


Tuhun tsaá tsa nacoog jutu mañi yo Jesucristo

tsi yo



New Testament in Mixtec, San Juan Colorado (MX:mjc:Mixtec,
San Juan Colorado)

**Tuhun tsaá tsa nacoó jutu mañi yo Jesucristo
tsi yo
New Testament in Mixtec, San Juan Colorado
(MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

c270ec54-172a-541f-83e6-7760f619c744

Contents

| | |
|-----------------------------|-----|
| San Mateo | 1 |
| Marcos | 83 |
| Lucas | 136 |
| Juan | 224 |
| Los Hechos | 287 |
| Romanos | 369 |
| I Corintios | 402 |
| II Corintios | 433 |
| Gálatas | 456 |
| Efesios | 468 |
| Filipenses | 479 |
| Colosenses | 488 |
| I Tesalonicenses | 496 |
| II Tesalonicenses | 503 |
| I Timoteo | 507 |
| II Timoteo | 517 |
| Tito | 524 |
| Filemón | 528 |
| Hebreos | 530 |
| Santiago | 555 |
| I San Pedro | 563 |
| II San Pedro | 573 |
| I San Juan | 579 |
| II San Juan | 587 |
| III San Juan | 589 |
| San Judas | 591 |
| El Apocalipsis | 594 |

Tuhun Nyoo Tsa Tyaa Ra Mateo

Nyivi ra Jesucristo tsa tsi-coo tsa ndi cumañi ca cacu ra (Lc. 3.23-38)

1 Ihya nyecú tandihi sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuv̄i tsi ra.

2 Sehe ra Abraham cuv̄i tsi ra Isaac, tan sehe ra Isaac cuv̄i tsi ra Jacob. Tan sehe ra Jacob cuv̄i tsi ra Judá tsihin tandihi ra yañi ra. 3 Tan ra Fares tsihin ra Zara sehe ra Judá tsihin ña Tamar cuv̄i tsi ra naha. Tan sehe ra Fares cuv̄i tsi ra Esrom, ra cuv̄i jutu ra Aram. 4 Tan sehe ra Aram cuv̄i tsi ra Aminadab, jutu ra Naasón. Tan sehe ra Naasón cuv̄i tsi ra Salmón. 5 Tan ra Booz, sehe ra Salmón tsihin ña Rahab cuv̄i tsi ra. Tan sehe ra Booz tsihin ña Rut cuv̄i tsi ra Obed, jutu ra Isaí. 6 Tan ra David, ra cuv̄i rey, sehe ra Isaí cuv̄i tsi ra. Tan sehe ra rey David tsihin ñaha tsa cuv̄i ñasihi ra Uriás cuv̄i tsi ra Salomón.

7 Tan sehe ra Salomón cuv̄i tsi ra Roboam, ra cuv̄i jutu ra Abías. Tan sehe ra Abías cuv̄i tsi ra Aza. 8 Tan sehe ra Aza cuv̄i tsi ra Josafat, ra cuv̄i jutu ra Joram. Tan sehe ra Joram cuv̄i tsi ra Uzías. 9 Tan sehe ra Uzías cuv̄i tsi ra Jotam, ra cuv̄i jutu ra Acaz. Tan sehe ra Acaz cuv̄i tsi ra Ezequías. 10 Tan sehe ra Ezequías cuv̄i tsi ra Manasés, ra cuv̄i jutu

ra Amón. Tan sehe ra Amón cuv̄i tsi ra Josías. 11 Tan sehe ra Josías cuv̄i tsi ra Jeconías tsihin tandihi ra yañi ra. Tsi-coo ra naha quivi tñin ra ñuu Babilonia naha ra tsi nyivi Israel, tsa cua cahun ñi cuv̄i ñi musu ra ñuu Babilonia can naha ra.

12 Tsa yaha can, tan tsicoo sehe ra Jeconías, tan ra ican cuv̄i ra Salatiel, jutu ra Zorobabel. 13 Tan sehe ra Zorobabel cuv̄i tsi ra Abiud, ra cuv̄i jutu ra Eliaquim. Tan sehe ra Eliaquim cuv̄i tsi ra Azor. 14 Tan sehe ra Azor cuv̄i tsi ra Sadoc, ra cuv̄i jutu ra Aquim. Tan sehe ra Aquim cuv̄i tsi ra Eliud. 15 Tan sehe ra Eliud cuv̄i tsi ra Eleazar, ra cuv̄i jutu ra Matán. Tan sehe ra Matán cuv̄i tsi ra Jacob. 16 Tan ra Jacob cuv̄i jutu ra José, yñi ña María. Juvín ña cuv̄i sihi ra Jesús ra cuv̄i Cristo, o cuñi tsi catyí, ra tsa jaquitsi Nyoo tyin quihí ndaha tsi yo.

17 Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tñin ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata ñi nda cuanda quivi cacu ra Cristo.

Nu cacu ra Jesucristo (Lc. 2.1-7)

18 Tyehen cuv̄i tan cacu ra Jesucristo: tsa yaha cunda yñi tsa cua tindaha ña María tsihin ra José. Tan tsa ndi cumañi ca naquihin ra tsi ña, ñihí sehe ña tsa cuenda Tatyí Ii Nyoo. 19 Tan ra José,

ra cua cuví yíi ña, vaha xaan iñi ra. Ña cuñi ra cuhva ra ticanuu tsi ña. Yacan cuenda tsicá iñi ra tsa nacao xeehe ra tsi ña tan ña cua tindaha ca ra tsihin ña. ²⁰ Tan tsitsi tsa tsicá iñi ra yacan, quituvi iin ángel Jutu Mañi yo nuu ra nu quixi ra. Tan nyehe ra ñumaahna, tan catyí ángel can tsihin ra:

—José, tata ra David, ña caca iñi un quihin un tsi ña María cuvi ña ñasihi un, tyin sehe ña tsa cua cacu, sehe Tatyí Ii Nyoo cuví tsi. ²¹ Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tsihin ra José.

²² Tacan cuví tyin tacan tan cundaa tsa cahan ra cuví ndusu yuhu Jutu Mañi yo tahanan tsanaha.

²³ Tan catyí ra tyehen:

Ñaha yoco tsa ñaha ca coo yíi, cua cahun sehe ña.

Tan cua coo iin sehe ña.
Tan cua cunañi ra:
Emanuel.

Tan sivi can cuñi tsi catyí: “Nyoo iyó ra tsihin yo.”

²⁴ Tan tsa ndoto ra José, javaha ra tumaa catyí ángel can tsihin ra. Quihin ra tsi ña María tyin cuvi ña ñasihi ra. ²⁵ Maa tyin ña quixi ra tsihin ña nda cuanda tsa yaha cacu sehe ña. Tan jacunañi ra tsi lee can: Jesús.

2

Nu cuahán ra tsitó xaan, ra cuví rey, cua nyehe ra naha nu cacu ra Jesús

¹ Cacū ra Jesús ñuu Belén tsa canyii nu cuví Judea. Tan quivi can ra cuví rey Judea nañi ra Herodes. Tacan tan tsaá juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuví ra naha. ² Tsicá tuhun ra naha tsi nyivi tan catyí ra naha:

—¿Nu maa nyii ra cuví rey cuenda nyivi Israel? Tyin ityi nu caná ñicanyii nyehe ndi tiñuu tsa tsahá cuenda tyin cacū ra ityi ihya. Tan vatsí ndi vatsí jacahnu ndi tsi ra —catyí ra naha.

³ Quivi tsa tsitó ra rey Herodes tsa cahan ra can naha ra, tuñu xaan cuñi ra cuví. Tacan tucu tandihi nyivi ñuu Jerusalén can. ⁴ Tacan tan cana ra Herodes tsi tandihi ra jutu tsa cuví ityi nuu tsihin ra cuví jutu tan tsihin tandihi ra cuví maestro cuenda ley vehe ñuhu naha ra. Tan tsicá tuhun ra tsi ra naha numaa nda taahán tsi cacu ra Cristo. ⁵ Tan nacahan ra can naha ra tan catyí ra naha:

—Ñuu Belén tsa canyii Judea, ndacan taahán tsi cacu ra tyin tyehen tyaa ra cuví ndusu yuhu Nyoo nu tutu tahanan tsanaha:

⁶ Tan yooho Belén ñavin iin ñuu luhlu ñi cuví un tsa nuu tandihi maa ñuu tsa cayucú Judá

tyin nuu yooho cua quita ra cua quihí ndaha tsi nyivi ñuu yu Israel. Maa ra cua jaha cuenda ra tsi ñi.

Tacan catyí nu tutu Nyoo, —catyí ra can naha ra tsihin ra Herodes.

⁷ Tacan tan cana xeehe ra Herodes tsi ra tsitó xaan can naha ra, tan tsicā tuhun ra tsi ra naha náa quivi tan náa hora quituvī tiñuu can. ⁸ Tacan tan jacuhun ra tsi ra naha nda ñuu Belén, tan catyí ra tsihin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatun nañihi ndo tsi ra, quitsi catyí tuhun ndo tsihin yu, tyin cuhun ndihi yu cujacahnu yu tsi ra —catyí ra Herodes tsihin ra naha.

⁹ Tsa tsiñi ra tsa tsitó xaan can naha ra tsa cahan ra Herodes, tan quihin ra naha ityi cuahán ra naha. Tan tiñuu tsa nyehe ra naha ityi nu caná ñicanyii can, cuahán tsi ityi nuu ra naha. Tan tsicuiñi tsi maa maa siqui nu canyií ra lee can. ¹⁰ Tan tsa nyehe ra tsitó xaan can naha ra tyin tsicuiñi tiñuu can, sii xaan cuñi ra naha. ¹¹ Tan quihvi ra naha tsitsi vehe nu canyií lee can. Tan nyehe ra naha tsi ra tsihin ña María, sihi ra. Tan tsicuiñi tsiti ra naha tyin jacahnu ra naha tsi lee can. Tacan tan nuña ra naha yuhu caja tsa ndahá ra naha. Tan tava ra naha regalo tsa cuví xuhun cuaan, tan cutu vixi, tan ndutya tami tsa nañi mirra. Tan tsaḥa ra naha tsi lee can. ¹² Tsa yaha tsa nyehe ra naha tsi ra Jesús tan cuanuhu ra naha. Tan tsa cuanuhu ra naha nyehe ra naha ñumaahna tan catyí tsi tyin ña taahán tsi cuhun ra

naha cucatyí tuhun ra naha tsihin ra Herodes. Yacan cuenda sñn ityi cuanuhu ra naha.

Nu tsinu xeehe ra José tan ña María tsihin lee sehe ñi nda Egipto

¹³ Tsa yaha cuahán ra tsa tsitó xaan can naha ra, tacan tan iin ángel Jutu Mañi yo quituvī nuu ra José tsitsi ñumaahna. Tan catyí ángel can tsihin ra:

—Nduvita, quihin tsi lee ihya, tsihin sihi ra, tan cuhun ndo nda ñuhu Egipto. Ndo ndo ndacan nda cuanda cahán nyico yu tsihin un. Tyin ra Herodes cua nanducu ra tsi ra lee ihya tyin cuñi ra cahñi ra tsi ra —catyí ángel can tsihin ra José.

¹⁴ Tacan tan nduvita ra José tsacuaa can. Tan quihin ra tsi lee can tsihin sihi tsi. Tan cuahán ñi nda Egipto. ¹⁵ Ndacan tsicoo ñi nda cuanda tsa tsihi ra Herodes. Tacan cuvī tyin cunda tsa cahan ra cuvī ndusu yuhu Jutu Mañi yo tahañ tsanaha jaha Nyoo. Tyehen catyí ra: “Nda Egipto cana yu tsi Sehe yu”, catyí ra.

Nu tava tyiñu ra Herodes na cahñi ra naha tsi ra nyihi

¹⁶ [Tsa ndi cumañi ca cúu ra Herodes tan ndi ndatú ra tsa quitsi nyico ra tsitó xaan can naha ra] tan tsa tuvī iñi ra Herodes tyin ra tsitó xaan can naha ra jandavi ñaha ra naha tsi ra, tan nduxaan xaan ra. Tan tava tyiñu ra na cahñi andaru tsi tandihi ra nyihi tsa iyó ñuu Belén can tan inga ñuu tsa

cayucú yatyin ñi, ra nyihi tsa ndi cacú nda cuanda ra nyihi tsa uvi cuiya. Tacan javaha ra tyin tsicá iñi ra tyin tacan cuiya ra Jesús tumaa catyi ra tsitó xaan can naha ra tsihin ra. ¹⁷Tacan cuvi tyin cundaa tsa cahān Nyoo tan tyaa ra Jeremías, ra cuvi ndusu yuhu ra tahān tsanaha. Tyaa ra tyehen:

¹⁸ Tsiñi yo iin ndusu ñuu Ramá, tsacú tsaa nyivi, tan iyo taahán ñi.

Juvin ñi nyivi cuvi tata ña Raquel, nyivi Israel, tsacú tsaa ñi tsa cuenda sehe ñi.

Maa tyin ña cuñi ñi tsa naquihin ndaahvi nyivi tsi ñi tyin tsa yaha tsihi sehe ñi, catyi tsi nu tutu Nyoo.

¹⁹ Maa tyin tsa yaha tsa tsihi ra Herodes, tacan tan quituvi nyico iin ángel Jutu Mañi yo nuu ra José nu quixi ra nda Egipto. Tan catyi ra tsihin ra:

²⁰ —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducu cahñi tsi ra lee ihya.

²¹ Tacan tan nduvita ra José, tan quihin ra tsi lee can tan tsihin sihi ra. Tan cuanuhu ñi nda Israel.

²² Maa tyin quivi tsito ra José tyin ra Arquelao, sehe ra Herodes, cuvi ra rey nda Judea, nayuhvi ra tan ña cuñi ra cahun ra ndacan. Tan cuanuhu ñi nda Galilea tyin tacan jacoto Nyoo tsi ra tsitsi ñumaahna. ²³ Tsa tsaa

ñi ican, tan cuahán ñi nda ñuu Nazaret, cua coo ñi. Tan ican tsicoo ñi. Tacan cuvi tyin cundaa tsa cahān ra cuvi ndusu yuhu Nyoo tahān tsanaha. Tyin catyi ra naha tyin ra Jesús ra ñuu Nazaret cua cuvi ra.

3

Nu cahān ra Juan tuhun Nyoo tsihin nyivi
(Mt. 1.1-8; Lc. 3.1-9, 15-17; Jn. 1.19-28)

¹ Quivi tsa ndi iyó ñi ñuu Nazaret, ra Juan, ra jacoondutyá tsi nyivi, cuahán ra nu tsiqui tsa iyó Judea. Tan quit-saha caahán ra tuhun Nyoo tsihin nyivi tsa tsaá nu nyii ra.

² Tan catyi ra:

—Ndu uvi iñi ndo cuatyí ndo tyin tsa cuñi tsaa quivi cundaca ñaha Nyoo tsi yo.

³ Juvin ra Juan cuvi ra tsa cahān ra Isaías ra cuvi ndusu yuhu Nyoo tahān tsanaha. Tan tyaa ra tsa tsaha Nyoo tsi ra tyehen:

Cua tyaa soho yo ndusu ra nu caná tsaa ra nu tsiqui tan catyi ra:

“Nuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyi tuhun tsa tyaa ra Isaías.

⁴ Tan ra Juan nditsi ra jahma tsinu tsihin ixi camellu. Tan cinturón ra, ñi cuvi tsi. Tan tica xama tsatsi ra tan tsihi ra ndutya ñuñu.

⁵ Quitsi nyivi ñuu Jerusalén tan tandihi ñuu tsa cayucú Judea, tan nyivi tsa iyó yatyin ñi ityi yutya cahnu Jordán

can; quitsj tyaa soho ñi tuhun caahán ra. ⁶ Tan tsa yaha nahma ñi cuatyí ñi, ra Juan jacoondutyá ra tsi ñi yutya cahnu Jordán ican.

⁷ Maa tyin nyehe ra Juan tyin cuaha xaan ra fariseo, ra tsa tyaa yahvi xaan ley vehe ñuhu, tan cuaha xaan ra saduceo, quitsj ra naha tyin coondutyá ra naha. Tan catyí ra tsihin ra naha:

—¡Nyooho, tumaa tata coo xaan cuví ndo! ¿A cuñí maa ndo tyin tsihin tsa coondutyá ñi ndo tan ña cua tatsi tuñi ca Nyoo tsi ndo? Ña cuví. ⁸ Nasama ndo cuhva iyó ndo, na nyehe yo tyin tsa ndu uvj iñi ndo cuatyí ndo nuu Nyoo. ⁹ Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tsihin yuu ihya, Nyoo cuví jananduvi ra nyivi ra Abraham. ¹⁰ Tsa ndatú yatsa Nyoo tsi tandihi ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua javaha Nyoo tsihin ndo —catyí ra Juan—. ¹¹ Tsa nditsa tyin yuhu jacoondutyá yu tsi nyivi tsihin ndutyá, tan cuví tsi iin seña tyin tsa ndu uvj iñi ñi cuatyí ñi. Maa tyin tsa yaha jacoondutyá yu tsi ñi tsihin ndutyá, vatsí inga ra cua jacoondutyá tsi ñi tsihin Tatyí Ii Nyoo tan tsihin ñuhu ihñi. Iyó ca tunyee iñi Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra. ¹² Tan ra ican ndahá

ra pala tyin cua jandava ra trigu. Cua tava sñin ra trigu vaha, tan cua natyihi vaha ra itsi. Tan cua cahmi ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan.

*Nu tsicoondutyá ra Jesús
(Mr. 1.9-11; Lc. 3.21-22)*

¹³ Tacan tan quita ra Jesús Galilea tan tsaá ra yutya cahnu Jordán nu nyii ra Juan, tyin cuñí ra tsa jacoondutyá ra Juan tsi ra. ¹⁴ Tsa jihna ñi ña cuñí ra Juan jacoondutyá ra tsi ra, tan quitsaha catyí ra tsihin ra:

—Cuñí un tsa jacoondutyá yu tsi un, maa tyin ña taahán tsi tsa jacoondutyá yu tsi un. Maa un taahán tsi jacoondutyá tsi yu —catyí ra.

¹⁵ Maa tyin ra Jesús catyí ra tsihin ra:

—Tsa vityin, na cuvi tsi cuhva catyí yu tsihin un. Tyin cuñí tsi tsa javaha yo tandihi tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

¹⁶ Tsa yaha tsicoondutyá ra Jesús tan quita ra tsitsi ndutyá. Tan nuña andivi, tan ra Jesús nyehe ra vatsi nuú Tatyí Ii Nyoo, tumaa iin paloma. Tan tsaá tsi siqui ra. ¹⁷ Tacan tan cahan iin ndusu ityi andivi, tan catyí tsi tye-hen:

—Ra ihya cuví Sehe yu, tan cuñí xaan yu tsi ra. Tan sñi xaan cuñí yu tsihin ra —catyí ndusu can.

4

Nu nducu cuhva nu ña vaha tsi ra Jesús

(Mr. 1.12-13; Lc. 4.1-13)

¹ Tacan tan tsindacā Tatyí Ii Nyoo tsi ra Jesús iin nu tsiqui, tyin cua nducu cuhva nu ña vaha tsi ra.

² Tsicoo nyitya ra uvi xico nduvi tan uvi xico tsacuaa. Tsa yahā can tan quitsi socó tsi ra. ³ Tacan tan natuhva nu ña vaha nu nyaá ra, tyin cuñi nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahan tsihin yuu ihya, na nanduvi tsi paan —catyí nu ña vaha tsihin ra Jesús.

⁴ Maa tyin ra Jesús nacahan ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihi tuhun caahan Nyoo” —catyí ra Jesús tsihin nu ña vaha.

⁵ Tacan tan quihin nu ña vaha tsi ra. Tan cuahán ra tsihin nu nda ñuu ii Jerusalén. Tan jandaā nu tsi ra jiñi vehe ñuhu cahnu. ⁶ Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuando nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un. Cua janahndi ra naha tsi un, tan ña cua nañi tsaha un nuu yuu.

⁷ Tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

⁸ Tacan tan quihin nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janahā nu tandihi tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi. ⁹ Tan catyí nu tsihin ra:

—Yuhu cuhva yu tandihi maa tsa janahā yu tsi un, tatun yooho tan cuiñi tsiti un nuu yu tan jacahnu un tsi yu.

¹⁰ Tacan tan nacahan ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

¹¹ Tacan tan cuahán nu ña vaha, tan ndoo ra Jesús. Tan tsaā ángel tan jatyinyee ra naha tsi ra.

Nu quitsaha caahan ra Jesús tuhun Nyoo tsihin nyivi tsa iyó ñuu tsa cayucú Galilea
(Mr. 1.14-15; Lc. 4.14-15)

¹² Quivi tsa tsito ra Jesús tyin ra Juan nyii ra vehe caa, cuahán ra nda Galilea.

¹³ Maa tyin ña ndoo ra ñuu Nazaret, nu tsahnū ra. Cuahán ra cua coo ra nda ñuu Capernaum, iin ñuu tsa canyí yatyin ñi yuhu miñi, nu ñuhu ra Neftalí yatyin ñuhu ra Zabulón. ¹⁴ Tacan tan cundaā tsa cahan ra Isaías, ra cuví ndusu yuhu Nyoo, tahan tsanaha. Tan catyí ra:

15 Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán,

tsa cuví Galilea nu iyó nyívi tsa ñavin nyívi Israel cuví.

16 Nyívi iyó nu naa, ñi iyó nu iyó tixahñu tuhun tsihi,

nyehé ñi iin ñuhũ nditsin tsa jandunditsín nu yucú ñi, catyí ra Isaías.

17 Nda cuanda quívi can, tan quitsahã caahán ra Jesús tuhun Nyoo tsihin nyívi, tan catyí ra tsihin ñi:

—Ndu uvi iñi ndo cuatyí ndo tyin tsa cuñí tsa quívi cundaca ñaha Nyoo tsi ndo —catyí ra Jesús tsihin nyívi.

Nu canã ra Jesús tsi cumi taahan ra tsa tñn tyaca

(Mr. 1.16-20; Lc. 5.1-11)

18 Ra Jesús tsicá ra yuhu miñi tsa nañí Nduya Ñuhu Galilea. Tan nyehẽ ra tsi uvi taahan ra tsihin yañi ra, ra Simón tsa nañí tucu Pedro, tan ra Andrés. Ra tñn tyaca cuví ra naha. Tan cañí ra naha traya ra naha nu ndutya. 19 Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tñn ndo tyaca, tacan cua ñihi ndo nyívi cua cuví nyívi Nyoo —catyí ra Jesús tsihin ra naha.

20 Juvín ñi cuhva can nacoq ra naha traya can, tan cuahán ra naha tsihin ra Jesús.

21 Luxu ñi tsicã ra naha ityi nuu, tan nyehẽ ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan canã ra Jesús tsi ra naha.

22 Juvín ñi cuhva can tan nacoq ra naha tsi jutu ra naha tan yutun ndoo can, tan cuahán ra naha tsihin ra.

Nu cuaha xaan nyívi jacuahã ra Jesús

(Lc. 6.17-19)

23 Cuahán ra Jesús tsicá ra tandihí ñuu cuenda Galilea jacuahá ra tsi nyívi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahã ra tsi nyívi cuuhví tsihin tandihí ñi nuu cuehe tsa yihí tsi ñi.

24 Tacan tan tsito tandihí nyívi ñuu cuenda Siria tuhun ra Jesús. Tan tsindacã ñi tandihí nyívi cuuhví tsi ra: juhva ñi yihí tatyí ña vaha. Tan yihí ñi tsihi naaha ñi. Tan yihí ñi ndohó ñi cuehe xii. Tan janduvahã ra Jesús tsi tandihí ñi. 25 Cuaha xaan nyívi nyicún tsi ra Jesús: nyívi iyó ñuu tsa cayucú Galilea, nyívi tsa queq nu utsi taahan ñuu tsa nañí Decápolis, nyívi iyó ñuu Jerusalén tan tandihí ca ñuu tsa cayucú Judea, tan nyívi iyó inga tsiyo yutya cahnu Jordán.

5

Nu cahãn ra Jesús tsihin

nyivi nu tsiqui
(Lc. 6.20-23)

¹ Nyehe ra Jesús tyin cuaha xaan nyivi, tan ndaa ra iin nuu yucu. Tan tsicunyaꝯa ra ican. Tacan tan nyivi tsicá tsihin ra, tsinunduví ñi tsi ra.
² Tacan tan quitsaha jacuahá ra tsi ñi tan catyí ra:

³ Nasocó Nyoo tsi tandihi nyivi tsa tsitó tyin tsiñí ñuhu ra tsi ñi, tan tsa cuenda ñi cuví nu ndacá ñaha ra.

⁴ 'Tan tandihi nyivi tsa cuihya cuñí tsa cuenda cuatyí ñi, nasocó Nyoo tsi ñi tan ña cua coo ca ñi tucuihya iñi.

⁵ 'Tan tandihi nyivi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayivi tsa catyí Nyoo tyin cuhva ra tsi ñi.

⁶ 'Tan tandihi nyivi tsa cuñí xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuví javaha ñi cuhva cuñí maa ra.

⁷ 'Tan tandihi nyivi tsa cundaahví iñi tsi inga nyivi, nasocó Nyoo tsi ñi, tan cua cundaahvi iñi ra tsi ñi.

⁸ 'Tan tandihi nyivi tsa janduvahá Nyoo aña, nasocó ra tsi ñi, tan cua nyehe ñi tsi ra.

⁹ 'Tan nyivi tsa nducú cuhva tsa coo vaha nyivi tsihin Nyoo tan tsihin inga nyivi, nasocó ra tsi ñi tan cua catyí ra tyin sehe ra cuví tsi ñi.

¹⁰ 'Tan tandihi nyivi tsa javahá cuhva cuñí Nyoo tan ndasi cuñí nyivi nyehe ñi tsi ñi, nasocó Nyoo tsi ñi, tan

tsa cuenda ñi cuví nu ndacá ñaha ra. ¹¹ 'Nasocó Nyoo tsi nyooho tsa caahán nyivi ndavaha ñi tsata, tan javahá ñi tsa uhvi tsi ndo, tan caahán ñi cuendu tsa ña nditsa siqui ndo tsa cuenda tsa tsinú iñi ndo tsi yu. ¹² Cusi iñi ndo tun tacan javahá nyivi tsihin ndo; si cuñi ndo, tyin cahnu xaan tan si xaan caá tsa cua ñihi ndo nda gloria. Tyin juvin ñi tacan javahá nyivi tsa ña vaha tsihin tandihi ra cuví ndusu yuhu Nyoo tahañ tsanaha.

Tatun jandihí yo tsa tsinú iñi yo tsi Nyoo cuví yo tumaa ñi tsa ndihí tsa uhva
(Mr. 9.50; Lc. 14.34-35)

¹³ 'Nyooho tsa tsinú iñi tsi yu, tumaa ñi vaha cuví ndo. Maa tyin tatun ñi, tan ndihí tsa uhva tsi, ña cua jandu uhva ca tsi tsa catsi yo. Ña vaha ca ñi can. Tacan tan javita yo can, tan cuañi nyivi tsata can.

Tatun tyaá yahvi vaha yo tuhun caahán Nyoo, cuví yo tumaa ñuhu tsa jandunditsín nu tsicá nyivi nu naa

¹⁴ 'Nyooho cuví ndo tumaa ñuhu tsa jandunditsín nu tsicá nyivi. Iin ñuu tsa canyí jñi iin yucu, ña cua cuví quihí xeehe tsi. ¹⁵ Ña tuhvá yo tyaá ñuhu tyuma, tan tyihí xeehe yo itsi tsitsi iin caja. Tyin tuhvá yo tyaá ñuhu tan tinyí yo itsi iin nu sucun tyin tacan tan jandunditsin tsi nu yucú yo tsitsi vehe yo. ¹⁶ Tan tacan taahán tsi jandunditsin tucu nyooho tsihin ñuhu Nyoo tsa iyó aña ndo nu tsicá nyivi. Tacan tan nyehe ñi tsa vaha

tsa javahá ndo, tan jacahnu ñi tsi Jutu yo Nyoo, ra nyaá gloria.

Nu jacuaha ra Jesús tyin ñiñi xaan javaha yo tandihi tuhun tsa tsaha Nyoo tsi yo tan jacuaha yo itsi tsi nyivi

¹⁷ Ña cuñi ndo tyin yuhu vatsí janaa yu ley tsa tsaha Nyoo tsi ra Moisés tyin tyaa ra. Tan ndi ña vatsí janaa yu tuhun tsa tyaa tandihi ra cuví ndusu yuhu Nyoo tahañ tsanaha. Ñavin tyiñu can vatsí yu. Yuhu vatsí yu vatsí tyaa yahvi yu tsa caahán ley can, tan catyi tuhun yu tsihin ndo náa cuñi tsi catyi ley can. ¹⁸ Tsa nditsa catyi yu tsihin ndo tyin tsitsi tsa ndi iyó ñuhu ñayivi tan andivi, ña cua naa ndi luxu ley tsa tyaa ra Moisés tyin tandihi maa tsa tyaa ra naha tan cua cundaa tsi. ¹⁹ Yacan cuenda, ra tsa ña tyaá yahvi cuhva catyi Nyoo, vasu iin tsa luhlu ñi; tan janahá ra tsi nyivi na javaha ñi tacan, luxu cuii ñi cua cuvi ra nu ndacá ñaha Nyoo. Maa tyin ra tsa tyaá yahvi tandihi, tan janahá ra tsi inga nyivi, cahnu xaan cua cuvi ra nu ndacá ñaha Nyoo. ²⁰ Catyi yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuvi quihvi ndo nu ndacá ñaha Nyoo.

Nu caahán ra Jesús tsihin yo tyin ña taahán tsi cahan yo tsi nyivi

²¹ Nyooho tsa cuaha tsaha tsiñi ndo tsa catyi Nyoo tsihin nyivi tsicoo tahañ tsanaha. Catyi ra: “Ña cahñi ndo tsi nyivi, tyin tatun cahñi ndo nyivi, taahán tsi tsa cutuñi ndo.” ²² Maa tyin yuhu, catyi yu tsihin ndo, tyin vasu tsa cuxaán ñi ndo tsi iin nyivi, vasu tsa caahán nyaá ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyi ndo tyin soho xaan caá ñi, taahán tsi cahun ndo anyaya tsa cuenda cuatyí can.

²³ Tan yacan cuenda quivi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javaha un tsi yañi un, ²⁴ nacoo tsa cuahán tsihin un ityi nu altar vehe ñuhu. Tan cahun jihna un ndacan un tucahun iñi tsi yañi un. Tacan tan cahun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

²⁵ Tatun iin ra tsicán cuatyí tsaha un, tan cuahán un tsihin ra nda nu nyaá ra cumi tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumi tyiñu, tyin ra cumi tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihi ra naha tsi un vehe caa. ²⁶ Tan tsa nditsa catyi yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihi xuhun tsa cua ndacan

ra naha.

Nu caahán ra Jesús tyin ndi tsa tsicá iñi yo tsa coo inga ñaha, o inga rayi tsi yo, tan ña vaha

²⁷ Nyooho tsa tsiñi ndo tyin catyi Nyoo tañan tsanaha tyin nyooho tsa iyó ñasihi, ña cua coo inga ñaha tsi ndo, tan ndi ñaha tsa iyó yi tan ña taahán tsi coo inga rayi tsi ña. ²⁸ Maa tyin yuhu catyi yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsicoo cuatyí ndo.

²⁹ Tatun tinuu cuaha un janacavá tsi un tsitsi cuatyí, vaha taxin ca tava un tinuu un tan javita un can. Tyin vaha ca quihvi un nu ndacá ñaha Nyoo tsihin intuhun ñi tinuu un, tan ñavin ca tsa cuhun un anyaya tsihin nduvi taahan tsi. ³⁰ O tatun iin ndaha un janacavá tsi un tsitsi cuatyí, vaha taxin ca cahnya un ndaha un tan javita un can. Tyin vaha ca tsa quihvi un nu ndacá ñaha Nyoo tsihin tsa lundu ndaha un, tan ñavin ca tsa nan un tan cuhun un anyaya.

Nu caahán ra Jesús tyin ña vaha tsa nacoo ihñi rayi tsi ñasihi ra

(Mt. 19.9; Mr. 10.11-12; Lc. 16.18)

³¹ Tan juvin ñi catyi Nyoo tsihin nyivi tsicoo tañan tsanaha tyin yoo ra nacoo ihñi ñasihi ra, cuñi tsi tsa cani ra tutu tsa tindaha ra tsihin ña. ³² Maa tyin catyi yu tsihin ndo tyin nduve ndatu iyó tsi rayi tsa nacoo ra ñasihi

ra tatun ña quituvi ña tsihin inga rayi. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayi cua coo ndihi cuatyí ña. Tan tacan ra tsa cua quihin tsi ña cua coo ndihi cuatyí ra.

Ña cahan yo "naha Nyoo maa"

³³ Tan tsiñi ndihi ndo, tyin catyi tucu Nyoo tsihin nyivi tsicoo tañan tsanaha: "Tatun catyi ndo 'naha Nyoo maa' tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo."

³⁴ Maa tyin yuhu catyi yu tsihin ndo tyin ña cahan ndo "naha Nyoo maa". Tan ña cahan ndo tuhun andivi, tyin yacan cuvi nu nyaá Nyoo.

³⁵ Tan ndi tuhun ñuhu ñayivi ihya ña cahan ndo, tyin ihya cuvi nu tsañi Nyoo. Tan ndi ña cahan ndo tuhun ñuu Jerusalén, tyin ican cuvi ñuu maa Nyoo tsa cuvi ra Rey cahnu ca. ³⁶ Tan ndi ña cahan ndo tuhun jiñi ndo, tyin ña cuvi janducuitsin ndo tan ndi tsa jandutuun ndo ndi intuhun ixi jiñi ndo. ³⁷ Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyi ndo "naha Nyoo maa" nu ña vaha jacahán tsi ndo tsa cahan ndo tacan.

Nu caahán ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi

(Lc. 6.29-30)

38 Tan tsiñi tucu ndo tsa catyi Nyoo tahañ tsanaha: “Tatun cañi nyivi tsi ndo, tan tavañi iin nuhu ndo, o iin tinuu ndo, taahán tsi tyin javaha ndihí ra cumi tyiñu tacan tsihin ñi, tumaa tsa javahá ñi tsihin ndo.” 39 Maa tyin yuhu catyi yu tsihin ndo, tyin ña javaha ndo tsa ña vaha tsa javahá nyivi xaan cuñi nyehe tsi ndo. Tyin tun yoo cañi iin tsiyo nuu ndo, taahán tsi tsa cuhva ndihí ndo inga tsiyo na cañi ndihí ñi, tan ña cuxaan ndo tsi ñi. 40 O tatun tsicán ñi cuatyí tsaha ndo, tan cuñi ñi quihin nyaa ñi iin camisa ndo. Taahán tsi cuhva ndihí ndo chamarra ndo tsi ñi tan ña cua cuxaan ndo tsi ñi. 41 O tatun yoo cuñi cundaca ndo ndaha tyiñu ñi iin kilómetro, taahán tsi cundaca ndo can uvi kilómetro. 42 Tatun yoo nyivi tsicán tumañi iñi tsi ndo, cuhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

Na cuñi yo tsi nyivi xaan iñi tsi yo

(Lc. 6.27-28, 32-36)

43 “Tan tsiñi tucu ndo tyin catyi Nyoo tahañ tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.” 44 Maa tyin yuhu catyi yu tsihin ndo, cuñi ndo tsi nyivi xaan iñi tsi ndo. Tan javaha ndo tsa vaha tsihin nyivi caahán tsi ndo, tan tsi nyivi ña cuñi nyehe tsi ndo. Tan ndacan tahvi ndo tsi Nyoo tsa cuenda nyivi tsa caahán nyaa tsi ndo tan

tsa cuenda ñi tsa jacuvi tsa uhvi tsi ndo. 45 Tatun javahá ndo tacan, cuví ndo sehe Jutu yo ra nyaá gloria. Tyin maa ra jacañá ra ñicanyii, tan jacuún ra savi nuu tyiñu jahá nyivi vaha tan nyivi ña vaha. 46 Tatun nyoocho tan cuñi ndo tsi nyivi vaha iñi tsi ndo tan ndasi cuñi ndo nyehe ndo tsi nyivi xaan iñi tsi ndo, nduve tsa vaha cua ñihi ndo. Tyin juvin ñi tacan javahá tucu ra tavañ xuhun cuenda ra ndacá ñaha nda ñuu Roma. Tan cuñi maa ndo tyin quiñi xaan iyó ra can naha ra. 47 Tatun tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyivi, nduve tsa vaha xaan javahá ndo. Tyin juvin ñi tacan javahá nyivi tsa ña tsitó tuhun Nyoo. 48 Tumaa Jutu yo tsa nyaá gloria cuiti xaan iyó ra, tacan taahán tsi coo tucu nyoocho.

6

Nu caahán ra Jesús nácaa javaha yo tumañi iñi

1 ‘Jaha ndo cuenda tan ña nduyaa ndo náa tumañi iñi javaha ndo tsi nyivi. Tyin tatun javaha ndo tumañi iñi tyin nyehe nyivi, Jutu yo, ra nyaá gloria, nduve náa cua cuhva ra tsi ndo. 2 Tun cua javaha ndo tumañi iñi, ña cua jacoto ndo tsi inga nyivi tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na

catyi nyiví tyin vaha xaan iñi ra naha. Yacan ñi ñihí ra can naha ra, tan nduve náa cua cuhva Nyoo tsi ra naha. ³ Yacan cuenda quiví javahá ndo tumañi iñi tsi nyiví ndaahvi, ña jacoto ndo ndi tsi ra tsa vaha xaan ca iñi tsi ndo. ⁴ Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

Nu caahán ra Jesús nácaa ndacan tahvi yo tsi Jutu yo Nyoo

(Lc. 11.2-4)

⁵ Tatun cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyiví, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyiví tyin vaha xaan ra naha. Tsa nditsa catyí yu tsihin ndo tyin yacan ñi ñihí ra naha. ⁶ Maa tyin nyoooho quiví tsa ndacan tahvi ndo tsi Nyoo, ña ndacan tahvi ndo tsi ra nu nyehe nyiví tsi ndo. Quíhvi ndo tsitsi vehe ndo tan nacasi ndo yuvehe ndo tan ndācan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyiví. Tan cua cuhva ra tsa vaha tsi ndo.

⁷ Tatun cua cahan ndo tsihin Nyoo, ñavin juvin ñi tuhun tsa nduve yahvi nyaa cahan ndo. Tacan javahá

nyiví tsa ña tsitó tsi Nyoo. Cuñí maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yahá cahan ñi. ⁸ Ña javaha ndo tacan. Tyin Nyoo tsa tsitó ra náa tsiñí ñuhu tsi ndo tsa ndi cumañi ca ndacan ndo tsi ra. ⁹ Yacan cuenda nyoooho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

¹⁰ Na quitsi tsa ndaca ñaha un nu ñuhu ñayiví ihya,

tan na javaha tandihí nyiví tandihí cuhva cuñí maa un, tumaa cuví nda gloria.

¹¹ Cuhva tsa catsi ndi tahan tahan quiví.

¹² Jaha tucahnu iñi tsi ndi náa tsa ña vaha javahá ndi, tumaa tsa jahá maa ndi tucahnu iñi tsi nyiví tsa javahá tsa ña vaha tsi ndi.

¹³ Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihí tunyee iñi tsi un. Tan taahán tsi tyin jacahnu tandihí nyiví tsi maa ñi un tandihí maa quiví tan na ña cundihí tsi. Na cuvi tsi tacan ñi.

Tyehen taahán tsi ndacan tahvi ndo tsi Nyoo.

¹⁴ 'Tyin tatun nyooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo. ¹⁵ Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyí ra Jesús.

Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi

¹⁶ Tan catyí tucu ra Jesús tsihin nyivi:

—Quivi tsa iyó nyitya ndo tyin nanducú ndo tsi Nyoo, ña cuihya nyehe ndo, tumaa javahá nyivi jahá tyin vaha xaan ñi. Tyin cahyí ñi nya nuu ñi tyin cuñi ñi tsa nyehe nyivi tyin iyó nyitya ñi tan nanducú ñi tsi Nyoo. Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi. ¹⁷ Maa tyin nyooho quiivi tsa iyó nyitya ndo tyin nanducú ndo tsi Nyoo, nacatya ndo nuu ndo. Tan tyihí ndo cuca jiñi ndo. ¹⁸ Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

Tsa vaha tsa iyó nda gloria
(Lc. 12.33-34)

¹⁹ 'Ña jacaya ndo tsa cuca tsa iyó nu ñuhu ñayivi ihya. Tyin coto tivi tsi jaha tiquixin o jaha cuxi. O cuví quihvi

ñasuhu, tan suhu nu tandihí tsa jacaya ndo. ²⁰ Vaha ca jacaya ndo tsa cuca tsa iyó nda gloria. Tyin ña cua cundihí tsi ndacan. Tyin ña cuvi tivi tsi ndacan, tan nduve quití jativi itsi, ndi nduve ñasuhu. ²¹ Tyin nu natyihí vaha ndo tsa cuca, ican cua cunyaa ndihí añima ndo.

Nu caahán ra Jesús tyin na jaha yo cuenda ñuhu nditsin tsa tyihí ra añima yo

(Lc. 11.34-36)

²² 'Tinnuu ndo cuví ñuhu nditsin tsi ndo. Tatun vaha tinuu ndo, tanñi cuñu ñuhu ndo tan iyó ñuhu nditsin. [Tan tuhun ihya cuñi tsi catyí tyin tatun iyó ñuhu nditsin Nyoo añima ndo cuví ndo nyivi vaha.] ²³ Maa tyin tatun ña vaha tinuu ndo, tandihí cuñu ñuhu ndo tan nyií tsi nu naa. Tan tacan tucu tatun nduve ñuhu Nyoo iyó añima ndo, [cuví ndo tumaa iin ra cuaa. Nu naa cuahán ndo tan ña cuví nyehe ndo ityi vaha tsa cuahán nu nyaá Nyoo].

Nu caahán ra Jesús tyin ña cuvi tyaa yahvi yo tsi Nyoo tatun cuñi xaan ca yo xuhun

(Lc. 16.13)

²⁴ 'Iin musu ña cuví coo uvi tsitoho ra. Tyin musu can cuñi ca ra tsi iin ra tan ñavin ca tsi inga ra. Tan tyaa yahvi ra tsi iin ra, tan ñavin ca tsi inga ra. Tan tacan tucu nyooho, ña cuví cuñi ndo tsi Nyoo, tan cuñi tucu ndo xuhun.

Nu caahán ra Jesús tyin ña caca xaan iñi yo náa ndihi tsa tsiñi ñuhu tsi yo

(Lc. 12.22-31)

25 'Yacan cuenda catyí yu tsihin ndo, tyin ña caca xaan iñi ndo nácaa ñihi ndo tsa catsi ndo tan tsa coho ndo. Ndi ña caca iñi ndo nácaa cua ñihi ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña yii cuhva ra inga tsa tsiñi ñuhu tsi yo].

26 Nyehe ndo cuhva iyó saa. Ña tatsí ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti tyin Jutu yo Nyoo ra nyaá gloria tsahá ra tsa catsi ti naha ti, Tan nuu Nyoo cahnu ca cuví nyooho tan ñavin ca saa can naha ti. 27 Tan vasu ndi maa tsicá xaan iñi ndo maa tyin ña cua cuví jandusucun ca ndo ndi luxu ca tsi ndo.

28 'Tan tatun ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi cuhu, tyin ña jahá tyiñu tun tan ndi ña tavi tun yuhva. 29 Maa tyin catyí yu tsihin ndo tyin ndi ra cuví rey Salomón tsihin tandihi tsa cuca ra, tan ña tsinditsi ra jahma sii ca caá tan ñavin ca tsa jacunditsí Nyoo tsi yutun ita can. 30 Tatun tacan ñi jacunditsí Nyoo tsi yutun ita tsa iyó tsitsi cuhu vityin, tan tyaan cua cuví tun nducu tan cayu tun. ¿A ña cua jatyinyee cuaha

ca ra tsi ndo? Tyin nyooho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra. 31 Yacan cuenda ña cua caca xaan iñi yo tan catyí yo: "¿Náa cua catsi yo, o náa cua coho yo, o nácaa cua ñihi yo jahma cunditsi yo?" 32 Tyin nyivi tsa ña tsitó tsi Nyoo tsicá xaan iñi ñi yacan. Maa tyin nyooho ña caca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsiñi ñuhu tsi ndo. 33 Yacan cuenda, caca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsiñi ñuhu tsi ndo. 34 Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñi ñuhu tsi ndo ityaan. Caca iñi ndo tan nyehe ndo nácaa yahá ndo quivi vityin jahá Nyoo.

7

Ña cahan yo tsa caá inga nyivi

(Lc. 6.37-38, 41-42)

1 Ña cahan ndo tsa caá inga nyivi, tacan tan Nyoo ña cua cahan ra tsa caá ndo. 2 Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juvin ñi tacan cua javaha Nyoo tsihin ndo. 3 ¿Nácaa tyin nyehé un tsahan luhlu tsa nyii tinuu yañi un,

tan ña jahá un cuenda yutun cahnu tsa nyíí tinuu maa un? ⁴ Tatun tinuu maa un nyíí iin yutun cahnu, ¿nácaa cuví catyi un tsihin ra yañi un: “Naha, na tava yu tsahan luhlu tsa nyíí tinuu un?” ⁵ ¡Yooho tsa jahá tyin vaha xaan un! Tava jihna yutun cahnu tsa nyíí tinuu un. Tyin tacan tan cuvi nyehe vaha un tsahan luhlu tsa cua tava un tinuu yañi un.

⁶ Ña jañihi ndo cahan ndo tuhun Nyoo tsihin nyivi ña cuñí coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo
(Lc. 11.9-13; 6.31)

⁷ Ndacan ndo tsa tsiñí ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña. ⁸ Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

⁹ Tacan tucu nyooho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi? ¹⁰ O tatun tsicán tsi tyaca, ¿a cua cuhva ndo iin coo itsi? ¹¹ Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa

vaha tsi sehe ndo. Tan vihi ca maa Jutu yo, ra nyaá gloriá, cuaha ca tsa vaha cua cuhva ra tsi ndo tatun ndacan ndo tsi ra.

¹² Tumaa cuñí ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsaha Nyoo tsi ra Moisés tan tacan tucu nyaá nu tandihi libru tsa tyaa ra cuvi ndusu yuhu Nyoo tahañ tsanaha.

Yuvehe tihin tan ityi cuiñi tsa cuahán nu nyaá Nyoo
(Lc. 13.24)

¹³ Nducu ndo cuhva quihvi ndo yuvehe tihin. Tyin quiihin yuvehe, tan quiihin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can. ¹⁴ Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihí ityi can.

Tsihin tsa javahá nyivi, tan nacotó yo tatun nyivi vaha, a nyivi ña vaha cuví ñi
(Lc. 6.43-44)

¹⁵ Jaha ndo cuenda tsi ndo tsihin ra vatya naha ra. Tyin catyi ra naha tyin ndusu yuhu Nyoo cuví ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quiñi xaan cuví ra naha. ¹⁶ Nyooho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra

naha. Tyin iin tinyata ña cua cuhva tun mangu, tan ndi iñu nduhva ña cuvi cuhva tsi yucu vixi. ¹⁷ Tan tacan tucu tandihí yutun vaha. Tsháhá tun tsítí vaha. Tan tandihí yutun ña vaha, tsháhá tun tsítí ña vaha. ¹⁸ Tyin yutun vaha, ña cuví cuhva tun tsítí ña vaha. Tan ndi yutun ña vaha ña cuví cuhva tun tsítí vaha. ¹⁹ Tan tandihí yutun tsa ña tsháhá tsítí vaha, cahnya yo tsi tun. Tan cayu tun. ²⁰ Tan tacan tsihin tsa javahá nyívi, cuví nacoto ndo tsi ñi tatun nyívi vaha o nyívi ña vaha cuví ñi.

Nu catyí ra Jesús tyin ña tandihí nyívi tan cua quihví ñi nu ndacá ñaha Nyoo
(Lc. 13.25-27)

²¹ Ña tandihí nyívi tsa catyí tsihin yu: “Jutu Mañi yu, Jutu Mañi yu”, cua quihví ñi nu ndacá ñaha Nyoo nda gloriá. Maa tyin nyívi tsa javahá tsa catyí maa Nyoo Jutu yu, juvin ñi can cua quihví nu ndacá ñaha ra. ²² Quívi tatsi tuñi Nyoo tsi nyívi, cuaha xaan ñi cua catyí ñi tsihin yu tye-hen: “Jutu Mañi yu, nyuhu cahán ndi tuhun cun tsihin nyívi. Tan tsihin sívi un tava ndi tatyí ña vaha tsa yihí tsi ñi. Tan cuaha xaan tsa iyo javahá ndi tsihin sívi un”, cua catyí ñi tsihin yu. ²³ Tacan tan yuhu cua catyí yu tsihin ñi: “Ña nacotó yu tsi nyooho. Çatsiyo nyaha ndo nu nyaá yu tandihí nyooho tsa javahá maa maa ñi tsa ña vaha”, cua catyí yu tsihin ñi.

Nu caahán ra Jesús nácaa cua cacu nyívi tsa tyaá yahvi tuhun caahán ra, tan nyívi tsa ña tyaá yahvi tsa caahán ra, ña cua cacu ñi

(Lc. 6.47-49; Mr. 1.22)

²⁴ Tacan catyí yu tsihin ndo, tyin nyívi tsa tsiñí tsa caahán yu tan javahá ñi cuhva cuñí yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava. ²⁵ Tan quitsahá cuún ñihi savi. Tan cuaha xaan ndutya ñuhu yahá tsata vehe can. Tan ñihi xaan quitsahá yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava. ²⁶ Maa tyin nyívi tsa tsiñí tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahá vehe nu nyiti. ²⁷ Tan quitsahá cuún ñihi savi. Tan cuaha xaan ndutya ñuhu yahá nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduva tsi tan cunaá tsi —catyí ra Jesús tsihin ñi tsa nyicún tsi ra.

²⁸ Cuhva tsa ndihí cahán ra Jesús tsihin ñi, iyo xaan cuñí ñi tsihin tsa caahán ra, ²⁹ tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

8

Nu janduvahá ra Jesús tsi iin ra ndohó cuehe tyaahyú
(Mr. 1.40-45; Lc. 5.12-16)

¹ Cuhva tsa nuú ra Jesús yucu can, cuaha xaan nyívi nyicún tsi ra. ² Tan tsaá iin

ra ndohó cuehe tyaahyú, tan tsicuiñi tsiti ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

³ Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvaha ra.

⁴ Tacan tan catyí ra Jesús tsihin ra:

—Jihna, coto ñahñi catyi tuhun un tsihin nyivi. Maa tyin cuaahan nu nyaá ra cuví jutu, tan janaha un tsi un tsi ra. Tan cuhva un tsa taahan tsi jamañi un nuu Nyoo tumaa catyí ley Nyoo tsa tyaá ra Moisés. Tan cua cuvi tsi iin tsa ndaa tsi ra jutu can tan tsi nyivi tyin tsa nduvaha un.

Nu janduvaha ra Jesús tsi musu iin ra cuví capitán

(Lc. 7.1-10)

⁵ Quivi tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyii ra Jesús tan caahan ndaahvi ra tsihin ra, ⁶ tan catyí ra:

—Jutu Mañi yu, musu yu ñihi xaan cuuhví ra, canyii ra nu cama. Ña cuví nduvita ra tyin nduxii ra, tan yaha xaan cuhva cuñi ra.

⁷ Tan catyí ra Jesús tsihin ra:

—Cuhun maa yu tan cujan-
duvaha yu tsi ra —catyí ra
tsihin ra.

⁸ Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahan ñi un tan musu yu cua nduvaha ra. ⁹ Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

¹⁰ Tan tsa tsiñi ra Jesús tsa cahan ra can, tan iyo xaan cuñi ra. Tan catyí ra tsihin nyivi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya. ¹¹ Tan catyí yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cun-
yecu ñi catsi ñi tsihin ra Abra-
ham, ra Isaac tan ra Jacob nu ndacá ñaha Nyoo. ¹² Tan nyivi tsa taahan tsi cuhun gloria, ña cua cuhun ñi, tyin cua cuhun ñi nu naa. Tan cua vacu tsa ñi tan catsan ña cua cuvi nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyivi nyicún tsi ra.

¹³ Tacan tan catyí ra tsihin ra capitán can:

—Cuaahan, tan na ndu-
vaha musu un tsa cuenda
tyin tsinú iñi un tsi yu —catyí
ra Jesús tsihin ra capitán.

Tan juvin ñi cuhva can nduvaha musu ra.

Nu janduvahā ra Jesús tsi tyiso ra Pedro

(Mr. 1.29-31; Lc. 4.38-39)

¹⁴Tsa yaha can, tan cuahán ra Jesús yuvehe ra Pedro. Tan nyehe ra tsi ña tyiso ra, canyíí ña nu tsito tyin yihí cahñi tsi ña. ¹⁵Tan tñin ra ndaha ña, tan iin yaha ñi quita cahñi tsi ña. Tan nduvitā ña, tan quitsahā nanducú ña tsa catsi ra naha.

Nu cuaha xaan nyivi cuuhví janduvahā ra Jesús

(Mr. 1.32-34; Lc. 4.40-41)

¹⁶Tan tsa cunaaha, cuaha xaan nyivi yihí tatyí ña vaha tsindacā nyivi tsi ra Jesús. Tan tsihin intuhun ñi tuhun cahān ra Jesús tan quita tatyí ña vaha tsi ñi. Tan tandihí ñi cuuhví iin yaha ñi nduvahā ñi. ¹⁷Tacan cuví tyin tacan tan cundaā tsa cahān Jutu Mañi yo tsihin yuhu ra Isaías, ra cuví ndusu yuhu ra tahañ tsanaha. Tan catyí ra tyehen: “Maa ra quihin ra cuehe tsa yihí tsi yo, tan quihin nyaa ra tsa uhvi tsi yo.”

Nyivi tsa cuñi quihvi cuenda ra Jesús

(Lc. 9.57-62)

¹⁸Tan tsa nyehe ra Jesús tyin cuaha xaan nyivi tsinū nduvi nu nyíí ra, catyí ra tsihin ra tsicá tsihin ra tyin cua yaha ra naha inga tsiyo miñi. ¹⁹Tacan tan tsaā iin ra maestro cuenda ley vehe ñuhu tan catyí ra tsihin ra:

—Maestro, cuñi yu cunyi-cun yu tsi un tandihí ñi ityi nu cuahán un —catyí ra.

²⁰Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayñi tsa quee nda gloria, nduve nu maa cunyanaa luxu jiñi yu iyó —catyí ra.

²¹Inga ra tsa tsicá tsihin ra nacahān ra tsihin ra:

—Taa, cūhva na cūhun jihna yu cucutsi yu tsi jutu yu, —catyí ra.

²²Tan catyí ra Jesús tsihin ra:

—Ñaha yooho quitsi nyicun un tsi yu. Tan nyivi ña iyó Nyoo ñima na cucutsi tahan maa ñi tsi ñi tsitsi ñuhu tun tsihi ñi —catyí ra.

Nu jacutaxín ra Jesús tatyí xaan nu miñi

(Mr. 4.35-41; Lc. 8.22-25)

²³Tacan tan quihvī ra tsitsi yutun ndoo tan ra tsicá tsihin ra cuahán ra naha tsihin ra,

²⁴Tan ñihi xaan quitsahā yihí tatyí nu miñi can, tan cuaha xaan ndutya quihvī tsitsi yutun ndoo ra naha. Maa tyin ra Jesús quixí ra. ²⁵Tan ra tsicá tsihin ra jandoto ra naha tsi ra, tan catyí ra naha:

—Jutu Mañi yu, jacacu tsi yo, tyin cuñi cunaa yo!

²⁶Tan catyí ra Jesús tsihin ra naha:

—¿Nacuenda yuuhví xaan ndo? ¡Nyooho tsa luxu xaan tsinú iñi tsi yu! —catyí ra Jesús.

Tacan tan nduvitā ra tan cahān ra tsihin tatyí tan tsihin ndutya, tan cutaxin tsi.

²⁷Tan iyo xaan cuñi ra naha tan catyí ra naha:

—¿Yóo ra cuví ra ihya? Tyin nda cuanda tatyí tan

nda cuanda ndutya tan tyaá yahvi tsi ra —catyí ra naha.

Nu nduvaha uvi ra ñuu Gadara ra yihí tatyí ña vaha nahara

(Mr. 5.1-20; Lc. 8.26-39)

²⁸ Tacan tan tsaá ra naha inga tsiyo miñi nda nu ñuhu Gadara. Tan tsaá uvi taahan ra yihí tatyí ña vaha. Tan quitá ra naha nu ñaña cumí sandu. Xaan xaan ra naha, tan yoñi maa cuví yaha ityi can. ²⁹ Tan caná tsaá ra naha, tan catyí ra naha:

—¿Náa cuñi un tsihin ndi, yooho Jesús Sehe Nyoo? ¿A vatsi un vatsi janyehe un tundoho tsi ndi tsa ndi cumañi ca tsaá quivi? —catyí ra naha jahá tatyí ña vaha can.

³⁰ Tan yatyin ñi can yucú cuaha quini tsatsi ti naha ti.

³¹ Tan catyí nu tatyí ña vaha can tsihin ra Jesús:

—Tatun cua tava un tsi ndi, cuhva tsa quihvi ndi tsitsi quini can naha ti —catyí nu tatyí ña vaha can nahnu.

³² —Vaha. Quihvi ndo —catyí ra Jesús.

Tan quitá nu tatyí ña vaha can nahnu, tan quihvi nahnu tsitsi tandihi quini tsa nyecú can. Tan tandihi quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

³³ Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihi tsa cuví tsi ra tsa yihí tatyí ña vaha can naha ra.

³⁴ Tacan tan tandihi nyivi ñuu

can, tsahan ñi tsinyehe ñi tsi ra Jesús, tan cahán ndaahvi ñi tsihin ra na quita ra ñuu can.

9

Nu janduvaha ra Jesús tsi iin ra xii

(Mr. 2.1-12; Lc. 5.17-26)

¹ Tacan tan quihvi ra Jesús tsitsi iin yutun ndoo tan yaha ra miñi, tan tsaá ra nda ñuu nu iyó ra. ² Nu nyii ra ican, tsindaca nyivi tsi iin ra cuuhvi tsa ña cuví nacanda tyin nduxii ra, tan canyí ra nu tsito. Tan tsa nyehe ra Jesús tyin tsinú xaan iñi ñi tsi ra, quitsaha caahán ra tsihin ra cuuhvi can:

—Jandu iin iñi un, sehe yu, tyin tsa tsicoo tucahnu iñi cuatyí un —catyí ra Jesús tsihin ra.

³ Tacan tan quitsaha tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoo cuatyí ra nu Nyoo tsihin tuhun caahán ra”, cuñi ra naha tsicá iñi ra naha.

⁴ Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha? ⁵ Tyin ¿ndáa tsa yii ca catyí yo: a yii ca catyí yo: “Cuatyí un tsa yaha ndatsi”, o yii ca catyí yo: “Ndúvita tan caca un”? ⁶ Vityin cua janaha yu tsi ndo tyin yuhu Rayii tsa quee nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhvi can:

—Nduvita, naquihin tsito un tan cuanuhu nda yuvehe un —catyí ra.

⁷ Tacan tan nduvita ra tan cuanuhu ra nda yuvehe ra.

⁸ Tan nyivi tsa nyehe tsa cuvi, nayuhvi xaan ñi. Tan quit-saha jacahnú ñi tsi Nyoo tyin tsaha ra tunyee iñi tsi nyivi.

Nu cana ra Jesús tsi ra Mateo

(Mr. 2.13-17; Lc. 5.27-32)

⁹ Yaha can tan quita ra Jesús ican. Tan nyehe ra tsi iin ra tsa nañi Mateo, nyaá ra naquihin ra xuhun tsa tyahvi nyivi Israel tsi ra ndaca ñaha. Tan catyí ra tsihin ra:

—Cohon tsihin yu.

Tacan tan nduvita ra Mateo tan cuahán ra tsihin ra Jesús.

¹⁰ Tacan tan cuvi tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaa, tan tsihin inga ca ra iyó cuatyí naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra. ¹¹ Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

¹² Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi

ñuhu doctor tsi ñi. ¹³ Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahvi iñi ndo tsi nyivi, tyin yacan cuvi tsa ñiñi xaan ca tan ñavin ca tsa cahñi ndo quití tan cuhva cuenda ndo tsi yu.” Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

Nu tsicá tuhun nyivi tsi ra Jesús tatun taahán tsi tsa coo nyitya ñi

(Mr. 2.18-20; Lc. 5.33-35)

¹⁴ Tacan tan ra nyicún tsi ra Juan, ra jacoondutya tsi nyivi, natuhva ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuvi tyin nyuhu tan ra cuvi fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

¹⁵ Tan nacahan ra Jesús tan catyí ra:

—¿A cuvi cunyecú cuihya nyivi yucú vico tindaha tun nyii ra cua tindaha tsihin ñi? Maa tyin coo quivi cua quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

Nu caahán ra Jesús tyin ña nacatsí tahan tuhun tsahnu tsa iyó nyivi tsihin tuhun tsaa tsa jacuahá ra tsi ñi

(Mr. 2.21-22; Lc. 5.36-39)

¹⁶ Ña tuhvá nyivi naquicú iin jahma tuuhu tsihin iin jahma tsaa, tyin cua nandiyi

nu naquicu ñi tsihin tsa tsa can, tan cua tyahnya tsi inga tsaha. ¹⁷ Tan tacan tucu, ña cuví tyihí nyívi vinu tsa tsitsi ñii tsaahnu tyin tatun tacan javaha ñi, cua tyahnya ñii can, tan cua tiví vinu can tan cua tiví ndihi tucu ñii can. Yacan cuenda taahán tsi tyihi yo vinu tsa tsitsi ñii tsa. Tyin tacan tan ña tyahnya ñii can tan ndi vinu can ña tiví tsi.

Nu nduvaha ñaha sehe ra Jairo tan ñaha tsa tñin jahma ra Jesús

(Mr. 5.21-43; Lc. 8.40-56)

¹⁸ Tsitsi tsa caahán ra Jesús tuhun ihya, tsaá iin ra cumí tyiñu cuenda vehe ñuhu nyívi Judea tan tsicuiñi tsiti ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yooho tan cahun un tan tyiso ndaha un jiñi ña, cua nandoto ña —catyí ra tsihin ra Jesús.

¹⁹ Nduvita ra Jesús tsihin ra tsicá tsihin ra tan cuahán ra naha tsihin ra.

²⁰ Tacan tan iin ñaha cuuhví natuhva ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaa ña ndaha ña jahma ra, ²¹ tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

²² Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Jandunii iñi un, xihí, tsa nduvaha un tyin tsinú iñi un —catyí ra.

Tan juvin ñi cuhva can tan tsicuiñi tsa cuún niñi ña.

²³ Yahá can tan tsaá ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyívi tsa yucú can iyo xaan tsacú ñi. ²⁴ Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixi ña —catyí ra.

Tan tsa cahan ra tacan quit-saha tsacú naaha ñi. ²⁵ Tan ra Jesús tava ra tsi ñi ityi tsata vehe. Tacan tan quihvi ra tsitsi vehe nu canyiñi ñaha can, tan tñin ra ndaha ñaha luhlu can, tan nduvita ña. ²⁶ Tan tandihi nyívi iyó ityi ñuu can tsito ñi tsa nandoto ñaha luhlu can.

Nu janduvaha ra Jesús tsi uvi taahan ra cuaa

²⁷ Tsa quita ra Jesús ican, tan uvi taahan ra cuaa nyicún tsi ra, caná tsa ra naha tan catyí ra naha:

—Cundahvi iñi tsi ndi, yooho ra cuví tata ra David! —catyí ra naha.

²⁸ Tan tsa yaha quihvi ra Jesús tsitsi vehe, ra cuaa can, natuhva ra naha nu nyaá ra, tan maa ra Jesús quitsaha tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahan ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

²⁹ Tacan tan tyanaa ra Jesús ndaha ra tinuu ra naha tan catyí ra tsihin ra naha:

—Na cuví maa tumaa cuhva tsinú iñi ndo —catyí ra.

³⁰ Tan nduvahā tinuu ra naha. Tan catyí ra Jesús tsihin ra naha:

—Coto ñahñi catyi tuhun ndo tsihin ndi intuhun nyivi.

³¹ Maa tyin cuahán ra naha tan quitsahā catyí tuhun ra naha tsa javahā ra Jesús tsihin ra naha tsihin tandihi nyivi iyó ityi ñuu can.

Nu janduvahā ra Jesús tsi iin ra ñiñí

³² Tsa cuahán ra naha, juhva nyivi tsindacā ñi tsi iin ra ñiñí tsa yihí tatyí ña vaha nu nyii ra Jesús. ³³ Tan tsa tava ra Jesús tatyí ña vaha can, tacan tan nacahan ra can. Tan iyo xaan cuñi nyivi, tan catyí ñi:

—Ñaha ca maa nyehe yo ñuu Israel ihya ndi intuhun ra tava tatyí ña vaha tsi nyivi —catyí ñi.

³⁴ Maa tyin ra cuví fariseo naha ra, catyí ra naha:

—Ra ihya tava ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyí ra naha.

Nu caahán ra Jesús tyin ña cuaha maa nyivi jahá tyiñu cuenda Nyoo iyó

³⁵ Ra Jesús tsahan ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyivi. Tan janduvahá ra tandihi nuu cuehe tsa ndohó ñi. ³⁶ Tan tsa nyehé ra tsi nyivi, cundaahvi xaan iñi ra nyehe ra tsi ñi, tyin nyehé ñi tundoho tan iyó ñi tucuihya iñi, tumaa mbee ticatyí tsa

nduve tsitoho iyó. ³⁷ Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha.

³⁸ Yacan cuenda, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

10

Nu nacatsi ra Jesús tsa utsi uvi ra cua caca tyiñu ra

(Mr. 3.13-19; Lc. 6.12-16)

¹ Tacan tan canā ra Jesús tsi tsa utsi uvi ra tsicá tsihin ra tan tsahā ra ndatu tsi ra naha na tava ra naha tatyí ña vaha tsa yihí añima nyivi, tan na janduvaha ra naha tsi nyivi cuuhvi náa ndihi ca nu cuehe tan tsa uhvi.

² Ihya nyaá sivi tsa utsi uvi ra tsicá tyiñu ra: jihna ca, ra Simón, tsa nañi tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha; ³ tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo; ⁴ tan ra Simón ra nyii cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo

(Mr. 6.7-13; Lc. 9.1-6)

⁵ Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cūhun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria. ⁶ Cuaahan ndo nu yucú mbee tsa tsinaa tsa cuví nyivi Israel. ⁷ Cuaahan ndo cua cahan ndo tyin tsa tsaa quivi tsa cua cundaca ñaha Nyoo tsi nyivi. ⁸ Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyooho naquihín ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

⁹ Ña cūiso ndo xuhun; ndi xuhun cuaan, ndi xuhun cuitsin, ndi xuhun cuaaha. ¹⁰ Tan ña cūiso ndo ndi yunu tsa cuenda tsa caca ityi ndo. Intuhun ñi camisa tsa nditsín ndo cūhun tsihin ndo. Tan ña cūiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

¹¹ Tatun tsaa ndo iin ñuu cahnu o iin ñuu luhlu, nducu ndo iin nyivi vaha iñi, tan ndo ndo yuvehe ñi nda cuanda quita ndo ñuu can. ¹² Tatun cua quihvi ndo iin vehe, cūhva ndo nacumi tsi nyivi iyó yuvehe can. Tan catyi ndo tsihin ñi: “Na coo tsa vaha Nyoo ánima ndo”. ¹³ Tan tatun nyivi iyó yuvehe can tan nacotó ñi tyin tsiñí ñuhu tsa vaha can tsi ñi, cua

ndo can tsihin ñi. Maa tyin tatun ña tsitó ñi tyin tsiñí ñuhu tsa vaha can tsi ñi, naquihin nyico ndo can. ¹⁴ Tan tatun ña cuñí nyivi quihin cuenda ñi tsi ndo, tan ndi ña cuñí ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi siqui ñi. ¹⁵ Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

Nu catyí tuhun tsi náa ndihi tundoho cua nyehe nyivi tsicá tyiñu Nyoo

¹⁶ ¡Nyēhe ndo! Tumaa mbee ticatyí cuví ndo, tan jacuhún yu tsi ndo nu yucú quiti xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti. ¹⁷ Jaha ndo cuenda tsi ndo tsihin nyivi tyin cua cūhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. ¹⁸ Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví. ¹⁹ Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsaa cūhva tsa cua cahan ndo, Nyoo cua cūhva ra tuhun cahan ndo. ²⁰ Tyin ñavin maa ndo cua cahan, tyin maa Tatyí Ii Jutu yo Nyoo

tsa iyó ańima ndo cua cuhva ra tsa cahan ndo.

²¹ 'Yihí rayii cua xico ra naha juven ñi tsi ra yańi ra naha na cahńi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyivi na cahńi nyivi can tsi ñi. ²² Tandihí nyivi, ndasi cua cuńi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú ińi ndo tsi yu, tacan tan cua cacu ndo. ²³ Tatun nyaa ndaha ñi tsi ndo iin ñuu, cahun ndo inga ñuu. Tyin tsa nditsa catyí yu tsihin ndo tyin tsa ndi cumańi ca cahun ndo tandihí ñuu nu iyó nyivi Israel tan cua quitsi nyico yuhu, Rayii tsa quee nda gloria.

²⁴ 'Iin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra. ²⁵ Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyivi tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyivi cuenda yu.

¿Yóo tsii taahán tsi nayuhvi yo, a tsii nyivi o tsii Nyoo?

(Lc. 12.2-7)

²⁶ 'Yacan cuenda ña nayuhvi ndo tsi nyivi, tyin nduve tsa nyii xeehe tsa ña cua quituvi. Tan nduve tsa xeehe tsa ña cua coto

nyivi. ²⁷ Tandihí tsa caahán yu tsihin ndo tsacuaa, cahan ndo can tsinu cahńi. Tan tandihí tsa caahán xeehe yu tsihin ndo, ndaa ndo jińi vehe cana tsa ndo can, na coto tandihí nyivi. ²⁸ Ña nayuhvi ndo tsi nyivi tsahńi cuńu ñuhu yo, tyin ña cuví cahńi ñi ańima yo. Vaha ca nayuhvi ndo tsi maa Nyoo, ra cuví janaa cuńu ñuhu ndo tan ańima ndo tsitsi anyaya.

²⁹ 'Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cuhva maa Nyoo Jutu yo. ³⁰ Tyin nda cuanda ixi jińi ndo tan tsitó Nyoo najava taahan tsi iyó, tyin tsa nacahvi ra intuhun intuhun tsi. ³¹ Yacan cuenda ña nayuhvi ndo. Nyoo, nyaá yahvi ca ndo nu Nyoo tan ñavin ca tsa cuaha saa.

Ña cua nayuhvi yo cahan yo tuhun ra Jesucristo tsihin nyivi

(Lc. 12.8-9)

³² 'Tandihí nyivi tsa caahán catsi tsihin nyivi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi. ³³ Maa tyin nyivi cua tyihi xeehe tsi yu nuu inga nyivi, tacan tucu yuhu cua tyihi xeehe yu tsi ñi nuu Jutu yu ra nyaá gloria.

Nu caahán ra Jesús tyin tsa cuenda ra tan cua cańi tahan nyivi tsihin tahan ñi

(Lc. 12.51-53; 14.26-27)

34 'Ña cuñi ndo tyin yuhu vatsí cuhva yu tsa coo taxin nyivi nu ñuhu ñayivi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan. 35 Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña. 36 Tan yacan cuenda juvin ñi maa nyivi vehe ndo cua cuxaan iñi tsi ndo.

37 'Nyivi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyivi cuenda yu. Tan nyivi cuñi ca tsi sehe yí ñi a sehe sihi ñi, tan ñavin ca tsi yuhu, ña cuví cuví ñi nyivi cuenda yu. 38 Tan nyivi tsa ña cuñi nyehe tundoho tan ndi ña cuñi ñi cuhva ñi ñayivi iyó ñi tsa cuenda yu, ña taahan tsi cuví ñi nyivi cuenda yu. 39 Tyin nyivi cuñi xaan ca ñayivi iyó ñi, cua cunaa ñi. Maa tyin nyivi cua cuhva ñayivi iyó ñi tsa cuenda yu, cua ñihi ñi ñayivi nyito coo ñi.

*Nu caahán ra Jesús nácaa
cua ñihi yo tsa vaha Nyoo
(Mr. 9.41)*

40 'Nyivi tsa naquihín cuenda tsi nyoocho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsj tsi yu. 41 Nyivi naquihín cuenda tsi iin ra cuví ndusu yuhu Nyoo tyin Nyoo jaquitsj tsi ra, cua ñihi

ndihi ñi tsa vaha tsa cua ñihi ra cuví ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi. 42 Tan yóo nyivi tsa cuhva intuhun vasu ndutya vitsin coho nyivi tsa nyicún tsi yu, cua ñihi ndihi ñi tsa cua cuhva Nyoo tsi ñi tsa nyicún tsi yu —catyí ra Jesús.

11

*Nu jacuhun ra Juan tsi ra
tsicá tsihin ra nu nyii ra Jesús
(Lc. 7.18-35)*

1 Tsa ndihí cahan ra Jesús tsihin tsa utsi uvi ra tsicá tsihin ra, tacan tan quita ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

2 Tan ra Juan nyii ra vehe caa quivi can, tan ñihí tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyii ra. 3 Tan catyí ra naha tsihin ra:

—¿A juvin yooho cuví ra Cristo tsa nyaa tsa cua quitsi jacacu tsi ndi? O tatun ñavin un cuví, cuatu ndi tsi inga ra —catyí ra naha tsihin ra Jesús.

4 Nacahan ra Jesús tan catyí ra:

—Cuaahan ndo tan catyi tuhun ndo tsihin ra Juan tandihi tsa nyehé ndo, tan tsa tsiñi ndo. 5 Tan catyi ndo tsihin ra: nyivi cuaa nanyehé ñi, nyivi coxo nacacá ñi, nyivi

ndohó cuehe tyaahyú ndu-
vahá ñi, nyívi soho nacuñí
ñi, tan nandotó nyívi tsa tsa
tsihí, tan nyívi ndaahvi tsiñí
ñi tuhun Nyoo nácaa cua cacu
ñi.

6 'Tan catyi ndo tsihin ra
tyin sii xaan cua cuvi tsi nyívi
tsa nyicún tsi yu tun ña ndu
uvi iñi ñi —catyí ra Jesús tsi-
hin ra naha.

7 Tsa cuahán ra naha, tan
quitsahá caahán ra Jesús
tuhun ra Juan tsihin nyívi,
tan catyí ra:

—Quívi tsa tsahan ndo
tsinyehé ndo nu tsiqui, ¿náa
cua nyehe ndo cuñí maa ndo?
¿A nyehe ndo iin ndoo tsa
janduvá tatyí? 8 ¿O náa cuví
tsa tsinyehé ndo? ¿A iin ra
nditsí jahma vaha cua nyehe
ndo? Ñavin. Tyin tsitó ndo
tyin ra nditsí jahma vaha, iyó
ra vehe ra cuví rey. 9 ¿A ña
tsahan ndo tsinyehé ndo tsi
iin ra cuví ndusu yuhu Nyoo?
Juvín. Tyin ra ican cahnu ca
cuví ra tan ñavin ca tandihí
ra cuví ndusu yuhu Nyoo.
10 Juvín ñi tuhun ra Juan cuví
tsa nyaá nuu tutu Nyoo. Tan
catyí tsi tyehen:

Yuhu cua jacuhun yu iin ra
cahan tuhun yu tsa ndi
cumañi ca cuhun yu.

Tyin natyiso vaha ra ityi nu
cua cuhun un.

11 'Tsa nditsa catyí yu tsi-
hin ndo, tyin tsitsi tsa tandihí
nyívi tsa tsicoo tan nyívi iyó
vityin, tan ña cahnu ca cuví
ñi tan ñavin ca ra Juan, ra ja-
coondutyá tsi nyívi. Maa tyin
ra tsa ndaca ñaha Nyoo añima,
vasu ra lihli ñi cuví ra, cahnu

ca ra cuví ra tan ñavin ca ra
Juan.

12 'Nda cuanda quívi tsa
tsaa ra Juan tan nda vityin,
nyívi ñihi iñi, nducú xaan
ñi cuhva ñihi ñi tsa cundaca
ñaha Nyoo tsi ñi. 13 Ra Moisés
cahan ra tuhun nácaa cua
cundaca ñaha Nyoo tsi nyívi,
tan tacan tucu tandihí ra cuví
ndusu yuhu Nyoo. Tacan
tan quítsi ra Juan jacoto ra
tsi nyívi tyin tsa tsaa quívi
tsa cua cundaca ñaha Nyoo.
14 Tan ra Juan cuví ra Elías ra
tsa nyaá tsa cua quítsi, tun
nyooho tan cuñí ndo tsinu iñi
ndo tsa caahán yu. 15 Nyooho
tsa iyó soho, tyaa soho ndo
tsa caahán yu.

16 '¿Náa tsihin jandu inducu
yu tsi nyooho, nyívi tsa iyó
quívi ihya? Tumaa ra nyihi
cuví nyooho. Tyin ra nyihi
jasiqui nuyahvi. Caná tsa
tahan ra naha tan catyí ra
naha: 17 "Tívi ndi tiyoo tan
ña tsañi ndo yaa. Tan tsita
ndi yaa cuiihya, tan ña tsacu
ndo", catyí ra nyihi. [Tan
tacan cuví nyooho tyin ndi
intuhun cuhva ña taahán iñi
ndo.] 18 Tyin ra Juan, ra ja-
coondutyá, quítsi ra tan ña
tsatsí vaha ra, tan ña tsihi
ra vinu. Tan nyooho catyí
ndo tyin tatyí ña vaha yihí tsi
ra. 19 Yaha can tan tsaa tucu
yuhu Rayi tsa quee nda glo-
ria. Tan tsatsí yu tan tsihí yu.
Tan catyí ndo tyin tsatsí xaan
yu tan tsihí xaan yu vinu,
catyí ndo. Tan ña taahán
iñi ndo tsa cutahán yu tsi-
hin ra iyó cuatyí naha ra tan
tsihin ra tavá xuhun cuenda

ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyivi naquihín tuhun caahán yu tan tuhun cahán ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyí ra Jesús.

Nyivi ña cuñi naquihin cuenda tuhun caahán ra Jesús cua nyehe ñi tundoho
(Lc. 10.13-15)

²⁰ Tacan tan quitsaha caahán ra Jesús tsihin nyivi tandihi ñuu nu javaha ra cuaha tsa iyo, tyin ña nasama ñi cuhva iyó ñi, tan catyí ra:

²¹ —¡Ndahvi nyooho, nyivi ñuu Corazin! ¡Ndahvi nyooho nyivi ñuu Betsaida! Tyin nyehé ndo tsa iyo tsa javahá yu tan ña nasama ndo cuhva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuihaya iñi tan cua coso ñi nyaa nuu ñi: tyin ndu uvi iñi ñi cuatyí ñi. ²² Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón. ²³ Tan nyooho nyivi ñuu Capernaum, cuñi maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihi anyaya. Tun tsatyin tsicoo tsa iyo nyehe ñi ñuu Sodoma tumaa tsa nyehé ndo ihya, ñuu can ña tsinaa tsi tan iyó tsi nda cuanda vityin. ²⁴ Maa tyin catyí yu tsihin ndo tyin quivi cua tatsi tuñi

Nyoo tsi nyivi, ñihi ca cua tatsi tuñi ra tsi nyooho tan ñavin ca nyivi ñuu Sodoma.

*“Cuhva ndo tsi ndo tsi yu, tan cuhva yu tsa quitatu ndo”,
catyí ra Jesucristo*
(Lc. 10.21-22)

²⁵ Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayivi. Tyin tyihi xeehe un tuhun ihya nuu ra tsitó xaan tan ra nyityi xaan naha ra. Tan jandunditsi un tuhun ihya nuu ra nyihi. ²⁶ Tacan Tyaa, tyin tacan cuñi maa un —catyí ra Jesús.

²⁷ Tacan tan catyí tucu ra tsihin nyivi:

—Jutu yu nacuhva cuenda ra tandihi tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñi yu tsa nacoto tsi Jutu yu, cua janaha yu tsi ra tsi ñi. ²⁸ Tandihi nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa quitatu ndo. ²⁹ Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo. ³⁰ Ña yi tsa cuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

12

Quivi quitatú nyivi cuví tsi tan ra tsicá tsihin ra Jesús tuhún ra naha yoco itya trigu (Mr. 2.23-28; Lc. 6.1-5)

¹ Iin qui^vi quitatú nyⁱvi, yah^a ra Jesús mahⁿu nu iyó tsa tats^ji nyⁱvi. Tan tsa^a soco tsi ra tsicá tsihin ra. Tan quitsah^a tuhún ra naha yoco trigu can tan tsatsⁱ ra naha.

² Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiⁿu tsa ña taahán tsi javahá yo qui^vi quitatú yo —catyí ra naha tsihin ra.

³ Tan ra Jesús catyí ra tsihin ra naha:

—¿A ñaha ca cahvi ndo tsa javahá ra David tsihin ra cuthan tsihin ra qui^vi tsa tsa^a soco tsi ra naha? ⁴ Quihvⁱ ra tsitsi vehe Nyoo, quihⁱn ra paan ii, tan tsats^ji ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can.

⁵ ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiⁿu ra naha tsitsi vehe ñuhu qui^vi quitatú yo? Tan ñavin cuatyí cuví can. ⁶ Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu. ⁷ Nyoo^oho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñí ca yu javaha ndo cuví tsa cundaahvi iñi ndo nyehe ndo tsi nyⁱvi tahan ndo, tan

ñavin ca tsa cahñi ndo quitⁱ tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyⁱvi tsa nduve cuatyí. ⁸ Yuhu, Rayⁱ tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo qui^vi quitatú yo —catyí ra Jesús.

Nu janduvahá ra Jesús tsi in ra na ityi ndaha

(Mr. 3.1-6; Lc. 6.6-11)

⁹ Tacan tan quit^a ra Jesús ican, tan cuahán ra vehe ñuhu. ¹⁰ Tan ican nyiⁱ iin ra tsa na ityi ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicá tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyⁱvi cuuhvi qui^vi quitatú yo? —catyí ra naha tsihin ra Jesús.

¹¹ Tan nacahan ra Jesús tan catyí ra:

—¿Ndáa nyoo^oho, tatun canacava iin mbee jana ndo tsitsi iin yavi qui^vi quitatú yo, a ña cua cuhun ndo tan tava ndo tsi ti? ¹² Tan ¿a ña nyaá yahvi ca iin nyⁱvi tan ñavin ca mbee? Yacan cuenda taahán tsi javaha yo tsa vaha qui^vi quitatú yo —catyí ra.

¹³ Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvahá tsi tumaa inga tsiyo.

14 Tacan tan quitā ra fariseo naha ra cua natuhun tahan ra naha nácaa cua cahñi ra naha tsi ra Jesús.

Tsa cahan ra Isaías, ra cuvī ndusu yuhu Nyoo, tsa cuenda ra Jesús tahan tsanaha

15 Tsa tsito ra Jesús tyin nducú ra naha tsi ra, quitā ra ican. Tan cuaha nyivi tsinyicun tsi ra. Tan maa ra janduvaha ra tsi tandihi ñi cuuhvi. 16 Tan catyi ra tsihin ñi tyin na ña catyi tuhun ñi yoo ra cuvī ra. 17 Tacan cuvī tyin tacan cahan ra Isaías, ra cuvī ndusu yuhu Nyoo tahan tsanaha. Tan tyehen tyaā ra tuhun Nyoo:

18 Ra ihya cuvī musu yu, ra tsa nacatsj vaha yu.

Cuñi xaan yu tsi ra, tan sii xaan cuñi yu tsihin ra.

Cua kuhva yu Tatyī Ii yu tsi ra.

Tan cua jacoto ra tsi nyivi tsa ñavin nyivi Israel cuvī, nácaa cua janduvaha yu tsi ñi nuu yu.

19 Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

20 Tan ndi intuhun ndoo yacua, tan ña cua cahnu ndihi ra.

Tan ndi ña cua ndahva ndihi ra tiñuhu lihli nu caná luxu yuhma.

Nda cuanda coto tandihi nyivi tyin maa ra cuvī ra ndacá ñaha tsi ñi.

21 Tan tandihi nyivi, tan cua cuita iñi ñi tsi ra.

Nu xaan iñi tsi ra Jesús catyi nahnu tyin tsihin tunyee iñi nu ña vaha javahá ra tsa iyo (Mr. 3.20-30; Lc. 11.14-23; 12.10)

22 Tacan tan tsindacā nyivi tsi iin ra yihí tatyī ña vaha nu nyií ra Jesús, cuaa ra tan ñihi ra. Tan ra Jesús janduvaha ra tsi ra. Tacan tan nacahan ra, tan nanyehē ra. 23 Iyo xaan cuñi tandihi nyivi, tan catyi ñi:

—¿A ñavin ra ihya cuvī tata ra rey David? —catyi ñi.

24 Tan kuhva tsa tsiñi ra fariseo naha ra tsa caahán ñi, catyi ra naha:

—Tsihin tunyee iñi nu Beelzebú, nu cuvī ityi nuu tsihin nu ña vaha nahnu, tavá ra ihya tatyī ña vaha —catyi ra naha.

25 Maa tyin ra Jesús tsitó ra tsa tsicá iñi ra naha, yacan cuenda catyi ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihī tyiñu tsa ndacá ñaha ra naha. Tan tatun iin ñuu o tandihi nyivi iin vehe tan cusin ñi, tacan tan cua tivī nu yucú ñi. 26 Tan tacan tucu tatun nu ña vaha tan tava nu juvin ñi tahan maa nu, cuñi tsi catyi tyin ña iin ñi cuvī nahnu, tan cundihī tunyee iñi tsa iyó tsi nahnu.

27 Tan nyooho catyi ndo tyin tsihin tunyee iñi nu Beelzebú tavá yu tsi nu tatyī ña vaha nahnu. Tun tsatyin tavá yu tsi nahnu tumaa kuhva catyi ndo, yoo tsahá tunyee iñi tsi ra nyicun tsi ndo tan tavá

ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo. ²⁸ Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñí tsi catyí yacan tyin nditsa tyin tsa tsaá cuhva ndacá ñaha Nyoo nu yucú ndo.

²⁹ 'Tan ¿yóo cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuhñi jihna ra tsi ra can, tacan tan cuví quihin nyaa ra tandihí tsa iyó tsi ra.

³⁰ Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatyinyee tsi yu tsa caahán yu tuhun Nyoo tsihin nyivi, cuñí tsi catyí tyin ña tsahá ñi tsa coto nyivi tuhun caahán yu.

³¹ 'Yacan cuenda catyí yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí Ii Nyoo, yacan nditsa, ña cua jaha Nyoo tucahnu iñi tsi ñi.

³² Tan yóo nyivi tsa caahán tsa ndavaha ñi siqui yuhu Rayii tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí Ii Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

Tsihin tsa javahá nyivi tan nacoto yo tsi ñi tatun vaha ñi a

ña vaha ñi
(Lc. 6.43-45)

³³ 'Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti tun. ³⁴ ¡Nyoooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo. ³⁵ Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi. ³⁶ Tan yuhu catyí yu tsihin ndo tyin quivi cua tatsi tuñi Nyoo tsi tandihí nyivi, cua cuhva cuenda ñi tandihí tuhun tsa ña vaha cahan ñi. ³⁷ Tyin tsa cuenda tsa caahán ndo, tan cua catyí Nyoo tun vaha ndo o ña vaha ndo.

Nyivi ña vaha, tsa iyo ñi cuñi ñi nyehe ñi

(Mr. 8.12; Lc. 11.29-32)

³⁸ Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñi ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

³⁹ Tan nacahan ra Jesús tan catyí ra:

—Nyivi ña vaha tan nyivi tsa nyicún inga nyoo cuñi ñi nyehe ñi tsa iyo. Maa tyin ña cua nyehe ñi tsa iyo, in-tuhun ñi tsa cua nyehe ñi, tumaa tsa javahá Nyoo tsihin ra Jonás ra cuví ndusu yuhu

ra taḥan tsanaha. ⁴⁰ Tyin tumaa tsinyi ra Jonás tsitsi tyaca cahnu uñi quivi tan uñi tsacuaa, tacan cua cunyii yuhu Rayi tsa quee nda gloria tsitsi ñuhu uñi quivi tan uñi tsacuaa. ⁴¹ Tan quivi cua tatsi tuñi Nyoo tsi tandihi nyivi, cua nduvita nyivi tsi-coo ñuu Nínive taḥan tsanaha tan cua catyi ñi na tatsi tuñi Nyoo tsi nyooho nyivi tsa iyó vityin. Tan cua catyi ñi tyin cua cunaa ndo, tyin maa ñi tsa cuví ñi ñuu Nínive, nasama ñi cuhva iyó ñi quivi caḥan ra Jonás tuhun Nyoo tsihin ñi. Tan ihya nyi ra cahnu ca cuví tan ñavin ca ra Jonás. [Tan ña cuñi ndo tyaa soho ndo tsa caahán yu.] ⁴² Tan tacan tucu ñaha tsa tsindaca ñaha ityi Sur, cua nduvita ña quivi cua cutuñi nyivi tan cua catyi ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa caḥan ra Salomón. Tan vityin cahnu ca ra caahán tsihin ndo tan ñavin ca ra Salomón.

Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo
(Lc. 11.24-26)

⁴³ "Tatun iin nu tatyí ña vaha quitá nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu: ⁴⁴ "Cunuhu yu nda vehe yu nu quee yu." Tacan tan cuahán nyico nu añima

nu quee nu. Tan nyehe nu tyin ndi xaan, tan yoñi iyó, tan sii xaan caá. ⁴⁵ Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuví tsi nyivi quiñi iyó —catyí ra Jesús.

Nu tsaha cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñi Nyoo
(Mr. 3.31-35; Lc. 8.19-21)

⁴⁶ Ndi caahán ca ra Jesús tsihin nyivi, tan tsaá sihi ra tan yañi ra, tan nyecú ñi ityi tsata vehe, tan cuñi ñi cahan ñi tsihin ra. ⁴⁷ Tacan tan jacoto iin ra tsi ra Jesús, tan catyi ra:

—Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

⁴⁸ Tan nacahán ra Jesús tan catyi ra tsihin ra can:

—¿Yóo cuví sihi yu tan yóo cuví yañi yu? —catyí ra.

⁴⁹ Tacan tan janaha ndaha ra nu nyecú ra tsicá tsihin ra, tan catyi ra:

—Ra ihya naha ra cuví sihi yu tan yañi yu. ⁵⁰ Tyin tandihi nyivi tsa javahá cuhva cuñi Jutu yu, ra nyaá gloria, juvin ñi can cuví yañi yu, tan cuhva yu, tan sihi yu —catyí ra Jesús.

13

Nu caahán ra Jesús tyin tu-maa iin ra tatsí, tacan cuví ra caahán tuhun Nyoo

(Mr. 4.1-9; Lc. 8.4-8)

¹ Quiví can quitá ra Jesús vehe nu nyíí ra tan cuahán ra, tsicunyaá ra yuhu miñi. ² Tan cuaha xaan nyívi ndu iin nu nyaá ra, yacan cuenda quihví ra tsitsi iin yutun ndoo tan tsinyaá ra. Tan tandihí nyívi ndoo ñi yuhu ndutya. ³ Tacan tan quítsahá jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quitá iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra.

⁴ Tan cuhva tsa quití ra tsiti can, cucoyo juhva tsi yuhu ityi. Tan quítsi saa tan tsatsi ti tsiti can. ⁵ Tan juhva ca tsiti can cucoyo tyañu yuu nu ña cuaha nyahyu yihí. Tan ican caná tsiti can tsa numi ñi tyin ña cuaha nyahyu yihí tyañu yuu can. ⁶ Maa tyin cuhva tsa caná ñicanyii, numi ñi na ityi tsi, tyin ña cunu yihí yoho tsaha tsi. ⁷ Juhva ca tsiti can cucoyo tyañu iñu. Tan quiví caná trigu can tsahnú tsi iin caa ñi tsihin iñu can, tan iñu can numi xaan ca tsahnú tsi tan tsahní tsi trigu can.

⁸ Maa tyin juhva ca tsiti can cucoyo nu ñuhu vaha. Tan quiví tsahnú tsi, vaha xaan tsahá tsi tsiti. Tyin tsa iin tsiti can, cientu tsiti quitá tsihin tsi. Tan inga tsiti can, uñi xico, tan inga tsi oco utsi tsiti tsahá tsi. ⁹ ¡Tatun nyaá soho ndo,

tyaa soho ndo tuhun caahán yu! —catyí ra Jesús.

Nu catyí tuhun ra Jesús nacuenda jacuahá ra tsi nyívi tan ña catyí tuhun catsi ra tsihin ñi

(Mr. 4.10-12; Lc. 8.9-10)

¹⁰ Tacan tan natuhva ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenda tyin tsihin cuhva ñi jacuahá un tsi nyívi, tan ña catyí tuhun catsi un tsihin ñi? —catyí ra naha.

¹¹ Tan nacahán ra Jesús tan catyí ra:

—Tsi nyoocho jacotó Nyoo tuhun xeehe, cuhva ndacá ñaha ra, maa tyin nyívi ihya ña cuví coto ñi tsa tsahá Nyoo tsi nyoocho. ¹² Tyin tandihí nyívi tsa cutuñí iñi tsa caahán yu tan javahá ñi, cuaha ca cua cutuñí iñi ñi. Tan nyívi tsa ña cutuñí iñi, tan ña cuñí ñi javaha ñi, cua quihin nyaa ndihí yu tsa luxu ñi tsa tsitó ñi. ¹³ Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñí ñi maa tyin ña cutuñí iñi ñi, tumaa tsa ña tsiñí ñi cuví can. ¹⁴ Tyin tacan tan cundaa tsa cahán ra Isaías ra cuví ndusu yuhu Nyoo tahn tsanaha, tan catyí ra:

Tsa nditsa tyin nyoocho tsiñí ndo tuhun yu, maa tyin ña cutuñí iñi ndo.

Cua nyehe ndo tsa javahá yu, tan ña cua cutuñí iñi ndo.

¹⁵ Tyin tsa ndundava xaan añima nyívi ihya,

tan ña catsi vaha tsiñí ñi.
 tan ndasí tinuu ñi,
 na ña cua nyehe ñi tsihin
 tinuu ñi,
 tan ña cua cuñi ñi tsihin soho
 ñi.
 Tan ndí ña cua cutuñi iñi ñi
 tsihin añima ñi.
 Tan ndí ña cua nanducu ñi tsi
 yu, na janduvaha yu
 tsi ñi.

16 'Maa tyin sii xaan cuví
 tsi nyooho, tyin nyehé ndo
 tsihin tinuu ndo, tan tsiñí ndo
 tsihin soho ndo. 17 Tsa nditsa
 catyí yu tsihin ndo, tyin
 cuaaha xaan ra cuví ndusu
 yuhu Nyoo tan cuaaha xaan
 nyívi vaha, cuñi ñi nyehe ñi
 tsa nyehé nyooho tsa javahá
 yu, maa tyin ña nyehe ñi. Tan
 cuñi ñi tyaa soho ñi tandihi
 tsa tsiñí nyooho vityin, maa
 tyin ña tsiñi ñi.

*Nu catyí tuhun ra Jesús tsa
 cuñí tsi catyí cuhva tsa cahan
 ra tsihin nyívi tsa cuenda ra
 tatsi can*

(Mr. 4.13-20; Lc. 8.11-15)

18 'Tyaa soho ndo tsa cuñí
 tsi catyí cuhva tsa cahan yu
 tsa cuenda ra tsa tatsí tsiti
 trigu can: 19 Nyívi tsa tsiñí
 tuhun nácaa cuñí Nyoo cun-
 daca ñaha ra añima ñi, tan ña
 cutuñi iñi ñi, cuví ñi tumaa
 nu cucoyo tsiti trigu yuhu ityi.
 Tan quítsi nu ña vaha tan
 quihin nyaa nu tuhun Nyoo
 tsa iyó añima ñi. 20 Tan tu-
 maa nu cucoyo tsiti can tyañu
 yuu, juvin ñi nyívi tsa tsiñí
 tuhun Nyoo cuví can. Tan
 sii xaan naquihin vaha ñi
 itsi juhva ñi quívi. 21 Tyin
 nduve ñuhu cunu ican, ya-
 can cuenda cana tsiti can,

maa tyin ña cuví cuhun yoho
 tsi. Tan tacan cuví nyívi
 can. Juhva ñi quívi tsinú
 iñi ñi. Maa tyin quívi tsa
 quítsahá nyehe ñi tundoho,
 tan caahán ndasí nyívi tsata
 ñi tsa cuenda tuhun Nyoo,
 tacan tan jandihí ñi tsa tsinú
 iñi ñi. 22 Tan tumaa nu cu-
 coyó tsiti can tsitsi iñu, juvin
 ñi nyívi tsa tsiñí tuhun Nyoo
 cuví can. Tsiñí ñi, maa tyin
 ña cuñi ñi javaha ñi tumaa
 tsiñí ñi. Tyin tyaa xaan ca
 iñi ñi tundoho ñayívi tan ñavin
 ca tuhun Nyoo. Tan nyiyo ca
 iñi ñi tsa cuca. Tan tandihi
 tuhun can jatyañú tsi tsi ñi,
 tan cuví ñi tumaa yutun tsa
 ña tsahá tsiti. 23 Tan ñuhu
 vaha nu cucoyo tsiti can, ya-
 can cuví inga nyívi tsa tsiñí
 tuhun Nyoo, tan cutuñi iñi ñi,
 tan javahá ñi tandihi tuhun
 caahán ra. Yihí ñi cuví ñi tu-
 maa tsiti tsa cana tan tsaha tsi
 iin cientu tsiti, tan inga ñi cuví
 ñi tumaa tsiti tsa tsahá uñi
 xico, o tumaa tsiti tsa tsahá
 oco utsi tsiti intuhun intuhun.

*Nu caahán ra Jesús nácaa
 cuahán tuhun trigu tan cuhu
 ña vaha*

24 Tan cahan tucu ra Jesús
 inga cuhva ihya tsihin ñi; tan
 catyí ra:

—Tsa ndacá ñaha Nyoo tsi
 nyívi cuví tsi tumaa iin ra tsa
 tatsi tsiti trigu nu ñuhu ra.
 25 Tan cuhva tsa quixí tandihi
 ra jahá tyiñu naha ra, quihvi
 iin ra xaan iñi tsi ra jatsii
 can, tan quití ra tsiti cuhu ña
 vaha, tan cuahán ra. 26 Tan
 quívi cana tsiti trigu can, tan
 cana yoco tsi, cana ndihi tucu

cuhu ña vaha can. ²⁷ Tacan tan ra cuví musu can naha ra, tsahan ra naha tsicatyi tuhun ra naha tsihin tsitoho ra naha: “Tata, maa ñi tsiti trigu tatsi ndi, ¿tan nacuenda tyin caná cuhu ña vaha can?” catyi ra naha. ²⁸ Tan nacañan ra can tan catyi ra: “Iyó iin ra xaan iñi tsi yu javaha tsehe, tun cuví.” Tacan tan musu can, catyi ra naha tsihin tsitoho ra: “¿A cuñi un tyin cuhun ndi tan tuhun ndi cuhu ña vaha can?” ²⁹ Tan tsitoho ra naha catyi ra: “Ña tuhun ndo, tyin coto tuhun ndihi ndo trigu can. ³⁰ Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhni ra naha cuenda jucun, tan cahmi ra naha. Tan yaha can tan natyihí vaha ra naha tsa vaha can tsitsi yaca yu.”

Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo

(Mr. 4.30-32; Lc. 13.18-19)

³¹ Tacan tan cañan ra Jesús inga cuhva ihya tsihin ñi tan catyi ra:

—Tsa ndacá ñaha Nyoo tsi nyivi cuví tsi tumaa iin tsiti mostaza tsa tatsi iin ra nu ñuhu ra. ³² Tyin tsiti can lihli ñi tsi tan ñavin ca tandihi ca tsiti. Maa tyin quivi tsahnu tsi cuví tsi iin yutun. Tan quitsi saa, tan javahá ti taca ti soco tun —catyi ra Jesús.

Nu caahán ra Jesús tyin tumaa yutsan iya tacan cuví tsa

ndacá ñaha Nyoo tsi yo
(Lc. 13.20-21)

³³ Tan cañan ra Jesús inga cuhva ihya tsihin ñi tan catyi ra:

—Tsa ndacá ñaha Nyoo tsi nyivi cuví tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndaá tandihi yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyi ra.

Nu catyi tuhun ra Jesús nacuenda jacuahá ra tsi nyivi tsihin cuhva

(Mr. 4.33-34)

³⁴ Tandihí tuhun can cañan ra Jesús tsihin nyivi tsihin cuhva. Tan tandihí tsa cañan ra tsihin ñi ña cañan catsi maa ra, maa ñi maa tsihin cuhva cañan ra. ³⁵ Tacan cuví tyin tacan tan cundaa tsa cañan Jutu Mañi yo tsihin yuhu ra cuví ndusu yuhu ra tahañ tsanaha tan tyaa ra tye-hen:

Tsihin cuhva cua cañan yu tsihin nyivi.

Cua cañan yu tsihin ñi tuhun tsa yihí xeehe nda cuanda tsa javaha Nyoo ñuhu ñayivi.

Nu caahán ra Jesús náa cuñi tsi catyi cuhu ña vaha tsa caná tsihin tsiti trigu can

³⁶ Tacan tan jacunuhu ra Jesús tsi nyivi, tan quihvi ra tsitsi vehe nu nyii ra. Tan natuhva ra tsicá tsihin ra nu nyaá ra, tan catyi ra naha tsihin ra:

—Catiyí tuhun tsihin ndi náa cuñi tsi catyi tsa cañan un

tsihin nyivi tsa cuenda cuhu ña vaha tan trigu can.

³⁷ Tacan tan quitsaha catyí ra Jesús tshin ra naha:

—Ra tsa tatsi tsiti trigu can cuví yuhu Rayi tsa quee nda gloria. ³⁸ Tan ñuhu can cuví nyivi iyó nu ñuhu ñayivi. Tan tsiti trigu can cuví nyivi tsa ndacá ñaha Nyoo. Tan cuhu ña vaha can cuví nyivi tsa nyicún tsi nu ña vaha. ³⁹ Tan nu tsa tatsi cuhu ña vaha can, nu ican cuví nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñi tsi catyí quivi cua cundihi ñuhu ñayivi. Tan ra tsa cua naquihin tsiti can, cuví ra ángel naha ra. ⁴⁰ Tumaa jataca ra naha cuhu ña vaha can tyin cayu tsi, tacan cua cuví quivi cua cundihi ñayivi. ⁴¹ Yuhu Rayi tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí. ⁴² Tan cua tyihi ra naha tsi ñi tsitsi ono nu cayú ñuhu. Tan ican cua vacu tsaa ñi tan cahyu ña cua cuvi nuhu ñi. ⁴³ Nyooho tan nyivi javahá cuhva cuñi Nyoo cua quituvi ndo nuu Jutu yo. Tan cua cuvi ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaa soho ndo tsa caahán yu.

Xuhun cuaan tsa yihí xeehe

⁴⁴ Tsa ndacá ñaha Nyoo tsi nyivi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra

xuhun cuaan can, tan tyihí xeehe nyico ra inga tsaha, tan sii xaan cuñi ra cuanuhu ra tan xico ra tandihí tsa iyó tsi ra. Tacan tan jata ra ñuhu nu yihí xeehe xuhun cuaan can.

Iin cuhva tsa cahan ra Jesús cuenda iin yuu xiñu tsa yahvi xaan nyaá

⁴⁵ Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra, ⁴⁶ tan tsa ñihí ra iin tsa yahvi xaan nyaá, xico ra tandihí maa tsa cumi ra, tan jata ra yuu xiñu vaha can.

Nu caahán ra Jesús iin cuhva cuenda traya

⁴⁷ Tan juvin ñi cuví tucu tsa ndacá ñaha Nyoo tsi nyivi tumaa iin traya tsa cañi ra naha nu ndutya ñuhu, tan ñihí ra naha tandihí nuu tyaca. ⁴⁸ Tan tsa tsitu traya can tshin tyaca, tavá ra naha traya can nu ityi. Tan ican nacatsi ra naha tsi ti, naquihin vaha ra naha quití vaha tsitsi iin tyica, tan javitá ra naha quití ña vaha can. ⁴⁹ Tan tacan cua cuvi quivi naa ñayivi, cua quitsi ángel, quitsi tava sin ra naha tsi nyivi vaha tan nyivi ña vaha. ⁵⁰ Tan cua tyihi ra naha tsi nyivi ña vaha can anyaya nu cayú ñuhu, nu cua vacu tsaa ñi tan cahyu ña cua cuvi nuhu ñi.

Nu caahán ra Jesús tyin vaha tuhun tsahnu Nyoo tan tuhun tsaa Nyoo

⁵¹ Tacan tan ra Jesús tsica tuhun ra tsi ra tsicá tshin ra, tan catyí ra tshin ra naha:

—¿A cutuñi iñi ndo tandihi tsa cahān yu?

Tan nacahān ra naha tan catyí ra naha:

—Cutuñi iñi ndi, Jutu Mañi yu.

⁵² Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihi ra nácaa ndacá ñaha Nyoo tsihin tandihi tuhun tsa tsa caahān yu, cua cuví ra tumaa iin ra jatsii vehe tan cua jacuaha ra nduvi taahan tuhun vaha can tsi nyivi —catyí ra Jesús.

Nu tsinuhu ra Jesús ñuu Nazaret nu tsahnu ra

(Mr. 6.1-6; Lc. 4.16-30)

⁵³ Tsa ndihi cahān ra Jesús cuhva ihya tan quita ra cuahān ra. ⁵⁴ Tan tsa nyico ra ñuu ra. Tan quitsaha jacuaha ra tsitsi vehe ñuhu ñuu can. Tan iyo cuñi nyivi tan catyí ñi:

—¿Nu maa tahan cutuhva ra ihya tsa tsitó xaan ra? ¿Tan nácaa cuví javaha ra tsa iyo?

⁵⁵ Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas. ⁵⁶ Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhva ra tandihi tsa tsitó ra? —catyí ñi.

⁵⁷ Tan yacan cuenda ña cuñi ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyivi tandihí ñi ityi jahá ñi tsa ñayivi tsi ra ndusu yuhu Nyoo, maa tyin

nyivi ñuu ra ña tyaa yahvi ñi tsi ra tan ndi nyivi vehe ra —catyí ra Jesús.

⁵⁸ Tan ña cuaha tsa iyo javaha ra ñuu ra tsa cuenda tyin ña tsinú iñi ñi tsi ra.

14

Nu catyí tsi nácaa tsihi ra Juan, ra jacoondutyā tsi nyivi
(Mr. 6.14-29; Lc. 9.7-9)

¹ Quivi can ra Herodes, ra ndacá ñaha nichanu nu cuví Galilea, ñihi tuhun ra tsa javahá ra Jesús. ² Tan catyí ra tsihin ra yucú tsihin ra:

—Ra ican cuví ra Juan, ra jacoondutyā tsi nyivi, ra tsa tsihi tan vityin nandoto nyico ra. Yacan cuenda iyó tunyee iñi tsi ra tsa javahá ra tsa iyo.

³⁻⁴ Tacan catyí ra tyin juvin ñi maa ra tava tyiñu tyin tiin ra naha tsi ra Juan. Tan cuhñi ra naha tsi ra tsihin cadena, tan tyihi ra naha tsi ra vehe caa. Tacan javaha ra Herodes tyin xaan cuñi ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasihi ra Felipe, yañi ra.

⁵ Yacan cuenda ra Herodes cuñi ra cahñi ra tsi ra Juan, maa tyin yuuhví ra tsi nyivi, tyin tandihí ñi tsinú iñi ñi tyin ra Juan, ndusu yuhu Nyoo cuví ra. ⁶ Tan iin quivi iyó vico ra Herodes, tan sehe ña Herodías quitsaha tsañi ña yaa nu yucú ñi vico can. Tan tahañ xaan iñi ra Herodes. ⁷ Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

⁸ Tacan tan natyuhū sīhi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra ja-coondutyá tsi nyívi, tsi yu nu iin coho —catyí ña.

⁹ Tsa tsiñi ra rey Herodes tsa cahan ña, nducuihya cuñi ra. Maa tyin tsa cuenda tsa cahan ra tyin tandihi tsa cua ndacan ña tan cua cuhva ra, yacan cuenda ña cuvi jandaví ñaha ra tyin tandihi nyívi yucú vico can tan tsiñi ñi tsa cahan ra. Yacan cuenda tava tyiñu ra na cuhva ra naha jiñi ra Juan tsi ña nu iin coho. ¹⁰ Tan tava tyiñu ra na cucahnya ra naha jucun ra Juan nu nyí ra vehe caa. ¹¹ Tacan tan tsindaca ra naha jiñi ra Juan tsi ña, nyí tsi nu iin coho. Tan tsaha ra naha tsi ñaha tyuvaa can. Tan maa ña nacuhva cuenda ña tsi sīhi ña.

¹² Tacan tan tsaá ra nyicun tsi ra Juan naha ra tan naquihin ra naha cuñu ñuhu ra, tan tyihí ra naha tsitsi ñuhu. Yaha can tan tsahan ra naha tsijacotō ra naha tsi ra Jesús.

Nu jacatsi ra Jesús tsi uhun mil rayi

(Mr. 6.30-44; Lc. 9.10-17; Jn. 6.1-14)

¹³ Tsa tsitō ra Jesús tsa tahañ ra Juan, quihin ra iin yutun ndoo, tan cuahán intuhun ñi maa ra nu taxin caa. Tan tsa tsitō nyívi, quitā ñi ñuu ñi, tan cuahán tsihin tsaha ñi nu nyí ra. ¹⁴ Tsa quitā ra Jesús tsitsi

yutun ndoo can, tan nyehe ra tyin cuaha xaan nyívi nyicun tsi ra. Tan cundaahvi ñi ra nyehe ra tsi ñi. Tan janduvaha ra tsi nyívi cuuhvi tsa tsaá tsihin ñi. ¹⁵ Tan tsa cuñi cuaa, tacan tan natuhva ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyívi iyó yatyin ñi ihya. Yacan cuenda vaha ca cahan un tsihin nyívi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

¹⁶ Tan ra Jesús catyí ra:

—Nduve náa nducu ñi cuhun ñi. Cuhva nyoocho tsa catsi ñi.

¹⁷ Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

¹⁸ Tan catyí ra Jesús:

—Ndaça ndo can tsi yu.

¹⁹ Tacan tan catyí ra tsihin nyívi tyin na cunyecū ñi nu cuhu can. Yaha tsa tsinyecu ñi tan quihin ra uhun taahan paan can, tan nduvi tyaca can. Tan nanyehē ndaa ra ityi siqui, tan nacuhva ra tyahvi nyoo tsi Nyoo tan tsahnū cū-atyí ra paan can. Tan tsaha ra tsi ra tsicá tsihin ra, na tsatsa ra naha tsi nyívi can. ²⁰ Tan tandihi nyívi tsatsi ñi tan ndaha vaha ñi ñi. Yaha can tan ndoo ca tsa ñahñu, tan jacutū ra naha utsi uvi tyica tsihin tsa ñahñu ican. ²¹ Tan tsa tandihi ñi tsa tsatsi can, quitā maa tumaa uhun mil

tsa maa ñi maa rayi. Tan siin maa ñiñaha tan tsa nyihi.

Nu tsicá ra Jesús nu ndutya (Mr. 6.45-52; Jn. 6.16-21)

22 Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi. 23 Tsa yaha tsa jacunuh ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaa. 24 Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañi tsi tsi yutun ndoo can tsa cuenda tyin ñihi xaan yihí tatyí nu cuahán ra naha. 25 Tan tsa cua tui cuahán ndihi ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya. 26 Tan cuhva tsa nyehe ra naha tsi ra, tsicá ra nu ndutya can, nayuhvi xaan ra naha. Tan caná tsa ra naha, tan catyí ra naha:

—¡Jihna ndo xin. Tatyí vatsi can!

27 Maa tyin nacahan ra Jesús tsihin ra naha, tan catyí ra:

—¡Ña nayuhvi ndo tyin maa yu cuví! —catyí ra.

28 Tacan tan nacahan ra Pedro tan catyí ra:

—Jutu Mañi yu, tatun maa un vatsi juvin, cuhva tsa quitsi ndihi yu nu vatsi un.

29 Tan ra Jesús catyí ra tsihin ra:

—Ñaha jiin.

Tacan tan quita ra Pedro tsitsi yutun ndoo can, tan quitsaha tsicá ra nu ndutya tan cuahán ra nda nu vatsi ra Jesús. 30 Maa tyin cuhva tsa tui ñi ra tyin ñihi xaan quitsaha yihí tatyí, nayuhvi xaan ra, tacan tan quitsaha cuñi nyee ra, tan quitsaha caná tsa ra tan catyí ra:

—¡Jacacu tsi yu, Jutu Mañi yu!

31 Tan iin yaha ñi tin ra Jesús ndaha ra, tan catyí ra tsihin ra:

—¿Nacuenda tsa nayuhvi un, yooho tsa luxu xaan tsinú ñi tsi yu? —catyí ra Jesús tsihin ra.

32 Tan cuhva tsa quihvi ra naha tsitsi yutun ndoo can, cutaxin tatyí can. 33 Tacan tan ra yucú tsitsi yutun ndoo can tsicuiñi tsi ra naha nu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

Nu janduvaha ra Jesús tsi nyivi cuuhvi tsa iyó Genesaret (Mr. 6.53-56)

34 Tsa yaha sava ra naha miñi can, tsa ra naha ñuhu Genesaret. 35 Tan cuhva tsa nacoto nyivi iyó ican tsi ra Jesús tyin juvin ra cuví, jacoto ñi tsi tandihi nyivi iyó tani cahnu can. Tan tsindaca ñi tandihi nyivi cuuhvi nu nyii

ra. ³⁶ Tan caahán ndaahvi ñi tsihin ra, na cuhva ra tsa tiin ñi vasu luxu jahma ra. Tan tandihi ñi tsa tiin jahma ra, nduvahá ñi.

15

Tsajativí tsi nyivi nuu Nyoo
(Mr. 7.1-23)

¹ Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyí ra Jesús tan tsicá tuhun ra naha tsi ra, tan catyí ra naha:

² —¿Nacuenda ña javahá ra tsicá tsihin un naha ra cuhva nacoó tsii tsaahnu yo?, tyin catyi ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyi ra naha.

³ Tan tsicá tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñi ndo tyaá yahvi ndo tsa caahán Nyoo? ⁴ Tyin Nyoo catyí ra: “Tyaa yahvi ndo tsi jutu ndo tan tsi sihi ndo, tyin tandihi nyivi tsa caahán ndavaha ñi siqui jutu ñi o sihi ñi, cua cúu ñi”, catyí Nyoo. ⁵ Maa tyin nyooho catyí ndo tyin cuví catyi ndo tsihin jutu ndo o tsihin sihi ndo tyehen: “Ña cuví jatyinyee yu tsi un tyin tsa tsaha yu tandihi tsa iyó tsi yu tsi Nyoo.” ⁶ Tatun tsa catyi ndo yacan, ña cuñi tsi tsa jatyinyee ndo tsi jutu ndo o tsi sihi ndo, catyí ndo.

Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo. ⁷ ¡Nyooho cuñi ndo tyin vaha xaan ndo, maa tyin ña nditsa ndo! Nditsa tsa cahan ra Isaías, ra cuví ndusu yuhu Nyoo, siqui ndo jaha Nyoo. Tan catyí ra tyehen:

⁸ Nyivi ihya, jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ñi.

⁹ Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jaha Nyoo, catyí ra Jesús tsihin ra ican naha ra.

¹⁰ Tacan tan cana ra Jesús tsi nyivi tan catyí ra tsihin ñi:

—Tyaa soho ndo tsa caahán yu, tan nducu ndo cuhva cutuñi ñi ndo. ¹¹ Tyin nyivi tsa tiví nuu Nyoo, ñavin tsa quihví yuhu ñi jativí tsi ñi. Tyin tiví ñi jahá tsa quitá yuhu ñi.

¹² Tacan tan natuhva ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñi ra naha tsa tsiñi ra naha tsa cahan un.

¹³ Tan maa ra Jesús nacahan ra tan catyí ra:

—Tandihi yutun tsa ña tatsi Jutu yu, ra nyaá gloria, cua tuhun ra nda cuanda yoho tun. ¹⁴ Jaña ndo tsi ra fariseo naha ra tyin ra cuaa cuví ra naha, tan janahá ra naha ityi

tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

¹⁵ Tacan tan quitsahá catyí ra Pedro tsihin ra Jesús:

—Catyi tuhun tsihin ndi náa cuñi tsi catyi tsa cahān un nañi.

¹⁶ Tacan tan ra Jesús catyí ra tsihin ra naha:

—Ndi nyooho tan ña cutuñi ndihi iñi ndo. ¹⁷ ¿A ña cutuñi iñi ndo tyin tsa tsatsi yo, tsitsi yo cuahán tsi? Yaha can tan cua quita nyico tsi. ¹⁸ Maa tyin tuhun tsa quitá yuhu yo, tsitsi añima yo queé can tan nyivi tiví ñi nuu Nyoo jahá tsa caahán ñi. ¹⁹ Tyin tsa caquiñi tsicá iñi ñi tsitsi añima ñi quitá can, tan cuñi ñi cahñi ñi nyivi. Cuñi ñi suhu ñi. Yihí nyivi caahán ñi cuendu, o jacuñi nyaa ñi tsi inga ca nyivi. Yihí ra cuñi ra coo inga ñaha ra, o ñiñaha iyó yñi tsicá nuu ñi tsihin inga rayñi. Yihí ra tsi-coó ra tsihin ñaha tan ña tindaha ra tsihin ña. Tan yihí rayñi quixí ra tsihin juvin ñi maa rayñi. Tan ñiñaha yihí ñi quixí ñi tsihin juvin ñi maa ñaha. Tan tandihi ca maa tsa caquiñi tsa javahá ñi tsihin cuñu ñuhu ñi. ²⁰ Yacan cuví tsa jativí tsi nyivi nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jativí can tsi ñi —catyí ra Jesús.

*Nu tsinu iñi iin ñaha inga ñuu tsi ra Jesús
(Mr. 7.24-30)*

²¹ Quita ra Jesús ñuu can tan cuahán ra ityi ñuu Tiro tan Sidón. ²² Tan ityi can iyó iin ñaha Canaán. Tan tsa nyehe ña tsi ra Jesús natuhva ña nu nyaá ra tan caná tsa ña tan catyí ña:

—Jutu Mañi yu, tata ra David, cundaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

²³ Maa tyin tumaa tsa ña tsiñi ñi ra Jesús jahá ra tsi ra tan ña nacahān ra tsa iin yaha ñi. Tacan tan natuhva ra tsicá tsihin ra tan catyí ra naha tsihin ra:

—Cahan tsihin ña na cunuhu ña tyin utsan xaan yo tsa caná tsa ña tsata yo.

²⁴ Tacan tan catyí ra Jesús tsihin ra naha:

—Vatsí yu jaha Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

²⁵ Tan ñaha can natuhva ña nu nyaá ra tan tsicuiñi tsiti ña nuu ra, tan catyí ña tsihin ra:

—Jutu Mañi yu, jatyinyee tsi yu!

²⁶ Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

²⁷ Maa tyin ña ndasi cuñi ña tsa cahān ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan

tsatsí ti titsehe tsa cucoyo xuu mesa tsitoho ti —catyí ña.

²⁸ Tacan tan catyí ra Jesús tsihin ña:

—Yooho ñaha, tsinú xaan iñi un tsi yu. Na cuvi maa cuhva tsicá iñi un.

Tan juvin ñi cuhva can tan nduvahá sehe ña.

Nu cuaha xaan nyivi cuhví janduvahá ra Jesús

²⁹ Tsa yahá yacan tan ra Jesús cuahán ra ityi yuhu miñi Galilea, tan ndaa ra iin jiñi yucu tan ican tsinyaa ra.

³⁰ Tan cuaha xaan nyivi cuahán ñi nu nyaá ra cuandacá ñi nyivi cuhví tyin janduvaha ra tsi ñi. Yihí ñi coxo ñi, cuaa ñi, ñiñi ñi, lundu ñi. Tan yihí ñi yihí inga ca nu cuehe tsi ñi. Tan tsaquin nyecu ñi tsi tandihí ñi cuhví can nu nyaá ra Jesús. Tan janduvahá ra tsi ñi. ³¹ Tan iyo xaan cuñí nyivi can nyehé ñi tyin nacahan ñi ñiñi tan nduvahá ñi lundu, tan nacacá ñi coxo, tan nanyehé ñi cuaa. Tan quitsahá jacahnu xaan ñi tsi Nyoo ñi, tsa cuví ñi nyivi Israel.

Nu tsahá ra Jesús tsa catsi cumi mil rayi

(Mr. 8.1-10)

³² Tacan tan caná ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyivi ihya, tyin tsa uñi quivi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha

ñi ityi cuanuhú ñi —catyí ra Jesús.

³³ Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyivi cuaha ihya, tyin ihya nduve nyivi iyó?

³⁴ Tacan tan ra Jesús tsicá tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

³⁵ Tan catyí ra tsihin nyivi na cunyecú ñi nu ñuhu.

³⁶ Tacan tan quihín ra tsa utsa paan can tañ tyaca can, tan nacuhvá ra tyahvi nyoo tsi Nyoo. Tan quitsahá tsahnú cuatyí ra paan tsihin tyaca, tan tsahá ra tsi ra tsicá tsihin ra tyin na tsatsa ra naha tsi nyivi. ³⁷ Tandihí ñi tsatsí ñi, tan ndahá vaha iñi ñi. Tan tsa ndihí tsatsí ñi tan naquihín ra naha tsa ñahñu tsa ndoo can tan quitá utsa tyica cuví tsi. ³⁸ Tan ra tsa tsatsí can naha ra quitá maa cumi mil ra naha tan sñn maa ñiñaha tan tsa nyihi. ³⁹ Yahá can tan jacunuhu ra tsi ñi, tan quihví ra tsitsi yutun ndoo, tan cuahán ra ityi Magdala.

16

Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo

(Mr. 8.11-13; Lc. 12.54-56)

¹ Tacan tan ra fariseo naha ra tan ra saduceo naha ra tsahan ra naha nu nyíi ra Jesús, tyin cuñí ra naha

nducu cuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo. ² Maa tyin nacahan ra Jesús tan catyí ra tsihin ra naha:

—Tsa cueñi, tuhvá ndo catyí: “Sii xaan caa ityaan cua cuvi tyin cuaaha xaan nu vico”. ³ Tan tsa tuvi catyí tucu ndo tyin ña sii maa caa cua cuvi, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha? ⁴ Nyivi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñi ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuví tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

Tuhun caahán ra fariseo naha ra cuví tsi tumaa yutsan iya

(Mr. 8.14-21)

⁵ Cuhva tsa yaha ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha. ⁶ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

⁷ Tacan tan quitsaha natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan

cuenda caahán ra tyehen tsihin yo? —catyí ra naha.

⁸ Tan tsa tuvi iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo? ⁹ ¿A ñaha ca cutuñi iñi ndo? ¿A ña nducuhún iñi ndo quiñi tsa jacatsi yu tsi uhun mil rayii tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can? ¹⁰ ¿A tsa naá ndihi tucu iñi ndo quiñi tsa jacatsi yu cumi mil rayii, tan najava taahan tyica jacutu ndo tsihin tsa ndoo tsa utsa taahan ñi paan? ¹¹ ¿Nacuenda ña tuvi iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

¹² Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

Nu catyí ra Pedro tyin ra Jesús cuví ra Cristo, ra jacacú tsi yo

(Mr. 8.27-30; Lc. 9.18-21)

¹³ Cuhva tsa tsaá ra Jesús ityi ñuu Cesarea Filipo, tsicá tuhun ra tsi ra tsicá tsihin ra tan catyí ra:

—¿Náa catyí nyivi? ¿Yoo ra cuví yu, Rayii tsa quee nda gloria? —catyí ra.

14 Tan nacahan ra naha tan catyí ra naha:

—Yihí nyivi catyí ñi tyin ra Juan ra jacoondutya tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahan tsanaha cuví un.

15 Tacan tan catyí ra tsihin ra naha:

—Tan nyooho, zyóo ra cuví yu, catyí ndo?

16 Tacan tan nacahan ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

17 Tan nacahan ra Jesús tan catyí ra:

—Si xaan cuví tsi yooho, Simón, sehe ra Jonás, tyin ñavin nyivi janaha tuhun ihya tsi un, tyin maa Jutu yu, ra nyaá gloria janaha tsi un.

18 Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi. 19 Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu ñuhu ñayivi, tsa nuuhñi jahá Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

20 Tacan tan catyí ra Jesús tsihin ra tsicá tsihin ra tyin ña cahan ra naha tsihin nyivi tun juvin ra cuví ra Cristo ra tsa quee nu nyaá Nyoo.

Nu caahán ra Jesús tyin cua cahñi nyivi tsi ra

(Mr. 8.31—9.1; Lc. 9.22-27)

21 Nda quivi can quitsaha catyí ra Jesús tsihin ra tsicá tsihin ra, tyin cuñí tsi tsa cuhun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha.

22 Tacan tan quihin ra Pedro tsi ra tan quita sin ra tsihin ra tan quitsaha caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

23 Tan nanyico coo ra Jesús, tan quitsaha caahán ra tsihin ra Pedro:

—¡Jatsiyo nyaha tsi un, cuihna! Tyin cuñí un casi un tsi yu. Tyin yooho ña tsicá iñi un cuhva cuñí Nyoo, tyin cuhva cuñí nyivi tsicá iñi un —catyí ra.

24 Tacan tan ra Jesús catyí ra tsihin ra tsicá tsihin ra:

—Tatun ndáa nyooho cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuví javaha ndo tsa cuñí Nyoo. Tan ña cua ndu uvi iñi ndo tsa yihí ndo cuenda yu, vasu tandihi quivi nyehé ndo tundoho. Tyin yacan cuví cruu tsa taahán tsi

cuiso ndo tatun cua cunyi-cun ndo tsi yu. ²⁵ Tan nyooho tsa ña cuñi nyehe tundoho, tan ña cuñi ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi ndo tsa cuenda yu, cua cacu ndo. ²⁶ Tyin nduve yahvi nyaá tsa cua ñihi ndo tandihi tsa iyó nu ñuhu ñayivi tun añima ndo tan ña cua cacu tsi. Tyin nduve maa náa tsihin tan cuvi tyahvi ndo tan ña cua cunaa añima ndo. ²⁷ Tyin yuhu, Rayi tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javaha ndo. ²⁸ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

17

Nu nyehe uñi taahán ra tsicá tsihin ra Jesús nácaa tsa si caá xiñu ra Jesús nu ndacá ñaha ra nda gloria

(Mr. 9.2-13; Lc. 9.28-36)

¹ Tan tsa yaha iñu quivi, tan quihin ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha. ² Tan ican nasama cuhva caá ra Jesús nuu ra yucú tsihin ra. Tan xiñu xaan nuu ra cuvi tumaa xiñu

ñicanyii. Tan jahma ra cuitsin xaan tsi cuvi tumaa cuitsin ñuhu. ³ Tacan tan nyehe ra naha tsi ra Moisés tan ra Elías, natuhún ra naha tsihin ra Jesús. ⁴ Tan quitsaha caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñi un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

⁵ Tsitsi tsa caahán ra Pedro, quitsi iin vico tsa xiñu xaan siqui ra naha. Tan tyasi tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñi xaan yu tsi ra. Tan sii xaan cuñi yu tsihin ra. Tyaa yahvi ndo tsa caahán ra —catyí ndusu can.

⁶ Tsa tsiñi ra tsicá tsihin ra Jesús tuhun ihya, tsicava tsihin nuu ra naha nda nu ñuhu, tyin nayuhvi xaan ra naha. ⁷ Tacan tan natuhva ra Jesús nu cayucú ra naha, tan tijn ra tsi ra naha, tan catyí ra:

—Nduvita ndo, tan ña nayuhvi ndo.

⁸ Tan cuhva tsa nanyehe ra naha, intuhun ña ra Jesús nyaá, tan nduve inga uvi ca ra naha.

⁹ Tan cuhva tsa vatsí nuu ra naha yucu can, catyí ra Jesús tsihin ra naha:

—Ña çahan ndo tsa nyehe ndo ihya tsihin nyivi. Tsa yaha tsa cúu Rayi tsa quee nda gloria tan nandoto ra,

tacan tan cua cahan ndo can —catyí ra.

¹⁰ Tacan tan tsicá tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

¹¹ Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihi. ¹² Maa tyin yuhu catyí yu tsihin ndo tyin tsa yaha quitsi ra Elías, tan ña nacoto nyivi tsi ra, tan javaha ñi tsihin ra tandihi cuhva cuñi maa ñi. Tan tacan tucu yuhu, Rayi tsa quee nda gloria, cua janyehe ñi tundo ho tsi yu —catyí ra tsihin ra naha.

¹³ Tacan tan cutuñi iñi ra naha tyin tuhun ra Juan, ra jacoondutya, caahán ra Jesús.

Nu janduvaha ra Jesús tsi iin ra luhlu tsa tsiihi naaha jahá tatyí ña vaha

(Mr. 9.14-29; Lc. 9.37-43)

¹⁴ Cuhva tsa tsaá ra naha nu yucú nyivi, natuhvá iin ra tan tsicuiñi tsiti ra nuu ra Jesús, tan catyí ra tsihin ra:

¹⁵ —Tata, cundaahvi iñi tsi sehe yu, tyin yihí cuehe tsihi naaha tsi ra, tan tuhvá ra nduva ndasava, tan cuaha xaan tundo ho nyehé ra jahá cuehe can. Tan yihí tsaha nduvá ra nu ñuhu tan cayú ra, tan nduvá tucu ra nu yihí ndutya. ¹⁶ Tan tsindaca yu tsi ra tsi ra tsicá tsihin un,

maa tyin ña cuví janduvaha ra naha tsi ra —catyí ra.

¹⁷ Tan nacahan ra Jesús tan catyí ra:

—¿Nyooho, nyivi tsa ña tsinú iñi cuví ndo! ¿Tan caquiñi ndo! ¿Ndáa nda quivi cua cunyi yu tsihin ndo? ¿Tan ndáa nda quivi cua cunyeé iñi yu tsihin ndo, tyin nyooho ña tsinú vaha maa iñi ndo tsi yu? Tindaca ndo tsi ra luhlu tsi yu —catyí ra.

¹⁸ Tacan tan tava ra Jesús tsi nu tatyí ña vaha can, tan quita nu tsi ra luhlu can. Tan juvin ñi cuhva can nduvaha ra.

¹⁹ Tsa yaha can tan tsicá tuhun siin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuví tava ndi tatyí ña vaha can?

²⁰ Tan ra Jesús nacahan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuví catyí ndo tsihin yucu ihya na catiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuví javaha ndo tatun nditsa tsa tsinú iñi ndo tsi yu. ²¹ Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

Inga tsaha cahan ra Jesús tsa cua cahñi nyivi tsi ra

(Mr. 9.30-32; Lc. 9.43-45)

22 Yucú ra naha Galilea can, tan ra Jesús catyí ra tsihin ra naha:

—Yuhu, Rayi tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra. ²³ Tan cua cahñi ra naha tsi yu. Maa tyin tsa tsinu uñi quivi tan cua nandoto yu —catyí ra.

Tsa tsiñi ra naha tuhun ihya, cuihya xaan cuñi ra naha cuvi.

Nu tyahví ra naha cuenda tsa nduvaha vehe ñuhu cahnu

²⁴ Cuhva tsa tsaá ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsahān ra naha tsinyehe ra naha nu nyií ra Pedro tan tsicá tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahví xuhun tsa cuenda vehe ñuhu cahnu? —catyí ra naha tsihin ra Pedro.

²⁵ Tan nacahān ra Pedro tan catyí ra:

—Tuhvá ra.

Tan tsa quihvi ra Pedro tsitsi vehe nu iyó ra naha, jihna ca ra Jesús nacahān tan catyí ra:

—¿Nacaa cuñi yooho, Simón? ¿Yóo tsi quihín ra cuvi rey tsa iyó nu ñuhu ñayivi ihya yahvi? ¿A tsi nyivi ñuu maa ra o tsi inga nyivi?

²⁶ Nacahān ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña taahán tsi tyahvi ñi.

²⁷ Maa tyin ña cuñi yo tsa cahān ra naha siqui yo, yacan cuenda vaha ca tsa cahun un yuhu miñi can, tan jacuhun un yiqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

18

Nu janahā ra Jesús yóo ra cahnu ca cuví nuu tandihi nyivi tsa ndacá ñaha Nyoo

(Mr. 9.33-37; Lc. 9.46-48)

¹ Quivi can natuhva ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuví nu ndacá ñaha Nyoo?

² Tacan tan ra Jesús canā ra tsi iin ra luhlu, tan tyaa ra tsi ra mahñu ra naha. ³ Tan catyí ra:

—Tsa nditsa catyí yu tsihin ndo, tyin tatun nyooho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuvi quihvi ndo nu ndacá ñaha Nyoo. ⁴ Tyin ra tsa cahnu ca cuví nuu Nyoo, juvin ra cuví ra tsa janduluhlu tsi, tumaa ra luhlu ihya.

⁵ Nyivi tsa naquihín tsi iin nyivi tumaa ra luhlu ihya, tyin tsinú iñi ñi tsi yu, yuhu naquihín cuenda ñi.

Nu caahán ra Jesús tsihin yo nácaa jaha cuenda yo tsi yo coto javaha yo tsa ña vaha

(Mt. 5.29-30; Mr. 9.42-48; Lc. 17.1-2)

6 'Tatun yóo nyívi natyuhú tsi iin nyívi tsa ñaha ca tsinú vaha iñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan cujanehñi nyívi tsi ñi nu cunu ndutya ñuhu. 7 ¡Ndahvi nyívi ñuu ñayívi, tyin tacan iyó tsa jatívi tsi ñi! ¡Tan ndahvi tucu ra ndaahvi tsa jatívi tsi ñi!

8 'Yacan cuenda tatun ndaha un o tsaha un javahá tsa ña vaha, cahnya can tan javita un. Tyin vaha ca quihvi un nu coo un tsihin Nyoo tsihin tsa lundu ndaha un o lundu tsaha un, tan ñavin ca tsa nanii un tan jacuhun Nyoo tsi un nu cayú ñuhu tsa ña cua ndahva maa. 9 Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhu tsitsi anyaya.

Nu cahan ra Jesús tyin tumaa mbee tsa cunaq, tacan cuvíyo

(Lc. 15.3-7)

10 'Ña caca iñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria. 11 Tyin yuhu, Rayii tsa quee nda gloria, vatsí jacacu yu tsi nyívi tsa cuanaa.

12 ¿Nacaa cuñi nyoooho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cuhun ra cunanducu ra tsi quití tsa cuanaa can? 13 Tan tatun nañihi ra tsi ti, tsa nditsa tyin sii ca cua cuñi ra tsihin quití can, tan ñavin ca tsihin tsa cumi xico tsahun cumi quití tsa ña tsinaa. 14 Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyívi tsa cuví tumaa ra nyihi ihya.

Nacaa taahán tsi jahá tahan yo tucahnu iñi tsi yo

(Lc. 17.3)

15 'Tatun ra yañi un tan javaha ra tsa ña vaha tsi un, cahan tsihin intuhun ñi maa ra tan catyi un tsihin ra tyin ña vaha cuhva javaha ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can. 16 Maa tyin tatun ña tyaa yahvi ra tsi un, tacan tan cana un tsi iin o uvi ra tyin cuví ra naha tsa ndaa tsa cuenda tsa cua cahan un tsihin ra can. 17 Tatun ña tyaa yahvi ra ndi maa tsi ra tsa sahan tsihin un naha ra, tacan tan cahan tsihin tandihi nyívi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jaha ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tava xuhun cuenda ra ndacá ñaha nda ñuu Roma.

18 'Tsa nditsa catyí yu tsihin ndo, tyin tandihi tsa cuhñi

ndo ihya nu ñuhu ñayivi, tsa nuuhñi tsi jaha maa Nyoo nda gloria. Tan tandihi tsa ndatsi ndo ihya nu ñuhu ñayivi, tsa ndatsi maa Nyoo nda gloria.

¹⁹ Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahan ndo tan tsicán ndo tsi Jutu yu, ra nyaá gloria, cua kuhva ra yacan tsi ndo.

²⁰ Tyin nu yucú uvi o uñi nyivi tan jacahnú ñi tsi yu, ican nyaá yu mahñu ñi —catyí ra Jesús.

²¹ Tacan tan tsahan ra Pedro tsindaca tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahan tsi jaha yu tucahnu iñi tsi ra? ¿A utsa taahan tsaha?

²² Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahan tsi jaha un tucahnu iñi.

Nu cahan ra Jesús iin kuhva cuenda iin ra tsa ña cuñi jaha tucahnu iñi

²³ Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandihi musu ra tyin cua nyehe ra nácaa nyaá cuenda ra naha tsi ra. ²⁴ Tan kuhva tsa quitsaha natavá ra cuenda, tan tsindaca ra tsi iin musu tsa cuaha millón pesu nyaá cuenda tsi ra. ²⁵ Tan musu can nduve náa tsihin tyahvi ra tsi tsitoho ra, yacan

cuenda tsitoho ra catyí: “Xico ndo tsi ra iin cahnu ñi tsihin ñasihi ra, tan tsihin sehe ra tan tandihi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.” ²⁶ Tacan tan musu can tsicuiñi tsiti ra nuu tsitoho ra, tan cahan ndaahvi ra tsihin ra, tan catyí ra: “Tata, jaha tumañi iñi, cuatu un luxu, tan tyahvi yu tandihi tsa nyaá cuenda yu tsi un nda ñihi yu xuhun”, catyí ra. ²⁷ Tan cundahvi iñi tsitoho ra tsi ra, tan jaha ra tucahnu iñi tsi ra, tan janaa ra tandihi tsa nyaá cuenda ra, tan jandoo nuña ra tsi ra. ²⁸ Maa tyin kuhva tsa quita musu can, nañihi ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tin ra tsi ra can, tan quitsaha tin ra jucun ra, tan catyí ra tsihin ra: “Tyahvi tsa nyaá cuenda un tsi yu.” ²⁹ Tacan tan tsicuiñi tsiti ra can nuu ra, tan cahan ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra. ³⁰ Maa tyin maa ra ña cuñi ra cuatu ra, tan tsahan ra tsityihi ra tsi ra can vehe caa nda cuanda tsa tyahvi ra tsa nyaá cuenda ra tsi ra. ³¹ Tsa nyehe inga ca musu tsa javaha ra, cuihya xaan cuñi ra naha, tan tsahan ra naha tsinacatyí tuhun ra naha tsihin tsitoho ra naha tsa ña vaha tsa javaha ra can. ³² Tacan tan tsitoho ra can tava tyiñu ra na quitsi ra can. Tan tsa tsaá ra, tan catyí ra

tsihin ra: “Musu ña vaha cuví un. Yuhu jahá yu tucahnu iñi tandihí tsa nyaá cuenda un tsi yu, tyin cahān ndaahvi un tsihin yu. ³³ Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra. ³⁴ Tan cuxaan xaan tsitoho ra, tan tavá tyiñu ra na tatsi tuñi ra naha tsi ra nda cuanda tsa tyahvi ra tandihí tsa nyaá cuenda ra.

³⁵ Tan nu ndihí cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tucahnu iñi tsi nyivi ndo tsihin tsa ñi iñi añima ndo.

19

Nu caahán ra Jesús tyin ña vaha tsa nacoó ihñi rayi tsi ñasihi ra

(Mr. 10.1-12; Lc. 16.18)

¹ Tsa yaha tsa cahān ra Jesús tuhun ihya, tan quita ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñicanyii. ² Cuaha xaan nyivi tsinyicun tsi ra, tan janduvahā ra tsi nyivi cuuhví.

³ Tacan tan juhva ra fariseo naha ra natuhva ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuví tyaa ra naha cuatyí siqui ra. Tan tsica tuhun ra naha tsi ra tan catyí ra naha:

—¿A vaha tsa nacoó rayi tsi ñasihi ra tsa cuenda náa ñi tsihi tsahā ña tsi ra?

⁴ Tan nacahān ra tan catyí ra:

—¿A ña tuhvá ndo cahví nu tutu Nyoo nu catyí tsi tyin ra tsa javahā tsi ndo nda quivi jihna ñi, javahā ra rayi tan ñaha? ⁵ Tan catyí tsi tyehen: “Taahán tsi nacoó rayi tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuví ñi tumaa tsa intuhun ña nyivi.”

⁶ Yacan cuenda, ñavin ca uvi taahan ñi, maa tyin nduvi ñi intuhun ña nyivi cuví ñi. Yacan cuenda, ña taahán tsi tsa nacoó tahan ñi tsi ñi tyin maa Nyoo tsa jandu iin tsi ñi —catyí ra.

⁷ Tacan tan tsica tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuví cani iin rayi tutu cuenda ley ra tan nacoó ra ñasihi ra?

⁸ Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsahā ra Moisés ndatu tsa nacoó ndo ñasihi ndo. Maa tyin quivi jihna ñi ñavin tacan tsicoó nyivi. ⁹ Yuhu catyí yu tsihin ndo tyehen: Ra tsa nacoó ñasihi, tan ñavin tsa cuenda tsa quituvi ña tsihin inga rayi, tan tindahā ra tsihin inga ñaha, tsicoó cuatyí ra nuu Nyoo. Tan ra tsa tindahā tsihin ñaha tsa nacoó rayi can, juvin ñi tsicoó tucu cuatyí ra can —catyí ra.

¹⁰ Tacan tan ra tsica tsihin ra, catyí ra naha tsihin ra:

—Tatun tacan taahán tsi coo rayi tsihin ñasihi ra, vaha ca ña tindaha yo.

11 Tan ra Jesús catyí ra tsihin ra naha:

—Ña tandihi nyívi cuví naquihin cuenda tuhun ihya. Maa tyin nyívi tsa tsahá Nyoo cuví naquihin cuenda ñi can. 12 Tsa ña tindaha nyívi, cuaha ñi cuenda cuví tsi. Yihí ñi ña cuñí ñi tindaha ñi tyin iin cuhva caa maa ñi nda cacu ñi. Tan inga ñi ña cuñí ñi tindaha ñi tyin tsa nducapun ñi jahá nyívi. Tan yihí ñi ña tindaha ñi tsa cuenda tsa cuñí ñi javaha ñi maa ñi maa tyiñu Nyoo, na nducuaaha ca añima tsa ndacá ñaha Nyoo. Tandihi nyívi tsa cuví javaha yacan na javaha ñi —catyí ra Jesús.

Nu nasocó ra Jesús tsi tsa nyihi

(Mr. 10.13-16; Lc. 18.15-17)

13 Tacan tan quitsi ndaca nyívi juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quitsahá caahán ra naha tsi nyívi tsa cuahán tsihin tsa nyihi can. 14 Maa tyin ra Jesús catyí ra:

—Jaña ndo tsi tsa nyihi na quitsi maa tsi naha tsi nu nyaá yu. Tan ña casi ndo. Tyin nyívi ndacá ñaha Nyoo cuví ñi tumaa tsa nyihi ihya —catyí ra.

15 Tacan tan tyiso ndaha ra jiñi tsi naha tsi. Yahá can tan cuahán ra.

Nu tsahá ra Jesús cuhva tyin yíi xaan nacuhva cuenda iin ra cuca tsi ra tsi Nyoo

(Mr. 10.17-31; Lc. 18.18-30)

16 Iin ra tyuvaa tsahan ra tsindacá tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayívi nyito tsa ña cua naa maa?

17 Tan ra Jesús catyí ra tsihin ra:

—¿Nacuenda catyí un tyin ra vaha cuví yu? Intuhun ñi maa Nyoo cuví ra vaha. [Tan tsa catyí un tyin vaha yu, nacotó un tyin Nyoo cuví yu.] Maa tyin tatun cuñí un coo un ñayívi tsa ña cua naa maa, javaha tandihi tuhun tsa tsahá Nyoo tyin javaha yo —catyí ra tsihin ra.

18 Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña cahñi un nyívi. Ña coo inga ñaha tsi un. Ña suhu un tsa tsii nyívi. Ña cahan un cuendu siqui nyívi. 19 Tyaa yahvi tsi jutu un tan tsi sihi un. Tan cuñi tsi nyívi, tumaa tsa cuñi un tsi maa un.

20 Tan ra tyuvaa can, catyí ra tsihin ra:

—Tandihí maa yacan tan tyaá yahvi yu nda tahan luhlu yu tan nda cuanda vityin. ¿Náa ca cumañi tsi yu?

21 Tan ra Jesús catyí ra tsihin ra:

—Tatun cuñi un tsa iin ndaha ñi cuví un iin ra cuiti nuu Nyoo, cuaahan tan xico

un tsa iyó tsi un, tan cuhva un tsi nyívi ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

²² Maa tyin cuhva tsa tsiñi ra tyuvaa can tsa cahan ra Jesús tsihin ra, cuihya xaan cuñí ra cuví tan cuanuhu ra tyin cuca xaan ra.

²³ Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yí xaan tan cuví nacuhva cuenda nyívi cuca tsi ñi na cundaca ñaha Nyoo tsi ñi. ²⁴ Catyí yu tsihin ndo inga tsaha, tyin vasu yí xaan yaha iin camellu xuu iin yiqui tucu, maa tyin yí xaan ca tsa quihvi iin nyívi cuca nu ndacá ñaha Nyoo —catyí ra Jesús.

²⁵ Tsa tsiñi ra tsicá tsihin ra Jesús tsa cahan ra, iyo xaan cuñí ra naha, tan quitsaha tsicá tuhun tahan ra naha, tan catyí ra naha:

—Tun tacan, yoñi cuca cuví cacu

²⁶ Tacan tan nanyehe ra Jesús nu nyecú ra naha tan catyí ra:

—Nyívi ña cuví javaha ñi yacan, maa tyin Nyoo cuví javaha ra tandihí.

²⁷ Tacan tan quitsaha cahán ra Pedro tsihin ra:

—Jutu Mañi yu, nyuhu tandihí maa tsa iyó tsi ndi nacoq ndi tan nyicún ndi tsi un. ¿Náa cuca ñihi ndi? —catyí ra tsihin ra.

²⁸ Tan nacahan ra Jesús tan catyí ra:

—Tsa nditsa catyí yu tsihin ndo, tyin quívi tsa cuca ndut-saa tandihí tsa iyó, yacan cuví quívi cuca cunyaa yuhu Rayí tsa quee nda gloria nu tyayu sii xaan caá tan cuca cundaca ñaha yu. Tan nyooho tsa nyicún tsi yu, cuca cunyecu ndihí ndo nu utsi uvi taahan tyayu sii caá. Tan cuca cundaca ñaha ndo tsi tandihí nyívi cuví tata tsa utsi uvi taahan sehe ra Israel. ²⁹ Tan tandihí nyooho tan tandihí inga nyívi tsa nacoq vehe, o yañi ñi, o cuhva ñi, o jutu ñi, o sihí ñi, o ñasihi ñi, o sehe ñi, o ñuhu ñi, tsa cuenda yuhu, cuca ñihi ñi iin cientu ca tsaha siqui can, tan cuca ñihi tucu ñi ñayívi nyito tsa ña cuca naa maa coo ñi. ³⁰ Cuaha xaan nyívi cuahán ityi nuu vityin, ñi ican cuca cuhun nu ndihí ña. Tan cuaha xaan nyívi cuahán nu ndihí vityin, ñi ican cuca cuhun ityi nuu.

20

Nu jacuaha ra Jesús iin cuhva cuenda ra jahá tyiñu

¹ Tsa ndacá ñaha Nyoo tsi nyívi, cuví tsi tumaa iin ra iyó cora uvas. Tan tuvi ñi quita ra cuahán ra cuanducú ra musu jaha tyiñu nu tyiñu jahá ra. ² Tan ndoo ra tuhun tsihin musu can tyin cuca tyahvi ra yahvi tsa iin quívi. Tan jacuhun ra tsi ra naha cuca jaha tyiñu ra naha nu iyó tyiñu jahá ra. ³ Yaha can tan cuahán ra inga tsaha cuhva caa iin tsa tuvi. Tan nyehe ra tsi juhva ca ra yucú taxin nuyahvi can. ⁴ Tan catyí ra tsihin ra naha: “Cuahan

ndihi tucu nyooho jahá tyiñu ndo nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihi tucu ra can naha ra. ⁵ Tan tsitoho cora can quita ra inga tsaha tsa ora. Tan juvin ñi musu nducú ra. Tan caa uñi tsa tseñi, quita ra inga tsaha nducú ra musu. ⁶ Yahá can tan quita nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.” ⁷ Tan nacahan ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuaahan ndihi ndo jahá tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra. ⁸ Tan cuhva tsa cua caaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihi naha ra, tan nu cua ndihi tan tyahvi un tsi ra tsa quihvi tsa jihna ñi naha ra”, catyí ra. ⁹ Tacan tan tsaá ra tsa quihvi caa uhun tsa tseñi can naha ra. Tan intuhun intuhun ra naha quihin ra naha yahvi naní iin quivi. ¹⁰ Yahá can, tan cuhva tsa tahan tsi tsi ra tsa quihvi tsa jihna ñi can naha ra, cuñí maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin

quivi quihin ra naha. ¹¹ Tan cuhva tsa quihin ra naha, quitsaha caahán ra naha tsi tsitoho tyiñu can. ¹² Tan catyí ra naha: “Ra tsa tsaá nu ndihi ihya naha ra, intuhun ñi hora jahá tyiñu ra naha. Tan iin ñi yahvi tyahvi un tsi ra naha tsihin tucu nyuhu tan nduvi nduvi jahá tyiñu ndi nu ihñi”, catyí ra naha. ¹³ Maa tyin nacahan tsitoho tyiñu can, tan catyí ra tsihin iin ra can: “¿Tsaal, nduve tsa ña vaha javahá yu tsihin un. ¿A ñavin yahvi tsa iin quivi ndoo yo tuhun tyin cua tyahvi yu tsi un? ¹⁴ Quihin yahvi un, tan cuanuhu. ¿A nduve ndatu iyó tsi yu tsa tyahvi yu tsi ra tsa quihvi nu ndihi iin ñi cuhva tsa tyahvi yu tsi yooho? ¹⁵ ¿A nduve ndatu iyó tsi yu tsa javaha yu náa cuñí maa yu tsihin xuhun yu? ¿A ndasi cuñí un tyin vaha iñi yu tsihin inga ra can naha ra?” catyí ra. ¹⁶ Tacan nyivi quihvi nu ndihi, cuhun ñi ityi nuu. Tan nyivi cuahán ityi nuu, nda nu ndihi ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

Inga tsaha jacotó ra Jesús cuhva cua cahñi nyivi tsi ra
(Mr. 10.32-34; Lc. 18.31-34)

¹⁷ Cuhva tsa cuñí cuhun ra Jesús nda ñuu Jerusalén, cana siin ra tsi tsa utsi uvi ra tsicá tsihin ra tan catyí ra tsihin ra naha:

¹⁸—Nyehe ndo tyin cuahán yo Jerusalén vityin. Tan ndacan cua nacuhva cuenda

nyivi tsi yuhu, Rayii tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyi ra naha tyin taahán tsi cúu yu. ¹⁹ Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyi ra Jesús tsihin ra naha.

Nu tsicán sihi ra Jacobo tan ra Juan iin tumañi iñi tsi ra Jesús

(Mr. 10.35-45)

²⁰ Tacan tan ñasihí ra Zebedeo natuhva ña nu nyii ra Jesús tsihin nduvi sehe ña, ra Jacobo tan ra Juan. Tan tsicuiñi tsiiti ña nuu ra tyin cua ndacan ña iin tumañi iñi tsi ra. ²¹ Tan tsicá tuhun ra Jesús tsi ña tan catyi ra:

—¿Náa cuñi un?

Tan catyi ña:

—Quivi tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

²² Maa tyin nacahan ra Jesús tan catyi ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cuhun ndo tuhun tsihi tumaa cua cuhun yuhu? —catyi ra.

Tan nacahan ra naha tan catyi ra naha:

—Cuví maa.

²³ Tan catyi ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsihi tumaa cuhun yuhu tuhun tsihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyi ra Jesús tsihin ra naha.

²⁴ Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra. ²⁵ Maa tyin cana ra Jesús tsi ra naha tan catyi ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha. ²⁶ Maa tyin ñavin tacan taahán tsi javaha nyooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihi nyooho. ²⁷ Tan ndáa nyooho tsa cuñi ndo cuví ndo ityi nuu, cuñi tsi cuví ndo musu tandihi ca ra naha. ²⁸ Tumaa yuhu, Rayii tsa quee nda gloria, ña vatsí yu tyin jatyinyee nyivi tsi yu. Maa tyin yuhu vatsí yu vatsí jatyinyee yu tsi maa ñi, tan cua cuhva yu ñayivi yu tsa cuenda ñi. Tyin tsihin yacan cua tyahvi yu cuatyí tandihi ñi.

Nu janduvaha ra Jesús tsi uvi taahan ra cuaa

(Mr. 10.46-52; Lc. 18.35-43)

29 Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha. 30 Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsaha caná tsaa ra naha. Tan catyi ra naha:

—Jutu Mañi yu, tata ra David, cundaahvi iñi tsi ndi!
—catyi ra naha.

31 Tan nyivi quitsaha caahán ñi tsihin ra naha na casi ra naha yuhu ra naha. Maa tyin ñihi ca cana tsaa ra naha:

—Jutu Mañi yu, tata ra David, cundaahvi iñi tsi ndi!

32 Tacan tan tsicuiñi ra Jesús tan cana ra tsi nduvi taahan ra cuaa can, tan tsica tuhun ra tsi ra naha tan catyi ra:

—¿Náa cuñi ndo javaha yu tsi ndo?

33 Tan nacañan ra naha tan catyi ra naha:

—Jutu Mañi yu, jananyehe tsi ndi.

34 Tacan tan cundaahvi iñi ra Jesús tsi ra naha, tan tiñ ra tinuu ra naha. Tan iin yaha ñi nanyehe ra naha, tan cuiti cuanyicún ndihi ra naha tsi ra Jesús.

21

Nu cuahán ra Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

1 Tsa cua tsaa ra naha ñuu Jerusalén, tan tsañ ra naha ñuu Betfagé, yatyin ñi yucú Olivo nu iyó yutun olivo.

Tacan tan tava tyiñu ra Jesús tsi uvi ra tsicá tsihin ra. 2 Tan catyi ra tsihin ra naha:

—Cuaahan ndo ñuu tsa canyií ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndatsi ndo tsi ti, tan quitsi ndaca ndo tsi ti naha ti tsi yu. 3 Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyi ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyi ndo tsihin ñi —catyi ra.

4 Tacan cuvi tyin cundaa tsa cañan ra cuvi ndusu yuhu Jutu Mañi yo tañan tsanaha nu catyi ra tyehen:

5 Cañan ndo tsihin nyivi ñuu Sión:

“Nyehé ndo, vatsí rey ndo nu iyó ndo.

Ndaahvi ñi vatsí ra yosó ra iin urru luhlu, sehe iin quití tsa tuhvá nyisó carga”, catyi ra cuvi ndusu yuhu Nyoo can.

6 Tacan tan cuahán ra tsicá tsihin ra Jesús, tan javaha ra naha tumaa tsa cañan ra tsihin ra naha. 7 Quitsi ndaca ra naha tsi ti tsihin sihi ti. Tan tyisó ra naha jahma ra naha tsata ti, tan ndañ ra Jesús tsi ti. 8 Tan cuaha xaan nyivi tsaquin ñi jahma ñi nu ñuhu ityi nu cuahán ra, tan inga ñi tsahnya ñi ndaha yutun tsaquin ñi tsitsi ityi. 9 Tan nyivi tsa cuahán ityi nuu tan ityi tsata, quitsaha caná tsaa ñi tan catyi ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsi Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

¹⁰ Cuhva tsa tsaꝯ ra Jesús ñuu Jerusalén can, tandihi maa nyivi ñuu quitsahꝯ cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

¹¹ Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

Nu tavaꝯ ra Jesús tsi nyivi xicó tsitsi vehe ñuhu cahnu
(Mr. 11.15-19; Lc. 19.45-48; Jn. 2.13-22)

¹² Yahaꝯ can tan quihvi ra Jesús tsitsi vehe ñuhu cahnu Nyoo. Tan tavaꝯ ra tsi tandihi nyivi jatá tan xicó ican. Tan janduvꝯ ra mesa nu nasamá ñi xuhun. Tan janduvꝯ ra tyayu nu xicó ñi paloma.

¹³ Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooho jananduvꝯ ndo vehe ihya, vehe ñasuhu —catyí ra tsihin ñi.

¹⁴ Tan tsa tsitoꝯ juhva ra cuaa tan ra coxo naha ra tyin nyí ra Jesús tsitsi vehe ñuhu cahnu, quihvi ra naha tan janduvahꝯ ra Jesús tsi ra naha. ¹⁵ Tan nyeheꝯ ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin

javahꝯ ra Jesús tsa iyo. Tan tsiñi ra naha tyin caná tsa tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaꝯ ra naha tsa tsiñi ra naha tsa caahán tsa nyihi can. ¹⁶ Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahanꝯ ra Jesús tan catyí ra:

—Tsiñi yu. Maa tyin ¿a ñaha ca cahvi nyooho nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín sii xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

¹⁷ Tacan tan nacoꝯ ra tsi ra naha, tan quitaꝯ ra ñuu can cuahán ra ñuu Betania. Tan ican ndoꝯ ra tsacuaa can.

Nu cahanꝯ ra Jesús tsi yutun higo tsa ña tsahá tsiti
(Mr. 11.12-14, 20-26)

¹⁸ Tan tsa tuvi cuii ñi inga quivi can, vatsí nyico ra Jesús nda ñuu Jerusalén, tan tsaꝯ soco tsi ra. ¹⁹ Tan nyeheꝯ ra nyaá iin yutun higo yatyin ñi yuhu ityi can. Tan natuhvꝯ ra nu nyaá tun, maa tyin nduve maa náa nañihꝯ ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaha ña cua cuhva ca un tsiti!

Tan juvin ñi cuhva can na ityi tun. ²⁰ Tan tsa nyeheꝯ ra

tsicá tsihin ra tsa javahá ra tsi tun, iyo xaan cuñí ra naha, tan tsicá tuhun ra naha tsi ra tan catyí ra naha:

—¿Nacuenda tsa numi xaan na ityí yutun higo can?

²¹ Tan nacahan ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahá yu tsihin yutun higo ihya ñi cuví javaha tucu nyooho, tyin cuví ndihi tucu catyí ndo tsihin yucu ihya: “Cuatsiyo ihya tan cuhun un nda tsitsi ndutya ñuhu.” Tan cua cuhun tsi. ²² Tan tandihi tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihi ndo —catyí ra Jesús.

Nu tsicá tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tyin cahan ra tsihin nyivi

(Mr. 11.27-33; Lc. 20.1-8)

²³ Yahá can tan quihví ra Jesús tsitsi vehe ñuhu cahnu, tan tsitsi tsa jacuahá ra ican, natuhvá ra jutu tsa cuví ityí nuu naha ra nu nyaá ra, tan ra cuví mandoñi ñuu Israel naha ra. Tan tsicá tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

²⁴⁻²⁵ Tan nacahan ra Jesús tan catyí ra:

—Yuhu tucu cuñí yu ndaca tuhun yu tsi nyooho. ¿Yóo jaquitsi tsi ra Juan tyin jacoundutya ra tsi nyivi? ¿A Nyoo jaquitsi tsi ra, o nyivi?

Tatun catyí tuhun ndo tsihin yu, cua catyí tuhun tucu yuhu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

Tacan tan ra ican naha ra quitsahá caahán yuhu tahan ra naha, tan catyí ra naha:

—Tatun catyí yo tyin Nyoo jaquitsi tsi ra Juan, cua catyí ra tsihin yo: “Tun tacan, ¿nacuenda ña tsinu iñi ndo tsi ra?” ²⁶ Tan tatun catyí yo tyin nyivi jaquitsi tsi ra, yuuhví yo coto cuxaan nyivi tsi yo, tyin tandihi ñi tsinú iñi ñi tyin ra Juan, cuenda Nyoo cahan ra —catyí ra naha.

²⁷ Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyí tuhun yu tsihin ndo yóo tava tyiñu tsi yu.

Nu caahán ra Jesús iin cuhva cuenda uvi taahan sehe iin rayii

²⁸ Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayii, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.” ²⁹ Tan nacahan sehe ra tan catyí ra: “¡Ña cuhun yu!” Maa tyin yahá can tan nasama cuhva tsicá iñi ra tan tsahan ra tsijahá tyiñu ra. ³⁰ Yahá can tan jutu ra cahan ra tsihin inga sehe ra. Tan catyí tucu ra

tsihin ra na cuhun ra cujaha tyiñu ra. Tan ra ican numi ñi quihj̄n ra tyiñu tan catyí ra: “Vaha, tyaa, cuhun maa yu.” Maa tyin ña tsahan ra. ³¹ Tsitsi tsa nduvi taahan ra can naha ra, ¿ndáa ra javaha tsa cahan jutu ra? —catyí ra Jesús.

Tan nacahan ra naha tan catyí ra naha:

—Ra tsa cahan ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tavá xuhun cuenda ra ndacá ñaha tan ñi sii ñi caca nuu, jihna ca ñi cua quihvi nu ndacá ñaha Nyoo tan ñavin ca nyooho. ³² Tyin ra Juan, ra jacoondutya tsi nyivi, quitsi ra jacuahā ra tsi ndo nácaa taahán tsi coo cuiti ndo, tan nyooho ña tsinu ñi ndo tsi ra. Maa tyin ra tavá xuhun naha ra tan ñi sii ñi caca nuu tsinu ñi ñi tsi ra. Tan nyooho vasu ndi maa nyehe ndo yacan, maa tyin ña nasama ndo cuhva iyó ndo, tan ña tsinu ñi ndo tsi ra.

Nu caahan ra Jesús tyin tumaa cuvi juhva nu caquiñi nahnu, tacan cuvi ra tsa cua cahñi tsi ra

(Mr. 12.1-12; Lc. 20.9-19)

³³ Tyaa soho ndo inga cuhva ihya: Tsicoo iin rayii, tan iyó ñuhu ra. Tan tatsi ra yoho yucu vixi tsa nañi uvas, tan tyihj̄ ra cora. Tan javaha ra iin nu cua tava ra ndutya uvas can. Tan javaha tucu ra iin vehe sucun tyin cuvi jaha cuenda ra tandihi.

Yaha can tan tsaha nuu ra ñuhu can tsi juhva ra cua jaha tyiñu naha ra, tan cuahan ra inga ñuu. ³⁴ Tan tsa tsa quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahan tsi tsi ra. ³⁵ Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra. ³⁶ Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javaha ra naha tsihin ra tsa tsahan jihna naha ra, tacan ñi javaha nyico ra naha tsihin ra ihya naha ra.

³⁷ Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra. ³⁸ Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihi tsa iyó ihya. Na cahñi yo tsi ra tan ndoo maa yo tsihin cora ihya”, catyí ra naha. ³⁹ Tacan tan tñin ra naha tsi ra, tan tava ra naha tsi ra ityi tsata cora can, tan tsahñi ra naha tsi ra —catyí ra Jesús.

⁴⁰ Tacan tan tsica tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

⁴¹ Tan nacahan ra naha tan catyí ra naha:

—Ñã cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quiñi coo uvas, cua nacuhva cuenda ra naha juhva tsa taahán tsi tsi ra cuví tsi toho cora can.

⁴² Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tye-hen?

Yuu tsa javita ihñi ra javahá vehe,

Yacan cuví yuu tsa ñiñi ca.

Jutu yo Nyoo cuví ra tsa javahá tandihí can.

Tan iyo xaan cuñi yo nyehé yo, catyí tsi.

⁴³ Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahá cuhva cuñi ra tyin nditsa tsahá ñi tsi ñi cundaca ñaha ra. ⁴⁴ Tan tsa cuenda yuu can, yóo nyivi tsa nduva siqui tsi, cua tahnú cu-atyí ñi. Tan tatun yuu can tan canacava tsi siqui yóo nyivi, cua taxin nyihi ñi —catyí ra Jesús.

⁴⁵ Cuhva tsa tuví iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahan ra Jesús cuhva ihya, ⁴⁶ cuñi ra naha tñn ra naha tsi ra, maa tyin yuuhví ra naha tsi nyivi tyin tsinú iñi ñi tyin ra Jesús caahán ra cuenda Nyoo.

22

Nu cahan ra Jesús iin cuhva cuenda vico tindaha (Lc. 14.15-24)

¹ Quitsaha caahán ra Jesús tsihin nyivi inga tsaha tsihin cuhva, tan catyí ra:

² —Tsa ndacá ñaha Nyoo tsi nyivi cuví tsi tumaa iin rey tsa javahá iin vico tsa cuenda tsa cua tindaha sehe ra. ³ Tan jacuhun ra tsi musu ra na cucana ra naha tsi nyivi tsa jacoto ra tyin cuhun ñi, maa tyin ñi ican, ña cuñi ñi cuhun ñi. ⁴ Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihí. Yacan na quitsi ñi”, catyí ra. ⁵ Maa tyin ñi ican ña tyaa yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra. ⁶ Tan inga ra naha tñn ra naha tsi musu rey can naha ra tan cañi xaan ra naha tsi ra naha nda cuenda tsahñi ra naha tsi ra naha. ⁷ Tacan tan ra rey can cuxaan xaan ra, tan jacuhun ra tsi andarú ra na cuahñi ra naha tsi ra tsa tsahñi tsi musu can naha ra, tan cahmi ra naha ñuu ra naha. ⁸ Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi cana yu, ña taahán tsi tsa quitsi ñi. ⁹ Cuaahan ndo ityi cahnu tan cana ndo tsi tandihí nyivi tsa nañihi ndo na quitsi ñi vico tindaha”, catyí ra rey can. ¹⁰ Musu can cuahán ra naha tandihí ñi ityi, tan jandu iin ra naha tsi tandihí nyivi nañihi ra naha: ñi caquiñi tan ñi vaha iñi.

Tacan tan tsitu tsitsi vehe ra tsihin nyivi.

¹¹ Tacan tan quihvi ra rey can cua nyehe ra tsi tandihi nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsi. ¹² Tan catyí ra rey tsihin ra: “Tsa, ¿nacuenda nyii un ihya tan nduve jahma vico tindaha nditsi un?” Tan ña nacahan maa ra can. ¹³ Tacan tan catyí ra rey can tsihin ra tyihí mesa can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra. ¹⁴ Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

Nu caahán ra Jesús tsa cuenda tsa tyahvi nyivi xuhun tsi ra ndacá ñaha nda ñuu Roma
(Mr. 12.13-17; Lc. 20.20-26)

¹⁵ Tacan tan cuahán ra fariseo naha ra tan ndoo ra naha tyiñu tyin cua jacañan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra. ¹⁶ Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñi un nyehe un tsi nyivi cuca tan nyivi ndaahvi. ¹⁷ ¿Nacaa tsicá

tucu iñi yooho: A vaha tyahvi yo tsa tsicán ra ndacá ñaha nda ñuu Roma, o ña vaha?

¹⁸ Tan ra Jesús tuvi iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu? ¹⁹ Janaha jihna ndo iin xuhun tsa tuhvá yo tyahvi tsi ra ndacá ñaha tsi yu —catyí ra.

Tan tsindaca ra naha iin xuhun tsa nañi denario tsi ra. ²⁰ Tan tsa nyehe ra Jesús xuhun can, tsica tuhun ra tsi ra naha tan catyí ra:

—¿Yoo nuu tan yoo sivi nyaá ihya?

²¹ Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

²² Tsa tsiñi ra naha tsa cañan ra Jesús, iyo xaan cuñi ra naha. Tan cuahán ra naha.

Nu cuñi ra cuvi saduceo naha ra jandavi ñaha ra naha tsi ra Jesús

(Mr. 12.18-27; Lc. 20.27-40)

²³ Juvín ñi quivi can juhva ra cuvi saduceo naha ra tsahan ra naha nu nyii ra Jesús. Tan ra cuvi saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan cuenda tsica tuhun ra naha tsi ra Jesús, tan catyí ra naha:

24 —Maestro, ra Moisés catyí ra tyin tatun iin ra tindaha tan tsihi ra tan ña tsicoo sehe ra, taahan tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi. 25 Vaha. Tun iin ra tan iyó utsa sehe yí ra, tan ra tsa jihna ñi tindaha ra. Tan nduve sehe ra tsicoo tsihin ñasihi ra tan tsihi ra. Ndoq ñasihi ra tsi yañi ra tsa tsinu uvi. 26 Tan juvin ñi tsihi ndihi ra can. Tan ndoo ñaha can tsihin ra tsa tsinu uñi, maa tyin juvin ñi tacan tahan ndihi ra. Tan inducu ñi tahan tandihi tsa utsa ra naha. 27 Tan nu ndihi ña tsihi ndihi maa ñaha can. 28 Tatun nditsa tsa cua nandoto nyivi tsihi, ¿ndáa tsa utsa taahan ra can naha ra cua cuvi yí ña? Tyin tandihi maa ra naha tindaha tsihin ña —catyí ra naha.

29 Tan nacahan ra Jesús tsihin ra naha tan catyí ra:

—Nyooho, caahan soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee ñi tsa iyó tsi Nyoo. 30 Tyin quivi cua nandoto nyivi tsihi, ndi ña cua tindaha ñi, tan ndi ña cua kuhva ñi sehe sihi ñi tindaha, tyin cua cuvi ñi tumaa cuví ángel tsa iyó gloria. 31 Tyin tuhun Nyoo tsahá cuenda tsi nácaa cuví tuhun tsa cua nandoto nyivi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tye-hen:

32 “Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito aña ra can naha ra, vasu tsanaha tsihi ra naha. Tyin Nyoo ñavin Nyoo cuenda nyivi tsihi cuví ra, tyin Nyoo cuví ra Nyoo cuenda nyivi nyito —catyí ra.

33 Tan tsa tsiñi nyivi tsa caahan ra Jesús, iyo xaan cuñi ñi.

Ley tsa ñiñi ca tsa tsaha Nyoo

(Mr. 12.28-34)

34 Tsa tsito ra fariseo naha ra tyin ra Jesús tyasi ra yuhu ra saduceo naha ra, ndu iin ra naha. 35 Tan iin ra tsa nyii tsihin ra naha cuví ra maestro cuenda ley vehe ñuhu tan cuñi ra nducu kuhva ra tsi ra Jesús. Tan tsicā tuhun ra tsi ra, tan catyí ra:

36 —Maestro, ¿ndáa ley cuví tsa ñiñi ca?

37 Tan catyí ra Jesús tsihin ra:

—“Cuñi tsi Jutu Mañi yo Nyoo tsihin tsa ñi ñi un tan tsihin tsa ñi ñi aña un, tan tsihin tandihi tsa tsiñi tuñi jiñi un.” 38 Ley ihya cuví tsa ñiñi ca, tan tsa jihna ñi taahan tsi javaha yo. 39 Tan tsa tsinu uvi, tsa yatyin inducu ñi caahan tsi tumaa caahan tsa jihna ñi tan catyí tsi tye-hen: “Cuñi tsi nyivi tahan un tumaa cuñi un tsi maa un.” 40 Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaá ra Moisés jahā Nyoo, tan tandihi tuhun tsa

jacuahā ra cuví ndusu yuhu Nyoo taḥan tsanaha.

Ra Cristo cuví ra Sehe Nyoo tan juvin ñi cuví ra tata ra David

(Mr. 12.35-37; Lc. 20.41-44)

⁴¹ Tsitsi tsa ndi yucú ra fariseo naha ra nu ndu iin ra naha, ⁴² ra Jesús tsicā tuhun ra tsi ra naha, tan catyí ra:

—¿Nacaa tsicá iñi nyooho cuenda ra cuví Cristo? ¿Yóo tata cuví ra, cuñí maa ndo?

Tan nacahan ra naha tan catyí ra naha:

—Tata ra David cuví ra.

⁴³ Tacan tan ra Jesús catyí ra tsihin ra naha:

—Tun tacan, ¿nacuenta jacahan Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

⁴⁴ Nyoo cahan tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

⁴⁵ ¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

⁴⁶ Tan yoñi maa cuví nacahan nu cahan ra ndi in-tuhun maa tuhun. Tan nda quivi can, yoñi ca maa cuñí nducu tuhun tsi ra.

23

Nu caahán ra Jesús tyin cuaha xaan cuatyí ra maestro

cuenda ley vehe ñuhu naha ra tan ra fariseo naha ra

(Mr. 12.38-40; Lc. 11.37-54; 20.45-47)

¹ Tacan tan ra Jesús catyí ra tsihin tandihi nyivi, tan tsihin ra tsicá tsihin ra:

²—Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaa ra Moisés. ³ Yacan cuenda tyaa yahvi ndo tsa caahán ra naha tan javaha ndo tandihi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha. ⁴ Janducuahá ca ra naha ley tsa tsaha Nyoo taḥan tsanaha. Tan cuñí ra naha tsa javaha nyivi tandihi can. Maa tyin ña cunyeen ñi javahá ñi tandihi can, tan ndi maa ra naha tan ña cuñí ra naha javaha ra naha can.

⁵ Tyin maa ra naha tyaa ra naha caja ñi nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsí ra naha jahma nañi ca tan ñavin ca tsa iyó tsi inga ca nyivi. Javahá ra naha tandihi can tyin na nyehe nyivi tyin vaha xaan ca ra naha. ⁶ Tan nu vaha ca, cuñí ra naha cunyecú ra naha nu iyó vico tan catsi ra naha. Tan nu vaha ca cuñí ra naha cunyecú ra naha tsitsi vehe ñuhu. ⁷ Tan nu tsicá nuu ra naha cuñí ra naha tyin cuhva nyivi nacumi tsi ra naha tyin jahá ñi tsa ñayivi tsi ra naha. Tan

cuñí tucu ra naha tsa catyi ñi “maestro” tsihin ra naha.

⁸ ‘Maa tyin nyooho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyí tsihin ndo, tan tandihi ca maa ra naha yañi ndo cuví tsi ra naha.

⁹ Tan ña cahan ndo Jutu ndo tsihin ndi intuhun rayi ñuu ñayivi ihya, tyin intuhun ñi ra nyaá gloria cuví Jutu ndo.

¹⁰ Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo. ¹¹ Ra tsa jahá tyiñu tyiñu tandihi ca ra naha, ra ican cuví ra cahnu ca nu yucú ndo. ¹² Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

¹³ ‘iNdahvi nyooho ra cuví maestro cuenda ley vehe ñuhu tan nyooho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuví quihvi nyivi. Tan ndi maa ndo ña quihvi ndo, tan ndi ña tsahá ndo tsa quihvi nyivi tsa cuñí quihvi.

¹⁴ ‘iNdahvi nyooho ra cuví maestro cuenda ley tan nyooho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyi tyin quihín nyaa ndo vehe ñi ndaahvi tsa tsihi yii

tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

¹⁵ ‘iNdahvi nyooho ra maestro cuenda ley vehe ñuhu tan nyooho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayivi tyin cuñí ndo nañihi ndo vasu intuhun nyivi cunyicun tsi ndo. Tatun tsa quihvi ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cahun ñi anyaya tsihin ndo.

¹⁶ ‘iNdahvi nyooho ra ndaahvi! Tyin cuñí ndo jaquihin ityi ndo tsi nyivi, ¡maa tyin cuaa ndo! Caahán ndo tyin yóo nyivi cua cahan “Naha Nyoo” tsa cuenda vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyi ndo. ¹⁷ ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu íi tsi xuhun cuaan can?

¹⁸ Tan juvin ñi catyi tucu ndo tyin yóo nyivi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañi ñi nu altar, tacan tan taahán tsi javaha ñi tsa cahan ñi, catyi ndo. ¹⁹ ¡Soho xaan ndo tan cuaa ndo! ¿Ndáa tsa

cahnu ca cuví? ¿A tsa jamañí ndo nu altar can, o maa altar tsa jandu íí tsa jamañí ndo?

²⁰ Tyin nyívi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndihi ñi tsa cuenda tandihi tsa yosó nu altar can. ²¹ Tan

nyívi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican.

²² Tan tacan tucu nyívi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

²³ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaá yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandihi nyívi, tsa cundaahvi iñi yo tsi ñi, tsa tsinú iñi yo tsi Nyoo tan ña nacoo yo tsi ra. Cuñí tsi javaha ndo tandihi can, tan ña cua jandihí ndo tsa cuhva ndo diezmo can. ²⁴ Nyooho ra cuaa, cuñí ndo jaquihin ityi ndo tsi nyívi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihi ñi.

Tan cuví tsi tumaa tsa tavá ndo tyucun luhlu nu tsa tsatsi ndo tan coco ndo iin camellu.

²⁵ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo.

²⁶ ¡Nyooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndihí ityi tsata.

²⁷ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandihi nuu tsa caquiñi. ²⁸ Tacan cuví nyooho, tyin cuñí nyívi tyin vaha xaan iñi ndo, maa tyin añima ndo ican quitá tsa jandaví ñaha ndo tan tandihi tsa caquiñi ndo.

²⁹ ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyaquí ndo ñaña ra cuví ndusu yuhu Nyoo, tan nacahyi ndo ñaña nyívi vaha tsicoo tahan tsanaha. ³⁰ Tacan tan catyí ndo: “Tun

tsatyin tsicoo yo quivi tsicoo tsii tsaahnu yo, ña cua jatyinyee yo tsi ra tsahñi tsi ra cuvi ndusu yuhu Nyoo”, catyí ndo. ³¹ Tsihin yacan ñi tan nacotó ndo tyin cuví ndo tata nyivi tsahñi tsi ra cuvi ndusu yuhu Nyoo! ³² Yacan vityin nyehe maa ndo na jaha ndo, javaha ndihi ndo tsa javaha tsii tsaahnu ndo, tun cuñi ndo!

³³ Nyooho nyivi caquiñi cuví ndo, tan nyivi cuví tata coo! ¿Nacaa cua cacu ndo tan ña cua cahun ndo anyaya? Ña cua cuvi. ³⁴ Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsaa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu. ³⁵ Yacan cuenda, tsata nyooho cua cunyaa cuatyí tsa cuenda tandihi ra vaha tsa tsahñi tsii tsaahnu ndo nda cuanda tsihi ra Abel tan nda cuanda quivi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo. ³⁶ Tsa nditsa catyí yu tsihin ndo, tyin tandihi cuatyí can cua coso siqui nyooho, nyivi tsa iyó vityin —catyí ra Jesús tsihin ra naha.

Nu nducuihya cuñi ra Jesús nyehé ra tsi nyivi ñuu

Jerusalén

(Lc. 13.34-35)

³⁷ ¡Ñuu Jerusalén! ¡Ndahvi nyooho nyivi ñuu Jerusalén! Tyin tsahñi ndo tsi ra cuvi ndusu yuhu Nyoo. Tan cañi ndo yuu tsi tandihi ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndivi sihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo. ³⁸ Nyehe ndo vityin, tyin tsa naco ihñi Nyoo tsi ndo. ³⁹ Tan catyí yu tsihin ndo, tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan cuví ra vatsí tsihin siivi Nyoo Jutu yo —catyí ra Jesús.

24

Nu caahán ra Jesús tyin cua tani vehe ñuhu cahnu

(Mr. 13.1-2; Lc. 21.5-6)

¹ Quita ra Jesús tsitsi vehe ñuhu cahnu can, tan tsa cuñi cahun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra. ² Maa tyin nacahan ra Jesús tan catyí ra:

—¿A nyehé ndo tandihi tsa iyó ihya? Tsa nditsa catyí yu tsihin ndo, tyin ihya ndi intuhun ca yuu tan ña cua coso tsata inga tsi. Tandihi maa can tan cua tani —catyí ra.

Nu caahán ra Jesús náa cua cuvi tsa ndi cumañi ca naa ñuhu ñayivi

(Mr. 13.3-23; Lc. 21.7-24; 17.22-24)

³Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahán ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñí ndi tsa catyi tuhun un tsihin ndi, ama cua cuvi tandihí tsa cahán un. ¿Nacaa tan coto ndi tatun tsa cuy- atyin tsa cua quitsi un inga tsaha tan tsa cua naa ñuhu ñayiví?

⁴Tacan tan nacahán ra Jesús:

—Jaha vaha ndo cuenda coto jandavi ñaha nyiví tsi ndo. ⁵Tyin cuaha xaan ra cua quitsi, tan cua cutyiñu ra naha sivi yu, tan cua catyi ra naha: “Yuhu cuví ra Cristo, ra tsa jaquitsí Nyoo.” Tan cuaha nyiví cua jandavi ñaha ra naha. ⁶Tan cua ñihi tuhun ndo tyin iyó cuatyí tan cañí tahan nyiví ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayiví. ⁷Tyin nyiví iin ñuu cua cañi tahan ñi tsihin nyiví inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi. ⁸Tandihí yacan cua cuvi nu ndi cua quitsaha nyehe nyiví tundoho.

⁹’Tacan tan cua cuhva cuenda nyiví tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihí nyiví iyó nu ñuhu ñayiví ndasi cua cuñi ñi nyehe

ñi tsi ndo tsa cuenda yuhu. ¹⁰Quiví can cuaha xaan nyiví cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua ñaxico ñaha tahan ñi tsi ñi. ¹¹Tan cuaha xaan ra caahán cuendu cua coo, tan cua catyi ra naha tyin cuenda Nyoo caahán ra naha. Tan cuaha xaan nyiví cua jandavi ñaha ra naha. ¹²Tan cuaha xaan tsa caquiñi cua coo. Yacan cuenda cua jandihí ñi tsa cuñí tahan ñi tsi ñi. ¹³Maa tyin nyiví tsa tsinú iñi tsi yu nda cuanda nu ndihí, tan ña cua ndu uvi iñi ñi, cua cacu ñi. ¹⁴Tan taniñi cahnu ñuhu ñayiví cua nacutya tuhun vaha tsa cuenda cuhva tsa ndacá ñaha Nyoo. Tan quiví cua coto nyiví tandihí ñuu tuhun vaha ihya, tacan tan cua naa ñayiví.

¹⁵’Ra Daniel, ra cuvi ndusu yuhu Nyoo, tyaa ra nu tutu Nyoo tyin coo tsa cua janducaquiñí, tsa cua jativi. Quiví tsa cua nyehe ndo can tsitsi vehe ñuhu Nu Ii, (nyooho tsa cahví, na cutuñi iñi ndo). ¹⁶Tyin quiví can, nyiví tsa iyó Judea taahán tsi tsa quita ñi ican tan cahun ñi ityi yucu. ¹⁷Tan nyiví yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi. ¹⁸Tan nyiví yucú tsitsi cuhu ña cua cunuhu jihna ñi cunaquihin ñi jahma ñi. ¹⁹¡Ndahvi ñiñaha tsa ñuhú sehe quiví can! O tatun iyó sehe ñi tsa tyaxín, ¡ndahvi ñi can! ²⁰Ndacan ndo tsi Nyoo na ña tahan tsi cunu ndo quiví vitsin, tan

ndi quiví quitatú yo. ²¹ Tyin tundoho tsa cua nyehe nyiví quiví can, ñaha ca maa coo can nda quiví tsa tsinu ñuhu ñayiví. Tan ndi ityi nuu ca ña cua nyehe nyiví tundoho tacan inga tsaha. ²² Tyin tatun ña cua janducuiti Nyoo quiví can, yoñi maa cua cacu. Maa tyin cua janducuiti ra tsa cuenda tsa cuñi ra tsi nyiví nacatsi maa ra.

²³ "Tatun yoo cua cahan tsihin ndo: "Jihna ndo, ihya nyaá ra Cristo" o "Nyehe ndo, ndacan nyaá ra Cristo", ña tsinu iñi ndo. ²⁴ Tyin cua quitsi ra jandavi ñaha naha ra tan cua catyi ra naha tyin ra Cristo cuví ra naha. Cua catyi ra naha tyin ndusu yuhu Nyoo cuví ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyiví tsa nacatsi maa Nyoo tun tsatyin cuvi jaha ra naha. ²⁵ Vaha tyin tsa tsitó ndo vityin ihya, jaha ndo cuenda tsi ndo quiví can. ²⁶ Yacan cuenda tatun catyi nyiví tsihin ndo: "Nyehe ndo, va ra Cristo nyii nu tsiqui can", Ña cahun ndo. O tatun catyi ñi tsihin ndo: "Nyehe ndo, nyii ra tsitsi cuarto ihya", ña tsinu iñi ndo. ²⁷ Tyin tumaa tsa cañi tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quiví quitsi yuhu, Rayii tsa quee nda gloria. ²⁸ Tumaa natacá nditsii nu cayucú tsa iñi, tacan cua nataca nyiví

yihí cuenda yu quiví quitsi yu inga tsaha.

Nacaa cua quitsi Rayii tsa quee nda gloria inga tsaha

(Mr. 13.24-37; Lc. 21.25-33; 17.26-30, 34-36)

²⁹ "Tan tsa yaha tsa cua nyehe nyiví tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihi tsa iyó andiví cua nacanda.

³⁰ Tacan tan cua quituvi seña ityi andiví tyin vatsí yuhu Rayii tsa quee nda gloria. Cua quitsi yu nu vico ityi andiví tsihin tunyee iñi cahnu tan tsihin tsa cahnu cuví Nyoo. Tan tandihi nyiví iyó nu ñuhu ñayiví, cua vacu tsa xaan ñi tsa cua nyehe ñi tsi yu.

³¹ Tan cuaha ángel cuenda yu cua jaquitsi yu tyin ñihi cua tiví ra naha cutu tan cua jandu iin ra naha tsi nyiví nacatsi maa Nyoo. Cua quita ñi taniñi cahnu nu ñuhu ñayiví, nda cuanda nu ndihi ñuhu ñayiví tan nda cuanda nu ndihi andiví.

³² "Cutuñi iñi ndo iin cuhva yutun tsa nañi higo: Tatun tsa yutya soco tuñ, tan tsa cana ndaha yutya tun, nyooho tsitó ndo tyin tsa cua coo tsiti tun. ³³ Tan juvin ñi tacan, tatun tsa cuví tandihi yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. ³⁴ Tsa nditsa catyi yu tsihin ndo tyin tandihi yacan cua cuvi jihna, tsa ndi cumañi ca cúu nyiví iyó nu ñuhu ñayiví. ³⁵ Tan coo quiví cua cunaa andiví tan tsihin

ñuhu ñayivi, maa tyin tuhun caahán yuhu, ña cua cundihi tsi tyin cua cundaa tandihi tsi.

³⁶ Maa tyin quivi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

³⁷ Tumaa cuvi quivi tsa tsicoo ra Noé, tacan cua cuvi quivi tsa cua quitsi nyico yuhu Rayii tsa quee nda gloria. ³⁸ Quivi tsa ndi cumañi ca cuun savi xaan, nyivi can, tsatsí ñi, tsihí ñi, tindahá ñi, tan tsahá ñi tsi sehe siihi ñi tindaha nda cuanda quivi quihvi ra Noé tsitsi yutun ndoo. ³⁹ Tan sana iñi ñi tan tsaq savi tan tañi tandihi ñi. Tan tacan sana iñi ñi tan cua tahan tsi quivi quitsi nyico yuhu Rayii tsa quee nda gloria. ⁴⁰ Tan tatun yucú uvi taahan rayii tsitsi cuhu quivi can, intuhun ñi ra cua quihin yu, tan cua nacoo yu tsi inga ra. ⁴¹ Tan quivi can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña. ⁴² Cuatu vaha ndo tyin ña tsitó ndo náa hora cua quitsi ra ndacá ñaha tsi ndo. ⁴³ Tan çoto ndo tuhun ihya tyin tatun iin tsitoho vehe tan tsitó ra náa cuhva cua quihvi ñasuhu tsitsi vehe ra, cua cuatu vaha ra tan ña cua cuhva ra tsa quihvi ñasuhu can. ⁴⁴ Yacan cuenda nyooho, cuatu vaha ndo. Tyin sana iñi ndo, tan cua quitsi nyico yuhu Rayii tsa quee nda gloria.

Musu vaha tan musu ña

vaha

(Lc. 12.41-48)

⁴⁵ Musu tsa tyaá soho tsa caahán tsitoho ra, juvin ra cuvi musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihi ca musu. ⁴⁶ Tan sii xaan cuñi ra cuvi musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihi tsa taahán tsi ica ra. ⁴⁷ Tan tsa nditsa catyí yu tsihin ndo, tyin tsitoho ra cua nacuhva ra tandihi cuvi tsa cumí ra, cua quihvi ndaha ra, tyin vaha tyaá yahvi ra tsihin tyiñu jahá ra. ⁴⁸ Maa tyin iin musu ña vaha tsicá iñi ra tyin cua cucuee tsitoho ra. ⁴⁹ Tacan tan quitsaha cañi ra tsi inga musu, tan tsatsí ra tan tsihí ra nyixi tsihin ra tsiñi naha ra. ⁵⁰ Tacan tan sana iñi ra tan cua tsa tsitoho ra quivi tsa ña ndatú ra tsi ra, tan hora tsa ña tsitó ra. ⁵¹ Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra icá tsihin nyivi tsa jahá tyin vaha xaan ñi tan ña icá ñi tsa vaha. Tacan tan cua vacu ra cuvi musu ña vaha can tan cahyu ña cua cuvi nuhu ra tsa nyehé ra tundoho.

25

Nu cahan ra Jesús iin cuhva cuenda utsi taahan ñaha yoco

¹ Tsa ndacá ñaha Nyoo tsi nyivi cuvi tsi tumaa utsi taahan ñaha yoco tsa quihin lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha. ² Uhun taahan ñi, soho xaan ñuhú iñi ñi,

tan inga uhun taahan ñi can catsi xaan tsicá iñi ñi. ³ Ñi tsa soho ñuhú iñi can, nyisó ñi lámpara ñi maa tyin ña quihin ñi juhva ca acetye tsa natyihí ñi tsitsi lámpara ñi tatun ndihi tsi. ⁴ Tan ñi tsa catsi tsicá iñi can, nyisó siin ñi inga yutyi acetye tsa cua natyihí ñi tsitsi lámpara can tatun ndihi acetye tsa yihí tsitsi lámpara can. ⁵ Tan ra tsa cua tindaha can cucueé xaan ra, tacan tan tijn ñumaahna tsi tandihi ñi, tan quixi ñi. ⁶ Tacan tan maa ñuu tsiñi ñi iin ndusu tsa catyí tyehen: “¡Tsa vatsí ra tsa cua tindaha! ¡Quita ndo, jatahan ndo tsi ra!” ⁷ Tandihi ñi can nduvitá ñi tan quitsahá janduvahá ñi lámpara ñi. ⁸ Tacan tan quitsahá caahán tsa uhun ñi soho ñuhú iñi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñí ndahva lámpara ndi”, catyí ñi. ⁹ Maa tyin ñi yoco tsa catsi tsicá iñi can nacahan ñi tyehen: “Ña cua kuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca kuhun maa ndo kujata ndo nu cuyahví tsi.” ¹⁰ Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaá ra tsa cua tindaha can. Tan ñi yoco tsa ndatú vaha can, quihvi ñi tsihin ra tsitsi vehe nu cua coo vico tindaha. Tan tsicundasí yuvehe can. ¹¹ Yahá can tan tsaá nyico ñi soho ñuhú iñi can, tan catyí ñi: “¡Yooho tata! ¡Nuña yuvehe na quihvi ndi!”, catyí ñi.

¹² Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

¹³ Tacan tan quitsahá caahán ra Jesús:

—Cuatu vaha ndo, tyin ña tsitó ndo ndáa quivi tan náa hora cua quitsi nyico yuhu Rayí tsa quee nda gloria.

Nu caahán ra Jesús tsihin yo na jaha tyiñu yo tsihin tsa tsaá Nyoo tsi yo

(Lc. 19.11-27)

¹⁴ Tsa ndacá ñaha Nyoo tsi nyivi cuví tsi tumaa iin rayí tsa nyaá cua quita kuhun inga ñuu nu cañi. Tan caná ra tsi musu ra, tan tsaá cuenda ra xuhun ra tsi ra naha tyin jaha cuenda ra naha.

¹⁵ Iin ra tsaá ra uhun mil xuhun, tan inga ra tsaá ra uvi mil xuhun, tan inga ra tsaá ra iin mil. Tsaá ra tsi intuhun intuhun ra nácaa kuhva tsitó ra jaha tyiñu ra naha tan cua nandaa siqui xuhun can. Tacan tan cuahán ra. ¹⁶ Musu tsa quihin uhun mil xuhun can, ñihi jahá tyiñu ra tsihin xuhun can, tan jahá canaa ra inga uhun mil ca siqui tsi. ¹⁷ Tan juvin ñi tacan tucu ra tsa quihin uvi mil can, jahá canaa ra uvi mil ca tsihin xuhun can. ¹⁸ Maa tyin ra tsa quihin intuhun ñi mil can, tsaá ra tan tsatyá ra iin yavi tsitsi ñuhu tan tyihí xeehe ra xuhun tsitoho ra.

¹⁹ Cuaha quivi yahá tan tsaá nyico tsitoho musu can. Tan quitsahá natavá cuenda ra tsihin intuhun intuhun ra naha. ²⁰ Jihna ca ra tsa

quih̄in uhun mil xuhun can tsāa, tan nacuhvā cuenda ra uhun mil ca siqui can, tan catyí ra: “Taa, uhun mil tsāa un tsi yu, juhun inga uhun mil ihya tsa jah̄a canaa yu siqui tsi.”²¹ Tan tsitoho ra catyí ra tsihin ra: “Vaha. Iin musu vaha xaan cuví un. Tan javahā un tandih̄i tsa cahan̄ yu tsihin un. Luxu ñi xuhun tsāa yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan sīi cuñi un tsihin yu.”²² Yahā can tan tsāa musu tsa quih̄in uvi mil xuhun can, tan catyí ra: “Taa, uvi mil ñi tsāa un tsi yu, juhun uvi mil ca ihya tsa jah̄a canaa yu siqui tsi.”²³ Tan catyí tsitoho ra tsihin ra: “Vaha. Iin musu vaha xaan cuví un, tan javahā un tandih̄i tsa cahan̄ yu tsihin un. Luxu ñi xuhun tsāa yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan sīi cuñi un tsihin yu”, catyí ra.²⁴ Tan cuhva tsa tsāa musu tsa quih̄in intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñi un naquih̄in un xuhun nu ña jahá tyiñu un, tan cuñi un naquih̄in un cosecha nu ña tatsi un.”²⁵ Yacan cuenda nayuhvi yu tan tsāan yu tan tyih̄i xeehe yu xuhun un tsitsi ñuhu. Juhun xuhun ihya tsa tsāa un tsi yu”, catyí ra.²⁶ Tacan tan nacahan̄ tsitoho ra, tan catyí ra tsihin

ra: “Musu ña vaha cuví un, tan musu jutsan cuví yooho. Tatun tsitó un tyin naquih̄in yu nu ña jahá tyiñu yu, tan quih̄in yu cosecha nu ña tatsi yu,²⁷ ¿nácaa tyin ña tsityih̄i un xuhun yu nu banco? Tun tsatyin tacan javahā un, tsa cua quitsi nyico yu cuví naquih̄in yu xuhun can tsihin xuhun siqui tsa jahá canaa tsi”, catyí ra.²⁸ Tacan tan quitsahā caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cuhva ndo tsi ra tsa ndahá utsi mil.”²⁹ Tyin nyivi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyivi tsa ña cuñi jaha tyiñu tsihin tsa tsāa yu, nda cuanda tsa luxu tsa cumí ñi, cua quihin nyaa ndih̄i yu.³⁰ Tan musu tsa ña tsiñi ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsa ra, tan cahyu ña cua cuví nuhu ra tsihin tsa nyehé ra tundoho.”

Nu cahan̄ ra Jesús tyin cua cutuñi tandih̄i nyivi

³¹ 'Quivi cua quitsi nyico yuhu Rayīi tsa queē nda gloria, cua quitsi yu tsihin cuaha ángel cuenda yu. Tan cua cunyaa yu tyayu sīi caá tan cua cundaca ñaha yu.³² Tandih̄i cuii nyivi iyó nanīi cahnu nu ñuhu ñayivi cua nataca ñi nuu yu. Tan cua natava sīn yu tsi intuhun intuhun ñi, tumaa ra jahá cuenda mbee tavá sīn ra

tsi mbee ticatyí tan tavá s̄in tucu ra tsi mbee chivo. ³³ Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu. ³⁴ Tacan tan yuhu tsa cuví yu Rey cua catyí yu tsihin nyívi nyecú tsiyo cuaha yu: “Naha nyooho nyívi tsa nasoco Jutu yu. Na quíhin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javaha ra ihya quívi javaha ra ñuhu ñayívi. ³⁵ Tyin quívi tsisoco yu, nyooho tsaha ndo tsa tsatsí yu. Quívi na ityí ñi yu, tsaha ndo ndutya tsihi yu. Tan quívi tsica nuu yu cuví yu ra inga ñuu, tsaha ndo nu quixí yu. ³⁶ Quívi cumañi jahma yu, tsaha ndo jahma tsinditsí yu. Quívi cuhví yu, tsinyehé ndo nu canyí yu. Tan quívi tsinyí yu vehe caa, tsinyehé ndo nu nyí yu”. Tacan cua cahan yu tsihin ñi. ³⁷ Tan ñi tsa vaha ñi can cua ndaca tuhun ñi tsi yu, tan catyí ñi: “Jutu Mañi yu, ¿ama nyehe ndi tsisoco un, tan tsaha ndi tsa tsatsí un? ¿Ama nyehe ndi na ityí ñi un tan tsaha ndi tsa tsihi un? ³⁸ ¿Ama nyehe ndi tsi un tsica nuu un cuví un ra inga ñuu tan tsaha ndi vehe nu quixí un? ¿Ama cumañi jahma un, tan tsaha ndi jahma tsinditsí un? ³⁹ ¿Ama nyehe ndi cuhví un, o tsinyí un vehe caa, tan tsahan ndi tsinyehé ndi tsi un?” cua catyí ñi. ⁴⁰ Tan yuhu tsa cuví Rey cua catyí yu tsihin ñi: “Tsa nditsa catyí yu tsihin ndo, tyin tandihi

tumañi ñi tsa javaha ndo tsi ra ndaahvi, ra yañi yu, tsi yuhu javaha ndo tumañi ñi”, cua catyí yu tsihin ñi.

⁴¹ Tacan tan yuhu tsa cuví Rey cua cahan yu tsihin nyívi tsa yucú tsiyo satyin yu tyehen: “Catsiyo ndo nuu yu, nyooho, nyívi taahan tsi cuhun anyaya. Cuaahan ndo nu ñuhu tsa ña cua ndahva maa. Tsinu anyaya can tyin ican cua coo nu ña vaha tan tatyí ña vaha cuenda nu. ⁴² Tyin tsisoco yu tan nyooho ña tsaha ndo tsa catsi yu. Na ityí ñi yu tan ña tsaha ndo ndutya coho yu. ⁴³ Tsica nuu yu cuví yu iin ra inga ñuu, tan ña tsaha ndo nu cusu yu. Cumañi jahma yu tan ña tsaha ndo jahma cunditsi yu. Nacuhví yu tan tsinyí yu vehe caa, maa tyin ña tsahan ndo tsinyehé ndo tsi yu nu tsinyí yu”, cua catyí yu tsihin ñi. ⁴⁴ Tacan tan cua catyí ñi tsihin yu: “Jutu Mañi yu, ¿ama nyehe ndi tsisoco un, o na ityí ñi un, o tsica nuu un cuví un ra inga ñuu, o nduve jahma un, o nacuhví un, o tsinyí un vehe caa, tan ña jatinyee ndi tsi un?” cua catyí ñi. ⁴⁵ Tan yuhu tsa cuví yu Rey cua catyí yu tsihin ñi: “Tsa nditsa caahan yu tsihin ndo tyin tandihi maa tsa ña javaha ndo tsihin nyívi ndaahvi ihya, ña javaha ndihi ndo tsihin yu, cuví can”, cua catyí yu tsihin ñi. ⁴⁶ Tacan tan ñi can cua cuhun ñi nu cayú ñuhu tsa ña cua ndahva maa. Tan nyívi vaha can cua cuhun ñi coo ñi ñayívi nyito tsa ña cua naa

maa.

26

Nu nducú ra mandoñi naha ra cuhva nácaa tan tñn ra naha tsi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva tsa ndihí cahan ra Jesús tandihí tuhun can, tan quitsaha catyí ra tsihin ra tsicá tsihin ra:

² —Nyooho tsitó ndo tyin ndi cumañi uvi ca quiví tan tahan tsi vico pascua. Tan yuhu, Rayí tsa quee nda gloria, cua cuhva cuenda nyiví tsi yu na tyaa ra cumi tyiñu tsi yu nu cruu —catyí ra.

³ Quiví can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsaahnu tsa cuví ityi nuu. ⁴ Tan jandaq ra naha tyiñu nácaa cua jandavi ñaha ra naha tsi ra Jesús tan tñn ra naha tsi ra tan cahñi ra naha tsi ra. ⁵ Tan catyí ra naha:

—Ña cua cahñi yo tsi ra quiví maa vico, coto nduvaa xaan nyiví —catyí ra naha.

Nu tyosó iin ñaha ndutyá tami jiñi ra Jesús

(Mr. 14.3-9; Jn. 12.1-8)

⁶ Ra Jesús nyíí ra ñuu Betania, vehe ra Simón, ra tsa yihí cuehe tyaaahu. ⁷ Tan natuhvā iin ñaha nu nyaá ra Jesús, ndahá ña iin yutyi yuu vaha tsitú can yihí ndutyá tami. Tan yahví xaan nyaá ndutyá tami can. Tan ra Jesús nyaá ra yuhu mesa, tan ñaha

can tyoso ña ndutyá can jiñi ra. ⁸ Tsa nyehe ra tsicá tsihin ra, nduxaan ra naha tan catyí ra naha:

—¿Nacuenda jativí ña ndutyá tami can? ⁹ Vaha ca tun tsatyin xico ña can, tan ñihi cuaha ña xuhun tsihin can. Tan cuví jatyyinyee ña tsi nyiví ndaahví tsihin xuhun can —catyí ra naha.

¹⁰ Tan tsa tsiñi ra Jesús tsa caahán ra naha, tacan tan catyí ra tsihin ra naha:

—¿Nacuenda cuñí ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi. ¹¹ Tyin nyiví ndaahví tandihí ñi quiví cua coo ñi tsihin ndo, maa tyin yuhu, ña naha ca cua cunyii yu tsihin ndo. ¹² Tyoso ña ndutyá tami siqui cuñu ñuhu yu, tyin janduvaha ña itsi tyin cua cahun tsi tsitsi ñuhu. ¹³ Tsa nditsa catyí yu tsihin ndo, tyin tandihí ñi nu cua cahan nyiví tuhun Nyoo tanií cahnu ñuhu ñayiví, cua nacatyí tuhun tucu ñi tsa javahā ñaha ihya, na nducuhun iñi nyiví tsi ña —catyí ra Jesús.

Nu xico ra Judas Iscariote tsi ra Jesús

(Mr. 14.10-11; Lc. 22.3-6)

¹⁴ Tacan tan iin ra tsicá tsihin ra Jesús, ra tsa nañi Judas Iscariote, tsahan ra tsicahan ra tsihin ra jutu tsa cuví ityi nuu naha ra. ¹⁵ Tan catyí ra tsihin ra naha:

—¿Nacaa cua tyahví ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsaḥa ra naha oco utsi xuhun cuitsin tsi ra. ¹⁶ Tan nda quiví can tan quitsaha nducú ra Judas cuhva cua nacuhva cuenda ra tsi ra Jesús tsi ra jutu can naha ra.

Nu cuxiñi ra Jesús tsihin ra tsicá tsihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quiví jihna ñi tsa quitsaha vico nu tsatsí nyiví paan tsa nduve yutsan iya yihí, ra tsicá tsihin ra Jesús natuhva ra naha nu nyaá ra tan quitsaha tsicá tuhun ra naha tsi ra tan catyí ra naha:

—¿Numaa cuñí un tsa cujanduvaha ndi tsa cuxiñi un cuenda vico pascua ihya?

¹⁸ Tan catyí ra Jesús tsihin ra naha:

—Cuaahan ndo tsitsi ñuu nda vehe rayií ihya. Tan catyí ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, catyí ndo tsihin ra —catyí ra Jesús.

¹⁹ Tacan tan javaha ra naha cuhva caḥan ra Jesús tsihin ra naha. Tan janduvaha ra naha tsa cuxiñi ra naha vico pascua can.

²⁰ Tsa cunaaha tan tsicunya ra Jesús nu mesa tsihin tandihí utsi uvi ra tsicá tsihin ra. ²¹ Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooḥo cua xico ndo tsi yu tsi ra xaan iñi tsi yu.

²² Tan nducuihya xaan cuñí ra naha, tan quitsaha

tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

²³ Tan nacahaḥan ra Jesús tan catyí ra:

—Ra tsa tsatsí iin ñi coho tsihin yu, ra ican cua xico tsi yu. ²⁴ Yuhu, Rayií tsa quee nda gloria, cua tahan yu tumaa tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacú ra —catyí ra Jesús.

²⁵ Tacan tan nacahaḥan ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahaḥan ra Jesús, tan catyí ra:

—Juvín un.

²⁶ Tsitsi tsa tsatsí ra naha, ra Jesús quihín ra paan tan nacuhva ra tyahvi nyoo tsi Nyoo, tan tsahnú sava ra, tan tsaḥa ra tsi ra tsicá tsihin ra, tan catyí ra tsihin ra naha:

—Çatsi ndo. Paan ihya cuví tumaa cuñu ñuhu yu.

²⁷ Yaha can tan quihín tucu ra vasu vinu, tan nacuhva ra tyahvi nyoo tsi Nyoo, tan jayaha ra tsi tandihí ra naha tan catyí ra:

—Coho tandihí ndo vinu ihya. ²⁸ Tyin cuví tsi tumaa niñi yu. Tan tsihin niñi yu cua cundaa tyiñu tsa ndoḥ Nyoo tsihin ndo, tyin cua cati niñi yu tsa cuenda tsa vaha tsi nyiví cuaha, tyin tsihin niñi yu cua coo tucahnu iñi cu-atyí ñi. ²⁹ Tan catyí yu tsihin ndo, tyin ña cua coho ca yu tahan vinu tsa cuví ndutya

uvas ihya, nda cuanda tsa coho yu vinu tsa tsihin ndo nda nu ndacá ñaha Jutu yu gloria —catyí ra.

Nu cahan ra Jesús tyin cua cahan ra Pedro tyin ña nacotó ra tsi ra

(Mr. 14.26-31; Lc. 22.31-34; Jn. 13.36-38)

³⁰Tsa yahá tsa tsitá ra naha iin yaa Nyoo, tan cuahán ra naha yucu Olivo. ³¹Tacan tan quitsahá caahán ra Jesús tsihin ra naha:

—Tandihí nyooho tan cua nacoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi. ³²Maa tyin tsa yahá nandoto yu, jihna ca yu cua cahun Galilea, tsa ndi cumañi ca cahun nyooho.

³³Tacan tan nacahan ra Pedro tan catyí ra:

—Vasu ndi maa tandihí ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

³⁴Tacan tan catyí ra Jesús tsihin ra:

—Tsa nditsa catyí yu tsihin un tyin juvin ñi maa tsacuaa vityin, tsa ndi cumañi ca vacu tsitooho, uñi tsaha cua cahan un tyin ña nacotó un tsi yu —catyí ra Jesús.

³⁵Tan ra Pedro catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra.

Tan juvin ñi tacan catyí tandihí ca ra tsicá tsihin ra.

Nu tsican tahvi ra Jesús tsi Nyoo nda Getsemaní

(Mr. 14.32-42; Lc. 22.39-46)

³⁶Tacan tan tsaá ra Jesús tsihin ra tsicá tsihin ra iin nu iyó cuaha yutun nu nañi Getsemaní, tan catyí ra tsihin ra naha:

—Cunyecu ndo ihya tsitsi tsa cuahán yu ndacan cua ndacan tahvi yu.

³⁷Tan quihín ra tsi ra Pedro tan nduvi sehe ra Zebedeo cuahán tsihin ra. Tan quitsi tucuiihya iñi cahnu tsi ra, tan tsa tuñu cuñi ra. ³⁸Tacan tan catyí ra tsihin ra naha:

—Cahnu xaan tucuiihya iñi nyaá añima yu, nda cuanda cuñi cahñi ña can tsi yu. Ndo ndo ihya tan coo nyito ndo tsihin yu —catyí ra.

³⁹Tacan tan cuahán ra Jesús luxu ca ityi nuu tan tsicuiñi tsiti ra tan tsaquin ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuvi jat-siyo nyaha un tundoho ihya siqui yu, vaha xaan. Maa tyin na ña cuvi cuhva cuñi maa yu, tan na cuvi cuhva cuñi maa un —catyí ra.

⁴⁰Tacan tan tsaá ra nu yucu ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora? ⁴¹Coo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa

nditsa tyin añima ndo, cuñí xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñí —catyí ra Jesús.

⁴² Tan tsa tsahan ra tsa tsinu uvi tsaha, tsican tahvi ra tyehen:

—Tyaa, tatun ña cuvi tsa jatsiyo nyaha un tundoho ihya sigui yu, na cuvi cuhva cuñí maa un —catyí ra.

⁴³ Tacan tan tsaq ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñí xaan ra naha cusu ra naha. ⁴⁴ Tacan tan nacoq ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsican tahvi ra tsi Nyoo juvin ñi maa tsihin tuhun tsa tsa yaha cahán ra. ⁴⁵ Tacan tan tsaq nyico ra nu yucú ra tsicá tsihin ra, tan catyí ra tsihin ra naha:

—Vityin cusu ndo tan quitatu ndo. Tyin tsa tsaq cuhva tsa cua nacuhva cuenda ra can tsi Rayí tsa quee nda gloria tsi ra iyó cuatyí naha ra. ⁴⁶ Nduvita ndo, cohon ndo. Tyin tsa vatsí ra tsa xico tsi yu —catyí ra Jesús.

Nu tsaha cuenda ra Judas tsi ra Jesús tsi nu xaan ñi tsi ra nahnu

(Mr. 14.43-50; Lc. 22.47-53; Jn. 18.2-11)

⁴⁷ Ndi caahán ca ra Jesús yacan, tan tsaq ra Judas, ra tsa cuví iin ra tsicá tsihin ra Jesús. Tan tsihin ra Judas tsaq tucu cuaha xaan nyivi ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi

nyivi Israel naha ra. ⁴⁸ Tan ra Judas, ra tsa tsahá cuenda tsi ra Jesús, tsa yaha tsaha ra iin seña tsi ra can naha ra, tyin coto ra naha yóo cua tiin ra naha. Tyin tsa yaha cahán ra tsihin ra naha:

—Ra tsa cua tyayuhu yu, ra ican cuví ra tsa cua tiin ndo.

⁴⁹ Tacan tan natuhva ra Judas nu nyaá ra Jesús tan catyí ra:

—Nacumi tsi un, Maestro. Tan tyayuhu ra tsi ra.

⁵⁰ Tacan tan nacahan ra Jesús tan catyí ra tsihin ra:

—¿Náa tyiñu vatsí un ñih?

Tacan tan natuhva ra can naha ra tan tiin ra naha tsi ra Jesús.

⁵¹ Tacan tan iin ra cutahán tsihin ra Jesús, tava ra mityi tan tsahnya ra soho musu jutu tsahnu tsa cuví ityi nuu.

⁵² Tan catyí ra Jesús tsihin ra:

—Natyihí mityi un tsitsi vena un. Tyin tandihí nyivi tsa cañí tahan tsihin mityi, juvin ñi tsihin mityi cua cúu ñi. ⁵³ ¿A ña tsitó un tyin tatun yuhu tan cuñí yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu? ⁵⁴ Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen?

—catyí ra.

⁵⁵ Tacan tan catyí ra Jesús tsihin tandihí nyivi:

—¿A vatsí tiin ndo tsi yu tumaa cua tiin ndo iin ñasuhu? tyin ndahá ndo mityi tan yutun. Tandihí quivi tsinyi yu

jacuahā yu tsi ndo tsitsi vehe ñuhu cahnu, tan ña tñin ndo tsi yu. ⁵⁶ Tandihī yacan cuvī tyin tacan tan cundaa cuhva catyī tuhun Nyoo, tsa tyaā ra cuvī ndusu yuhu Nyoo taħan tsanaha.

Tacan tan tandihī ra tsicā tsihin ra, tsinū ra naha. Tan ndoq̄ intuhun ña maa ra.

Nu tsicā tuhun ra mandoñi naha ra tsi ra Jesús tatun Sehe Nyoo cuvī tsi ra

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Tan ra tsa tñin tsi ra Jesús, tsindacā ra naha tsi ra nuu ra Caifás, ra jutu tsaahnu tsa cuvī ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra. ⁵⁸ Tan ra Pedro cuahán ra tsata ra naha, tan tsaā ra nda nuquehe vehe ra Caifás can. Tan quihvī ra tan ndoq̄ ra nyiī ra tsihin vitya can naha ra, tyin cua nyehe ra nácaa cua quita tuhun can.

⁵⁹ Ra jutu tsa cuvī ityi nuu naha ra, tan ra mandoñi naha ra, tan tandihī ra cumí tyiñu naha ra, nducū ra naha tsi ra cahan cuendu siqui ra Jesús. Tyin tacan tan cuvī cahñi ra naha tsi ra. ⁶⁰ Maa tyin ña ñihī maa ra naha cuatyī tyaa ra naha siqui ra, vasu ndi maa cuaha nyivi tsaħan ñi tsicahān ñi cuendu siqui ra. Tan nu ndihī tuhun, tsaā uvi ca tsa ndaa tsa caahán cuendu. ⁶¹ Tan catyī ra naha:

—Ra ihya, catyī ra tyin cuvī canī ra vehe ñuhu cahnu Nyoo, tan tsitsi tsa uñi quivi

cua janduvita ra tsi inga tsaha —catyī ra naha.

⁶² Tacan tan ra jutu tsa cuvī ityi nuu can, nduvitā ra, tan catyī ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

⁶³ Maa tyin ra Jesús ña nacahān ra. Tacan tan catyī ra jutu tsaahnu tsa cuvī ityi nuu tsihin ra:

—Tsihin sivi Nyoo nyitó, catyī yu tsihin un tyin catyī un tsa nditsa vaha. ¿A ra Cristo Sehe Nyoo cuvī tsi un? —catyī ra.

⁶⁴ Tan catyī ra Jesús tsihin ra:

—Juvin yu cuvī. Tan catyī tucu yu tsihin ndo, tyin cua nyehe ndo tsi yuhu, Rayñi tsa quee nda gloria, cunyaa yu xiin cuaha Nyoo ra iyó tandihī tunyee iñi, tan cua nyehe ndo nu cua quitsi yu nu vico ityi andivi inga tsaha —catyī ra.

⁶⁵ Tacan tan ra jutu tsaahnu tsa cuvī ityi nuu can tsaħnyā ra jahma ra tumaa iin seña tyin cuñi maa ra tyin ña vaha tsa caahán ra Jesús, tan catyī ra tsihin tandihī ca ra naha:

—Ra ihya tsicoq̄ cuatyī ra nuu Nyoo tsihin tsa caahán ra. ¡Nyehe ndo vityin! Ña cuñi ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cahan ra. ⁶⁶ ¿Náa catyī ndo vityin?

Tan nacahān ra naha tan catyī ra naha:

—Iyó cuatyí ra, yacan taahán tsi tsa cúu ra.

⁶⁷ Tacan tan tiví sii ra naha nuu ra tan cañi ra naha tsi ra. Inga ra cañi ra naha nuu ra tsihin tsiqui. ⁶⁸ Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

Nu cahan ra Pedro tyin ña nacotó ra tsi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Tsitsi tsa ndi nyíí ra Pedro nuquehe ityi tsata vehe can, tan iin ñaha tsa cuví musu jutu can, natuhva ña nu nyaá ra tan catyí ña tsihin ra:

—Yooho tucu tsica un tsihin ra Jesús, ra Galilea can.

⁷⁰ Tan ra Pedro catyí ra nuu tandihi nyivi yucú can:

—Ña tsica yu tsihin ra can. Ña tsitó yu náa caahán un.

⁷¹ Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsica ndihi tucu ra ihya tsihin ra Jesús, ra ñuu Nazaret —catyí ña.

⁷² Tan inga tsaha tyihí xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

⁷³ Tañi cuii ca, tan ra yucú can natuhva ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

⁷⁴ Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvín ñi cuhva can navacu tsitooho. ⁷⁵ Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho, yooho tsa yaha cahan un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quita ra ican, tan tsacu xaan ra tsa cuihya cuñi ra tsa javaha ra tacan.

27

Nu nacuhva cuenda ra naha tsi ra Jesús tsi ra Pilato

(Mr. 15.1; Lc. 23.1-2; Jn. 18.28-32)

¹ Tan tsa tuví inga quivi, tandihi ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús. ² Tan nuuhñi ra jaha ra naha. Tan tsahan ra naha tsinacuhva cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

Nu tsihi ra Judas

³ Tsa nyehe ra Judas, ra tsa xico tsi ra Jesús, tyin cua cúu ra, tan ndu uví iñi ra tsa javaha ra, tan nacuhva ra tsa oco utsi xuhun cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra. ⁴ Tan catyí ra:

—Tsiocoꝝ cuatyí yu, tyin tsaḥa cuenda yu tsi iin ra nduve cuatyí na cúu ra.

Tan nacahaṅ ra naha tan catyí ra naha:

—¿Nacuenda nyuhu? ¡Nyehe maa yooho!

⁵ Tacan tan tyoso ihñi ra Judas xuhun can tsitsi vehe ñuhu cahnu, tan quita ra cuahán ra tsityihí ra yoho jucun ra tan ticaa ra tsi ra iin nu yutun, tan tsihi ra.

⁶ Ra cuví ityi nuu tsihin jutu can naha ra naquihin ra naha xuhun can tan catyí ra naha:

—Ña cuví tyihi yo xuhun ihya tsitsi caja nu yihí xuhun tsa tsahá nyivi tsi Nyoo tyin xuhun tsa cuyahvi ra tsa cua cati niñi cuví can.

⁷ Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyivi inga ñuu tun tsiihi ñi ñuu can. ⁸ Yacan cuenda nañi ñuhu can nda cuanda vityin “Ñuhu Cuenda Tsa Tsati Niñi Nyivi”. ⁹ Tacan cuví tyin cundaa tsa tyaa ra Jeremías, ra cuví ndusu yuhu Nyoo tahaṅ tsanaha nu catyí tsi tyehen: “Juvín ñi maa ra naha quihin nyico tsa oco utsi xuhun cuitsin, tsa jata ra naha tsi ra Cristo. ¹⁰ Tan tsihin can, jata ra naha ñuhu tsa nañi ‘Ñuhu Ra Javahá Quisi’, tacan catyí Jutu Mañi yo tsihin yu”, catyí tsi.

Nu nyehe ra Pilato tyin nduve cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Tsindaca ra mandoñi can naha ra tsi ra Jesús nuu ra ndacá ñaha, tan ra can tsica tuhun ra tsi ra, tan catyí ra:

—¿A yooho cuví rey cuenda nyivi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

¹² Tan cuhva tsa tyaa ra jutu can naha ra tan ra mandoñi naha ra cuatyí siqui ra, ña nacahaṅ maa ra. ¹³ Tacan tan catyí ra Pilato tsihin ra:

—¿A ña tsiñi un tandihi tsa caahán ra naha siqui un?

¹⁴ Maa tyin ra Jesús ña nacahaṅ maa ra. Tan iyo xaan cuñi ra ndacá ñaha can tyin ña nacahaṅ ra.

Nu cahaṅ ra cumí tyiñu tyin taahán tsi cúu ra Jesús

(Mr. 15.6-20; Lc. 23.13-25; Jn. 18.38—19.16)

¹⁵ Tan vico pascua tuhva ra ndacá ñaha jañá intuhun ra yucú vehe caa. Ndáa ra tsa nacatsi maa nyivi, juvín ra cua quita nuña. ¹⁶ Tan quivi can nyii iin ra tsa nañi Barrabás vehe caa. Tan tandihi nyivi tsitó tuhun ra.

¹⁷ Tan cuhva tsa ndu iin nyivi, ra Pilato tsica tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

¹⁸ Tyin tsitó ra tyin tsa cuenda tsa ndasi cuñi ra jutu

can naha ra nyehe ra naha tsi ra Jesús, yacan cuenda tsaha cuenda ra naha tsi ra tsi ra Pilato.

19 Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhvi xaan tsi tsi yu”, catyí ña.

20 Maa tyin ra jutu can naha ra tan ra mandoñi naha ra, cuñihi ra naha natyuhú ra naha tsi nyivi na ndacan ñi tsa jaña ra Pilato tsi ra Barrabás, tan na cúu ra Jesús.

21 Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahan ñi, tan catyí ñi:

—Jaña tsi ra Barrabás.

22 Tan ra Pilato tsica tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañi Cristo ihya?

Tandihí ñi nacahan ñi tan catyí ñi:

—iTyaa tsi ra nu cruu na cúu ra!

23 Tacan tan catyí ra Pilato tsihin ñi:

—Tan ¿náa tsa ña vaha javaha ra?

Maa tyin maa ñi cana tsaa ñi inga tsaha tan catyí ñi:

—iTyaa tsi ra nu cruu na cúu ra!

24 Tsa nyehe ra Pilato tyin ña cuví jaha ra tsi nyivi, tyin ñihi xaan cuvaá jahá ñi. Tacan tan tsican ra ndutya,

tan nacatyá ra ndaha ra nuu nyivi can, tan catyí ra:

—Ña cua ndoo cuatyí tsa cua cúu ra vaha ihya siqui yuhu, tyin siqui nyooho cua ndoo cuatyí can.

25 Tan tandihí nyivi nacahan ñi, tan catyí ñi:

—Na ndoo maa tsi siqui ndi tan siqui sehe ndi.

26 Tacan tan ra Pilato jaña ra tsi ra Barrabás, tan tava tyiñu ra na ndoho ra Jesús, tan nacuhva cuenda ra tsi ra tsi ra andaru naha ra na cúu ra nu cruu.

27 Tacan tan ra andaru cuenda ra Pilato, ra ndacá ñaha can tsindaca ra naha tsi ra Jesús nda vehe tyiñu ra Pilato, tan jandu iin ra naha tsi tandihí ca andaru nu nyaá ra. 28 Tacan tan tava ra naha jahma ra tan jacunditsi ra naha iin jahma cuaaha tsi ra. 29 Tan tyihí ra naha iin corona tsa tsinu tsihin iñu jiñi ra. Tan tsaha ra naha iin yutun tatun na cundaha ra tsihin ndaha cuaaha ra. Tacan tan tsicuiñi tsiti ra naha nuu ra, tan tsacu nducu ra naha tsi ra tan catyí ra naha:

—iNacumi tsi un, yooho Rey cuenda nyivi Israel!

30 Tan tiví si ra naha tsi ra. Tan quihín ra naha yutun tatun can tan cañi ra naha jiñi ra. 31 Tsa yahá tsa tsacu nducu ra naha tsi ra tan tava ra naha jahma cuaaha tsa nditsi ra, tan jacunditsi nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

Nu tyaq̄ ra naha tsi ra Jesús nu cruu
(Mr. 15.21-32; Lc. 23.26-43; Jn. 19.17-27)

³² Tsa quit̄a ra naha ican, tahañ ra naha tsi iin ra ñuu Cirene, tsa nañí Simón. Tan jañiñi ra naha tsi ra na cuiso ra cruu ra Jesús.

³³ Tan tsaq̄ ra naha iin nu nañí Gólgota, tan cuñí tsi catyí “Yiqui Jiñi Ndiyí”.

³⁴ Tan ican tsaḥa ra naha vinu nasac̄a tsihin ndutya uva xaan coho ra Jesús. Tan tsa yaha tsa tsihi ra luxu can, ña cuñí ca ra coho ra. ³⁵ Tan tsa yaha tsa tyaq̄ ra naha tsi ra nu cruu, tacan tan ra andaru can quihin ra naha jahma ra tan tava cuenda ra naha tyin cua nyehe ra naha ndáa ra jaha canaa intuhun intuhun jahma ra. Tacan cuv̄i tyin cundaa tuhun tsa tyaq̄ iin ra cuv̄i ndusu yuhu Nyoo tahañ tsanaha nu catyí tsi tyehen: “Tava cuenda ra naha tan tsatsa ra naha jahma yu”, catyí tsi. ³⁶ Tacan tan tsinyecu ra naha ican tyin jaha cuenda ra naha tsi ra. ³⁷ Tan ityi jiñi ra tyaq̄ ra naha letra tsa catyí nacuenda cua cúu ra. Tan catyí tsi tyehen: “Ra ihya cuv̄i ra Jesús, rey cuenda nyivi ñuu Israel.”

³⁸ Tan tyaq̄ tucu ra naha uvi taahan ra suhu tsihin ra nu uvi taahan ca cruu. Iin ra tyaq̄ ra naha xiin cuaha ra, tan inga ra xiin satyin ra. ³⁹ Tan nyivi tsa yahá ican, caahán ñi tsi ra, tan javicó ñi jiñi ñi tsa tsacú nducu ñi tsi ra. ⁴⁰ Tan catyí ñi tsihin ra:

—¡Yooho tsa cahañ un tyin cua cani un vehe ñuhu cahnu, tan tsitsi tsa uñi quivi tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuv̄i tsi un! —catyí ñi tsihin ra.

⁴¹ Tan juvin ñi tacan tsacú nducu ra jutu tsa cuv̄i ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahañ ra naha tan catyí ra naha:

⁴² —Jacacu ra tsi inga nyivi, maa tyin ña cuv̄i jacacu ra tsi maa ra. Tun nditsa tyin Rey cuenda nyivi Israel cuv̄i ra, na nuu ra nu cruu can, tan cua tsinu iñi yo tsi ra. ⁴³ Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñí ra tsi ra. Tyin catyí ra tsihin yo tyin Sehe Nyoo cuv̄i tsi ra.

⁴⁴ Tan nda cuanda nu ñasuhu nahnu tsa nyaá nu cruu xiin ra tan tsacu nducu ndihi nahnu tsi ra.

Nu tsihi ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tacan tan ndunaq̄ taniñ cahnu ñuhu ñayivi tsa ora tan nda cuanda caa uñi tsa tseñi. ⁴⁶ Tan juvin ñi cuhva can, ñihi xaan cana tsa ra Jesús. Tan catyí ra:

—Elí, Elí, ¿lama sabactani? —tan cuñí tsi catyí: Nyoo Jutu yu, Nyoo Jutu yu, ¿nacuenda naco ihñi un tsi yu?

⁴⁷ Juhva ra yucu can naha ra, tsiñi ra naha tsa cahañ ra, tan catyí ra naha:

—Ra Elías, ra cuv̄i ndusu yuhu Nyoo tsanaha, caná tsaa ra.

⁴⁸ Tan juvin ñi cuhva can, cuahán iin ra cua quihin ra iin yahma cuhva caá catyi, tan jatyī ra tsihin vinu iya, tan tyaā ra nu yutun, tan jatuhv̄a ra yuhu ra Jesús tyin na coho ra. ⁴⁹ Maa tyin inga ra naha catyí ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

⁵⁰ Inga tsaha cana tsaa ñihi ra Jesús, tacan tan tsihī ra.

⁵¹ Tan juvin ñi cuhva can ndatā sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siqui tan nda cuanda ityi tsaha. Tan ñihi xaan taan. Tan tahvī cuatyí cava nahnu.

⁵² Tan nuñā yuhu ñaña. Tan cuaha nyivī tsa tsinú iñi tsi Nyoo tan tsihī ñi, nandotō ñi. ⁵³ Tan tsa yahā nandotō ra Jesús quitā ñi nu ñaña tan quihvī ñi tsitsi ñuu Jerusalén, tan cuaha nyivī nyehē tsi ñi.

⁵⁴ Tacan tan ra capitán tan ra andaru tsa jahá cuenda tsi ra Jesús, nayuhvī xaan ra naha tsa taan, tan tsa nyehē ra naha inga ca tsa cuv̄i. Tan catyí ra naha:

—Nditsa nditsa cuii, tyin Sehe Nyoo cuv̄i tsi ra ihya.

⁵⁵ Cuaha ñiñaha tsa tsinyicun tsi ra Jesús nda Galilea tan jatyinyeē ñi tsi ra, yucú ñi nyehé ñi ndasava. ⁵⁶ Tan juhva ñi ican cuv̄i ñi ihya: ña María tsa queē Magdala, tan

ña María sihi ra Jacobo tan ra José, tan ñasihi ra Zebedeo.

Nu tsicutsī ra naha tsi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva tsa cuñí cuaa, quitsī iin ra cuca tsa nañi José, ra ñuu Arimatea. Tan tsinú iñi ra tsi ra Jesús. ⁵⁸ Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tavā tyiñu ra Pilato na cuhva ra andaru naha ra cuñu ñuhu ra Jesús tsi ra. ⁵⁹ Tacan tan quihin ra José cuñu ñuhu ra, tan cavā nuu ra iin jahma cuitsin vaha tsi ra. ⁶⁰ Tan tyih̄i ra cuñu ñuhu ra Jesús tsitsi iin ñaña tsaa tsa cuv̄i iin yavi yuu tsa tavā tyiñu ra tsatyā ra naha. Tan tsa yahā tsa nacasī ra yuhu ñaña can tsihin iin yuu cahnu, tan cuahán ra. ⁶¹ Tan ña María tsa queē Magdala, tan inga ña María, ndoō ñi yucú ñi yuhu ñaña can.

Nu jahá cuenda ra andaru ñaña ra Jesús

⁶² Tan tsa inga quivī, quivī quitatú nyivī cuv̄i can, tan ra jutu tsa cuv̄i ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato. ⁶³ Tan catyí ra naha tsihin ra:

—Yooho taa, nducuhun iñi ndi tyin ra vatya can, catyī ra tahan nyito ra tyin tsa yahā tsa uñi quivī tsa cua cúu ra tan cua nandoto ra. ⁶⁴ Yacan cuenda tavā tyiñu na jaha cuenda vaha ra andaru naha ra ñaña can, nda yaha tsa uñi

quivi, coto cuhun ra tsica tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuvi, yaha ca cuhva cua cuvi tan ñavin ca tsa jihna ñi —catyí ra naha.

⁶⁵ Tan ra Pilato catyí ra:

—Quihin ndo andaru ihya. Cuaahan ndo, tan jahā cuenda vaha ndo ñaña can, nácaa cunye maa ndo jaha cuenda ndo —catyí ra.

⁶⁶ Tacan tan cuahán ra naha, tan jahā cuenda vaha ra naha ñaña can, tan tyaa ra naha iin tsa tyaa ra naha tsata yuu tsa ndasí can tyin tatun nacanda yuu can coto ra naha. Tan nacoo ra naha tsi ra andaru jahá cuenda ra naha ican.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Tsa yaha quivi tsa quitatú nyivi, cuhva tsa cuñí cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña.

² Tan ñihi xaan taan tyin quitsi iin ángel Jutu Mañi yo quee ra andivi, tan tsaā ra nu ñaña can. Tan jatsiyō ra yuu tsa ndasí yuhu can, tan tsicunyaā ra tsata can.

³ Tan xiñu xaan ra, tumaa tsa cañí tatsa. Tan cuitsin xaan jahma ra. ⁴ Cuhva tsa nyehe ra andaru can naha ra tsi ra, nayuhvi xaan ra naha tan quitsaha ñihí ra naha,

tan nda cuanda tsihi naaha ra naha tsihin tsa yuuhvi ra naha. ⁵ Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo. ⁶ Yoñi ca ra nyii ihya, tyin tsa nandoto ra, tumaa catyí ra. Naha ndo tan nyehe ndo nu tinyii ra naha tsi ra. ⁷ Janumi xaan ndo cuhun ndo cucatyí tuhun ndo tsihin ra tsica tsihin ra tyin tsa nandoto ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

⁸ Tacan tan numi ñi quita ñi nu ñaña can. Yuuhvi ñi, tan sii xaan cuñí tucu ñi. Tan tsinú xaan ñi cuahán ñi cua catyí tuhun ñi tsihin ra tsica tsihin ra Jesús. ⁹ Tan cuhva can quituvi ra Jesús nuu ñi tan tsaha ra nacumi tsi ñi. Tacan tan natuhva ñi nu nyaá ra tan tsicuiñi tsiti ñi nuu ra tan jachnu ñi tsi ra, tan tsicunumi nyaá ñi tsaha ra. ¹⁰ Tan catyí ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

Tuhun tsa nacatyí tuhun ra andaru naha ra

¹¹ Tsitsi tsa cuahán ñi can, juhva andaru tsa jahā cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra. ¹² Tacan tan ra jutu can naha

ra tsahan ra naha tsicahan ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsaha ra naha tsi ra andaru can naha ra. ¹³ Tan catyi ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixi ndo, tsahan ra tsica tsihin ra Jesús tan quihin ra naha cuñu ñuhu ra. ¹⁴ Tan tatun cua coto ra ndaca ñaha tuhun ihya, cua nyehe maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo. ¹⁵ Tacan tan quihin ra andaru can xuhun can, tan cuahan ra naha cuajavaha ra naha cuhva catyi ra naha tsihin ra naha. Tan nda quivi vityin tan tacan caahan nyivi ñuu Israel.

Nu tava tyiñu ra Jesús tsi ra tsica tyiñu ra

(Mr. 16.14-18; Lc. 24.36-49; Jn. 20.19-23)

¹⁶ Tan tacan, tandihi tsa utsi iin ra tsica tsihin ra, cuahan ra naha nda Galilea nda yucu nu catyi maa ra Jesús tsihin ra naha tyin cahun ra naha. ¹⁷ Tan cuhva tsa nyehe ra naha tsi ra Jesús, jacahnu ra naha tsi ra, maa tyin juhva ra naha uvi ñi tsica iñi ra naha. ¹⁸ Tacan tan natuhva ra Jesús nu nyecú ra naha tan catyi ra tsihin ra naha:

—Nyoo tsaha ra tsa cundaca ñaha yuhu tandihi andivi tan nu ñuhu ñayivi ihya. ¹⁹ Yacan cuenda, cuaahan ndo tandihi nu iyó nyivi, tandihi ñi ñuu, tan catyi

ndo tsihin ñi na cunyicun ñi tsi yu. Tan jacoondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatyi Ii ra. ²⁰ Tan jacuaha ndo tsi ñi na tyaa yahvi ñi tandihi tsa catyi yu tyin javaha ndo. Tan coto ndo tyin yuhu cunyaa yu tsihin ndo tandihi quivi nda cuanda naa ñayivi —catyi ra Jesucristo tsihin ra tava tyiñu ra.

Tan na cuvi tsi tacan ñi.

Tuhun Nyoo Tsa Tyaa ra Marcos

Nu caahán ra Juan, ra jacoondutyá tsi nyívi, tuhun Nyoo

(Mt. 3.1-12; Lc. 3.1-9, 15-17; Jn. 1.19-28)

¹ Tyehen quítsaha tuhun ra Jesucristo, Sehe Nyoo. ² Tسانaha ra Isaías, ra cuví ndusu yuhu Nyoo, tyaa ra nácaa cua quítsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyívi

na janduvaha ñi tsi ñi tsa ndi cumañi ca cahun un nu yucú ñi, catyí Nyoo tsihin ra Cristo.

³ Cua tyaa soho yo ndusu ra nu cana tsa ra nu tsiqui, tan catyí ra:

“Nuña ndo iin ityi cuiti tan natyiso vaha ndo tsi ndo tyin tsa vatsí Jutu Mañi yo”, catyí tuhun tsa tyaa ra Isaías.

⁴ Tacan cuví; quítsi ra Juan nu tsiqui, tan javaha ra kuhva tyaa ra Isaías. Catyí ra tsihin nyívi tyehen: “Ndu uvi iñi ndo cuatyí ndo tan coondutyá ndo tyin tacan tan jaha Nyoo tucahnu iñi tsi ndo tsa cuenda cuatyí ndo.” ⁵ Tan tandihi nyívi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiñi ñi tsa caahán ra, ndu uvi iñi ñi kuhva iyó ñi tan nahma

ñi cuatyí ñi nu Nyoo. Tacan tan tsicoondutyá ñi yutya Jordán.

⁶ Tan jahma ra Juan tsinu tsi tsihin ixi camellu. Tan cinturón ra cuví ñii. Tan maa ñi tica xama tsatsí ra, tan tsihí ra ndutyá ñuñu tsa iyó tsitsi cuhu. ⁷ Caahán ra tuhun Nyoo tsihin nyívi tan catyí ra:

—Tsa yatyin cuíi quítsi ra tsa cahnu ca cuví tan ñavin ca yuhu. Tan ndi ña taahán tsi tsi yu tsa ndatsi yu ñii nditsan ra, tyin cahnu ca cuví maa ra tan ñavin ca yuhu. ⁸ Yuhu jacoondutyá yu tsi ndo tsihin ndutyá ñi. Maa tyin maa ra cua jacoondutyá ra tsi ndo tsihin Tatyí Ii Nyoo —catyí ra Juan.

Nu tsicoondutyá ra Jesús
(Mt. 3.13-17; Lc. 3.21-22)

⁹ Quiví can quita ra Jesús ñuu Nazaret, tsa canyí Galilea, tan cuahán ra nu nyíi ra Juan yutya Jordán tyin jacoondutyá ra tsi ra. ¹⁰ Tsa quita ra Jesús tsitsi ndutyá tsa yahá tsicoondutyá ra, nuña andivi tan nyehe ra vatsí nuú Tatyí Ii Nyoo siqui ra tan caá tsi tumaa caá iin paloma. ¹¹ Tan nacahan iin ndusu ityi andivi tan catyí tsi tsihin ra tyehen:

—Yooho cuví Sehe yu tan cuñi xaan yu tsi un. Tan sii xaan cuñi yu nyehé yu tsi un —catyí ndusu can.

Nu nducu kuhva nu ña vaha tsi ra Jesús
(Mt. 4.1-11; Lc. 4.1-13)

¹² Tsa yahá tsa tsicoondutyá ra Jesús tan tsindaca Tatyí Ii Nyoo tsi ra nu tsiqui.

13 Tan tsinyij ra ican uvi xico quivi nu nduve nyivi iyó, maa ñi quití xaan iyó. Tan nducu cuhva nu ña vaha tsi ra. Yaha can tan tsaá ángel Nyoo tan jatyinyee ra naha tsi ra.

Nu quitsaha caahán ra Jesús tuhun Nyoo tsihin nyivi iyó Galilea

(Mt. 4.12-17; Lc. 4.14-15)

14 Tsa yaha tsa tyihí nyivi tsi ra Juan vehe caa, tan tsinuhu ra Jesús Galilea tan caahán ra tsihin nyivi nácaa ndacá ñaha Nyoo. 15 Tan catyí ra:

—Tsa tsaá quivi tsa cua cundaca ñaha Nyoo tsi nyivi iyó nu ñuhu ñayivi ihya. Yacan cuenda ndu uvi ñni ndo cuatyí ndo, tan tsinu ñni ndo tuhun tsa jacacú Nyoo tsi nyivi —catyí ra Jesús.

Nu cana ra Jesús cumi taahan ra tñ tyaca

(Mt. 4.18-22; Lc. 5.1-11)

16 Iin quivi cuahán ra Jesús tsicá ra yuhu miñi tsa nañi Nduya Ñuhu Galilea. Tan nyehe ra tsi ra Simón tan ra Andrés, yañi ra Simón, cañi ra naha traya ra naha nu ndutya, tyin ra tñ tyaca cuví ra naha. 17 Tan catyí ra Jesús tsihin ra naha:

—Ñaha ndo, quitsi nyicun ndo tsi yu, tan yuhu cua jatyinyee yu tsi ndo tyin tumaa tsa tñ ndo tyaca ihya, tacan cua ñihi ndo nyivi cua cuví nyivi Nyoo —catyí ra Jesús tsihin ra Simón tan tsihin ra Andrés.

18 Juvín ñi cuhva can tan nacoq ra naha traya can, tan

cuahán ra naha cuanyicún ra naha tsi ra.

19 Ña cuaha ñi tsica ra naha, tan nyehe ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya. 20 Cana ra tsi nduvi taahan ra naha. Tan nacoq ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

Nu quitq tatyí ña vaha tsi iin rayi

(Lc. 4.31-37)

21 Tsa tsaá ra Jesús ñuu Capernaum tsihin ra tsicá tsihin ra, quihvi ra Jesús tsitsi vehe ñuhu quivi quitatú nyivi. Tacan tan quitsaha jacuahá ra tuhun Nyoo tsi nyivi. 22 Tan iyo xaan cuñi ñi tsa tsiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra. 23 Tan tsitsi vehe ñuhu can nyii iin ra yihí tatyí ña vaha. Tan cana tsa ra tan catyí ra:

24 —¿Nacuvi tyihí un tsi un tsihin nyuhu, yoocho Jesús, ra ñuu Nazaret? ¿A vatsí un vatsí janaa un tsi ndi? Yuhu nacoqó vaha yu tsi un, tan tsitó yu tyin Sehe Ii Nyoo cuví un —catyí ra can tsihin ra Jesús jahá nu tatyí ña vaha can.

25 Tacan tan nduxaan ra Jesús tsi nu tan catyí ra tsihin nu:

—¡Ña cahan ca un! ¡Quita tsi ra ihya! —catyí ra tsihin nu.

²⁶ Tacan tan quitsaha nihi rayi can jahá nu. Tan ñihi xaan caná tsaa ra jahá nu, tan quita nu tsi ra. ²⁷ Tandihí nyívi iyó xaan cuñí ñi tan tsicá tuhun tahan ñi tsi ñi, tan catyí ñi:

—¿Náa cuví tsa nyehé yo ihya? ¿Náa tuhun tsaa jacuahá ra ihya? ¡Tyin iyó vaha tunyee iñi tsi ra, nda cuando tatyí ña vaha tan tyaá yahví tsi ra! —catyí ñi.

²⁸ Tan numi ñi tsito nyívi iyó tandihí ñuu tsa cayucú Galilea tuhun ra Jesús.

Nu nduvaha tyiso ra Simón Pedro

(Mt. 8.14-15; Lc. 4.38-39)

²⁹ Tsa ndihí jacuahá ra Jesús tsi nyívi tsitsi vehe ñuhu, quita ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra. ³⁰ Tan ña tyiso ra Simón cuuhví ña tsihin cahñi canyí ña nu tsito. Tan catyí tuhun nyívi ña tsihin ra Jesús tyin cuuhví ña. ³¹ Tacan tan natuhvá ra Jesús yuhu tsito nu canyí ña, tiñ ra ndaha ña, tan cañihí ra tsi ña. Juvín ñi cuhva can, quita cahñi tsi ña, tan quitsaha nanducú ña tsa catsi ra naha.

Nu cuaha xaan nyívi cuuhví janduvaha ra Jesús

(Mt. 8.16-17; Lc. 4.40-41)

³² Tsa tsa cuñí cuaa tsa tsa yaha tyiso ñicanyii, tandihí nyívi cuuhví tan nyívi yihí tatyí ña vaha tsindaca nyívi tsi ñi nu nyí ra Jesús. ³³ Tan

ndu iin tandihí nyívi ñuu can nu yucú ra naha. ³⁴ Tan janduvaha ra tsi tandihí ñi tsa yihí siin siin cuehe, tan cuaha tatyí ña vaha tava ra. Maa tyin ña tsaha ra tsa cahan tatyí ña vaha can, tyin tsitó nahnu yóo ra cuví ra.

Nu tsicá ra Jesús caahán ra tuhun Nyoo tandihí ñuu tsa cayucú Galilea

(Lc. 4.42-44)

³⁵ Ra Jesús nduvitá ra tsa ndi naa ca inga quívi, quita ra ñuu can tan cuahán ra iin nu taxín caá cuandacán tahví ra tsi Nyoo. ³⁶ Tsa nyehe ra Simón tyin nduve ra, tacan tan cuahán ra tsihin tandihí ca ra naha cuananducú ra naha tsi ra. ³⁷ Tan tsa nañihí ra naha tsi ra, catyí ra naha tsihin ra:

—Tandihí nyívi tan nanducú ñi tsi un —catyí ra naha.

³⁸ Maa tyin catyí ra tsihin ra naha:

—Cohon ndo ñuu tsa cayucú yatyin ñi ihya, tyin cuñí tsi cahan ndihí yu tuhun Nyoo ican, tyin yacan tyiñu vatsí yu —catyí ra Jesús tsihin ra naha.

³⁹ Tan tacan tsicá ra Jesús caahán ra tuhun Nyoo tsihin nyívi tsitsi vehe ñuhu tan iin tan iin ñuu tsa cayucú Galilea. Tan tava ra tatyí ña vaha tsi nyívi.

Nu janduvaha ra Jesús tsi ra ndohó cuehe tyaahyú

(Mt. 8.1-4; Lc. 5.12-16)

⁴⁰ Tsa ndi cuahán ra Jesús tsicá ra tan quita iin ra ndohó cuehe tyaahyú tsicuiñi tsiti ra nuu ra, tan catyí ra tsihin ra:

—Tun yooho tan cuñi un, cuvi janduvaha un tsi yu —catyi ra.

⁴¹ Tan cundaahvi iñi ra Jesús nyehe ra tsi ra, tan tyiso ndaha ra jiñi ra, tan catyi ra tsihin ra:

—Cuñi yu janduvaha yu tsi un. Tan vityin tsa nduvaha un —catyi ra tsihin ra.

⁴² Tsa cahan ra Jesús tacan tsihin ra, juvin ñi cuhva can tan nduvaha ra. ⁴³ Tacan tan catyi ra Jesús tyin tsa cuvi cunuhu ra, maa tyin cahan vaha xaan ra tsihin ra na javaha ra tyehen:

⁴⁴—Coto catyi tuhun un tsihin nyivi yoo janduvaha tsi un. Maa tyin cuaahan nu nyaá ra cuvi jutu, tan janaha un tsi un tsi ra. Tan cuhva tsa catyi ra Moisés tyin cuhva ndo tsa cuenda tsa nduvaha ndo tun cuhvi ndo. Yacan cua cuvi tsa ndaa tsi ra jutu tan tsi nyivi tyin tsa nduvaha un —catyi ra Jesús tsihin ra.

⁴⁵ Maa tyin ra ican cuahan ra, tan quitsaha catyi tuhun ra tsihin tandihi nyivi nácaa nduvaha ra. Yacan cuenda ña cuvi ca quihvi nditsin ra Jesús tsitsi ndi intuhun maa ñuu. Tan tsicá ra ityi tsata ñuu ñi nu nduve nyivi iyó, maa tyin tandihi ñi ityi tan quita nyivi, tan tsinyehé ñi tsi ra.

2

Nu janduvaha ra Jesús tsi iin ra xii

(Mt. 9.1-8; Lc. 5.17-26)

¹ Tsa yaha juhva quivi tan cuahan ra Jesús ñuu Capernaum inga tsaha. Tan tsa

tsito nyivi tyin tsaá nuhu ra yuvehe ra, ² iin yaha ñi ndu cuaha ñi yuvehe ra tan ña tsi-tahan maa ñi tsitsi vehe tan ndi yuvehe. Tan caahan ra tuhun Nyoo tsihin ñi. ³ Tacan tan tsaá cumi taahan rayii nyisó ra naha iin ra xii. Cuñi ra naha cuhun ra naha tsihin ra nda nu nyaá ra Jesús. ⁴ Maa tyin ña cuvi yaha ra naha yuvehe tan cuhun ra naha nu nyaá ra Jesús tyin cuaha xaan nyivi nyecú yuvehe can. Yacan cuenda ndaa ra naha jiñi vehe, tan jatsiyó ra naha juhva tyiyo ndihi cuhva nu nyaá ñi ra Jesús. Tacan tan januu ra naha tsi ra cuuhvi can nu nyaá ra Jesús tsihin iin tsito. ⁵ Tsa nyehe ra Jesús tyin tsinú xaan iñi ra can naha ra, catyi ra tsihin ra cuuhvi can:

—Vityin, tsa jaha yu tucahnu iñi tsi un tsa cuenda tandihi cuatyi un —catyi ra Jesús tsihin ra.

⁶ Tan nyecú juhva ra cuvi maestro cuenda ley vehe ñuhu naha ra ican, tacan tan quitsaha tsicá iñi ra naha tuhun ihya: ⁷ “¿Nacuenda tyin caná iñi ra ihya caahan ra tyehen? Tan intuhun ñi maa Nyoo cuvi ra jahá tucahnu iñi tsi yo. Tsicoo cuatyi ra nuu Nyoo tsa cuenda tsa caahan ra tacan”, cuñi ra naha, tsicá iñi ra naha. ⁸ Maa tyin ra Jesús iin yaha ñi tuví iñi ra cuhva tsicá iñi ra naha. Tan catyi ra tsihin ra naha:

—¿Nacuenda tsicá iñi ndo tacan? ⁹ ¿Náa yí ca cahan yo; “Cuatyí un tsa yaha ndatsi”, o catyi yo: “Nduvita, naquihin

tsito un tan çaça"? ¹⁰ Vaha. Cua janaha yu tsi ndo tyin yuhu, tsa cuví yu Rayi quee nda gloria, iyó ndatu tsi yu nu ñuhu ñayivi ihya tsa jaha yu tucahnu iñi tsi nyivi tsa cuenda cuatyí ñi —catyí ra Jesús tsihin ra naha.

Tacan tan nacahan ra tsihin ra cuuhví can:

¹¹ —Catyí yu tsihin un; nduvita, naquihin tsito un, tan cuanuhu yuvehe un —catyí ra Jesús tsihin ra.

¹² Tan iin yaha ñi nduvita ra cuuhví can, naquihin ra tsito ra, tan cuanuhu ra. Tan iyo xaan cuñi tandihi maa nyivi tsa nyehe can, tan quitsaha jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehe yo tsehe —catyí ñi.

Nu cana ra Jesús tsi ra Leví (Mt. 9.9-13; Lc. 5.27-32)

¹³ Tsa yaha yacan tan cuahán ra Jesús yuhu miñi inga tsaha. Tacan tan tsa cuaha nyivi nu nyii ra, tan quitsaha jacuahá ra tsi ñi.

¹⁴ Tsa ndihi jacuahá ra tsi ñi, tan cuanuhú ra. Tan tsa cuahán ra yaha ra nu nyaá vehe nu tyahví nyivi xuhun cuenda ra ndacá ñaha ñuu Roma, tan ican nyaá ra Leví, sehe ra Alfeo, naquihin cuenda ra xuhun can. Nyehe ra Jesús tsi ra, tan catyí ra tsihin ra:

—Cohon tsihin yu.

Tacan tan nduvita ra Leví, tan cuahán ra tsihin ra.

¹⁵ Yaha can tan cuahán ra Jesús cuacatsí ra yuvehe

ra Leví tsihin ra tsicá tsihin ra. Tsinyaa ra nu mesa tan tsinyecu ndihi tucu ra tavá xuhun cuenda ra ndacá ñaha tan inga ca nyivi iyó cuatyí. Tyin cuaha xaan nyivi nyicún tsi ra. ¹⁶ Maa tyin tsa nyehe ra cuví maestro cuenda ley vehe ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsí tan tsihi ra maestro ndo tsihin ra tavá xuhun tan ra iyó cuatyí?

¹⁷ Tsa tsiñi ra Jesús tsa cahán ra naha tan catyí ra:

—Yuhu ña vatsí yu vatsí jatyinyee yu tsi nyivi cuñi tyin vaha iyó ñi; vatsí yu vatsí jatyinyee yu tsi nyivi tsitó tyin iyó cuatyí ñi tumaa nyivi cuuhví, tyin nyivi cuuhví tsiñi ñuhu doctor tsi ñi. Maa tyin nyivi vaha cuñi, ña tsiñi ñuhu doctor tsi ñi —catyí ra Jesús tsihin ra naha.

Nu tsicá tuhun nyivi tsi ra Jesús tun taahán tsi coo nyitya ñi

(Mt. 9.14-15; Lc. 5.33-35)

¹⁸ Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahan juhva nyivi nu nyii ra Jesús, tan tsicá tuhun ñi tsi ra, tan catyí ñi:

—¿Nacuenda tyin tsicoó nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoó nyitya ra naha? —catyí ñi.

¹⁹ Nacahan ra Jesús tan catyí ra:

—¿A cuví coo nyitya nyivi yucú nu iyó vico tindaha tun ndi nyii ra cua tindaha tsihin ñi? Ña cuví coo nyitya ñi tun ndi nyii ra tsihin ñi. ²⁰ Maa tyin coo quivi ña cua cunyi ca ra tsihin ñi. Tacan tan cua coo nyitya ñi —catyí ra Jesús tsihin ñi.

Nu caahán ra Jesús tyin ña nacatsi tahan tuhun tsahnu tsa iyó nyivi tsihin tuhun tsa jacuahá ra tsi ñi

(Mt. 9.16-17; Lc. 5.36-39)

²¹ Tan catyí ra Jesús:

—Ña tuhvá nyivi natyaá jahma tsa iin jahma tuuhu, tyin jahma tsa can cua nandiyi can tan cua nducahnu ca nu ndata jahma tuuhu can jaha can. ²² Tacan tucu ñi ñii yihí vinu tun tyihí yo vinu tsa tsitsi ñii tsaahnu cua ndata ñii can, tan cua cati vinu can tan cua tivi can. Yacan cuenda cuñi tsi tsa tyihi yo vinu tsa tsitsi ñii tsa —catyí ra Jesús.

Nu jocón ra tsicá tsihin ra Jesús yoco trigu quivi quitatú nyivi

(Mt. 12.1-8; Lc. 6.1-5)

²³ Iin tsaha yahá ra Jesús tsitsi tsa tatsi nyivi tan cuví tsi quivi quitatú ñi. Tan tsa yahá ra tsicá tsihin ra quitsahá tuhún ra naha yoco trigu. ²⁴ Tacan tan tsa nyehe ra fariseo naha ra can quitsahá caahán ra naha tsihin ra Jesús:

—¡Nyehe tsa javahá ra tsicá tsihin un naha ra! Jahá tyiñu ra naha tan ña taahán tsi jahá

tyiñu yo quivi ihya —catyí ra naha.

²⁵ Tan nacahán ra Jesús tsihin ra naha:

—¿A ñaha ca cahvi ndo nu tutu nu tsahá cuenda tsi tsa javahá ra David tan ra cutahán tsihin ra quivi tsisoco ra naha? ²⁶ Ra David quihvi ra tsitsi vehe Nyoo quivi cuví ra Abiatar jutu tsaahnu cuví ityi nuu. Tan quihin ra paan ii, tsa taahán tsi catsi maa ñi maa ra jutu naha ra. Maa ra tan tandihi ra cutahán tsihin ra tsatsi ra naha paan can —catyí ra Jesús.

²⁷ Tacan tan catyí ra Jesús tsihin ra naha:

—Nyoo javahá ra quivi quitatú yo tyin tacan tan cuví quitatu cuñu ñuhu yo; tan ñavin maa yo tsinu tsa cuenda quivi quitatú yo. ²⁸ Yacan cuenda yuhu tsa cuví yu Rayii quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

3

Nu nduvahá ra na ityi iin ndaha

(Mt. 12.9-14; Lc. 6.6-11)

¹ Tsa quihvi ra Jesús inga tsaha tsitsi vehe ñuhu, nyii iin ra na ityi iin ndaha ican. ² Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quivi quitatú nyivi. Tyin tun cua janduvaha ra tsi ra can, tacan tan cua cuví tyaa ra naha

cuatyi síqui ra. ³ Tacan tan catyí ra Jesús tsihin ra na ityi ndaha can:

—Ndúvita nyityi tan cunyaa un mahñu ihya.

⁴ Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quívi quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyívi, o cahñi yo tsi ñi? —catyí ra Jesús.

Maa tyin ña nacahan ra naha. ⁵ Tacan tan nanyehe xaan ra Jesús nuu ra naha, tan nducuihya cuñí ra tyin ña cuñí ra naha cutuñi iñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoo ra can ndaha ra, tan iin yaha ñi nduvaha ndaha ra. ⁶ Tacan tan quitá ra fariseo naha ra, tan quitsaha natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

Nu cuaha xaan nyívi cuahán cuanyehé nu nyíi ra Jesús yuhu miñi

⁷ Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyívi iyó Galilea cuahán cuanyicún tsi ra naha. ⁸ Tsa tsitō nyívi tyin nahnu xaan tsa iyo javahá ra, cuaha ñi tsahan nu nyíi ra tyin cuñí ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya

Jordán. Tan quee tucu juhva ñi ñuu Tiro tan ñuu Sidón tan tandihí ca ñuu tsa cayucú yatyin nu cayucú nduvi ñuu can. ⁹ Tsa nyehe ra Jesús tsaá nyívi, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuvi ca nyívi, cuvi quihví ra tsitsi yutun ndoo can tyin tacan tan ña cua tindahñi ñi tsi ra. ¹⁰ Tsa cuaha xaan nyívi janduvaha ra, yacan cuenda tsahan cuaha ca nyívi cuuhví nu nyíi ra. Tsicá iñi maa ñi tyin tun nañí luxu ndaha ñi tsi ra tan cua nduvaha ñi. ¹¹ Yihí ñi cuuhví can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi cana tsaa nu tan catyí nu tsihin ra:

—¡Yooho cuví Sehe Nyoo!

¹² Tan tandihí ñi cuhva tsa caahán tatyí ña vaha yoo ra cuví ra, tyasí ra nu cahan nu.

Nu nacatsi ra Jesús tsi utsi uvi ra caca tyiñu ra

(Mt. 10.1-4; Lc. 6.12-16)

¹³ Tsa yaha yacan tan ndaa ra Jesús iin yucu tan cana ra tsi ra tsa cuñi maa ra cana ra. Tacan tan cuahán ra naha nu nyíi ra. ¹⁴ Tan tsitsi tsa tandihí ra tsa cana ra, nacatsi ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo. ¹⁵ Tan tsaha ra ndatu tsi ra naha tsa janduvaha ra naha tsi nyívi cuuhví, tan tava ra naha tatyí ña vaha yihí tsi nyívi. ¹⁶ Ihya nyecú sívi ra naha: ra Simón, tsa jacunañi

tucu ra Jesús Pedro; ¹⁷ tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyi: “ra caahán tumaa ñihi caahán savi”. ¹⁸ Tan tandihi ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cahun cuatyí siqui ñuu Roma tsa ndacá ñaha tsi ñi; ¹⁹ tan ra Judas Iscariote, tsa xico tsi ra Jesús.

Tsa yahá yacan tan cuahán ra Jesús tsitsi iin vehe tsihin ra tsicá tsihin ra.

Nu xaan iñi tsi ra Jesús catyi nahnu tyin tsihin tunyee iñi nu ña vaha javahá ra tsa iyo (Mt. 12.22-32; Lc. 11.14-23; 12.10)

²⁰ Tan nducuahá nyivi nu yucú ra naha inga tsaha, tan nda cuando ña cuyatyí ca ra naha catsi ra naha. ²¹ Tsa tsito nyivi ra Jesús tyin nyii ra ican, tsahan ñi tsiquihin ñi tsi ra tyin cunuhu ra tsihin ñi, tyin catyi nyivi tsihin ñi tyin ndusaná iñi ra.

²² Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaá ra naha nu nyii ra Jesús tan catyi ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihi tatyí ña vaha —catyi ra naha.

²³ Tsa tuví iñi ra Jesús tyin tacan caahán ra naha, cana ra tsi ra naha tan tsaá ra iin

cuhva tsi ra naha, tan catyi ra tsihin ra naha:

—¿A cuví tavá nu ña vaha juvín ñi maa tahan nu? Ña cuví. ²⁴ Tyin tun ra ndacá ñaha naha ra tan cua natahvi sava ra naha, tan cua quit-saha cañi tahan ra naha, cua cundihí tsa ndacá ñaha ra naha. ²⁵ Tacan tucu ñi tun nyivi iyó iin caa ñi iin vehe tan cañi tahan ñi, cua cusin ñi tan ña cua cuví coo vaha ñi. ²⁶ Tan tun nu ña vaha tan ndusin nu tan nduvita iin nu siqui inga nu, ¿náa cua tahan nahnu? Cua ndusin nahnu tan cua cundihí nahnu.

²⁷ Yoñi cuví quihvi tsitsi vehe iin ra xaan tan suhu ra tsa iyó tsi ra, tun ña cuhñi jihna ra tsi ra. Maa ñi cuñi tsi cuhñi jihna ra tsi ra jatsii vehe can tan cuví quihvi ra suhu ra tsa tsi ra.

²⁸ Tsa nditsa catyi yu tsihin ndo tyin cuví coo tucahnu iñi tsi nyivi tsa cuenda tandihi nuu cuatyí javahá ñi, tan tsa cuenda tucu tsa caahán ñi tsa ña vaha. ²⁹ Maa tyin tun cahan ñi ndavaha ñi siqui Tatyí Ii Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quivi —catyi ra Jesús.

³⁰ Tacan cahan ra Jesús tsihin ra maestro cuenda ley vehe ñuhu naha ra, tyin catyi ra naha tyin tatyí ña vaha yihí tsi ra.

Nu catyi ra Jesús tyin nyivi tyaá yahvi tuhun Nyoo, juvín ñi cuví yañi ra, tan sihi ra

(Mt. 12.46-50; Lc. 8.19-21)

³¹ Tacan tan tsaá sihi ra Jesús tan yañi ra nu nyii ra,

maa tyin ndoo ñi ityi tsata vehe, tan catyí ñi tsihin ra nyecú ican naha ra tyin cana ra naha tsi ra Jesús. ³² Tan catyí nyívi nyecú nanií canduvi xiin ra Jesús tsihin ra:

—Sihí un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

³³ Maa tyin catyí ra:

—¿Yóo cuví sihi yu tan yañi yu?

³⁴ Tacan tan nanyehe ra nanií canduvi nu nyaá ra, tan catyí ra:

—Nyívi nyecú ihya cuví sihi yu, yañi yu tan cuhva yu. ³⁵ Tyin tandihi nyívi javahá cuhva cuñí Nyoo, juvin ñi cuví yañi yu, cuhva yu tan sihi yu —catyí ra Jesús.

4

Nu caahán ra Jesús tyin ra caahán tuhun Nyoo cuví ra tu-maa iin ra tatsí
(Mt. 13.1-9; Lc. 8.4-8)

¹ Quitsahá jacuahá ra Jesús inga tsaha yuhu miñi. Tan cuaha xaan nyívi ndu iin nu nyíi ra. Tan tsa cuenda tsa cuaha xaan ñi cuví, quihví ra tsitsi yutun ndoo tsa canyí nu ndutya yuhu miñi can, tan tsinyaá ra tsitsi can. Tan ndoo tandihi maa nyívi nu nyíti. ² Tacan tan cuaha xaan tsa jacuahá ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:

³ —Tyaa soho ndo tsa cuahan yu. Iin ra quitá ra yu-vehe ra. Tan cuahán ra cua tatsi ra trigu nu ñuhu ra. ⁴ Tan cuhva tsa quitá ra tsiti trigu

can, cucoyo juhva tsi yuhu ityi. Maa tyin quítsi saa tan tsatsi ti naha ti itsi. ⁵ Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi caná tsiti can tyin ña cuaha nyahyu yihí tyañu yuu can. ⁶ Maa tyin tsa caná ñicanyii, iin yaha ñi na ityi tsi tyin ña cunu cuahán yoho tsi. ⁷ Tan juhva ca tsiti can cucoyo tsi tyañu iñu. Quívi caná tsiti can, tsahnú tsi iin caa ñi tsihin iñu can. Maa tyin iñu can numi ca tsahnú can tan tsahñi can trigu can. Yacan cuenda ña tsahá trigu can tsiti. ⁸ Maa tyin juhva ca tsiti can cucoyo tsi nu ñuhu vaha. Caná tsi tan tsahnú tsi, tan cuaha tsiti tsahá tsi. Tyin tsa intuhun tsiti can, tsahá tsi oco utsi tsiti tsitsi yoco tsi. Tan inga tsiti can tsahá tsi uñi xico, tan inga tsi tsahá tsi iin cientu —catyí ra Jesús tsihin ñi.

⁹ Tan catyí nyico ra tsihin ñi:
—Nyooho tsa iyó soho, tyaa soho ndo tsa caahán yu.

Nu tsahá cuenda ra Jesús nacuenda jacuahá ra tsi nyívi tsihin cuhva
(Mt. 13.10-17; Lc. 8.9-10)

¹⁰ Tsa yahá yacan tan ndoo maa ña ra Jesús tsihin ra tsicá tsihin ra tan nyívi nyicún tsi ra. Tan tsicá tuhun ñi:

—¿Náa cuñí tsi catyí tsa cahan un nañi?

¹¹ Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacá ñaha ra. Maa tyin inga ca nyívi jacotó yu can tsi

ñi tsihin cuhva ñi tyin ña cuñí ñi cunycun vaha ñi tsi yu. ¹² Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñí ñi, ña cua cutuñí iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi tsa cuenda cuatyí ñi —catyí ra Jesús tsihin ñi.

Nu tsahá cuenda ra Jesús tsa cuñí tsi catyí tuhun ra tatsí (Mt. 13.18-23; Lc. 8.11-15)

¹³ Tan catyí ndihí ra tsihin ñi:

—Tun ña cutuñí iñi ndo tuhun cahán yu nañi, ndi ña cua cutuñí iñi ndo tandihí ca tsa cua jacuaha yu tsi ndo tsihin cuhva ñi. ¹⁴ Ra tatsí trigu can cuví ra caahán tuhun Nyoo. ¹⁵ Yihí nyívi cuví ñi tumaa nu cucoyo tsítí trigu yuhu ityi tyin tsiñí ñi tuhun Nyoo, maa tyin yaha can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsí ra añima ñi. ¹⁶ Tan juhva nyívi cuví ñi tumaa nu cucoyo tsítí trigu tsata yuu tyin sñi xaan cuñí ñi tsiñí ñi tuhun Nyoo juhva ñi quívi. ¹⁷ Maa tyin ña ndoó tsi añima ñi tan ña cuví cuahnu ñi tan juhva ñi quívi tsinú iñi ñi, yacan cuenda cuví ñi tumaa nu cucoyo tsítí tsata yuu tyin tsata yuu can luxu cuii ñi nyahyu yihí. Yacan cuenda ña tsahnu tsi tyin ña ñihí tsi nu cuhun yoho tsi. Tacan cuví nyívi can, tyin quívi vatsí tundoho

siqui ñi, tan caahán nyívi tsi ñi tsa cuenda tuhun Nyoo, ndu uví iñi ñi tan jandihí ñi tsa tsinú iñi ñi tsi Nyoo. ¹⁸ Tan juhva nyívi cuví ñi tumaa nu cucoyo tsítí tyañu iñu tyin tsiñí ñi tuhun Nyoo, ¹⁹ maa tyin tsicá xaan iñi ñi tundoho ñayívi ihya tan ña tsicá iñi ñi tuhun Nyoo. Nyiyo iñi ñi tsa cuca, tan cuñí ñi coo tandihí tsa iyó nu ñuhu ñayívi ihya tsi ñi. Tan tandihí yacan jatyañú can tsi ñi, tan cuví ñi tumaa cuví yutun tsa ña tsaha tsítí. ²⁰ Maa tyin nyívi tsa tsiñí tuhun Nyoo tan naquihín vaha ñi itsi, tan javahá ñi tandihí tsa caahán tsi, juvin ñi cuví tumaa ñuhu vaha nu cucoyo tsítí can tyin tsítí tsa cucoyo can cana vaha tsi, tsahnu tsi, tan yihí tsi tsaha tsi oco utsi tsítí. Inga tsi tsaha tsi uñi xico tsítí, tan inga tsi tsaha tsi cientu tsítí.

Nu cahán ra Jesús tyin ña taahán tsi tyihí xeehe yo ñuhu Nyoo tsa jandunditsín añima yo coto quihin nyaa ra itsi (Lc. 8.16-18)

²¹ Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyí yo can iin nu sucun tyin tacan tan janditsin can nanñi tsitsi vehe. ²² Tyin nduve tsa yihí xeehe tan ña cua quituvi, tan ndi tsa xeehe tan ña cua coto nyívi. Tyin tandihí maa tan cua quita nu nditsin tan coto yo can. ²³ Nyoocho tsa iyó soho,

tyaa soho ndo tsa caahán yu —catyí ra Jesús tsihin ñi.

²⁴Tan catyí tucu ra:

—Tyaa soho vaha ndo tsa caahán yu tyin tun tyaá yahvi ndo tuhun tsiñi ndo, cuaha ca tsa cua cuhva Nyoo tsi ndo. ²⁵Tyin nyivi tyaá soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyaá soho, cua quihin nyaa ra nda cuanda tsa luxu tsa iyó tsi ñi tsa tsa yaha ñihí ñi.

Nu tsahá ra Jesús iin cuhva nácaa tsahnú iin tsiti

²⁶Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsí nyivi. ²⁷Tyin nyivi tatsí ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quivi tsa tatsí ñi, tacan tan cuahán ñi cuanyehé ñi inga tsaha. Tsa tsaá ñi tsa cana tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi, ²⁸tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan tan tsahá tsi tsiti. ²⁹Tan tatun tsa tsitsa tsiti tsi, tacan tan jocón ñi itsi tyin tsa tahañ maa tsi quivi coyo tsi —catyí ra Jesús.

Nu caahán ra Jesús tyin tumaa cuví tsiti mostaza, tacan cuví tsandacá ñaha Nyoo tsiyo
(Mt. 13.31-32; Lc. 13.18-19)

³⁰Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin

náa tsihin? Cuví. ³¹Tyin cuví tsi tumaa iin tsiti mostaza tsa tatsí nyivi. Tsiti can cuví tsa nyihi ca tan ñavin ca tandihi ca tsiti tsa iyó nu ñuhu ñayivi. ³²Maa tyin tsa yaha tatsí tsi, caná tsi tan ndunahnú tsi, tan cuví tsi yutun tumaa nducuaya. Ndunahnú soco tun, tan cuahán saa cua quitatu ti naha ti nuu tun.

Nu tsahá cuenda ra Jesús nacuenda jacuahá ra tsi nyivi tsihin cuhva ñi

(Mt. 13.34-35)

³³Tacan jacuahá ra Jesús tsi nyivi, tsihin cuaha cuhva, ndihi cuhva cuví cutuñi iñi ñi.

³⁴Tan tandihi tsaha tsa cañan ra tsihin ñi maa ñi maa tsihin cuhva cañan ra. Maa tyin cañan catsi ra tsihin ra tsicá tsihin ra.

Nu jacutaxín ra Jesús tatyí xaan nu miñi

(Mt. 8.23-27; Lc. 8.22-25)

³⁵Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

³⁶Tacan tan ra Jesús tan ra tsicá tsihin ra nacoñ ra naha tsi nyivi tan quihvi ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyivi tsi ra naha. ³⁷Tan quitsahá yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñi cutu yutun ndoo can.

³⁸Tan ra Jesús canyí ra quixí ra tsa yatyin xuu yutun ndoo

can, tan nyanaá iin jahma jiñi ra. Jandoto ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñi nyee yo?

³⁹ Tacan tan nduvita ra Jesús tan jacutaxin ra tatyí xaan can. Tan catyí ra tsihin ndutya:

—¡Taxin ñi!

Tan cutaxin tatyí can tan ndutya can. Tacan tan taxin cuii ñi cuví. ⁴⁰ Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu iñi ndo? —catyí ra tsihin ra naha.

⁴¹ Maa tyin iyo xaan cuñi ra naha tsa nyehe ra naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuanda tatyí tan ndutya tyaá yahvi tsi naha tsi tsi ra —catyí ra naha.

5

Nu caahán ra Jesús tyin ra caahán tuhun Nyoo cuví ra tumaa iin ra tatsí Nu nduvaha iin ra Gadara tsa yihí tatyí ña vaha

(Mt. 8.28-34; Lc. 8.26-39)

¹ Tsaq ra naha inga tsiyo miñi nda nu ñuhu cuenda Gadara. ² Tsa quita ra Jesús tsitsi yutun ndoo, tan quita iin ra yihí tatyí ña vaha nu ndaa cumi santu, tan tsaq ra nu nyaá ra. ³ Tan nu ndaa can iyó maa ra can. Tsaahñi ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñi ra. ⁴ Cuaha xaan tsaha tsahñi nyivi tsaha ra tan

ndaha ra tsihin cadena, maa tyin tsaahnyá cuatyí ra can. Tan yoñi maa cuví cunye tsi ra. ⁵ Tan tsicá nuu maa ra caná tsa ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu. ⁶ Maa tyin ndi cañi ca quita ra Jesús, tan nyehe ra can tsi ra, tan tsinú xaan ra tsahan ra, tsicuiñi tsiti ra nuu ra. ⁷ Tan cana tsa ra tan catyí ra:

—¿Nacuenda tyihí un tsi un tsihin yuhu, yoocho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

⁸ Tacan catyí nu tatyí ña vaha can tsihin ra Jesús tyin tsa yahá cahan ra tsihin nu tyehen:

—¡Yoocho tatyí ña vaha, jaña tsi ra ihya! —catyí ra.

⁹ Tan ra Jesús tsicá tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

¹⁰ Tan caahán ndaahvi nu tsihin ra Jesús na ña jacuhun cañi ra tsi nahnu. ¹¹ Yatyin ñi yucu can yucú cuaha quini tsatsí ti naha ti. ¹² Tacan tan catyí tandihí nahnu tsihin ra Jesús:

—Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

¹³ Tacan tan tsaha ra Jesús ndatu tsi nahnu, tan quihvi nahnu tsitsi quini can. Quita nahnu tsi ra can tan quita

tumaa uvi mil quini yucú can. Tsa quihvi nahnu tsitsi ti naha ti, quitsaha tsinú ti naha ti, tan yaha ti naha ti yuhu xahva tan cucoyo ti naha ti tsitsi miñi, tan tsihi ti naha ti tsitsi ndutya.

¹⁴ Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhú ra naha cuacatyí tuhun ra naha tsa cuví can tsihin nyivi ñuu can tan inga ca nyivi tsa taahán ra naha ityi cuhu. Tan tandihi nyivi tsa cahan ra naha tsihin, tsahan ñi tsinyehé ñi tsa cuví can. ¹⁵ Cuhva tsa tsaá ñi nu nyii ra Jesús, nayuhvi xaan ñi tsa nyehe ñi tsi ra tsa yihí tatyí ña vaha can. Nyaá taxin ra, nditsí ra jahma, tan vaha cuñí ra. ¹⁶ Tan tandihi maa nyivi tsa nyehe tsa tahan ra can tan tsa tahan quini can, catyi tuhun ñi can tsihin inga ca nyivi. ¹⁷ Tacan tan quitsaha caahán ndaahvi ñi tsihin ra Jesús, na ña ndoo ra nu ñuhu ñi.

¹⁸ Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra. ¹⁹ Maa tyin ña tsaha ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu iyó nyivi un, tan catyi tuhun tsihin ñi tandihi tsa javaha Jutu Mañi yo Nyoo tsihin un, tan nácaa cundaahvi iñi ra tsi un.

²⁰ Tacan tan cuanuhú ra tan quitsaha catyí tuhun ra

tsihin nyivi iyó tandihi ñuu tsa cayucú Decápolis tandihi tsa javaha ra Jesús tsihin ra. Tan iyó xaan cuñí ñi.

Nu nduvaha sehe ra Jairo tan ñaha tsa tñin jahma ra Jesús (Mt. 9.18-26; Lc. 8.40-56)

²¹ Tsa tsaá ra Jesús tsihin yutun ndoo nda inga tsiyo miñi can, tsaá cuaha nyivi nu tsaá ra. Tan ndoo ra yuhu miñi ican. ²² Tacan tan tsaá iin ra nyisó tyiñu vehe ñuhu, nañi ra Jairo. Cuhva tsa nyehe ra tsi ra Jesús, tsicuiñi tsiti ra nuu ra. ²³ Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñí cúu cuii ña ña.

²⁴ Tacan tan cuahán ra Jesús tsihin ra, tan cuaha xaan nyivi cuahán cuanyicún tsi ra, nda cuanda catyihí tahan ña maa ñi. ²⁵ Tsihin nyivi can cuahán ndihi iin ñaha cuuhví. Ñaha ihya tsa quitá maa utsi uvi cuiya ndohó ña cuehe tsa cuún niñi ña. ²⁶ Tan cuaha xaan tundoho nyehe ña tsihin tsa cuaha doctor. Tandihi xuhun ña janaa ña tsihin ra naha, maa tyin nduve maa náa catyi janaa ña xuhun ña tyin vihi ca nduñihí cuuhvi ña. ²⁷ Tsa tsiñi ña caahán nyivi tyin tsaá ra Jesús, natuhva ña ityi tsata ra tan tñin ña jahma ra. ²⁸ Tyin tsicá iñi maa ña: “Tatun tñin yu vasu tan jahma ra, cua nduvaha yu”. ²⁹ Tsa tñin ña jahma ra iin yaha ñi cutaxin tsa cuún niñi ña. Tan

tuv_i iñi cuñu ñuhu ña tyin tsa janduvaha_h ra tsi ña. ³⁰ Tsa tuv_i iñi ra Jesús tyin nduvaha_h iin nyivi tsihin tunyee iñi tsa iyó tsi ra. Tacan tan nanyico_o coo ra ityi tsata ra tan tsica_h tuhun ra tan catyí ra:

—¿Yóo t_iñ jahma yu?

³¹ Tacan tan catyí ra tsicá tsihin ra:

—¿Nacuenda tsicá tuhun ca un: yóo t_iñ jahma un? tan nyehé vaha un tyin cuaha xaan nyivi nyicún tsi un tan tyañu xaan jahá ñi —catyí ra naha tsihin ra.

³² Maa tyin ra Jesús nanyehe_h ra naniñi ñi tyin cuñí ra coto ra yóo t_iñ jahma ra.

³³ Tacan tan ñaha can tsahan_h ña tsicuiñi_i tsiti ña nuu ra Jesús tyin tsitó vaha ña tyin tsa nduvaha_h ña. Yuuhví ña tan nihí ña tsahan_h ña tsicatyi_i tuhun ña tandihi_i tsa nditsa tsihin ra. ³⁴ Tan catyí ra Jesús tsihin ña:

—Nduvaha_h un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

³⁵ Ndi caahán ca ra Jesús tan tsa_h nyivi quee_e yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi_i ñaha luhlu sehe un. Ña cahan_h yuhu ca un tan ña jatyañu ca un tsi ra Maestro ihya —catyí ñi tsihin ra.

³⁶ Maa tyin ra Jesús ña tyaa yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsinu iñi yooho —catyí ra tsihin ra.

³⁷ Tan ña tsa_h ra cuhun cuaha nyivi tsihin ra. Tan quih_in ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra. ³⁸ Tsa tsa_h ra naha yuvehe ra nyisó tyiñu vehe ñuhu, nyehe_h ra Jesús tyin tsacú xaan nyivi tan caná tsa_h ñi. ³⁹ Quihv_i ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Ñaha luhlu ihya quixí ña; ñavin tsihi_i ña —catyí ra tsihin ñi.

⁴⁰ Maa tyin ña tsinu_h iñi ñi tan tsacu_h naaha ñi nyehé ñi tsi ra. Tacan tan tava_h ra tsi tandihi_i ñi nuquehe, tan quih_in ra tsi jutu ñaha luhlu tsa tsihi_i can tan sihi_i ña tan ra tsa tsa_h tsihin ra, tan quihv_i tandihi_i ñi nu canyií ña. ⁴¹ Tan t_iñ ra ndaha ña, tan catyí ra tsihin ña:

—Talita cumi —tan cuñí tsi catyí tsi tyehen: Catyí yu tsihin yooho ñaha luhlu, jnduvita!

⁴² Juvín ñi cuhva can tan nduvita_h ña, tan nacaca_h ña. Utsi uvi cuiya ña. Tan tsa nyehe_h nyivi tsa iyo tsa javaha_h ra Jesús, iyo xaan cuñí ñi cuv_i.

⁴³ Maa tyin ra Jesús ñihi tsa_h cuenda ra tsi ñi tyin na ña cahan_h ñi tsa nyehe_h ñi tsihin ndi intuhun maa nyivi. Tan tava_h tyiñu ra tsi sihi_i ña na cuhva ña tsa catsi ña.

6

Nu tsinuhu_h ra Jesús ñuu Nazaret nu tsahnu_h ra (Mt. 13.53-58; Lc. 4.16-30)

¹ Tacan tan quita ra Jesús ican, tan cuanuhu ra nda ñuu ra. Tan ra tsicá tsihin ra cuahán ndihi ra naha tsihin ra. ² Tan tsa tahañ tsi quivi quitatú nyivi, tacan tan cuahán ra naha vehe ñuhu tan quitsaha jacuahá ra Jesús tsi nyivi. Tan cuaha ñi yucú tyaa soho ñi tsa caahán ra. Iyo cuñí ñi tsa tsiñí ñi tsa caahán ra, tan catyí ñi:

—¿Numaa tahan cutuhva ra ihya tandihi tsa tsitó ra? ¿Yóo tsaḥ tsa tsiñi tuñi iñi ra? ¿Tan nácaa cutuhva ra javahá ra tsa iyo? ³ Tan ra tahví yutun cuví ra. Tan sehe ña María cuví ra. Tan yañi ra cuví ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñi ñi tyaa yahvi ñi tsi ra. ⁴ Maa tyin catyí ra tsihin ñi:

—Tandihí ñi ityi tan jahá tandihí nyivi tsa ñayivi tsi ra cuví ndusu yuhu Nyoo, maa tyin nyivi ñuu ra, tan nyivi ra, tan nyivi vehe ra ña tyaa yahvi ñi tsi ra —catyí ra Jesús.

⁵ Tan tyiso ndaha ra jiñi juhva nyivi cuuhví, tan janduvaha ra tsi ñi, maa tyin ña cuví javaha ra inga ca tsa iyo. ⁶ Tan iyo cuñí ra tyin ña tsinú iñi ñi tsi ra. Tacan tan cuahán ra cuajacuahá ra tsi nyivi iyó tandihí ñi ñuu nyihi tsa cayucú yatyin ñi ñuu can.

Nu jacuhun ra Jesús tsi ra tsicá tsihin ra cucahan ra naha tuhun Nyoo

(Mt. 10.5-15; Lc. 9.1-6)

⁷ Tsa yaha yacan tan cana ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsaha jacuhún ra uvi uvi ra naha. Tan tsaḥ ra ndatu tsi ra naha tsa tava ra naha tatyí ña vaha tsi nyivi. ⁸ Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuví cundaha ra naha yutun ñi. ⁹ Tan cunyaa nditsan tsaha ra naha. Tan ña cundaha ra naha inga nditsi jahma, na cahun ra naha tsihin cuhva nditsi ñi maa ra naha. ¹⁰ Tan catyí ra tsihin ra naha:

—Cuhva tsa tsaa ndo iin ñuu, quihvi ndo iin vehe, tan ndoo ndo ican nda cuanda quita ndo ñuu can. ¹¹ Tan tatun tsaa ndo iin ñuu tan ña naquihin cuenda nyivi iyó ñuu can tsi ndo, tan ña cuñi ñi tyaa soho ñi tsa cuacahan ndo, quita ndo ican tan naquisi ndo nyaca tsaha ndo tan yacan janaha tyin ndoo cuatyí ñi siqui ñi. Tsa nditsa catyí yu tsihin ndo, tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra —catyí ra Jesús tsihin ra naha.

¹² Tacan tan cuahán ra naha cuacahán ra naha tuhun Nyoo tsihin nyivi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo. ¹³ Tan cuaha ñi nyivi tava ra naha

tatyí ña vaha. Tan tyihí ra naha acetye tsi nyiví cuuhví tan nduvahá ñi.

Nu tsahá cuenda tsi nácaa tsihí ra Juan, ra jacoondutyá tsi nyiví

(Mt. 14.1-12; Lc. 9.7-9)

¹⁴ Ra rey Herodes tsitó ra tsa javahá ra Jesús tyin tandihí nyiví tan caahán ñi tsa javahá ra, tan tsicá iñi ra tyehen:

—Ra ihya cuví ra Juan, ra jacoondutyá tsi nyiví, ra tsa tsihí. Vityin nandotó ra. Juvín ra cuví can, yacan cuenda iyó tunyee iñi tsi ra —cuñí ra Herodes, tsicá iñi ra.

¹⁵ Yihí nyiví catyí ñi:

—Ra Elías, ra cuví ndusu yuhu Nyoo tahañ tsanaha, cuví ra.

Tan catyí tucu inga ñi:

—Ndusu yuhu Nyoo cuví ra, tumaa ra tsicoo tahañ tsanaha naha ra —catyí ñi.

¹⁶ Tsa tsiñí ra Herodes tandihí tsa caahán nyiví, tan catyí ra:

—Ra ihya cuví ra Juan tsa tavá tyiñu yu tyahnya jucun. Vityin nandotó ra —catyí ra Herodes.

¹⁷ Tacan catyí ra tyin juvin ñi maa ra tavá tyiñu na tyihí ra naha tsi ra Juan vehe caa tan cuhñi ra naha tsi ra tsihin carena. Tacan javahá ra Herodes tsihin ra Juan tsacatyí ña Herodías tsa cuví ñasihi ra Felipe yañi ra. Ra Herodes quihín ra tsi ña Herodías tyin cuví ña ñasihi ra ¹⁸ Tan tsa tacan javahá ra, catyí ra Juan tsihin ra tyin ña vaha tsa quihín ra tsi ña

Herodías tyin ñasihi yañi ra cuví ña.

¹⁹ Yacan cuenda ndasi cuñí ña Herodías nyehé ña tsi ra Juan. Cuñí ña cahñi ña tsi ra, maa tyin ña cuví, ²⁰ tyin ña tsahá ra Herodes tyin tsitó ra tyin ra vaha cuví ra Juan tan cuítí iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñí iñi ra Herodes tandihí tsa caahán ra Juan, maa tyin vaha cuñí ra tyaá soho ra tsa caahán ra. ²¹ Maa tyin tsa tahañ tsi quiví cacu ra Herodes javahá ra iin vico. Tan caná ra tsi ra cumí tyiñu naha ra, tan ra yihí ndaha andarú naha ra, tan nyiví cuca tsa iyó ityi Galilea. Quiví ihya tsican ña Herodías tsa cuñí ña tsi ra Herodes. ²² Tyin ñaha sehe ña tahañ ña tsicuañí ña yaa nu iyó vico ra Herodes. Tan tahañ xaan iñi ra Herodes tan ra nyecú cuxiñí tsihin ra cuhva tsañí ña. Tacan tan catyí ra Herodes tsihin ña:

—Ndacan tsi yu náa cuñí maa un. Náa tahañ ñi maa tsi cua ndacan un tsi yu cua cuhva maa yu can tsi un. ²³ Tsitó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un —catyí ra tsihin ña.

²⁴ Tacan tan quita ña, cuahán ña cuandacá tuhun ña tsi sihi ña tan catyí ña:

—¿Náa ndacan yu tsi ra?

Tan catyí sihi ña:

—Ndacan jiñi ra Juan, ra jacoondutya tsi nyivi tsi ra —catyí ña.

²⁵ Tacan tan numi ñi quihvi nyico ñaha tyuvaa can nu nyii ra rey Herodes, tan catyí ña tsihin ra:

—Cuñi yu jiñi ra Juan, ra jacoondutya tsi nyivi. Cahnya jucun ra tan tinyii un jiñi ra nuu iin coho, cuhva un tsi yu vityin vityin ñi —catyí ña tsihin ra.

²⁶ Tacan tan cuihya xaan cuñi ra rey can cuvji. Maa tyin tsa cuenda tsa cahan ra tyin cua cuhva maa ra tsa cua ndacan ña, ña cuñi ra jandavi ñaha ra tsi ña tyin tandihi maa nyivi yucú vico can tan tsiñi ñi tsa cahan ra, yacan cuenda tsaha ra tsa tsican ña. ²⁷ Numi ñi tava tyiñu ra rey can tsi iin andaru na cuquihin ra jiñi ra Juan. ²⁸ Tsahan andaru can tsitsi vehe caa, tan tsahnya ra jucun ra Juan. Tan tsindaca ra jiñi ra Juan tsi ñaha tyuvaa can, nyii tsi nu iin coho. Tan nacuhva cuenda ña can tsi sihi ña.

²⁹ Tsa tsito ra nyicun tsi ra Juan tsa cuvji, tsahan ra naha tsiquihin ra naha cuñu ñuhu ra, tan tsicutsi ra naha can.

Nu jacatsi ra Jesús uhun milrayii

(Mt. 14.13-21; Lc. 9.10-17; Jn. 6.1-14)

³⁰ Tsa yaha yacan tan ndu iin ra tsicá tyiñu ra Jesús tsihin ra, tan catyí tuhun ra naha tsihin ra tandihi tsa javaha ra naha, tan tsa jacuaha ra naha nu tsahan ra naha tsicahan ra naha tuhun

Nyoo tsihin nyivi. ³¹ Tan catyí ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyí ra tsihin ra naha tyin cuaha xaan nyivi cuahan tan vatsi, tan ndi ña cuyatyí ra naha catsi ra naha jahá ñi. ³² Tacan tan quihvi ra Jesús tsihin ra naha tsitsi iin yutun ndoo tan cuahan ra naha iin nu taxin caa. ³³ Maa tyin cuaha xaan nyivi nyehe ñi cuahan ra naha. Tan nacotó ñi tsi ra Jesús. Tacan tan cuahan ñi tsihin tsaha ñi, quitá ñi tandihi ñi ñuu tan jihna ca ñi tsaá nu cua tsaá ra Jesús. ³⁴ Cuhva tsa tsaá ra naha, quitá ra Jesús tsitsi yutun ndoo tan nyehe ra tyin cuaha xaan nyivi yucú ican. Tan cundaahvi iñi ra nyehe ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsaha jacuaha ra cuaha xaan tuhun vaha tsi ñi. ³⁵ Tsa tsa cua cuiso ñicanyii, tan natuhva ra tsicá tsihin ra Jesús xiin ra tan catyí ra naha tsihin ra:

—Tsa cueñi xaan, tan nduve nyivi iyó yatyin ñi ihya. ³⁶ Vaha ca jacunuhu un tsi nyivi tyin ihya nduve tsa catsi ñi. Tan na kujata ñi paan catsi ñi vehe tsa iyó tsitsi cuhu ihya tan ñuu tsa cayucú yatyin ñi —catyí ra naha tsihin ra.

³⁷ Maa tyin nacahan ra Jesús, tan catyí ra:

—Cuhva nyooho tsa catsi ñi.

Tacan tan nacahan ra naha tan catyí ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihi nyivi ihya.

³⁸ Tan catyí ra Jesús tsihin ra naha:

—Nyehe jihna ndo najava paan ndahá ndo —catyí ra.

Cuhva tsa tsito ra naha najava paan ndahá ra naha, tacan tan tsicahan ra naha tsihin ra tan catyí ra naha:

—Ndahá ndi uhun taahan ñi paan tan uvi taahan ñi tyaca.

³⁹ Tacan tan catyí ra tsihin nyivi na cunyecu ñi nu cuhu can. ⁴⁰ Tan tsinyecu cuenda cientu tan cuenda uvi xico utsi ñi tsa iin cuhva tsinyecu ñi. ⁴¹ Tacan tan quihin ra Jesús tsa uhun paan can tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo, tsa yaha tan tsahnu cuatyí ra paan can, tan tsaha ra can tsi ra tsicá tsihin ra tyin tsatsa ra naha can tsi nyivi. Tsa ndihi tsatsa ra naha paan can, tan tsatsa ndihi ra naha tyaca. ⁴² Tsatsi tandihi ñi tan ndaha iñi ñi. ⁴³ Tan jacutu ra naha utsi uvi tyica tsihin paan tan tyaca tsa ndoo. ⁴⁴ Tan uhun mil rayi tsatsi paan can.

Nu tsicá ra Jesús nu ndutya (Mt. 14.22-27; Jn. 6.16-21)

⁴⁵ Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuha ra tsi nyivi yuvehe ñi. ⁴⁶ Tsa yaha cuanuho nyivi, tacan tan

cuahán ra Jesús cuandacán tahvi ra tsi Nyoo iin jiñi yucu.

⁴⁷ Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyii ra yuhu miñi can.

⁴⁸ Tan tsa nyehe ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñi tuvi, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha. ⁴⁹ Maa tyin tsa nyehe ra naha tsicá ra nu ndutya, tsica iñi ra naha tyin tatyí cuví ra, tacan tan quitsaha caná tsa ra naha ⁵⁰ tyin tandihi ra naha nyehe ra naha tsi ra tan nayuhvi ra naha. Maa tyin nacahan ra tan catyí ra tsihin ra naha:

—¡Ña nayuhvi ndo tyin maa yu cuví!

⁵¹ Tacan tan quihvi ra tsitsi yutun ndoo nu yucú ra naha, tan tsa yaha quihvi ra, iin yaha ñi cutaxin tatyí can. Tan iyo xaan cuñi ra naha cuví ⁵² tyin ñaha ca cutuñi iñi ra naha tsa iyo tsa javaha ra tsihin paan, tyin ndi ndava añaima ra naha.

Nu janduvaha ra Jesús nyivi cuuhvi tsa iyó nduhva tsa nañi Genesaret (Mt. 14.34-36)

⁵³ Yaha sava ra naha nu miñi can tan tsa ra naha Genesaret inga tsiyo yuhu miñi can, tan tsahñi ra naha yutun ndoo can yatyin ñi yuhu ndutya. ⁵⁴ Cuhva tsa quitá ñi ra naha tsitsi yutun

ndoo can, tan nacotoꝝ nyivi tsi ra Jesús. ⁵⁵ Tacan tan tsinú xaan ñi cuahán ñi cuajacotó ñi tsi nyivi iyó nanií cahnu ityi can tyin tsaꝝ ra Jesús. Tan tsaꝝ cuaha nyivi quee tandihí ñi ñuu nu nyií ra, tan yucú nyivi cuuhví nu tsitó tsaꝝ tsihin ñi. ⁵⁶ Tan tandihí ñi ityi nu cuahán ra tsitsi ñuu nyihi o tsitsi ñuu nahnu, o tsitsi cuhu, tsaquín nyivi nyivi cuuhví yuhu ityi. Tan caahán ndaahvi ñi tsihin ra na cuhva ra tiin ñi cuuhví can vasu tan yuhu jahma ra tan nduvaha ñi. Tan tandihí maa nyivi tsa tiin jahma ra nduvaha ñi.

7

Tsa jatívi tsi nyivi nu Nyoo (Mt. 15.1-20)

¹ Tacan tan tsaꝝ juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyií ra Jesús. ² Ra ihya naha ra nyehe ra naha tyin juhva ra tsicá tsihin ra Jesús ña nacatyá ra naha ndaha ra naha tan tsatsí ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahá ra can naha ra. ³ Tyin ra fariseo naha ra javahá ra naha tumaa catyí costumbre tsii tsaahnu ra naha tacan tucu ñi tandihí ca nyivi Israel ña cuví catsi ñi tun ña nacatyá ñi ndaha ñi cuaha tsaha tumaa iyó maa ñi. ⁴ Tan tatun ña nacatyá ñi ndaha ñi tsa tsaá ñi quee ñi nuyahvi, ña cuví catsi ñi. Iyó cuaha ca costumbre tsa tuhvá ñi

javahá tumaa tsa nacatyá ñi vasu, jarra, tan tandihí ndaha tyiñu tsa tsinú tsihin caa tsa iyó tsi ñi tan nda cuanda cama ñi. ⁵ Tacan tan tsicá tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoꝝ tsii tsaahnu yo naha ra? Tyin ña nacatyá jihna ra naha ndaha ra naha tumaa iyó maa yo tan tsatsí ra naha —catyí ra naha tsihin ra.

⁶ Tan nacahan ra Jesús, tan catyí ra:

—Nditsa tsa cahan ra Isaías, ra cuví ndusu yuhu Nyoo tuhun nyoocho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyivi ihya jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ñi.

⁷ Yacan cuenda nduve yahvi nyaá jacahnú ñi tsi yu, tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyí ra Isaías tuhun ndo jahá Nyoo, catyí ra Jesús tsihin ra naha.

⁸ Tyin nyoocho nacoꝝ ndo cuhva caahán Nyoo, tan nyicún ndo cuhva caahán nyivi ñi, tumaa tuhvá ndo nacatyá ndaha tyiñu ndo, tan inga ca tsa tuhvá ndo javahá. ⁹ Nyoocho tyaa tsiyo ndo tuhun caahán Nyoo, tacan tan javahá ndo tuhun tsahnu tsa nacoꝝ tsii tsaahnu

ndo. ¹⁰Tyin catyí ley Nyoo tsa tyaa ra Moisés: “Tyaa yahvi ndo tsi jutu ndo tan tsi sihi ndo, tyin tandihi nyivi tsa cua cahan ndavaha ñi tsi jutu o tsi sihi, cua cúu ñi” catyí ley Nyoo tsa tyaa ra Moisés.

¹¹Maa tyin nyooho catyí ndo tyin cuví catyí iin nyivi tsihin jutu ñi o sihi ñi tyehen: “Ña cuví jatinyee yu tsi un tyin tandihi tsa iyó tsi yu cuví tsi Corbán.” (Tuhun ihya cuñí tsi catyí: “Tsa ndihi can tsaha cuenda yu tsi Nyoo.”) ¹²Tan tatun catyí nyivi tacan, ña cuñí ca tsi jatinyee ñi tsi jutu ñi o tsi sihi ñi, catyí ndo.

¹³Yacan cuví tsa javahá ndo vityin, tyaa tsiyo ndo tuhun caahán Nyoo, tsahan tyaa yahvi ca ndo tuhun tsahnu kuhva iyó maa ndo. Tan cuaha ca tsa tacan caá javahá ndo —catyí ra Jesús.

¹⁴Tacan tan cana nyico ra Jesús tsi nyivi tan catyí ra tsihin ñi:

—Tyaa soho vaha tandihi ndo tsa cua cahan yu, tan nducu ndo kuhva cutuñi iñi ndo. ¹⁵Tsa quihví yuhu nyivi, ña cuví jatívi tsi tsi ñi. Tsa jatívi tsi ñi cuví tsa quitá añima ñi. ¹⁶Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

¹⁷Tsa yaha nacoo ra Jesús tsi nyivi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra. ¹⁸Tan catyí ra tsihin ra naha:

—¿A ndi nyooho tan ña cutuñi iñi ndo? ¿A ña tsitó ndo

tyin tsa quihví tsitsi yo ña cuví jatívi tsi tsi yo? ¹⁹Tyin tsitsi yo quihví tsi tan ñavin añima yo. Yaha can tan quitá tsi tsitsi cuñu ñuhu yo —catyí ra Jesús.

Tsihin tsehe janaha ra tyin tandihi nyayu tan vaha catsi yo itsi. ²⁰Tan catyí tucu ra:

—Tsa quitá añima nyivi, yacan jatívi tsi ñi. ²¹Tyin tsa caquiñi tsa tsicá iñi ñi tsitsi añima ñi quitá can, tacan tan rayi cuñí ra coo inga ñaha tsi ra, o ñiñaha cuñí ñi coo inga rayi tsi ñi. Yihí ra tsicoó ra tsihin inga ñaha tan ña tindaha ra tsihin ña. Yihí rayi tsicoó ra tsihin ra ndusihi. Tan yihí ñiñaha tsicoó ñi tsihin ñi nduyi. Tan yihí ñi cuñi ñi cahni ñi nyivi, ²²o cuñí ñi suhu ñi. Yihí ñi cuñí ñi coo tsa tsii inga nyivi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi. ²³Tandihi tsa ña vaha ihya, quitá can tsitsi añima nyivi, tan jatívi can tsi ñi —catyí ra Jesús tsihin ra naha.

Nu tsinu iñi iin ñaha inga ñuu tsi ra Jesús

(Mt. 15.21-28)

²⁴Tsa yaha yacan tan quita ra Jesús ñuu can, tan cuahán ra ñuhu nu canyí ñuu Tiro tan ñuu Sidón. Tsa tsaa ra ican, quihví xeehe ra tsitsi iin vehe tyin ña cuñí ra coto nyivi numaa nyii ra. Maa tyin ña

cuví cunyi xeehe ra ²⁵ tyin yatyí xaan tsito síhi iin ñaha tyuvaa tsa yihí tatyí ña vaha nu nyíí ra. Tacan tan cuahán ña nu nyíí ra. Tsa tsaá ña tan tsicuiñi tsiti ña nuu ra. ²⁶ Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaá ña nu nyíí ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña. ²⁷ Maa tyin catyí ra Jesús tsihin ña:

—Ña cahan yuhu ca un; na catsi jihna nyívi Israel, ñi cuví sehe Nyoo, tyin ña vaha quihin nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

²⁸ Tan nacahan ña tan catyí ña:

—Nditza, Jutu Mañi yu, maa tyin nda cuando ina cuví ndatú ti tan tsatsí ti titsehe tsa cucoyó xuu mesa jahá sehe tsitoho ti —catyí ña tsihin ra.

²⁹ Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yahá quita tatyí ña vaha tsi sehe un. Cuanuhu vityin —catyí ra tsihin ña.

³⁰ Tan cuhva tsa tsaá ña yuvehe ña, canyíí taxin sehe ña nu cama, tyin tsa yahá quita tatyí ña vaha tsi ña.

Nu janduvahá ra Jesús tsi ra soho tan ñiñhi

³¹ Quita nyico ra Jesús ñuhu nu canyíí ñuu Tiro, tan yahá ra ñuu Sidón, tan cuahán ra inga ca ñuu tsa cayucú Decápolis. Yahá ra ican tan tsaá ra miñi Galilea. ³² Tsa tsaá ra Jesús ican, tsahan

nyívi tsindaca ñi iin ra soho tsa ña cuví cahan nu nyíí ra. Cahán ndaahvi ñi tsihin ra na tyiso ra ndaha ra jiñi ra can. ³³ Tacan tan quihin ra tsi ra can cuahán tsiyo tsihin ra nu nduve nyívi. Tan tyaxin ra nundaha ra tsitsi soho ra can, tan tiví síi ra, tan tñin ra nu yaa ra can. ³⁴ Tacan tan nanyehé ndaa ra ityi andívi. Tan ixta tatyí ra, tan catyí ra:

—¡Efata! —tan tuhun ihya cuñí tsi catyí: ¡Nuña!

³⁵ Tan tsihin can nuña soho ra can, tan nduvahá yaa ra, tan cuví nacahan ra. ³⁶ Tan catyí ra Jesús tsihin ñi tyin ña cahan ñi can tsihin nyívi, maa tyin vasu ndi maa caahán ra tacan tsihin ñi, cuñihí ca ñi caahán ñi tsa javahá ra. ³⁷ Iyo cuñí ñi tan catyí ñi:

—Tandíhi tsa javahá ra tan vaha javahá ra itsi. Nyívi soho nacuí ñi jahá ra tan nyívi ñiñhi nacahan ñi.

8

Nu tsaá ra Jesús tsa catsi cumi mil nyívi

(Mt. 15.32-39)

¹ Quívi can nataca cuaha nyico nyívi nu nyíí ra Jesús. Tan nduve maa tsa catsi ñi iyó. Tacan tan cana ra Jesús tsi ra tsicá tsihin ra, tan catyí ra tsihin ra naha:

² —Ndaahvi xaan cuñí yu nyehé yu nyívi ihya, tyin tsa uñi quívi yucú ñi tsihin yo, tan nduve ca tsa catsi ñi. ³ Tyin tun jacuhun yu tsi ñi yuvehe ñi tsa ndi cumañi ca catsi ñi, cua cúu naaha ñi ityi cahun ñi, tyin yihí ñi cañi

xaan quee ñi —catyí ra Jesús tsihin ra naha.

⁴ Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve nyivi iyó ihya tan xico ñi tsa catsi yo?

⁵ Tan tsicá tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

⁶ Tacan tan catyí ra tsihin nyivi na cunyecu ñi nu ñuhu. Tsa yaha cahan ra yacan, tacan tan quihin ra tsa utsa paan can, tan nacuhva ra tyahvi nyoo tsi Nyoo tsa cuenda can. Tsahan tsahnū cuatyí ra can tan tsaha ra can tsi ra tsicá tsihin ra, tyin tsatsa ra naha can tsi nyivi.

⁷ Tan ndahá tucu ra naha juhva tyaca nyihi. Tsaha ndihi ra Jesús tyahvi nyoo tsi Nyoo tsa cuenda can, tacan tan tsaha ra can tsi ra naha tyin tsatsa ra naha tsi nyivi. ⁸ Tandihí ñi tsatsí ñi, tan ndahá vaha iñi ñi. Tsa ndihí tsatsí ñi tan jacutu ra naha utsa tyica tsihin tsa ndoo. ⁹ Tan quitā maa cumi mil nyivi jacatsí ra. Yaha can tan jacunuhu ra tsi ñi. ¹⁰ Tsa yaha cuanuhu ñi, tacan tan quihvī ra tsihin ra tsicá tsihin ra tsitsi iin yutun ndoo. Tan cuahán ra naha ityi Dalmanuta.

Nu tsicán ra fariseo naha ra tsi ra Jesús tyin javaha ra iin tsa iyo

(Mt. 16.1-4; Lc. 12.54-56)

¹¹ Tsaā ra fariseo naha ra nu nyii ra Jesús, tan quitsaha caahán yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsí tsi ra, yacan cuenda catyí ra naha tsihin ra tyin javaha ra iin tsa iyo nyehe ra naha. ¹² Tacan tan ra Jesús ñihi xaan ixtā tatyí ra, tan catyí ra:

—¿Nacuenda tyin tsicán nyivi iyó vityin tsa iyo? Tsa nditsa catyí yu tsihin ndo tyin ña cua nyehe ndo ndi intuhun tsa iyo —catyí ra tsihin ra naha.

¹³ Tacan tan nacoō ra tsi ra naha, tan quihvī nyico ra tsitsi yutun ndoo tan cuahán ra inga tsiyo miñi.

Nu catyí ra Jesús tyin tsa jacuahá ra fariseo naha ra cuví can tumaa yutsan iya (Mt. 16.5-12)

¹⁴ Ra tsicá tsihin ra Jesús naā iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can. ¹⁵ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo naha ra tañ ra Herodes —catyí ra tsihin ra naha.

¹⁶ Tan ra tsicá tsihin ra quitsaha natuhún tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

¹⁷ Tsa tuvī iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan aña ndo? ¹⁸ Nyecú tinuu ndo, tan ña nyehé ndo. Nyecú soho ndo, tan ña tsiñí ndo. ¿A ña nducuhún iñi ndo tsa javahá yu ¹⁹ quivi tsa jacatsi yu uhun mil rayi tsihin uhun taahan ñi paan? ¿A ña ñuhú iñi ndo najava tyica jacutu ndo tsihin tsa ndoo? —catyí ra Jesús, tsicá tuhun ra tsi ra tsicá tsihin ra.

Nacahan ra naha tan catyí ra naha:

—Utsi uvi tyica.

²⁰ Tan catyí nyico ra Jesús tsihin ra naha:

—Tan quivi jacatsi yu cumi mil nyivi tsihin utsa taahan ñi paan, ¿najava tyica jacutu ndo tsihin tsa ndoo?

Nacahan ra naha tan catyí ra naha:

—Utsa taahan tyica.

²¹ Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

Nu janduvahá ra Jesús iin ra cuaa nda ñuu Betsaida

²² Tsa yahá yacan tan cuahán ra Jesús tsihin ra tsicá tsihin ra nda ñuu Betsaida. Tsa tsaá ra naha ican, tsindacá nyivi ñuu can iin ra cuaa nu yucú ra naha. Tan cahan ndaahvi ñi tsihin ra Jesús tyin tin ra tsi ra cuaa can tan janduvaha ra tsi ra. ²³ Tacan tan tin ra ndaha ra cuaa can, tan quihin ra tsi ra cuahán tsihin ra ityi tsata ñuu. Tyaa si ra nu ndaha ra

tan tin ra tinuu ra can, tan tyiso ra ndaha ra soco ra can, tan tsicá tuhun ra tsi ra tun nditsin nyehé ra luxu. ²⁴ Ra cuaa can nanyehé ra tan catyí ra:

—Nyehé yu juhva nyivi, tan caá ñi tumaa caá yutun, maa tyin tsicá ñi —catyí ra.

²⁵ Tacan tan tin nyico ra Jesús tinuu ra inga tsaha, tan nanyehé vaha ra tan nduvahá ra. Nanyehé catsi vaha ra tandihi tsa iyó. ²⁶ Tacan tan jacunuhu ra Jesús tsi ra yuvehe ra, tan catyí ra tsihin ra:

—Ña quihvi un tsitsi ñuu ihya tan ña nacatyí tuhun tsehe tsihin nyivi —catyí ra Jesús tsihin ra.

Nu cahan ra Pedro tyin ra Jesús cuví Cristo, ra jacacú tsi yo

(Mt. 16.13-20; Lc. 9.18-21)

²⁷ Yahá can tan cuahán ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javahá ra Felipe. Tsitsi tsa cuahán ra naha, tan tsicá tuhun ra Jesús tsi ra naha, tan catyí ra:

—¿Náa caahán nyivi tuhun yu? ¿Yóo ra cuví yu catyí ñi? —catyí ra tsihin ra naha.

²⁸ Nacahan ra naha tan catyí ra naha:

—Yihí nyivi catyí ñi tyin ra Juan, ra jacoondutyá tsi nyivi, cuví un. Inga ñi catyí ñi tyin ra Elías. Yihí ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

²⁹ Tacan tan tsicá tuhun ra tsi maa ra naha, tan catyí ra:

—Tan nyoo^{ho}, ¿yóo ra cuví yu, cuñí ndo?

Tan nacahan ra Pedro tsihin ra:

—Yoo^{ho} cuví ra Cristo, ra jacacú tsi nyívi.

³⁰ Maa tyin cahan ra Jesús tsihin tandihí ra naha tyin ña cahan ra naha can tsihin ndi intuhun maa nyívi.

Nu cahan ra Jesús tyin cua cúu ra

(Mt. 16.21-28; Lc. 9.22-27)

³¹ Tacan tan quitsaha jacuahá ra tyin Rayí tsa quee nda gloria cua nyehe xaan ra tundoho. Tan ña cua tsinu iñi ra mandoñi naha ra tan ra jutu cuví ityi nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahñi nyívi tsi ra maa tyin cua nandoto ra tsa tsinu uñi quívi. ³² Tacan cahan catsi ra tsihin ra naha. Tacan tan quihin ra Pedro tsi ra cuahán tsihin ra tsata vehe tan quitsaha caahán ra tsihin ra Jesús tyin ña vaha tsa cahan ra. ³³ Maa tyin ra Jesús nanyico coo ra, tan nanyehe ra nu nyecú inga ra tsicá tsihin ra. Tan quitsaha caahán ra tsihin ra Pedro, tan catyí ra:

—¡Cuatsiyo nuu yu ihya, cuihna! Tyin yoo^{ho} ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyívi—catyí ra Jesús tsihin ra Pedro.

³⁴ Tacan tan cana ra Jesús tsi nyívi tan tsi ra tsicá tsihin ra tan catyí ra:

—Tatun ndáa nyoo^{ho} cuñí cunyicun tsi yu, cahnya iñi ndo nacoo ndo tsa cuñí maa ndo javaha ndo, tyin tacan tan cuví javaha ndo cuhva cuñí Nyoo. Tan ña cua ndu uvi iñi ndo tsa yihí ndo cuenda yu, vasu ndi maa tandihí quívi nyehé ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunyicun ndo tsi yu. ³⁵ Tyin nyoo^{ho} tsa ña cuñí nyehe tundoho tan cuhva ndo ñayívi ndo tsa cuenda yu, cua nyehe ndo tundoho anyaya. Maa tyin nyoo^{ho} tsa cua cuhva ñayívi tsa cuenda yu tan tsa cuenda tuhun Nyoo, cua cacu ndo. ³⁶ Tyin nduve yahvi nyaá cua ñihi ndo tandihí tsa iyó nu ñuhu ñayívi ihya tun ña cua cacu añima ndo. ³⁷ Tyin nduve maa náa tsihin tyahvi ndo tan cuví cacu añima ndo tan ña cunaa tsi. ³⁸ Tyin nyívi cua nducahan nuu tsa cuenda yu tan tsa cuenda tuhun caahán yu quívi cahan ñi tsihin nyívi caquiñi tsa ña tyaá yahvi tuhun Nyoo, yuhu Rayí tsa quee nda gloria cua nducahan nuu yu nyehe yu tsi ñi quívi quitsi yu tsihin ángel cuenda Nyoo Jutu yu tan tsihin tsa si caá ra.

9

¹ Tan tsa nditsa catyí yu tsihin ndo, tyin yihí nyoo^{ho} tsa yucú ihya vityin, cua nyehe ndo nácaa ndacá ñaha Nyoo tsihin tunyee iñi ra tsa ndi cumañi ca cúu ndo.

Nu nyehe uñi ra tsicá tsihin ra Jesús nu nasamā cuhva caá ra

(Mt. 17.1-13; Lc. 9.28-36)

² Tsa yaha iñu quivi, tacan tan quihin ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasamā cuhva caá ra tan nyehe ra yucú tsihin ra can. ³ Xiñu xaan tan cuitsin xaan jahma ra cuvī tumaa cuitsin vico. Ndi intuhun maa nyivi iyó nu ñuhu ñayivi ihya tan ña cuvī janducuitsin ñi jahma tumaa cuitsin jahma ra. ⁴ Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra. ⁵ Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro. ⁶ Cahān ra tacan tyin ña tsitó ra náa cahan ra tyin maa ra tan ra yucú tsihin ra nayuhvi xaan ra naha.

⁷ Tacan tan nuu iin vico siqui ra naha tan tyasi tsi tsi ra naha. Tan tsitsi vico can nacahān iin ndusu tan catyí tsi:

—Ra ihya cuvī Sehe yu, tan cuñi xaan yu tsi ra. Tyaa yahvi ndo tsa caahán ra —catyí ndusu can.

⁸ Tan cuhva tsa nanyehe ra naha, nduve ca ra Elías tan ra Moisés nyaá, intuhun ña maa ra Jesús nyaá.

⁹ Tan cuhva tsa vatsi nuu ra naha yucu can, catyí ra Jesús

tsihin ra naha tyin ña cahan naha ra naha tsa nyehe ra naha. Cuvī cahan maa ra naha can nda yaha nandoto Rayi quee nda gloria, tan rayi can cuvī maa ra. ¹⁰ Yacan cuenda ña cahan maa ra naha tuhun can, tan natuhún tahan ra naha náa cuñi tsi catyi tuhun tsa cua nandoto ra. ¹¹ Tacan tan tsicā tuhun ra naha tsi ra Jesús tan catyí ra naha:

—¿Nacuenda tyin catyí ra cuvī maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayivi ihya inga tsaha?

¹² Tan nacahān ra, tan catyí ra:

—Nditsa tyin jihna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihi. ¿Tan náa catyí tuhun Nyoo cuenda yuhu Rayi quee nda gloria? Catyí tsi tyin cua nyehe yu tundoho, tan ña cua cuñi nyivi nyehe ñi tsi yu. ¹³ Maa tyin yuhu catyí yu tsihin ndo tyin tsa yaha quitsi ra Elías. Tan nyivi javaha ñi tsihin ra cuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

Nu janduvaha ra Jesús iin ra tyuvaa tsayihí tatyí ña vaha
(Mt. 17.14-21; Lc. 9.37-43)

¹⁴ Tsa yaha yacan tan cuahán ra naha nu yucú tandihi ca ra tsicá tsihin ra naha. Tsa tsaā ra naha ícan, nyehe ra naha tyin yucú cuaha nyivi nani canduvi. Tan yucú tucu ra maestro

cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús. ¹⁵ Tsa nyehe nyivi can tsi ra Jesús, iyo xaan cuñí tandihi ñi cuví. Tacan tan tsahan ñi nu nyaá ra tsicuhva ñi nacumi tsi ra. ¹⁶ Tacan tan tsicá tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

¹⁷ Tacan tan nacahan iin ra tsa nyaá tyañu tandihi nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihí ra jahá nu. ¹⁸ Tyin tandihi ñi nu tñn tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yaha cahan yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuví tava ra naha tsi nu —catyí ra can tsihin ra Jesús.

¹⁹ Nacahan ra Jesús tan catyí ra:

—¡Nyooho nyivi ña tsinú iñi tan caquiñi! ¿Ndáa nda quivi cua cunyii yu tsihin ndo? ¿Tan najava ca quivi cua cun- yee iñi yu nyehe yu tsi ndo tyin ña tsinú vaha iñi ndo tsi yu? Ndaca ndo tsi ra luhlu can tsi yu ihya —catyí ra.

²⁰ Tacan tan tsindacá jutu ra luhlu can tsi ra tsi ra Jesús. Tan cuhva tsa nyehe nu tatyí ña vaha can tsi ra Jesús, janduvá nu tsi ra luhlu can tan quitsaha tsicó tui ra nu ñuhu jahá nu. Tan quita tiñuu yuhu

ra. ²¹ Tacan tan tsicá tuhun ra Jesús tsi jutu ra luhlu can tan catyí ra:

—¿Ama quitsaha taahán ra tyehen?

Tan nacahan jutu ra luhlu can, tan catyí ra:

—Nda ndi luhlu xaan ra. ²² Tan cuaha tsaha tyihí tatyí ña vaha can tsi ra nu cayú ñuhu, tan nu ndutya. Cuñí nu cahñi nu tsi ra. Maa tyin tun cuví javaha un náa javaha un tsihin ra, cundaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

²³ Tan catyí ra Jesús tsihin ra:

—Tun tsinú iñi un, tandihi tan cua cuví tyin tsa cuenda ra tsa tsinú iñi tandihi tan cuví —catyí ra Jesús.

²⁴ Tacan tan caná tsaa jutu ra tan catyí ra tsihin ra Jesús:

—¡Tsinú iñi yu! ¡Jatyinyee tsi yu na tsinu ca iñi yu! —catyí ra tsihin ra.

²⁵ Cuhva tsa nyehe ra Jesús tyin cuaha nyivi ndu iin nu nyaá ra, tacan tan tava ra tatyí ña vaha can, tan catyí ra tsihin nu:

—Yooho tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihvi ca un tsi ra —catyí ra Jesús tsihin nu tatyí ña vaha can.

²⁶ Tacan tan quiñi xaan caná tsaa nu tatyí can tan janduvá nu tsi ra inga tsaha, tan quita nu tsi ra. Tan jacúu naaha nu tsi ra. Tan cuñí maa nyivi tyin tsa tsihi ra. ²⁷ Maa tyin ra Jesús tñn ra ndaha ra

luhlu can, tan cañihĩ ra tsi ra, tan tsinyaa nyityi ra.

²⁸ Tacan tan quihvĩ ra Jesús tsitsi iin vehe, tan tsicā tuhun ra tsicá tsihin ra tsi ra tan catyí ra naha:

—¿Nacuenda tyin ña cuvĩ tava nyuhu tatyí ña vaha can?

²⁹ Tacan tan catyí ra Jesús:

—Tsa cuenda tyin tahan tatyí ña vaha ihya ña cuvĩ quita nu jaha yo tun ña coonyitya yo tan ña ndacan tahví yo tsi Nyoo —catyí ra tsihin ra naha.

Nu cahan ra Jesús inga tsaha tyin cua cahñi nyivi tsi ra

(Mt. 17.22-23; Lc. 9.43-45)

³⁰ Quivĩ tsa quita ra Jesús ican, tan ra tsicá tsihin ra yahā ra naha ñuhú Galilea. Tan ña cuñí ra Jesús tsa coto nyivi iyó ican tyin nyíi ra nu iyó ñi. ³¹ Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayĩ tsa quee nda gloria cua nacuhva cuenda nyivi tsi yu tsi ra xaan iñi tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi. ³² Maa tyin ra ican naha ra ña cutuñí iñi ra naha tsa caahán ra tsihin ra naha. Tan ña cuñí ra naha ndaca tuhun ra naha tsi ra tyin yuuhví ra naha.

Nu janahá ra Jesús yóo ra cahnu ca cuvĩ tsitsi tsa tandihĩ nyivi tsa ndacá ñaha Nyoo

(Mt. 18.1-5; Lc. 9.46-48)

³³ Tan tsa tsaā ra Jesús ñuu Capernaum tan ra tsicá tsihin ra, tsa tsa yucú ra naha tsitsi

vehe, tan tsicā tuhun ra Jesús tsi ra naha tan catyí ra:

—¿Náa natuhún xaan ndo ityi vatsí yo? —catyí ra tsicā tuhun ra.

³⁴ Tsa cahan ra Jesús tacan, taxin ña cuvĩ ra naha, tyin ityi vatsí ra naha natuhun ra naha yóo ra cahnu ca cuvĩ tsa nuu tandihĩ ra naha. ³⁵ Tacan tan tsinyaa ra Jesús tan canā ra tsi tandihĩ tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñí cuvĩ ityi nuu, cuñí tsi cuvĩ ndo nda nu ndihĩ ña tsa nuu tandihĩ ndo, tan jatyinyee ndo tsi tandihĩ nyivi —catyí ra Jesús tsihin ra naha.

³⁶ Tacan tan quihĩn ra iin ra luhlu tyaa ra mahñu ra naha. Tan tyihĩ jucun ndaha ra tsi ra luhlu can, tan catyí ra:

³⁷ —Nyivi naquihin iin nyivi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñí ñi tsi yu. Tan nyivi naquihin cuenda tsi yuhu, naquihin cuenda tucu ñi tsi ra tsa jaquitsĩ tsi yu tan ñavin maa ñi maa yu naquihin cuenda ñi.

Nyivi tsa ña cuxaán tsi yo, juvin ñi ican jatyinyee tsi yo

(Mt. 10.42; Lc. 9.49-50)

³⁸ Tacan tan catyí ra Juan tsihin ra Jesús:

—Maestro, nyehẽ ndi iin ra tavá tatyí ña vaha tsi nyivi tsihin sivi un. Maa tyin tyasĩ ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

39 Maa tyin catyí ra Jesús tsihin ra:

—Ña çasi ndo nu javaha nyivi tacan. Tyin ndi intuhun ñi tsa javaha tsa iyo tsihin sivi yu tan ña cua cana iñi ñi cahan ñi ndavaha ñi tsi yu. 40 Tyin nyivi tsa ña xaan iñi tsi yo, tsihin yo cutahán ñi. 41 Tan nyivi tsa cua cuhva vasu tan iin yatsin ndutya coho ndo tyin tsinú iñi ndo tsi yu, cua cuhva Nyoo tsa cua cuhva ra tsi ñi.

Nu tsahá cuenda ra Jesús tsi yo nácaa jaha cuenda yo tsi yo tan ña javahayo tsa ña vaha (Mt. 18.6-9; Lc. 17.1-2)

42 Nyivi cua natyuhu tsi iin nyivi tsa ñaha ca tsinú vaha iñi tsi yu tyin javaha ñi tsa caquiñi, vaha ca cuhñi nyivi yuu yoso vee jucun ñi tan cujanehñi ñi tsi ñi tsitsi nu cunu ndutya ñuhu. 43 Tatun ndaha un javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca quihvi un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un. 44 Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. 45 Tatun tsaha un tan javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu.

46 Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. 47 Tun tinuu un javahá tsa ña vaha, çasi nu javahá can tacan. Tatun ña cuví, tava can tan javita un tyin vaha ca quihvi un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un. 48 Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

49 Maa tyin tandihi nyivi nyicún tsi yuhu, ñi tsa nyehé tundoho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñi. 50 Vaha xaan ñi. Maa tyin tun ndihi tsa uhva tsi, ña jandu uhva ca tsi tan ña cuví ca cuatyíñu nyivi itsi. Yacan cuenda nyooho, ña jandihí ndo tsa coo tuhun Nyoo añima ndo tyin cuví tsi tumaa ñi. Tyin tacan tan cuví coo taxin ndo tsihin tahan ndo.

10

Nu caahán ra Jesús tyin ña vaha nacoó rayi ñasihi ra (Mt. 19.1-12; Lc. 16.18)

1 Quita ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyivi nu nyíí ra, tacan tan quitsaha jacuahá ra tsi ñi tumaa tuhvá maa ra javahá. 2 Tacan tan natuhva juhva ra fariseo naha ra nu nyaá ra Jesús, tan nducú ra naha cuhva tyaa ra

naha cuatyí tsi ra. Tan tsicá tuhun ra naha tsi ra tatun vaha nacoó rayíi ñasihi ra. ³Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

⁴Tan nacahan ra naha tan catyí ra naha:

—Ra Moisés catyí ra tyin cuví cani ndi tutu cuenda ley ndi, tacan tan cuvi nacoó ndi ñasihi ndi —catyí ra naha tsihin ra.

⁵Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo.

⁶Maa tyin quivi jihna ñi, quivi javaha Nyoo tandihi maa tsa iyó, catyí nu tutu ra tyin javaha ra rayíi tan ñaha.

⁷“Yacan cuenda taahan tsi nacoó rayíi jutu ra tan sihi ra tan ndu iin ra tsihin ñasihi ra. ⁸Tan nduvi ñi cua cuvi ñi tumaa intuhun ña nyivi.”

Yacan cuenda ñavin ca uvi taahan ñi, tyin intuhun ña nyivi cua cuvi ñi. ⁹Yacan cuenda, ña cuví jasiin nyivi tsa jandu iin Nyoo —catyí ra Jesús tsihin ra naha.

¹⁰Yaha can tan cuanuhu ra nda yuvehe, tan quitsaha nducú tuhun nyico ra tsicá tsihin ra siqui tuhun can.

¹¹Tan catyí ra Jesús tsihin ra naha:

—Ra tsa cua nacoó ñasihi tan quihin ra inga ñaha, cua coo cuatyí ra nu Nyoo.

¹²Tacan tucu ñi ñaha: Tun nacoó ña tsi yí ña tan tindaha ña tsihin inga rayíi, juvin ñi

cua coo tucu cuatyí ña —catyí ra Jesús.

Nu nasoco ra Jesús tsi tsa nyihi

(Mt. 19.13-15; Lc. 18.15-17)

¹³Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsaha cuxaán ra naha tsi nyivi cuahán cuandacá tsa nyihi. ¹⁴Maa tyin tsa nyehe ra Jesús tsa javahá ra naha tacan, cuxaan ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña casi ndo itsi naha tsi tyin nyivi ndacá ñaha Nyoo cuví ñi tumaa cuví tsa nyihi tyin tsinú iñi ñi tsi Nyoo. ¹⁵Tan tsa nditsa catyí yu tsihin ndo tun ña cuita iñi nyivi tsi Nyoo tumaa nyitá iñi iin ra luhlu tsi jutu ra, ña cua cuvi quihvi ñi nu ndacá ñaha Nyoo —catyí ra Jesús tsihin ra naha.

¹⁶Tacan tan quihin ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

Nu tsaha cuenda ra Jesús tyin yí xaan nacuhva cuenda iin ra cuca tsi ra tsi Nyoo

(Mt. 19.16-30; Lc. 18.18-30)

¹⁷Yaha yacan tan cuahán ra Jesús. Tan tsinú xaan iin rayíi cuahán ra cuanyicún ra tsi ra. Tsa tahan ra tsi ra, tsicuiñi tsi ti ra nuu ra, tan

tsicá tuhun ra tsi ra, tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa? —catyí ra tsihin ra Jesús.

¹⁸ Tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi ra vaha iyó tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu. ¹⁹ Yooho tsitó un tsa catyí Nyoo tyin javaha yo: “Ña coo inga ñaha tsi un. Ña cahñi un nyivi. Ña suhu un. Ña cahan un cuendu. Ña jandavi ñaha un tsi nyivi. Tyaa yahvi tsi jutu un tan tsi sihi un” —catyí ra Jesús tsihin ra.

²⁰ Nacahan ra tan catyí ra:

—Maestro, tandihi tuhun ihya tan tyaá yahvi yu itsi nda ndi luhlu yu tan nda cuanda vityin —catyí ra.

²¹ Tacan tan sii cuñi ra Jesús nyehé ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandihi tsa iyó tsi un, tan cuhva un xuhun can tsi nyivi ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyivi tsi un —catyí ra Jesús tsihin ra.

²² Tsa tsiñi ra tyuvaa can tsa cahan ra Jesús tacan, cui-ihya xaan cuñi ra cuví, tan tsihin tucuiihya iñi cuanuhu ra yuvehe ra tyin cuca xaan ra.

²³ Tacan tan nanyehe ra Jesús nanii canduvi nu nyaá ra, tan catyí ra tsihin ra tsicá tsihin ra:

—¿Yii xaan tan cuvi nacuhva cuenda nyivi cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

²⁴ Tsa tsiñi ra tsicá tsihin ra tsa caahán ra, iyo xaan cuñi ra naha cuví. Maa tyin catyí tucu ra tsihin ra naha inga tsaha:

—¿Sehe yu, nyivi tyaá xaan jiñi tandihi tsa cuca, yii xaan tan quihvi ñi nu ndacá ñaha Nyoo! ²⁵ Yatyí ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra Jesús.

²⁶ Tsa tsiñi ra naha tuhun ihya, iyo xaan cuñi ra naha cuví, tan quitsaha tsicá tuhun tahan ra naha, tan catyí ra naha:

—Tun tacan, ¿yóo cua cacu? —catyí ra naha.

²⁷ Tacan tan nanyehe ra Jesús tsi ra naha tan catyí ra tsihin ra naha:

—Nyivi ña cuví javaha ñi tsehe, maa tyin Nyoo cuví javaha ra tyin tsa cuenda Nyoo nduve maa tsa yii.

²⁸ Tacan tan catyí ra Pedro tsihin ra:

—Jutu Mañi yu, tandihi maa tsa iyó tsi ndi nacoq ndi can tan nyicún ndi tsi un.

²⁹ Nacahan ra Jesús tan catyí ra:

—Tsa nditsa catyí yu tsihin ndo tyin tandihi nyooho tan tandihi inga ca nyivi tsa cua nacoo vehe, o yañi, o cuhva,

o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyivi tyin cuñí Nyoo jacacu ra tsi ñi, ³⁰ cua ñihi ñi cientu ca tsaha siqui tsa nacoo ñi nu ñuhu ñayivi ihya. Cua ñihi ñi vehe, cua ñihi ñi nyivi cua cuvi yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyivi tundoho tsi ñi. Tan nu inga ñuhu ñayivi tsa tsa vatsí, cua ñihi ñi ñayivi nyito tsa ña cua naa maa coo ñi. ³¹ Cuaha ñi nyivi cuahán ityi nuu vityin, cua cuhun ñi nda nu ndihi ña. Tan nyivi cuahán nu ndihi ña vityin, cuaha ñi cua cuhun ityi nuu —catyí ra Jesús.

Nu jacotó nyico ra Jesús nácaa cua cahñi nyivi tsi ra
(Mt. 20.17-19; Lc. 18.31-34)

³² Tsa tsa cuñí cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandihi nyivi tsa cuahán cuanyicún tsi ra. Iyo xaan cuñí ñi tan tsihin tsa yuhví ñi cuahán ñi. Tacan tan tava siin ra tsi tsa utsi uvi ra tsicá maa tsihin ra. Tan quitsaha catyí tuhun ra tsihin ra naha tsa cua tahan ra. ³³ Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyivi tsi yuhu, Rayi quee nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyí ra naha

tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra. ³⁴ Cua vacu nducu ra naha tsi yu, cua cañi ra naha tsi yu, cua tivi si ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

Nu tsicán ra Jacobo tan ra Juan iin tumañi iñi tsi ra Jesús
(Mt. 20.20-28)

³⁵ Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

³⁶ Tacan tan tsicá tuhun ra Jesús tsi ra naha tan catyí ra:

—¿Náa cuñí ndo javaha yu?

³⁷ Tan nacahan ra naha tan catyí ra naha:

—Cuñí ndi tsa cuhva un cunyecu ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

³⁸ Tacan tan catyí ra Jesús tsihin ra naha:

—Nyooho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

³⁹ Tan nacahan ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu. ⁴⁰ Maa tyin tsa cunyaa iin ndo xiin cuaha yu tan iin ndo xiin

satyin yu, ñavin yuhu taahán tsi cuhva yacan, tyin maa Nyoo cua catyí yóo cua ñihi can —catyí ra Jesús tshin ra naha.

⁴¹ Tsa tsiñi tsa utsi ca ra tsicá tshin ra Jesús yacan, cuxaan ra naha tsi ra Jacobo tan ra Juan. ⁴² Maa tyin cana ra Jesús tsi ra naha tan catyí ra tshin ra naha:

—Tsa tsitó ndo tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. ⁴³ Maa tyin ñavin tacan taahán tsi javaha nyooho tyin ra tsa cuñi cuvi ra cahnu ityi nuu Nyoo, cuñi tsi cuvi ra musu tandihi ndo. ⁴⁴ Tan nyooho tsa cuñi cuvi ityi nuu, cuñi tsi cuvi ndo musu tandihi ca ndo. ⁴⁵ Tyin yuhu, Rayi tsa quee nda gloria, ña vatsí yu tyin cuñi yu jatyinyee nyivi tsi yu. Yuhu vatsí yu vatsí jatyinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

Nu jananyehę ra Jesús tsi ra Bartimeo
(Mt. 20.29-34; Lc. 18.35-43)

⁴⁶ Tacan tan tsaą ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tshin ra tsicá tshin ra, cuaha nyivi cuahán cua nyicun tsi ra naha. Tan ityi yaha ra naha nyaá iin ra cuaa nañi Bartimeo, sehe ra Timeo, tsicán ra caridaa. ⁴⁷ Tan cuhva tsa tsitó ra cuaa can tyin tsa cua cuyatyin yaha ra Jesús, ra ñuu

Nazaret, nu nyaá ra, quitsaha caná tsa ra, tan catyí ra:

—¡Jesús, tata ra David, cundaahvi iñi tsi yu! —catyí ra caná tsa ra.

⁴⁸ Tacan tan quitsaha cuxaan nyivi tsi ra tan catyí ñi tshin ra na cutaxin ra, maa tyin cuñihí ca ra caná tsa ra tan catyí ra:

—¡Tata ra David, cundaahvi iñi tsi yu! —catyí ra.

⁴⁹ Tacan tan tsicuiñi ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tshin ra:

—Jandu iin iñi un. Nduvita, cohon tyin caná ra tsi un —catyí ra naha tshin ra.

⁵⁰ Tacan tan janeñi ra jahma ndasi ra nda sava. Tan cuahan ra iin yaha ñi nda nu nyaá ra Jesús. ⁵¹ Tacan tan tsicá tuhun ra Jesús tsi ra:

—¿Náa cuñi un javaha yu?

Tan nacahan ra cuaa can tan catyí ra:

—Maestro, cuñi yu janduvaha un tinuu yu na nanyehe nyico yu —catyí ra.

⁵² Tan catyí ra Jesús tshin ra:

—Cuanuhu. Tsa nduvaha un tyin tsinú iñi un tsi yu.

Juvin ñi cuhva can tan nanyehe ra can. Tan cueta cuahán ra cuanyicún ra tsi ra Jesús.

11

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Tsa tsa cuñi tsa ra Jesús tan nyivi nyicún tsi ra nda ñuu Jerusalén, yatyin nu canyí ñuu Betfagé tan ñuu Betania, tan yatyin ñi yucu nu iyó yutun Olivo, tan catyí ra Jesús tshin uvi ra tsicá tshin ra:

² —Cuaahan ndo ñuu tsa canyí ityi nuu ihya. Tsa tsa ndo ican cua nañihi ndo iin urru. Quiti yoco cuví ti, nyaá ti nuuhñi ti, tan ñaha ca quihí tyayu ti. Ndati ndo tsi ti, tan quihin ndo tsi ti quitsi ndaca ndo tsi yu. ³ Tatun cusana ndaca tuhun nyivi tsi ndo: “¿Nacuu ndo urru ihya?” Tacan tan catyi ndo tshin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyi ndo tshin ñi —catyí ra Jesús tshin ra naha.

⁴ Tacan tan cuahán ra naha, tan tsa tsaá ra naha, nañihi ra naha urru can nuuhñi ti tsitsi ityi tsata yuhu iin cora. Tan ndatsi ra naha tsi ti. ⁵ Tan catyí juhva ra yucú ican naha ra tshin ra naha:

—¿Náa javahá ndo? ¿Nacuenda ndatsi ndo urru can? —catyí ra naha tshin ra naha.

⁶ Tacan tan nacahan ra naha tumaa cahan ra Jesús tshin ra naha. Tan tsaha ra can naha ra quihin ra naha urru can. ⁷ Tacan tan tsindaca ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti. ⁸ Tan tsaquin cuaha nyivi jahma ñi tsitsi ityi nu yaha ra, tan inga ñi tsahnya ñi ndaha yutun tan tsaquin ñi tsitsi ityi.

⁹ Tacan tan nyivi tsa cuahán ityi nuu ra tan ityi tsata ra, quitsaha caná tsa ñi tan catyí ñi:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsi Nyoo! ¹⁰ ¡Na jacahnu yo tsi ra vatsi cundaca ñaha tumaa tsindaca ñaha ra David, tsii tsaahnu yo! ¡Cahnu xaan cuví ra nyaá gloria! —catyí ñi.

¹¹ Tacan tan quihvi ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yaha nyehe ra tandihi tsa iyó nuquehe vehe ñuhu can, cuahán ra ñuu Betania tshin tsa utsi uvi ra tsicá tshin ra tyin tsa cueñi xaan.

Nu cahan ra Jesús tsi yutun higo tsa ña tsahá tsiti (Mt. 21.18-19)

¹² Tsa tuvi inga quivi tsa quita ra Jesús tan ra tsicá tshin ra ñuu Betania, tsaá soco tsi ra Jesús. ¹³ Tsa quita ra naha ndasava nyehe ra Jesús nu nyaá iin yutun higo tsa iyó numa. Tsahan ra tsinyehe ra tun iñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi cuhva tun tsiti. ¹⁴ Tacan tan cahan ra Jesús tsi tun, tan catyí ra:

—Ndi iin sava ca quivi ña cua quee ca tsiti catsi nyivi nuu un —catyí ra tshin tun.

Tan tsiñi ra tsicá tshin ra tsa caahan ra.

Nu jacunu ra Jesús nyivi xico nuquehe vehe ñuhu cahnu (Mt. 21.12-17; Lc. 19.45-48; Jn. 2.13-22)

15 Tsa tsaꞗ ra naha ñuu Jerusalén, cuahán nyico ra Jesús vehe ñuhu cahnu tan quitsahꞗ jacunú ra nyivi xicó tan jatá tsa yucú nuquehe yuvehe ñuhu can. Janduvaꞗ ra mesa nu nyecú nyivi samá xuhun nyivi. Tan janduvaꞗ tucu ra tyayu nu nyecú nyivi xicó paloma. 16 Tan ña tsaꞗ ca ra yaha sava ñi nuquehe vehe ñuhu can tsihin ndaha tyiñu. 17 Tan quitsahꞗ jacuahá ra tsi nyivi, tan catyí ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé naniñi nu ñuhu ñayivi tsi Nyoo”? Tan nyooho jananduvi ndo itsi vehe ñasuhu —catyí ra tsihin ñi.

18 Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsahꞗ nducú ra naha cuhva cahñi ra naha tsi ra tyin yuuhví ra naha nyehe ra naha tsi ra tsa cuenda tsa janahá ra tsi nyivi tan yuuhví tucu ra naha tyin tsa cuaha xaan nyivi nyicún tsi ra. 19 Maa tyin tsa tsa cuñí cuaa, quitꞗ ra Jesús ñuu can tsihin ra tsicá tsihin ra.

*Nu na ityi yutun higo
(Mt. 21.20-22)*

20 Tsa tuvi inga quivi, yaha nyico ra naha nu nyaá yutun higo tsa cahan ra Jesús. Tan nyehe ra naha tyin na ityi tun tan nda cuanda yoho tun na ityi. 21 Tacan tan tsa nyehe ra Pedro yutun higo can, nducuhun iñi ra tsa javahꞗ ra

Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahan un —catyí ra.

22 Nacahan ra Jesús, tan catyí ra:

—Tsinu iñi ndo tsi Nyoo. 23 Tyin tsa nditsa catyí yu tsihin ndo tyin nyivi cua cahan tsihin yucu ihya tyehen: “Cuatsiyo ihya tan cuaahan tsitsi ndutya ñuhu”, tan tatun tsinú iñi ñi tyin cua cundaa tsa cahan ñi tan ña uvi tsicá iñi ñi, cua cundaa tsi. 24 Yacan cuenda catyí yu tsihin ndo tyin tandihí tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihin cuenda ndo can, cua naquihin ndo can. 25 Tan tsa cua ndacan tahvi ndo tsi Nyoo, tun nducuhún iñi ndo tyin xaan cuñí ndo tsihin nyivi, jaha ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo. 26 Maa tyin tun ña jaha ndo tucahnu iñi tsi nyivi, ndi Jutu ndo, ra nyaá gloria, tan ña cua jaha ra tucahnu iñi tsi maa ndo.

Nu tsicꞗ tuhun ra cumí tyiñu vehe ñuhu naha ra tsi ra Jesús yóo tavaꞗ tyiñu tsi ra tsa cahan ra tsihin nyivi

(Mt. 21.23-27; Lc. 20.1-8)

27 Tacan tan tsaꞗ nyico ra naha ñuu Jerusalén. Tsa nyí ra Jesús tsicá nuu ra nuquehe vehe ñuhu cahnu, natuhvaꞗ ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi

nyivi Israel naha ra nu nyaá ra. ²⁸ Tan tsicá tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

²⁹⁻³⁰ Tan nacahan ra Jesús, tan catyí ra:

—Cuñí tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo o nyivi? Tatun catyi tuhun ndo tsihin yu yóo jaquitsi tsi ra, cua catyi tuhun tucu yuhu tsihin nyooho yóo tava tyiñu tsi yu javahá yu tyehen —catyí ra Jesús tsihin ra naha.

³¹ Tacan tan quitsaha caahán yuhu tahan ra naha, tan catyí ra naha:

—Tun catyi yo tyin Nyoo jaquitsi tsi ra Juan, cua catyi ra tsihin yo tyehen: “Tun Nyoo jaquitsi tsi ra, ¿nacuenta ña tsinu ñi ndo tsa cahan ra?”

³² ¿A vaha tun catyi yo tyin nyivi jaquitsi tsi ra? Ña cuvi —catyí ra naha, tyin yuuhvi ra naha tsi nyivi, tyin tandihi ñi tan tsinú ñi ñi tyin ndusu yuhu Nyoo cuví ra.

³³ Tacan tan catyí ra naha tsihin ra Jesús:

—Ña tsitó ndi.

Tacan tan catyí ra Jesús tsihin ra naha:

—Tun ña tsitó ndo, ndi yuhu tucu, tan ña cua catyi tuhun yu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

12

Nu caahán ra Jesús tuhun ra ña vaha jaha tyiñu

(Mt. 21.33-46; Lc. 20.9-19)

¹ Tacan tan quitsaha caahán ra Jesús tsihin ra naha tsihin cuhva ihya, tan catyí ra:

—Tsiocoq iin rayi tsa tatsi yoho yucu vixi tsa nañi uva, ra ican tyasi ra iin cora nani canduvi nu tatsi ra yucu vixi can. Tan javahá ra iin nu cua tava ra ndutya uvas can. Tan javahá tucu ra iin vehe sucun tyin tacan tan cuvi jaha cuenda ra nani cahnu nu ndaha tyiñu ra.

’Tsa yaha yacan tan tsaha nuu ra ñuhu can tsi juhva rayi tyin jaha tyiñu ra naha tsihin tsi. Tacan tan cuahán ra inga ñuu. ² Tsa tahan tsi quivi iyó uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra.

³ Maa tyin ra ican naha ra tñin ra naha tsi ra. Tan cañi ra naha tsi ra. Tan jacunuhu ra naha tsi ra tsihin ndaha ndi ra. ⁴ Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cahan nyaa ra naha tsi ra.

⁵ Tsitoho ñuhu can jacuhun nyico ra inga musu. Tan tsahñi ra naha tsi ra. Yaha yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

⁶ ’Tan cumañi intuhun ña ra tsa cuví jacuhun ra. Tan

ra ican cuví sehe ra tsa cuñí xaan ra. Nu ndihi tuhun jacuhun ra sehe ra tyin cuñí maa ra tsicá iñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuví ra”, cuñí ra. ⁷ Maa tyin tsa nyehe ra jahá tyiñu can naha ra tsi ra sehe ra, natuhun tahan ra naha tan catyí ra naha: “Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tsihin can”, catyí ra naha. ⁸ Tacan tan tiñ ra naha tsi ra tan tsahñi ra naha tsi ra. Tan tavá ra naha cuñu ñuhu ra ityi tsata cora can —catyí ra Jesús.

⁹ Tacan tan tsicá tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can. ¹⁰ ¿A ñaha ca cahví ndo nu tutu Nyoo nu catyí tsi tyehen?

Yuu tsa javita ra javahá vehe naha ra,
yacan cuví yuu tsa tsiñi ñuhu ca.

¹¹ Maa Nyoo Jutu yo jaha tsa cahnu ca cuví yuu ihya. Tan iyo xaan cuñí yo nyehé yo can, catyí tsi—catyí ra Jesús tsihin ra naha.

¹² Tacan tan ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducu ra naha cuhva tyihi ra naha tsi ra Jesús vehe caa tyin tsitó ra naha tyin tuhun

maa ra naha caahán ra tsa tsatyíñu ra cuhva can. Maa tyin ña tiñ ra naha tsi ra tyin yuuhví ra naha nyehe ra naha tsi nyivi. Nacoq ra naha tsi ra, tan cuahán ra naha.

Nu caahán ra Jesús siqui tuhun tsa tyahví nyivi xuhun tsi ra ñuu Roma tsa ndacá ñaha tsi nyivi Israel

(Mt. 22.15-22; Lc. 20.20-26)

¹³ Tacan tan jacuhun ra naha juhva ra yihi cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahan ra Jesús iin tsa ña vaha tyin tacan tan cuví tyaa ra naha cuatyí tsi ra. ¹⁴ Tsa tsaq ra can naha ra tan quitsaha caahán ra naha tsihin ra Jesús tan catyí ra naha:

—Maestro, tsitó ndi tyin tsa nditsa caahán un. Tan inducu ñi cuñí un nyehe un nyivi cuca tan nyivi ndaahvi. Tan nditsa tyin ityi Nyoo janahá un. Yacan cuenda cuñí ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

¹⁵ Tan tsitó ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Nḁaca ndo iin xuhun tsi yu ihya, na nyehe yu —catyí ra.

¹⁶ Tsindaca ra naha xuhun can tsi ra. Tsa nyehe ra can

tan tsicā tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

¹⁷ Tacan tan catyí ra Jesús tsihin ra naha:

—Tun tacan, cūhva ndo tsa tsii ra ndacá ñaha tsi ra, tan cūhva ndo tsa tsii Nyoo tsi Nyoo —catyí ra Jesús tsihin ra naha.

Tan iyo xaan cuñí ra naha tsihin tsa nacahan ra.

Nu cuñi ra saduceo naha ra jandavi ñaha ra naha tsi ra Jesús

(Mt. 22.23-33; Lc. 20.27-40)

¹⁸ Tacan tan cuahán juhva ra saduceo naha ra nu nyii ra Jesús. Tan ra saduceo can naha ra catyí ra naha tyin ña cua nandoto nyivi. Yacan cuenda cahān ra naha tyehen tan catyí ra naha tsihin ra Jesús:

¹⁹ —Maestro, ra Moisés tyaa ra nácaa taahán tsi javaha yo tatun iin rayii tsihi tan ndoo ñasiihi ra tan nduve sehe ña tsicoo tsihin ra. Catyí ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi. ²⁰ Iin tsaha iin rayii tsicoo utsa sehe yii ra. Ra tsa jihna ñi tindaha ra tsihin iin ñaha, maa tyin nduve sehe ra tsicoo tsihin ña, tan tsihi ra. ²¹ Tacan tan tindaha ra yañi ra tsa tsinu uvi tsihin ñaha

tsa ndoo can. Maa tyin juvin ñi ña tsicoo sehe ra tsihin ña tan tsihi ra. Juvín ñi tacan tahān tucu ra tsa tsinu uñi. ²² Tandihī tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoo sehe ra naha tsihin ña. Tan nu ndihī tuhun, tsihi ndihī maa ña. ²³ Tan vityin, tun nditsa tsa cua nandoto nyivi, ndaa tsa utsa taahan ra can naha ra cua cuvi yii ña quivi cua nandoto ñi? Tyin tandihī maa ra naha tan tindaha ra naha tsihin ña —catyí ra naha tsihin ra Jesús.

²⁴ Tacan tan nacahan ra Jesús tan catyí ra tsihin ra naha:

—Caahán soho ñi maa nyooho, tyin ña tsitó ndo tsa catyí tuhun Nyoo, tan ndi ña tsitó ndo nácaa tsa cahnu cuvi tunyee iñi tsa iyó tsi Nyoo.

²⁵ Quivi cua nandoto nyivi, ndi ña cua tindaha ñi tan ndi ña cua tindaha sehe ñi, tyin cua cuvi ñi tumaa ángel iyó gloria. ²⁶ Tan tuhun tsa cua nandoto nyivi, ¿a ñaha ca cahvi ndo nu libru tsa tyaa ra Moisés nu catyí tsi nácaa cahān Nyoo tsihin ra nu cayú yutun iñu? Tyin catyí ra tsihin ra tyehen: “Yuhu cuvi Nyoo ra Abraham, ra Isaac, tan ra Jacob”, catyí Nyoo tsihin ra Moisés. ²⁷ Ihya nyehé yo tyin nyito añima ra can naha ra vasu ndi maa tsanaha tsihi ra naha tyin Nyoo ñavin Nyoo nyivi tsihi cuvi ra, tyin Nyoo cuvi ra Nyoo nyivi nyito. Yacan cuenda catyí yu tyin nyooho caahán soho ñi maa ndo

—catyí ra Jesús tsihin ra naha.

Ley tsa ñiñi ca tsa tsaha Nyoo

(Mt. 22.34-40)

²⁸ Ña naha ñi tan tsaḷ iin ra maestro cuenda ley vehe ñuhu, tan tsiñi ra tsa caahán ra Jesús tsihin ra saduceo can naha ra. Tan cuhva tsa tsito ra tyin ra Jesús vaha nacahan ra tsihin ra naha, tsicḷ tuhun ra tsi ra tan catyí ra:

—Tsitsi tsa tandihi ley, ¿ndáa tsa ñiñi ca cuñi tsi javaha yo? —catyí ra.

²⁹ Tan nacahan ra Jesús tan catyí ra:

—Ley tsa jihna ñi tan ñiñi ca cuñi tsi javaha yo tsa nuu tandihi ley, cuví ley ihya: “Nyooho nyivi Israel, tyaa soho ndo: intuhun ñi maa Nyoo Jutu yo iyó. ³⁰ Cuñi ndo tsi Jutu Mañi yo Nyoo tsihin tsa ñi ñi ndo, tan tsihin tsa ñi ñi añima ndo, tan tsihin tandihi tsa tsiñi tuñi jiñi ndo, tan tsihin tandihi tunyee ñi tsa iyó tsi ndo.” Ley ihya cuví tsa ñiñi ca tan tsa jihna ñi taahán tsi javaha yo. ³¹ Tan tsa tsinu uvi tsa yatyin inducu ñi caahán tsi tsihin tsa jihna ñi tan catyí tsi tyehen: “Cuñi tahan ndo tsi ndo tumaa cuñi ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyí ra Jesús.

³² Tacan tan ra maestro cuenda ley can catyí ra tsihin ra:

—Vaha xaan nacahan un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó.

³³ Tan tsa cuñi yo tsi Nyoo tsihin tsa ñi ñi yo, tan tsihin tandihi tsa tsiñi tuñi jiñi yo, tan tsihin tsa ñi ñi añima yo, tan tsihin tandihi tunyee ñi iyó tsi yo, tan tsa cuñi tahan yo tsi yo tumaa cuñi yo tsi maa yo, tandihi yacan tan cahnu ca cuví can tan ñavin ca tsa jamañi yo tsi Nyoo, tsa tsahñi yo quití tan tsahmí yo can nu altar —catyí ra maestro cuenda ley can tsihin ra Jesús.

³⁴ Tsa nyehe ra Jesús tyin vaha nacahan ra tsihin tsa catsi jiñi ra, tan catyí ra tsihin ra:

—Luxu cuii ña tan ñihi un cuhva nácaa nacuhva cuenda un añima un tsi Nyoo na cundaca ñaha ra tsi un —catyí ra Jesús tsihin ra.

Ndi intuhun ca maa nyivi tan ña canḷ ca ñi ñi ndaca tuhun ñi náa ndaca tuhun ñi tsi ra Jesús.

Ra Cristo Sehe Nyoo tsi ra tanjuvin ñi cuví tucura tata ra David

(Mt. 22.41-46; Lc. 20.41-44)

³⁵ Jacuahá ra Jesús tsitsi vehe ñuhu cahnu, tan catyí ra:

—¿Nacuenda tyin catyí ra maestro cuenda ley vehe ñuhu naha ra tyin tata ra David cuví ra Cristo? ³⁶ Tan juvin ñi maa ra David catyí tuhun ra Cristo tyehen:

Nyoo cahan ra tsihin Jutu Mañi yu, tan catyí ra:

“Cunyaa xiin cuaha yu ihya nda cuanda caquin yu tsi ra xaan ñi tsi un naha ra tsaha un”, catyí ra David tahan

tsanaha jahā Tatyī Ii Nyoo.

³⁷ ¿Nacaa cuví cuú tucu ra Cristo tata ra David, tan juvin ñi maa ra David catyī tyin ra Cristo cuví Jutu Mañi ra? —catyí ra Jesús.

Tan cuaha nyivi yucú tyaá soho tsa caahán ra tan sii xaan cuñí ñi.

Nu caahán ra Jesús tyin iyó cuaha cuatyī ra maestro cuenda ley vehe ñuhu naha ra

(Mt. 23.1-36; Lc. 11.37-54; 20.45-47)

³⁸ Quitsaha jacuahá ra Jesús tan catyí ra tyeheh:

—Jaha ndo cuenda tsi ndo tsihin ra maestro cuenda ley vehe ñuhu naha ra, tyin taahán xaan iñi ra naha cunditsí ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva ndo nacumi tsi ra naha. ³⁹Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha ca cunyecu ra naha.

⁴⁰ Tan quihín nyaá ra naha vehe ñi ndaahvi tsa tsihi yii tyin ña cuví tyahvi ñi xuhun tsa tsicán ra naha tsi ñi. Tan cuñí ra naha tsa vaha cahan nyivi tuhun ra naha. Yacan cuenda naha tsicán tahvi ra naha tsi Nyoo nu tui nyivi. Maa tyin nduve náa catyí javahá ra naha tacan tyin ñihi ca cua tatsi tuñi Nyoo tsi ra naha —catyí ra Jesús.

Tsa tsaha ñaha ndaahvi tsihi yii

(Lc. 21.1-4)

⁴¹ Iin tsaha nyii ra Jesús tsitsi vehe ñuhu cahnu tan nyaá ra yatyin ñi nu nyii tsatun nu tyihí nyivi xuhun tsa tsahá ñi tsi Nyoo. Tan nyehé ra nu tyihí nyivi xuhun tsitsi tsatun can. Tan cuaha nyivi cuca tyihí ñi cuaha xaan xuhun. ⁴² Tsitsi tsa nyaá ra ican tsaq iin ñaha ndaahvi tsihi yii, tan tyihí ña uvi taahan ñi xuhun nyihi tsa caaha xaan nyaá. ⁴³ Tacan tan cana ra Jesús tsi ra tsicá tsihin ra, tan catyí ra tsihin ra naha:

—Tsa nditsa catyí yu tsihin ndo tyin nuu Nyoo cuaha ca xuhun tsaha ñaha ndaahvi ihya tan ñavin ca inga nyivi. ⁴⁴ Tyin tsahá ñi tsa ndoo siqui xuhun ñi. Maa tyin ñaha ihya tyihí ña tandihi tsa iyó tsi ña —catyí ra Jesús.

13

Nu caahán ra Jesús tyin cuatani vehe ñuhu cahnu

(Mt. 24.1-2; Lc. 21.5-6)

¹ Cuhva tsa cua quita ra Jesús tsitsi vehe ñuhu cahnu can, iin ra tsicá tsihin ra catyí ra tsihin ra:

—¡Maestro, nyehé jihna tsa sii caá yuu yihí vehe ihya! ¡Nyehé tsa nahnu vehe ihya! —catyí ra tsihin ra Jesús.

² Maa tyin nacahan ra Jesús, tan catyí ra tsihin ra:

—Nditsa nahnu vehe ihya tan sii caá tsi nyehé yo vityin. Maa tyin catyí yu tsihin un tyin coo quivi nduve ca maa náa cua ndoo ihya. Ndi in-tuhun yuu tan ña cua coso tahan tsi tsihin inga tsi, tyin

tandihí maa tsi tan cua tani tsi
—catyí ra Jesús.

*Nu tsahá cuenda ra Jesús
náa cua cuvi tsa ndi cumañi ca
naa ñuhu ñayivi*

(Mt. 24.3-28; Lc. 21.7-24;
17.22-24)

³ Tacan tan cuahán ra Jesús
tsihin ra tsicá tsihin ra yucu
yutun Olivo tsa canyí inga
tsiyo nu nditsin nyehé tsi
vehe ñuhu cahnu. Tsa tsinyaa
ra Jesús ican, ra Pedro, ra Ja-
cobo, ra Juan, tan ra Andrés
tsicá tuhun xeehe ra naha tsi
ra tan catyí ra naha:

⁴ —Cuñí ndi tsa catyi
tuhun un tsihin ndi ama cua
cuví tandihí tsa cahan un.
¿Nacaa tan coto ndi tatun tsa
cuyatyn cundaa tandihí can?
—catyí ra naha.

⁵ Nacahan ra Jesús tan catyí
ra:

—Jaha ndo cuenda tsi ndo
coto jandavi ñaha nyivi tsi
ndo. ⁶ Tyin cuaha xaan nyivi
cua quitsi, tan cua cuatyíñu
ñi sivi yu, tan cua catyí ñi:
“Yuhu cuví ra Cristo, ra tsa
jaquitsi Nyoo.” Tan cuaha
xaan nyivi cua jandavi ñaha
ñi.

⁷ Maa tyin tun ñihi tuhun
ndo tyin iyó cuatyí tan cañí
tahan nyivi ityi can tan ityi
ihya, ña nayuhvi ndo tyin
tacan taahán maa tsi cuvi
tsa ndi cumañi ca naa ñuhu
ñayivi. ⁸ Tyin nyivi iin ñuu
cua cañi tahan ñi tsihin nyivi
inga ñuu, tan cua coo cuatyí
iin ñuu tsihin inga ñuu. Tan
cuaha ñi ityi cua taan ñihi,
tan cua coo tama, tan cua
nduvaa nyivi. Vasu ndi maa
nyehe nyivi tundoho ihya, ña

cua naa naha ñuhu ñayivi tyin
ndi nyaa ca cua nyehe ñi tun-
doho.

⁹ Maa tyin jaha ndo
cuenda tsi ndo tyin cua cuhva
cuenda nyivi tsi ndo tsi ra
cumí tyiñu naha ra. Tan cua
cañi ñi tsi ndo tsitsi vehe
ñuhu. Cua cuhva cuenda
ñi tsi ndo tsi ra cumi tyiñu
tan tsi ra cuví rey tsacatyí
yuhu. Tyin tacan tan cuvi
cahan ndo tuhun yu nuu ra
naha. ¹⁰ Tyin tsa ndi cumañi
ca naa ñuhu ñayivi, cuñí tsi
coto tandihí nyivi inga ñuu
tyin Nyoo jacacú ra tsi nyivi.
¹¹ Tan cuhva tsa cua cundaca
ñi tsi ndo nuu ra cumi tyiñu
naha ra, ña caca iñi ndo náa
cua cahan ndo. Tyin juvin ñi
maa hora can tan cua cuhva
Nyoo tsa cahan ndo. Tyin
ñavin maa ndo cua cahan;
tyin maa Tatyí Ii Nyoo cua
cahan. ¹² Yihí ra naha cua
nacuhva cuenda ra naha
juvin ñi maa yañi ra naha
tan cua ndacan ra naha tsa
cúu ra can naha ra. Yihí nyivi
cua nacuhva cuenda ñi juvin
ñi maa sehe ñi. Tan yihí ñi
cua nacuhva cuenda ñi nda
cuanda jutu ñi tan sihi ñi tyin
cúu ñi. ¹³ Tandihí nyivi iyó
nu ñuhu ñayivi ndasi cua cuñi
ñi nyehe ñi tsi ndo tsacatyí
yuhu. Maa tyin nyooho tsa
cua cunyeet iñi tsinú iñi tsi yu
nda nu ndihí, cua cacu ndo.

¹⁴ Tandihí nyooho tsa
cahví nu tutu Nyoo nu tyaa
ra Daniel, ra cuví ndusu
yuhu Nyoo tsa tsicoo tahan
tsanaha, cūtuñi iñi ndo tyin
iyó tsa janducaquiñi tan tsa
jativi. Quivi tsa nyehe ndo

tyin tsa nyíi yacan nu ña taahán tsi cunyii can, nyooho nyívi iyó Judea, quita ndo ñuu ndo tan cuhun ndo ityi yucu. ¹⁵ Nyooho tsa cua cuyucu jiñi vehe quívi can, cua nuu ndo, maa tyin ña cua nuu ndo tsa quíhvi ndo tsitsi vehe ndo tan tava ndo tsa iyó tsi ndo. ¹⁶ Nyooho tsa cua cuyucu tsitsi cuhu, ña cua cunuhu jihna ndo cuquihin ndo jahma ndo. ¹⁷ ¡Ndahvi ñiñaha tsa ñuhú sehe quívi can! ¡Tan ndahvi ñi iyó sehe lee tsa ndi tyaxín! ¡Ndahvi ñi! ¹⁸ Ndaçan tahvi ndo tsi Nyoo na ña tahan tsi cunu ndo quívi vitsin. ¹⁹ Tyin tundoho tsa cua nyehe nyívi quívi can, ñaha ca maa coo can ndaha tsinu maa ñuhu ñayívi nda cuanda vityin. Tan ndi ityi nuu ca tan ña cua nyehe nyívi tahan tundoho can inga tsaha. ²⁰ Tun tsatyin Jutu Mañi yo tan ña jandihí ra tsa cua nyehe yo tundoho quívi can, yoñi maa cua cacu. Maa tyin cua jandihí ra can tsa cuenda tsa cuñi ra tsi nyívi yihí cuenda ra, nyívi nacatsi vaha maa ra.

²¹ "Tatun catyi nyívi tsihin ndo: "Jihna ndo, ihya nyaá ra Cristo" o "Nyehe ndo, ican nyaá ra Cristo", ña tsinu iñi ndo. ²² Tyin cua quitsi nyívi jandavi ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyívi nacatsi maa

Nyoo, tatun cunyehe ñi javaha ñi tacan. ²³ Maa tyin nyooho jaha cuenda vaha ndo tsi ndo vityin tsa tsa tsitó ndo tandihí yacan tsa ndi cumañi ca tahan tsi quívi can —catyi ra Jesús.

Nu jacoto ra Jesús nácaa cua quitsi nyico ra inga tsaha (Mt. 24.29-35, 42-44; Lc. 21.25-36)

²⁴ Tan catyi nyico ra Jesús tyehen:

—Maa tyin tsa cua yaha nyehe nyívi tundoho quívi can, cua ndunaa ñicanyii, yoo ña cua jandunditsin ca tsi, ²⁵ tan cua cucoyo tiñuu. Tan tandihí tsa iyó andívi tan cua nacanda tsi naha tsi. ²⁶ Tacan tan cua nyehe ndo tsi yuhu, Rayii tsa quee nda gloria, vatsí yu nu vico tsihin tunyee iñi cahnu tan tsihin tsa cahnu cuví Nyoo. ²⁷ Tan cuaha ángel cuenda yu cua jaquitsi yu tyin jandu iin ra naha nyívi nacatsi maa Nyoo. Cua quita ñi nanii cahnu nu ñuhu ñayívi, nda nu ndihí ñuhu ñayívi tan nda nu ndihí andívi.

²⁸ Cutuñi iñi ndo cuhva iyó yutun tsa nañi higo: Tun tsa nduyutyá soco tun tan cana ndaha yutya tun, tsitó ndo tyin tsa cua quee tsiti tun. ²⁹ Tan juvin ñi tacan, tatun tsa cuví tandihí tsa iyo tsa caahán yu tuhun tsihin ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. ³⁰ Tsa nditsa catyi yu tsihin ndo tyin tsa ndi cumañi ca cúu nyívi iyó nu ñuhu ñayívi ihya tan cua cuví tandihí tsa caahán yu tuhun

tsihin ndo. ³¹ Tan coo quivi
cua cundihi andivi tan cua
cundihi ñuhu ñayivi, maa tyin
tuhun caahán yuhu, ña cua
cundihi maa tsi tyin tandihi
tsi tan cua cundaa tsi.

³² Maa tyin quivi tan hora
tsa cua cuvi tandihi yacan,
yoñi maa tsitó can, ndi maa
ca ángel tan ña tsitó ra naha,
ndi yuhu tsa cuví yu Sehe
Nyoo tan ña tsitó yu. Intuhun
ñi maa Nyoo Jutu yo tsitó ama
cua javaha ra tandihi.

³³ Yacan cuenda ço nyito
vaha ndo, tan jaha cuenda
ndo tsi ndo, tan ndacan tahvi
ndo tsi Nyoo, tyin ña tsitó ndo
náa quivi tan náa cuhva cua
quitsi nyico yu. ³⁴ Tumaa
iin rayi tsa cua cahun nu
cañi. Ra ican tsa ndi cumañi
ca cahun ra, tsahá cuenda
ra vehe ra tsi musu ra. Tan
tsahá ra tyiñu tsi intuhun in-
tuhun ra naha. Tan tava
tyiñu ra tsi ra jahá cuenda
yuvehe na jaha cuenda vaha
ra. ³⁵ Yacan cuenda nyooho
ço nyito ndo tyin ña tsitó
ndo náa cuhva cua quitsi yu
tsa cuví yu tumaa tsitoho
vehe can, tyin cuvi quitsi yu
tsa cua cunaaha, maa ñuu, o
cuhva tsacú tsitooho, o tsa
cua cana ñicanyii. ³⁶ Yacan
cuenda ço nyito vaha ndo
tan ña cusu ndo tyin sana
iñi ndo tan cua quitsi yu.

³⁷ Tsa caahán yu tsihin nyoo-
ooho, caahán tucu yu tsihin
tandihí ca nyivi: Çoo nyito
ndo.

14

*Nu nducú ra jutu cuví ityi
nuu naha ra cuhva tñin ra naha*

tsi ra Jesús

*(Mt. 26.1-5; Lc. 22.1-2; Jn.
11.45-53)*

¹ Tsa ndi cumañi uvi quivi
ca tan tahan tsi vico pascua
tan vico nu tuhvá nyivi tsatsí
paan tsa nduve yutsan iya
yihí. Ra jutu tsa cuví ityi
nuu naha ra tan ra maestro
cuenda ley vehe ñuhu naha
ra nducú ra naha cuhva tñin
xeehe ra naha tsi ra Jesús tan
cañi ra naha tsi ra. ² Maa
tyin natuhun tahan ra naha
tan catyí ra naha:

—Ña cua tñin naha yo tsi
ra quivi maa vico tyin coto
nduvaa xaan nyivi —catyí ra
naha.

*Nu tyihí iin ñaha ndutya
tami jiñi ra Jesús*

(Mt. 26.6-13; Jn. 12.1-8)

³ Tsa ndi cumañi ca tahan
tsi vico can, nyii ra Jesús ñuu
Betania, vehe ra Simón, ra
tsa tsindohó cuehe tyaahyu.
Tsitsi tsa nyaá ra Jesús tsatsí
ra, tsaá iin ñaha ndahá ña iin
yutyi tsa tsinu tsihin yuu tsa
nañi alabastro. Tsiñu can yihí
ndutya tami tsa nañi nardo.
Tan yahvi xaan nyaá ndutya
tami can. Nuñá ña yuhu yutyi
can tan tava ña ndutya tami
can tan tyihí ña can jiñi ra
Jesús. ⁴ Maa tyin juhva ra tsa
yucú ican naha ra nduxaan
ra naha tan catyí ra naha:

—¿Nacuenda tyin jativi ñaha
ihya ndutya tami can? ⁵ Tun
tsatyin xico ña can, cuaha
xaan xuhun cua ñihi ña tsihin
can, tan cuvi jatinyee ña tsi
nyivi ndaahvi tsihin xuhun
can —catyí ra naha.

Tan cuxaan ra naha tsi ña.

6 Maa tyin ra Jesús catyí ra:
 —¡Jaña ndo tsi ña!
 ¿Nacuenda cuñí ndo jandu uvi
 iñi ndo tsi ña? Tan tsa vaha
 javahá ña tsihin yu. 7 Tyin
 nyívi ndaahvi tandíhi ñi quívi
 cua cuyucu ñi tsihin ndo,
 maa tyin yuhu, ña naha ca
 cunyi yu tsihin ndo. 8 Ñaha
 ihya javahá ña ndíhi cuhva
 cuví ñi javahá ña. Tyíhi ña
 ndutya tami cuñu ñuhu yu,
 tumaa tuhvá maa yo javahá
 tsihin cuñu ñuhu nyívi tsa ndi
 cumañi ca quíhvi ñuhu ñi.
 9 Tsa nditsa catyí yu tsihin
 ndo, tyin tandíhi ityi nu cua
 cahan nyívi tuhun Nyoo nani
 cahnú nu ñuhu ñayívi, cua
 cahan ñi tuhun ñaha ihya tan
 tsa javahá ña, tyin tacan tan
 ña naa iñi nyívi tsi ña —catyí
 ra Jesús.

Nu xico ra Judas tsi ra Jesús
 (Mt. 26.14-16; Lc. 22.3-6)

10 Tsa yahá yacan tan quita
 iin ra tsitsi tsa utsi uvi ra tsicá
 tsihin ra Jesús. Ra ihya cuví
 ra Judas Iscariote. Tsahan ra
 tsicahan ra tsihin ra jutu cuví
 ityi nuu naha ra, tan jandaá
 ra tyíñu tsihin ra naha tyin
 cua cuhva cuenda ra tsi ra
 Jesús tsi ra naha. 11 Cuhva tsa
 tsíñi ra naha tsa caahán ra, sii
 xaan cuñí ra naha cuví, tan
 catyí ra naha tsihin ra tyin
 cuhva ra naha xuhun tsi ra.
 Tacan tan quitsahá nducú ra
 Judas cuhva cuhva cuenda ra
 tsi ra Jesús tsi ra naha.

Nu cuxiñi ra Jesús tsihin ra
tsicá tsihin ra
 (Mt. 26.17-29; Lc. 22.7-23;
 Jn. 13.21-30; 1 Co. 11.23-26)

12 Quívi jihna ñi tsa quit-
 sahá vico nu tsatsí nyívi paan
 tsa nduve yutsan iya yíhi tan
 quívi tuhvá ñi tsahñi mbee
 lee tan jamañi ñi tsi Nyoo,
 ra tsicá tsihin ra Jesús tsicá
 tuhun ra naha tsi ra, tan catyí
 ra naha:

—¿Numaa cuñí un cuhun
 ndi janduvaha ndi tsa cuxiñi
 un cuenda vico pascua ihya?

13 Tacan tan tava tyíñu ra
 tsi uvi taahan ra naha tan
 catyí ra tsihin ra naha:

—Cuaahan ndo tsitsi ñuu,
 tan ícan cua nañihi ndo
 iin rayí yosó soco iin quívi
 ndutya. Tsa nyehe ndo tsi
 ra, cuanyicun ndo tsi ra.

14 Tsa tsaa ndo yuvehe nu
 cua quíhvi ra, catyí ndo
 tyehen tsihin tsitoho vehe
 can: “Ra Maestro cuñí ra
 coto ra numaa nyaá cuarto
 nu cua jacahnú ra vico tsihin
 ra tsicá tsihin ra”, catyí ndo.
 15 Tan cua janaha ra iin
 cuarto cahnú nu tsinu uvi
 pisu tsi ndo. Tsa nduvahá
 maa tsitsi tsi jahá ra, javaha
 ndo tsa cuxiñi yo tsitsi vehe
 can—catyí ra Jesús tsihin ra
 naha.

16 Tacan tan cuahán ra
 naha. Tsa tsaa ra naha
 tsitsi ñuu can, nañihí ra naha
 tandíhi maa cuhva catyí ra
 Jesús tsihin ra naha. Tan
 javahá ra naha tsa cua cuxiñi
 ra naha cuenda vico pascua.

17 Tsa ndíhi javahá ra naha
 tsa cua cuxiñi ra naha, tacan
 tan cuahán nyico ra naha
 nu nyí ra Jesús. Tan tsa
 cunaaha, cuahán ra Jesús,
 cuacuxiñi ra tsihin tsa utsi
 uvi ra tsicá tsihin ra. 18 Tan

cuhva tsa nyecú ra naha tsatsí ra naha nu mesa, tan catyí ra Jesús:

—Tsa nditsa catyí yu tsihin ndo tyin iin nyooho tsa tsatsí tsihin yu cua xico tsi yu tsi ra xaan iñi tsi yu.

¹⁹ Tacan tan nducuiihya xaan cuñí ra naha, tan quitsahā tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

²⁰ Tan nacahan ra Jesús tan catyí ra:

—Ña tandihí ndo. Intuhun ñi ra tsitsi tsa utsi uvi ndo. Tan ra ican cuví ra tsa jatyií paan iin ñi tsitsi coho tsihin yu. ²¹ Tyin yuhu, Rayii tsa quee nda gloria, cua tahan yu tumaa caahán maa nu tutu Nyoo tyin cua tahan yu. Maa tyin jndahvi ra ndaahvi tsa cua xico tsi yu! Vaha ca tun tsatyin ña cacū ra —catyí ra Jesús.

²² Tan tsitsi tsa tsatsí ra naha, tacan tan quihin ra Jesús iin paan tan nacuhva ra tyahvi nyoo tsi Nyoo tsa cuenda can, tan tsahnū sava ra can, tan tsahā ra can tsi ra tsicá tsihin ra, tan catyí ra:

—Çatsi ndo paan ihya tyin tsehe cuví tumaa cuñu ñuhu yu —catyí ra tsihin ra naha.

²³ Tsa yahā yacan quihin ndihí ra vasu nu yihí vinu. Tsa yahā tsahā ra tyahvi nyoo tsi Nyoo, tacan tan tsahā ra can tsi ra naha. Tandihí ra naha tan tsihi ra naha vinu

tsa yihí tsitsi vasu can. ²⁴ Tan catyí ra tsihin ra naha:

—Vinu ihya cuví tumaa niñi yu tyin tsihin niñi yu cua ndoo Nyoo tuhun tsa tsihin ndo tyin cua cati niñi yu tsa cuenda tsa vaha tsi nyooho tan tsa vaha tsi cuaha nyivi. ²⁵ Tsa nditsa catyí yu tsihin ndo tyin ña cua coho ca yu vinu tsa cuví ndutya yucu vixi uva, nda cuenda coho yu vinu tsa nda nu ndacá ñaha Nyoo quivi tsa yu ndacan —catyí ra Jesús tsihin ra naha.

Nu jacotó ra Jesús tyin cua cahan ra Pedro tyin ña nacotó ra tsi ra

(Mt. 26.30-35; Lc. 22.31-34; Jn. 13.36-38)

²⁶ Tsa ndihí tsitā ra naha yaa Nyoo, tan cuahán ra naha yucu yutun Olivo. ²⁷ Tacan tan catyí ra Jesús tsihin tandihí ra naha:

—Tandihí maa ndo tan cua nacao ihñi ndo tsi yu tsa cuaa vityin tyin catyí nu tutu Nyoo tyehen: “Tandihí mbee ticatyí jana yu cua cuhun tsiyo ti naha ti siin siin ityi tyin cua cahñi yu tsi ra jahá cuenda tsi ti naha ti”, catyí tsi. ²⁸ Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyooho —catyí ra Jesús tsihin ra naha.

²⁹ Tacan tan catyí ra Pedro tsihin ra:

—Vasu ndi maa nacao ihñi tandihí ra naha tsi un, maa tyin yuhu ña cua nacao ihñi maa yu tsi un —catyí ra tsihin ra Jesús.

³⁰ Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitooho tsa tsinu uvi tsaha, uñi tsaha cua cahan un tyin ña nacotó un tsi yu —catyí ra Jesús tsihin ra Pedro.

³¹ Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro.

Tan juvin ñi tacan catyí tandihi ca ra naha.

Nu nyii ra Jesús Getsemani tsicán tahvi ra tsi Nyoo

(Mt. 26.36-46; Lc. 22.39-46)

³² Tacan tan tsaḡ ra Jesús tan ra tsicá tsihin ra iin nu nañi Getsemani. Tan catyí ra Jesús tsihin ra naha:

—Ndoḡ ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

³³ Tan quihin ra tsi ra Pedro, ra Jacobo tan ra Juan cuahán tsihin ra. Tan tsaḡ tucuihya iñi cahnu tsi ra tan tuñu cuñi ra. ³⁴ Tan catyí ra tsihin ra naha:

—Cuihya xaan cuñi yu; cahñi ña maa tucuihya iñi ihya tsi yu, cuñi yu. Ndoḡ ndo ihya, tan ña cusu ndo —catyí ra.

³⁵ Tacan tan cuahán ra luxu ca ityi nuu. Tan tsicuiñi tsiti ra nu ñuhu tan tsaqujin ra nuu ra nda nu ñuhu. Tan tsicán tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho

tsa cua nyehe yu —catyí ra tsicán tahvi ra.

³⁶ Tan tsa tsicán tahvi ra, catyí ra:

—Jutu Mañi yu, tsa cuenda yooho nduve tsa ña cuvi javaha un. Tun yooho tan cuñi un cuvi jatsiyo un tundoho ihya siqui yu. Maa tyin na cuvi maa cuhva cuñi maa un, tan ñavin cuhva cuñi maa yu —catyí ra Jesús tsicán tahvi ra.

³⁷ Tacan tan cuahán ra nu nacoḡ ra tsi uñi ra tsicá tsihin ra. Tsa tsaḡ ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeḡ iñi un coo nyito un tsihin yu ndi intuhun hora? ³⁸ Ña cusu ndo; ndacan tahvi ndo tsi Nyoo, tyin tacan tan ña cua javaha ndo cuhva cuñi nu ña vaha. Tsa nditsa tyin añima ndo cuñi xaan tsi nanducu tsi tsi Nyoo, maa tyin cuñu ñuhu ndo cuvi tsa vita cuñi —catyí ra Jesús tsihin ra naha.

³⁹ Tacan tan cuahán nyico ra inga tsaha. Tan tsicán tahvi ra tsi Nyoo juvin ñi tsihin tuhun tsa cahan ra tsa jihna ñi. ⁴⁰ Tacan tan tsaḡ nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasi maa tinuu ra naha jahḡ ñumaahḡ. Tan ña tsitó ra naha náa nacahan ra naha tsihin ra. Ndi maa ra tan ña cahan ca ra. ⁴¹ Tan cuahán nyico ra. Tsa tsaḡ ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaa tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsi ra tyin tsa tahañ tsi hora tsa cua cuhva cuenda ra tsi yuhu, Rayi tsa quee nda gloria. ⁴² Nduvita ndo, cohon ndo tyin tsa vatsi ra tsa xico tsi yu —catyi ra Jesús tsihin ra naha.

Nu tsaha cuenda ra Judas tsi ra Jesús tsi nu xaan iñi tsi ra nahnu

(Mt. 26.47-56; Lc. 22.47-53; Jn. 18.2-11)

⁴³ Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhun ra naha tsihin ra Judas, iin ra tsicá tsihin ra Jesús, tyin tñin ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaá ra Judas tsihin nyivi cuaha can. ⁴⁴ Tsa ndi cumañi ca cahun ra Judas, ra tsa xico tsi ra Jesús, tsa catyi maa ra tsihin nyivi náa cua javaha ra tan coto ñi ndáa ra cuvi ra Jesús. Tan cahan ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jaha cuenda vaha ndo coto cunu ra —catyi ra nu quitsi tsi.

⁴⁵ Tsa tsaá ra Judas nu nyii ra Jesús natuhva ra nu nyaá ra tan catyi ra tsihin ra:

—Maestro.

Tan tyaa yuhu ra tsi ra. ⁴⁶ Tacan tan quihin ra naha tsi ra Jesús cuahán tsihin ra naha.

⁴⁷ Maa tyin iin ra nyii tsihin ra Jesús, tava ra mityi ra tan tsahnya ra soho musu ra jutu tsaahnu cuví ityi nuu. ⁴⁸ Tacan tan catyi ra Jesús tsihin ra quihin tsi ra:

—¿A ñasuhu cuví yuhu? tyin vatsi ndo vatsi quihin ndo tsi yu tsihin mityi tan yutun. ⁴⁹ Ndihi quivi tsinyii yu jacuaha yu tsi ndo tsitsi vehe ñuhu cahnu, tan ña quihin ndo tsi yu. Tandihitsehe cuví tyin tacan tan cundaa tsa catyi nu tutu Nyoo —catyi ra Jesús tsihin ra naha.

⁵⁰ Tacan tan tsinu tandihit ra tsicá tsihin ra, tan ndoo intuhun ña maa ra jaha ra naha. ⁵¹ Maa tyin ndoo intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyi tan tñin ndihit ra naha tsi ra. ⁵² Maa tyin nacoó ihñi ra ticatyi can tan tsinu tandihit ra.

Nu tsica tuhun ra mandoñi naha ra tsi ra Jesús tun juvin Sehe Nyoo tsi ra

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tacan tan tsindaca ra naha tsi ra Jesús tsi ra jutu tsaahnu cuví ityi nuu tan ndu iin tucu tandihit ra jutu cuví ityi nuu naha ra tan ra cuví mandoñi nyivi Israel naha ra, tan ra maestro cuenda ley vehe ñuhu naha ra. ⁵⁴ Ra Pedro nyicún tsica nyicún tsica ñi ra tsi ra naha cuahán ra.

Tan tsaꞗ ra nda nuquehe yu-
vehe ra jutu tsaahnu cuví ityi
nuu can. Tan ndooꞗ ra tuñú ra
ñuhu tsihin ra vitya naha ra.

⁵⁵ Ra cuví jutu ityi nuu
naha ra, tan tandihí ca ra
cumí tyiñu naha ra nducú
ra naha cuatyí tyaa ra naha
siquí ra Jesús, tyin tacan tan
cuví cahñi ra naha tsi ra.
Maa tyin ña ñihí maa ra naha
cuatyí tyaa ra naha tsi ra.

⁵⁶ Cuaha xaan nyívi cahꞗn
cuendu siquí ra, maa tyin
ña nacatsí tahan maa tuhun
caahán ndi intuhun ñi. ⁵⁷ Yihí
ñi nduvitá ñi tan cahꞗn ñi
maa ñi maa cuendu siquí ra,
tan catyí ñi:

⁵⁸ —Nyuhu tsiñi ndi tsa
cahꞗn ra tan catyí ra tyehen:
“Yuhu cua cani yu vehe ñuhu
cahnu tsa javahꞗ nyívi. Tan
cua janduvita yu inga vehe
ñuhu tsitsi tsa uñi quívi ñi.
Maa tyin ñavin tahan vehe
ñuhu tsa javahá nyívi” catyí
ra —catyí ñi.

⁵⁹ Vasu ndi maa tacan
caahán ñi, maa tyin ña
nacatsí tahan maa tsa cahꞗn
ñi.

⁶⁰ Tacan tan nduvitá ra jutu
tsaahnu cuví ityi nuu mahñu
tandihí ra yucú ican naha ra,
tan tsicꞗ tuhun ra tsi ra Jesús,
tan catyí ra:

—¿A ña cua nacahan un nu
caahán nyívi ihya? ¿A nditsa
tsa caahán ñi, o ña nditsa?
—catyí ra

⁶¹ Maa tyin ña nacahan
maa ra Jesús tan nduve maa
náa cahꞗn ra. Tacan tan ra
jutu tsaahnu cuví ityi nuu
tsicꞗ tuhun ra tsi ra inga
tsaha, tan catyí ra:

—¿A yooho cuví ra Cristo,
Sehe Nyoo ii tsa tsahá tsa
vaha?

⁶² Tan ra Jesús catyí ra tsi-
hin ra:

—Juvín. Nyooho cua nyehe
ndo tsi yuhu, Rayí tsa quee
nda gloria, nyaá yu xiin
cuaha Nyoo, ra iyó tandihí
tunyeé iñi, tan cua nyehe
tucu ndo nu quitsi yu nu vico
ityi andívi —catyí ra tsihin ra.

⁶³ Tacan tan tsahnyꞗ ra jutu
tsaahnu cuví ityi nuu jahma
ra tumaa iin seña tyin ña
taahán iñi ra tsa caahán ra
Jesús tyin cuñi maa ra tyin ña
vaha tsa caahán ra, tan catyí
ra:

—Ña tsiñi ñuhu ca tsa
nducu yo tsi ra cuví tsa ndaa.

⁶⁴ Tyin tsa tsiñi maa ndo tsa
cahꞗn ra. Tsicoꞗ cuatyí ra
nuu Nyoo tsihin tuhun cahꞗn
ra. ¿Náa catyí ndo vityin?
—catyí ra.

Tacan tan nacahan tandihí
ra naha tan catyí ra naha tyin
taahán tsi cúu ra.

⁶⁵ Tacan tan quitsahꞗ tiví sii
juhva ra naha tsi ra. Tyasi ra
naha nuu ra, tan cañi ra naha
tsi ra tsihin tsiquí tan catyí ra
naha tsihin ra:

—¡Cahꞗn tsihin ndi yóo cañi
tsi un! —catyí ra naha tsihin
ra.

Tan cañi tucu ra vitya naha
ra nuu ra.

*Nu cahꞗn ra Pedro tyin ña
nacotó ra tsi ra Jesús*

(Mt. 26.69-75; Lc. 22.56-
62; Jn. 18.15-18, 25-27)

⁶⁶ Tsitsi tsa ndi nyíi ra Pe-
dro nuquehe tsata vehe ra
jutu tsaahnu cuví ityi nuu,
tsaꞗ iin ñaha cuví musu ra

jutu can. ⁶⁷ Cuhva tsa nyehe ñaha can tsi ra Pedro nyaá ra tuñú ra ñuhu, quitsaha nyehe xaan ña tsi ra, tan catyí ña tsihin ra:

—Tsiçā tucu yooho tsihin ra Jesús, ra ñuu Nazaret can —catyí ña tsihin ra.

⁶⁸ Maa tyin ra Pedro tyihí xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quita ra ityi yuhu cora. Tan tsacu ñi tsitooho. ⁶⁹ Tacan tan ñaha can nanyehe nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha ñi tsi ra can cuví ra ihya —catyí ña.

⁷⁰ Maa tyin tyihí xeehe nyico ra inga tsaha. Tacan tan ña naha ñi tan catyí ra yucú ican naha ra tsihin ra Pedro:

—Nditsa tyin ra vaha ñi tsi ra can cuví yooho, tyin ra Galilea cuví un, tan caahán un tumaa caahán nyivi Galilea —catyí ra naha tsihin ra.

⁷¹ Tacan tan iyo xaan caahán ra Pedro, tan catyí ra:

—¡Tsitó vaha maa Nyoo tyin ña nacotó yu tsi ra tsa caahán ndo tuhun! ¡Na cahñi maa Nyoo tsi yu tun ña nditsa yu tsa caahán yu! —catyí ra.

⁷² Juvín ñi cuhva can navacu tsitooho tsa tsinu uvi tsaha. Tacan tan nducuhun ñi ra Pedro tsa cahan ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yaha cahan un

uñi tsaha tyin ña nacotó un tsi yu.” Tsa nducuhun ñi ra Pedro tsehe, quitsaha ra tsacú ra.

15

Nu jaqueé yuhu ra Pilato tsi ra Jesús

(Mt. 27.1-2, 11-14; Lc. 23.1-5; Jn. 18.28-38)

¹ Tan tsa tuví inga quivi ndu iin ra jutu cuví ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandihi ca ra cumí tyiñu tsa yihí ndaha tsi nyivi Israel. Nuuhñi ñi maa ra Jesús tan tsindaca ra naha tsi ra nuu ra Pilato. ² Tan tsicā tuhun ra Pilato tsi ra, tan catyí ra:

—¿A juvin un cuví rey nyivi Israel?

Nacahan ra Jesús tan catyí ra:

—Juvín yu, tumaa caahán maa un.

³ Tan cuaha xaan cuendu cahan ra cuví jutu ityi nuu naha ra siqui ra Jesús. ⁴ Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyehé, cuaha xaan cuatyí tyaá ra naha siqui un —catyí ra.

⁵ Maa tyin ra Jesús ña nacahan maa ra. Yacan cuenda ña ñihí ra Pilato náa cahan ra.

Nu tsahá ra Pilato ndatu tsa cúu ra Jesús

(Mt. 27.15-31; Lc. 23.13-25; Jn. 18.38—19.16)

⁶ Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñi maa nyivi tyin tava

ra. ⁷ Quiví can nyíi iin ra nañí Barrabás vehe caa, tsihin inga ca ra tsaññi nyivi nu cuvaq nyivi siqui ra ndacá ñaha. ⁸ Tan tsañan nyivi tsicahān ñi tsihin ra Pilato na jaña ra iin ra yucú vehe can tumaa tuhvá maa ra javahá. ⁹ Tan nacahān ra Pilato, tan catyí ra:

—¿A cuñí ndo tsa jaña yu tsi ra cuví Rey ndo?

¹⁰ Tacan cahan ra tyin tuví iñi ra tyin tsañā cuenda ra jutu cuví ityi nuu naha ra tsi ra Jesús tsi ra tsa cuenda tsa ndasí cuñí ra naha nyehe ra naha tsi ra tyin cuaha nyivi nyicún tsi ra. ¹¹ Maa tyin ra jutu cuví ityi nuu can naha ra natyuhū ra naha tsi nyivi tsa cahan ñi na tava ra Pilato tsi ra Barrabás vehe caa. ¹² Tacan tan tsicá tuhun ra Pilato tsi ñi, tan catyí ra:

—¿Tun tacan, náa cuñí ndo javaha yu tsihin ra tsa jacunañi ndo Rey cuenda ndo? —catyí ra tsihin ñi.

¹³ Tacan tan canā tsa ñi, tan catyí ñi:

—iTyāa tsi ra nu cruu na cúu ra! —catyí ñi.

¹⁴ Tan catyí ra Pilato tsihin ñi:

—Maa tyin, ¿náa tsa ña vaha javahā ra? —catyí ra.

Ñi ican quitsahā caná tsa nyico ñi tan catyí ñi:

—iTyāa tsi ra nu cruu na cúu ra! —catyí ñi.

¹⁵ Tacan tan tsa cuñí ra Pilato ndoo vaha ra nuu nyivi, tavā ra tsi ra Barrabás vehe caa. Tsa yahā tavā ra tsi ra can, tavā tyiñu ra na ndoho

ra Jesús. Tsa yahā ndoho ra Jesús, tan tsañā cuenda ra tsi ra tsi andaru na ticaa ra naha tsi ra nu cruu.

¹⁶ Tacan tan tsindacā ra andaru can naha ra tsi ra nuquehe vehe tyiñu. Tan jandu iin ra naha tandihi ca andaru. ¹⁷ Tan jacunditsi ra naha iin jahma cuaaha tuun tsi ra. Tan javahā ra naha iin corona iñu. Tan tyihí ra naha can jiñi ra. ¹⁸ Tsa yahā yacan tan quitsahā caná tsa ra naha tsata ra tan tsacú nducu ra naha tsi ra, tan catyí ra naha:

—iNacumi tsi un, yooho Rey nyivi Israel! —catyí ra naha.

¹⁹ Tan cañi ra naha jiñi ra tsihin yutun, tan tiví si ra naha tsi ra. Tan tsicuiñi tsi ra naha nuu ra jahá ra naha tyin jacahnú ra naha tsi ra. ²⁰ Tsa yahā tsacú nducu ra naha tsi ra, tavā ra naha jahma cuaaha tuun tsa jacunditsi ra naha tsi ra. Tacan tan jacunditsi nyico ra naha jahma maa ra tsi ra. Tan cuahān ra naha tsihin ra cuticaá ra naha tsi ra nu cruu.

Nu tyaa ra naha tsi ra Jesús nu cruu

(Mt. 27.32-44; Lc. 23.26-43; Jn. 19.17-27)

²¹ Ityi cuahān ra naha tahañ ra naha iin ra ñuu Cirene tsa nañí Simón. Tan cuví ra jutu ra Alejandro tan ra Rufo. Ndi vatsí nuhu ra quee ra cuhu. Cuhva tsa cua yahā ra, jañiñi ra andaru naha ra tsi ra na cuiso ra cruu ra Jesús.

²² Tan tsindacā ra naha tsi ra Jesús iin nu nañí Gólgota, tan cuñí tsi catyí Yiqui Jiñi

Ndiyí. ²³ Tan ican jacoḥo ra naha vinu saca nuu tsihin numeri tsa nañi mirra tsi ra. Maa tyin ra Jesús ña cuñi ra coho ra can. ²⁴ Tsa yaha tyaa ra andaru naha ra tsi ra nu cruu, quihin ra naha jahma ra tan tava cuenda ra naha tyin cuñi ra naha coto ra naha yoo cua jaha canaa intuhun intuhun jahma can.

²⁵ Tyaa ra naha tsi ra nu cruu caa in tsa tui. ²⁶ Tan letra tsa tyaa ra naha jifi cruu ra, catyí tsi nacuenda cua cúu ra. Tan catyí tsi tyehen: “Ra ihya cuví Rey nyivi Israel.” ²⁷ Tan tyaa ndihi ra naha uvi taahan ñasuhu tsihin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyin ra. ²⁸ Tacan cuvi tan cunda cuhva catyí nu tutu Nyoo tyehen: “Javaha nyivi tsihin ra tumaa javaha ñi tsihin ra caquiñi.” ²⁹ Tan nyivi yaha ican jacuñi nyaa ñi tsi ra, tan javicó ñi jifi ñi tsa tsacú nducu ñi tsi ra, tan catyí ñi:

—¡Jaan! ¡Yooho tsa cahan tyin cua cani un vehe ñuhu cahnu, tan tsitsi tsa uñi quivi cua janduvaha nyico un itsi, ³⁰ jacacu tsi un vityin tan nuu nu cruu juvin! —catyí ñi.

³¹ Tan juvin ñi tacan tsacú nducu tucu ra jutu cuví ityi nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—¡Jacacu ra tsi inga ca nyivi, maa tyin ña cuví jacacu ra tsi maa ra! ³² Tun nuu ra nu cruu vityin nyehe yo, tacan tan cua tsinu iñi yo tyin juvin

ra cuví ra Cristo, Rey cuenda yo tsa cuví yo nyivi Israel —catyí ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacu nducu ndihi nahnu tsi ra.

Nu tsihi ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva tsa cua tahan hora, ndunañ nanii cahnu nda cuanda caa uñi tsa tseñi. ³⁴ Tan juvin ñi cuhva can cana tsaa ra Jesús tsihin tandihi tunyee iñi ra, tan catyí ra:

—Eloi, Eloi, ¿lama sabac-tani? —tan cuñi tsi catyí: Nyoo Jutu yu, Nyoo Jutu yu, ¿nacuenta naco ihñi un tsi yu? —catyí ra.

³⁵ Juhva ra yucú ican naha ra tsiñi ra naha tsa cahan ra tan catyí ra naha:

—¡Jihna ndo! Caná tsaa ra tsi ra Elías, ra cuvi ndusu yuhu Nyoo tahan tsanaha —catyí ra naha.

³⁶ Tacan tan tsinú xaan iin ra tsiquihin ra iin yahma tsa caá tumaa caá catyi, tan jatyii ra can tsihin vinu iya. Tan tyaa ra can iin nu yutun tan jatuhva ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

³⁷ Tacan tan ñihi xaan cana tsaa ra Jesús, tan tsihi ra.

³⁸ Tan jahma tsa ticaá tsitsi vehe ñuhu cahnu ndata sava tsi, nda siqui tan nda cuanda ityi tsaha. ³⁹ Tan ra capitán tsa yihí ndaha andaru tsa

nyaá yatyin ñi nu ticaá ra Jesús nyehe ra nácaa cana tsa ra, tan nácaa tsihi ra, tacan tan catyí ra:

—Nditsa nditsa cuii tyin Sehe Nyoo tsi ra ihya —catyí ra.

⁴⁰ Tan ndasava ñi nyecú tucu juhva ñiñaha nyehé ñi. Tan mahñu ñi can nyií ña María tsa quee ñuu Magdala, tan ña María sihi ra José tan ra Jacobo ra tyuvaa ca. Tan nyií tucu ña Salomé. ⁴¹ Ñiñaha ihya tsinyicun ñi tsi ra Jesús, tan jatyinyee ñi tsi ra quivi tsica nuu ra ityi Galilea. Tan yucú cuaha tucu ñiñaha inga ñuu tsa tsaá tsihin ra ñuu Jerusalén ican.

Nu tsicutsi ra naha tsi ra Jesús

(Mt. 27.57-61; Lc. 23.50-56; Jn. 19.38-42)

⁴² Quivi tsa tuhvá nyivi jan-duvaha tsa catsi ñi cuenda inga quivi tuhvá ñi quitatu, juvin ñi tseñi can ⁴³ tsaá ra José ra ñuu Arimatea nu nyií ra Pilato. Ra José can cuví ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jaquitsi Nyoo tyin cundaca ñaha nu ñuhu ñayivi. Ña nayuhvi ra tan tsahan ra tsindacan ra cuñu ñuhu ra Jesús tsi ra Pilato. ⁴⁴ Tsa tsito ra Pilato tyin tsa yaha tsihi ra Jesús, iyo xaan cuñí ra. Tacan tan cana ra tsi iin capitán tan tsica tuhun ra tsi ra tun nditsa tyin tsa tsihi ra Jesús. ⁴⁵ Tan tsa tsito vaha ra Pilato tyin tsa yaha tsihi ra Jesús, tava tyiñu ra na cuhva ra andaru naha

ra cuñu ñuhu ra tsi ra José. ⁴⁶ Tacan tan tsijata ra José iin jahma cuitsin tsa tsinu tsihin jahma vaha tsa nañí linu, tan januu ra cuñu ñuhu ra Jesús nu cruu. Yaha can tan cava nuu ra jahma can cuñu ñuhu ra. Tacan tan tyihi ra cuñu ñuhu ra tsitsi iin ñaña tsa nyaá nduvaha tsitsi iin cava. Tan tyasi ra yuhu ñaña can tsihin iin yuu cahnu. ⁴⁷ Tan ña María, tsa quee ñuu Magdala, tan ña María, sihi ra José, tsahan ñi, tsinyehe ñi nu tinyi ra José can cuñu ñuhu ra Jesús.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Tsa yaha quivi quitatu nyivi, ña María ñuu Magdala, tan ña María sihi ra Jacobo, tan ña Salomé jata ñi ndutya tamí tyin cuñí ñi cahun ñi cutyihí ñi can cuñu ñuhu ra Jesús. ² Tacan tan cuahán ñi nu nyaá ñaña ra tsa cunditsin cuii ñi quivi quitsaha vitya. Tan tsaá ñi ican cuhva tsa cua cana cuii ñi ñicanyii. ³ Tan ityi cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

⁴ Maa tyin cuhva tsa tsaá ñi nyehe ñi tyin tsa catsiyo yuu cahnu tsa ndasí yuhu ñaña can. ⁵ Tan cuhva tsa quihvi ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyuvaa. Nditsi

ra jahma cuitsin cañi. Tan nayuhvi xaan ñi. ⁶ Maa tyin catyí ra tsihin ñi:

—Ña nayuhvi ndo. Tsi^{tó} yu tyin nanducú ndo tsi ra Jesús, ra ñuu Nazaret, ra tsa tsihi nu cruu. Maa tyin nduve cá ra nyii ihya vityin tyin tsa nandoto ra. Nyehe ndo nu tinyii ra naha tsi ra. ⁷ Cuaahan ndo tan jacoto ndo tsi ra Pedro tan tsi inga ca ra tsicá tsihin ra Jesús. Tan catyí ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyí maa ra tsihin ra naha tsa ndi cumañi ca cúu ra —catyí ángel can tsihin ñi.

⁸ Tacan tan tsinú xaan ñi cuahán ñi, tyin nihí ñi jahá tsa yuuhví ñi. Tan ña cahan maa ñi tsa cahan ñi tsihin ndi in-tuhun maa nyivi tyin yuuhví xaan ñi.

Nu quituvi ra Jesús nuu ña María quee ñuu Magdala
(Jn. 20.11-18)

⁹ Ra Jesús nandoto ra quivi quitsahá vitya. Tan quituvi ra jihna cuii ca nuu ña María ñuu Magdala. Juvín ña cuví ña tsa tava ra utsa tatyí ña vaha. ¹⁰ Tsa^{han} ña tsijacoto ña tsi ra tsicá tsihin ra, tyin yucú ra naha tsihin tucuiihya iñi tan tsacú ra naha. ¹¹ Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

Nu quituvi ra Jesús nuu uvi ra tsicá tsihin ra
(Lc. 24.13-35)

¹² Tsa yaha yacan, tan quituvi ra Jesús nuu uvi ra tsa cuahán ityi cuhu naha

ra. Maa tyin sin cuhva caá ra nyehe ra naha. ¹³ Tan tsinuhu ra naha tsijacoto ra naha tsi tandihi ca ra naha. Maa tyin juvin ñi ña tsinu iñi ra naha tsa cahan ra can naha ra.

Nu tsa^{ha} ra Jesús tyiñu tsi ra tsa tsicá tsihin ra
(Mt. 28.16-20; Lc. 24.36-49; Jn. 20.19-23)

¹⁴ Yaha yacan tan quituvi ra Jesús nuu tandihi tsa utsi iin ra tsa tsicá tsihin ra, tsitsi tsa nyecú ra naha nu mesa. Tan cuxaan ra tsi ra naha tsa cuenda tsa ña tsinú iñi ra naha, tan tsa cuenda tucu tsa ndava aña^{ma} ra naha tan ña tsinu iñi ra naha tsa cahan nyivi tsa nyehe tsi ra tsa yaha nandoto ra. ¹⁵ Tan catyí ra tsihin ra naha:

—Cuaahan ndo naniⁱ cahnu nu ñuhu ñayivi, tan cahan ndo tuhun Nyoo tsihin tandihi nyivi, tan catyí ndo tsihin ñi nácaa jacacú Nyoo tsi ñi. ¹⁶ Tan nyivi tsa cua tsinu iñi tan coondutya ñi, cua cacu ñi. Maa tyin ñi tsa ña cua tsinu iñi cua ndoo cuatyí ñi siqui ñi tan cua cunaa ñi. ¹⁷ Tan tandihi tsa iyo ihya cua javaha nyivi tsa cua tsinu iñi tsi yu: Tsihin sivi yu cua tava ñi tatyí ña vaha, tan cua cahan ñi inga yuhu tsa ña tuhvá ñi cahan. ¹⁸ Cua tin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyivi cuuhvi, tan cua nduvaha nyivi.

Nu ndaa ra Jesús andivi
(Lc. 24.50-53)

19 Tsa ndih̄i cah̄an Jutu Mañi yo Jesús tsihin ra naha, tacan tan ndaā ra andiv̄i, tan tsinyāa ra xiin cuaha Nyoo.

20 Tacan tan ra tsic̄a tsihin ra quit̄a ra naha tan tsah̄an ra naha tandih̄i ñi ityi tsicah̄an ra naha tuhun Nyoo nácaa jacacú ra tsi yo. Juv̄in ñi maa Jutu Mañi yo jatyinyēe tsi ra naha tyin tsah̄a ra tsa javaha ra naha cuaha tsa iyo. Tan tsihin yacan nyehē nyiv̄i tyin nditsa tsa caah̄an ra naha.

Tan na cuvi tsi tacan ñi.

Tuhun Nyoo Tsa Tyaa Ra Lucas

Nu quitsahā jacotó ra Lucas tuhun ra Cristo tsi ra Teófilo

¹ Cuaha ñi nyivi nducu ñi cuhva tyaa ñi nuu tutu tandihi tsa cuvī nu yucú ndi ihya. Tyaa ñi cuhva ² nacatyí tuhun nyivi tsihin yo, ñi tsa nyehe tan cahan tuhun ra Jesús nda quivi jihna ñi. ³ Tan yuhu tucu tsa yahā cahvi yu tan nducu tuhun vaha yu tandihi tsa cuvī nda nu quitsahā. Yacan cuenda cuñí yu tyaa yu tuhun ihya tsa cuenda un, yooho Teófilo, nda nu quitsahā tan nda nu ndihi. ⁴ Tyin tacan tan coto un tyin nditsa tsa jacuahā nyivi tsi un.

Nu jacoto iin ángel tsi ra Zacarías ama cua cacu ra Juan, ra cua jacoondutya tsi nyivi

⁵ Quivi tsa cuvī ra Herodes rey tanī cahnu cuenda Judea, tsicoo iin ra cuvī jutu, nañí ra Zacarías. Tan yihí ra cuenda ra cuvī jutu naha ra tsa nañí Abías. Tan ñasihi ra nañí ña Elisabet. Tata ra Aarón, ra cuvī jutu tahan tsanaha, cuvī ña. ⁶ Tan nduve maa cuatyí ñi nuu Nyoo. Tyin vaha xaan tyaá yahvi ñi tuhun caahan Nyoo Jutu yo. Tan yoñi maa cuvī tyaa cuatyí tsi ñi. ⁷ Tan nduve maa sehe ñi tsicoo. Tyin ña Elisabet, ña cuvī coo sehe ña. Tan tsa tsahnu xaan nduvi taahan ñi.

⁸ Iin quivi taahan tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo. ⁹ Tan cuhva iyó maa ra cuvī jutu naha ra, tavā ra naha suerte, ndáa ra cua tahan tsi quihvi tsitsi vehe ñuhu Jutu Nyoo, tyin cahmi ra cutu. Quivi can tahan tsi tsi ra Zacarías. ¹⁰ Tan cuaha nyivi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmí ra cutu can. ¹¹ Tan tsitsi tsa ndi nyii ra ican tan quituvi iin ángel Jutu Nyoo nu nyii ra. Tan nyaá nyityi ángel can ityi xiin cuaha nu nyaá altar nu tsahmí ra cutu. ¹² Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra. ¹³ Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahan un tsihin ra. Tan cua coo iin sehe ña Elisabet ñasihi un. Tan cua cunañi ra Juan. ¹⁴ Siñ xaan cua cuñi un. Tan cuaha xaan nyivi cua cusii ndihi iñi quivi cua cacu ra. ¹⁵ Tyin sehe un, cahnu xaan cua cuvī ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihī Tatyí Ii Nyoo tsi ra tsa ndi cumañi ca cacu ra tan tandihi tyembu tsa cua coo ra. ¹⁶ Tan cuaha xaan nyivi Israel cua cunyicun ñi tsi Jutu yo Nyoo jaha ra. ¹⁷ Juvín ra cua cahun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihī xaan Tatyí Ii Nyoo tsi ra. Tyin cua cuvī ra tumaa ra Elías, ra cuvī ndusu yuhu

Nyoo tahañ tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquiñi, na tyaa yahvi ñi tuhun caahán Nyoo. Tacan cua janduvaha ra tsi nyivi tan cua cuatu vaha ñi tsi Nyoo —catyí ángel tsihin ra Zacarías.

18 Tan tsicā tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihihi yu? Tyin yuhu tsa tsahnu xaan yu. Tan tacan tucu ñasihihi yu —catyí ra.

19 Tan ángel can nacahañ ra tan catyí ra:

—Yuhu Gabriel nañi yu. Tan tsicá yu tyiñu Nyoo. Maa ra tava tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un. 20 Tan vityin cua nduñihihi un. Tyin ña tsinú iñi un tsa caahán yu tsihin un. Tan ña cua cuvi cahan un nda cuanda tsa yaha cacu sehe ñasihihi un. Tan nda quivi cundaa tandihi tsa cahan yu tsihin un —catyí ángel ican tsihin ra.

21 Tan nyivi tsa ndatú tsi ra Zacarías ityi tsata vehe ñuhu, iyo xaan cuñi ñi tyin cucuee xaan ra tsitsi vehe ñuhu can. 22 Tan cuhva tsa quita ra Zacarías, ña cuvi maa cahan ra tsihin ñi. Tan tuví iñi ñi tyin iyó tsa nyehē ra tsitsi vehe ñuhu can. Tacan tan quitsaha caahán ra tsihin ñi tsihin ndaha ra. Tyin ña cuvi cahan ra.

23 Tan quivi ndihi tyiñu jahá ra Zacarías vehe ñuhu can, tan cuanuhu ra yuvehe ra. 24 Tsa yaha quivi can tan tsicuhun sehe ñasihihi ra, ña Elisabet. Tan ña quita maa ña tsata vehe tsa tandihi tsa uhun yoo. Tan tsicá iñi ña: 25 “Tyehen javaha Jutu Mañi yu tsihin yu, tyin tacan tan ña cahan nyaa ca nyivi tsi yu”, cuñi ña tsicá iñi ña.

Nu jacoto iin ángel tsi ña María tyin cua cacu ra Jesús

26 Tsa quita iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyí Galilea. 27 Tyin cahan ra tsihin iin ñaha yoco tsa nañi María. Tan tsa nyaa maa tsa cua tindaha ña tsihin ra nañi José, ra cuvi tata ra rey David. 28 Tan quihvi ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihi ca ñaha —catyí ángel ican tsihin ña.

29 Tan tsa tsiñi ña tsa cahan ra, iyo xaan cuñi ña tsa cahan ra. Tan tsicā iñi ña: “¿Nacuenda tacan caahán ra ihya nacumi tsi yo?” tsicá iñi ña.

30 Tan catyí ángel ican:

—Ña nayuhvi un, María, tyin ñihí un tumañi iñi Nyoo. 31 Vityin cua cahun sehe un. Tan cua cunañi ra Jesús. 32 Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa

cuví ra David, tsi tsaahnu ra.
 33 Tyin cua cundaca ñaha ra tsi nyívi Israel tandihi maa tyembu. Tan ña cua ndihi maa tsa cundaca ñaha ra —catyí ángel can tsihin ña.

34 Tacan tan tsicá tuhun ña María tsi ángel, tan catyí ña:

—¿Nacaa cua cuví can? Tyin yuhu, ñaha ca coo yíi yu.

35 Tan nacahan ángel tan catyí ra:

—Maa Tatyí Ii Nyoo cua quitsi siqui un. Tan tunyee íñi Nyoo, ra nyaá gloria, cua quitsi tan cua casi tsi siqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo. 36 Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyívi tyin ñaha can ña cuví coo sehe ña. Maa tyin vityin tsa ñuhú sehe ña. Tsa íñu yoo tsa ñuhú sehe ña. 37 Tyin Nyoo nduve tsa ña cuví jaha ra —catyí ángel tsihin ña.

38 Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyíi ña Elisabet

39 Tan iin quívi can, numi ñi cuahán ña María iin ñuu tsa canyíi Judea nu maa ñi maa yucu iyó. 40 Tan quíhví ña tsitsi vehe ra Zacarías. Tan nacuhvá ña nacumi tsi ña Elisabet. 41 Tan tsa tsiñi ña Elisabet tsa cahán ña María, tan natuñu sehe ña tsitsi ña. Tan ñihi nyaá Tatyí Ii Nyoo

tsihin ña. 42 Tan ñihi xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihi ca ñiñaha. Tan nasoco ra tsi sehe un. 43 ¿Tan yoo cuví yuhu? Tyin quitsi sihi Jutu Mañi yu quitsi nyehe ña nu nyaá yu. 44 Cuhva tsa tsiñi yu tsa cahán un, tan natuñu sehe yu tsitsi yu. Tyin sii xaan cuñí ra. 45 Tan sii xaan cuñí tucu maa añima un tyin tsinú íñi un. Tyin cua cuví cuhva tsa cahán Nyoo tsihin un —catyí ña Elisabet.

46 Tan catyí ña María:

—Jacahnú yu tsi Nyoo tsihin tandihi añima yu.

47 Tan sii xaan cuñí añima yu tsihin Nyoo ra jacacú tsi yu.

48 Tyin cuví yuhu iin ñaha ndaahvi tan Nyoo nyehe ndaahvi ra tsi yu.

Tan vityin tandihi quívi cua cahan nyívi tyin cahnú xaan tumañi íñi ñihí yu.

49 Tyin Nyoo, cahnú xaan cuví ra. Tan cahnú tsa javahá ra tsihin yu.

Tan ii xaan sívi ra.

50 Tan ndaahvi cuñí ra tsihin tandihi nyívi tsa cua coo tan tyaa yahvi ñi tsi ra.

51 Cahnú xaan tsa javahá ra tsihin tunyee íñi tsa iyó tsi ra.

Jatsiyó ra tsi nyívi tsa cahnú xaan tsicá íñi ñi.

52 Quinyaa ra tunyee íñi iyó tsi nu cuví rey.

Tan cua janducahnú ra tsi nyívi ndaahvi.

53 Tsahá Nyoo tsa vaha tsi nyivi cuñí coto tsa vaha.

Tan nyivi cuca tsa cuñí tyin nduve tsa tsiñí ñuhu tsi ñi, tsihin ndaha ndi ñi, jacuhún ra tsi ñi.

54 Jatyinyeé ra tsi nyivi Israel tsa cuví ñi musu ra.

Tan ña naá iñi ra tsi ñi. Nyehé ndaahvi ra tsi ñi.

55 Tumaa cuhva catyí Nyoo tsihin ra Abraham, tsi tsaahnu yo, tan tsihin sehe ra, tacan ñi javahá maa Nyoo —catyí ña María.

56 Tan ña María ndoo ña tsihin ña Elisabet uñi yoo. Tan tsa yahá uñi yoo can tan cuanuhu ña nda yuvehe ña.

Quivi cacu ra Juan, ra tsa jacoondutyá tsi nyivi

57 Tsa tsaá quivi tsa cacu sehe ña Elisabet, jacacu ña iin rayii. 58 Tan nyivi vehe ña tsihin nyivi tsa iyó yatyin ñi yuvehe ña, sii xaan cuñí ñi. Tacan tucu maa ña. Tyin vaha xaan tsa javahá Nyoo tsihin ña. 59 Tan tsa quita una quivi tsa cacu ra, tan tyaa ra naha tuñi Nyoo tsi ra tumaa cuhva iyó maa ñi. Tan cuñí ra naha tsa cunañi ra Zacarías tumaa nañi maa jutu ra. 60 Maa tyin sihi ra catyí ña:

—Ña cuví. Tyin Juan cua cunañi ra.

61 Tan catyí ra naha:

—¿Nacuenda jacunañi un Juan tsi ra? Tan yoñi nyivi ndo nañi tacan —catyí ra naha.

62 Tan quitsahá tsicá tuhun ra naha tsihin ndaha ra naha tsi jutu ra. Tyin coto ra naha

náa sivi cuñí ra tsa cunañi ra. 63 Tan tsican jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihi maa ra ican naha ra iyo xaan cuñí ra naha tsa tacan. 64 Juvín ñi maa hora can nacahan ra Zacarías. Tan quitsahá jacahnú ra tsi Nyoo. 65 Tan tandihi maa nyivi iyó yatyin yuvehe ñi, iyo xaan cuñí ñi cuví. Tan tandihi maa nyivi tsa iyó yucu iyó Judea ican nacatyí tuhun tahan ñi tsa cuví can. 66 Tan tandihi maa nyivi tsa tsito can, tsicá iñi ñi, tan tsicá tuhun tahan ñi tsi ñi:

—¿Yóo ra cua cuví ra lee ihya? —catyí ñi.

Tyin nditsa, Nyoo nasocó xaan ra tsi ra.

Nu jacahnú ra Zacarías tsi Nyoo

67 Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsahá cuenda ra tsa caahán Nyoo tsihin ra, tan catyí ra:

68 —Cahnu xaan ra cuví Jutu yo Nyoo cuenda yo nyivi Israel.

Tyin quitsi ra nu yucú yo, tsa cuví yo nyivi maa ra.

Tan jacacú ra tsi yo.

69 Tan tsahá ra iin ra tsa cahnu xaan cuví tsi yo, ra cua jacacu tsi yo.

Tata ra David, ra tsa cuví musu Nyoo cuvi ra.

70 Tacan cua javaha ra, catyí Nyoo tahan tsanaha, quivi cahán ra cuví ndusu yuhu ra, tan catyí ra naha tyehen:

71 Cua jacacu Nyoo tsi yo ndaha nu xaan iñi tsi yo, tan nuu tandihí nu tsa ndasi cuñi nyehe tsi yo.

72 Tan cua cundaahvi iñi ra nyehe ra tsi nyivi yo tsa tsicoo tahan tsanaha.

Tan cua nducuhun iñi ra tsa cahan ra tsihin ñi tahan tsanaha.

73 Cahān maa Nyoo tsihin ra Abraham, tsii tsaahnu yo,

74 tan catyi ra tyin cua jacacu ra tsi yo ndaha nu xaan iñi tsi yo.

Tyin ña cua nayuhvi ca yo jacahnu yo tsi ra.

75 Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ñi tsa cuenda maa ra tandihí quivi tsa cua coo yo ñayivi —catyi ra Zacarías.

76 Tan catyi ra Zacarías tsihin lee can:

—Sehe luhlu yu, yooho cua cuvi un ndusu yuhu Nyoo, ra nyaá gloria.

Tyin cuhun un ityi nuu Jutu Mañi yo. Tan cua cahan un tuhun ra tsihin nyivi tyin tsa cuñi quitsi ra.

77 Tan cua jacoto un tsi nyivi tyin cua jaha Nyoo tucahnu iñi tsi ñi.

Tacan tan cacu añima ñi.

78 Tyin Jutu yo Nyoo cuñi ra tsi yo. Tan cundaahvi xaan iñi ra tsi yo.

Tan cua jaquitsi ra iin ra jatyinyee tsi yo. Tan cuvi ra tumaa ñuhu ñicanyii.

79 Tyin cua janaha ra ñuhu nditsin nu iyó nyivi nu naa, nu ndatú tuhun tsihi tsi ñi.

Cua janaha ra ityi ra tsi yo, ityi vaha —catyi ra Zacarías.

80 Tan ra luhlu can cua cuahnu ca ra. Ñihi xaan tsicoo tunyee iñi tsi ra tsihin Tatyí li Nyoo. Tan tsicoo ra iin tsiqui ndi nda cuanda quivi tsa nacoto nyivi Israel tsi ra.

2

Quivi cacu ra Jesús (Mt. 1.18-25)

1 Quivi ican tsicoo iin ra ndacá ñaha, ra cuví rey cahnu, nañi ra Augusto. Tava tyiñu ra tsi ra nyisó tyiñu naha ra na tyaa ra naha sivi tandihí nyivi tanií cahnu ñuu ñayivi. 2 Ihya cuvi tsa jihna ñi tsinyaa sivi nyivi. Tan ra Cirenio cuvi ra ra ndacá ñaha tandihí ñuu nu cuvi Siria. 3 Tan tandihí nyivi cuanuhu ñi ñuu ñi, tyin cua ndaca ñi sivi ñi. 4 Yacan quee ra José ñuu Nazaret tsa canyí Galilea. Tan cuahán ra ñuu Belén tsa canyí Judea, nu cacu ra rey David, tyin tata ra David cuvi ra. 5 Cuahán ra cuandacá ra sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña. 6 Tan tsa ndi yucú ca ñi ñuu Belén ican tan quitsaha cuuhvi tsitsi ña tyin tsa cua cacu sehe ña. 7 Tan ican cacu sehe nuu ña. Tan cavá nuu ña jahma tsi ra. Tan nacaquin ña tsi ra tsitsi iin canuva nu tsatsí quiti itya. Tyin ña ñihí ñi iin vehe coo ñi.

Cuhva cahan ángel tsihin ra jahá cuenda mbee

8 Yatyin ñi ñuu Belén can yucú ra jahá cuenda mbee tsa tsacuaa. 9 Tan sana iñi ra naha quituví iin ángel Nyoo. Tan jandunditsin Jutu yo Nyoo tanií cahnu nu yucú ra naha. Tan nayuhví xaan ra naha.

10 —Ña nayuhvi ndo —catyí ángel can—. Tyin vatsí cahan yu iin tsa vaha xaan tsihin ndo. Sií xaan cua cuñí tandihi cuíi maa nyívi tsa cuenda tsi. 11 Vityin nda ñuu ra David cacu iin ra cua jacacu tsi nyívi. Cuví ra Cristo, ra cuví Jutu Mañi yo. 12 Tan tsihin cuhva ihya cua nacoto ndo tsi ra: cua nañihi ndo tsi ra lee ican, cavá nuu ra jahma tan canyí ra tsitsi iin canuva nu tsatsí quití —catyí ángel can tsihin ra jahá cuenda mbee can.

13 Tan juvin ñi cuhva ican quituví cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

14 Cahnu xaan cuví Nyoo, ra nyaá gloria.

Tan nu ñuhu ñayívi, na coo tsa vaha añaíma nyívi tsa ñihí tumañi iñi Nyoo, catyí ra ángel naha ra.

15 Tacan tan tsa cuanuhu ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacoto tsi yo —catyí ra naha.

16 Tacan tan numi xaan cuahán ra naha, tan nañihi

ra naha tsi ra lee can tsihin ña María tan tsihin ra José. Tan canyí ra lee can tsitsi iin canuva nu tsatsí quití itya. 17 Tan cuhva tsa nyehe ra naha tsi ra, quitsaha natuhún ra naha tandihi tuhun cahan ángel tsihin ra naha tsa cuenda lee ican tsihin ñi. 18 Tan tandihi nyívi tsa tsiñi tuhun caahán ra naha, iyo xaan cuñí ñi. 19 Maa tyin ña María naquihin cuenda ña tuhun ican tsitsi añaíma ña, tan tandihi tuhun ican tsicá iñi ña. 20 Tan cuanuhu ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihi tsa nyehe ra naha tan tsa tsiñi ra naha. Tyin cundaq cuhva tsa catyí ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

21 Tsa ndu una quívi ra Jesús, tan tyaa ñi tuñi Nyoo tsi ra tyin tacan catyí tuhun tsahnu maa ñi. Tan jacunañi ñi Jesús tsi ra. Juvín ñi maa sívi tsa catyí ángel tsihin ña María quívi tsa ndi cumañi ca cahun ra Jesús tsitsi ña.

22 Tan tsa yaha quívi cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo. 23 Tacan ñi javaha ñi tyin catyí ley Nyoo tyin: “Tandihí sehe nuu ñi tsa cuví rayí, cua tyaa cuenda ñi tsi ra ndaha Jutu yo Nyoo”, catyí ley ican. 24 Tan tsahan

ñi tsijamañi ñi uvi taahan quití, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

²⁵ Tan quivi can iyó iin ra ñuu Jerusalén nañi ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihi ca nyivi ñuu Israel ican. Tan nyaá Tatyí li Nyoo tsihin ra Simeón. ²⁶ Tan jacoto Tatyí li tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo. ²⁷ Tan Tatyí li jacuhun ra tsi ra Simeón can nda vehe ñuhu. Tan juvin ñi kuhva can tsaá jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi kuhva catyí maa ley. ²⁸ Tan kuhva tsa tsaá ñi nu nyaá ra Simeón tan quihin ra Simeón tsi ra Jesús. Tan tyihí jucun ndaha ra tsi ra. Tacan tan quitsahá jacahnú ra tsi Nyoo, tan catyí ra:

²⁹ —Jutu Mañi yu, vityin tsa cundaá kuhva tsa catyí maa un tsihin yu, tsa cuví yu musu un, cuví jaña ndaha un tsi yu vityin, tan na cúu yu tsihin tsa vaha.

³⁰ Tyin tsa nyehe tsihin nuu yu tsi ra cua jacacu tsi ndi.

³¹ Tsa iyó ra ihya ityi nuu tandihi nyivi.

³² Tan cua cuvi ra ñuhu tsa cua jandunditsin aña nyivi tsa ñavin nyivi Israel cuví.

Tan cahnu ca cua jaha ra tsi nyivi Israel, tsa cuví ndi nyivi cuenda maa un —catyí ra Simeón.

³³ Tan ra José tsihin sihi ra Jesús, iyo xaan cuñí ñi tsa tsiñi ñi tsa cahan ra Simeón tsa cuenda lee ican. ³⁴ Tacan tan tsican tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehe tsi lee ihya. Cuaha xaan nyivi Israel ñuu Nyoo cua tsinu iñi tsi ra quivi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaá ra tsi ra tan cuví ra tumaa seña tsa cuenda yo. ³⁵ Tacan tan coto tandihi yo náa tsicá iñi nyivi tun tsinú iñi ñi o ña tsinú iñi ñi tsi ra. Maa tyin tsa cuenda yooho, María, tsehe cuví tumaa iin mityi xaan tsa cua yaha aña un —catyí ra Simeón tsihin ña.

³⁶ Tan ican, tsitsi vehe ñuhu cahnu can, nyí tucu iin ñaha tsa cuví ndusu yuhu Nyoo. Nañi ña Ana, tan sehe ra Fanuel, iin ra cuvi tata ra Aser, cuví tsi ña. Tan tsa tsahnu xaan ña. Tan nda luhlu ña tan tindahá ña, maa tyin utsa cuiya ñi tsicoo ña tsihin yi ña tan tsihi ra. ³⁷ Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicán tahvi ña tan iyó nyitya ña. ³⁸ Tan juvin ñi tsa ndi nyí ca ra José tan ña María tsihin lee ican, tan tsaá ña Ana nu yucú ñi. Tan quitsahá nacuhvá ña tyahvi nyoo tsi Nyoo. Tan

cahan ña tuhun ra Jesús tsihin tandihí nyiví tsa yucú ican, nyiví tsa ndatú tsa cacu ñuu Jerusalén.

Nu cuanuhu ñi nda ñuu Nazaret

³⁹ Tacan tan tsa yaha tsa javaha ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhu ñi nda ñuu Nazaret tsa canyí Galilea nu cuví ñuu maa ñi. ⁴⁰ Tan ra luhlu Jesús vatsí cuahnu ca ra. Tan cua ndunye ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

Nu cahan ra luhlu Jesús tsihin ra maestro cuenda ley vehe ñuhu naha ra

⁴¹ Ra José tsihin sihi ra Jesús tuhvá ñi tsicá vico pascua nda ñuu Jerusalén ndihí ñi cuiya. ⁴² Tan tsa quita tsa utsi uvi cuiya ra Jesús, tan tsahan tandihí ñi nda ñuu Jerusalén, cuhva tuhun tsa iyó maa ñi. ⁴³ Tan quiví ndihí vico, tan vatsí nuhu ñi, maa tyin ra luhlu Jesús ndoo ra ñuu Jerusalén can. Tan ña jaha jutu ra tan sihi ra cuenda. ⁴⁴ Tsicá iñi maa ñi tyin vatsí maa ra tyañu tandihí nyiví ican. Tan ndihí iin quiví tsicá ityí ñi. Tacan tan quitsaha nanducú ñi tsi ra tyañu nyiví nacotó tsi ñi. ⁴⁵ Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

⁴⁶ Tan tsa yaha uñi quiví tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley

vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha. ⁴⁷ Tan tandihí nyiví tsiñi tsa caahán ra, iyo xaan cuñi ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra. ⁴⁸ Cuhva tsa nyehe jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javaha un tyehen? Jutu un tan yuhu tuñú xaan cuñi ndi tan nanducú xaan ndi tsi un —catyí ña.

⁴⁹ Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñi tsi nyehé yu tyiñu Jutu yu? —catyí ra.

⁵⁰ Maa tyin ña cutuñi iñi ñi tsa caahán ra tsihin ñi.

⁵¹ Tacan tan cuanuhu ra tsihin ñi nda ñuu Nazaret. Tan vaha javahá ra tyin tyaá yahvi ra tsi ñi. Tan sihi ra naquihin vaha ña tandihí tuhun ihya tsitsi aña ña.

⁵² Tan ra Jesús cua cuahnu ca ra tan tsaá ca tsa tsiñi tuñi jiñi ra. Tan sihi xaan cuñi Nyoo tsihin ra, tacan tucu nyiví, sihi xaan cuñi ñi tsihin ra.

3

Nu cahan ra Juan, ra jacoondutyá tsi nyiví, tuhun Nyoo nuu tsiqui

(Mt. 3.1-12; Mr. 1.1-8; Jn. 1.19-28)

¹ Tsa quita tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea

tsihin Traconite. Tan ra Lisianas ndacá ñaha ra Abilinia quivi can. ² Tan ra Anás tsihin ra Caifás cuví ra naha jutu tsaahnu tsa cuví ityi nuu. Quivi can cahan Nyoo tsihin ra Juan sehe ra Zacarías iin nu tsiqui. ³ Tan ra Juan tsicá nuu ra tandihi ñuu tsa cayucú yatyin ñi yutya cahnú Jordán, caahán ra tuhun Nyoo tsihin nyivi. Tan catyí ra tsihin ñi tyin na ndu uvi ñi ñi cuatyí ñi tan coondutya ñi. Tacan tan Nyoo cua jaha ra tucahnú ñi cuatyí ñi, catyí ra. ⁴ Tumaa caahán tuhun tsa nyaá nu libru tsa tyaa ra Isaías, ra cuví ndusu yuhu Nyoo tahanan tsanaha. Tan catyí ra:

Cua tyaa soho yo ndusu ra nu caná tsaa ra nu tsiqui tan catyí ra:

“Nuña ndo iin ityi cuiti tan natyiso vaha ndo tsi ndo tyin tsa vatsi Jutu Mañi yo.

⁵ Tumaa tsa tahví ndo yucu tan jandutú ndo xahva cunu,

jandoó ndo ityi yacua, tan janduvahá ndo nu quiñi.

⁶ Tacan tan tandihi nyivi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahan ra Juan tsihin nyivi.

⁷ Tan tsa cuahán nyivi tsa cuñi ñi jacoondutya ra tsi ñi, tan catyí ra tsihin ñi:

—iNyooho cuví ndo tumaa tata coo! ¿A cuñi ndo tyin tsihin tsa coondutya ñi ndo tan ña cua tatsi tuñi ca Nyoo

tsi ndo? Ña cuvi. ⁸ Yacan ñasama ndo cuhva iyó ndo, na nyehe yo tyin tsa ndu uvi ñi ndo cuatyí ndo nuu Nyoo. Tan ña nduyaa ndo cahan ndo tyin nyivi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyivi ra Abraham. ⁹ Tsa ndatú yatsa Nyoo tsi tandihi ndo tyin cuví ndo tumaa yutun tsa ña tsahá tsi vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

¹⁰ Tacan tan nducu tuhun ñi tsi ra tan catyí ñi:

—¿Tan nácaa javaha ndi? —catyí ñi.

¹¹ Tacan tan nacahan ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

¹² Tan tsaa tucu ra tsa tavá xuhun cuenda ra ndacá ñaha nda ñuu Roma, tsa cuñi ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

¹³ Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴ Tacan tan tsicá tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyívi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoo ndo vaha tshin yahvi ndo —catyí ra Juan.

¹⁵ Tan quívi can tandihí nyívi ndatú ñi tsi ra Cristo. Tan tsicá ñi ñi tun juvin ra Juan cuví Cristo. ¹⁶ Maa tyin ra Juan catyí ra tshin tandihí ñi:

—Tsa nditsa tyin jacoondutyá yu tsi ndo tshin ndutyá. Maa tyin vatsí inga ra tsa cahnu ca cuví, tan iyó ca tunyee ñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuví yu musu ra tan ndatsi yu ñi nditsan ra. Tan ra ican cua jacoondutyá ra tsi ndo tshin Tatyí Ii Nyoo, tan tshin ñuhú ihñi. ¹⁷ Tan ra ican ndahá ra pala tyin cua jandava ra trigu. Cua natava sñn ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tshin trigu can tshin ñuhú tsa ña cua ndahva maa —catyí ra Juan tshin ñi.

¹⁸ Tan tacan cahán ra Juan tshin nyívi can. Tan náa ndihí ca maa kuhva cahán ra tan jacoto ra tsi ñi nácaa tsa cua quitsi Sehe Nyoo. ¹⁹ Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihñin ra tsi ña Herodías, ñasihí ra Felipe, yañi ra, tshin tsa cuenda náa ndihí tsa ña vaha javahá ra. ²⁰ Maa

tyin ña tyaa yahvi maa ra Herodes tuhun cahán ra Juan. Nu ndihí tuhun tinyí ra tsi ra Juan tsitsi vehe caa.

Nu jacoondutyá ra Juan tsi ra Jesucristo

(Mt. 3.13-17; Mr. 1.9-11)

²¹ Tsa ndi cumañi ca cuhun ra Juan vehe caa tan jacoondutyá ra tsi tandihí nyívi. Tan jacoondutyá ndihí ra tsi ra Jesús. Tsa yaha tsicoondutyá ra, tsican tahvi ra tsi Nyoo, tacan tan nuña andívi. ²² Tan nuu Tatyí Ii Nyoo síqui ra tumaa iin paloma. Tan cahán iin ndusu ityí síqui andívi, tan catyí tsi tyehen:

—Yooho cuví Sehe yu, tan cuñí xaan yu tsi un. Tan sñi xaan cuñí yu nyehé yu tsi un —catyí ndusu ican tshin ra.

Cuhva quitsi tata ra Jesucristo

(Mt. 1.1-17)

²³ Tan tsa iyó maa tan oco utsi cuiya ra Jesús tan quitsaha jahá tyiñu ra tyiñu Nyoo. Tan tandihí nyívi cuñí maa ñi tyin sehe ra José cuví tsi ra. Tan ra José, sehe ra Elí cuví tsi ra. ²⁴ Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra. ²⁵ Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra. ²⁶ Tan ra Nagai, sehe ra Maat

cuv̄i tsi ra. Tan ra Maat, sehe ra Matatías cuv̄i tsi ra. Tan ra Matatías, sehe ra Semei cuv̄i tsi ra. Tan ra Semei, sehe ra José cuv̄i tsi ra. Tan ra José, sehe ra Judá cuv̄i tsi ra. ²⁷ Tan ra Judá, sehe ra Joana cuv̄i tsi ra. Tan ra Joana, sehe ra Resa cuv̄i tsi ra. Tan ra Resa, sehe ra Zorobabel cuv̄i tsi ra. Tan ra Zorobabel, sehe ra Salatiel cuv̄i tsi ra. Tan ra Salatiel, sehe ra Neri cuv̄i tsi ra. ²⁸ Tan ra Neri, sehe ra Melqui cuv̄i tsi ra. Tan ra Melqui, sehe ra Adi cuv̄i tsi ra. Tan ra Adi, sehe ra Cosam cuv̄i tsi ra. Tan ra Cosam, sehe ra Elmodam cuv̄i tsi ra. Tan ra Elmodam, sehe ra Er cuv̄i tsi ra. ²⁹ Tan ra Er, sehe ra Josué cuv̄i tsi ra. Tan ra Josué, sehe ra Eliezer cuv̄i tsi ra. Tan ra Eliezer, sehe ra Jorim cuv̄i tsi ra. Tan ra Jorim, sehe ra Matat cuv̄i tsi ra. ³⁰ Tan ra Matat, sehe ra Leví cuv̄i tsi ra. Tan ra Leví, sehe ra Simeón cuv̄i tsi ra. Tan ra Simeón, sehe ra Judá cuv̄i tsi ra. Tan ra Judá, sehe ra José cuv̄i tsi ra. Tan ra José, sehe ra Jonán cuv̄i tsi ra. Tan ra Jonán, sehe ra Eliaquim cuv̄i tsi ra. ³¹ Tan ra Eliaquim, sehe ra Melea cuv̄i tsi ra. Tan ra Melea, sehe ra Mainán cuv̄i tsi ra. Tan ra Mainán, sehe ra Matata cuv̄i tsi ra. Tan ra Matata, sehe ra Natán cuv̄i tsi ra. ³² Tan ra Natán, sehe ra David cuv̄i tsi ra. Tan ra David, sehe ra Isaí cuv̄i tsi ra. Tan ra Isaí, sehe ra Obed cuv̄i tsi ra. Tan ra Obed, sehe ra Booz cuv̄i tsi ra. Tan ra Booz, sehe ra Salmón cuv̄i tsi ra. Tan ra Salmón, sehe

ra Naasón cuv̄i tsi ra. ³³ Tan ra Naasón, sehe ra Aminadab cuv̄i tsi ra. Tan ra Aminadab, sehe ra Aram cuv̄i tsi ra. Tan ra Aram, sehe ra Esrom cuv̄i tsi ra. Tan ra Esrom, sehe ra Fares cuv̄i tsi ra. Tan ra Fares, sehe ra Judá cuv̄i tsi ra. ³⁴ Tan ra Judá, sehe ra Jacob cuv̄i tsi ra. Tan ra Jacob, sehe ra Isaac cuv̄i tsi ra. Tan ra Isaac, sehe ra Abraham cuv̄i tsi ra. Tan ra Abraham, sehe ra Taré cuv̄i tsi ra. Tan ra Taré, sehe ra Nacor cuv̄i tsi ra. ³⁵ Tan ra Nacor, sehe ra Serug cuv̄i tsi ra. Tan ra Serug, sehe ra Ragau cuv̄i tsi ra. Tan ra Ragau, sehe ra Peleg cuv̄i tsi ra. Tan ra Peleg, sehe ra Heber cuv̄i tsi ra. Tan ra Heber, sehe ra Sala cuv̄i tsi ra. ³⁶ Tan ra Sala, sehe ra Cainán cuv̄i tsi ra. Tan ra Cainán, sehe ra Arfaxad cuv̄i tsi ra. Tan ra Arfaxad, sehe ra Sem cuv̄i tsi ra. Tan ra Sem, sehe ra Noé cuv̄i tsi ra. Tan ra Noé, sehe ra Lamec cuv̄i tsi ra. ³⁷ Tan ra Lamec, sehe ra Matusalén cuv̄i tsi ra. Tan ra Matusalén, sehe ra Enoc cuv̄i tsi ra. Tan ra Enoc, sehe ra Jared cuv̄i tsi ra. Tan ra Jared, sehe ra Mahalaleel cuv̄i tsi ra. Tan ra Mahalaleel, sehe ra Cainán cuv̄i tsi ra. ³⁸ Tan ra Cainán, sehe ra Enós cuv̄i tsi ra. Tan ra Enós, sehe ra Set cuv̄i tsi ra. Tan ra Set, sehe ra Adán cuv̄i tsi ra. Tan ra Adán, sehe Nyoo cuv̄i tsi ra.

4

Nu nducū kuhva nu ña vaha tsi ra Jesús
(Mt. 4.1-11; Mr. 1.12-13)

¹Tan ñihi nyaá Tatyí Ii Nyoo tsihin ra Jesús tsa yaha tsi-coondutyá ra, quita ra yutya Jordán tan cuanuhú ra. Tan quihín Tatyí Ii Nyoo tsi ra, tan tsahan ra iin nu cuví nu tsiquí ² nu tsinyí ra uvi xico nduvi. Tan ña tsatsí maa ra tandihí quívi ícan. Yaha can tan quítsí tsa tsisocó ra. Tan nducú cuhva nu ña vaha tsi ra. ³Tan catyí nu tsihin ra:

—Tatun juvin Sehe Nyoo cuví tsi un, cahan tsihin yuu ihya, na nanduvi tsi paan catsi un.

⁴Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsí nyívi coonyito ñi, tyin coonyito ñi tsihin tandihí tuhun caahán Nyoo —catyí ra Jesús tsihin nu ña vaha.

⁵Tacan tan quihín nu ña vaha tsi ra Jesús, cuahán ra iin jiñi yucu sucun. Tan iin yaha ñi janaha nu tandihí tsa cuca nu ndacá ñaha nu ñuu ñayívi ihya tsi ra Jesús. ⁶Tan catyí nu tsihin ra:

—Cuhva yu tandihí tsa nyehé un tun cuñí un tyin maa Nyoo tsaha tsa cundaca ñaha yu tandihí can, tan ndáa ra cuñí yu cuhva yu can, cuví tsii ra. ⁷Tatun yooho tan cuiñi tsiti un nuu yu ihya tan jacahnu un tsi yu, tandihí can cua cuhva yu tsi un —catyí nu ña vaha tsihin ra.

⁸Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu

Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahán tsi javaha un.”

⁹Tacan tan quihín nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaá nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuando nu ñuhu. ¹⁰Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuenda ra naha tsi un.

¹¹Cua janahndi ra naha tsi un. Tan ña cua nañi tsaha un nu yuu.

¹²Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³Tan tsa ndihí nducu cuhva nu ña vaha tsi ra Jesús, tacan tan nacoó nuu nu tsi ra.

Nu quítsaha caahán ra Jesús tuhun Nyoo tsihin nyívi (Mt. 4.12-17; Mr. 1.14-15)

¹⁴Tan tsa yaha tsa nducu cuhva nu ña vaha tsi ra Jesús tan cuanuhú ra nda Galilea tsihin tsa tsitú tunyee iñi Tatyí Ii Nyoo tsi ra. Tan tsitó nyívi tuhun ra ñi cahnu Galilea can. ¹⁵Tan jacuaha ra tsi nyívi nu cuví vehe ñuhu tandihí ñi ñuu. Tan tandihí ñi jacahnu ñi tsi ra.

Tsa tsaq nyico ra Jesús ñuu Nazaret nu tsahnu ra (Mt. 13.53-58; Mr. 6.1-6)

16 Tacan tan tsaꞗ nyico ra Jesús ñuu Nazaret nu tsañu ra. Tan iin quiví quitatú nyiví, quihví ra tsitsi vehe ñuhu, tumaa tsa tuhvá maa ra tsicá. Tan nduvitá ra cua cahví ra tuhun Nyoo. 17 Tan tsaha ra naha iin libru tsa tyaa ra Isaías ra cuví ndusu yuhu Nyoo. Tan cuhva tsa nuña ra, nañihí ra iin nu catyí tsi:

18 Iyó Tatyí Ii Nyoo tsihin yu, tyin maa Nyoo tava tyiñu tsi yu

cahan yu tuhun ra tsihin nyiví ndaahvi.

Tan janduvaha yu tsi nyiví tsa uhvi añima.

Tan maa ra tava tyiñu tsi yu tyin jacoto yu tsi nyiví yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyiví cuaa.

Tan cua nacao nuña yu tsi nyiví tsa iyó tundoho.

19 Tan jacoto yu tsi nyiví tyin tsa quita quiví tsa nyaá Nyoo tumañi iñi tsihin ñi.

20 Tacan tan ndihí cahví ra tan nacasí ra nuu libru can. Tan nacuhva ra tsi iin ra tsa jatyinyeé tsihin tyiñu vehe ñuhu can. Tan tsinyaa ra Jesús. Tacan tan tandihí nyiví tsa nyecú ican, ndoo ñi tsa nyehé ñi tsi ra. 21 Tacan tan catyí ra tsihin ñi:

—Vityin quiví ihya tsa cundaꞗ cuhva catyí tuhun Nyoo tsa cahví yu tsiñi ndo —catyí ra Jesús tsihin ñi.

22 Tan tandihí nyiví tsa nyecú can, vaha xaan cahan ñi tuhun ra. Tan iyo xaan cuñí ñi tsihin tandihí tsa vaha tsa cahan ra. Tacan tan quitsaha tsicá tuhun tahan ñi:

—¿A ñavin ra ihya cuví sehe ra José?

23 Tan nacahan ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyiví, janduvaha jihna tsi maa un.” Tan cuñí tucu ndo catyí ndo: “Tandihí tsa javaha un ñuu Capernaum tsitó ndi, javaha ndihí tucu can ñuu maa un ihya.”

24 Tan cahan ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyiví ñuu ra naha tsi ra naha. 25 Tan tsa nditsa tyin cuaha xaan ñi ndaahvi tsa tsihi yí tsi-coo Israel ihya quiví tsa tava Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsicá ra cahan ra tuhun Nyoo. Tan quiví can ña cuun maa savi uñi cuiya sasava. Tan tsi-coo tama cahnu xaan. 26 Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elías cuahán ra. Maa tyin tsahan ra jatyinyeé ra tsi iin ñaha ndaahvi tsihi yí tsa tsicoo ñuu Sarepta tsa canyií Sidón.

27 Tacan tucu quiví tsicá inga ra cuví ndusu yuhu Nyoo cuenda nyiví Israel, ra Eliseo. Cuaha xaan ra cuuhví tsihin cuehe tyaaahyú tsicoo

Israel ihya, tan ndi intuhun ra naha tan ña nduvaha ra naha. Nduvaha intuhun ñi ra Naamán ra quee ñuu Siria —catyí ra Jesús.

²⁸ Tsa yaha tsiñi ñi tandihi tuhun can, tandihi nyivi tsa yucú tsitsi vehe ñuhu can xaan xaan cuñi ñi cuví. ²⁹ Tan nduvita ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñi ñi janacava ñi tsi ra ican. ³⁰ Maa tyin ra Jesús yaha ra tyañu ñi tan cuahán ra.

Nu quita tatyí ña vaha tsa yihí tsi iin rayi

(Mr. 1.21-28)

³¹ Tan cuahán ra Jesús ñuu Capernaum tsa canyí Galilea. Tan jacuahá ra tsi nyivi tsitsi vehe ñuhu tandihi sauru, quivi tuhvá nyivi quitatú. ³² Tan iyo xaan cuñi ñi tsihin tsa cahan ra. Tyin ñihi xaan cahan ra tumaa tuhvá ra cumí tyiñu caahán. ³³ Tan iin quivi nyí ra Jesús vehe ñuhu tan iin ra yihí tatyí ña vaha catyí ra caná tsa ra jahá tatyí ña vaha can:

³⁴ —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu naco-tó vaha yu tsi un. Yooho cuví Sehe Ii Nyoo.

³⁵ Tacan tan nduxaan ra Jesús tsi tatyí ña vaha tsa yihí tsi ra can tan catyí ra:

—Taxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyivi nduva ra can nu ñuhu jahá tatyí ña vaha can, tan nduve ca náa javaha nu tsi ra can. Tan quita nu cuahán nu. ³⁶ Tandihi nyivi tsa nyehe can, iyo xaan cuñi ñi tan yuuhví ñi cuví. Tan quitsaha tsicá tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyí ña vaha tan ñihi caahán ra, tan quita tatyí ña vaha ican —catyí ñi.

³⁷ Tacan tan tandihi ñi ityi quita natuhun nyivi tuhun ra Jesús.

Nu janduvaha ra Jesús tsi ña tyiso ra Simón Pedro

(Mt. 8.14-15; Mr. 1.29-31)

³⁸ Tacan tan quita ra Jesús tsitsi vehe ñuhu can. Tan cuahán ra vehe ra Simón. Tan nu tsaá ra can, canyí ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña. ³⁹ Tacan tan natuhva ra nu canyí ña tan nacañi nuu ra jiñi ra tan cahan ra tsihin cahñi can na quita tsi. Tacan tan quita cahñi can iin yaha ñi, tan nduvita ña can, quitsaha nanducú ña tsa catsi ra Jesús.

Nu cuaha xaan nyivi cuuhví janduvaha ra Jesús

(Mt. 8.16-17; Mr. 1.32-34)

⁴⁰ Tan tsa tyiso ñicanyii, tandihi nyivi tsa iyó ñi cuuhví vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan

janduvahā ra tsi ñi. ⁴¹ Tan cuaha xaan nyivi quita tatyi ña vaha tan cana tsa nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaān ra tsi nahnu tan ña tsaha ra tsa cahan nahnu, tyin tsitó nahnu tyin juvin ra cuví Cristo.

Nu tsica ra Jesús cahan ra tuhun Nyoo tandihi ñuu cayucú Galilea

(Mr. 1.35-39)

⁴² Tsa tuvi inga quivi, tan quee ra Jesús ñuu can. Tan cuahán ra iin nu taxin caá. Tan nyivi nanducú ñi tsi ra. Tan tsaā ñi nda nu nyí ra ican. Tan cuñí ñi tsa ña cuhun ca ra. ⁴³ Tacan tan catyí ra Jesús tsihin ñi:

—Ndi cuñí ca tsi jacoto yu tsi nyivi tandihi ca ñuu nácaa tan quihvi Nyoo añima ñi tan cundaca ñaha ra tsi ñi. Tyin yacan cuenda vatsí yu nu ñuhu ñayivi ihya.

⁴⁴ Tan tacan ñi tsicá ra Jesús caahán ra tuhun Nyoo vehe ñuhu tandihi ñi ñuu tsa cayucú Galilea.

5

Nu tsaha ra Jesús ndatu tsa cuaha xaan tyaca ñihí ra naha
(Mt 4.18-22; Mr. 1.16-20)

¹ Iin quivi nyaá ra Jesús yuhu miñi nu cuví Genesaret. Tan tsaā cuaha xaan nyivi, tyin cuñí ñi tyaa soho ñi tuhun Nyoo. Tan tihin xaan nyí ra Jesús tyañu ñi. ² Tan nyehē ra uvi taahan yutun ndoo yatyin ñi yuhu miñi ican. Yoñi yucú tsitsi yutun

ndoo can tyin tsa quita ra tñin tyaca. Tan nacatyá ra naha traya. ³ Tacan tan quihvi ra Jesús tsitsi iin yutun ndoo tsa cuví tsii ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaā ra Jesús tsitsi yutun ndoo can. Tan quitsaha caahán ra tsihin nyivi. ⁴ Cuhva tsa ndihí cahan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tñin ndo tyaca.

⁵ Tan nacahan ra Simón tan catyí ra:

—Maestro, tsa jahā tyiñu xaan ndi ñiñu maa tan ndi in-tuhun maa tyaca ña ñihí ndi. Maa tyin tatun maa un catyí, cua jacuhun nyico ndi traya.

⁶ Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsaha tyaahnyá tsihin tsa vee tyaca can. ⁷ Tacan tan jandahā ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaā ra can naha ra. Tan jacutu ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca. ⁸ Tsa nyehē ra Simón Pedro tsa cuví tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra

iyó cuatyí cuví yu —catyí ra Simón.

⁹ Tyin ra Simón tsihin tandihí ra yucú tsihin ra, nayuhví xaan ra naha tsa cuenda tsa cuaha xaan tyaca ñihí ra naha. ¹⁰ Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhví xaan ra naha. Tan ra Jesús catyí ra tsihin ra Simón:

—Ña nayuhví un, tyin vityin tan nda nu cuahán ca tsi ityí nuu, tumaa tsa tñin ndo tyaca ihya, tacan cua ñihi un nyívi cua cuví nyívi Nyoo, tan cua tava un tsi ñi nu caquiñi, na quihví ñi cuenda Nyoo —catyí ra Jesús tsihin ra Simón.

¹¹ Tacan tan tava ra naha yutun ndoo can nda nu ñuhu ityí. Tan nacoꝝ ra naha tandihí tsa iyó tsi ra naha. Tan cuahán ra naha tsihin ra Jesús.

Nu janduvaha ra Jesús tsi iin ra ndohó cuehe tyaaHyú (Mt 8.1-4; Mr. 1.40-45)

¹² Iin quívi nyí ra Jesús iin ñuu nu iyó iin ra ndohó cuehe tyaaHyú. Tan tsa nyehe ra tsi ra Jesús, tan tsicuiñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahví ra tsihin ra Jesús, tan catyí ra:

—Jutu Mañi yu, tun yooho tan cuñi un, cuví janduvaha un tsi yu —catyí ra.

¹³ Tacan tan tyiso ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin

—catyí ra Jesús tsihin ra cuuhví can.

Tan iin yaha ñi nduvaha ra. ¹⁴ Tacan tan catyí ra Jesús tsihin ra:

—Coto catyí tuhun un tsihin nyívi. Intuhun ñi tsa cua cahan yu tsihin un, cuaahan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaa ra Moisés, tan cua cuví tsi iin tsandaa tsi ra jutu can tan tsi nyívi tyin tsa nduvaha un —catyí ra Jesús tsihin ra.

¹⁵ Vasu ndi maa tsa ña cuñi ra Jesús tsa coto nyívi, ñihi ca quitá tuhun ra. Tan cuaha xaan nyívi ndu iin tyin cuñi ñi tyaa soho ñi tsa caahán ra tan janduvaha ra tsi ñi. ¹⁶ Maa tyin ra Jesús, jatsiyó, jatsiyó ñi ra tsi ra nu iyó nyívi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvaha ra Jesús tsi iin ra xii

(Mt. 9.1-8; Mr. 2.1-12)

¹⁷ Iin quívi jacuahá ra Jesús tsi nyívi. Tan yucú juhva ra fariseo, ra tyaa yahvi xaan ley Nyoo tsa tyaa ra Moisés tsanaha. Tan yucú tucu juhva ra maestro cuenda ley vehe ñuhu ican. Quita ra naha ñuu Jerusalén, tan inga ñuu nyihi tani cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyívi cuuhví. ¹⁸ Tacan tan tsaá ra naha tan nyiso ra naha iin ra cuuhví tsihin cuehe xii nu tsito. Tan cuñi ra naha quihví ra naha tsitsi vehe tan caquin ra naha tsi ra

cuuhví can nu nyíí ra Jesús.
 19 Maa tyin ña ñihí ra naha nu quihví ra naha tyin tuvi xaan nyívi. Tacan tan ndaa ra naha ityi jíñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyíí ra Jesús tyañu nu tuvi nyívi can. 20 Tan nyehe ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoo tucahnu iñi tsi un, tsa cuenda cuatyí un —catyí ra Jesús tsihin ra can.

21 Tacan tan ra maestro cuenda ley vehe ñuhu tsihin ra cuví fariseo, quitsaha tsicá iñi ra naha: “¿Yóo ra cuví ra ihya? Tsicoo cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoo tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñí ra naha tsicá iñi ra naha.

22 Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan? 23 ¿Náa tsa yí ca catyí yo? ¿A yí ca catyí yo: “Cuatyí un tsa yaha ndatsi”, a yí ca catyí yo tsihin iin nyívi xii: “Nduvita tan caa un”?

24 Maa tyin vityin cua janaha yu tsi ndo tyin yuhu Rayí tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yaha cahan ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

25 Tan nduvita ra can, tan naquihin ra tsító ra. Tan

cuanuhu ra yuvehe ra, juvin ñi jacahnú ra tsi Nyoo. 26 Tandihí nyívi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví (Mt. 9.9-13; Mr. 2.13-17)

27 Yaha can tan quita ra Jesús vehe can. Tan nanyehe ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañí ra Leví. Tan nyaá ra nu tyahví nyívi. Tan catyí ra Jesús tsihin ra:

—Cohon tsihin yu —catyí ra.

28 Tacan tan nduvita ra Leví. Tan nacoo ra tandihí tsa iyó tsi ra. Tan cuahán ra tsihin ra Jesús.

29 Tacan tan javaha ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyívi. 30 Tan ra fariseo naha ra tsihin ra cuví maestro cuenda ley vehe ñuhu naha ra, quitsaha caahán nyaa ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

31 Tan ra Jesús nacahan ra, tan catyí ra:

—Ña tsiñí ñuhu doctor tsi ra tsa vaha maa. Ra cuuhví, cuví ra tsiñí ñuhu doctor. 32 Yuhu ña vatsí yu jatyinyee yu tsi nyívi tsa tsicá iñi tyin vaha

ñi, vatsí yu jatyinyee yu tsi nyívi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janaha ra Jesús tyin tatun tsa cuahán ra cua coo nyitya nyívi nyicún tsi ra

(Mt. 9.14-15; Mr. 2.18-20)

³³ Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsi-coó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yooho, ndihí quívi tsatsí ra naha tan tsihí ra naha. ¿Nacuví? —catyí ra naha.

³⁴ Tan nacahan ra Jesús, tan catyí ra:

—¿A cuví coonyitya nyívi yucú vico tindaha jaha ndo tatun nyíi ra tsa cua tindaha tsihin ñi? Ña cuvi. [Tyin sii cuñí ñi, tan cuñí ñi catsi ñi.] ³⁵ Maa tyin cua quita quívi tsa cua jatsiyo ra tindaha ícan tsi ra nu yucú ñi. Tacan tan cua coonyitya ñi.

Nu jacuahá ra Jesús tyin ña nacatsí tahan tuhun tsahnu tsa iyó nyívi tsihin tuhun tsa jacuahá ra

(Mt. 9.16-17; Mr. 2.21-22)

³⁶ Tacan tan cahán tucu ra Jesús iin cuhva tsihin nyívi, tan catyí ra:

—Yoñi tsaahnyá iin jahma tsa, tan naquicú ñi tsihin jahma tuuhu. Tyin tatun javaha ñi tacan, nandiyí jahma tsa can. Tan ña ndoo

vaha tsi tsihin jahma tuuhu can.

³⁷ Tan tacan tucu, ña cuví tyihi nyívi vinu tsa tsitsi ñi tsaahnu. Tyin cua tyahnya ñi can tsihin vinu tsa can. Tan cua tiví vinu can tan tiví ndihí tucu ñi tsaahnu can. ³⁸ Yacan cuenda taahán tsi tyihi yo vinu tsa tsitsi ñi tsa. Tyin tacan tan nduvi taahan tsi tan cua jaha cuenda tahan tsi itsi. ³⁹ Tan yoñi tsihí vinu tsahnu, tan cuñí ñi coho ñi vinu tsa. Tyin catyí ñi, vaha ca vinu tsahnu. [Vinu tsahnu can cuñí tsi catyí tyin cuví tsi cuhva iyó maa ñi.]

6

Nu tuhun ra tsicá tsihin ra Jesús yoco itya trigu quívi quitatú nyívi

(Mt. 12.1-8; Mr. 2.23-28)

¹ Iin quívi quitatú nyívi, yaha ra Jesús mahñu tsa tatsi nyívi. Tan ra tsicá tsihin ra tuhún ra naha yoco trigu. Tan jocon ra naha can tsihin ndaha ra naha. Tan tsatsi ra naha tsiti can. ² Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quívi quitatú yo? ³ Tan nacahan ra Jesús, tan catyí ra:

—¿A ñaha ca cahvi ndo nu tsahá cuenda tsi tsa javaha ra David tan ra cutahán tsihin ra quívi tsa tsisoco ra naha? ⁴ Quihví ra tsitsi vehe Nyoo.

Tan quihín ra paan tsa tyiso nyívi nuu altar Nyoo. Tan tsatsi ra. Tan tsaha ndihí ra tsi ra tsa cutahán tsihin ra. Tan maa ñi maa ra cuví jutu

naha ra taahán tsi catsi paan can —catyí ra Jesús.

⁵ Tacan tan catyí ra Jesús:

—Rayii tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quivi quitatú yo —catyí ra.

Nu janduvaha ra Jesús tsi iin ra na ityi ndaha

(Mt. 12.9-14; Mr. 3.1-6)

⁶ Inga quivi quitatú nyivi quihvi ra Jesús tsitsi vehe ñuhu. Tan quitsaha jacuahá ra tsi nyivi. Tan nyehe ra tsi iin ra tsa na ityi ndaha cuaha. ⁷ Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quivi quitatú nyivi, tyin tacan tan cuvi tyaa ra naha cuatyí tsi ra Jesús.

⁸ Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityi ndaha can:

—Nduvita. Cunyaa nyityi mahñu ra naha ihya.

Tacan tan ra na ityi ndaha can nduvita ra. Tan tsinyaa nyityi ra mahñu ra naha.

⁹ Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quivi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyivi, o cahñi ndihi yo tsi ñi?

¹⁰ Tacan tan ra Jesús nyehé ra intuhun intuhun ra naha. Yahá can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihi ra ndaha ra. Tan nduvaha ndaha ra. ¹¹ Maa tyin ra yucú ican naha ra, cuxaan ra naha. Tan quitsaha tsicá tuhun tahan ra naha tsi ra naha:

—¿Nacaa javaha yo tan cuvi casi yo nu caahán ra Jesús ihya? —catyí ra naha.

Nu nacatsi ra Jesús tsa utsi uvi taahan ra cua caca tyiñu ra

(Mt. 10.1-4; Mr. 3.13-19)

¹² Quivi ican ndaa ra Jesús iin yucu. Tan ñiñu maa tsican tahvi ra tsi Nyoo. ¹³ Tan tsa tuvi, cana ra tsi tandihi ra nyicún tsi ra. Tan nacatsi ra utsi uvi taahan ra naha. Tan jacunañi ra tsi ra naha apóstol, tan cuñí tsi catyi tsi “ra tsa tava tyiñu Nyoo”. ¹⁴ Tan ihya nyaá sivi tandihi tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé; ¹⁵ ra Mateo; ra Tomás; ra Jacobo, sehe ra Alfeo; tan ra Simón ra nyanaa cuví ra cuenda partido tsa cuñí cuhun cuatyí siqui ñuu Roma tsa ndacá ñaha tsi ñi; ¹⁶ tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

Nu jacuahá ra Jesús tsi nyivi cuaha

(Mt. 4.23-25)

¹⁷ Tacan tan nuu ra Jesús yucu ican tsihin tsa utsi uvi ra naha. Tan ndu iin nyivi tsa nyicún tsi ra tsaha yucu can. Tan tsaá cuaha tucu

nyivi quee ñuu Jerusalén tsihin tandihi ca ñuu cayucú Judea, tsihin tucu nyivi quee ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsaá ñi tyin tyaa soho ñi tuhun caahán ra Jesús. Tan tandihi nyivi cuuhví cuñí ñi tsa janduvaha ra tsi ñi. ¹⁸ Tan tandihi nyivi tsa yihí tatyí ña vaha janduvaha ra tsi ñi. ¹⁹ Tan tandihi ñi cuñí ñi tñin ñi tsi ra, tyin janduvaha ra tsi ñi tsihin tunyee iñi tsa iyó tsi ra.

Tsehe cahan ra Jesús tsihin nyivi tsa naquihin ndaahvi ra (Mt. 5.1-12)

²⁰ Tacan tan nanyehe ra Jesús tsi ra tsicá tsihin ra. Tan catyí ra tsihin ra naha:

—Tandihi nyooho tsa ndaahvi, sii xaan cua cuñi ndo, tyin taahán tsi cundaca ñaha Nyoo tsi ndo.

²¹ Tandihi nyooho tsa tsi socó vityin, sii xaan cua cuñi ndo. Tyin coo quivi ña cua cusoco ca maa ndo. Tan tandihi nyooho tsa tsacú tsa cuiihya cuñi ndo, sii xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa sii cuñi ndo.

²² Cusii iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyi ñi tyin nyivi ña vaha cuví ndo tyin tsinú iñi ndo tsi maa yu tsa cuví yu Rayii quee nda gloria. ²³ Sii cuñi ndo quivi can tyin tacan tucu javaha nyivi ñi tahañ tsanaha. Cuxaan ñi tsi ra cuví

ndusu yuhu Nyoo. Ndava ndo tsihin tsa sii cuñi ndo. Tyin cahnu xaan ndatu cua ñihi ndo nda gloria.

Tsehe cahan ra Jesús tsihin nyivi ña tsinú iñi tsi ra

²⁴ Maa tyin ndahvi nyooho, ñi cuca. Tyin vityin sii xaan cuñi ndo tsihin tandihi tsa cuca ndo. Maa tyin cua coo quivi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

²⁵ Tan ndahvi nyooho tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooho tsa sii cuñi vityin, ndahvi nyooho, tyin coo quivi cua coo ndo tucuiihya iñi. Tan cua vacu xaan ndo. ²⁶ Tan ndahvi nyooho tsa vaha caahán nyivi tuhun ndo. Tyin tacan caa tucu nyivi tsicoo tsanaha, vaha xaan cahan ñi tuhun ra tsa cahan tsa ña nditsa tsihin ñi.

Cuñi ndo tsi nyivi xaan iñi tsi ndo

(Mt. 5.38-48; 7.12)

²⁷ Tandihi nyooho tsa tsiñi tsa caahán yu, catyí yu tsihin ndo tyin: Cuñi ndo tsi nyivi xaan iñi tsi ndo. Javaha ndo tsa vaha tsihin nyivi tsa ndasi cuñi nyehe tsi ndo. ²⁸ Cahán ndo tsa vaha tsihin nyivi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyivi caahán nyaá tsi ndo. ²⁹ Tatun iin ra cañi iin tsiyo nuu ndo, cuhva ndihi ndo inga tsiyo, nacañi ndihi maa ra. Tatun iin ra quinyaá tsaqueta nditsí ndo,

cuhva ndihi ndo camiseta ndo. ³⁰ Cuhva ndo náa ndihi tsicán nyivi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi. ³¹ Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi.

³² Tatun cuñi ndo tsi maa ñi maa nyivi tsa cuñi tsi ndo, nduve tsa vaha javahá ndo. Tyin tacan icá tucu nyivi quiñi iyó. ³³ Tan tatun tsihin nyivi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyivi, nduve tsa vaha icá ndo cuví can, tyin nyivi caquiñi, tacan icá tucu ñi can.

³⁴ Tatun javahá ndo tumañi iñi tsi iin nyivi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyivi caquiñi, tacan icá ñi. Tatun náa tumañi iñi javahá ñi tsi nyivi vaha iñi tsi ñi, ndatú ñi tsa nacuhva tucu ñi can tumañi iñi tsi ñi. ³⁵ Maa tyin nyooho, cuñi ndo tsi nyivi xaan iñi tsi ndo. Tan javaha ndo tsa vaha tsihin ñi. Tan cuhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuví ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin nyivi tsa ña nacuhvá tyahvi nyoo tsi ra, tan tsihin nyivi caquiñi. ³⁶ Cu uhvi iñi ndo tsi nyivi, tumaa uhvi cuñi Nyoo Jutu yo nyehé ra tsi yo.

Ña cahan nyaa yo tsi inga

nyivi

(Mr. 7.1-5)

³⁷ 'Ña cahan nyaa ndo tsi nyivi, tacan tan Nyoo ña cua cahan nyaa ra tsi maa ndo. Ña catyi ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyivi. Tan Nyoo cua jaha ra tucahnu iñi tsi maa ndo. ³⁸ Cuhva ndo tsa tsiñi ñuhu tsi nyivi. Tacan tan cua cuhva tucu maa Nyoo tsa tsiñi ñuhu tsi maa ndo. Cuaa cua cuhva ra tsi ndo. Tyin tumaa cuhva cua cuhva ndo tsi nyivi, tacan cuhva cua cuhva Nyoo tsi ndo —catyí ra Jesús.

³⁹ Tan tsahá ra Jesús cuhva ihya tsi ñi, tan catyí ra:

—Iin ra cuaa ña cuví janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuví canacava ra naha tsitsi iin xahva. ⁴⁰ Ndi intuhun ra cutuhvá ña cua cuví coto ra tsa tsitó ra jacuahá tsi ra. Tyin ndi quitsahá cahví ra. Cua coto ra nda ndihi cahvi ra.

⁴¹ '¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un? ⁴² Tatun tinuu maa un nyii iin yutun cahnu, ¿nácaa cua cuví catyi un tsihin ra yañi un: “Ñaha, na tava yu tsahan luhlu tsa nyii tinuu un.”? ¡Yooho tsa jahá tyin vaha xaan un! Tava jihna yutun cahnu tsa nyii tinuu maa un. Tyin tacan tan cuví nyehé

vaha un tsahan luhlu tsa cua tava un tinuu yañi un.

Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuví ñi
(Mt. 7.17-20; 12.34-35)

43 'Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha. 44 Tandihí yutun nacotó yo tsi tun tsihin tsiti tun. Tyin tiñata, ña cua cuhva tun mangu. Tan ndi intuhun iñu nduuhva ña cua cuhva tun uvas [tsa cuví yucu vixi]. 45 Tan tacan tandihí nyivi vaha, vaha caahán ñi, tyin yihí tsa vaha añima ñi. Maa tyin nyivi ña vaha, maa ñi maa tsa ña vaha caahán ñi tyin yihí tsa caquiñi añima ñi. Tyin tsihin yuhu yo caahán yo tandihí tsa quitá tsitsi añima yo.

Cua cacu nyivi tsa tyaá yahvi tuhun caahán ra Jesús, tan nyivi ña tyaá yahvi tsa caahán ra, ña cua cacu ñi
(Mt. 7.24-27)

46 '¿Nacuenda catyí ndo tsihin yu, "Jutu Mañi yu, Jutu Mañi yu", tan ña javahá ndo tsa caahán yu? 47 Vityin cua catyí yu tsihin ndo yóo ndacú nyooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyí yu. 48 Cuví ndo tumaa cuví iin ra tsitó janduvita vehe. Tyin jihna ca tahví cunu xaan ra tan tañan ra yuu. Tan tyaá ra tyihyo tsaha vehe can tsata yuu can. Tan quivi nduñihí cuún savi, ndutya can tsatya xaan tsi

tsaha vehe, maa tyin vehe can ña taní maa tsi tyin vaha xaan quitá tyihyo tsaha tsi. 49 Maa tyin nyivi tsa tsiñí tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quivi tsaá savi, tan cuñihí cuún savi, tan yaha ndutya cuaha tsaha vehe can. Tan vehe can, iin yaha ñi taní tsi —tacan catyí ra Jesús.

7

Nu janduvaha ra Jesús musu iin ra capitán andaru
(Mt. 8.5-13)

1 Ndhí cañan ra Jesús tsihin nyivi, tacan tan cuanuhu ra inga tsaha nda ñuu Capernaum. 2 Tan ñuu can iyó iin ra capitán. Tan iyó iin musu ra tsa cuñi xaan ra. Tan cuuhví ra can. Tan tsa cuñi cúu ra. 3 Tan tsa tsitó ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra. 4-5 Tacan tan tsaá ra tsahnu ican naha ra nu nyí ra Jesús. Tan quitsaha caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyivi cuví ra tsihin yo tsa cuví yo nyivi Israel. Nda cuando javahá ña ra iin vehe ñuhu yo. Tan taahán tsi tyin jatyinyee un tsi ra. Tyin cuuhví xaan musu ra. Tan cuñi ra tyin janduvaha un tsi ra.

⁶ Tacan tan cuahán ra Jesús tsihin ra naha. Maa tyin tsa ndi cumañi ca tsaá ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaá ra naha nu nyii ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra. ⁷ Yacan ña cana iñi ra quitsi ra nu nyii un. ¿A ña jaha un tumañi iñi tsi ra, tyin ihya cahán un iin tuhun, tan cua nduvaha musu ra, catyí ra?

⁸ Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tava tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

⁹ Tsa tsiñi ra Jesús tsa cahán ra can naha ra, tan iyo xaan cuñí ra. Tan nanyehe ra tsi nyivi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

¹⁰ Tacan tan cuanuhu ra vaha iñi tsi ra capitán can

naha ra. Tan tsa tsaá ra naha nda yuvehe, tan nyehe ra naha tyin tsa nduvaha musu ra.

Nu janandotó ra Jesús tsi sehe iin ñaha ndaahvi tsihi yii

¹¹ Tsa yaha yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyivi.

¹² Tacan tan cuhva tsa cua tsaá ra yatyin ñuu ican, nyehe ra tyin cuaha xaan nyivi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihi yii. Tan intuhun ñi maa ra cuví sehe ña, tan tsihi ra. ¹³ Tan tsa nyehe ra Jesús tsi ña, tan cundaahvi iñi ra nyehe ra tsi ña. Tan catyí ra tsihin ña:

—Ña vacu un.

¹⁴ Tsahan natuhva ra tan tñin ra tsatun tsa nyii ndiyi can. Tacan tan ra nyisó tsi ndiyi can naha ra tsicuiñi ra naha. Tan catyí ra Jesús tsihin ndiyi can:

—Nduvita, yooho ra tyuvaa —catyí ra.

¹⁵ Tacan tan nduvita ndiyi can. Tan nacunyaá ra. Tacan tan quitsaha caahán ra. Tan ra Jesús nacuhva cuenda ra tsi ra tsi sihi ra. ¹⁶ Tsa nyehe ñi tsa tacan nandoto ra jahá ra Jesús tan yuuhví xaan ñi, tan quitsaha jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaá nu yucú yo ihya.

Tan catyí tucu ñi:

—Maa Nyoo cuví ra vatsí nu iyó yo, vatsí jatyinyee ra tsi yo —catyí ñi.

¹⁷ Tan tandihí maa nyívi tanií cahnu Judea, tsitó ñi tsa javahá ra Jesús.

Nu jacuhun ra Juan uvi taahan ra tsa tsicá tsihin ra nu nyí ra Jesús

(Mt. 11.2-19)

¹⁸ Tan ra tsicá tsihin ra Juan naha ra nacatyí tuhun ra naha tsa javahá ra Jesús. Tacan tan caná ra Juan tsi uvi taahan ra naha. ¹⁹ Tan tava tyiñu ra tsi ra naha na cuhun ra naha nu nyí ra Jesús, tan ndaca tuhun ra naha tsi ra tatun juvin ra cuví Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra. ²⁰ Tacan tan ra tsa jacuhun ra Juan, cuahán ra naha. Tan tsaá ra naha nu nyí ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

²¹ Tan tsa ndi yucú ra tsa jacuhun ra Juan naha ra tan cuaha xaan nyívi cuuhví janduvahá ra Jesús. Tan tacan tucu nyívi yihí tatyí ña vaha. Tan cuaha tucu nyívi cuaa nanyehe ñi jahá ra. ²² Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan nacatyí tuhun ndo tsihin ra Juan tandihí tsa nyehe ndo,

tan tandihí tsa tsiñi ndo. Tan catyí ndo tsihin ra: ra cuaa nanyehe ra, ra coxo nacacá ra, ra ndohó cuehe tyaahyú nduvahá ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyí ndo tsihin ra tyin ²³ sii xaan cuñi ñi nyicún tsi yu tun ña ndu uvi iñi —catyí ra Jesús tsihin ra naha.

²⁴ Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyívi. Tan catyí ra:

—¿Náa nyehe ndo quivi tsahan ndo nuu tsiqui ndii ican? ¿A nyehe ndo iin ndoo tsa janduvá tatyí? ²⁵ ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey. ²⁶ ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo. ²⁷ Juvín ñi tuhun ra Juan cuví tsa nyaá nuu tutu tsa tyaá ra Isaías tahan tsanaha. Tan caahán Nyoo tuhun ra tyehen: Yuhu cua jacuhun yu iin ra cua cahan tuhun yu tsa ndi cumañi ca cuhun un.

Na natyiso vaha ra ityi nu cua cuhun un.

²⁸ Tan catyí yu tsihin ndo tyin tsitsi tsa tandihí ra tsa cacu jahá ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo aña vasu iin ra luhlu cuí ñi cuví ra, maa tyin

cahnu xaan ca cuví ra tan ñavin ca ra Juan.

29 Tandihí nyívi tan ra tavá xuhun naha ra, tsa tsicoon-dutya jahá ra Juan, nacoto ñi tyin cuhva javahá Nyoo, cuiti xaan tsi. 30 Maa tyin tandihí ra fariseo tsihin ra maestro cuenda ley vehe ñuhu, ña cuñí ra naha tsa jacoondutyá ra Juan tsi ra naha, tyin ña cuñí ra naha quihin ra naha tsa tsahá Nyoo tsi ra naha—catyí ra Jesús. 31 Tan catyí tucu ra:

—¿Náa cua jandu inducu yu tsihin nyooho, nyívi iyó quívi ihya? ¿Yóo caá tumaa caá ndo? 32 Tumaa ra nyihi cuví nyooho. Tyin ra nyihi jasiquí nuyahvi. Tan caná tsa tahan ra naha, tan catyí ra naha: “Tívi ndi tiyoo tan ña tsañi ndo yaa. Tan tsita ndi yaa cuihya, tan ña tsacu ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán iñi ndo.] 33 Tyin ra Juan, ra jacoondutyá, quítsi ra tan ña tsatsí vaha ra. Tan ña tsihi ra vinu. Tan nyooho catyí ndo tyin tatyí ña vaha yihí tsi ra. 34 Tan quítsi tucu yuhu tan cuví yu Rayíi tsa quee nda gloria. [Tan tsatsí yu tan tsihí yu.] Tan nyooho catyí ndo tyin tsatsí xaan yu tan tsihí xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra. 35 Maa tyin catyí yu tsihin ndo tyin tsa tsiñi tuñi Nyoo tsahá ra tsi nyívi naquihín tuhun caahán yu tan tuhun caahán ra Juan. Tan maa ñi

cua janaha tsi ndo tyin vaha tsa tsiñi tuñi Nyoo—catyí ra Jesús.

Nu nyíi ra Jesús vehe ra Simón ra cuví fariseo

36 Iin ra fariseo tsa nañi Simón jacoto ra tsi ra Jesús tyin cuhun ra cucatsi ra nda yuvehe ra. Tan tsaá ra Jesús vehe ra, tan tsicunyaá ra nu meša. 37 Tacan tan iin ñaha sii iñi ñuu ican tsito ña tyin nyíi ra Jesús ican. Tan tsaá ña tsihin iin yutyí yuu xiñu tsitú tsi ndutyá tami. 38 Tan tsinyaá ña yatyin ñi tsaha ra. Tan quítsahá tsacú ña tyin ndu uví iñi ña cuatyí ña. Tan cuún ndutyá nuu ña. Tan tsihin ndutyá nuu ña nacatyá ña tsaha ra Jesús. Yahá can tan jana ityi ña tsaha ra tsihin ixi jiñi ña. Tan tyayuhu ña tsaha ra. Tacan tan tyoso ña ndutyá tami ican tsata tsaha ra. 39 Tsa nyehe ra fariseo can tsa tacan ica ña, tan tsicá iñi ra: “Tatun nditsa tsa Nyoo jaquítsi tsi ra ihya, cua nacoto ra yóo ñaha tñn tsaha ra, tyin ñaha ican, ñaha iyó cuatyí cuví ña.”

40 Tacan tan ra Jesús catyí ra tsihin ra fariseo ican:

—Yooho Simón, iyó iin tsa cua cahan yu tsihin un—catyí ra tsihin ra.

Tacan tan nacahan ra Simón, tan catyí ra:

—Vaha, cahan tsihin yu, Maestro—catyí ra.

41 Tan catyí ra Jesús tyehen tsihin ra:

—Uvi taahan rayíi nyaá cuenda ra xuhun tsi iin ra tsa tuhvá tsahá nuu xuhun.

Tan iin ra ican nyaá cuenda ra uhun cientu denario. Tan inga ra nyaá cuenda ra uvi xico utsi ñi denario. ⁴² Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ican, jahá ra tucahnu iñi tsi nduvi taahan ra naha. Tan vityin çatyi tsihin yu, yooho Simón, ¿ndáa ra cua cuñi ca tsi ra tsa tsahá nuu xuhun ican? —catyí ra Jesús.

⁴³ Tacan tan nacahan ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

⁴⁴ Tacan tan nanyehé ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihya? Yuhu quihvi yu tsitsi vehe un, tan ña tsaha un ndutya tsa ndoo tsaha yu tumaa cuhva tsa iyó yo. Tan ñaha ihya nacatya ña tsaha yu tsihin ndutya nuu ña. Tan jana ityi ña tsihin ixi jiñi ña. ⁴⁵ Yooho ña tyayuhu un ndaha yu, tumaa cuhva tsa iyó yo, maa tyin maa ña nda cuanda tsa quihvi yu ihya tan ña jandihí ña tsa tyayuhú ña tsaha yu. ⁴⁶ Tan yooho ña tyihí un acetye jiñi yu, maa tyin ñaha ihya tyihí ña ndutya tami tsaha yu. ⁴⁷ Tan catyí yu tsihin un, yooho Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyí ñi,

luxu ñi cuñi ñi tsi yu —catyí ra Jesús.

⁴⁸ Tacan tan catyí ra Jesús tsihin ña can:

—Cuatyí un tsa yaha cat-siyó, tyin tsa jahá Nyoo tucahnu iñi tsi un —catyí ra Jesús tsihin ña.

⁴⁹ Tacan tan ra yucú tsihin ra quitsaha tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyí nyivi.”

⁵⁰ Tacan tan catyí ra Jesús tsihin ñaha ican:

—Cuaahan vityin, tsa cacu un tyin tsinu iñi un tsi yu. Cuaahan tsihin tsa vaha —catyí ra tsihin ña.

8

Ñiñaha tsa jatyinyee tsi ra Jesús

¹ Tsa yaha can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tsihin nyivi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tava tyiñu ra, cuahán ra naha tsihin ra. ² Tan cuahán tucu juhva ñiñaha tsa janduvaha ra: ñi cuhvi tan ñi yihí tatyí ña vaha. Tan tsihin ñi cuahán ña María tsa quee ñuu Magdala, tan juvin ña cuví ña yihí utsa tatyí ña vaha tan nduvaha ña. ³ Tan cuahán tucu ña Juana, ñasihi ra Chuza, ra cumí tyiñu cuenda ra Herodes, tan ña Susana tsihin tandihí ca ñiñaha tsa jatyinyee tsi ra Jesús tsihin tsa iyó tsi ñi.

Nu caahán ra Jesús tyin tu-maa iin ra tatsí tacan cuví ra caahán tuhun Nyoo

(Mt. 13.1-9; Mr. 4.1-9)

⁴ Tan cuaha xaan nyivi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nyecú, tan quitsaha caahán ra tsihin ñi tsihin iin cuhva tsaḥa cuenda ra, tan catyí ra:

⁵ —Quita iin ra vehe ra. Cuahán ra nu iyó tyiñu jahá ra, tyin cua tatsí ra tsiti trigu nu ñuhu ra. Tan cuhva tsa tatsí ra quití ra tsiti can, tan cucoyo juhva yuhu ityi. Tan tsañi nyivi tsata can. Tan quitsi saa tan tsatsi ti. ⁶ Tan juhva ca tsiti can cucoyo tyañu yuu. Cana tsiti ican. Maa tyin na ityi tsi tyin luxu cuii ñi ñuhu yihí tsaha tsi. Tan nduve catsin. ⁷ Tan juhva ca tsiti cucoyo tyañu iñu. Maa tyin quivi cana trigu iin caa ñi tsihin iñu can, iñu can tsahñi tsi trigu can. ⁸ Maa tyin juhva ca tsiti cucoyo nu ñuhu vaha. Tan quivi tsahnú tsi, vaha xaan tsahá tsi tsiti. Tyin tsa iin ñi tsiti ican, cientu tsiti quita tsihin tsi —catyí ra Jesús.

Tan tsa yaha tsahá ra cuhva can, tan quitsaha caná tsa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacoto ra Jesús nacuenda jacuahá ra tsi nyivi tsihin cuhva caahán ra tsihin ñi

(Mt. 13.10-17; Mr. 4.10-12)

⁹ Yaha can tan ra tsicá tsihin ra, nducu tuhun ra naha tsi ra náa cuñi tsi catyi cuhva tsa cahan ra tsihin nyivi. ¹⁰ Tacan tan catyí ra tsihin ra naha:

—Tsi nyooho jacoto Nyoo tuhun xeehe, nácaa ndacá ñaha ra. Maa tyin tandihí ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñi ñi maa tyin ña cua cutuñi iñi ñi náa tuhun cuví can.

Nu tsahá cuenda ra Jesús cuenda ra tsa tatsí

(Mt. 13.18-23; Mr. 4.13-20)

¹¹ 'Cuhva tsa tsahá yu tsi ñi, cuñi tsi catyi tsi tyehen: tsiti can, tuhun Nyoo cuví tsi. ¹² Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsi nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi. ¹³ Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Si xaan naquihin vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsaha nyehé ñi tundoho, tan jandihí ñi tsa tsinú iñi ñi. ¹⁴ Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasama ñi cuhva iyó ñi. Tyin yihí ñi, tyaá ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi si ca cuñi ñi tsihin tsa si caá tsa

iyó nu ñuhu ñayivi. Tan cuví ñi tumaa cuví yutun tsa ña tsaḥa tsiti. ¹⁵ Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha añima ñi tyin tsinú iñi ñi tsihin tanii añima ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihi tuhun caahán ra.

Nu caḥan ra Jesús tyin ña cua tyihi xeehe yo ñuhu tsa jandunditsín Nyoo añima yo coto quinyaa ra itsi

(Mr. 4.21-25)

¹⁶ Ndi intuhun yo ña tyaá yo ñuhu tyuma tan tyihí xeehe yo xuu tsito a inga nu xeehe. Tyaá yo ñuhu tyuma maa tyin tsaquin nyaa yo can iin nu sucun, tacan tan quihví nyivi tsitsi vehe maa tyin nditsin. ¹⁷ Tyin nduve iin tsa nyii xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo. ¹⁸ Yacan cuenda tyaa soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaa soho ndo, tacan tan cua quinyaa Nyoo nda cuanda tsa luxu ñi tsa cuñi maa ndo tyin cumí ndo.

Nu tsaḥa cuenda ra Jesús tyin tumaa yañi ra, tan tumaa sihi ra, tacan cuví nyivi tyaá yahvi tuhun Nyoo

(Mt. 12.46-50; Mr. 3.31-35)

¹⁹ Tacan tan tsaḥ sihi ra Jesús tsihin yañi ra nu nyii ra.

Maa tyin ña cuví tsaá ñi tyin tuvi xaan nyivi. ²⁰ Tacan tan jacoto nyivi nyecú ican tsi ra Jesús, tan catyí ñi:

—Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

²¹ Tacan tan nacahan ra Jesús, tan catyí ra:

—Tandihí maa nyivi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

Nu jacutaxin ra Jesús tatyí ñihi nu miñi

(Mt. 8.23-27; Mr. 4.35-41)

²² Cuví tsi iin quivi quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican. ²³ Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaḥ tatyí ñihi xaan. Tan quitsaḥ tyihí tsi ndutya tsitsi yutun ndoo ican. Tan cuñi nyee yutun ndoo can tyin cuaha xaan ndutya quihví. ²⁴ Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñi nyee yo tsitsi ndutya —catyí ra naha.

Tacan tan nduvita ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi.

25 Tacan tan catyí ra tsihin ra tsicá tsihin ra:

—[¿Nacuvi yuuhví ndo?]
¿Numaa cuahán tsa tsinú ñi
ndo? —catyí ra tsihin ra
naha.

Maa tyin ra ican naha ra,
nayuhví xaan ra naha. Tan
iyo xaan cuñí ra naha. Tan
quitsahá tsicá tuhun tahan ra
naha:

—¿Yóo ra cuví ra ihya?
Tyin nda cuando tatyí tan
ndutyá tan tyaá yahvi tsi tsa
caahán ra.

*Nu nduvahá iin ra yihí tatyí
ña vaha nda Gadara*
(Mt. 8.28-34; Mr. 5.1-20)

26 Tacan tan tsaá ra naha
nda Gadara tsa canyí yuhu
miñi ityi nuu Galilea tsa
canyí inga tsiyo miñi can.

27 Tan quitá ra Jesús tsitsi
yutun ndoo ican. Tan ican
tsaá iin ra ñuu tsa canyí
Gadara can tsijatahan ra tsi
ra. Tan tsanaha xaan yihí
tatyí ña vaha tsi ra, tan ña
nditsí ca maa ra jahma. Tan
ña iyó ra vehe ra. Tsicá nuu
ñi maa ra nu ñaña cumí santu.
28-29 Tan tuhvá tatyí ña vaha
ican jacunú sana nu tsi ra.
Tan yacan cuenda tuhvá ñi
tsaahñi ndaha ra tan tsaha ra
tsihin cadena. Maa tyin tatyí
ña vaha ican tsahá tunyee ñi
tsi ra tsa cahnya ra can. Tan
jacunú nu tsi ra. Tan tsindacá
nu tsi ra iin nu nduve maa
nyivi iyó. Ra ican tsaá ra
nu nyí ra Jesús. Tan cuhva
tsa nyehe ra can tsi ra Jesús,
tsicuiñi tsiti ra nuu ra. Tan
caná tsaá ra tan catyí ra:

—¿Nacuvi tyihí un tsi un tsi-
hin yuhu, yooho Jesús, Sehe

Nyoo nyaá gloria? Tsicán yu
tsi un ña janyehe un tundoho
tsi yu —catyí ra yihí tatyí ña
vaha ican tsihin ra Jesús, tyin
ra Jesús tava tyiñu ra tsi nu tsa
quita nu tsi ra ndaahvi ican.

30 Tan nducú tuhun ra Jesús
tsi tatyí ña vaha ican, tan
catyí ra:

—¿Náa nañi un?

Tan tatyí ña vaha ican jac-
ahan nu tsi ra can, tan catyí
ra:

—Nyuhu nañi ndi, Legión.

Tacan catyí ra tyin cuaha
xaan tatyí ña vaha yihí tsi
ra. [Cuenda mil nahnu yihí
tsi ra.] 31 Tacan tan catyí
nahnu tsihin ra Jesús tyin ña
jacuhun ra tsi nahnu tsitsi
Yavi Cunu nu cua nyehe
nahnu tundoho tan ña cuvi
maa quita nahnu. 32 Tan
tsican nahnu tsi ra Jesús na
cuhva ra quihvi nahnu tsitsi
quiní tsa yucú yuhu miñi
ican tsatsí ti naha ti. Tacan
tan tsahá ra Jesús ndatu tsa
quihvi nahnu tsitsi quiní ican
naha ti. 33 Tan quitá nahnu tsi
ra ndaahvi can. Tan quihvi
nahnu tsitsi quiní ican naha
ti. Tacan tan tsinu quiní can
naha ti. Tan yatyin ican nyaá
iin xahva cunu yuhu miñi
ican. Ican cucoyo ti naha ti
tsitsi miñi ican. Tan tsihi ti
naha ti tsitsi ndutyá.

34 Tacan tan ra jahá cuenda
tsi quiní ican naha ra,
nayuhvi xaan ra naha. Tan
tsinú ra naha cuahán ra naha
cua nacatyí tuhun ra naha tsa
cuví can tsihin nyivi nda ñuu.
Tan tandihí ñi nyivi tsa nyehe
ra naha, tan nacatyí tuhun ra

naha tsa cuv̄i ican. ³⁵ Tacan tan tsahan nyiv̄i tsinyeh̄e ñi náa tsa cuv̄i, tan tsaā ñi nu nyií ra Jesús. Tan nañih̄i ñi tsi ra tsa tsa yahā quit̄a tatyí ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñī jiñi ra. Tan nayuhv̄i xaan ñi cuv̄i. ³⁶ Tacan tan tandih̄i ñi tsa nyeh̄e tsa cuv̄i ican, nacatyí tuhun ñi tsihin tandih̄i ca nyiv̄i nácaa quit̄a tatyí ña vaha tsi ra ndaahvi can, tan nduvah̄a ra. ³⁷⁻³⁹ Tacan tan tandih̄i nyiv̄i iyó Gadara can quitsahā caahán ñi tsihin ra Jesús na cunuhu ra ityi nu quee ra. Tyin nayuhv̄i xaan ñi tsa javah̄a ra tsihin nu tatyí ña vaha ican. Tacan tan ra tsa quit̄a nu tatyí ña vaha can nahnu, cah̄an ndaahvi ra tsihin ra Jesús, na cuhva ra cuhun ndih̄i ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyiv̄i vehe un náa ndih̄i tsa javah̄a Nyoo tsihin un —catyí ra.

Tacan tan ra Jesús quihv̄i ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvah̄a ican, cuanuhu ra nda ñuu ra. Tan ityi cuahán ra nacatyí tuhun ra tsihin tandih̄i nyiv̄i ñuu ican nácaa janduvah̄a ra Jesús tsi ra.

Nu nduvah̄a ña sehe ra Jairo tan ñaha tsa t̄in̄ jahma ra Jesús

(Mt. 9.18-26; Mr. 5.21-43)

⁴⁰ Quiv̄i tsa tsaā ra Jesús inga tsaha tsa tsahan ra inga tsiyo miñi can, cuaha xaan

nyiv̄i ndatú tsi ra. Tan sii xaan cuñī ñi tyin tsaā nyico ra. ⁴¹ Tacan tan tsaā iin ra tsa nañī Jairo, ra cuv̄i ityi nuu vehe ñuhu, tan tsicuiñī tsiti ra nuu ra Jesús. Tan quitsahā caahán ndaahvi ra tsihin ra na cuhun ra vehe ra. ⁴² Tyin iyó iin ñaha sehe ra, tan iyó utsi uvi cuiya ña. Tan tsa cuñī cúu ña jahá cuehe. Tacan tan cuahán ra Jesús vehe ra. Tan cuaha xaan nyiv̄i cuahán tsihin ra, tan tyañu xaan nu cuahán ra tyañu ñi. ⁴³ Tan tsihin nyiv̄i ican cuahán iin ñaha cuuhv̄i. Tsa iyó utsi uvi cuiya ndohó ña cuehe tsa cuún niñī ña. Tan tsa ndih̄i maa xuhun ña janaā ña tsihin doctor tan ña nduvah̄a ña. ⁴⁴ Maa tyin tsaā ña nu cuahán ra Jesús, ityi tsata ra. Tan t̄in̄ ña jahma ra. Tan iin yaha ñi, tan tsicuiñī tsa cuún niñī ña.

⁴⁵ Tacan tan catyí ra Jesús:

—¿Yóo t̄in̄ jahma yu?

Tan tandih̄i ñi cuahán tsihin ra catyí ñi:

—Yof̄i.

Tan ra Pedro tsihin ra cu-tahan tsihin ra, catyí ra naha tsihin ra Jesús:

—Maestro, cuaha xaan nyiv̄i cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo t̄in̄ jahma yu?” —catyí ra naha.

⁴⁶ Maa tyin ra Jesús catyí ra:

—Tsitó maa yu tyin iyó iin nyiv̄i t̄in̄ jahma yu, tyin tuv̄i iñi yu cuahán juhva tunyee iñi tsa iyó tsi yu —catyí ra.

47 Tacan tan ñaha can nyehé ña tyin tsa tsitó ra. Tan quit-saha ñihí ña tsihin tsa yuuhví ña. Tan tsicuiñi tsiti ña nuu ra. Tan nacatyí tuhun ña tsihin ra nacuenda tiñ ña jahma ra, tan nácaa nduvaha ña iin yaha ñi ican. Tan tsiñi tandihi nyivi tsa nacatyí tuhun ña.

48 Tacan tan catyí ra Jesús tsihin ña:

—Tsa nduvaha un tyin tsinú iñi un tsi yu. Cuaahan tsihin tsa vaha —catyí ra.

49 Ndi caahán ca ra Jesús, tan tsaá ñi iin ra quee vehe ra Jairo, ra cuví ityi nuu vehe ñuhu. Tan catyí ra tsihin ra Jairo:

—Sehe un tsa yaha tsihi ña. Ña cuhva ca un tsihi tsi ra Maestro ihya —catyí ra.

50 Maa tyin tsa tsiñi ra Jesús tsa cahan ra ican, tan catyí ra tsihin ra Jairo:

—Ña nayuhvi un. Tsinu iñi. Tan ña sehe un cua nduvaha ña —catyí ra.

51 Tan cuhva tsa tsaá ra Jesús vehe ra Jairo, ña tsaha ra quihvi nyivi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvi ñi tsitsi vehe nu canyii ñaha luhlu tsa tsihi can. 52 Tan tandihi ñi tsacú xaan ñi tsa cuenda tyin tsihi ña. Maa tyin ra Jesús catyí ra tsihin ñi:

—Ña vacu ca ndo. Tyin ña tsihi ña. Quixí ña —catyí ra.

53 Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihi ña. 54 Tacan tan tiñ ra Jesús ndaha ña. Tan tsaá

nacahan ra tan catyí ra tsihin ña:

—Nduvita, ñaha luhlu —catyí ra.

55 Tacan tan nandoto ña. Tan iin yaha ñi nduvita ña. Tan catyí ra Jesús:

—Cuhva ndo tsa catsi ña.

56 Tan jutu ña tsihin sihi ña, iyo xaan cuñi ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuví ican.

9

Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo

(Mt. 10.5-15; Mr. 6.7-13)

1 Cana ra Jesús tsa utsi uvi taahan ra tsicá tsihin ra. Tan tsaha ra tunyee iñi cahnu tsi ra naha tyin cuvi tava ra naha tatyí ña vaha tsi nyivi, tan cuvi janduvaha ra naha tsi nyivi cuuhví.

2 Tan tava tyiñu ra tsi ra naha na cahan ra naha nácaa ndacá ñaha Nyoo tsi nyivi. Tan tava tucu ra tyiñu tsi ra naha na janduvaha ra naha tsi nyivi cuuhví. 3 Tan catyí ra tsihin ra naha:

—Nduve tsa cuiso ndo ityi cuhun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cuhun tsihin ndo. 4 Tan ndáa cuví ñi vehe tsaá ndo, ndoo ndo ican nda cuanda quita quivi tsa cuhun ndo inga ñuu. 5 Tan nu ña cuñi nyivi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha

ndo. Tan yacan janahá tyin ndoó cuatyí ñi siqui ñi —catyí ra Jesús tshin ra naha.

⁶ Tacan tan cuahán ra naha tandihí maa ñuu. Tan caahán ra naha tuhun Nyoo tan nácaa cuñí tsi tan cacu ñi. Tan janduvahá ra naha tsi nyívi cuuhví.

Nu cuñí ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyívi

(Mt. 14.1-12; Mr. 6. 14-29)

⁷ Ra Herodes, ra cuví ra ndacá ñaha [tanií cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyívi catyí ñi tyin ra Juan nandoto. ⁸ Tan yihí ñi catyí ñi tyin ra Elías quituví nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto. ⁹ Maa tyin catyí ra Herodes:

—Maa maa yu tyihí tyiñu tsa tyahnya jucun ra Juan. Tun tacan, zyóo ra cuví ra tsa caahán xaan nyívi tuhun catyí ñi tsiñí yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

Nu tsahá ra Jesús tsa catsi uhun mil rayí

(Mt. 14.13-21; Mr. 6.30-44; Jn 6.1-14)

¹⁰ Tan cuhva tsa tsaa nyico ra tava tyiñu ra Jesús, tan nacatyí tuhun ra naha tshin ra Jesús tandihí maa tsa cuví nu tsahan ra naha. Tacan tan tava siin ra Jesús tsi ra naha tan cuahán ra naha yatyin

ñi iin ñuu tsa nañí Betsaida. ¹¹ Maa tyin cuhva tsa ñihí tuhun nyívi tyin cuahán ra Jesús ndacan, tan cuahán ñi nda nu nyí ra. Tan naquihin cuenda ra tsi ñi. Tacan tan quitsahá caahán ra tshin ñi nácaa ndacá ñaha Nyoo tsi ñi. Tan janduvahá ra tsi nyívi cuuhví.

¹² Tan tsa tseñi cuii ña, tsa utsi uvi taahan ra tsicá tshin ra Jesús catyí ra naha tshin ra:

—Cahan tshin nyívi ihya, na cunuhu ñi na quitatu ñi, na nanducu ñi tsa catsi ñi ñuu tsa canyí yatyin ñi ihya, tyin ihya nduve maa tsa catsi yo iyó —catyí ra naha.

¹³ Tacan tan catyí ra Jesús tshin ra naha:

—Cuhva nyooho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihí tsa catsi tandihí nyívi ihya. Ndi maa cuhun ndi cujata ndi, maa tyin ña cua ñihí tsa catsi ñi tyin cuaha xaan ñi —catyí ra naha.

¹⁴ Tyin vasiqui quitá maa uhun mil rayí yucú ican. Tan siin maa ñiñaha tshin sehe ñi. Tacan tan ra Jesús catyí ra tshin ra naha:

—Na cunyecu nyívi tsa uvi xico utsi taahan ñi iin iin nu cunyecu ñi.

¹⁵ Tacan tan tsicunyecu tandihí ñi jahá ra naha. ¹⁶ Tan quihin ra Jesús uhun taahan paan ican tshin uvi taahan tyaca ican. Tan nanyehe ndaa ra ityi andívi, tan

nacuhvā ra tyahvi nyoo tsi Nyoo tsa cuenda can. Tan tsahnyā sava ra paan tan tyaca ican. Tan tsahā ra tsi ra tsicā tsihin ra, na tsatsa ra naha can tsi nyivi. ¹⁷ Tacan tan tandihī ñi tsatsī ñi, tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi taahan tyica tsihin tsa ñahñu ican.

Nu catyī ra Pedro tyin ra Jesús cuvī ra Cristo, ra jacacú tsi yo

(Mt. 16.13-19; Mr. 8.27-29)

¹⁸ Iin quivi quita siin ra Jesús tsihin ra tsicā tsihin ra. Tan tsican tahvi ra tsi Nyoo. Tan nu ndihī tsican tahvi ra, tan tsicā tuhun ra tsi ra tsicā tsihin ra tan catyī ra tsihin ra naha:

—¿Náa catyī nyivi tuhun yu, yóo ra cuvī yu, catyī ñi?

¹⁹ Tan nacahan ra tsicā tsihin ra, tan catyī ra naha:

—Yihí ñi catyī ñi tyin ra Juan, ra jacoondutyā tsi nyivi, cuvī un. Tan yihí ñi catyī ñi tyin ra Elías cuvī un. Tan yihí ñi catyī ñi tyin inga ra cuvī ndusu yuhu Nyoo tahañ tsanaha cuvī un —catyī ra naha.

²⁰ Tacan tan nducū tuhun ra Jesús tsi ra naha, tan catyī ra:

—Tan nyooho, ¿yóo ra cuvī yuhu, cuñi maa ndo?

Tan nacahan ra Pedro, tan catyī ra:

—Yooho cuvī ra Cristo, ra tsa quee nu nyaá Nyoo.

²¹ Tan catyī ra Jesús tsihin ra naha tyin ña cahan ra naha can tsihin nyivi.

Nu jacoto ra Jesús nácaa cua cahñi nyivi tsi ra

(Mt. 16.20-28; Mr. 8.30—9.1)

²² Tacan tan catyī ra tsihin ra naha inga tsaha:

—Yuhu Rayi tsa quee nda gloria cuvī yu. Tan taahán tsi tyin cuaha xaan tundoho cua nyehe yu. Tan ra cuvī mandoñi naha ra, tan ra cuvī jutu tsa cuvī ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quivi cua nandoto yu —catyī ra Jesús.

²³ Tacan tan catyī ra tsihin ra naha:

—Nyooho tsa cuñi cunyi-cun tsi yu, cahnya iñi ndo tsa cuñi maa ndo javaha ndo, tacan tan cuvī javaha ndo tsa cuñi Nyoo. Ña ndu uvi iñi ndo tsa yihí ndo cuenda yu vasu tandihī quivi nyehé ndo tundoho. Tyin yacan cuvī tumaa cruu tsa taahán tsi cuiso ndo tatun cua cunycun ndo tsi yu. ²⁴ Tan nyooho tsa ña cuñi nyehe tundoho tan ña cuñi ndo kuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua kuhva ñayivi iyó ndo tsa cuenda yu, cua cacu ndo. ²⁵ Nduve yahvi nyaá cua ñihi ndo tandihī tsa iyó nu ñuhu ñayivi ihya, tun ña cua cacu añima ndo. ²⁶ Tyin tatun cahan nuu ndo tsa xaan cuñi nyivi nyehé ñi tsi ndo

tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsaá quívi quítsi yu inga tsaha. Tyin cua quítsi nyico yuhu Rayíi tsa quee nda gloria tshin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra. ²⁷ Tan tsa nditsa catyí yu tshin ndo tyin yihí ndo tsa nyecú ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

Nu uñi taahan ra tsicá tshin ra Jesús nyehé ra naha nácaa cuví nu ndacá ñaha Nyoo (Mt. 17.1-8; Mr. 9.2-8)

²⁸ Una quívi yaha tsa cahān ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tshin ra. ²⁹ Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Sih xaan cuítsin tsi tan xiñu tsi. ³⁰ Tacan tan quituvi uvi taahan ra natuhún tshin ra, ra Moisés tan ra Elías. ³¹ Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra. ³² Tan vasu cuñi xaan ra Pedro naha ra cusu ra naha, maa tyin ña quixi maa ra naha tyin nyehé ra naha tsa nditsin cuví nu nyaá ra Jesús tshin ra nyecú tshin ra. ³³ Cuhva tsa cuahán ra tsinyecu tshin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa

un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

³⁴ Tan tsa ndi caahán ca ra tan quítsi iin vico siqui ra naha. Tan nayuhvi xaan ra naha tsa quihvi ra naha tsitsi vico ican. ³⁵ Tacan tan tsitsi vico ican tsiñi ra naha iin ndusu tsa catyí:

—Juvín ra ihya cuví Sehe yu, tan cuñi xaan yu tsi ra. Tyaa soho ndo tsa caahán ra —catyí ndusu ican.

³⁶ Tan tsa yaha cahān ndusu ican, tan nanyehe ra naha tyin intuhun ña maa ra Jesús nyaá ican. Tan yoñi maa tshin cahān ra naha tsa nyehe ra naha.

Nu janduvaha ra Jesús tsi iin ra luhlu tsa yihí tatyí ña vaha

(Mt. 17.14-21; Mr. 9.14-29)

³⁷ Tan tsa inga quívi tsa nuu ra Jesús yucu ican, cuaha xaan nyivi tsijatahan tsi ra. ³⁸ Tacan tan canā tsaá iin ra cuahán tshin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu. ³⁹ Tan tuhvá tatyí ña vaha quihvi tsi ra. Tan tuhvá ra caná tsaá jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñi maa nu tatyí ña vaha ican jaña nu tsi ra. ⁴⁰ Tsa cahān yu tshin ra tsicá tshin un na tava ra naha tsi nu tatyí ña vaha ican, maa tyin

ña cuví tavá ra naha tsi nu —catyí ra.

⁴¹ Tacan tan nacahan ra Jesús tan catyí ra:

—Nyooho, nyívi ña tsinú vaha iñi. Tan caquiñi ndo. ¿Najava taahan ca quivi cunyaa yu tsihin ndo tan cunyee iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

⁴² Tan cuhva tsa natuhva ra luhlu can nu nyaá ra Jesús, tan janduvá nu tatyí ña vaha ican tsi ra ndasava. Maa tyin ra Jesús tavá ra tsi nu tatyí ña vaha ican. Tan janduvaha ra tsi ra. Tacan tan nacuhva cuenda ra tsi ra tsi jutu ra.

⁴³ Tan tandihi nyívi, iyo xaan cuñí ñi tsa cahnu tsa javaha Nyoo nu yucú ñi.

Tsitsi tsa iyo cuñí nyívi tsa javaha ra Jesús, tan catyí ra tsihin ra tsicá tsihin ra:

Nu cahan ra Jesús inga tsaha tyin cua cañi nyívi tsi ra

(Mt. 17.22-23; Mr. 9.30-32)

⁴⁴ —Tyaa soho vaha ndo tuhun caahán yu. Tan ña naa iñi ndo. Tyin Rayi tsa quee nda gloria, cua cuhva cuenda nyívi tsi ra tsi ra xaan iñi tsi ra —catyí ra Jesús.

⁴⁵ Maa tyin ra tsicá tsihin ra ña cutuñí iñi ra naha nacuenda cahan ra tacan. Tyin Nyoo ña tsaha ra tsa cutuñi iñi ra naha. Tan yuuhví ra naha nducu tuhun ra naha tsi ra Jesús náa cuví tsa caahán ra.

Nu janaha ra Jesús yóo ra tsa cahnu ca cuví nu ndacá ñaha Nyoo

(Mt. 18.1-5; Mr. 9.33-37)

⁴⁶ Tacan tan ra tsicá tsihin ra quitsaha caahán yuhu tahan ra naha, ndáa ra cahnu ca cuví tsitsi tsa utsi uvi taahán ra naha. ⁴⁷ Tan tsitó ra Jesús tsa tsicá iñi ra naha, tan quihin ra iin ra luhlu. ⁴⁸ Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyívi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi tsi yu, naquihín cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

Nyívi tsa ña cuxaán tsi yo, juvin ñi ican jatyinyeé tsi yo

(Mr. 9.38-40)

⁴⁹ Tacan tan ra Juan catyí ra tsihin ra Jesús:

—Maestro, nyehe ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsaha ca ndi javaha ra tacan. Tyin ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahan ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

51 Tuvj̄ iñi ra Jesús tyin tsa nyaa naa yatyin quiv̄i tsa cunuhu ra gloria. Tan jandu iin ra iñi ra, tan quih̄in ra ityi tan cuahán ra ñuu Jerusalén. 52 Tan tavā tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús. 53 Maa tyin nyiv̄i Samaria ican, ña cuñí ñi tsa ndoo ra ndacan, tyin tuv̄i iñi ñi tyin Jerusalén cuahán ra, tan nyiv̄i Samaria ndasi cuñí ñi nyehe ñi tsi nyiv̄i ñuu Jerusalén. 54 Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñí un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhu andiv̄i tyin cayu ñi Samaria ican tyin ña cuñí ñi tsa ndoo yo ñuu ñi —catyí ra naha.

55 Tacan tan nyehe ra Jesús nuu ra naha. Tan cuxaan ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñí iñi ndo náa tyiñu vatsí yuhu. 56 Tyin Rayīi tsa queē nda gloria, ña vatsí ra tyin janaa ra tsi nyiv̄i, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

Nyiv̄i tsa cuñí quihvi cuenda ra Jesús

(Mt. 8.19-22)

57 Tan tsitsi tsa tsicá ityi ra naha, quitā iin ra, tan catyí ra tsihin ra Jesús:

—Jutu Mañi yu, cuñí yu cunyicun yu tsi un. Tan cuhun yu tsihin un tandih̄i ñi ityi cuhun un —catyí ra.

58 Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayīi tsa queē nda gloria ndi nu cava jiñi ra tan nduve iyó —catyí ra tsihin ra ican.

59 Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, c̄uatu nuu tsi yu, na cuhun jihna yu cucutsi yu tsi jutu yu —catyí ra.

60 Tacan tan ra Jesús nacahan ra tan catyí ra tsihin ra:

—Nacoo tsi nyiv̄i ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho c̄uaahan cahan un tuhun Nyoo tsihin nyiv̄i na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

61 Tacan tan catyí inga ra tsihin ra Jesús:

—Cuñí yu cunyicun yu tsi un, tata. Maa tyin c̄uhva na cuhun jihna yu cucahan yu tsihin nyiv̄i vehe yu —catyí ra.

62 Tan ra Jesús catyí ra tsihin ra:

—Tumaa iin ra tahv̄i ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuv̄i iin ra nyicún tsi yu, tatun cuñí nyico ra tsa tsa nacoq ra, ña cuvi cuhva ra tsi ra

cundaca ñaha Nyoo —catyí ra Jesús tsihin ra.

10

Nu tava ra Jesús tyiñu tsi uñi xico utsi taahan ra cua cahan tuhun Nyoo tsihin nyivi

¹ Tsa yaha can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihi ñi ñuu, uvi uvi ra cuahan tsa iin nu cuahán ra nu cua cuhun ra Jesús. ² Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan ndo tuhun Nyoo tsihin nyivi. ³ Tan cuaahan ndo tan nyehe ndo tyin cua jacuhun yu tsi ndo tumaa mbee mahñu lobo tsa cuví quití xaan. Tyin lobo tuhvá ti tsahñi tsi mbee. Tan tacan tucu cua cuñi nyivi cahñi ñi tsi ndo. ⁴ Tan ña cua cuiso ndo ndi marali tan ndi nu yihí xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cuhva ndo nacumi tsi ñi tan ña cucuñi ndo natuhun ndo tsihin ñi. ⁵ Cuhva tsa quihvi ndo tsitsi vehe iin nyivi, cahan ndo tsihin ñi. Tan catyi ndo, na coo tsa vaha añima ñi. ⁶ Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yoñi ñi vaha añima, ña cua ndoo tsa vaha tsihin ñi. ⁷ Tan ndoo ndo juvin ñi maa vehe ican.

Tatun tsahá ñi tsa catsi ndo, catsi ndo. Tatun tsahá ñi tsa coho ndo, coho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsa quivi tsa cuhun ndo inga ñuu. ⁸ Tan nu tsa ndo iin ñuu tan vaha cahan ñi tsihin ndo, catsi ndo tandihi tsa cuhva ñi catsi ndo. ⁹ Tan janduvaha ndo tsi ñi cuuhvi ñuu ican. Tan catyi ndo tsihin ñi: “Tsa nyanaá yatyin Nyoo, ra cuñi quihvi añima ndo cundaca ñaha ra tsi ndo.” ¹⁰ Maa tyin tatun tsa ndo iin ñuu tan ña cuñi nyivi tyaa soho ñi tsa caahán ndo, quita ndo ityi cahnu. Tan catyi ndo tsihin ñi: ¹¹ “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñi tsi catyi tyin cuatyí ndo ndoó can siqui ndo. Tyin Nyoo nyanaá yatyin ra tsihin ndo tan ña tyaá soho ndo tsa caahán ra nácaa cuñi tsi tsa cundaca ñaha ra tsi ndo.” Tacan catyi ndo tsihin ñi —catyí ra Jesús tsihin ra tsa uñi xico utsi can naha ra.

¹² Tan catyí tucu ra tsihin ra naha:

—Quivi cua tatsi tuñi Nyoo tsi nyivi, yaha ca cuhva cua nyehe nyivi ñuu ican tundoho tan ñavin ca nyivi tsicoo tahan tsanaha ñuu Sodoma, —catyí ra Jesús.

Nyivi ña tyaá soho tuhun caahán ra Jesús cua nyehe ñi tundoho

(Mt. 11.20-24)

¹³ Tan catyí ra Jesús:

—¡Ndahvi nyooho, nyivi ñuu Corazin! Tan ¡ndahvi nyooho nyivi ñuu Betsaida! Tyin nyehé ndo tsa iyo javahá yu, tan ña cuñí ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuihya iñi tan cunyecú ñi nu nyaa: tsa ndu uvi iñi ñi cuatyí ñi cuví can. ¹⁴ Yacan cuenda, nyooho nyivi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can. ¹⁵ Tan nyooho nyivi ñuu Capernaum, cuñí maa ndo tyin cundaa ndo nda cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyí ra Jesús.

¹⁶ Tan catyí ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyooho, tsa caahán yuhu tyaá soho ñi. Tan nyivi ña tyaá soho tsa caahán nyooho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyí ra Jesús tsihin ra naha.

Nu tsaq nyico tsa uñi xico utsi ra tsa tsahan tsicahan tuhun Nyoo

¹⁷ Ihya cuví nu tsaq nyico tsa uñi xico utsi ra tsa tsahan tsicahan tuhun Nyoo tsihin

nyivi. Tan sii xaan cuñí ra naha. Tan catyí ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa cahan ndi tsihin sivi un —catyí ra naha.

¹⁸ Tacan tan catyí ra Jesús tsihin ra naha:

—Tacan tyin yuhu nyehe yu andivi nu canacava nu ña vaha, nu nañi Satanás. Tumaa cañi iin tatsa savi, tacan canacava nu. ¹⁹ Tan maa yuhu, tsaha tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujhama, tan nduve tsa cua jaha ti naha ti tsi ndo. ²⁰ Maa tyin ña cusii xaan iñi ndo tyin cuví tava ndo tatyí ña vaha ican. Cusii ca iñi ndo tyin nyaá sivi ndo nu libru Nyoo nda gloria —catyí ra Jesús tsihin ra naha.

Nu jacahnú ra Jesús tsi Nyoo tsa sii cuñí ra tyin janahá Nyoo tsa vaha tsi nyivi ndaahvi

(Mt. 11.25-27; 13.16-17)

²¹ Tacan tan sii xaan cuñí ra Jesús jahá Tatyí Ii Nyoo, tan catyí ra:

—Jacahnú yu tsi un, Jutu yu, tyin yooho cuví ra ndacá ñaha andivi tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñí maa un —catyí ra Jesús.

22 Tan catyí ra Jesús tsihin tandihí ra naha:

—Tandihí maa tsaha Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yóo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yóo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñí Sehe Nyoo jacoto ra tsi ñi —catyí ra Jesús.

23 Tacan tan nanyehe ra nu nyecú ra tsicá tsihin ra. Tan caahán xeehe ra tsihin ra naha:

—Sií xaan cuñí nyooho tan nyivi tsa iyó vityin tyin nyehé ndo tsa javahá yu.

24 Tyin cuaha xaan rey tan ra cuví ndusu yuhu Nyoo tahañ tsanaha, cuñi ra naha nyehe ra naha tsa nyehé nyooho vityin. Maa tyin ña nyehe ra naha. Tan cuñi ra naha tyaa soho ra naha tsa tsiñi nyooho vityin. Maa tyin ña tsiñi ra naha —catyí ra Jesús tsihin ra tsa tsicá tsihin ra.

Nu jacuaha ra Jesús tsi yo tyin taahán tsi jatyinyee yo tsi tandihí ñi maa nyivi

25 Tacan tan tsaq iin ra maestro cuenda ley vehe ñuhu. Tan quitsaha tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cahun yu coo yu ñayivi nyito tsa ña cua naa maa?

26 Tacan tan nacahan ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

27 Tacan tan nacahan ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin taniñi aña yu tan tsihin tandihí cuhva tsicá ñi yo, tan tsihin tandihí tunyee ñi tsa iyó tsi yo, tan tsihin tandihí tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

28 Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

29 Maa tyin ra maestro cuenda ley can cuñi ra cuví ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

30 Tacan tan nacahan ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan tahañ ra tsi nu ñasuhu nahnu. Tan suhu nahnu tandihí maa tsa nyisó ra, nda cuanda jahma ra. Tan cañi nahnu tsi ra nda cuanda tsaquin taxin ña nahnu tsi ra. Tan nacoq ihñi nahnu tsi ra ican. 31 Tacan tan yaha iin ra cuví jutu ityi can. Maa tyin tsa nyehe ra tsi ra canyií ican, ndasava ñi yaha tsiyo ra. 32 Tacan tan yaha tucu iin ra yihí cuenda vehe ñuhu, ra cuví tata ra Leví. Maa tyin tsa nyehe ra tsi ra canyií ican, juvin ñi ndasava yaha ra. 33 Tacan tucu iin ra Samaria yaha ra juvin ñi

ityi can. Tan nyehe ra tsi ra canyii ican, tan quitsi tsa ndaahvi cuñi ra nyehe ra tsi ra. ³⁴ Tan natuhva ra nu canyii ra, tan quitsaha tyaá ra numeri tsi ra, tyihj ra acetye tsihin vinu nu uhvi can. Tan tyaá ra iin jahma vita nu uhvi can. Yaha can tan jandaa ra tsi ra tsata burru jana ra, tan quihj ra tsi ra, cuahán tsihin ra nu nyaá iin vehe. Tan jahá cuenda ra tsi ra. ³⁵ Tan tsa inga quivi tsa cuñi cuhun ra Samaria. Tan tava ra uvi taahan xuhun. Tan tsaha ra tsi ra jatsii vehe can. Tan catyí ra tsihin ra: “Jaha cuenda vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñi ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

³⁶ Nu ndihj nacatyj tuhun ra Jesús, tan nducuj tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsi ra ndaahvi tsa tsinyaá ndaha nu ñasuhu nahnu? —catyí ra Jesús.

³⁷ Tacan tan catyí ra maestro ican:

—Ra tsa cundaahvi iñi tsi ra —catyí ra.

Tacan tan catyí ra Jesús:

—Cuaahan tan ica tucu yooho tacan tsihin nyivi tsa nyehe tundoho —catyí ra.

Nu tsinyaá ra Jesús vehe ña Marta tsihin ña María

³⁸ Tan quihj ra Jesús ityi cuahán ra. Tan tsaá ra iin ñuu. Tan ican iyó iin ñaha tsa nañi

Marta. Tan tsaá ra vehe ña. Tan tsaha ña quihvi ra tsitsi vehe ña. ³⁹ Tan ña Marta, iyó iin tahan ña nañi María. Tan ña María tsicunyaá ña yatyin ñi tsaha ra Jesús, tyin tyaa soho ña tsa caahán ra. ⁴⁰ Tan ña Marta cuaha xaan tyiñu javahá ña. Tan tsaá ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacoq ña tsi intuhun ñi maa yu tsihin tyiñu ihya? Cahan tsihin ña na jatyinyee ña tsi yu —catyí ña tsihin ra.

⁴¹ Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñi un tsihin tyiñu can. ⁴² Maa tyin iyó intuhun tsa ñiñi ca taahán tsi caca iñi yo. Tan ña María ihya nacatsi ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

11

Nu jacuahá ra Jesús tsi ra tsicá tsihin ra nácaa ndacan tahvi ra naha tsi Nyoo

(Mt. 6.9-15; 7.7-11)

¹ Cuví iin tsaha tsa tsicán tahvi ra Jesús. Tsa ndihj tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janaha ra Juan tsi ra tsicá tsihin ra —catyí ra.

² Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tyehen ndacan tahvi ndo, catyí ndo:

Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihi cuhva cuñi maa un, tumaa cuhva cuvi nda gloria.

³ Cuhva tsa catsi ndi tan yaha ndi iin iin quivi.

⁴ Jaha tucahnu iñi tsi ndi tsa cuenda cuatyi ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan jacacu tsi ndi tan ña cua cunye nu ña vaha tsihin ndi.

Tacan ndacan tahvi ndo —catyi ra Jesús.

⁵ Tan catyi tucu ra:

—Na catyi yo tyin iin nyooho iyó iin ra vaha iñi tsi ndo, tan tsaá ra vehe ndo tsa tsa cuaa tan catyi ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu. ⁶ Tyin iin ra vaha iñi tsi yu ndi tsaá ra yuvehe yu. Tan cañi xaan quee ra. Tan nduve tsa cuhva yu catsi ra.” ⁷ Tan nyooho cua nacahan ndo tan catyi ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuvi nduvita yu tan cuhva yu tsa cuhva yu tsi un tsa vityin.” Tacan cua catyi ndo tsihin ra. ⁸ Tan catyi yu tsihin ndo. Vasu ra vaha iñi ndo cuvi tsi ra can,

ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsa ra tsi ndo tsa ña cua cuvi cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo. ⁹ Tan tacan tucu nyooho tsihin Nyoo, ndacan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña. ¹⁰ Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

¹¹ Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca. ¹² Tan ña tuhvá ndo cuhva tujuhma tsi sehe ndo tatun tsicán tsi ndivi catsi tsi. ¹³ Nyooho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí li ra cunyaa aña ndo tun ndacan ndo tsi ra.

Nu xaan iñi tsi ra Jesús catyi nahnu tyin tsihin tunyee iñi nu ña vahajavahá ra tsa iyo (Mt. 12.22-30; Mr. 3.20-27)

¹⁴ Ra Jesús tava ra tatyí ña vaha tsa janduñhi tsi iin rayi. Tsa quitá nu tatyí can tsi ra can, cuvi nacahan ra. Tacan tan iyo xaan cuñi nyivi tsa nyehé ñi tsa cuvi. ¹⁵ Tan yihí ñi catyi ñi:

—Ra ihya, tavá ra tatyí ña vaha tsihin tunyee iñi nu Beelzebú nu cuví ityi nuu tsihin tandihi tatyí ña vaha —catyí ñi.

¹⁶ Tan yihí ñi cuñí ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi. ¹⁷ Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihí tyiñu tsa ndacá ñaha ra naha. Tan tatun iin vehe tan natahvi nyivi tsihin tahan ñi, tacan tan cua tiví nu yucú ñi. ¹⁸ Tan tacan tucu nu ña vaha, tatun natahvi nahnu, cua cundihí tunyee iñi tsa iyó tsi nahnu. Caahán yu tyehen tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. ¹⁹ Maa tyin tun tsatyin tavá yu tsi nahnu tumaa cuhva catyí ndo, ndaca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo. ²⁰ Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñí tsi catyí yacan tyin nditsa tyin Nyoo, ra taahán tsi cundaca ñaha tsi nyivi, tsa tsaá ra nu yucú ndo.

Nu jacuahá ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

²¹ Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuvi quinyaa ñasuhu. ²² Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

²³ Nyivi ña jahá tyiñu tsihin yu, jativí ñi tyiñu jahá yu. Tan tatun ña caahán ñi tuhun Nyoo tsihin nyivi, tyin cunyicun ñi tsi yu; cuñí tsi catyí tsi tyin ña tsahá ñi tsa cunyicun nyivi tsi yu.

Nu jacuahá ra Jesús tsi yo nácaa quihvi tatyí ña vaha tsi yo inga tsaha tatun naa iñi yo

²⁴ Tatun iin nu tatyí ña vaha quita nu tsi iin nyivi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: “Cunuhu nyico yu nda vehe yu nu quee yu.”

²⁵ Tacan tan tsaá nyico nu añima nu quee nu. Tan nyehé nu tyin ndihí xaan tan sii xaan caá. ²⁶ Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihi nahnu añima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyivi tsa nditsa iyó vaha ñi nu ñuhu ñayivi

27 Tsitsi tsa ndi caahán ca ra Jesús yacan, tan caná tsaá iin ñaha tsa nyí mahñu nyívi ican. Tan catyí ña:

—¡Náa tsa sii cuñí ñaha tsa jacacū tsi un, ñaha tsa jacaxin tsi un! —catyí ña.

28 Maa tyin ra Jesús catyí ra:

—Sii xaan ca cuñi nyívi tsa tsiñi tuhun caahán Nyoo tan tyaá yahvi ñi itsi —catyí ra.

Nyívi ña vaha, maa ñi maa tsa iyo cuñí ñi nyehe ñi

(Mt. 12.38-42; Mr. 8.12)

29 Tacan tan tsaá ca nyívi nu nyí ra Jesús. Tan catyí ra tsihin ñi:

—Nyívi tsa iyó vityin quiñi xaan iyó ñi. Tan nyiyo xaan iñi ñi. Cuñí ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuví tsa javahá Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehe ñi. 30 Tumaa tsa janahá ra Jonás tsi nyívi ñuu Nínive tahán tsanaha tyin ii Nyoo, tacan tucu yuhu, Rayíi tsa quee nda gloria, janahá yu tsi nyívi tsa iyó vityin tyin ii Nyoo. 31 Quiví cua tatsi tuñi Nyoo tsi nyívi, cua nandoto ñaha cuví reina ityi sur tahán tsanaha, tan cua catyí ña tyin cuhun ndo anyaya tyin maa ña vasu cañi ñuu ña, maa tyin quitsi ña, quitsi tyaa soho ña tsa tsiñi tuñi tsa cahán ra Salomón. Tan vityin cahnu ca cuví ra nyaá tsihin ndo tan ñavin ca ra Salomón. 32 Tan quiví cua cutuñi tandíhi nyívi, cua nandoto nyívi tsicoo ñuu Nínive tahán tsanaha, tan cua

catyí ñi tyin nyooho nyívi tsa iyó vityin cuhun ndo anyaya, tyin nyívi Nínive ican, nasama ñi cuhva iyó ñi quiví cahán ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

Nu janahá ra Jesús tyin na jaha yo cuenda añima yo na coo tsa nditsin jahá Nyoo
(Mt. 5.15; 6.22-23)

33 Ndi intuhun ndo tan ña tuhvá ndo tyaá ñuhū tyuma tan tyihí xeehe ndo can, a tinyíi ndo can tsitsi iin caja. Tyin ñuhū can taahán tsi cunyi can nu sucun. Tyin tatun quihvi nyívi tsitsi vehe ndo, nditsin. 34 Tinuu yo, iin ñuhū nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añima yo. Tatun iyó tsa nditsin jahá Nyoo añima yo, vaha nyívi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo. 35 Yacan cuenda jaha ndo cuenda tsi ndo, na coo tsa nditsin jahá Nyoo añima ndo, tan ña coo tsa naa. 36 Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi taníi cahnu ndo. Tumaa tsa nyaá iin ñuhū tyuma jandunditsín tsi taníi cahnu ndo cuví can —catyí ra Jesús.

Nu cuxaán ra Jesús tsihin ra maestro cuenda ley vehe

ñuhu naha ra tan tsihin ra fariseo naha ra

(Mt. 23.1-36; Mr. 12.38-40; Lc. 20.45-47)

³⁷ Tsa ndihí cahan ra Jesús tsihin nyívi, iin ra fariseo, catyí ra tsihin ra, na cahun ra cucatsi ra yuvehe ra. Tan tsaá ra Jesús vehe ra. Tan quíhví ra tsi cunyaá ra nu mesa.

³⁸ Tacan tan ra fariseo ican iyo cuñí ra tyin ña nacatyá ra Jesús ndaha ra tsa ndi cumañi ca catsi ra, tumaa cuhva iyó maa ra naha. ³⁹ Maa tyin Jutu Mañi yo Jesús catyí ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyooho. Tyin cuñí nyívi tyin vaha ndo. Maa tyin xeehe ñi suhú ndo tan javahá ndo tsa ña vaha. ⁴⁰ Ndava xaan iñi ndo. ¿A ña tsitó ndo tyin ra tsa javahá ityi tsata ndo, juvin ñi maa ra javahá ityi tsitsi ndo? ⁴¹ Taahán tsi javaha ndo tumañi iñi tsi nyívi ndaahvi, tan jatyinyee ndo tsi ñi tsihin taniñi añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

⁴² ¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndihí ca yucu tsa tsatsi ndo, tan tavá ndo intuhun tsi iin iin utsi tan tsahá ndo tsi Nyoo, maa tyin ña tyaá yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñi vaha ca ndo tsi Nyoo tan javaha ndo cuhva

cuñí ra, tan ña jandihí ndo tsa cuhva ndo diezmo can. ⁴³ ¡Ndahvi nyooho tsa cuví ndo fariseo! tyin cuñí ndo cunyaa ndo nu tyayu vaha tsitsi vehe ñuhu. Tan cuñí ndo tsa tyaa yahvi nyívi tsi ndo nuyahvi. ⁴⁴ ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyii. Tyin tsañi nyívi tsata can tan ña tsitó ñi tyin nyii ndiyi tsitsi ñaña ican. Tyin nduve ca cuhva canyii nu nyii ndiyi ican. Cuñí maa nyívi tyin vaha ndo, tan ña tsitó ñi tyin ña vaha añima ndo —catyí ra Jesús.

⁴⁵ Tacan tan nacahan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nyaa ndihí un tsi ndi —catyí ra.

⁴⁶ Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahá Nyoo tahañ tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyívi can, tan maa ndo ndi luxu ña jatyinyeé ndo tsi ñi. ⁴⁷ ¡Ndahvi nyooho! tyin janduvahá vaha ndo ñaña nu ñuhú yiqui ra cuví ndusu yuhu Nyoo tsa tsahñi ra cuví tsii tsaahnu ndo tahañ tsanaha. ⁴⁸ Yacan cuñí tsi catyí tyin ndoó ndo vaha tsa javahá tsii tsaahnu ndo naha ra. Tyin tsii tsaahnu

ndo tsahñi ra naha tsi ra cuvi ndusu yuhu Nyoo. Tan nyooho janduvahá ca ndo ñaña ra naha. ⁴⁹ Yacan cuenda catyi Nyoo tahañ tsanaha tsihin tsa tsiñi tuñi ra tyin cua jaquitsi ra tsi ra cua cuvi ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha. ⁵⁰ Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyivi iyó vityin tsa cuenda tandihi ra cuvi ndusu yuhu ra tsa tsahñi tsii tsaahnu ndo naha ra nda cuanda tsinu ñuhu ñayivi tan nda cuanda vityin. ⁵¹ Nda cuanda niñi ra Abel tsa tsati tsa tsahñi ra Caín yañi ra tsi ra, tan nda cuanda niñi ra Zacarías tsa tsahñi nyivi tsitsi vehe ñuhu yatyin nu nyaá altar. Yacan cuenda catyi Nyoo tyin cua tatsi tuñi ra tsi nyivi tsa iyó vityin tsa catyi cuaty nyivi tsa tsicoq tahañ tsanaha. ⁵² Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quihvi nyivi ityi nu nyaá Nyoo. Tan ndi maa ndo ña quihvi ndo nu nyaá Nyoo. Tan ndi ña tsahá ndo tsa quihvi inga nyivi tsa cuñi quihvi —catyi ra Jesús.

⁵³ Ndihi cahañ ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaan xaan ra naha tan quitsaha nducú tuhun xaan ra naha tsi ra Jesús. ⁵⁴ Tyin cuñi ra naha tsa cahan ra Jesús iin tsa ña vaha, tyin

tacan tan cuvi tyaa ra naha cuaty tsi ra.

12

Nu jacuahá ra Jesús tyin ña cuvi tyihi xeehe yo cuaty yo

¹ Cuenda mil nyivi ndu iin nda cuanda catyihí tahañ ña ñi, tyin cuaha xaan ñi. Tacan tan ra Jesús cahañ jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuaty ra tsa cuvi tumaa yutsan iya. Tyin ndaá paan jahá yutsan iya, tan tacan cuvi cuaty ra can naha ra. Tyin jahá ra naha tyin vaha ra. Maa tyin ña cuvi tyihi xeehe ra naha cuaty ra naha. ² Tyin nduve iin tsa yihí xeehe tan cuñi yo, tyin ña cua quituvi. Tan nduve tsa xeehe tan cuñi yo, tyin ña cua coto nyivi. ³ Yacan cuenda, náa ndihi tsa caahán ndo nu xeehe, cua quita tsi nu nditsin. Tan náa ndihi tsa caahán ndo tsitsi vehe ndo, cua cana tsa nyivi jiñi vehe.

¿Yóo taahán tsi nayuhvi yo, a tsi nyivi a tsi Nyoo?

(Mt. 10.28-31)

⁴ "Tan catyi yu tsihin ndo tsa cuvi ndo ra vaha iñi tsi yu, tyin ña nayuhvi ndo tsi nu tsahñi cuñu ñuhu yo. Tyin yaha can tan nduve ca tsa cuvi javaha nu tsi yo. ⁵ Maa tyin cua catyi yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuvi quinyaa tsa nyito ndo. Tan yaha yacan tan cuvi tyihi ra tsi ndo anyaya.

⁶Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti. ⁷Tan nyoooho, nyaá yahvi ca ndo nu Nyoo tan ñavin ca tsa cuaha saa can, tan nda cuando ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuando ña nayuhvi ndo.

Na ña nayuhvi yo cahan yo tuhun ra Jesucristo tsihin nyivi

(Mt. 10.32-33; 12.32; 10.19-20)

⁸Catyí yu tsihin ndo tyin tandihi nyoooho tsa janahá ndo tsi nyivi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayii nda gloria quee yu. ⁹Maa tyin nyoooho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuando yu cuví ndo. ¹⁰Tan vasu cuxaan nyivi tsi yuhu, Rayii tsa quee nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí Ii Nyoo ña cua coo tucahnu iñi tsi ñi cuando yacan.

¹¹Quivi tsa cua cundaca nyivi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo. ¹²Tyin cuhva tsa cua nacahan ndo, cua cuhva maa Tatyí Ii Nyoo náa tuhun

taahán tsi cahan ndo —catyí ra Jesús.

Nu tsaḥa cuando ra Jesús tyin ña taahán tsi nyiyo iñi yo tsa cuca

¹³Iin ra tsa nyii tsihin nyivi cuaha tsa ndu iin nu nyii ra Jesús, catyí ra tsihin ra Jesús:

—Maestro, cahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

¹⁴Tacan tan catyí ra Jesús tsihin ra:

—¿Tsa, yóo tsaḥa tsi yu tsa cuví yu juez tan natahvi yu ndaha tyiñu ndo? —catyí ra.

¹⁵Tan yahá can tan catyí ra nuu nyivi cuaha can:

—Jaha xaan ndo cuando tan ña nyiyo xaan iñi ndo tyin ña tsiñi ñuhu tsa coo cuaha ndaha tyiñu yo tan coonyito yo.

¹⁶Tacan tan tsaḥa cuando ra Jesús iin cuhva tsi tandihi nyivi, tan catyí ra:

—Tsicoo iin ra cuca. Tan cuaha xaan ndaha tyiñu ñihí ra nu jahá tyiñu ra. ¹⁷Tacan tan tsicá iñi ra: “¿Nacaa javaha yu? Nduve nu quihí tandihi ndaha tyiñu ihya.”

¹⁸Tan catyí ra: “Tsa tsitó yu nácaa cua javaha yu. Cua caní yu tandihi yaca nyihi yu, tan cua javaha yu tsa nahnu ca, tan natyihí yu tandihi ndaha tyiñu can tsihin tandihi ca tsa iyó tsi yu tsitsi can. ¹⁹Tacan tan cua catyí yu tsihin yu: Cuaha xaan ndaha tyiñu naquihin vaha un, tan vityin cuahán maa cuiya, quitatu, çatsi vaha, çoho vaha, tan çusi iñi.” ²⁰Tan Nyoo catyí

ra tsihin ra can: “Ra soho, tsacuaa vityin cua cúu un, tan tsa naquihin vaha un ¿Yóo tsií cua cuví yacan?” catyí Nyoo tsihin ra can. ²¹ Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

Ña caca xaan iñi yo náa ndihi tsa tsiñi ñuhu tsi yo
(Mt. 6.25-34)

²² Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihi ndo tsa catsi ndo, tan ndi jahma tsa cunditsi ndo. ²³ Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo. ²⁴ Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa. ²⁵ Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo. ²⁶ Tatun ndi luxu can tan ña cuví jahá ndo, ¿nacuenta tsa tsicá xaan iñi ndo tandihi ca tsa tsiñi ñuhu tsi ndo?

²⁷ Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandihi tsa cuca ra tan ña sii caá tsa tsinditsi ra tumaa tsa jacunditsí Nyoo tsi yutun ita ican. ²⁸ Tatun tacan ñi jacunditsí Nyoo tsi yutun ita tsa iyó nu tsiqui vityin,

tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra. ²⁹ Ña caca xaan iñi ndo tuhun tsa catsi ndo tan tsa coho ndo. ³⁰ Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñi ñuhu tsi ndo. ³¹ Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihi tsa tsiñi ñuhu tsi ndo.

Tsa vaha tsa iyó gloria
(Mt. 6.19-21)

³² 'Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñi ra tsi ndo. Yacan cuenda cua cuhva ra quihvi ndo nu ndacá ñaha ra. ³³ Xico ndo tsa iyó tsi ndo. Tan jatyinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihi tsa vaha. Tyin yoñi yóo jativi can ndacan, ndi nu ñasuhu, tan ndi quití. ³⁴ Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihi aña ndo —catyí ra.

Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

³⁵ Cuatu vaha ndo tsi yu tsihin ñuhu nditsin Nyoo quivi quitsi yu inga tsaha. ³⁶ Tan cuví ndo tumaa musu tsa ndatú tsi tsitoho ra nahá náa cuhva quitsi ra tsa cuahan ra iin vico tindaha. Tan ndatú

ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsa ra. ³⁷⁻³⁸ Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra. ³⁹ Tan coto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra. ⁴⁰ Tan tacan cuví tucu nyooho, cūatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

Musu vaha tan musu ña vaha
(Mt. 24.45-51)

⁴¹ Tacan tan quitsaha nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihi nyivi?

⁴² Tacan tan nacahan ra Jesús, tan catyí ra tsihin ra:

—Musu tsa tyaa soho tsa caahan tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihi ca musu ican. ⁴³ Tan sii xaan cuñi musu ican tatun cuhva tsa jahá tyiñu ra, tan cua tsa tsitoho ra. Tyin tyaa yahvi ra tandihi tsa taahan tsi ica ra. ⁴⁴ Tan catyí

yu tsihin ndo tyin tsa nditsa. Tyin tsitoho ra cua nacuhva ra tandihi tsa cumí ra, cua quihvi ndaha ra. Tyin vaha tyaa yahvi ra tsihin tyiñu jahá ra. ⁴⁵ Maa tyin tatun tsicá iñi musu ican tyin naha xaan cuahan tsitoho ra, tan quitsaha cañi ra tsi inga musu tsa cutahan tsihin ra tan ñiñaha jahá tyiñu ican, tan ña cuñi ra jaha tyiñu ra. Tyiñu tsatsi ñi tan tyiñu tsiñi nyixi ñi iyó ra. ⁴⁶ Tacan tan sana iñi ra cua tsa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñú iñi tsa caahan ra.

⁴⁷ Tan iin musu tsa tsitó nácaa iyó tsitoho ra tan ña javahá ra cuhva cuñi tsitoho ra, cuaha xaan tundoho cua nyehe ra. ⁴⁸ Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javaha ra. Tatun iin musu tan cuaha tsa tsaha tsitoho ra tsi ra, cuaha tyiñu taahan tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahan tsi nacuhva cuenda ra tsi tsitoho ra.

Nu cahan ra Jesús tyin tsacatyí ra cua cañi tahan nyivi tsihin nyivi ñi
(Mt. 10.34-36)

⁴⁹ Tumaa tsa jatahan yu ñuhu nu ñuhu ñayivi, tacan cuví tyiñu vatsí yu. ¡Tan cuñi xaan yu tsa nacayu catyín ña

ñuhu ihya! ⁵⁰ Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihi tyiñu jahá yu. ⁵¹ Cuñí maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiin yu tsi ndo. ⁵² Tyin tsa vityin tan ityi nuu ca, uhun taahan nyivi iin vehe ñi cua cusiiñ ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi. ⁵³ Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe sihi cua cañi tahan ña tsihin sehe sihi ña. Tan ña cuví sehe sihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

Nu cahan ra Jesús tsihin nyivi tyin ña nacotó ñi tyin tsa tsaq Sehe Nyoo nu yucú ñi
(Mt. 16.1-4; Mr. 8.11-13)

⁵⁴ Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví. ⁵⁵ Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo. ⁵⁶ Nyooho jahá ndo tsa tsitó xaan ndo, tan nacotó ndo tandihi tsa cuví andivi, tan tandihi tsa cuví nu ñuhu ñayivi ihya. Tan ¿nacuenda tsa

ñanacotó ndo náa tyembu iyó ndo vityin?

Nducu yo cuhva nácaa coo vaha yo tsihin ra tsicán cuatyí tsaha yo coto cahun yo anyaya

(Mt. 5.25-26)

⁵⁷ ¿Nacuenda ña jahá ndo cuenda, ndáa tsa vaha tan ndáa tsa ña vaha? ⁵⁸ Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsaa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa. ⁵⁹ Tatun tacan cua cuví, catyí yu tsihin ndo tyin ña cua quita ndo nda cuanda tyahvi ndo tandihi tsa taahán tsi tyahvi ndo —catyí ra Jesús.

13

Cuñí tsi tsa nasama yo cuhva iyó yo, tun ña cuñí yo cahun yo anyaya

¹ Tacan tan juvin ñi quivi can nyecu juhva ra naha. Tan quitsaha nacatyí tuhun ra naha tsihin ra Jesús tsa javaha ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan saca nuu niñi ra ican naha ra tsihin niñi quiti tsa tsijamañi ra ican naha ra. ² Tan nacahan ra Jesús tan catyí ra tsihin ra naha:

—¿A tsicá ñi nyooho tyin cahnu xaan ca cuatyí ra Galilea ican naha ra tan ñavin ca tandihí ca ra ñuu ra naha, tan yacan tsihi ra naha? ³ Ñavin. Tyin tatun nyooho tan ña nasama ndo cuhva iyó ndo, tacan cua cunaa ndo. ⁴ Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñi maa ndo? ⁵ Ñavin. Tyin tatun nyooho tan ña nasama ndo cuhva iyó ndo, cua cunaa ndo.

Nu tsaha cuenda ra Jesús iin cuhva nácaa ndatú Nyoo tsa nasama yo cuhva iyó yo

⁶ Tacan tan tsaha cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaatun nu ñuhu ra. Tan tsahan ra tsinyehé ra tatun ñi tsiti tun. Tan nyehe ra tyin nduve. ⁷ Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehe yu tatun iyó tsiti tun. Tan nduve maa tsiti tun ñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra. ⁸ Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaahyú. ⁹ Vasiqui tacan tan cua cuhva tun tsiti. Maa tyin tatun ña cuhva tun

tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quivi quitatú nyivi janduvaha ra Jesús tsi iin ñaha tihí tsata

¹⁰ Iin quivi tsa quitatú nyivi, jacuahá ra Jesús tsi nyivi tsitsi vehe ñuhu. ¹¹ Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuhvi ña tsa tihí tsata ña. Tan ña cuví ndundoo ña. ¹² Tacan tan nyehe ra Jesús tsi ña. Tan cana ra tsi ña. Tan quitsaha caahán ra tsihin ña, tan catyí ra:

—Tsa nduvaha un. Nduve ca cuehe ndohó un —catyí ra tsihin ña.

¹³ Tacan tan tyisó ra ndaha ra jiñi ña. Tan iin yaha ñi tan ndundoo ña. Tacan tan quitsaha jacahnú ña tsi Nyoo. ¹⁴ Maa tyin ra cuví ityi nuu vehe ñuhu, cuxaan xaan ra tsi ra. Tyin quivi quitatú janduvaha ra tsi ña. Tan catyí ra tsihin nyivi nyecú ican:

—Iyó iñu taahan quivi taahan tsi jaha tyiñu yo. Tacan quivi quitsi ndo cuví ndo numeri. Tan ña quitsi ndo quivi quitatú yo —catyí ra.

¹⁵ Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsí tucu nyooho quiti jana ndo tan jacohó ndo ndutya tsi ti quivi quitatú yo? ¹⁶ Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A

ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

¹⁷ Tacan tan cuhva tsa cahān ra Jesús yacan, tandihí maa nu xaan iñi tsi ra nducahan nuu nahnu. Maa tyin tandihí ca maa nyivi sii xaan cuñí ñi tsihin tsa cahnu tsa iyo javahā ra Jesús.

Nu cahān ra Jesús tyin tumaa iin tsiṭi mostaza cuví tsa ndacá ñaha Nyoo tsi yo

¹⁸ Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi? ¹⁹ Tumaa iin tsiṭi mostaza, tacan cuví tsi. Tyin iin ra tatsi ra iin tsiṭi ican nu ñuhu ra, tan canā iin yutun luhlu, tan tsahnu tun. Tan cuví tun iin yutun cahnu xaan. Tacan tan tsaā saa naha ti nuu yutun ican. Tan javahā ti taca ti nuu tun.

Nu cahān ra Jesús tyin tumaa yutsan iya, tacan cuví tsa ndacá ñaha Nyoo tsi yo

(Mt. 13.33)

²⁰ Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo? ²¹ Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá tani yutsan paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

Yuvehe tihin tan ityi cuiñi tsa cuahán nu nyaá Nyoo

(Mt. 7.13-14, 21-23)

²² Ityi cuahán ra Jesús ñuu Jerusalén caahán ra tuhun

Nyoo tsihin nyivi tandihí ñi ñuu nu yahá ra. ²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahān ra Jesús, tan catyí ra:

²⁴ —Nanducu ndo cuhva quihvi ndo yuvehe tihin. Tyin tacan cuví quihvi ndo nu ndacá ñaha Nyoo. Tyin cuaha xaan ndo cuñí ndo quihvi ndo ndacan, tan ña cuví.

²⁵ Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyooho tsa nyecú ndo ityi tsata cua jandatsan ndo yuvehe, tan cua catyí ndo: “Nuña yuvehe.” Tan ra ican cua catyí ra tsihin ndo: “Ña tsitó yu ndáa ityi quee nyooho.”

²⁶ Tacan tan nyooho cua catyí ndo: “Nyuhu tsatsi ndi tan tsihi ndi tsihin un. Maa un jacuahā un tuhun Nyoo tsi ndi ityi nu nyecú vehe ndi”, cua catyí ndo tsihin ra. ²⁷ Maa tyin ra ican cua nacahan ra tsihin ndo tan cua catyí ra: “Tsa catyí yu tsihin ndo tyin ña tsitó yu ndáa ityi quee ndo. Catsiyo nyaha ndo nu nyaá yu tandihí nyooho nyivi javahá tsa ña vaha”

²⁸ Tacan tan cua vacu ndo tan catsan ña cua cuví nuhu ndo tsa cua nyehe ndo tsi ra Abraham tsihin ra Isaac tan ra Jacob, tan tsihin tandihí ra cuví ndusu yuhu Nyoo tsa tsicoo tahan tsanaha. Tyin nyecú ra naha nu ndacá ñaha Nyoo. Tan nyooho ndoo ndo ityi tsata. ²⁹ Tan cua quitsi

nyivi ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra. ³⁰ Tan juhva nyivi tsa cuahán ityi nuu vityin, ñi can cuhun nu ndihi. Tan juhva nyivi tsa cuahán nu ndihi ña, ñi can cua cuhun ityi nuu —catyí ra.

Nu cuihya xaan cuñí ra Jesús nyehé ra tsi nyivi ñuu Jerusalén

(Mt. 23.37-39)

³¹ Juvín ñi maa quivi can tsaá juhva ra fariseo. Tan catyí ra naha tsihin ra Jesús:

—Quita ihya tyin ra Herodes cuñí ra cahñi ra tsi un —catyí ra naha.

³² Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuví tumaa ñicuii, tyin nda cuanda quita quivi tsa ndihi tyiñu jahá yu tsa tavá yu tatyí ña vaha tsi nyivi tan tsa janduvahá yu tsi nyivi cuuhví tsihin cuehe, tacan tan cundihi tyiñu jahá yu. ³³ Maa tyin nda cuanda tahan tsi tsa ndihi maa tyiñu jahá yu, tacan tan cuhun maa yu cua cúu yu nda ñuu Jerusalén. Tyin ña cuví cúu iin ra cuví ndusu yuhu Nyoo ityi tsata ñuu Jerusalén.

³⁴ ¡Ndahvi nyooho nyivi Jerusalén! tyin tsañí ndo tsi ra cuví ndusu yuhu Nyoo. Tan cañí ndo yuu tsi tandihi ra tsa jaquitsi Nyoo nu yucú ndo. Tan yuhu cuaha xaan tsaha cuñí yu jaha cuenda yu tsi ndo, tumaa jahá cuenda

iin ndivi sihi sehe ti, tan naquihín vaha ti tsi ti naha ti tsitsi nditsin ti. Maa tyin maa ndo ña cuñí ndo. ³⁵ Nyehe ndo vityin tyin tsa nacoq yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan ra vatsí tsihin sivi Nyoo Jutu yo —catyí ra Jesús.

14

Nu janduvahá ra Jesús tsi iin ra cuuhví tsa iyó cuiñu quivi quitatú nyivi

¹ Cuví tsi iin quivi quitatú nyivi. Tan ra Jesús cuahán ra cua catsi ra vehe iin ra cuví ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús. ² Tacan tan yatyin ñi nuu ra Jesús nyaá iin ra cuuhví tsa iyó cuiñu. ³ Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyivi cuuhví quivi quitatú yo? ¿Náa catyí ley Nyoo? —catyí ra.

⁴ Tacan tan tandihi ra naha, taxin ña tsinyecu ra naha. Tacan tan tyiso ndaha ra Jesús jiñi ra cuuhví can. Tan janduvahá ra tsi ra. Tan catyí ra tsihin ra na cunuhu ra. ⁵ Tacan tan catyí ra Jesús tsihin ra fariseo naha ra:

—Tatun nyooho tan canacava iin burru jana ndo, a inga quití jana ndo, tsitsi xahva, ¿a ña cua tava ndo tsi

ti tsa numi ñi, vasu ndi maa quívi quitatú yo cuví? —catyí ra.

⁶ Tacan tan taxin ña tsinyecú ra fariseo naha ra. Tyin ña ñihí ca ra naha náa nacahan ra naha.

Nu jacuahá ra Jesús tsi yo tyin ña vaha tsa cahnu jaha yo tsi yo

⁷ Nyehe ra Jesús tyin tandihí ra nyecú vico ican nacatsí ra naha tyayu vaha ca cunyecu ra naha. Tacan tan tsahá cuenda ra tyehen tsi ra naha:

⁸ —Ndáa quívi cahun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuví tan ñavin ca maa ndo, ⁹ tan coto quitsi ra tsa caná tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan cua cuhva ndo tyayu can. Tacan tan cua cunyecu ndo nu ndihí ña. ¹⁰ Maa tyin catyí yu tsihin ndo, tyin ndáa quívi cana ra tsi ndo, cūaahan ndo, tan ñavin nu vaha cunyecu ndo. Tyin tacan tan cua quitsi maa ra tsa caná tsi ndo tan cua cahan ra tsihin ndo: “Amigos, ñaha ndo, cunyecu ndo nu tyayu vaha ihya.” Tan tacan cua jacahnu ca ra tsi ndo nu nyívi nyecú yuhu mesa tsihin ndo. ¹¹ Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuví ra —catyí ra Jesús.

¹² Tacan tan catyí tucu ra tsihin ra caná tsi ra nu iyó vico can:

—Ndáa quívi coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyívi un, ndi tsi nyívi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un. ¹³ Maa tyin catyí yu tsihin un tyin ndáa quívi coo vico vehe un, cana tsi nyívi ndaahvi, nyívi cuuhví, nyívi coxo, tan tsihin nyívi cuaa. ¹⁴ Tacan tan sii cua cuñí un, tyin ñi ican ña cua cuví natyahvi ñi tsi un. Maa tyin cua natyahvi Nyoo tsi un quívi cua nandoto un tsihin nyívi vaha.

Nu tsahá cuenda ra Jesús iin cuhva nácaa caná ra tsi yo na quihvi yo nu ndacá ñaha Nyoo

(Mt. 22.1-10)

¹⁵ Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyívi tsa cua catsi nu ndacá ñaha Nyoo —catyí ra.

¹⁶ Tacan tan catyí ra Jesús tsihin ra:

—Iin ra ican jacoḡ ra iin vico cahnu xaan vehe ra. Tan caná ra cuaha xaan nyívi.

¹⁷ Tacan tan tsaá cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa tahanan tsi cuhva cuxiñi ñi. ¹⁸ Maa tyin tandihí ñi ican quitsahá caahán ñi

tyin ña cua cuhun ñi. Tan iin ra ican catyí ra: “Ndi jata yu iin ñuhu. Tan cuñí tsi cuhun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cuhun yu.”¹⁹ Tacan tan inga ra ican catyí ra: “Ndi jata ñi yu uhun taahan yunta. Tan cuhun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuvi cuhun yu.”²⁰ Tacan tan inga tucu ra ican catyí ra: “Ndi tindaha cuii ñi yu, tan ña cua cuvi cuhun yu”, catyí ra.²¹ Tacan tan musu ra ican cuanuhu ra. Tan catyí tuhun ra tandihi tsa cuvi ican tsihin ra tsitoho ra. Tsa tsiñi tsitoho ra tsa tacan, tan cuxaan xaan ra. Tan catyí ra tsihin musu ra: “Cuaahan vityin tandihi maa ityi. Tan quitsi ndaca un tsi nyivi ndaahvi, nyivi cuuhvi, nyivi coxo, tan tsihin nyivi cuaa”, catyí ra.²² Tan tsa yaha tsa nyico musu ican tan catyí ra tsihin ra tsitoho ra: “Tsa javaha yu tandihi maa tsa cahan un tsihin yu. Tan nuña ca tsitsi vehe”, catyí ra.²³ Tacan tan tsitoho ra catyí ra tsihin ra: “Cuaahan cua nducu ca nyivi tandihi maa ityi. Tan jañiñi un tsi ñi na quitsi ñi, tyin na cutu tsitsi vehe yu.”²⁴ Tyin catyí yu tsihin un tyin ndi intuhun ñi tsa cana yu tsa jihna, ña cua catsi ñi tsihin yu”, catyí ra —catyí ra Jesús.

Cuaha xaan tundoho nyehéyo tatun cuenda ra Jesús

yihíyo

(Mt. 10.37-38)

²⁵ Cuaha xaan nyivi nyicún tsi ra Jesús. Tacan tan nanyehe ra tsi ñi, tan catyí ra tsihin ñi:

²⁶ —Tandihí nyooho tsa nyicún tsi yu, tatun cuñí ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñí ca ndo tsi maa ndo tsa nuu yuhu, ñavin cuenda yu yihí ndo.²⁷ Tyin nyooho tsa ña cuñí nyehe tundoho tsa cunycun ndo tsi yu, ña taahán tsi cuvi ndo nyivi cuenda yu, tyin tsa nyehé ndo tundoho, yacan cuvi cruu tsa taahán tsi cuiso ndo.²⁸ Tyin tun cua javaha ndo iin vehe, nacañi nuu jihna ndo jiñi ndo tan tyihi tuñi iñi ndo tun quita vehe cahnu can tsihin xuhun tsa nyii tsi ndo.²⁹ Tyin tatun quitsaha jandaá ndo vehe ican, tan ña cuvi jandihí ndo tyin nduve ca xuhun ndo, cua vacu nducu nyivi tsi ndo.³⁰ Tan cua catyí ñi: “Ra ican quitsaha javahá ra vehe ra, tan ndi ña cuvi jandihí ra can”, cua catyí ñi.³¹ A tatun iin rey tan cuñí ra cañi tahan ra tsihin inga rey ¿a ña cunyaa jihna ra tan nyehe ra tatun ñihi tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican?³² Tan tatun tsitó ra tyin ña cua cuvi jaha canaa ra tsi inga rey ican, tacan tan cañi ca vatsí inga rey ican, tan cua jacuhun ra tsi musu ra tyin na catyí tuhun ra naha

tsihin inga rey ican na jandihí taxin ra itsi. ³³ Tan tacan cuví nyooho. Tatun ña cahnya iñi ndo tandihí maa tsa cuñí ndo tan tandihí tsa cumí ndo, ña cua cuví cunyicun ndo tsi yu.

Nu jacuahá ra Jesús tyin tumaa ñi tsa ndihí tsa uhva, tacan cuví yo tatun ndu uvi iñi yo tsa tsinú iñi yo tsi ra

(Mt. 5.13; Mr. 9.50)

³⁴ Vaha ñi tyin jacu uhvá tsi tsa catsi yo. Maa tyin tatun ndihí tsa uhva tsi, ña vaha ca tsi. ³⁵ Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyooho tsa iyó soho, tyaa soho ndo tuhun caahán yu —catyí ra Jesús.

15

Nu jacuahá ra Jesús tyin tumaa mbee tsa cuanaá tacan cuví yo

(Mt. 18.10-14)

¹ Tandihí ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhvā ra naha nu nyií ra Jesús, tan tyaá soho ra naha tsa caahán ra. ² Tacan tan ra fariseo naha ra tsihin ra maestro cuenda ley vehe ñuhu naha ra quitsahā caahán nyaa ra naha tsi ra Jesús, tan catyí ra naha:

—Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyí ra naha.

³ Tacan tan ra Jesús tsahā cuenda ra kuhva ihya, tan catyí ra:

⁴ —Nyooho tsa iyó iin cientu mbee jana, tun cunaa

intuhun ti, ¿a ña cua nacoo ndo tsi tandihí ca ti, tan cunanducu ndo tsi mbee tsa cunaa can nda cuanda tsa nañihi ndo tsi ti? ⁵ Tan tsa yaha nañihi ndo tsi ti, tyiso soco ndo tsi ti. Tan sii xaan cua cuñi ndo. ⁶ Tan tsa tsaa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivi iyó yatyin yuvehe ndo, tacan tan catyí ndo tsihin ñi tyin na cusii ndihí iñi ñi tsihin ndo tyin nañihi ndo mbee jana ndo tsa tsinaa. ⁷ Tan catyí yu tsihin ndo, tyin tacan tucu sii xaan ca cuñi ángel Nyoo tsa iyó gloria tsacatyí intuhun ra tsa iyó cuatyí tan nasamá ra kuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñi ca tsi tsa nasama ñi kuhva iyó ñi.

Ñaha tsa tsinaa xuhun tan nañihi ña

⁸ Tan catyí yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihvi ña tanií tsitsi vehe ña. Tan cua nanducu ña xuhun can nda cuanda tsa nañihi ña can. ⁹ Tan tsa yaha nañihi ña, cua cuhun ña cunanducu ña tsi ñi vaha iñi tsi ña, tsihin nyivi tsa iyó yatyin yuvehe ña, tan cua cahan ña tsihin ñi: “Cusii ndihí iñi ndo tsihin yu tyin tsa nañihi yu xuhun yu tsa tsinaa”, cua catyí ña. ¹⁰ Tan catyí yu tsihin ndo tyin tacan tucu sii cuñi ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

Nu jacuahā ra Jesús nácaa cuñí Nyoo tsi iin ra ndu uvi iñi cuatyí

11 Tacan tan tsahá cuenda ra Jesús inga cuhva ihya tan catyí ra:

—Iin ra, iyó uvi taahan sehe ra. 12 Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahvi sava ra tsa tsií ra tan tsahā ra tsi nduvi taahan sehe ra. 13 Tan ña cuaha ñi quivi tan ra luhlu ican xico ra tandihí maa tsa tsahā jutu ra tsi ra. Tan jandu iin ra xuhun ra, tan quihín ra ityi, cuahán ra iin ñuu cañi xaan. Tan ndacan tsicoo ra tan janaā ra tandihí maa xuhun ra tsihin tusi iñi. Tan quiñi xaan icá ra tsicá nuu ra. 14 Tacan tan tsaā tama ityi nu iyó ra. Tan quit-sahā tsisocó ra tyin tandihí xuhun ra janaā ra. 15 Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi ti naha ti. 16 Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñí ra catsi ra tsa tsatsí quini ican naha ti. Tan yoñi maa tsahā tsa catsi ra. 17 Tacan tan nducuhun iñi ra tsi jutu ra. Tan nacañi jñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñí cúu yo jahá soco. 18 Vityin cua cunuhu yo nu nyaá jutu yo. Tan cua catyí yo tsihin ra tyin tsicoo cuatyí yo nuu Nyoo tan

tacan tucu nuu maa ra. 19 Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuví tsi yo” cuñí ra tsicá iñi ra.

20 Tacan tan quihín ra ityi cuanuhu ra nda vehe jutu ra. Tan cañi ca vatsí ra tan nyehe jutu ra tsi ra, tan cundaahvi iñi ra nyehé ra tsi sehe ra. Tan tsinū xaan ra tsijatahan ra tsi ra. Tan tsinumí nyaa ra tsi ra. 21 Tacan tan catyí ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuví yu sehe un”, catyí ra tsihin jutu ra. 22 Maa tyin jutu ra tava tyiñu ra, tan catyí ra tsihin musu ra: “Tava ndo jahma vaha tan jácunditsi ndo tsi ra ihya. Tan tyihí ndo iin xehe nundaha ra. Tan tyihí ndihí ndo zapatu tsaha ra. 23 Tan cahñi ndo iin becerru tsa xaahan vaha ca, tyin catsi yo tsi ti. Tyin vityin cua coo yo vico. 24 Tyin ra sehe yu ihya tsa tsihi ra cuñi maa yu, tsicá iñi yu. Cuñi maa yu tyin ña cua nyehe ca yu tsi ra, tan tsaā nyico ra”, catyí jutu ra can. Tacan tan quitsahā tsicoo ñi vico. Tan si xaan cuñi ñi tyin tsaā nuhu nyico ra.

25 Tacan tan inga sehe ra, ra tsa tsitsa, nyii ra tsicuhu. Tan tsa cua tsaā nuhu ra nda yuvehe ra, tan tsiñi ra tyin iyó yaa. Tan tuví iñi ra tyin tsañi ñi yaa. 26 Tacan tan tsa cuyatyn ra nda yuvehe ra tan canā ra tsi iin musu ra. Tan tsicā tuhun ra tsi ra can

náa cuví xaan can. ²⁷ Tacan tan musu can catyí ra: “Ra yañi un tsaá nuhu ra. Tan yacan tava jutu un tyiñu tyin na cahñi ra naha iin becerru xaahan. Tyin vaha tsaá ra yañi un, tan nduve náa tañan ra”, catyí musu can tsihin ra. ²⁸ Tacan tan nduxaan xaan cuñi ra can. Tan ña cuñi ra quihvi ra tsitsi vehe. Tan jutu ra tsahan ra tsicahan ndaahvi ra tsihin ra, tyin na quihvi ra tsitsi vehe. ²⁹ Tacan tan nacahan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu. ³⁰ Maa tyin vityin tsaá nuhu nu sehe un ihya, nu tsa janaa xuhun tsihin ñaha sii iñi. Tan tsaha un iin becerru quití xaahan tsi nu”, catyí ra tsihin jutu ra. ³¹ Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihi quivi. Tan tandihi tsa cumí yu, tsi un cuví can. ³² Tan vityin taahán tsi tyin javaha yo vico ihya, tan cusii iñi yo. Tyin tsaá nuhu ra yañi un, ra tsa tsihi, cuñi maa yu. Tumaa tsa nandoto nyico ra cuví can, tyin tsinaa ra, tan nañihí yo tsi ra inga tsaha”, catyí ra tsihin sehe ra —catyí ra Jesús.

16

Nu jacuahá ra Jesús tsi yo nácaa javaha yo tumañi iñi tsihin tsa iyó tsi yo

¹ Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yihí ndaha tandihi tyiñu jahá ra cuca can. Tan tsahan iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaá ra tandihi tsa iyó tsi ra. ² Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi nu nyaá yu. Vaha ca nacuhva cuenda un tandihi tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra. ³ Tacan tan ra yihí ndaha tyiñu can tsicá iñi ra: “¿Nacaa cua javaha yu vityin? Tsiho yu ña cuñi ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahán xaan nuu yu caya yu tsitsi ñuu. ⁴ Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua tsaa yu vehe ñi”, tsicá iñi ra can. ⁵ Tacan tan cana ra tsi intuhun intuhun ra tsa nyaá cuenda tsi tsiho ra. Tan catyí ra tsihin iin ra ican: “¿Náa nyaá cuenda un tsi tsiho yu?” catyí ra. ⁶ Tacan tan nacahan ra ican tan catyí ra: “Yuhu nyaá cuenda yu cumi mil litru acetye.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un

tutu tsaahnu ican”, catyí ra. Tacan icā ra can, tan cuahán ra. ⁷ Tacan tan tsaā inga ra. Tan tsicá tuhun tucu ra tsi ra ican: “¿Náa nyaá cuenda un tsi tsitoho yu?” Tan nacaahan ra ican: “Nyaá cuenda yu iin mil arroba trigu”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra. ⁸ Tacan tan tsito tsitoho ra tsa ña vaha tsa javahā ra. Tan iyo xaan cuñí ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaá yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo añima.

⁹ Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatyinyee ndo tsi nyivi. Tan quivi tsa cua ndihi tsa cuca, cua ñihi ndo coo ndo nu ña cua naa maa.

¹⁰ Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo. ¹¹ Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó

gloria tsi ndo. ¹² Tyin tandihi tsa iyó tsi ndo, maa Nyoo tsaah nuu itsi tsi ndo. Tan tatun ña javahá ndo tumañi iñi tsihin tsi, ña cua cuhva ra tsa cuvi tsi ndo.

¹³ Iin musu ña cuví coo uvi taahan tsitoho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuvi cuñi ndo tsi Nyoo tatun cuñi tucu ndo tsa cuca —catyí ra Jesús. ¹⁴ Tan tsa tsiñi ra fariseo naha ra tandihi tsa cahan ra Jesús, tacan tan quitsahā tsacú nducu ra naha tsi ra. Tyin maa ra fariseo naha ra cuñi xaan ra naha xuhun. ¹⁵ Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha añima ndo. Tandihi tsa cahnu cuñi maa nyivi, Nyoo ña cuñi ra nyehe ra yacan.

Ley Nyoo tsa tyaa ra Moisés, tan tsihin tsa ndacá ñaha Nyoo tsi yo

¹⁶ Ley tsa tsaah Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo tahañ tsanaha, yacan cuví tsa janahā ityi tsi nyivi nda cuanda quivi tsa quitsi ra Juan. Tan ra Juan quitsahā caahán ra tuhun vaha tyin tsa cuñi quitsi Nyoo tyin cua cundaca ñaha ra. Tan tandihi nyivi nducú xaan ñi cuhva tsa quihvi ñi nu ndacá ñaha ra.

17 "Tan catyí yu tsihin ndo, tyin vasu cunaa andiví tan nu ñuhu ñayiví ihya, maa tyin tsa cuví ley Nyoo tsa tyaa ra Moisés, ña cua cunaa tsi tyin cua cundaa tandihí tsi.

Nu jacuahá ra Jesús tyin ña vaha tsa nacoo ihñi rayii ñasihi ra

(Mt. 19.1-12; Mr. 10.1-12)

18 "Tatun iin rayii tan iyó ñasihi ra, tan nacoo ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayii tsihin ñaha tsa nacoo yii, coo tucu cuatyí ra can nuu Nyoo.

Nu jacuahá ra Jesús tsi nyiví cuenda ra cuca tsihin ra Lázaro

19 "Tsicoo iin ra cuca. Tan vaha xaan jahma tsinditsi ra. Tan tandihí quiví iyó vico jahá ra tan tsatsí vaha ra. 20 Tan tsicoo tucu iin ra ndaahvi tsa tsinañi Lázaro. Tan ra ihya cuaha xaan ndihyí iñi tsi ra. Tan nyaá ra yuvehe ra cuca ican. 21 Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda cuanda ina tan tsaá ti naha ti nu nyaá ra, tan tsacayaá ti nu uhvi ra. 22 Tan iin quiví tsihi ra ndaahvi can. Tan ángel maa Nyoo na quihin tsi ra tan tsindacá ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra. 23 Tacan tan ra cuca ican nyehé xaan ra tundoho nu nyii ra anyaya. Tan nanyehe ra nu cañi xaan nu nyaá ra Abraham tsihin ra Lázaro.

24 Tacan tan caná tsa ra cuca can tan catyí ra: "Tyatya Abraham, cundaahvi iñi tsi yu. Jaquitsi tsi ra Lázaro tan na jatyii ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihya", catyí ra. 25 Tan ra Abraham catyí ra tsihin ra: "Nducuhun iñi tyin vaha xaan tsicoo un nu ñuhu ñayiví. Tan ra Lázaro, tuhun ndaahvi tsicoo ra. Tan vityin vaha iyó ra ihya, tan yooho nyehé un tundoho. 26 Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehé ña cuví cuhun ra naha nu nyii un. Tan ndi ra yucú nu nyii un, ña cuví quitsi ra naha nyehé", catyí ra Abraham tsihin ra cuca can. 27 Tacan tan catyí ra cuca ican: "Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu. 28 Tyin iyó uhun taahan ca ra yañi yu naha ra. Tan cuñi yu tyin catyí tuhun ra Lázaro tsihin ra naha nácaa nyii yu nyehé yu tundoho ihya, coto quitsi ndihí ra naha ihya", catyí ra. 29 Tacan tan catyí ra Abraham: "Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo tahañ tsanaha. Na tyaa yahvi ra yañi un naha ra, tun cuñi ra naha", catyí ra Abraham. 30 Tacan tan catyí ra cuca ican: "Tyatya Abraham. Ña cua tyaa yahvi ra naha. Maa tyin tatun yoo tsa nandoto, tan cuhun cucahan tsihin ra naha, tacan

tan cua tyaa soho ra naha tan cua nasama ra naha cuhva iyó ra naha”, catyí ra cuca ican. ³¹Tan ra Abraham catyí ra: “Tatun ña cuñí ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo taħan tsanaha, vasu ndi maa nandoto iin nyívi tan cahan ñi tsihin ra naha ña cua tsinu iñi ra naha.”

17

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha
(Mt. 18.6-7, 21-22; Mr. 9.42)

¹Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jativí tsi nyívi. Maa tyin ndahvi ra ndaahvi tsa jativí tsi nyívi. ²Vaha taxin ca na cunuhñi iin yuu jucun ra, tan jacuhun nyívi tsi ra nu ndutya ñuhu. Coto jativí ca ra tsi nyívi ndi nasama cuhva iyó.

³Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javaha ra. Tun nasama ra cuhva iyó ra, jaha ndo tucahnu iñi tsi ra. ⁴Tan ndi maa javaha ra tsa ña vaha tsihin ndo utsa tsaha tsa iin quiwi, tatun tandihí tsa utsa tsaha tan catyí ra tsihin ndo tyin ndu uvi iñi ra tsa javaha ra; tandihí tsa utsa taahan tsahacan, jaha ndo tucahnu iñi tsi ra.

Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha

⁵Tacan tan catyí ra tava tyiñu ra Jesús tsihin ra:

—Cuhva tsa tsinu ca iñi ndi tsi un —catyí ra naha.

⁶Tan catyí ra Jesús tsihin ra naha:

—Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yutun cahnu tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷Tan catyí ra Jesús:

—Tatun iin nyooho tan iyó iin musu ndo, tan tsaa ra tsa tsahan ra tsicuhu tsijaha tyiñu ra, a tsijaha cuenda ra quiñi jana ndo, ¿a catyí ndo tsihin ra: “Cunyaa tan catsi un”? Ña tuhvá ndo cahan tacan tsihin ra. ⁸Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyihi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra. ⁹Ndi ña tuhvá ndo nacuhvá tyahvi nyoo tsi ra tyin javaha ra náa tyiñu tava ndo tsi ra. ¹⁰Tacan tucu maa ndo tsihin Nyoo. Quiwi ndihí javaha ndo tandihí tsa cahan ra tsihin ndo, taahán tsi catyí ndo tsihin ra: “Nyuhu nduve náa ca tyiñu cuaha xaan javaha ndi. Tyiñu tsa tava ñi un tsi

ndi, yacan ñi javahā ndi. Tan ña yaha ca javahā ndi.”

Nu janduvahā ra Jesús tsi utsi taahan ra ndohó cuehe tyaahyú

¹¹ Cuahán ra Jesús ityi ñuu Jerusalén tan yahā ra nu cuvī xahñu Samaria tsihin Galilea.

¹² Tan nu tsaā ra iin ñuu, quita utsi taahan ra cuuhvī tsihin cuehe tyaahyú. Tan tsicuiñi ra naha ndasava. ¹³ Tan canā tsaā ra naha tan catyí ra naha:

—Yooho, Maestro Jesús, cundaahvi iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahā ndo.

Tacan tan cuahán ra naha. Tan ityi cuahán ra naha tan nduvahā ra naha. ¹⁵ Tacan tan tsa nyehe iin ra ican tyin tsa nduvahā ra, vatsí tsihin tsata nyico ra nu nyii ra Jesús. Tan quitsahā canā tsaā ra, jacahnú ra tsi Nyoo. ¹⁶ Tan tsa tsaā ra nu nyii ra Jesús, tsicuiñi tsiiti ra, tan nacañi nuu ra jiñi ra nda nu ñuhu nuu ra Jesús. Tan nacuhva ra tyahvi nyoo tsi ra. Ra tsa nduvahā ihya, ra Samaria cuvī ra.

¹⁷ Tacan tan catyí ra Jesús:

—¿A ñavin utsi taahan ndo nduvahā? ¿Náa inga ñn taahan ca ra naha? ¹⁸ ¿A in-tuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvahā ican:

—Nduvita, cuaahan. Nduvahā un tyin tsinú iñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihya (Mt. 24.23-28, 36-41)

²⁰ Tsica tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuvī tsa ndacá ñaha Nyoo ihya nu ñuhu ñayivi. ²¹ Ña cua cuvī catyí nyivi: “Juvín ra nyii ihya, juvín ra nyii ityi ican.” Tyin Nyoo tsa tsaā ra mahñu ndo, tan ndacá ñaha ra tsi nyivi yihí cuenda ra —catyí ra tsihin ra naha.

²² Yahā yacan tan catyí ra tsihin ra tsicá tsihin ra:

—Cua tsaā quivi tsa cua cuñi ndo nyehe ndo tsi yuhu Rayi quee nda gloria. Maa tyin ña cua nyehe ndo tsi yu. ²³ Yihí ñi cua catyí ñi tsihin ndo: “Ihya nyii ra.” Inga ñi cua catyí ñi: “Ndacan nyii ra.” Maa tyin coto cahun ndo cunyehe ndo. Tan ña cunycun ndo tsi ra can tyin ñavin yu cuvī can. ²⁴ Tyin tandihí nyivi cua nyehe tsi yuhu, Rayi tsa quee nda gloria, quivi cua quitsi nyico yu inga tsaha. Tumaa tsa nyehé tandihí nyivi nu cañi tatsa savi tan quituvi ñuhu tatsa can ñi canduvi andivi, tacan cua cuvī quivi cua quitsi yu inga tsaha. ²⁵ Maa tyin cua nyehe jihna yu tundo ho cahnu xaan. Tyin

nyivi tsa iyó vityin, ndasi
cua cuñi ñi nyehe ñi tsi yu.
²⁶ Tuma quivi tsa tsicoo ra
Noé, tacan cua cuvi quivi cua
quitsi nyico yuhu Rayi quee
nda gloria.

²⁷ Quivi tsicoo ra Noé, tsatsi
nyivi. Tsihi ñi. Tindahá
ñi. Tan tsaha ñi sehe sihi
ñi tindaha, nda cuando quivi
quihvi ra Noé tsitsi yutun
ndoo tan cuun savi xaan. Tan
tandihí ñi can tsihi ñi jaha
ndutya. ²⁸ Tacan tucu cuvi
quivi tsicoo ra Lot. Tsatsi
ñi. Tsihi ñi. Jatá ñi. Xicó
ñi. Tatsi ñi itu. Tan javahá
ñi vehe ñi. ²⁹ Tan quivi
tsa quita ra Lot ñuu Sodoma
ican, cuun ñuhu tsihin azufre
tsa quee nda andivi. Tan
tsahñi ñuhu can tandihí nyivi
Sodoma. ³⁰ Tacan cua cuvi
quivi quitsi nyico yu tsa cuvi
yu Rayi quee nda gloria.

³¹ Tatun nycú ndo
nuquehe quivi quitsi yu, ña
quihvi ndo tsitsi vehe tan
tava ndo ndaha tyiñu ndo.
Tan tatun yucú ndo tsitsi
cuhu, ña cunuhu ca ndo
yuvehe ndo. ³² Ndūcuhun iñi
ndo tsa tahañ ñasihi ra Lot.
³³ Tandihí nyooho tsa cuñi
tsa iyó nu ñuhu ñayivi ihya,
cua cunaa ndo. Tan tandihí
nyooho tsa ña tyaá yahvi tsa
iyó nu ñuhu ñayivi ihya, cua
cacu ndo.

³⁴ Tan catyí yu tsihin ndo
tyin tsacuaa can, uvi taahan
nyivi cua cava iin nu tsito. Iin
ñi cua naquihin yu. Tan inga
ñi cua ndoo ñi. ³⁵ Tan uvi taa-
han ñiñaha, iin caa ñi cua ny-
ico ñi quivi can. Intuhun ña

cua naquihin yu. Tan inga ña
cua ndoo ña. ³⁶ Tan catyí yu
tsihin ndo tyin uvi taahan ra
cua cuyucu tsicuhu. Intuhun
ra cua naquihin yu, tan inga
ra cua ndoo ra —catyí ra
Jesús.

³⁷ Tsa tsiñi ra naha tsa
cahan ra Jesús tacan, tsica
tuhun ra naha tsi ra:

—¿Numaa tahan cua cuvi
yacan, Jutu Mañi yu? —catyí
ra naha.

Tacan tan nacahan ra
Jesús, tan catyí ra:

—Nu canyí ndiyi, ican cua
nataca nditsii.

18

*Nu jacuahá ra Jesús tyin
tuma tsa cahan yuhu iin
ñaha tsihi yí tsihin juez, tacan
taahán tsi ndacan yo tsi Nyoo*

¹ Tsaahá cuenda ra Jesús iin
cuhva ihya. Tyin iin nyita
ñi cuñi tsi tsa ndacan tahvi
ra naha tan ña cundihí iñi ra
naha. ² Tan catyí ra:

—Iyó iin ñuu tsa nyaá iin ra
cuví juez. Tan juez ican ña
tyaá yahvi maa ra tsi Nyoo.
Tan ndi nyivi tan ña tyaá
yahvi ra. ³ Tan juvin ñuu ican
iyó iin ñaha ndaahvi tsa tsihi
yí. Tan tsaahán ña tsicahán
ñá tsihin ra can, tyin tsicán
ñá cuatyí tsaha iin nu xaan
iñi tsi ña. ⁴ Tan juez ican
ñá tyaá yahvi nu tsa caahán
ñá. Ña jandaá maa nu tyiñu
tsicán ñá. Tan tsanaha xaan
tsicán ñá. Tacan tan quitsaha
tsicá iñi nu juez can: “Vasu
ndi maa ña tsinú iñi yu tsi
Nyoo, tan nduve náa cuenda
yu tsi nyivi, ⁵ maa tyin ñaha

ihya tsahá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihi tsi yu”, cuñí ra tsicá iñi ra.

⁶ Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican. ⁷ Tan vihi ca cuví Nyoo tsihin yo, ¿a ña cua jatyinyee ra tsi nyivi tsa nacatsí ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi? ⁸ Catyí yu tsihin ndo, tyin numi ca cua jatyinyee ra tsi ñi. Maa tyin quivi tsa cua quitsi nyico yu tsa cuví yu Rayi tsa quee nda gloria, tsitó Nyoo tun nañihi ca yu tsi nyivi tsa tsinú tsa cuii iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

⁹ Tacan tan tsahá cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñí ra naha nyehé ra tsi inga nyivi. Tan catyí ra:

¹⁰ —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra. ¹¹ Tan ra fariseo ican nduvita nyityi ra, tan quitsahá caahán ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu

ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya. ¹² Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can. ¹³ Tan ra tsa tavá xuhun can tsa cañi luxu nyaá ra. Tan ña cana iñi ra nanyehe ndaa ra. Tan cañi ndaha ra yiqui nyica ra tyin ndu uvi iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

¹⁴ Tan catyí nyico ra Jesús tyehen:

—Catyí yu tsihin ndo tyin Nyoo jahá ra tucahnu iñi tsi ra tavá xuhun ican. Janaa Nyoo cuatyí ra tan cuanuhu ra nda yuvehe ra. Maa tyin ra fariseo ican, nduve tucahnu iñi tsicoo tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

Nu nasocó ra Jesús tsi tsa nyihi

(Mt. 19.13-15; Mr. 10.13-16)

¹⁵ Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehe ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsahá ra naha cuhun tsa nyihi can.

16 Tacan tan cana ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya. 17 Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuvi quihvi ndo nu ndacá ñaha Nyoo.

Nu tsaha ra Jesús cuhva tyin yii xaan nacuhva cuenda iin ra cuca tsi ra tsi Nyoo

(Mt. 19.16-30; Mr. 10.17-31)

18 Tacan tan iin ra tsa cuvi ityi nuu cuenda vehe ñuhu tsica tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

19 Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha.

20 Yooho tsitó un tandihi tuhun tsa tsaha Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaa yahvi un tsi jutu un tan sihi un” —catyí ra Jesús.

21 Tacan tan ra ican catyí ra:

—Tandihí maa yacan tan tyaá yahvi yu nda tahañ luhlu yu tan nda cuanda vyin —catyí ra.

22 Tsa tsiñi ra Jesús tsa cahan ra can, tacan tan catyí ra tsihin ra:

—Maa tyin cumañi javaha un inga tsa taahan tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

23 Maa tyin tsa tsiñi ra tsa cahan ra Jesús, nducuihya xaan cuñi ra, tyin cuca xaan ra. 24 Tan tsa nyehé ra Jesús tyin nducuihya cuñi ra, tan catyí ra:

—Yii xaan tan cuvi nacuhva cuenda nyivi cuca tsi ñi na cundaca ñaha Nyoo tsi ñi. 25 Yatyí xaan ca cuvi yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

26 Tan nyivi tsa tsiñi tsa cahan ra catyí ñi:

—Tatun tacan, ¿yoo cua cuvi cacu? —catyí ñi.

27 Tacan tan ra Jesús catyí ra:

—Tandihí tsa ña cuvi javahá nyivi, Nyoo cuvi javahá ra tandihí —catyí ra.

28 Tacan tan ra Pedro catyí ra:

—Jutu Mañi yu, nyuhu tandihí maa tsa iyó tsi ndi nacoo ndi, tan nyicún ndi tsi un —catyí ra.

29 Tacan tan catyí ra Jesús tsihin ra:

—Tsa nditsa catyí yu tsihin ndo, tyin tandihí nyooho tsa nacoo vehe, a ñasihi ndo, a yañi ndo, a jutu ndo, a sehe ndo tsacatyí tsa tsahá ndo tsa

cundaca ñaha Nyoo tsi ndo,
³⁰ cuaha xaan tsa vaha cua
 ñihi ndo ñuu ñayivi ihya tan
 inga ñayivi tsa cua coo, cua
 ñihi ndo ñayivi tsa ña cua naa
 maa —catyí ra Jesús.

*Inga tsaha jacoto ra Jesús
 cuhva cua cahñi nyivi tsi ra*
 (Mt. 20.17-19; Mr. 10.32-
 34)

³¹ Tan cana sñn ra Jesús tsi
 tsa utsi uvi taahan ra tsicá
 tsihin ra, tan catyí ra tsihin ra
 naha:

—Vityin cuhun yo nda ñuu
 Jerusalén. Tyin ndacan cua
 cundaa tyiñu Rayi tsa quee
 nda gloria: tandihi tyiñu tsa
 tyaa ra cuvi ndusu yuhu
 Nyoo tahañ tsanaha. ³² Tyin
 ra xaan iñi tsi yu naha ra cua
 nacuhva cuenda ra naha tsi
 yu tsi ra inga ñuu, ra tsa ñavin
 ra ñuu Israel cuvi. Tan cua
 vacu nducu ra naha tsi yu.
 Tan cua cahan nya ra naha
 tsi yu. Tan cua tiví sñ ra naha
 nuu yu. ³³ Tan cua cañi ra
 naha tsi yu, tan cua cahñi ra
 naha tsi yu, maa tyin tsa tsinu
 uñi quivi tan cua nandoto yu
 inga tsaha —catyí ra Jesús.

³⁴ Maa tyin ña cutuñi iñi
 ra tsicá tsihin ra tsa cahan
 ra, tan ndi ña tsitó ra naha
 náa tuhun cahan ra tsihin ra
 naha. Tyin ña cuvi cutuñi iñi
 ra naha.

*Nu janduvaha ra Jesús iin
 ra cuaa ñuu Jericó*
 (Mt. 20.29-34; Mr. 10.46-
 52)

³⁵ Cuhva tsa cua tsaa ra
 Jesús ñuu Jericó, tan yuhu ityi
 ican nyaá iin ra cuaa, cayá
 ra. ³⁶ Tacan tan tsiñi ra cuvaa
 tsa yahá cuaha nyivi. Tan

tsica tuhun ra náa cuenda
 ñihi xaan cuvaa. ³⁷ Tan catyí
 tuhun nyivi tsihin ra tyin ra
 Jesús, ra ñuu Nazaret, vatsí.
³⁸ Tacan tan quitsaha caná
 tsaa ra tan catyí ra:

—¡Yooho Jesús, tata ra rey
 David! ¡Cundaahvi iñi tsi yu!
 —catyí ra.

³⁹ Tan ra tsa cuahan ityi
 nuu ican naha ra, catyí ra
 naha tsihin ra, nacasi ra yuhu
 ra. Maa tyin tsaa ca cana tsaa
 ra, tan catyí ra:

—¡Yooho, tata ra rey David!
 ¡Cundaahvi iñi tsi yu! —catyí
 ra.

⁴⁰ Tacan tan tsicuiñi ra
 Jesús. Tan tava tyiñu ra na
 cuhun ra naha cuquihin ra
 naha tsi ra. Tan cuhya tsa
 tsaa ra nu nyaá ra Jesús, tan
 nducú tuhun ra Jesús tsi ra:

⁴¹ —¿Náa cuñi un javaha yu
 tsihin un?

Tacan tan ra cuaa ican nac-
 ahan ra, tan catyí ra:

—Jutu Mañi yu, cuñi yu
 nanyehe yu —catyí ra.

⁴² Tacan tan catyí ra Jesús
 tsihin ra:

—Nanyehe. Tsa nduvaha
 tinuu un tyin tsinu iñi un tsi
 yu —catyí ra.

⁴³ Tan iin yaha ñi, nanyehe
 ra cuaa can. Tan cueta
 cuahan ra nyicún ra tsi ra
 Jesús. Tan jacahnú ra tsi
 Nyoo. Tan tandihi nyivi tsa
 nyehe tsa cuvi can, jacahnú
 ndihi tucu maa ñi tsi Nyoo.

19

*Nu cuahan ra Jesús vehe ra
 Zaqueo*

¹ Tacan tan quihvi ra Jesús
 ñuu Jericó. Tan cua yaha ra

tsitsi ñuu. ²Tan ñuu can iyó iin ra cuca xaan, nañí ra Zaqueo. Tan cuví ra ityi nuu tsihin ra tavá xuhun cuenda ra ndacá ñaha nda ñuu Roma. ³Ra ihya cuñí xaan ra nacoto ra tsi ra Jesús. Tan ña cuví nyehe ra tsi ra tyin cuaha xaan nyivi cuahan tsihin ra. Tan maa ra ndiqui xaan ra. ⁴Tacan tan tsinú xaan ra cuahán ra ityi nuu, tan ndaa ra iin nu yutun cahnu tsa nañí sicómoro tsa nyaá yuhu ityi nu cua yaha ra Jesús, tan cuví nyehe ra tsi ra Jesús. ⁵Tan cuhva tsa quita ra Jesús nu nyáá yutun can, nanyehe ndaa ra ityi siqui tan nyehe ra tsi ra Zaqueo. Tan catyí ra tsihin ra:

—Zaqueo, janumi nuu un nu yutun juvin. Tyin vityin cuñí tsi tsa cuhun yu yuvehe un —catyí ra tsihin ra.

⁶Tacan tan numi xaan nuu ra Zaqueo. Tan sih xaan cuñí ra. Tan quihin ra tsi ra Jesús cuahán tsihin ra yuvehe ra. ⁷Tan tsa nyehe nyivi tsa tacan cuvi, tandihi ñi quitsaha caahán nyaa ñi tsi ra Jesús. Tan catyí ñi tyin ndoo ra vehe iin ra iyó cuatyí. ⁸Tan nu nyecú ra naha tsitsi vehe, ra Zaqueo tsinyaá nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandavi ñaha yu tsi nyivi tan suhu yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

⁹Tacan tan catyí ra Jesús:

—Vityin cacu un, tan nyivi ra Abraham cuví tsi un. [Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo.] ¹⁰Tyin yuhu, Rayi tsa quee nda gloria, vatsí yu vatsí nanducu yu tan vatsí jacacu yu tsi nyivi tsa cuanaa maa —catyí ra Jesús.

Nu jacuahá ra Jesús tsi yo na jaha tyiñu yo tsihin tsa tsaha Nyoo tsi yo
(Mt. 25.14-30)

¹¹Tan tsitsi tsa tsiñí nyivi tsa caahán ra Jesús, tan quitsaha tsahá cuenda ra inga cuhva ihya tsi ñi. Tyin tsa cuñí tsa ra ñuu Jerusalén. Tan nyivi cuñí maa ñi tyin tsa cua quitsaha cundaca ñaha ra ndacan. ¹²Tacan tan catyí ra:

—Tsioco iin ra cuca tan tsa cuñí cuhun ra iin ñuu cañi. Tyin ndacan cua quihin cuenda ra tyiñu tsa cuvi ra rey, tyin tacan tan cua quitsi nuhu nyico ra ñuu ra.

¹³Tsa ndi cumañi ca cuhun ra, cana ra utsi taahan musu ra. Tan tsaha cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra. ¹⁴Maa tyin nyivi ñuu ra, ndasi cuñí ñi nyehé ñi tsi ra tan ña cuñí ñi tsa cundaca ñaha ra tsi ñi. Tan jacuhun ñi tsi ra cuhun cunycun tsi ra, tyin cahan ra naha tyin ña cuñí ñi tsa cundaca ñaha ra tsi ñi. ¹⁵Maa tyin ra ican cuvi maa ra rey. Tacan tan tsaá nyico ra nda ñuu ra. Tan quivi tsa tsaá ra,

canā ra tsi musu ra, ra tsa nacoō ra xuhun tsihin. Tyin cuñí ra coto ra nácaa xuhun jahā canaa xuhun ra tsa nacoō ra. ¹⁶ Tan tsaā iin ra ican. Tan catyí ra: “Yooho taa, jahā canaa yu utsi taahan ca siqui xuhun tsa nacoō un tsi yu”, catyí ra. ¹⁷ Tacan tan catyí ra rey can tsihin ra: “Vaha xaan. Yooho cuví musu vaha. Tyin javahā un ndihi tyiñu tsa tavā yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra. ¹⁸ Tacan tan tsaā tucu inga ra tsa tsahā ra xuhun. Tan catyí ra: “Juhun xuhun ihya. Jahā canaa yu uhun taahan ca siqui xuhun tsa nacoō un tsi yu”, catyí ra. ¹⁹ Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra. ²⁰ Tacan tan tsaā tucu inga ra can. Tan catyí ra: “Juhun xuhun tsa tsahā un tsi yu. Yuhu naquihin vaha yu itsi tsitsi pañitu. ²¹ Tyin yuuhví xaan yu tsi un, tyin yooho xaan xaan un. Tyin tuhvá un naquihin tsa ñavin tsa tatsj un. Tan naquihín un ndaha tyiñu quita nu jahā tyiñu inga nyivi”, catyí ra can. ²² Tacan tan ra rey ican catyí ra tsihin ra: “Yooho musu ña vaha cuví un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquihín yu tsa ña tatsj yu, tan naquihín yu ndaha tyiñu inga nyivi, ²³ ¿nacuvi tyin ña tsityihí un xuhun yu banco tyin tsaā yu maa tyin

tsa nandaa xuhun yu?” catyí ra rey can. ²⁴ Tan catyí ra tsihin ra nyecú ican: “Quinyaa ndo xuhun tsa tsahā yu tsi ra ihya, tan cuhva ndo tsi ra tsa jahā canaa utsi taahan ca siqui tsa tsahā yu tsi ra”, catyí ra. ²⁵ Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha. ²⁶ Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahā tyiñu tsihin tsa tsahā yu tsi ra, cuaha ca cua cuhva yu tsi ra. Tan ra tsa tsahā yu luxu ñi, tan ña cuñí ra jahá tyiñu ra tsihin tsi, cua quinyaa yu tandihí can tsi ra. ²⁷ Tan tandihí nyivi xaan ñi tsi yu, ñi tsa ña cuñí tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

Nu tsaā ra Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Tsa yahā cahan ra Jesús yacan, tan jañihí ra cuahán ra ñuu Jerusalén. ²⁹ Tacan tan tsa cuñí tsaā ra ñuu Betfagé tsihin ñuu Betania, yatyin ñi iin yucu tsa nañí Olivo, [tyin maa ñi maa yutun olivo iyó ican]. Tavā tyiñu ra tsi uvi taahan ra tsicá tsihin ra. ³⁰ Tan catyí ra tsihin ra naha:

—Cuaahan ndo ñuu tsa canyí yatyin ñi ihya. Ican cua nañihi ndo iin burru luhlu, quiti tsa ñaha ca quihí tyay. Nuuhñí ti. Ndatsi ndo

tsi ti. Tan quitsi ndaca ndo tsi ti tsi yu. ³¹ Tatun yoo tsicá tuhun tsi ndo: “¿Nacuenda ndatsí ndo tsi ti?” catyi ndo tsihin ñi: “Ndatsí ndi tsi ti tyin tsiñi ñuhu ti tsi ra ndacá ñaha.”

³² Tacan tan ra tsicá tsihin ra, cuahán ra naha. Tan nañihí ra naha tsi ti tumaa tsa cahán maa ra tsihin ra naha. ³³ Tan cuhva tsa ndatsí ra naha tsi ti, tsaá tsitoho ti. Tan nducu tuhun ra can naha ra tsi ra naha tan catyi ra:

—¿Nacuenda ndatsí ndo burru ihya? —catyi ra naha. ³⁴ Tacan tan nacahán ra can naha ra:

—Ndatsí ndi tsi ti tyin tsiñi ñuhu ti tsi ra ndacá ñaha —catyi ra naha.

³⁵ Tacan tan quihín ra naha tsi ti. Tan tsindaca ra naha tsi ti nu nyí ra Jesús. Tan tyiso ra naha jahma ra naha tsata ti. Tacan tan jandaá ra naha tsi ra Jesús tsata ti. ³⁶ Tacan tan cuahán ra Jesús. Tan cuaha xaan nyivi cuahán tsihin ra tsaquín ñi jahma ñi nu ñuhu ityi nu cua yaha ra, yosó ra burru ican. ³⁷ Tsa tsa cua cuyatyi tandihí nyivi tan ra Jesús nu ñi nuu yucu Olivo, quitsahá caná tsa tandihí ñi tsinú ñi tsi ra tsihin tsa sii cuñi ñi. Tan jacahnú ñi tsi Nyoo tyin cuaha xaan tsa iyo javahá ra nyehe ñi. ³⁸ Tan catyi ñi:

—¡Na jacahnu yo tsi ra Rey ihya tyin vatsí ra tsihin sivi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyi ñi.

³⁹ Tacan tan juhva ra fariseo tsa cuahán tsihin ñi, catyi ra naha:

—Maestro, jacutaxin tsi nyivi ihya —catyi ra naha.

⁴⁰ Tan nacahán ra Jesús tan catyi ra:

—Tatun nyivi ihya tan cutaxin ñi, yuu cua cana tsa, tan cua jacahnu tsi tsi yu —catyi ra Jesús.

⁴¹ Tacan tan tsa tsaá ra Jesús yatyi ñi yuhu ñuu Jerusalén, nanyehe ra ñuu can tan quitsahá tsacú ra tsa cuihya cuñi ra. ⁴² Tan catyi ra:

—Vaha xaan tun tsatyi cuvi coto ndo tan cutuñi ñi ndo nácaa ñihi ndo tsa taxin coo aña ndo vityin ihya. Maa tyin xeehe xaan yihí tsa vaha can, tan ña cuvi nañihi ndo can. ⁴³ Coo quivi cua nyehe ndo tundoho jaha nu xaan ñi tsi ndo cua tyihi cutu nahnu tsi ndo. Tandihí ityi cua quitsi nahnu. Tan cañi tahan nahnu tsihin ndo. ⁴⁴ Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñi ndo nacoto ndo tyin tsa vatsí Nyoo, vatsí jacacu ra tsi ndo.

Nu tavá ra Jesús tsi nu xicó tsitsi vehe ñuhu cahnu nahnu (Mt. 21.12-17; Mr. 11.15-19; Jn. 2.13-22)

⁴⁵ Tacan tan quihvi ra Jesús tsitsi cora vehe ñuhu cahnu. Tan quitsahá tavá ra tandihí nyivi xicó tan nyivi jatá tsa

yucú nu quehe. ⁴⁶ Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyoo ho jananduví ndo itsi vehe ñasuhu —catyi ra Jesús.

⁴⁷ Tan tandihí quiví tsaahán ra Jesús tsijacuahá ra tsi nyiví tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra. ⁴⁸ Maa tyin ña ñihí maa ra naha nácaa javaha ra naha tyin tandihí nyiví tan vaha tyaá soho ñi tsa caahán ra Jesús.

20

Nu tsica tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyiví

(Mt. 21.23-27; Mr. 11.27-33)

¹ Iin quiví jacuahá ra Jesús tsi nyiví tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaá ra jutu tsa cuví ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuví mandoñi naha ra. ² Tan catyí ra naha tsihin ra Jesús:

—Catyi tuhun tsihin ndi ¿yóo tava tyiñu tsi un javaha un tyiñu ihya? —catyí ra naha.

³ Tacan tan ra Jesús catyí ra tsihin ra naha:

—Yuhu cuñí tucu yu nducu tuhun yu tsi ndo. ⁴ ¿Yóo

jaquitsi tsi ra Juan tyin jacoonduya ra tsi nyiví? ¿A Nyoo jaquitsi tsi ra, a nyiví?

⁵ Tacan tan ra ican naha ra quitsahá caahán yuhu tahan ra naha tan catyí ra naha:

—Tun catyí yo tyin Nyoo jaquitsi tsi ra Juan, cua catyí ra tsihin yo nacuenda ña tsinu iñi yo tsa cahan ra Juan. ⁶ Tun catyí tucu yo tyin nyiví jaquitsi tsi ra, tandihí nyiví cua cahñi ñi tsi yo tsihin yuu. Tyin tandihí ñi, tan cuñí ñi tyin ndusu yuhu Nyoo cuví ra Juan —catyí ra naha.

⁷ Tacan tan nacahan ra naha tsihin ra Jesús tyin ña tsitó ra naha yóo tava tyiñu tsi ra Juan jacoonduya ra tsi nyiví. ⁸ Tacan tan ra Jesús catyí ra tsihin ra naha:

—Ndi yuhu, tan ña cua catyi tuhun yu tsihin ndo yóo tava tyiñu tsi yu tsa javaha yu tyiñu ihya.

Nu jacuahá ra Jesús tyin tumaa cuví juhva ra caquiñi naha ra, tacan cuví ra tsa cua cahñi tsi ra

(Mt. 21.33-44; Mr. 12.1-11)

⁹ Tacan tan tsahá cuenda ra Jesús iin cuhva ihya tsi nyiví:

—Iin ra, tatsi cuaha ra nu ñuhu ra yoho tsiti yucu tsa cua cuví vinu. Yahá can tan tsahá nuu ra ñuhu can tsi juhva ra jahá tyiñu. Tacan tan naha cuahán ra inga ñuu. ¹⁰ Tan quiví tsa iñí tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundhi ra jacunuhu

ra naha tsi ra. ¹¹ Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahān nyaa ra naha tsi ra. Tan jacunuhū ra naha tsi ra. Tan juvín ñi nduve tsa tsaḥa ra naha cuiso ra cunuhu ra. ¹² Tacan tan ra cuví tsitoho yoho can jacuhun nyico ra inga ra. Maa tyin juvín ñi tacan javahā nyico ra naha tsihin ra can. Tan jañicueeḥe ra naha tsi ra. Tan tavaḥa ra naha tsi ra.

¹³ Yahā can tan catyí tsi-toho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñi xaan yu. Vasiqūi cua tyaa yahvi ra naha tsi ra, tyin sehe yu cuví tsi ra”, catyí ra.

¹⁴ Maa tyin tsa nyeḥe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha.

¹⁵ Tacan tan tavaḥa ra naha tsi sehe tsitoho ñuhu ican ityi tsata cora, tan tsaññi ra naha tsi ra —catyí ra Jesús.

Tacan tan catyí ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsaññi ra naha sehe ra? ¹⁶ Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi

cuvi. Tan catyí ñi:

—¿Ña cuñi Nyoo tahan yo tacan! —catyí ñi.

¹⁷ Maa tyin ra Jesús nanyeḥe ra nuu ñi tan catyí ra:

—Tun tacan tsi cá iñi ndo ¿náa cuñi tsi catyí tsa nyaa nu tutu Nyoo? Tyin catyí tsi tyehen:

Yuu tsa ña cuñi ra javahā vehe cuatyíñu ra, yacan cuví yuu tsa tsiñi ñuhu ca.

¹⁸ Yóo nyivi cua canacava tsata yuu can, cua tahnu cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

¹⁹ Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuví iñi ra naha tyin tsa cahān ra Jesús tacan, tsi maa ra naha nañi can. Tan cuñi ra naha tñin ra naha tsi ra tyin cahñi ra naha tsi ra. Maa tyin ña tsitó maa ra naha nácaa javaha ra naha, tyin nayuhvi ra naha tsi nyivi.

Nu jacuahā ra Jesús tsa cuenda tsa tyahvi nyivi xuhun tsi ra ndacá ñaha ñuu Roma (Mt. 22.15-22; Mr. 12.13-17)

²⁰ Tacan tan jacuhun ra naha tsi juhva ra nducu cuhva tsi ra Jesús. Tan jahā ra naha tyin ra vaha cuví ra naha. Tyin tacan tan coto ra naha náa tsa ña vaha cua cahan ra Jesús tan cuví tñin ra naha tsi ra. Tan cuhva cuenda ra naha tsi ra tsi ra ndacá ñaha. ²¹ Yacan tsi cá tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyívi. Tan ñavin cuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un. ²² Catyi tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

²³ Tan ra Jesús tuví iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñí ndo nducu cuhva ndo tsi yu? ²⁴ Janaha jihna ndo iin xuhun tsi yu, na nyehe yu. ¿Yóo nuu nyaá xuhun can tan yóo sívi nyaá can? —catyí ra.

Tacan tan nacahan ra naha:

—Nuu ra ndacá ñaha, ra cuví rey cahnu, nyaá can tan juvin ñi sívi ra nyaá can —catyí ra naha.

²⁵ Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsii maa ra cuví tsi. Tan cuhva ndo tsi Nyoo tsa taahán tsi tsi ra —catyí ra Jesús tsihin ra naha.

²⁶ Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyívi. Tan iyo xaan cuñí ra naha tsa nacahan ra. Tan taxin ña cuví ra naha.

Nu cuñí ra cuví saduceo naha ra jandavi ñaha ra naha tsi ra Jesús

(Mt. 22.23-33; Mr. 12.18-27)

²⁷ Tsa yaha can tan tsaá juhva ra cuví saduceo nu nyí ra Jesús. Maa ra naha cuví ra tsa catyí tyin ña nandoto nyívi tun tsa tsihi ñi.

²⁸ Tacan tan catyí ra naha tsihin ra Jesús:

—Maestro, jandoo ra Moisés tyiñu ihya tyin tatun iin ra tsihi tan nandoo ñasihi ra, tatun nduve sehe ra tsicoo tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra. ²⁹ Maa tyin cuñí ndi coto ndi nácaa, tyin tsicoo iin ra tan tsicoo utsa sehe ra. Tan ra tsa ñihi ca tsicoo ñasihi ra, maa tyin nduve sehe ñi tsicoo, tan tsihi ra. ³⁰ Tacan tan naquihin ra tsa tsinu uvi tsi ña can. Tan nduve tucu sehe ñi tsicoo. Tan tsihi tucu ra can. ³¹ Tan juvin ñi tacan javaha ra tsinu uñi. Tandihí tsa utsa ra naha javaha tacan. Ndi intuhun ra tan ña tsicoo sehe ra tsihin ña. ³² Tan nu ndihi tuhun tsihi ndihi maa ña. ³³ Tan cuñí ndi coto ndi yóo ra cua cuví yí ña tsitsi tsa tandihí tsa utsa taahan ra naha quívi cua nandoto nyívi —catyí ra saduceo naha ra.

³⁴ Tacan tan nacahan ra Jesús, tan catyí ra:

—Ihya nu ñuhu ñayívi, rayí tan ñaha tindahá ñi. ³⁵ Maa tyin nyívi tsa nacatsi Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha. ³⁶ Tan nduve tuhun tsiihi iyó ndacan tyin cua cuví ñi tumaa ángel. Tan cua cuví ñi sehe Nyoo tyin nandoto ñi. ³⁷ Tan

tsa cuenda tuhun tsa nandotó ndiyi. Tsa nditsa cuví tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyivi tsihií cua nandoto ñi. Tyin catyí ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyí ra Moisés. ³⁸ Tacan catyí ra tyin Nyoo, ñavin Nyoo cuenda nyivi tsihií cuví ra. Nyoo cuenda nyivi nyito cuví ra. Tyin tsa cuenda Nyoo tandihi yo tan nyito añima yo vasu tsa tsihií cuñu ñuhu yo —catyí ra Jesús.

³⁹ Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahan un, Maestro —catyí ra naha.

⁴⁰ Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuví ra tata ra David, tan juvin ñi cuví tucura Sehe Nyoo

(Mt. 22.41-46; Mr. 12.35-37)

⁴¹ Tacan tan tsicá tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra? ⁴²⁻⁴³ Tyin juvin ñi maa ra David catyí ra nu libru Salmo:

Caahan Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo

tsa tsatyíñu ra yuhu ra David tahañ tsanaha.

⁴⁴ ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu cahan ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihi nyivi tsiñi ñi tsa cahan ra Jesús tsihin ra tsicá tsihin ra nu cahan ra tyehen:

⁴⁶ —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahan xaan iñi ra naha cunditsi ra naha jahma nañi. Tan cuahan ra naha nuyahvi, cuñi ra naha tsa cuhva nyivi yucú nuyahvi nacumi tsi ra naha tsihin tsa jaha ñi tsa ñayivi tsi ra naha. Tan nanducú ra naha tyayu vaha cunyecu ra naha tsitsi vehe ñuhu, tan nu cuahan ra naha vico. ⁴⁷ Tan naha tsicán tahvi ra naha tsi Nyoo nu tuví, tsa cuñi ra naha tsa nyehe nyivi tan catyí ñi tyin vaha xaan nyivi cuví ra naha. Maa tyin juvin ñi maa ra naha cuví ra quinyaá vehe ñi ndaahvi tsa tsihií yí tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

21

Tsa jamañi iin ñaha ndaahvi tsa tsihií yí
(Mr. 12.41-44)

¹ Tan nyehe ra Jesús tyin cuaha xaan nyivi cuca tyihí ñi xuhun tsitsi caja tsa nyii tsitsi vehe ñuhu cahnu. ² Tan nyehe tucu ra tsi iin ñaha ndaahvi tsa tsihi yii. Tan tyihí ña uvi taahan ñi xuhun nyihí. ³ Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihi ñi cuca can. ⁴ Tyin tsa ndoo ña tyihí ñi. Tan ñaha ihya tyihí ña tandihi tsa iyó tsi ña —catyí ra.

Nu cahan ra Jesús tyin cua tani vehe ñuhu cahnu
(Mt. 24.1-2; Mr. 13.1-2)

⁵ Tacan tan juhva nyivi natuhún ñi tuhun cuenda vehe ñuhu cahnu ican. Tan catyí ñi tyin sii xaan caá yuu. Tan sii xaan caá tsa jamañi nyivi. Tacan tan catyí ra Jesús:

⁶ —Coo quivi tan cua tani tandihi tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua cani nu xaan iñi tsi ndo.

Tsa cua cuvi tsa ndi cumañi ca naa ñuhu ñayivi
(Mt. 24.3-28; Mr. 13.3-23)

⁷ Tacan tan nducú tuhun nyivi tsi ra Jesús, tan catyí ñi:

—Maestro, ¿ama cua cuvi tandihi tsa cahán un ihya? ¿Naca tan coto ndi tatun tsa cuyatyin tsa naa ñuhu ñayivi? —catyí ñi.

⁸ Tacan tan catyí ra Jesús:

—Jaha vaha ndo cuenda, coto jandavi ñaha nyivi tsi ndo. Tyin cuaha xaan ra cua quitsi, tan cua cuatyínu ra

naha sivi yu, tan cua catyí ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayivi”, cua catyí ra. Maa tyin ña cuny-icun ndo tsi ra naha. ⁹ Tan quivi cua ñihi tuhun ndo tyin tsa iyó cuatyí tan ñihi cañi tahan nyivi, ña nayuhvi ndo. Tyin tandihi can taahán tsi cuvi tsa jihna ñi. Maa tyin cumañi ca tsa quivi tsa cua naa ñuhu ñayivi.

¹⁰ Tan catyí tucu ra:

—Nyivi iyó iin ñuu cua cañi tahan ñi tsihin nyivi inga ñuu. Tan cua coo cuatyí. ¹¹ Tan ñihi xaan cua taan. Tan cua coo tama. Tan cua coo cuehe tandihi ñi ityi. Tan cua nyehe nyivi tsa yuuhví ityi andivi. Tan cuaha xaan tsa iyo nahnu tsa ña tuhvá nyivi nyehe tan cua nyehe ñi. ¹² Maa tyin tsa ndi cumañi ca cuvi yacan, cua cuxaan iñi nyivi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihí ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu. ¹³ Tacan tan cuví cahan ndo tuhun yu tsihin ñi. ¹⁴ Maa tyin jaha ndo cuenda tan ña cua caca iñi ndo náa tuhun cua naca-han ndo tsihin ra ndacá ñaha ican. ¹⁵ Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nu cua cahan ndo. Ndi intuhun nu xaan iñi tsi ndo tan ña cuvi jaha nahnu tsi ndo. ¹⁶ Maa tyin nyivi cua

cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyivi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyooho cua cahñi nyivi tsi ndo. ¹⁷ Tandihí nyivi tan ndasi cua cuñi ñi nyehe ñi tsi ndo tsacatyí yuhu. ¹⁸ Maa tyin ndi intuhun ixí jiñi ndo tan ña cua cunaa. ¹⁹ Tatun ña ndu uvi iñi ndo tsa nyicun ndo tsi yu, cua cacu ndo.

²⁰ 'Quivi cua nyehe ndo tyin nii canduvi yuhu ñuu Jerusalén ihya nyecú andaru, coto ndo tyin tsa cuñi naa ñuu ihya. ²¹ Tan nyivi iyó ñuu tsa cayucú Judea, cua cunu ñi tan cahun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya. ²² Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuví tandihí cuhva catyí nu tutu Nyoo. ²³ Tan ndahvi ñiñaha tsa ñuhú sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihí nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo. ²⁴ Andaru cua cahñi ra naha tsi juhva nyivi tsihin mityi. Tan cua tñin ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí

maa Nyoo.

Nacaa cua quitsi Rayi tsa quee nda gloria inga tsaha
(Mt. 24.29-35, 42-44; Mr. 13.24-37)

²⁵ 'Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu. ²⁶ Tan cua cúu naaha ñi tsihin tsa yuhvi ñi tsa tsicá iñi ñi náa ndihí tsa cua cuví ihya nu ñuhu ñayivi. Tyin nda cuanda tsa iyó andivi cua nacanda tan taan. ²⁷ Tacan tan cua nyehe ñi tsi yuhu, Rayi tsa quee nda gloria, vatsi nuu yu tsitsi vico tsihin tunyee iñi Nyoo, tan tsihin tsa cahnu cuví ra. ²⁸ Tan cuhva tsa cua quitsaha yacan tan jandu iin ndo iñi ndo tan cusii iñi ndo tyin numi xaan cua cacu ndo —catyí ra.

²⁹ Tacan tan tsaha cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihí ca yutun. ³⁰ Tatun tsa nduyutyá numa tun tsa cuyatyin cuun savi. ³¹ Tan tacan tucu nyoooho, tatun tsa nyehe ndo tyin tsa quitsaha cuví tandihí tsa cahan yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

³² 'Maa tyin tsa nditsa catyí yu tsihin ndo tyin yacan cua cuví jihna tsa ndi cumañi ca cúu nyivi tsa iyó nu ñuhu ñayivi. ³³ Coó quivi cua naa andivi tan ñuhu ñayivi, maa

tyin tuhun caahán yu, ña cua cundihi tsi.

³⁴ Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayivi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quivi cua quitsi yu tan cua quitsi tundoho cua nyehe ndo. ³⁵ Tyin tacan cua cuvi, tandihi nyivi iyó nu ñuhu ñayivi, sana iñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi. ³⁶ Maa tyin nyoocho cūatu ndo. Nḁacan tahvi ndo tsi Nyoo tandihi quivi, na jacacu ra tsi ndo. Tan ña nyehe ndo tandihi tundoho tsa cua coo. Nḁacan tahvi ndo, tacan tan cua cuvi tsa ndo nu nyaá yuhu, Rayi tsa quee nda gloria —catyí ra Jesús.

³⁷ Tan tandihi quivi jacuahá ra Jesús tsi tandihi nyivi tsitsi vehe ñuhu cahnu. Tan tsa tsacuaa tsicá ra yucu Olivo. ³⁸ Tan tandihi nyivi tsaá ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

22

Nu cua xico ra Judas Iscariote tsi ra Jesús

Mt. 26.1-5, 14-16; Mr. 14.1-2, 10-11; Jn. 11.45-53)

¹ Tan tsa nyanaá yatyin quivi tsa cua coo vico pas-cua, vico nu tuhvá nyivi tsatsí paan tsa nduve yutsan iya yihí. ² Tan ra jutu tsa cuví ityi

nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyivi.

³ Tacan tan quihvi nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsi ra Jesús. ⁴ Tan nu ihya, tsahan nu tsicahan nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha.

⁵ Tan ra ican naha ra sii xaan cuñí ra naha. Tan tyihí ra naha cuhva tyin cuhva ra naha xuhun tsi ra Judas.

⁶ Tan ra Judas ndoo ra vaha. Tan quitsahá nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyivi yucú tsihin ra Jesús.

Nu cuxiñi ra Jesús tsihin ra tsicá tsihin ra

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Tan tsaá quivi tsa cuvi vico tsa tsatsí nyivi paan tsa nduve yutsan iya yihí. Tan juvin ñi quivi ican tuhvá ñi tsahñi iin mbee luhlu tsa vico pascua can. Tyin catsi ñi tsi ti. ⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua —catyí ra.

⁹Tacan tan nducú tuhun ra naha tsi ra:

—¿Numaa cuñí un javaha ndi tsa cuxiñi yo? —catyí ra naha.

¹⁰Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyisó iin quiyi ndutya. Cuaahan ndo tsata ra tan quihvi ndo vehe nu quihvi ra.

¹¹Tan catyí ndo tsihin tsitoho vehe can: “Ra cuví Maestro, cuñí ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyí ndo tsihin ra. ¹²Tacan tan cua janaha ra iin cuarto cahnu ityi siqui, nu tsinu uvi pisu tsi ndo. Tan tsa nduvaha maa tsi. Tan ndacan cua javaha ndo tsa cuxiñi yo —catyí ra tsihin ra naha.

¹³Tacan tan cuahán ra naha. Tan nañihi ra naha tandihi tumaa tsa cahan ra Jesús. Tacan tan na icá vaha ra naha tsa cuxiñi ra naha cuenda vico pascua.

¹⁴Tacan tan tsa tahan tsi cuhva tsa cuxiñi ra Jesús tsihin tandihi ra tava tyiñu ra, tsinyecu ra naha yuhu mesa.

¹⁵Tacan tan catyí ra Jesús:

—Cuñí xaan yu cuxiñi yu tsihin ndo cuenda vico pas-cua ihya tsa ndi cumañi ca nyehe yu tundoho tan cúu yu. ¹⁶Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

¹⁷Tacan tan quihin ra iin vasu vinu. Nacuhva ra tyahvi

nyoo tsi Nyoo. Yahá can tan catyí ra tsihin ra nyecú tsihin ra:

—Quihin ndo tsehe. Tan coho ndo luxu luxu. ¹⁸Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

¹⁹Yahá can tan quihin ra paan, tan tsaha ra tyahvi nyoo tsi Nyoo, tan tsahnya sava ra can. Tsahan tsaha ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

²⁰Tan tsa yahá cuxiñi ra naha, tacan tan quihin ra vasu vinu, tan catyí ra:

—Tsihin vinu ihya ndoó Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuví tsi. Tan tsa vaha tsi nyoocho tan cua cati niñi yu. Tan cua cúu yu.

²¹’Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya. ²²Tyin yuhu, Rayi tsa quee nda gloria, cua tahan yu tumaa tsa nyaá maa tsa cua tahan yu. Maa tyin ndahvi ra tsa cua nacuhva cuenda tsi yu! —catyí ra Jesús.

²³Tacan tan ra tsicá tsihin ra Jesús quitsaha nducú

tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cahan yuhu tahan ra tsicá tsihin ra Jesús, yóo ra cahnu ca cuví

²⁴ Yahá can tan quitsahá caahán yuhu tahan ra tsicá tsihin ra Jesús, ndáa ra cahnu ca cuví. ²⁵ Tan ra Jesús catyí ra:

—Tsitó nyooho tyin ra ndacá ñaha tsi nyivi iyó nu ñuhu ñayivi, ñihi xaan ndacá ñaha ra naha tsi ñi. Tan cuñí ra naha tyin catyí nyivi tyin jatyinyeé ra naha tsi ñi. ²⁶ Maa tyin nyooho ña taahán tsi javaha ndo tumaa javahá ra ican naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuví ndo musu tandihi ndo. ²⁷ Tyin nu ñuhu ñayivi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

²⁸ Tan nyooho cuví ndo tsa nyecú tsihin yu tandihi nu nyehe yu tundoho. ²⁹ Yacan cuenda, yuhu tsahá yu iin nu cua cundaca ñaha ndo tumaa tsa tsahá Jutu yu tsa cundaca ñaha yu. ³⁰ Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyivi cuví tata tsa utsi uvi sehe ra Israel.

Nu caahán ra Jesús tyin cua catyí ra Pedro tyin ña nacoto ra tsi ra

(Mt. 26.31-35; Mr. 14.27-31; Jn. 13.36-38)

³¹ Tacan tan catyí ra Jesús tsihin ra Pedro:

—Nyehe vaha un, yooho Simón. Tyin nu ña vaha tsa tsican ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo.

³² Maa tyin tsican tahvi xaan yu tsi ra tsa cuenda un, na ña jandihí un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandihí ra naha tsa tsinú iñi ra naha tsi yu —catyí ra Jesús tsihin ra Simón.

³³ Tan ra Simón catyí ra tsihin ra:

—Jutu Mañi yu, tsa ndu iin vaha iñi yu tsa cuhun yu tsihin un vasu vehe caa, vasu cúu yu tsihin un —catyí ra.

³⁴ Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyí un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñí tsaq cuhva tsa cua nacuhva cuenda ra Judas tsi ra Jesús

³⁵ Tacan tan tsica tuhun ra Jesús tsi ra tsicá tsihin ra tan catyí ra tsihin ra naha:

—Ndūcuhun iñi ndo quivi tsa jacuhun yu tsi ndo tsa cahan ndo tsihin nyivi, tan nduve tsa tsindahá ndo, ndi

marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyí ra Jesús.

—Nduve —catyí ra naha.

³⁶ Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo. ³⁷ Tyin catyí yu tsihin ndo, tyin tandihi tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivi tsi ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandihi tsa catyí tsi tsa cuenda yu cua cundaa tsi —catyí ra.

³⁸ Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

Nu tsican tahvi ra Jesús tsi Nyoo nda Getsemani

(Mt. 26.36-46; Mr. 14.32-42)

³⁹ Tacan tan quitá ra Jesús vehe nu nyii ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra. ⁴⁰ Tan tsa tsaá ra naha ndacan, catyí ra tsihin ra naha:

—Nðacan tahvi ndo tsi Nyoo tyin tacan tan ña cuvi jaha canaa nu ña vaha tsi ndo.

⁴¹ Tacan tan cuahán ra Jesús tsa cañi luxu ca, tumaa

tsa cañi tsaá iin yuu tun cañi yo can. Tacan tan tsicuiñi tsiti ra. Tan quitsaha caahán ra tsihin Nyoo, ⁴² tan catyí ra:

—Tyatya Jutu yu, tun yooho tan cuñi un, jatsiyo tundoho tsa cua nyehe yu ihya. Maa tyin na ña cuvi cuhva cuñi maa yu. Na cuvi cuhva cuñi maa un —catyí ra Jesús.

⁴³ Tacan tan quituvi iin ángel Nyoo, tyin cuhva ra tunyee iñi tsi ra Jesús. ⁴⁴ Tan tsitsi tsa nyehé xaan ra Jesús tundoho tsa cuiihya xaan cuñi ra, tan ñihi ca tsican tahvi ra tsi Nyoo. Tan cuaha xaan tyeen ra quitá tan tsati tsi nu ñuhu, tan caá tsi tumaa caá niñi.

⁴⁵ Tacan tan nduvita ra tsa ndihi cahan ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuiihya xaan cuñi ra naha, ña cunyeé iñi ra naha ñumaahna tan quixi ra naha.

⁴⁶ Tacan tan catyí ra Jesús tsihin ra naha:

—¿Nacuenda quixí ndo? Nðuvita ndo. Tan ndacan tahvi ndo tsi Nyoo, tyin tacan tan ña cuvi jaha canaa nu ña vaha tsi ndo.

Nu tsaá cuenda ra Judas tsi ra Jesús tsi nu xaan iñi tsi ra

(Mt. 26.47-56; Mr. 14.43-50; Jn. 18.2-11)

⁴⁷ Ndi caahán ca ra Jesús yacan, tan tsaá cuaha ra cat-saa. Tan ityi nuu, vatsí nu Judas, iin ra tsicá tsihin ra Jesús. Tan natuhvá nu nu nyaá ra

Jesús tyin tyayuhu nu tsi ra.
 48 Tacan tan cahān ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayi tsa quee nda gloria tsi nu xaan iñi tsi yu nahnu? —catyí ra Jesús.

49 Tan ra nyecú tsihin ra Jesús quitsahā nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

50 Tacan tan iin ra can, tsahnya ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

51 Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tiin ra Jesús soho ra ican tan janduvahā ra itsi.

52 Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahān tsitān tsi ra Jesús. Tan catyí ra Jesús tsihin ra naha:

—¿A vatsí tiin ndo tsi yu tumaa tiin ndo iin ñasuhu? tyin ndaha ndo mityi tan yutun.

53 Ndihi quivi tsinyii yu tsitsi vehe ñuhu cahnu, tan ña tiin ndo tsi yu ndacan. Maa tyin vityin tsaā kuhva tsa ndunaa tyin nu ña vaha ndacá ñaha. Yacan cuenda vatsí tiin ndo tsi yu.

Nu cahān ra Pedro tyin ña nacotó ra tsi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18,

25-27)

54 Tacan tan tiin ra naha tsi ra Jesús. Tan tsindacā ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahān ra nyicún ra. 55 Tan tsa tsaā ra naha vehe ra jutu tsaahnu tsa cuví ityi nuu, jatahān ra tsa cuví musu naha ra ñuhū nuquehe. Tan tsinyecū ra naha tani canduvi nu cayú ñuhū can. Tan tsinyaa ndihi ra Pedro tyañu ra naha. 56 Tan tsa ndunditsín tsa cayú ñuhū ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

57 Maa tyin ra Pedro catyí ra:

—Yuhu ña nacotó yu tsi ra can.

58 Tañi ñi tan nyehe tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

59 Tan tsa yahā iin hora, tan nyehe tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

60 Tacan tan catyí ra Pedro:

—Ña tsitó yu náa caahān un —catyí ra.

Tan juvin ñi kuhva can, tsitsi tsa ndi caahān ca ra Pedro tan navacū ñi iin tsi-toho.

61 Tacan tan ra Jesús nanyehe ra nuu ra Pedro.

Tan ra Pedro nducuhun iñi ra tsa cahan ra Jesús tsihin ra: “Tsa ndi cumañi ca navacu tsitooho, yooho tsa cahan un uñi tsaha tyin ña nacotó un tsi yu.”

⁶² Tacan tan quitā ra Pedro ityi tsata vehe. Tan tsacu xaan ra tsa cuihya cuñi ra.

Nu tsacu nducu nyaa ra naha tsi ra Jesús tan cañi ra naha tsi ra

(Mt. 26.67-68; Mr. 14.65)

⁶³ Tacan tan ra jahá cuenda tsi ra Jesús, quitsaha tsacú nducu ra naha tsi ra. Tan cañi ra naha tsi ra. ⁶⁴ Tsañi ra naha jahma nuu ra, tan quitsaha cañi ra naha nuu ra. Tan catyí ra naha tsihin ra:

—Nacoto yóo ra cañi tsi un —catyí ra naha tsihin ra.

⁶⁵ Tan cuaha xaan ca maa tsa cahan nyaa ra naha tsi ra.

Nu tsica tuhun mandoñi naha ra tsi ra Jesús tatun Sehe Nyoo cuví tsi ra

(Mt. 26.59-66; Mr. 14.55-64; Jn. 18.19-24)

⁶⁶ Tan tsa cunditsin inga quivi, tan ndu iin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahán tsihin ra nda nu cua coo Junta Cahnu. Tan nducu tuhun ra naha tsi ra Jesús:

⁶⁷ —Catyi tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyi ra:

—Tatun catyi yu tsihin ndo tyin juvin yu cuví, ña cua tsinu iñi ndo tsa cahan yu. ⁶⁸ Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu. ⁶⁹ Maa tyin vi-tyin tan ityi nuu ca, Rayi tsa quee nda gloria cua cunyaa ra xiin cuaha Nyoo, ra tsa iyó tandihi tunyee iñi —catyí ra Jesús.

⁷⁰ Tacan tan tandihi ra naha tsica tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyi ra:

—Juvín, sehe Nyoo tsi yu tumaa catyi maa ndo.

⁷¹ Tacan tan natuhun tahan ra naha:

—Tsiñi ndo tsa caahán ra. Ña cuñi ca tsi tsandaa. Tyin tsa tsiñi maa yo tsa cahan ra —catyí ra naha.

23

Nu nyehe ra Pilato tyin nduve cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tacan tan nduvita tandihi ra naha. Tan tsindaca ra naha tsi ra Jesús nda nu nyaá ra Pilato, [ra ndacá ñaha quee nda ñuu Roma]. ² Tacan tan quitsaha tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuví

ra Cristo, ra tsa jaquitsi Nyoo tyin cuvi ra rey —catyi ra naha tsihin ra Pilato.

³ Tacan tan ra Pilato tsica tuhun ra tsi ra Jesús:

—¿A yooho cuvi Rey cuenda nyivi Israel? —catyi ra.

Tan nacahan ra Jesús tan catyi ra:

—Juvín, tumaa catyi maa un.

⁴ Tacan tan catyi ra Pilato tsihin ra jutu tsa cuvi ityi nuu naha ra, tan tsihin nyivi:

—Nduve cuatyí ra ihya —catyi ra tsihin ñi.

⁵ Maa tyin jañihí ca ñi caahán ñi. Tan catyi nyico ñi:

—Cahnu xaan cuatyí ra. Tyin cuaha xaan tsihi tsahá ra, tyin jacuahá ra tsi nyivi. Tsa jihna ñi quitsaha caahán ra tsihin nyivi iyó ñuu tsa cayucú Galilea. Tan nani ityi vatsí ra, jacuahá ra tsi nyivi. Tan vityin tsa tsaá ra Judea ihya tan juvin ñi yacan javahá ra —catyi ñi.

Nu jacuhun ra Pilato tsi ra Jesús nu nyaá ra Herodes, ra cuvi rey nyivi iyó Galilea

⁶ Cuhva tsa tsiñi ra Pilato yacan, tan nducu tuhun ra tatun ra Galilea cuvi ra Jesús.

⁷ Tan catyi nyivi tsihin ra tyin juvin. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuvi ra ndacá ñaha Galilea can. Tan quivi can nyii ra ñuu Jerusalén. ⁸ Tan cuhva tsa nyehe ra Herodes tsi ra Jesús, sii xaan cuñi ra. Tyin tsanaha xaan cuñi ra nyehe ra tsi ra. Tyin ñihí tuhun ra tyin cuaha

xaan tsa iyo javahá ra. Tan cuñi xaan ra nyehe ra iin tsa iyo tsa cua javaha ra Jesús.

⁹ Tan cuaha xaan tsa nducu tuhun ra Herodes tsi ra Jesús. Maa tyin ra Jesús ña nacahan maa ra. ¹⁰ Ican nyecú ndihi tucu ra jutu tsa cuvi ityi nuu naha ra, tan ra maestro cuenda ley vehe ñuhu naha ra. Tan tyaá xaan ra naha cuatyí tsi ra Jesús. ¹¹ Tacan tan ra Herodes tsihin andaru cuenda ra, tsacu nducu ra naha tsi ra. Tan jacunditsi nuu ra naha iin jahma yahvi tan sii caá tsi ra Jesús, tumaa caá tsa tuhvá rey tsinditsi. Tacan tan jacuhun nyico ra Herodes tsi ra nda nu nyaá ra Pilato. ¹² Tan quivi can ra Pilato tsihin ra Herodes nduvaha iyó ra naha. Tyin nu quitsi quivi, ña cuvi nyehé tahan ra naha tsi ra naha.

Nu cutuñi ra Jesús tyin cua cúu ra
(Mt. 27.15-26; Mr. 15.6-15; Jn. 18.39-19.16)

¹³ Tacan tan ra Pilato jandu iin ra tsi ra jutu tsa cuvi ityi nuu naha ra, tan ra cumi tyiñu vehe ñuhu naha ra, tan tsihin tandihi nyivi. ¹⁴ Tan catyi ra tsihin ñi:

—Nyooho quitsi ndaca ndo tsi ra ihya nu nyaá yu. Tan catyi ndo tyin jativí ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahan ndo can nañihí yu. ¹⁵ Tan ndi ra Herodes tan ña nañihí ra ndi intuhun cuatyí ra. Yacan jaquitsi nyico ra tsi ra inga tsaha nu nyaá

yu. Nyehe ndo tyin nduve cu-
atyí ra. Tan yacan ña taahán
tsi tsa cúu ra. ¹⁶Yacan cuenda
cua tatsi tuñi yu tsi ra. Yaha
can tan cua jaña yu tsi ra
—catyí ra Pilato.

¹⁷Tacan catyí ra Pilato tyin
tsitsi vico ican, taahán tsi
tsa jaña ra iin ra yucú vehe
caa, tumaa tuhvá maa ra icá.
¹⁸Maa tyin tandihí nyívi iin
caa ñi cana tsaa ñi tan catyí ñi:

—Cahñi tsi ra Jesús. Tan
jaña tsi ra Barrabás —catyí ñi.

¹⁹Tan ra Barrabás can nyíi
ra vehe caa tsa cuenda tsa
cañi tahan ra tsihin ra cumí
tyiñu ñuu can. Tan inga
tuhun tyin tsahñi ra nyívi.
²⁰Tan ra Pilato cuñi ra jaña
ra tsi ra Jesús. Tan quit-
sahá caahán ra tsihin nyívi
can inga tsaha tyin cua jaña
ra tsi ra. ²¹Maa tyin nyívi tsaa
ca cana tsaa ñi:

—iTyaa tsi ra nu cruu. Na
cúu ra nu cruu!

²²—¿Náa tsa ña vaha
javahá ra ihya? Tan nyehé
yu tyin ña taahán tsi tsa cúu
ra. Cua tatsi tuñi ñi yu tsi ra,
tan cua jaña yu tsi ra —catyí
ra Pilato.

²³Maa tyin nyívi cana tsaa
ca ñi, tan catyí ñi tyin nac-
ahñi ra tsi ra Jesús nu cruu.
Tan maa ñi tan tsihin ra jutu
tsa cuví ityi nuu naha ra,
ñihí ñi tsa cuñi ñi tyin cana
tsaa xaan ñi. ²⁴Tacan tan
javahá ra Pilato cuhva cahán
ñi. ²⁵Tan jaña ra tsi ra
Barrabás, ra tsa nyíi vehe caa
tsa cuenda tsa cañi tahan ra
tsihin ra cumí tyiñu tan tsa
cuenda tsa tsahñi ra nyívi.

Tan nacuhva cuenda ra Pi-
lato tsi ra Jesús tsi ñi cuhva
cuñi maa ñi.

*Nu tyaa ra naha tsi ra Jesús
nu cruu*

(Mt. 27.32-44; Mr. 15.21-
32; Jn. 19.17-27)

²⁶Tacan tan quihín andaru
tsi ra Jesús. Tan cuahán ra
tsihin ra naha. Tan tñin tucu
ra naha tsi iin ra ñuu Cirene
nañi Simón. Ra ican ndi vatsí
nuhu ra quee ra cuhu. Tan
jañiñi ra naha tsi ra tsa cuiso
ra cruu ra Jesús. Tan cuhun
ra ityi tsata ra.

²⁷Tan cuaha xaan nyívi
cuahán ityi tsata ra Jesús.
Tan cuaha xaan ñiñaha tsacú
xaan ñi tsa cuiihya cuñi ñi
tsacatyí tundoho tahan ra.

²⁸Maa tyin ra Jesús nanyehe
ra nuu ñi. Tan catyí ra tsihin
ñi:

—Tandihí nyooho, ñiñaha
ñuu Jerusalén ihya, ña vacu
ndo tsacatyí yuhu. Vacu
ndo, tsacatyí maa ndo tan
tsacatyí sehe ndo. ²⁹Tyin
cua quitsi quívi cua nyehe
xaan ndo tundoho. Tan cua
cahan nyívi tsi tandihí ndo
tsa cuví ndo ñaha tsa ña cuví
coo sehe. Tan cua cahan
ñi tsihin ndo: “Vaha xaan
tyin nduve sehe ndo tsicoo
tyin cuaha xaan tundoho
nyehé yo vityin”, cua catyí
ñi tsihin ndo. ³⁰Tyin quívi
can cua cuñi ñi nduva yucu
tsata ñi tan quihvi xeehe ñi.
³¹Tyin tatun tyehen icá nyívi
tsihin iin yutun vaha, yaha ca
cuhva cua ica ñi tsihin yutun
ityi —catyí ra Jesús tsihin
ñiñaha ñuu Jerusalén can.

32 Tan quihin tucu andaru can naha ra tsi uvi taahan ra iyó cuatyí, tyin cahñi ndihí ra naha tsi ra naha iin caa ñi tsihin ra Jesús. 33 Tacan tan tsaá ra naha iin nu nañi Yiqui Jiñi Ndiyí. Tan ican tyaa ra naha tsi ra Jesús nu cruu. Tan tacan tyaa ndihí tucu ra naha tsi nduvi taahan ra iyó cuatyí can naha ra. Iin ra tyaa ra naha nuu cruu xiin cuaha ra Jesús. Tan inga ra can tyaa ra naha nuu cruu xiin satyin ra. 34 Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tavá ra naha suerte tsihin jahma ra Jesús, tyin nyehe ra naha ndáa ra cua jaha canaa jahma can. 35 Tan nyivi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacú ra tsi inga nyivi. Na jacacu ndihí tucu maa ra tsi ra vityin, tun nditsa tsa ra Cristo, ra tsa jaquitsi Nyoo, cuví ra —catyí ra naha.

36 Tan juven ñi cahan nyaá ra andaru can naha ra tsi ra. Tan natuhvá ra naha nu ticaá ra. Tan tsahá ra naha vinuiya tsihi ra. 37 Tan catyí ra naha tsihin ra:

—Tatun rey cuenda nyivi Israel cuví un, jácacu tsi un —catyí ra naha.

38 Tan jiñi cruu nu nyaá ra Jesús nyaá iin tsa tyaa ra Pilato tsihin sahan griego, sahan latín, tan sahan hebreo.

Tyehen caahán letra can: “Juvín ra ihya cuví Rey cuenda nyivi ñuu Israel” —catyí letra can.

39 Tan iin ra tsa iyó cuatyí tsa nyaá nu cruu xiin ra Jesús, quitsahá caahán nyaa ra tsi ra:

—Tatun nditsa tyin ra Cristo cuví un, jácacu tsi un. Tan jácacu ndihí tsi nyuhu —catyí ra can.

40 Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juven ñi tundoho tsa taahán ra ihya, tan taahán un vityin. 41 Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

42 Tacan tan catyí ra can tsihin ra Jesús:

—Yooho Jesús, nducuhun iñi tsi yu quivi cundaca ñaha un —catyí ra.

43 Tacan tan ra Jesús nacahan ra tsihin ra tan catyí ra:

—Tsa nditsa caahán yu tsihin un tyin juven ñi vityin tan cua cunyaa un tsihin yu nda paraíso [nu yucú añima nyivi tsinú iñi tsi Nyoo] —catyí ra Jesús tsihin ra.

Nu tsihi ra Jesús

(Mt. 27.45-56; Mr. 15.33-41; Jn. 19.28-30)

44 Tacan tan cuhva ora quitsahá ndunaá nu ñuhu ñayivi, nda cuanda caa uñi tsa tseñi.

45 Tyin ndunaá ñicanyii. Tan jahma tsa ticaá tsitsi vehe ñuhu cahnu, ndatá sava tsi.

46 Tacan tan caná tsa ra Jesús tan catyí ra:

—Tyatya, Jutu yu, tyaa cuenda yu añima yu ndaha un —catyí ra.

Tan cuhva tsa cahān ra tacan, tan tsihi ra.

⁴⁷ Tan ra cuví capitán cuenda andaru can naha ra, nyehe ra tandihi tsa cuví. Tan jacahnu ra tsi Nyoo, tan catyí ra:

—Nduve tsa cuii cuatyí ra ihya tsicoo —catyí ra.

⁴⁸ Tan tandihi nyivi tsa nyecú ican, nyehe ñi tsa cuví. Tan cuahán ñi tan quitsahā cañí ndaha ñi yiqui nyica ñi. Tyin tsitó ñi tyin ña vaha tsa javahā ñi tsihin ra Jesús.

⁴⁹ Tan tandihi nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehe ñi tandihi tsa cuví can.

Nu cua cutsi ra naha tsi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Tan iyó iin ra vaha, nañí ra José. ra ñuu Arimatea tsa canyií Judea. Tan cuví ra iin ra cuví ityi nuu cuenda Junta Cahnu nyivi Israel. ⁵¹ Tan ra José can ndatú ra quivi tsa cua cundaca ñaha Nyoo. Tan ña ndoo ra vaha tsihin tsa javahā ra cutahán tsihin ra, ra cuví jutu tsa cuví ityi nuu naha ra. ⁵² Tacan tan tsahān ra José can tsindacān ra cuñu ñuhu ra Jesús tsi ra Pilato. ⁵³ Tan yahā tsa januu ra José can cuñu ñuhu ra Jesús nu cruu, cava nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsa tsa cuví yavi yuu tsa javahā nyivi

tan ñaha ca quihvi ndiyi tsitsi can. ⁵⁴ Tan viernes cuví can, quivi tsa janduvahá nyivi tsa catsi ñi tsa sabaru, quivi quitatú ñi. Tan tsa cua tahan tsi quivi can.

⁵⁵ Tan tandihi ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyií cuñu ñuhu ra. ⁵⁶ Tan cuanuhu ñi nda yuvehe ñi. Tan janduvahā ñi ndutya tami tyin cua tyihi ñi cuñu ñuhu ra Jesús. Tacan tan quitatú ñi inga quivi can tumaa catyí maa tuhun tsa tsahā cuenda Nyoo tsi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Tsa tuví tumingu quivi nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahā ñi. ² Tan cuhva tsa tsaā ñi, nyehe ñi tyin tsa cuatsiyo yuu tsa ndasí yuhu ñaña can. ³ Tan quihvi ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús. ⁴ Tan yucú ñi tsihin tsa yuuhví ñi. Tan ña tsitó ñi náa cua javaha ñi. Tan sana iñi ñi quituvi uvi taahan rayi nuu ñi. Tan xiñu xaan jahma nditsí ra naha. ⁵ Tan tsihin tsa yuuhví ñi, tan tsaquin ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi?

⁶ Nduve ca ra nyii ihya, tyin tsa nandoto ra. Ndūcuhun iñi

ndo tsa cahān ra tsihin ndo quivī tsiçā ra Galilea. ⁷ Catyī ra tyin taahān tsi nacuhva cuenda nyivī tsi ra ndaha ra iyó cuatyī naha ra. Tyin cuvī ra Rayī tsa quee nda gloria. Tan taahān tsi tyin cahñi ra can naha ra tsi ra nu cruu. Maa tyin tsa tsinu uñi quivī cua nandoto ra. Tacan catyī ra tsihin ndo—catyí ángel can naha ra tsihin ñi.

⁸ Tacan tan nducuhun iñi ñi tsa cahān ra Jesús quivī can. ⁹ Tan cuanuhu ñi. Tan nacatyī tuhun ñi tsihin tsa utsi iin ra tsa tavā tyiñu ra Jesús tan tsihin tandihī ca nyivī tsa tsinyicun tsi ra. ¹⁰ Tan ñiñaha tsa tsiçatyī tuhun tsihin ra naha cuvī ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha. ¹¹ Maa tyin ra tavā tyiñu ra Jesús cuñi maa ra naha tyin caahān ñi maa ñi. Tan ña tsinú iñi ra naha tsa caahān ñi.

¹² Maa tyin ra Pedro nduvitā ra tan tsinú xaan ra cuahān ra cua nyehe ra tsitsi ñaña nu tinyiī ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasi ña ra canyiī nda sava. Tacan tan cuanuhu ra yuvehe nu yucú tandihī ca ra naha. Tan iyo xaan cuñi ra tsa cuvī.

Tsa cuvī ityi cuahān ñuu Emaús
(Mr. 16.12-13)

¹³ Juvin ñi maa quivī can, uvi taahan ra tsinyicun tsi ra Jesús cuahān ra naha

ñuu Emaús, tumaa utsi iin kilómetro tsa quee yo ñuu Jerusalén. ¹⁴ Tan cuahān ra naha tan natuhún tahan ra naha náa ndihī tsa cuvī. ¹⁵ Tan tsitsi tsa natuhún ra naha, tan ra Jesús tahañ ra tsi ra naha ityi cuahān ra naha. ¹⁶ Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuvī nacoto ra naha tsi ra Jesús. ¹⁷ Tacan tan nducū tuhun ra Jesús tsi ra naha:

—¿Náa natuhún xaan ndo? ¿Nacuenda cuihya xaan cuñi ndo? —catyí ra tsihin ra naha.

¹⁸ Tan iin ra tsa nañi Cleofas nacahañ ra tan catyī ra:

—Tandihī nyivī tsitó tsa cuvī ñuu Jerusalén. ¿A ra inga ñuu cuvī yoocho tyin ña tsito un tsa cuvī? —catyí ra.

¹⁹ Tacan tan catyí ra Jesús tsihin ra naha:

—¿Náa cuvī?

Tan nacatyī tuhun ra naha tsihin ra:

—Tuhun ra Jesús ra ñuu Nazaret. Tyin cuvī ra iin ra cuvī ndusu yuhu Nyoo. Tan tsihin tunyee iñi cahnu Nyoo javaha ra tsa cahnu tan cahān ra tsa vaha nuu Nyoo tan nuu tandihī nyivī. ²⁰ Maa tyin ra jutu tsa cuvī ityi nuu naha ra tan ra cumi tyiñu cuenda vehe ñuhu, tsaha cuenda ra naha tsi ra tsi ra ndacá ñaha cuenda ñuu Roma. Tan tsahñi ra naha tsi ra. Tan tsihi ra nu cruu. ²¹ Tan vityin tsa quitā uñi quivī tsa cuvī yacan.

Tan nyuhu cuñí maa ndi tyin juvin ra cua jacacu tsi yo tsa cuví yo nyívi Israel. ²² Maa tyin vityin iyo xaan cuñí ndi tsa nacatyí juhva ñiñaha tsihin ndi. Tyin maa ñi tsahan ñi nu ñaña ra tsa tuví. ²³ Tan nduve ca cuñu ñuhu ra canyí. Tan nacatyí tuhun ndihi ñi tyin nyehe ñi uvi taahan ángel. Tan catyí ángel can naha ra tsihin ñi tyin ra Jesús nyito ra. ²⁴ Yaha yacan tan tsahan tucu juhva ra cutahan tsihin ndi tsinyehe ra naha nu ñaña. Tan nyehe ra naha tyin tsa nditsa cuví tsa cahan ñiñaha can. Maa tyin ña nyehe ra naha tsi ra Jesús —catyí ra naha tsihin ra Jesús.

²⁵ Tacan tan catyí ra Jesús tsihin ra naha:

—Luxu xaan cutuñí iñi ndo. Tan cuee xaan tan tsinu iñi ndo tuhun tsa cahan ra cuví ndusu yuhu Nyoo tahan tsanaha. ²⁶ ¿A ña tsitó ndo tyin taahan tsi tsa nyehe jihna ra Cristo tundoho? Yaha can tan tahan tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

²⁷ Tacan tan quitsaha tsahá cuenda ra nácaa cuahán tuhun maa ra nu tutu Nyoo. Tan quitsaha caahán ra tuhun tsa tyaa ra Moisés tahan tsanaha. Tan yaha can tan cahan ra tuhun tandihi libru tsa tyaa ra cuví ndusu yuhu Nyoo.

²⁸ Tan cuhva tsa tsaa ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra.

²⁹ Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndo tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha. ³⁰ Tan cuhva tsa tsinyaa ra yuhu mesa tsihin ra naha, quihin ra paan. Tan tsaha ra tyahvi nyoo tsi Nyoo. Tan tsahnú sava ra, tan tsaha ra tsi ra naha. ³¹ Tan iin yaha ñi nuña nuu ra naha tan nacoto ra naha tsi ra Jesús. Maa tyin ra Jesús naa ihñi ñi ra. ³² Tacan tan quitsaha natuhún tahan ra naha tan catyí ra naha:

—Yacan cuenda vaha xaan cuñí aña yó tsa vatsí ra tsihin yó, tan tsahá cuenda ra tuhun Nyoo tsa nyaá nu tutu Nyoo tsi yó —catyí ra naha.

³³ Ña ndatu ca ra naha, tan cuanuhu ra naha nda ñuu Jerusalén. Tan ñihi tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha. ³⁴ Tacan tan tsa utsi iin ra can naha ra nacatyí tuhun ra naha tsihin ra tsa ndi tsaa can naha ra:

—Nditsa tyin Jutu Mañi yó nandoto ra. Tyin ra Simón nyehe ra tsi ra —catyí ra naha.

³⁵ Tacan tan ra tsa ndi tsaa can nacatyí tuhun ndihi ra naha nácaa natuhún ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnú sava ra paan.

Nu quituv̄i ra Jesús nu yucú ra tsic̄a tsihin ra

(Mt. 28.16-20; Mr. 16.14-18; Jn. 20. 19-23)

³⁶ Ndi natuhún ca ra naha yacan tan quituv̄i ra Jesús tyañu ra naha. Tan tsah̄a ra nacumi tsi ra naha, tan catyí ra:

—Na coo tsa vaha añima ndo.

³⁷ Tacan tan nayuhv̄i xaan ra naha. Tan cuñi ra naha tyin tatyí ndiyi cuví can.

³⁸ Tacan tan catyí ra Jesús tsihin ra naha:

—¿Nacuenda yuuhví xaan ndo? ¿Tan nacuenda tsicá xaan iñi ndo? ³⁹ Nyehe ndo ndaha yu. Tan nyehe ndo tsaha yu. Tyin juvin ñi maa yu cuví. Tjin ndo tsi yu tan coto ndo. Tyin tatyí ndiyi nduve cuñu ñuhu can iyó. Tan nduve yiqui can tumaa tsa nyehé ndo tsi yuhu —catyí ra Jesús.

⁴⁰ Tan cuhva tsa cahan ra yacan, tan janah̄a ra ndaha ra tsihin tsaha ra tsi ra naha.

⁴¹ Maa tyin maa ra naha, tsa cuenda tsa iyo cuñi ra naha tan sii cuñi ra naha, nda cuanda ña cuví ca tsinú vaha iñi ra naha. Yacan nacahan ra Jesús tsihin ra naha:

—¿A iyó tsa catsi yo? —catyí ra.

⁴² Tacan tan tsah̄a ra naha luxu tyaca tyihyo tsihin ndutya ñuñu tsi ra. ⁴³ Tan quih̄in ra. Tan quitsah̄a tsatsí ra nu nyecú ra naha. ⁴⁴ Tan catyí ra tsihin ra naha:

—Tandih̄i tsa tahan yu, yacan cuví tsa catyí yu tsihin ndo quivi can. Tan catyí

yu tsihin ndo tyin tacan cua cuvi, tumaa cuhva nyaá tuhun tsa tyaá ra Moisés tan ra cuvi ndusu yuhu Nyoo tan tsihin tsa nyaá nu libru salmo —catyí ra tsihin ra naha.

⁴⁵ Tacan tan tsah̄a cuenda ra Jesús cuhva catyí nu tutu Nyoo. Tan cutuñi iñi tandih̄i ra naha jah̄a ra. ⁴⁶ Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quivi cua nandoto ra. ⁴⁷ Tan taahán tsi coto nyivi tuhun ra Cristo, tyin tatun ndu uvi iñi ñi cuatyí ñi, cua coo tucahnu iñi tsi ñi. Tan jihna ñi cua cahan ra naha tsihin sivi ra Cristo ñuu Jerusalén, yaha can tan tandih̄i ca ñuu tanñi cahnu nu ñuhu ñayivi.

⁴⁸ Tan catyí tucu ra Jesús tsihin ra naha:

—Tan nyooho cuví tsandaa tsa cuenda tandih̄i tsehe. ⁴⁹ Tan cua jaquitsi maa yu Tatyí Ii Nyoo siqui ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria (Mr. 16.19-20)

⁵⁰ Tacan tan ra Jesús cuahán ra tsihin tandih̄i ra tsic̄a tsihin ra nda ñuu Betania. Tan cañih̄i ra ndaha ra. Tan nasoco ra tsi ra naha. ⁵¹ Tan tsitsi tsa nasocó ra tsi ra naha, nandaa ra andivi. ⁵² Tacan tan tandih̄i ra naha quitsah̄a jacahnú ra naha tsi ra. Tan sii xaan cuñi ra naha,

cuanuhu ra naha nda ñuu
Jerusalén. ⁵³Tan tandihí quiví
tsiyucu ra naha tsitsi vehe
ñuhu cahnu, jacahnú xaan ra
naha tsi Nyoo.

Tan na cuvi tsi tacan ñi.

Tuhun Nyoo tsa Tyaa Ra Juan

Tuhun tsa Caahán Nyoo nanduví tsi iin rayíi, tan rayíi can cuví ra Cristo

¹Nda quiví jihna ñi, nda ndi cumañi ca coo tandihí tsa iyó, tan tsa iyó maa ra cuví Tuhun tsa Caahán Nyoo. Nyíí ra tsihin Nyoo. Tan Nyoo cuví ra.

²Tan iyó ra tsihin Nyoo nda quiví jihna ñi. ³Tan tsihin ra, javahá Nyoo tandihí cuíi maa tsa iyó. Tan nduve tsa javahá Nyoo tsa intuhun ñi maa ra. ⁴Ra tsa cuví Tuhun tsa Caahán Nyoo iyó ñayiví nyito tsa ña cua naa maa tsi ra. Tan juvin ñayiví can, cuví ñuhu tsa jandunditsín ańima nyiví. ⁵Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

⁶Tsicoo iin ra tsa jaquitsí Nyoo, nańi ra Juan. ⁷Quitsí ra cuví ra tsa ndaa. Tyin caħan ra tumańi ińi cuenda ra cuví ñuhu can, tyin tacan tan tsinu ińi tandihí nyiví tsi ra. ⁸Ra Juan, ñavin ñuhu can cuví ra. Iin tsa ndaa cuenda ra cuví ñuhu can cuví ra. ⁹Tyin ñuhu nditsa can, ndi cua quitsi tsi nu ñuhu ñayiví, tan cua jandunditsín tsi ańima tandihí nyiví tsa iyó nu ñuhu ñayiví ihya.

¹⁰Ra cuví Tuhun tsa Caahán Nyoo quitsí ra nu ñuhu ñayiví. Tan juvin ñi maa ra tsihin Jutu ra javahá ra naha ñuhu ñayiví. Maa

tyin nyiví iyó nu ñuhu ñayiví ihya, ña nacoto ñi tsi ra tsa ra Cristo cuví ra. ¹¹Quitsí ra nu iyó nyiví ñuu ra, nyiví Israel, tan ña naquihín vaha ñi tsi ra. ¹²Maa tyin tandihí nyiví tsa naquihín vaha tsi ra, tan tsinú ińi ñi tyin ra Cristo cuví ra, tsaha ra ndatu tsi ñi tsa cuví ñi sehe Nyoo. ¹³Juvin ñi nacacu tsaa. Maa tyin ñavin tumaa tsa cacu ñi tsa culee ñi cuenda cuńu ñuhu ñi. Tan ndi ñavin tsa cuenda tsa cuńi iin rayíi coo ra tsihin iin ñaha. Ñavin tsa cuenda tsa cuńi nyiví coo sehe ñi. Maa tyin nacacu tsaa ñi jahá maa Nyoo.

¹⁴Tan ra cuví Tuhun tsa Caahán Nyoo nanduví ra iin rayíi. Tan tsicoo ra tsihin yo. Tan nyehe ndi tsa cahnu cuví ra. Tan cahnu cuví ra tyin Sehe mańi Jutu Nyoo cuví tsi ra. Tsiťu ra tsihin tsa nditsa tan tsa vaha. ¹⁵Tan ra Juan can caħan ra tumańi ińi tsa cuenda ra, tan catyí ra:

—Juvin ra ihya cuví ra tsa caħan yu tuhun quiví can, tyin ra tsa vatsí ityí tsata yu, cahnu ca cuví ra tan ñavin ca maa yu. Tyin nda quiví cacu yu tan tsa iyó maa ra —catyí ra Juan.

¹⁶Tandihí yo naquihín yo tumańi ińi cahnu tsa tsahá ra tsi yo, tyin nasocó xaan ra tsi yo. ¹⁷Ra Moisés tsaha cuenda ra ley Nyoo tsi yo. Maa tyin ra Jesucristo tsahá ra tsa naquihín yo tsa vaha Nyoo. Tan caahán ra tsa nditsa tsihin yo. ¹⁸Tan nduve maa yóo nyehé tsi Nyoo. Intuhun ñi maa

Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

Nu caahán ra Juan, ra jacoondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cuví ityi nuu tsihin nyivi Israel tsa iyó ñuu Jerusalén, tava tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cahun ra naha nu nyii ra Juan tan ndaca tuhun ra naha tsi ra yóo ra cuví ra. ²⁰ Tan tsicā tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyihí xeehe ra.

²¹ Tacan tan tsicā tuhun nyico ra naha tsi ra Juan:

—¿Yóo ra cuví un? ¿A ra Elías, ra cuví ndusu yuhu Nyoo tahān tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicā tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahan nyico ra Juan tan catyí ra:

—Ñavin.

²² Tan tsicā tuhun nyico ra naha tsi ra Juan inga tsaha:

—¿Yóo ra cuví un? Tyin cuñí tsi catyí tuhun ndi tsihin ra tsa tava tyiñu tsi ndi yóo ra

cuví un —catyí ra naha tsihin ra.

²³ Tan nacahan ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Nuña ndo tsitsi añima ndo tyin tsa vatsí Jutu Mañi yo.” Tuma cahan ra Isaías ra cuví ndusu yuhu Nyoo tuhun yu tahān tsanaha —catyí ra Juan tsihin ra naha.

²⁴ Ra fariseo naha ra cuví ra tava tyiñu tsi ra can naha ra, na ndaca tuhun ra naha tsi ra Juan. ²⁵ Tan tsicā tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacuvi tyin jacoondutyá un tsi nyivi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

²⁶ Tan nacahan ra Juan tan catyí ra:

—Yuhu jacoondutyá yu tsi nyivi tsihin ndutyá. Maa tyin mahñu ndo nyii iin ra tsa ña nacotó ndo. ²⁷ Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuvi ndatsi yu ñi nditsan ra —catyí ra Juan.

²⁸ Tandihí yacan cuví nu nañi Betábara tsa canyí inga tsiyo yutya cahnu Jordán nu tsinyii ra Juan jacoondutyá ra.

Ra Jesucristo, Mbee Ticatyí Luhlu jana Nyoo

²⁹ Tsa inga quivi nyehe ra Juan tsi ra Jesús cuahán ra nu nyii ra, tacan tan catyí ra Juan:

—Nyehe jihna ndo, ra ihya cuví Mbee Ticatyi Luhlu jana Nyoo ra tsa quihín nyaa cutatyí nyívi iyó nu ñuhu ñayívi ihya. ³⁰ Tuhun ra cahān yu quívi catyí yu tsihin ndo tyin ityi tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoo yu. ³¹ Ndi yuhu tan ña nacoto yu tsi ra quívi can. Maa tyin vityin vatsí yu jacoondutyá yu tsihin ndutya tyin tacan tan nacoto nyívi Israel ñuu yu tsi ra —catyí ra Juan.

³² Tan catyí nyico ra Juan:

—Yuhu nyehe yu Tatyí Ii Nyoo tsa quítsi ityi andívi tan quítsi tsi tumaa iin paloma, tan ndoo tsi tsihin ra. ³³ Yuhu ñaha ca nacoto yu yóo ra cuví ra quívi can. Maa tyin Nyoo, ra tsa tavā tyiñu tsi yu jacoondutya yu tsi nyívi tsihin ndutya, catyí ra tsihin yu: “Quívi nyehe un Tatyí Ii, vatsí nuú tsi síqui iin rayíi, tan ndoo tsi tsihin ra, juvin ra can cuví ra tsa cua jacoondutya tsi nyívi tsihin Tatyí Ii yu”, catyí Nyoo tsihin yu. ³⁴ Yuhu tsa yahā nyehe yu tsi ra. Tan cuví yu tsa ndaa tyin juvin ra cuví Sehe Nyoo —catyí ra Juan.

Ra tsa quítsahā nyicún jihna tsi ra Jesús

³⁵ Tsa inga quívi nyíi nyico ra Juan nu nyíi ra tan yucú ndíhi uvi taahan ra tsicá tsihin ra. ³⁶ Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticatyi Luhlu jana Nyoo —catyí ra.

³⁷ Tsa tsiñi nduvi taahan ra nyicún tsi ra Juan tsa cahān ra, tacan tan cuahan ra naha cuanyicun ra naha tsi ra Jesús. ³⁸ Tacan tan nanyehe ra Jesús ityi tsata ra, tan nyehe ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahān ra naha tan catyí ra naha:

—Maestro, ¿numaa iyó un?

³⁹ Tan catyí ra Jesús tsihin ra naha:

—Cohon ndo tsihin yu, tan nyehe ndo —catyí ra tsihin ra naha.

Tacan tan cuahán ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaā ra naha ndacan tumaa caa cumi tsa tseñi.

⁴⁰ Iin ra tsa tsiñi tsa cahān ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro. ⁴¹ Tan ra Andrés numi xaan tsinanducú ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñí tsi catyí, ra Cristo, o cuñí tucu tsi catyí, ra tsa nacatsi vaha Nyoo tyin quítsi ra cuví ra rey tsa cuenda yo.

⁴² Tacan tan quihín ra Andrés tsi ra Simón yañi ra cuahán tsihin ra nu nyíi ra Jesús. Tsa nyehe ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñí tsi catyí tsi “Pedro”, tan tsa nduvi sivi can, cuñí tsi catyí tsi “cava”, [tumaa iin yuu cahnu].

Nu cana ra Jesús tsi ra Felipe tan ra Natanael

⁴³ Tsa inga quivi tyaa ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Naha quitsi nyicun un tsi yu —catyí ra.

⁴⁴ Ra Felipe ihya, ra ñuu Bet-saida cuví ra. Tan ican iyó tucu ra Andrés tan ra Pedro. ⁴⁵ Tacan tan tsahan ra Felipe tsinanducu ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cahan tucu ra cuví ndusu yuhu Nyoo tuhun tahan tsanaha. Tan nañí ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

⁴⁶ Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacañan ra Felipe tan catyí ra:

—Naha tan nyehe un —catyí ra.

⁴⁷ Tacan tan tsa cua cuy-tyin ra Natanael nu nyii ra Jesús. Tan nanyehe ra Jesús tyin vatsí ra, tan quitsaha catyí ra:

—¡Jihna ndo! Ihya vatsí iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

⁴⁸ Tacan tan tsica tuhun ra Natanael tsi ra:

—¿Nacaa tsa tsitó un tsi yuhu?

Tan nacañan ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyii un tsaha yutun higo can —catyí ra Jesús tsihin ra.

⁴⁹ Tacan tan quitsaha catyí ra Natanael:

—Jutu Mañi yu, yooho cuví Sehe Nyoo. Tan juvin un cuví rey cuenda nyuhu tsa cuví yo nyivi Israel.

⁵⁰ Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsaha yutun higo? Maa tyin nahnu ca tsa cua nyehe un tan ñavin ca yacan —catyí ra tsihin ra.

⁵¹ Tan catyí ra Jesús tsihin ra naha:

—Tsa nditsa catyí yu tsihin ndo tyin nyoocho cua nyehe ndo cua nuña andivi tan cuaha xaan ángel Nyoo cua ndaa, tan cua nuu ra naha siqui yuhu Rayi tsa quee nda gloria —catyí ra Jesús tsihin ra naha.

2

Nu iyó vico tindaha ñuu Caná iin ñuu tsa canyii Galilea

¹ Tsa yaha uñi quivi tan tsi-coo iin vico tindaha ñuu Caná tsa canyii Galilea. Tan ican

nyii sihi ra Jesús. ² Tan nyivi javaha vico can cana ndihi ñi tsi ra Jesús tan tsihin tandihi ra tsicá tsihin ra tyin cuhun ra naha. ³ Tacan tan cuahán ra naha. Tan tsitsi tsa yucú ra naha nu iyó vico can, tan ndihi vinu ñi javaha vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.

⁴ Tan catyí ra Jesús tsihin ña:

—¿Náa tsa ndihi iñi yo yacan, Miyan? Tyin ñaha ca tsaa hora yu —catyí ra tsihin ña.

⁵ Maa tyin sihi ra cahan ña tsihin ra tsa tyihí mesa nu iyó vico can naha ra:

—Javaha nyooho tandihi tsa cua cahan ra tsihin ndo —catyí ña tsihin ra naha.

⁶ Tan nyecú iñu quisi yuu nahnu tsa yihí ndutya tsa tuhvá ra Israel naha ra tsaty-iñú nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutya tsitsi can. ⁷ Tacan tan catyí ra Jesús tsihin ra tsa tyihí mesa can naha ra:

—Jacutu ndo quisi ihya tsihin ndutya —catyí ra tsihin ra naha.

Tacan tan tsitu cuii quisi can jahá ra naha. ⁸ Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tsihin ra naha.

Tan tacan icá ra naha. ⁹ Ra cuví ityi nuu cuenda vico can

tsihi ra naha ndutya tsa nan-duví vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can cana ra tsi ra tsa tandaha can. ¹⁰ Tan catyí ra tsihin ra:

—Tandihi nyivi, jihna ca vinu vaha tuhvá ñi tava. Yaha can tan tatun tsa tsihi xaan nyivi, tacan tan tava ñi vinu ndaahvi. Maa tyin yooho tsicumí vaha un vinu vaha. Tan nda vityin tava un can —catyí ra tsihin ra.

¹¹ Tsa javaha ra Jesús ñuu Caná tsa canyii Galilea, yacan cuví tsa iyo tsa jihna ñi javaha ra tan janaha ra tsa cahnu cuví ra tsi nyivi. Tan ra tsicá tsihin ra tsinu iñi ra naha tsi ra tyin ra ican cuví ra tsa jaquitsi Nyoo.

¹² Tsa yaha yacan tan cuahán ra ñuu Capernaum tsihin sihi ra tan tsihin yañi ra. Tan cuahan ndihi ra tsicá tsihin ra. Tan ican tsiyucú ñi juhva quivi.

Nu jacunu ra Jesús tsi nyivi xicó nuquehe yuvehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Tsa cua tahan tsi quivi vico pascua tsa jacahnú nyivi Israel. Yacan cuenda cuahán ra Jesús ñuu Jerusalén. ¹⁴ Tsa tsaá ra ñuu can, quihví ra nuquehe vehe ñuhu cahnu, tan nyehe ra yucú cuaha nyivi xicó ñi nuquehe can. Yihí ñi xicó ñi indiqui, mbee

ticatyí, tan paloma. Tan yucú ndihí tucu nyívi nasamá xuhun. ¹⁵ Tsa nyehe ra Jesús tandihí yacan, tacan tan javahá ra iin yoho. Tan tsihin yoho can jacunú ra tsi tandihí nyívi nuquehe vehe ñuhu iin cahnu ñi tsihin mbee tan tsihin indiquí jana ñi. Tan ñi nasamá xuhun can, jatucuatyí ra xuhun ñi nu ñuhu tan janduvá ra mesa ñi. ¹⁶ Tan catyí ra tsihin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahví! —catyí ra tsihin ñi.

¹⁷ Tacan tan ra tsicá tsihin ra, nducuhun iñi ra naha tsa catyí nu tutu Nyoo tye-hen: “Cuiñu xaan yu vehe un”, catyí tsi, nducuhun iñi ra naha.

¹⁸ Tacan tan ra cuví ityi nuu tsihin nyívi Israel quít-sahá tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsahá Nyoo ndatu tsi un tsa javaha un yacan? —catyí ra naha tsihin ra.

¹⁹ Tan nacahan ra Jesús tan catyí ra:

—Caní ndo vehe ñuhu ihya, tan tsitsi tsa uñi quívi ñi tan cua janduvita nyico yu itsi inga tsaha —catyí ra tsihin ra naha.

²⁰ Tacan tan quít-sahá catyí ra nyecú ican naha ra tsihin ra:

—Uvi xico iñu cuiya jahá tyiñu ra naha tan tsinú vehe ñuhu ihya. ¡Tan yooho catyí un tyin tsitsi tsa uñi quívi ñi

tan cua janduvita un itsi inga tsaha! —catyí ra naha tsihin ra.

²¹ Maa tyin ñavin tuhun vehe ñuhu can cahan ra Jesús, tyin cahan ra tuhun cuñu ñuhu ra. ²² Yacan cuenda tandihí ra tsicá tsihin ra nducuhun iñi ra naha yacan quívi nandoto ra. Tan cutuñi iñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinú iñi ra naha tsa cahan ra Jesús tan tsa nyaá nu tutu Nyoo.

Ra Jesús tsitó ra tsa iyó
añima nyívi

²³ Tsitsi tsa ndi nyíi ra Jesús ñuu Jerusalén, quívi iyó vico pascua, cuaha xaan nyívi quít-sahá tsinú iñi tsa caahán ra tsa cuenda tsa cuaha tsa iyo javahá ra. ²⁴ Maa tyin ra Jesús ña ñi cuñi ra nyehé ra tsi tandihí ñi tyin tsitó ra cuhva tsicá iñi ñi. ²⁵ Ña tsiñiñuhu tsa nacatyí tuhun yo tsihin ra nácaa iyó nyívi, tyin tsa tsitó maa ra náa iyó tsitsi añima yo.

3

Nu jacuahá ra Jesús tsi ra
Nicodemo

¹ Tsicoo iin ra cuví fariseo tsa nañi Nicodemo. Tan cuví ra iin ra cuví ityi nuu tsihin ra Israel naha ra. ² Ra Nicodemo ihya, tsahan ra nu nyíi ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tava tyiñu tsi un tsa quít-si un jacuahá un tsi ndi. Tyin yoñi nyívi tan cuví javaha ñi tsa iyo tsa javahá un, tatun nduve Nyoo iyó

tsihin ñi —catyí ra tsihin ra Jesús.

³ Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsa nyivi inga tsaha, ña cua cuvi nyehe ñi nu ndacá ñaha Nyoo —catyí ra.

⁴ Tacan tan tsica tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsa inga tsaha? —catyí ra.

⁵ Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñí tsi nacacu tsa ñi tsihin Tatyí Ii Nyoo. ⁶ Tyin nyivi cacu tsihin cuñu ñuhu, cuñu ñuhu ñi cuví ñi. Tan nyivi nacacu tsa tsihin Tatyí Ii Nyoo, Tatyí Ii Nyoo iyó añima ñi. ⁷ Ña cu iyo ñi un tsa caahan yu tsehe tsihin un tyin tandihi nyivi cuñí tsi nacacu tsa ñi. ⁸ Tumaa tsa yihí tatyí tandihi ñi ityi tan tsiñi un cucayú vatsí tsi, maa tyin ña tsitó un numaa ityi quee tsi, tan ndáa ityi cuahan tsi; tacan cuví tandihi nyivi nacacu tsa tsihin Tatyí Ii Nyoo —catyí ra Jesús tsihin ra.

⁹ Tacan tan nducu tuhun nyico ra Nicodemo tsi ra inga tsaha tan catyí ra:

—¿Nacuenda caahan un tacan? —catyí ra tsihin ra.

¹⁰ Nacahan ra Jesús tan catyí ra:

—Yooho tsa cuví un maestro cuenda nyivi Israel, taahan tsi coto un tsehe.

¹¹ Tsa nditsa catyí yu tsihin un tyin caahan ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyooho ña tsinú ñi ndo tsa caahan ndi tsihin ndo. ¹² Tatun ña tsinú ñi ndo tsa caahan yu tuhun nu ñuhu ñayivi ihya tsihin ndo, ¿nacaa cua tsinu ñi ndo tatun cua cahan yu tuhun gloria tsihin ndo?

¹³ Yoñi tsahan gloria tsinyehe nácaa iyó. Intuhun ñi maa yuhu Rayi tsa quee nda gloria nyehé yu nácaa iyó gloria, tyin ndacan quee yu.

¹⁴ Tumaa tsa ticaa ra Moisés iin coo tsa tsinu tsihin caa nu yutun iin nu tsiqui, tacan cua ticaa nyivi tsi yuhu Rayi tsa quee nda gloria nuu cruu.

¹⁵ Tacan tan tandihi nyivi tsa tsinú ñi tsi yu, ña cua cunaa ñi. Tan cua coo ñi ñayivi nyito tsa ña cua naa maa.

Nyoo cuñí xaan ra tsi tandihi nyivi

¹⁶ Nyoo cuñí xaan ra tsi tandihi nyivi iyó nu ñuhu ñayivi. Yacan cuenda tsaha ra tsa cúu Sehe mañi ra nu cruu tsa cuenda ñi. Tyin tacan tan tandihi ñi tsa tsinú ñi tsi Sehe ra, ña cunaa ñi, tan coo ñi ñayivi nyito tsa ña cua naa maa. ¹⁷ Tyin Nyoo jaquitsi ra tsi Sehe ra nu ñuhu ñayivi tyin jacacu ra tsi nyivi, tan ña jaquitsi ra tsi ra tsa jacunaa ra tsi ñi.

18 'Yacan cuenda nyivi tsa tsinú iñi tsi yu tsa cuví yu Sehe Nyoo ña cua cunaa ñi, maa tyin nyivi tsa ña tsinú iñi tsi yu, tsa cunaa ñi tyin ña tsinú iñi ñi tsi yu tsa cuví yu Sehe mañi Nyoo. 19 Nyivi ña tsinú iñi, tsa cunaa ñi. Tyin quivi quitsi yu jandunditsin yu nu ñuhu ñayivi, ña naquihin cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi. 20 Tandihí nyivi javahá tsa ña vaha, ña taahán iñi ñi coo ñi nu nditsin, tyin ña cuñí ñi tsa quituvi tsa ña vaha javahá ñi. 21 Maa tyin nyivi taahán iñi tsa nditsa, naquitá ñi nu nditsin tyin tacan tan nyehe nyivi tyin javahá ñi cuhva cuñí Nyoo tyin nyaá ra tsihin ñi —catyí ra Jesús.

Nu caahán ra Juan, ra jacoondutyá tsi nyivi, tuhun ra Jesús inga tsaha

22 Tsa yahá yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ican juhva quivi, tyin jacoondutyá ra naha tsi nyivi. 23 Tacan tucu ra Juan nyii ra jacoondutyá ra tsi nyivi nu cuví Enón yatyin ñi nu cuví Salim, tyin ican ñuhú cuaha ndutyá. Tan tsaá nyivi tan tsicoondutyá ñi. 24 Yacan javahá ra Juan tsa ndi cumañi ca quihvi ra vehe caa.

25 Tacan tan quitsaha caahán yuhu tahan juhva ra tsicá tsihin ra Juan tsihin inga ca ra naha tsa cuenda

tsa janduvaha nyivi tsi ñi nuu Nyoo. 26 Tacan tan cuahán ra naha nu nyii ra Juan. Tan catyí ra naha tsihin ra:

—Maestro, ra tsa tsinyii tsihin un inga tsiyo yutya cahnu Jordán, ra tsa cahan un tuhun tsihin ndi, vityin jacoondutyá ndihí ra tsi nyivi tan tandihí nyivi nyicún tsi ra —catyí ra naha tsihin ra.

27 Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatyin ña tsahá Nyoo tunyee iñi ra tsi yo. 28 Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa cahan yu quivi catyí catsi yu tyin ra jaquitsi Nyoo ityi nuu ra Cristo cuví yu. 29 Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha iñi tsi ra nyii ra ican. Tan cusii iñi ra tsiñi ra tsa caahán ra tsa cua tindaha. Tan tacan tucu yuhu, siñi cuñí yu tyin naquihin nyivi tuhun caahán ra Jesús tan nyicún ñi tsi ra. 30 Maa ra cuví ra cahnu ca cuví. Tan yuhu cua nduluhlu yu nuu ra tyin tacan taahán maa tsi.

Ra quee nda gloria tan quitsi ra nu ñuhu ñayivi

31 'Ra tsa quee nda gloria, cahnu ca cuví ra tan ñavin ca tandihí nyivi. Tyin nyivi iyó nu ñuhu ñayivi ihya, cuenda nu ñuhu ñayivi cuví ñi. Tan caahán ñi tuhun tsa iyó nu ñuhu ñayivi. Maa tyin ra tsa quee nda gloria, cahnu cuví

ra. ³² Tan caahán ra tsa nyehé ra tan tsa tsiñí ra, maa tyin yoñi tsinú iñi tsa caahán ra. ³³ Tatun yoo tan tsinú iñi yo tsa caahán ra, cua cuví yo tsa ndaa tyin Nyoo ña vatya ra. ³⁴ Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí Ii ra tan tsahá ra itsi tsi ra. Tsahá ra nanií Tatyí Ii ra tsi ra. ³⁵ Nyoo Jutu yo cuñí ra tsi Sehe ra. Tan nacuhva cuenda ra tandihí maa tsi ra. ³⁶ Nyivi tsa tsinú iñi tsa caahán Sehe Nyoo, iyó ñi ñayivi nyito tsa ña cua naa maa. Maa tyin nyivi tsa ña cuñí tsinu iñi tsi ra, ña cua coo ñi ñayivi nyito. Tan cua tatsi tuñi Nyoo tsi ñi.

4

Nu natuhun ra Jesús tsihin iin ñaha Samaria

¹ Tsa tsito ra cuví fariseo naha ra tyin cuaha xaan ca nyivi nyicún tsi ra Jesús tan ñavin ca ra Juan. Tan cuaha xaan ñi tsicoondutya. ² Maa tyin ñavin maa ra Jesús jacoondutyá tsi ñi, tyin ra tsicá tsihin ra jacoondutyá tsi ñi. ³ Tan quivi tsa tsito ra Jesús tyin tsito ra naha yacan, quee ra Judea can tan cuanuhu ra nda nu cuví Galilea.

⁴ Tsa cuahán ra, yaha ra nu cuví Samaria tyin cuñí tsi yaha ra ican. ⁵ Tacan tan tsaá ra iin ñuu tsa canyí Samaria tsa nañí Sicar yatyin ñi nu cuví ñuhu ra Jacob nu tsahá ra tsi ra José sehe ra. ⁶ Ican nyaá iin soco pila tsa catyí nyivi tyin tsii ra Jacob cuví. Tsa quitá ra Jesús nu nyaá

soco can tan tsinyaá ra yuhu soco can tyin tatu xaan ra tyin cañi xaan ityi tsicá ra tan maa hora cuví. ⁷⁻⁸ Ra tsicá tsihin ra, yoñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaá iin ñaha Samaria tyin cua tava ña ndutya tsitsi soco can. Tacan tan catyí ra Jesús tsihin ña:

—Cuhva luxu ndutya coho yu —catyí ra tsihin ña.

⁹ Tacan tan ñaha Samaria can catyí ña tsihin ra:

—Yooho tsa cuví un iin ra ñuu Israel, ¿nacuvi tyin tsicán un ndutya coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyivi Israel ña vaha iyó ñi tsihin nyivi Samaria.) ¹⁰ Tacan tan nacahan ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tsihin ña.

¹¹ Tacan tan catyí ña tsihin ra:

—Tatta, cunu xaan soco ihya. ¿Nacaa tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu?

¹² Ra Jacob tsii tsahnu yo, nacoo ra soco ihya tsi ndi. Juvín ihya tsihi maa ra ndutya tan tsihin tandihí sehe ra. Tan juvín ñi ihya tsihi tucu quitá jana ra naha. ¿A cahnu ca

ra cuví yoocho tan ñavin ca ra can? —catyí ña tsihin ra.

¹³ Tacan tan nacahan ra Jesús tan catyí ra tsihin ña:

—Tandihí nyívi tsihí ndutya ihya, cua na ityi nyico iñi ñi. ¹⁴ Maa tyin nyívi tsihí ndutya tsa tsahá yuhu, ña cua na ityi ca iñi ñi. Tyin ndutya tsa tsahá yuhu cua cana tsi tsitsi añima ñi tumaa caná ndutya iin ndohyo, tyin iin ndohyo ña tuhvá tsi ndoco. Tan tacan cua coo ñi ñayívi nyito —catyí ra tsihin ña.

¹⁵ Tacan tan quitsaha caahán ña tsihin ra:

—Yoocho tatta, cūhva ndutya can coho yu na ña na ityi ca iñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

¹⁶ Tacan tan catyí ra Jesús tsihin ña:

—Cuaahan cua quihin y# un tan quitsi ndo —catyí ra tsihin ña.

¹⁷ Tan nacahan ña tan catyí ña:

—Nduve y# yu iyó.

Tacan tan catyí ra Jesús tsihin ña:

—Nditsa tsa caahán un, tyin nduve y# un iyó. ¹⁸ Tyin tsa uhun y# un tsicoo, tan ra cumí tsi un vityin ñavin y# un tsi ra. —catyí ra tsihin ña.

¹⁹ Tsa tsiñi ña tsa cahan ra tacan, quitsaha catyí ña tsihin ra:

—Yoocho tatta, tuví iñi yu tyin ra cuví ndusu yuhu Nyoo cuví un. ²⁰ Tsii tsahnu ndi, ra ñuu ihya naha ra, jacahnu ra naha tsi Nyoo yucu ihya. Maa tyin nyoocho tsa cuví

nyívi Israel catyí ndo tyin nda Jerusalén taahán tsi jacahnu yo tsi Nyoo —catyí ña tsihin ra.

²¹ Tacan tan nacahan ra Jesús tan catyí ra tsihin ña:

—Tsinu iñi tsa caahán yu tsihin un. Tyin vatsí hora tsa cua jacahnu ndo tsi Jutu yo Nyoo. Maa tyin ña tsiñiñuhu ca tsa quitsi ndo yucu ihya, a cahun ndo nda Jerusalén.

²² Nyoocho nyívi Samaria, ña tsitó ndo yóo jacahnú ndo. Maa tyin nyuhu tsitó ndi yóo jacahnú ndi. Tan tsitó ndi tyin cua jacacu iin ra Israel tsi nyívi jaha Nyoo. ²³ Maa tyin cua tsaa hora, tan hora can iyó yo vityin tyin nyívi tsa nditsa jacahnú tsi Nyoo Jutu yo, cua jacahnu ñi tsi ra tsihin añima ñi tan tsihin tsa nditsa. Tumaa jaquihín ityi maa Tatyí Ii Nyoo tsi ñi. Tyin Nyoo Jutu yo tacan cuñí ra javaha ñi tsa jacahnú tsi ra. ²⁴ Tyin Nyoo Tatyí Ii cuví ra. Tan nyívi jacahnú tsi ra cuñí tsi jacahnú ñi tsi ra tsihin tsa nditsa tumaa jaquihín ityi maa Tatyí Ii tsi ñi —catyí ra tsihin ña.

²⁵ Tan nacahan ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quívi quitsi ra, maa ra cua nacatyí tuhun tandihí tsihin yo —catyí ña tsihin ra.

²⁶ Tacan tan nacahan ra Jesús tan catyí ra tsihin ña:

—Ra tsa caahán un tuhun can, juvin ra caahán tsihin un —catyí ra tsihin ña.

27 Tacan tan tsaq nyico ra tsicá tsihin ra, tan iyo xaan cuñí ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñí ra, o ndaca tuhun ra naha tsi ra nacuenda natuhún ra tsihin ñaha can. 28 Tacan tan nacoq ña quiyi ña tan cuanuhu ña nda ñuu. Tan catyí ña tsihin nyivi:

29 —Cohon ndo cunyehe ndo tsi iin ra tsa cahan tandihi cuhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tsihin ñi.

30 Tacan tan quitā nyivi ñuu can tan cuahán ñi cua nyehe ñi nu nyíi ra Jesús. 31 Tan tsa ndi cumañi ca tsa ñi nu nyíi ra, ra tsicá tsihin ra, jañiñi ra naha tsi ra na catsi ra luxu. Tan catyí ra naha tsihin ra:

—Maestro, catsi luxu —catyí ra naha.

32 Maa tyin catyí ra Jesús tsihin ra naha:

—Yuhu iyó iin tsa tsatsí yu tan nyooho ña tsitó ndo náa cuví can —catyí ra tsihin ra naha.

33 Tacan tan ra tsicá tsihin ra, quitsahā natuhún tahan ra naha, tan catyí ra naha:

—¿A iyó yóo quitsi quitsi ndaca tsa catsi ra? —catyí ra naha.

34 Maa tyin ra Jesús catyí ra tsihin ra naha:

—Tsa tsatsí yuhu juvin tsi cuví tsa javahá yu cuhva cuñí ra tsa jaquitsi tsi yu, tan javahá yu tyiñu tsahā ra tsi yu. 35 Nyooho catyí ndo: “Ndi cumañi cumi yoo ca tan

tahan tsi naquihin vaha yo tsa tatsi yo.” Maa tyin yuhu catyí yu tsihin ndo: Nyehe ndo tyin tsa ndihi tsa tatsi ndo cuaan tan tsa nyecú vaha tsi tsa cua naquihin vaha yo itsi. 36 Ra tsa naquihin vaha can ñihí ra yahvi ra. Tan tsa naquihin vaha ra, cuví tsi nyivi tsa cua coo ñayivi nyito tsa ña cua naa maa. Tacan tan ra tsa tatsi tan ra tsa naquihin cusii iñi ra naha. 37 Tan iyó iin cuhva tuhvá nyivi caahán tan catyí ñi tyin sin nyivi tatsi tan sin nyivi naquihin vaha. Tan nditsa yacan. 38 Yuhu jacuhun yu tsi ndo tyin cua cahnu ndo niñi tsa iyó nu ña jahā tyiñu ndo, nu jahā tyiñu inga ra. Tan nyooho cucahnu ndo tan cua naquihin vaha ndo niñi can —catyí ra Jesús tsihin ra naha.

39 Tan cuaha xaan nyivi ñuu Samaria can quitsahā tsinú iñi ñi tsi ra Jesús tsa cuenda tsa cahan ñaha can, tyin catyí ña: “Cahan ra tsihin yu tandihi cuhva iyó yu”, catyí ña. 40 Cuhva tsa tsaq ñi nu nyíi ra Jesús, tan cahan ndaahvi ñi tsihin ra na ndoo ra tsihin ñi. Tan ndoo ra tsihin ñi uvi quivi. 41 Tan cuaha ca nyivi quitsahā tsinú iñi ñi tsa tsiñi ñi tsa caahán ra. 42 Tacan tan quitsahā catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cahan un tsihin ndi, tyin tsiñi maa ndi tsihin soho ndi tsa caahán ra, tan tsitó vaha ndi tyin juvin ra cuví ra Cristo ra jacacú tsi nyivi iyó nu ñuhu

ñayivi ihya —catyí ñi.

Nu janduvaha ra Jesús sehe iin ra cumí tyiñu

⁴³ Tsa yaha uvi quivi tan quee ra Jesús nu cuví Samaria tan cuahán ra ityi nu cuví Galilea, nu cacu ra. ⁴⁴ Vasu ndi maa juvin ñi maa ra cahan tyin iin ra cuví ndusu yuhu Nyoo, nyivi ñuu ra ña jahá ñi tsa ñayivi tsi ra. ⁴⁵ Tacan tan tsa tsaá ra Galilea, nyivi iyó ican, vaha caahán ñi tsihin ra, tyin tsahan ñi vico Jerusalén, tan nyehe ñi tsa vaha tsa javaha ra.

⁴⁶ Tacan tan cuanuhu nyico ra Jesús nda ñuu Caná tsa canyí Galilea nu nanduví ndutya vinu jahá ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhví nda ñuu Capernaum. ⁴⁷ Quivi tsa tsito ra can tyin tsa tsaá nyico ra Jesús nda Galilea tsa tsahan ra nda Judea, tsahan ra tsinyehe ra tsi ra Jesús. Tan tsican ra tumañi iñi tsi ra na cahun ra vehe ra tan janduvaha ra tsi sehe ra, tyin tsa cuñí cúu cuii ña sehe ra. ⁴⁸ Tacan tan catyí ra Jesús tsihin ra:

—Nyooho ña cua tsinu iñi ndo tatun ña nyehe jihna ndo tsa iyo —catyí ra tsihin ra.

⁴⁹ Maa tyin ra can catyí ra tsihin ra Jesús:

—Yooho taa, cohon ñi tsihin yu tsa ndi cumañi ca cúu sehe yu —catyí ra tsihin ra Jesús.

⁵⁰ Tacan tan catyí ra Jesús tsihin ra:

—Cuñuhu yuvehe un. Sehe un nyito ra, tsa nduvaha ra —catyí ra tsihin ra.

Tacan tan ra can tsinu iñi ra tsa cahan ra Jesús tan cuanuhu ra. ⁵¹ Tsa tsa cuyatyin ra yuvehe ra, quita musu ra tan caahán ra naha tsihin ra:

—¡Taa, sehe un nyito ra; tsa nduvaha ra!

⁵² Tacan tan quitsaha tsica tuhun ra tsi ra naha náa hora quitsaha vaha cuñi ra. Tan catyí ra naha tsihin ra:

—Icu cuhva caa iin tsa yaha hora quita cahñi tsi ra —catyí ra naha.

⁵³ Tacan tan tsito ra can, tyin hora can cahan ra Jesús tsihin ra, “Cuñuhu tyin sehe un nyito ra, tsa nduvaha ra.” Tan maa ra can tsihin tandihí nyivi ra quitsaha tsinú iñi ñi tsi ra Jesús.

⁵⁴ Yacan cuví tsa iyo tsa tsinu uvi javaha ra Jesús tsa tsaá nyico ra Galilea tsa yaha tsahan ra Judea.

5

Nu janduvaha ra Jesús iin ra cuuhví

¹ Tsa yaha can tan cuahán ra Jesús ñuu Jerusalén inga tsaha tyin nyivi ñuu Israel jachahnú ñi iin vico. ² Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyí. Tan yatyin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yuhu hebreo nañi vehe can Betesda. Tan iyó uhun corredor. ³ Tan ican yucú cuaha nyivi cuuhví: ñi cuaa, ñi coxo, tan

ñi ndohó cuehe xii. Ndatú ñi náa hora nacanda ndutya can. ⁴ Tyin nda naha nda naha ñi tan nuú iin ángel tan jacandá ra ndutya can. Tan nyivi tsa quihví jihna tsa yaha ñi nacandá ndutya can, nduvahá ñi vasu ndi maa cuehe cahnu ndohó ñi. ⁵ Tan ican canyíi iin ra cuuhví tan tsa iyó oco tsahun uñi cuiya cuuhví ra. ⁶ Tsa nyehe ra Jesús tsi ra ican canyíi ra, tuví iñi ra tyin tsa cuaha xaan cuiya cuuhví ra. Tan tsicá tuhun ra tsi ra ndaahví can, tan catyí ra:

—¿A cuñí un nduvaha un?

⁷ Tan ra cuuhví can nacahan ra tan catyí ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahn ñi tsaha tsa cuñí yu quihví yu, inga nyivi quihví jihna —catyí ra cuuhví can tsihin ra Jesús.

⁸ Tacan tan catyí ra Jesús tsihin ra:

—Nduvita, naquihin yuvi un tan caca un —catyí ra tsihin ra.

⁹ Juvín ñi hora can tan nduvahá ra, naquihin ra yuvi ra, tan nacacá ra. Maa tyin quivi quitatú nyivi cuví quivi can.

¹⁰ Yacan ra cuví ityi nuu tsihin nyivi Israel catyí ra naha tsihin ra tsa nduvahá can:

—Quivi quitatú yo cuví vityin, yacan cuenda ña taahán tsi cuiso un yuvi un —catyí ra naha tsihin ra.

¹¹ Tan ra tsa nduvahá can nacahan ra tan catyí ra:

—Ra tsa janduvahá tsi yu, catyí ra tsihin yu: “Naquihin

yuvi un tan caca un”, catyí ra tsihin yu.

¹² Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cahan tsihin un tyin naquihin un yuvi un tan caca un? —catyí ra naha.

¹³ Maa tyin ra tsa nduvahá can ña tsitó ra yóo janduvahá tsi ra. Tyin cuaha xaan nyivi nyecú ican, tan ra Jesús nduve ca ra nyaá tyin tsa cuahán ra. ¹⁴ Yaha can tan nañihí ra Jesús tsi ra tsa nduvahá can tsitsi vehe ñuhu cahnu, tan catyí ra tsihin ra:

—Jihna, vityin tsa nduvahá un, ña javaha ca un tsa ña vaha, tyin coto quitsi inga tundoho cahnu ca siqui un —catyí ra tsihin ra.

¹⁵ Tacan tan tsahan ra tsicahan ra tsihin ra Israel naha ra tyin ra Jesús cuví ra janduvahá tsi ra. ¹⁶ Tsa cuenda tsa janduvahá ra Jesús tsi ra can quivi quitatú nyivi, xaan xaan cuñí ra Israel naha ra nyehe ra naha tsi ra. Tan cuñí ra naha cahñi ra naha tsi ra. ¹⁷ Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

¹⁸ Tan tsa cuenda tsa cahan ra yacan, xaan ca cuñí ra Israel can naha ra. Tan ñihi ca cuñí ra naha cahñi ra naha tsi ra tyin cuñí maa ra naha tyin ña jahá ra Jesús tsa cahnu cuví quivi quitatú nyivi, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

Sehe Nyoo iyó xaan ndatu tsi ra cundaca ñaha ra

¹⁹ Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyehé yu javahá Jutu yu. Tandihí tsa javahá Jutu yu tan javahá tucu maa yu. ²⁰ Tyin cuñí xaan ra tsi yu, tyin Sehe ra cuví tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can. ²¹ Tumaa janandotó Nyoo Jutu yu ndiyí, tan tsahá ra ñayívi coo ñi, tacan tucu yuhu tsa cuví yu Sehe ra, tsahá yu ñayívi coo nyívi cuñí maa yu cuhva yu. ²² Tacan Nyoo Jutu yu, ña jandaa ca ra cuatyí ndi intuhun nyívi tyin tsa tsahá ra ndatu tsi yuhu tsa cuví yu Sehe ra tyin jandaa yu cuatyí nyívi. ²³ Tacan icá Nyoo Jutu yu tsa cuñí ra jacahnú nyívi tsi Sehe ra tumaa tsa jacahnú maa ñi tsi maa ra. Nyívi tsa ña jacahnú tsi yuhu tsa cuví yu Sehe Nyoo, ndi Jutu yu tan ña jacahnú ñi. Tyin maa ra jaquitsí tsi yu.

²⁴ Tan tsa nditsa caahán yu tyin nyívi tyaá soho tsa caahán yu tan tsinú ñi ñi tsi ra tsa jaquitsí tsi yu, iyó ñi ñayívi nyito tsa ña cua naa maa. Tan ña cua cuhun ca ñi anyaya tsa catyí cuatyí ñi tyin tsa jacacú Nyoo tsi ñi tan ña yihí ndaha ca tuhun tsihí tsi ñi, tan tsahá ra ñayívi

nyito iyó ñi. ²⁵ Nyívi; tumaa ndiyí cuví ñi. Tan tsa nditsa caahán yu tsihin ndo tyin vatsí quívi cua cuñi ñi ndusu Sehe Nyoo. Tan nyívi tsa cua tyaa yahvi tsa caahán ra, cua coo ñi ñayívi nyito tsa ña cua naa maa. Tan vityin cuví quívi tsa caahán yu tuhun. ²⁶ Tyin Nyoo Jutu yu iyó ra ñayívi nyito tsa ña cua naa maa. Tan tsahá ra ndatu can tsi yuhu tsa cuví yu Sehe ra tyin cuhva yu ñayívi can coo nyívi. ²⁷ Tan tsahá tucu Nyoo ndatu tsi yu tsa jandaa yu cuatyí nyívi, tyin Rayí quee nda gloria cuví yu. ²⁸ Ña iyo cuñi ndo tsa caahán yu tyehen, tyin cua tsaá quívi tsa cuñi ndiyí yucú tsitsi ñaña ndusu Sehe Nyoo. ²⁹ Tan cua quita ñi tsitsi ñaña ñi. Tacan tan nyívi tsa javahá tsa vaha cua nandoto ñi tyin coo ñi ñayívi nyitó. Maa tyin nyívi tsa javahá tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

Nu janahá tsi tyin ra Jesús iyó ndatu tsi ra tsa cuhva ra ñayívi nyito coo nyívi

³⁰ Yuhu ña cuví javaha yu tsa javahá yu tsa intuhun ñi maa yu. Yuhu jandaa yu cuatyí nyívi tumaa cuhva tava tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña javahá yu cuhva cuñí maa yu, tyin javahá yu cuhva caahán maa Jutu yu, ra tsa jaquitsí tsi yu. ³¹ Tan tatun juvin ñi maa yu cuví tsa ndaa tsa cuenda yu, nduve yahvi

nyaá tsa ndaa can. ³² Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa. ³³ Nyooho tava tyiñu ndo na ndaca tuhun ra naha tsi ra Juan. Tan tuhun tsa cahan ra, tsa nditsa cuví tsi. ³⁴ Maa tyin yuhu ña tsiñiñuhü tsa cuví rayi tsa ndaa tsa cuenda yu. Maa tyin caahán yu tuhun tsa cahan ra Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo. ³⁵ Ra Juan cuví ra tumaa iin lámpara tsa cayú tan jandunditsín tsi. Tan nyooho juhva ñi quivi cusii iñi ndo tsihin ñuhü nditsin can. ³⁶ Maa tyin yuhu iyó iin tsa ndaa vaha ca tsi yu tan ñavin ca tsa caahan ra Juan. Tyin tandihi tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsi tsi yu. ³⁷ Tacan tucu Jutu yu, ra tsa jaquitsi tsi yu, cuví ra tsa ndaa tsa cuenda yu. Nyooho ñaha ca cuñi ndo ndusu ra, tan ndi ñaha ca nyehe ndo tsi ra. ³⁸ Tan ña ndoó tuhun ra tsa caahán yu tsihin ndo tsitsi añima ndo tyin ña tsinú iñi ndo tyin Nyoo jaquitsi tsi yu. ³⁹ Nyooho tsihin cuenda xaan cahví ndo nu tutu Nyoo, tyin cuñi maa ndo tyin nuu tsi cua ñihi ndo ñayivi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi. ⁴⁰ Tan ny-

ooho ña cuñi ndo quitsi ndo nu nyaá yu tan cuhva yu ñayivi nyito coo ndo.

⁴¹ Yuhu ña nducú yu tsa jacahnu nyivi tsi yu. ⁴² Tyin yuhu tsitó yu tsi ndo tan tsitó yu tyin ña cuñi ndo tsi Nyoo. ⁴³ Yuhu vatsí yu cuenda Jutu yu tan nyooho ña naquihín ndo tsa caahán yu. Maa tyin tatun inga ra cua quitsí tsa cuenda maa ra, ra ícan cua tsinu iñi ndo. ⁴⁴ Nyooho ña cuví tsinu iñi ndo tsi yu tyin cuñi ndo nduvaha ndo nuu nyivi tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó. ⁴⁵ Ña caca iñi ndo tyin cua ndacan yu cuatyí tsaha ndo nuu Jutu yu. Nyooho cuñi maa ndo tyin ley tsa tyaa ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaha ndo tyin ña jacuví ndo ley tsa tyaa ra. ⁴⁶ Tyin tun tsatyin nditsa tsa tsinú iñi ndo tsa cahan ra Moisés, tacan cua tsinu ndihi iñi ndo tsa caahán yuhu. Tyin tuhun yuhu cuví tsa tyaa ra. ⁴⁷ Maa tyin tatun ña tsinú iñi ndo tuhun tsa tyaa ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityi nuu tsihin ra Israel naha ra.

6

Nu jacatsi ra Jesús uhun mil rayi

(Mt. 14.13-21; Mr. 6.30-44; Lc. 9.10-17)

¹ Tsa yaha yacan, tan cuahán ra Jesús inga tsiyo

miñi cahnu tsa nañi Nduitya Ñuhu Galilea. Tan juvin ñi nañi tucu tsi Miñi Tiberias. ² Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhví. ³ Tacan tan ra Jesús ndaa ra iin yucu tan tsinyaá ra ican tsihin ra tsicá tsihin ra. ⁴ Tan tsa cuyatyin cuii tahan tsi quivi vico pascua tsa jacahnú nyivi Israel. ⁵ Tan nyehé ra Jesús tyin cuaha xaan nyivi nyicún tsi ra, tacan tan quitsahá caahán ra tsihin ra Felipe:

—¿Numaa cua jata yo tsa catsi nyivi cuaha ihya? —catyí ra tsihin ra.

⁶ Caahán ñi maa ra tsihin ra Felipe tyin nducú cuhva ra tsi ra náa cua cahan ra, tyin tsa tsitó maa ra Jesús náa cua javaha ra. ⁷ Tacan tan nacaahan ra Felipe tan catyí ra:

—Xuhun tsa quihin yo tsa jahá tyiñu yo tsa uvi cientu quivi, ndi ña cua cutahan can jata yo luxu tsa catsi nyivi ihya —catyí ra Felipe.

⁸ Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tsihin ra Jesús:

⁹ —Ihya nyíi iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihya —catyí ra Andrés.

¹⁰ Tacan tan catyí ra Jesús tsihin ra naha:

—Cahan ndo tsihin tandihi nyivi na cunyecu ñi —catyí ra.

Tan cuaha xaan itya ican tan tsinyecu ñi, uhun mil rayi, [tan sñin maa ñi ñaha tsihin tsa nyihi]. ¹¹ Tacan tan quihin ra Jesús paan can tan tsa yaha tsahá ra tyahvi nyoo tsi Nyoo, tan tsahá ra can tsi ra tsicá tsihin ra. Tan ra can naha ra, tsahá ra naha can tsi tandihi nyivi tsa nyecú can. Juvin ñi tacan icá nyico ra tsihin tyaca can. Tan tsatsi ndaha iñi ñi. ¹² Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihin vaha ndo tsa ñahñu tsa ndoo tyin tacan tan ña tiví tsi —catyí ra tsihin ra naha.

¹³ Naquihin vaha ra naha can, tan jacutu ra naha utsi uvi tyica tsihin tsa ñahñu tsa ndoo tsa uhun taahan paan can. ¹⁴ Tacan tan tsa yaha nyehé nyivi can tsa iyo tsa javahá ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvin ra nyaá tsa quitsi maa nu ñuhu ñayivi ihya —catyí ñi.

¹⁵ Maa tyin tsa tuví iñi ra Jesús tyin cuñi ñi tsa quihin ñi tsi ra tsihin tsa ñiñi tyin cuví ra rey cuenda ñi, tacan tan cuahán nyico ra jiñi yucu nu sucun ca tyin cunyi intuhun ñi maa ra.

Nu tsicá ra Jesús nu nduitya (Mt. 14.22-27; Mr. 6.45-52)

¹⁶ Tsa cunaaha, nuu ra tsicá tsihin ra Jesús yuhu miñi can. ¹⁷ Tan quihví ra naha tsitsi yutun ndoo tyin cua yaha sava ra naha mahñu miñi can tan cua tsa ra naha ñuu Capernaum. Tsa cunaaha tan ra

Jesús ñaha ca maa tsaá ra.
 18 Tacan tan tsaá tatyí ñihi. Tan iyo nduvitá ndutya miñi can. 19 Tsa tsa yaha ra naha uhun a iñu kilómetro tsihin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyin tsa cua cuyatyin ra nu cuahán yutun ndoo can, nayuhvi xaan ra naha. 20 Maa tyin catyí ra Jesús tsihin ra naha:

—¡Maa yu cuví, ña nayuhvi ndo!

21 Tacan tan tsaá ra naha quihvi ra Jesús tsitsi yutun ndoo can. Tan iin yaha ñi tsaá ra naha yuhu miñi nu cuahán ra naha.

Nu nanducú nyivi tsi ra Jesús

22 Tsa tuvi inga quivi tan tsito nyivi tsa ndoo inga tsiyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsito ñi tyin ña cuahán ra Jesús tsihin ra naha. 23 Maa tyin tsaá taahan ca yutun ndoo tsa quee ñuu Tiberias yatyin ñi nu nacuhva Jutu Mañi yo tyahvi nyoo tsi Nyoo tan tsatsi nyivi paan. 24 Tacan tan tsa nyehe nyivi tyin nduve ra Jesús tan ndi ra tsicá tsihin ra, quihvi ñi tsitsi yutun ndoo tsa tsaá tan cuahán ñi nda ñuu Capernaum cua nanducu ñi tsi ra.

Ra Jesús cuví paan tsa tsahá ñayivi nyito coo yo

25 Tsa tsaá ñi inga tsiyo miñi can, nañihí ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaá un ihya? —catyí ñi tsihin ra.

26 Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyoocho nanducú ndo tsi yu maa tyin ñavin cuenda tsa nyehe ndo tsa iyo tsa javaha yu. Nanducú ndo tsi yu tyin tsatsi ndo tan ndaha iñi ndo. 27 Ña jaha tyiñu ndo cuenda tunyee iñi tsa tsatsi ndo tsa cua ndihi ñi maa, jaha tyiñu ndo cuenda tunyee iñi tsa catsi ndo tsa ña cua ndihi tan tsahá tsi ñayivi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tava tyiñu ra tsi yu tyin yuhu cuví Rayi tsa quee nda gloria —catyí ra Jesús.

28 Tacan tan quitsaha tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñi Nyoo? —catyí ñi.

29 Tacan tan catyí ra Jesús tsihin ñi:

—Tsa cuñi Nyoo javaha ndo, cuví tsa tsinu iñi ndo tsa caahán yuhu, ra tsa jaquitsi ra —catyí ra Jesús tsihin ñi.

30 Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu iñi ndi tsa caahán un? 31 Tsi tsahnu ndi tsatsi ñi maná nu tsiqui, tumaa tsa caahán tuhun Nyoo tyehen: “Andivi quee

paan tsatsj nyivi jahā Nyoo”
—catyí ñi tsihin ra Jesús.

³² Tan nacahan ra Jesús tan
catyí ra:

—Tsa nditsa caahán yu tsi-
hin ndo. Ñavin ra Moisés
tsahā paan tsa quee andivi
tsatsj ñi, tyin maa Nyoo Jutu
yu cuví ra tsahá paan nditsa
tsa quee andivi. ³³ Tyin paan
tsa tsahá Nyoo, yacan cuví ra
tsa quee andivi. Tan juvin
ra cuví ra tsahá ñayivi nyito
coo nyivi iyó nu ñuhu ñayivi
—catyí ra Jesús.

³⁴ Tacan tan quitsahā catyí
ñi tsihin ra:

—Taa, cūhva paan can
catsi ndi tandihi ñi quivi
—catyí ñi.

³⁵ Tan nacahan ra Jesús tan
catyí ra tsihin ñi:

—Yuhu cuví paan tsa tsahá
tsa coo nyito añima ndo. Nyivi
nyicún tsi yu ña cua cusoco
ca ñi, tan ñi tsinú iñi tsa
caahán yu ña cua na ityi iñi ñi.

³⁶ Maa tyin tumaa tsa caahán
yu tsihin ndo, nyehé vaha
ndo tsi yu, maa tyin ña cuñí
ndo tsinu iñi ndo tyin juvin
yu cuví ra tsa cuví jatyinyee
tsi ndo ³⁷ Tandihi nyivi tsa
tsahā Nyoo Jutu yu tsi yu,
nyicún ñi tsi yu, tan ñi tsa
nyicún tsi yu, naquihín vaha
yu tsi ñi. ³⁸ Tyin yuhu tsa
quee andivi; vatsí yu vatsí
javahá yu cūhva cuñí ra tsa
jaquitsj tsi yu. Ña vatsí yu
vatsí javaha yu cūhva cuñí ñi
maa yu. ³⁹ Tan cūhva cuñí
ra tsa jaquitsj tsi yu, yacan
cuví tsehe: tsa ña cunaa ndi
intuhun nyivi tsa tsahá ra tsi
yu, tan janandoto yu tsi ñi nu

cua cundihí quivi. ⁴⁰ Jutu yu,
ra tsa jaquitsj tsi yu, cuñí ra
tyin tandihi nyivi tsa cutuñi
iñi tyin Sehe Nyoo cuví tsi yu,
tan tsinu iñi ñi tsa caahán yu,
cua coo ñi ñayivi nyito tsa ña
cua naa maa. Tan juvin ñi yu
cua janandoto tsi ñi nu cua
cundihí quivi —catyí ra Jesús
tsihin ñi.

⁴¹ Tsa cuenda tsa cahan
ra Jesús yacan, tan quitsahā
caahán nyaa nyivi Israel tsi
ra tyin catyí ra: “Yuhu cuví
paan tsa quee andivi”, catyí
ra. ⁴² Tacan tan quitsahā
catyí ñi:

—¿A ñavin ra Jesús sehe ra
José cuví ra ihya? Yoo tsitó
vaha yo tsi jutu ra tan tsi sihi
ra. ¿Nacaa tsa catyí ra tyin
andivi quee ra? —catyí ñi.

⁴³ Tacan tan catyí ra Jesús
tsihin ñi:

—Jandihí ndo tsa caahán
nyaa ndo. ⁴⁴ Yoñi maa nyivi
cuví quitsi quitsi nyicún tsi
yu tatun ñavin Jutu yu, ra
tsa jaquitsj tsi yu, caná tsi
ñi. Tan cua janandoto yu
tsi ñi nu cua cundihí quivi.

⁴⁵ Nu libru tsa tyaá ra cuví
ndusu yuhu Nyoo caahán tsi
tyehen: “Nyoo cua jacuaha
ra tsi tandihi nyivi” catyí tsi.
Yacan cuenda nyivi tsa tyaá
soho tuhun tsa caahán Nyoo
Jutu yu tan cutuhvá ñi tsa
caahán ra, juvin ñi nyicún tsi
yu.

⁴⁶ Ñavin tsa tyin nyehé ñi
tsi Nyoo Jutu yu, tyin yoñi
nyehé tsi ra. Intuhun ñi maa
yu nyehé tsi ra. Tan ju-
vin yu cuví ra tsa quee nu
nyaa ra. ⁴⁷ Tsa nditsa catyí

yu tsihin ndo tyin nyivi tsa tsinú iñi tsa caahán yu tsa iyó ñi ñayivi nyito tsa ña cua naa maa. ⁴⁸ Yuhu cuví paan tsa tsahá tsa coo nyito añima ñi. ⁴⁹ Tsii tsaahnu ndo tsatsi ñi maná nu tsiqui, maa tyin juvin ñi tsihi ñi. ⁵⁰ Maa tyin yuhu, tuhun paan tsa quee andivi caahán yu tsihin ndo, tyin nyivi tsa cua catsi paan can, ña cua cúu ñi. ⁵¹ Juvín ñi maa yu cuví paan nyito tsa quee andivi. Nyivi tsa cua catsi paan ihya ña cua cundihi tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayivi tsa iyó yu tsa cuenda tandihi nyivi iyó nu ñuhu ñayivi —catyí ra Jesús tsihin ñi.

⁵² Tacan tan nyivi Israel can quitsaha natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

⁵³ Tan catyí ra Jesús:

—Tsa nditsa catyí yu tsihin ndo, tyin yuhu cuví Rayi tsa quee nda gloria, tan tatun nyooho tan ña cua catsi ndo cuñu ñuhu yu, tan ña coho ndo niñi yu, ña cuvi coo ndo ñayivi nyitó. ⁵⁴ Nyivi tsatsi cuñu ñuhu yu tan tsihi ñi niñi yu, iyó ñi ñayivi nyito tsa ña cua naa maa. Tan yuhu cua janandoto yu tsi ñi nu cua cundihi quivi. ⁵⁵ Tyin cuñu ñuhu yu yacan cuví paan tsa nditsa tsa taahán tsi catsi ñi, tan niñi yu cuví vinu tsa nditsa tsa taahán tsi coho ñi. ⁵⁶ Nyivi tsatsi cuñu ñuhu yu tan tsihi ñi niñi yu, iin ñi

cuví ñi tsihin yu. Tan iin ñi cuví yu tsihin ñi. ⁵⁷ Jutu yu, ra tsa jaquitsi tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyivi tsatsi cuñu ñuhu yu, cua coo ñi tsihin tunyee iñi tsa iyó tsi yu. ⁵⁸ Tuhun paan tsa quee andivi caahán yu. Paan ihya ñavin tumaa maná tsa tsatsi tsii tsaahnu yo cuví tsi, tyin juvin ñi tsihi ñi. Nyivi tsatsi paan tsa cuví cuñu ñuhu yu, ña cua cundihi maa tsa coo ñi —catyí ra Jesús.

⁵⁹ Juvín yacan jacuaha ra Jesús nu ndu iin nyivi tsitsi vehe ñuhu ñuu Capernaum.

⁶⁰ Cuaha xaan nyivi nyicún tsi ra Jesús. Tan cuhva tsa tsiñi ñi yacan catyí ñi:

—Tuhun tsa caahán ra ihya, yi xaan naquihin vaha yo itsi. Yoñi maa cua tsinu iñi tsa caahán ra —catyí ñi.

⁶¹ Tacan tan tuví iñi ra Jesús tyin ña cuñi ñi naquihin ñi tsa caahán ra. Tan tsicá tuhun ra tsi ñi:

—¿A ndasi cuñi ndo tsa caahán yu ihya? ⁶² Tan ¿náa cua javaha ndo tatun nyehe ndo tsi yuhu Rayi tsa quee nda gloria nandaa nyico yu inga tsaha ityi nu quee yu?

⁶³ Tatyí Ii Nyoo tsahá ñayivi nyito. Tan cuñu ñuhu, ña jatyinyeé tsi tsa coo yo ñayivi can. Tan tsa caahán yuhu tsihin ndo, Tatyí Ii Nyoo cuví tsi tan tsahá tsi tsa coo nyitó añima ndo. ⁶⁴ Maa tyin yihí ndo ña tsinú iñi ndo tsi yu —catyí ra Jesús.

Tyin nda quivi jihna tan tsa tsitó maa ra yoo ña cua tsinú iñi tsi ra tan yoo cua xico tsi ra. ⁶⁵ Tan catyí ra:

—Yacan cuenda catyí yu tsihin ndo tyin yoñi nyivi cuví quitsi nyicun tsi yu tatun ñavin maa Nyoo Jutu yu caná tsi ñi —catyí ra Jesús.

⁶⁶ Nda quivi can, tan cuaha xaan nyivi nyicún tsi ra Jesús nacoq ñi tsi ra. Tan ña tsicá ca ñi tsihin ra. ⁶⁷ Tacan tan tsica tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñi ndihi tucu nyoooho cuhun ndo? —catyí ra tsihin ra naha.

⁶⁸ Maa tyin nacahan ra Simón Pedro tan catyí ra:

—Jutu Mañi yu, ¿yoo cunyi-cun ndi? Tan intuhun ñi maa un caahan tuhun ñayivi nyito tsa ña cua naa maa. ⁶⁹ Nyuhu tsinú iñi ndi, tan tsitó ndi tyin yooho cuví ra Cristo Sehe Nyoo nyito.

⁷⁰ Tan nacahan ra Jesús tan catyí ra:

—¿A ñavin yuhu nacatsi tsi tandihi tsa utsi uvi ndo? Tan intuhun ndo yihí nu ña vaha —catyí ra.

⁷¹ Tuhun tsa caahan ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan iñi tsi ra, vasu iin ra tsa utsi uvi can cuví ra.

7

Nu ña tsinú iñi yañi ra Jesús tsi ra

¹ Tsa yaha yacan, tan nyii ra Jesús tsicá nuu ra nu cuví

Galilea. Ña cuñi ra cuhun ra nu cuví Judea tyin ra cuví ityi nuu tsihin nyivi Israel can naha ra cuñi ra naha cahñi ra naha tsi ra. ² Tan tsa cuyatyin quivi vico tsa jacahnú nyivi Israel ndihi ñi cuiya. Tan nañi tsi Vico Tyahva. ³ Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyivi nyicún tsi un tsa iyó ndacan nyehe ñi tyiñu javahá un. ⁴ Tyin tatun cuñi yo tsa coto nyivi tsi yo, ña javahá xeehe yo tsa javahá yo. Tan yooho tatun nditsa tsa javahá un, javaha can nuu tandihi nyivi —catyí tandihi yañi ra.

⁵ Tacan catyí ra naha tyin ndi tsa cuví ra naha yañi ra tan ña tsinú iñi ra naha tsi ra. ⁶ Tacan tan catyí ra Jesús tsihin ra naha:

—Ñaha ca tsaa hora tsa cuhun yuhu. Maa tyin nyoooho ndáa quivi ñi cuví cuhun ndo. ⁷ Tyin vaha cuñi nyivi nyehé ñi tsi ndo, maa tyin yuhu ndasi cuñi ñi nyehé ñi tsi yu tsa cuenda tyin caahan catsi yu tsihin ñi tyin ña vaha tsa javahá ñi. ⁸ Cuaahan nyoooho vico can. Yuhu ña cuhun yu tyin ñaha ca tsaa hora tsa taahan tsi cuhun yu —catyí ra.

⁹ Yaha can tan ndoo ra nu cuví Galilea.

Nu nyii ra Jesús nu iyó vico Tyahva

¹⁰ Tsa yaha cuahan yañi ra Jesús vico can, tsahan cuahan ndihi ra, maa tyin cuahan xeehe ñi ra. ¹¹ Tan ra cuví ityi

nuu tsihin nyivi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyii ra can? —catyí ra naha.

12 Tan caahán nyivi yucú vico can tuhun ra. Yihí ñi catyí ñi: “Iin ra vaha cuví ra.” Tan inga ñi catyí ñi: “Ña vaha ra, jandaví ñaha ra tsi nyivi”, catyí ñi.

13 Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

14 Tsa cusava iyó vico tan tsaá ra Jesús tsitsi vehe ñuhu cahnu tan quitsahá jacuaha ra tsi nyivi. 15 Tan ra cuví ityi nuu can iyó cuñi ra naha tan quitsahá natuhun tahan ra naha:

—¿Nacaa tyin tsitó ra ihya tan ña cahví ra? —catyí ra naha.

16 Tan nacahán ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsi tsi yu cuví tsi. 17 Tatun yihí nyooho tsa cuñi javaha cuhva cuñi Nyoo, cua coto ndo tyin cuenda Nyoo jacuahá yu tan ñavin tsa cuenda maa yu. 18 Nyivi tsa caahán cuenda maa ñi, caahán ñi tyin cuñi ñi tsa jacahnu nyivi tsi ñi. Maa tyin ra nducú tsa jacahnu nyivi tsi Nyoo, ra tsa jaquitsi tsi ra, ra ican caahán tsa nditsa. Tan ña jandaví ñaha ra.

19 ¿A ña nditsa tyin ra Moisés tsaá ra ley tsi ndo?

Maa tyin ndi intuhun nyooho tan ña tyaá yahvi ndo ley can. ¿Nacuenda cuñi ndo cahñi ndo tsi yu? —catyí ra.

20 Tan nacahán nyivi tan catyí ñi tsihin ra:

—Tatyí ña vaha yihí tsi yooho. Yoñi cuñi cahñi tsi un —catyí ñi tsihin ra.

21 Tan catyí ra Jesús:

—Tsacatyí tsa javahá yu tsa iyo quivi quitatu yo, yacan ndasi cuñi ndo nyehé ndo tsi yu. 22 Maa tyin ra Moisés catyí ra tsihin ndo tyin coo ndo tsihin tsa cun-yaa tuñi Nyoo tsi sehe yii ndo. Vasu ñavin ra quitsahá tsihin tuhun can, maa tyin nyivi cuví nyivi ra ityi tsata, jihna ca ñi javahá tacan. Yacan cuenda javahá ndo can vasu taahán tsi quivi quitatu yo. 23 Tan vityin, vaha tatun tsa cuenda tsa ña cuñi ndo cumañi ndo ley ra Moisés tan javahá ndo tuhun can vasu quivi quitatú yo cuví. Maa tyin tatun tacan javahá ndo, ¿nacuenda tyin cuxaan ndo tsi yu tsa janduvahá yu tsi ra can quivi quitatú yo? 24 Ña tyaá ndo cuatyí siqui nyivi tatun ña tsitó vaha ndo náa javahá ñi. Cuatu ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

Nu cahán ra Jesús tuhun maa ra

25 Tacan tan juhva nyivi iyó Jerusalén, quitsahá tsicá tuhun ñi:

—¿A ñavin ra ihya nanducú xaan ra naha tyin cua cahñi

ra naha tsi ra? ²⁶ Caahán nditsin ra tsihin nyivi. Tan yoñi caahán náa caahán tsihin ra. Vasiqúi tsinú ndihi maa iñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsi Nyoo. ²⁷ Yoo tsitó vaha yo nu quee ra ihya, tan quivi quitsi ra Cristo yoñi maa cua coto numaa ityi cua quee ra —catyí ñi.

²⁸ Ra Jesús nyii ra tsitsi vehe ñuhu jacuahá ra, tan tsitó ra tsa natuhún nyivi, yacan cuenda ñihi cahán ra tan catyí ra:

—¡Nyooho cuñí maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsi tsi yu, ra tsa cuví tsa nditsa. Nyooho ña nacotó ndo tsi ra. ²⁹ Yuhu nacotó yu tsi ra tyin cuenda ra vatsí yu, tan maa ra jaquitsi tsi yu —catyí ra Jesús.

³⁰ Tacan tan cuñí ra naha tyihi ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tñin ra naha tsi ra tsa cuenda tyin ñaha ca tahan tsi quivi tsa taahán maa tsi tñin ra naha tsi ra. ³¹ Maa tyin cuaha xaan nyivi tsinú iñi tsi ra. Tan catyí ñi:

—Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

Nu jacuhun ra cuví fariseo naha ra tsi ra vitya tyin tñin ra naha tsi ra Jesús

³² Tsa tsiñi ra fariseo naha ra tsa caahán nyivi tuhun ra Jesús, maa ra naha tan ra cuví ityi nuu tsihin ra jutu naha ra, jacuhun ra naha vitya cuenda vehe ñuhu, na tñin ra naha tsi ra Jesús. ³³ Tacan tan catyí ra Jesús:

—Juhva cuii ña quivi cua cunyaa yu tsihin ndo. Yahá can tan cuacunuhu yu nu nyaá ra tsa jaquitsi tsi yu. ³⁴ Nyooho cua nanducu ndo tsi yu. Maa tyin ña cua nañihi ndo tsi yu. Tyin ña cua cuví cuhun ndo nu cua cunyaa yu —catyí ra Jesús.

³⁵ Tacan tan quitsaha natuhún tahan ra cuví ityi nuu tsihin nyivi Israel naha ra:

—¿Numaa cua cuhun ra ihya tsa ña cua nañihi yo tsi ra? ¿A cuhun ra nu iyó ra Israel ñuu Grecia naha ra tyin jacuahá ra tsi nyivi iyó Grecia can? ³⁶ ¿Náa cuñi tsi catyi tsa caahán ra tsihin yo? Tyin catyi ra: “Cua nanducu ndo tsi yu maa tyin ña cua nañihi ca ndo tsi yu tyin ña cua cuví cuhun ndo nu cua cunyaa yu” —tacan caahán yuhu tahan ra naha tuhun ra Jesús.

Nyivi tsinú iñi tsi Nyoo cua coo Tatyí li ra añima ñi

³⁷ Quivi ndihi tsicoo vico, yacan cuví quivi tsa ñiñi ca. Tan quivi can nduvita ra Jesús tan ñihi caahán ra tan catyí ra:

—Tatun ndáa nyooho na ityi iñi ndo, ñaha ndo tan tsinu iñi ndo tsa caahán yu. ³⁸ Tyin nyivi tsa tsinú iñi tsa

caahán yu, cua cunu ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

³⁹ Maa tyin tsihin yacan cuñí ra catyí ra tyin ñi tsinú iñi tsi ra cua ñihi ñi Tatyí Ii Nyoo, tyin quivi can ñaha ca quitsi Tatyí Ii Nyoo tyin ra Jesús, ñaha ca cunuhu ra nda gloria nu cua jacahnu Jutu ra tsi ra.

Nu natahvi sava nyivi tsa cuenda ra Jesús

⁴⁰ Juhva nyivi tsa tsiñi yacan, catyí ñi:

—Nditsa tsa cuii tyin ra ihya cuví ndusu yuhu Nyoo tsa nyaá tsa cua quitsi —catyí ñi.

⁴¹ Tan inga ñi catyí ñi:

—Ra ican cuví ra Cristo ra tsa jaquitsi Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuví ra Cristo? ⁴² Tyin nu tutu Nyoo catyí tsi tyin ra Cristo cua cuví ra nyivi tata ra rey David, tan ra ñuu Belén tsa canyí nu cuví Galilea cua cuví ra, tumaa ra David —catyí ñi.

⁴³ Tacan tan nyivi can natahvi sava ñi tsa cuenda ra Jesús. ⁴⁴ Yihí ñi cuñí ñi quihin ñi tsi ra tan tyihi ñi tsi ra tsitsi vehe caa. Maa tyin yoñi tñin tsi ra.

Ra cuví ityi nuu vehe ñuhu naha ra ña tsinú iñi ra naha tsi ra Jesús

⁴⁵ Tacan tan ra vitya tsa iyó vehe ñuhu cahnu can, cuanuhu ra naha nu yucú ra

fariseo naha ra tsihin ra cuví ityi nuu tsihin ra jutu naha ra. Tan tsica tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

⁴⁶ Tan catyí ra vitya can naha ra:

—¿Ndi intuhun tsaha tan yoñi tuhva caahán tumaa caahán ra can! —catyí ra naha.

⁴⁷ Tacan tan catyí ra fariseo naha ra tsihin ra vitya can naha ra:

—¿A jandavi ñaha ndihi ra can tsi nyooho? ⁴⁸ Nyehhe ndo tyin ndi intuhun ra cuví ityi nuu tsihin ndi, tan ra cuví fariseo naha ra, tan ña tsinú iñi ra naha tsi ra can. ⁴⁹ Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

⁵⁰ Tacan tan ra Nicodemo, ra tsa tsahan nu nyii ra Jesús tsa tsacuaa, cuví ndihi tucu ra fariseo, tan catyí ra tsihin ra naha:

⁵¹ —Catyí ley tyin ña cuví tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javaha ra —catyí ra tsihin ra naha.

⁵² Tacan tan nacahan ra naha tan catyí ra naha tsihin ra:

—¿A juvin ñi ra Galilea cuví ndihi tucu yooho? Cahvi nu tutu Nyoo tan nyehhe un, tyin ndi intuhun ra cuví ndusu yuhu Nyoo tan ña nyaá tsi tsa quitsi ra nda Galilea —catyí ra naha.

Ñaha tsa quituvi tsihin rayi tsa ñavin yi ña cuví

53 Tacan tan cuanuhu intuhun ra naha nda yuvehe ra naha.

8

1 Maa tyin ra Jesús cuahán ra yucu Olivo. 2 Tsa cunditsin inga quivi, cuahán nyico ra Jesús inga tsaha vehe ñuhu cahnu. Tan tandihi nyivi natuhva ñi nu nyii ra. Tan tsinyaá ra tan quitsaha caahán ra tsihin ñi. 3 Tacan tan ra jacuahá ley vehe ñuhu tan ra cuví fariseo naha ra tsaá ra naha tsihin iin ñaha iyó yi tyin tiin ra naha tsi ña nu tsicoo cuatyí ña tsihin inga rayii. Tan tyaa ra naha tsi ña mahñu nyivi tsa nyecú can. 4 Tan quitsaha catyí ra naha tsihin ra Jesús:

—Maestro, tiin ndi tsi ñaha ihya nu tsicoo cuatyí ña tsihin inga rayii. 5 Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nácaa catyí un? —catyí ra naha tsihin ra.

6 Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí siqui ra. Tacan tan tsinyaá tyayii ra Jesús nu ñuhu tan quitsaha tyaa ra letra nu ñuhú tsihin nundaha ra. 7 Maa tyin nducú tuhun ca ra naha tsi ra, tacan tan nduvita nyityi ra tan catyí ra tsihin ra naha:

—Nyooho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

8 Tan tsinyaá tyayii nyico ra tan quitsaha jañihí ca ra tyaa

ra letra nu ñuhu. 9 Tsa tsiñi ra naha tsa caahán ra tacan, tuví iñi ra naha tyin iyó tucu cuatyí maa ra naha. Tan quitsaha quitá intuhun intuhun ra naha, jihna ca ra tsahnu naha ra quitá. Cuhva tsa ndihí ra naha quitá cuahán tan ndoo intuhun ña maa ra Jesús tsihin ñaha can mahñu nu nyecú nyivi can. 10 Tacan tan nduvita nyityi ra Jesús tan nyehe ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaa cuatyí siqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

11 Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

Ra Jesús cuví tsa nditsin tsa jandunditsin añima nyivi

12 Tacan tan cahan nyico ra Jesús tsihin nyivi inga tsaha, tan catyí ra tsihin ñi:

—Yuhu cuví ra tsa jandunditsin añima nyivi iyó nu ñuhu ñayivi. Yoo nyivi tsa nyicún tsi yu, cua coo ñi iin ñayivi nyito nu nditsin. Tan ña cua caça nuu ñi nu naa —catyí ra Jesús tsihin ñi.

13 Tacan tan ra cuví fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

¹⁴ Nacahan ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi quee yu tan numaa ityi cua cuhun yu. Maa tyin nyooho ña tsitó ndo numaa ityi quee yu tan numaa ityi cua cuhun yu.

¹⁵ Nyooho yatyi xaan caahán ndo tsa caa nyivi. Maa tyin yuhu, ña caahán yu tsa caa ñi. ¹⁶ Tyin tatun cahan yu tsa caa nyivi, tsa nditsa cua cahan yu. Tyin ñavin intuhun ñi maa yu nyehé tsa iyó aña ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu. ¹⁷ Nu ley nyooho nyaá tyin tatun uvi ra tsahá tsa ndaa, cuñi tsi tsinú iñi yo tsa caahán ra naha. ¹⁸ Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsi tsi yu, cuví inga tsa ndaa —catyí ra Jesús tsihin ra naha.

¹⁹ Tacan tan tsicá tuhun ra naha tsi ra:

—¿Numaa nyii jutu un?

Tan catyí ra Jesús:

—Nyooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó ndo tsi yu, coto ndihi ndo tsi Jutu yu —catyí ra.

²⁰ Tuhun ihya cahan ra Jesús tsitsi tsa jacuahá ra tsitsi vehe ñuhu cahnu, nu

nyii caja nu tyihí nyivi xuhun. Maa tyin yoñi tyihí tsi ra vehe caa, tyin ñaha ca tahan tsi quivi tsa taahán tsi cuhun ra.

“Nu cuhun yuhu ña cua cuvi cuhun ndo”, catyí ra Cristo

²¹ Tacan tan quitsaha caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siqui ndo. Tyin nu cua cuhun yuhu, nyooho ña cua cuvi cuhun ndo —catyí ra Jesús tsihin ra naha.

²² Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuvi cuhun yo nu cuahán ra —catyí ra naha.

²³ Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi siqui quee yu. Nyooho cuenda ñuhu ñayivi ihya cuví ndo. Maa tyin yuhu ñavin cuenda nu ñuhu ñayivi ihya cuví yu. ²⁴ Yacan cuenda catyí yu tsihin ndo tyin cua cúu ndo tan cua ndoo cuatyí ndo siqui ndo. Tyin tatun ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí ndo siqui ndo quivi cúu ndo —catyí ra Jesús tsihin ra naha.

²⁵ Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cuví yooho?

Nacahan ra Jesús tan catyí ra:

—Tsa yaha caħan yu tsihin ndo nda quiví jihna. ²⁶ Cuaha xaan ca tsa ndi cumañi caħan yu tsihin ndo, tan ndi cumañi caħan yu cuhva iyó ndo. Maa tyin tsa caahán yu tsihin nyiví iyó nu ñuhu ñayiví, cuví tsi tsa tsiñi yu tsa caahán ra tsa jaquitsi tsi yu. Tan maa ra caahán tsa nditsa —catyí ra Jesús.

²⁷ Maa tyin ra Israel naha ra ña cutuñi iñi ra naha tatun tuhun Nyoo Jutu yo caħan ra tsihin ra naha. ²⁸ Yacan cuenda catyí ra tsihin ra naha:

—Cua tyaa ndo tsi yuhu, ra cuví Rayii tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyiñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu. ²⁹ Tyin Jutu yu, ra tsa jaquitsi tsi yu, nyii ra tsihin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñí ra —catyí ra Jesús.

³⁰ Tsa caħan ra Jesús yacan, cuaha xaan ra naha quitsaha tsinú iñi tsi ra.

Nyiví cuví sehe Nyoo tan nyiví javahá tsa caquiñi

³¹ Tacan tan catyí ra Jesús tsihin nyiví Israel, tsa quitsaha tsinú iñi tsi ra:

—Tatun nyooħo tan jañihi ca ndo tyaa yahvi ndo cuhva jacuahá yu tsi ndo, cua tsa ndo cuví ndo nyiví tsa nditsa yihí cuenda yu. ³² Tan cua coto ndo tsa nditsa. Tan tsa

nditsa can cua tava nuña tsi ndo —catyí ra.

³³ Tan nacahán ra naha tan catyí ra naha:

—Nyuhu nyiví tata ra Abraham cuví ndi. Ndi iin tsaha tan ñaha ca cuví ndi musu nyiví. ¿Nacaa tsa catyí yooħo tyin quita nuña ndi? —catyí ra naha tsihin ra.

³⁴ Tan catyí ra Jesús:

—Tsa nditsa catyí yu tsihin ndo tyin tandihí nyiví javahá tsa caquiñi, musu cuenda tsa caquiñi cuví ñi. ³⁵ Iin musu ña ndoo cuii ra vehe tsitoho ra. Maa tyin ra cuví sehe tsitoho vehe can, ndoo cuii ra vehe jutu ra. ³⁶ Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuii tyin ña cua cundaca ñaha ca tsa ña vaha tsi ndo. ³⁷ Tsa tsitó yu tyin tata ra Abraham cuví ndo. Maa tyin yihí ndo cuñí ndo cahñi ndo tsi yu, tyin ña naquihín vaha ndo tsa caahán yu. ³⁸ Yuhu caahán yu tsa janahá Jutu yu tsi yu. Tan nyooħo javahá ndo tsa caahán ra cuví jutu ndo tsihin ndo —catyí ra tsihin ra naha.

³⁹ Tan nacahán ra naha tan catyí ra naha:

—Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra. ⁴⁰ Maa tyin nyooħo, vasu caahán yu tsihin ndo tsa nditsa tsa janahá Nyoo tsi yu, nyooħo cuñí ndo cahñi ndo tsi yu. ¡Ra Abraham ña javahá

ra tacan! ⁴¹ Nyooho javahá ndo tumaa javahá jutu ndo —catyí ra tsihin ra naha.

Tacan tan nacahan ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

⁴² Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñi ndo tsi yu. Tyin yuhu quee yu nu nyaá ra tan tsaá yu ihya. Ña vatsí yu cuenda maa yu, tyin maa Nyoo jaquitsi tsi yu. ⁴³ ¿Nacuenda ña cutuñí iñi ndo tsa caahán yu tsihin ndo? Tsa cuenda tyin ña cuñí ndo tyaa soho ndo tsa caahán yu. ⁴⁴ Cuihna cuví jutu ndo. Tan sehe nu tsi ndo. Tan cuñí ndo javaha ndo cuhva cuñí nu. Tan nu ña vaha can cuví nu tsahñí nyivi nda quivi jihna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyivi tyin cuñí nu tsa coo ñi cuhva iyó nu tyin vatya xaan nu. Tan jutu nyivi vatya cuví nu. ⁴⁵ Tan yuhu caahán yu tsa nditsa, maa tyin nyooho ña tsinú iñi ndo tsa caahán yu. ⁴⁶ ¿Ndáa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú iñi ndo tsi yu? ⁴⁷ Nyivi cuenda Nyoo tyaa soho ñi tuhun caahán ra. Maa tyin nyooho ñavin nyivi cuenda Nyoo cuví ndo, yacan cuenda ña cuñí ndo tyaa soho

ndo tsa caahán yu —catyí ra Jesús.

Ra Cristo, tsa iyó maa ra nda ndi cumañi ca coo ra Abraham,

⁴⁸ Tacan tan catyí ra Israel naha ra tsihin ra:

—¿A ña nditsa tyin yooho ra ñuu Samaria cuví un, tan yihí tatyí ña vaha tsi un? —catyí ra naha tsihin ra.

⁴⁹ Tan nacahan ra Jesús tan catyí ra:

—Nduve tatyí ña vaha yihí tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu. ⁵⁰ Yuhu ña nducú yu tsa jacahnu nyivi tsi yu, maa tyin iyó iin ra nanducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu. ⁵¹ Tsa nditsa catyí yu tyin nyivi tsa tyaa yahvi tsa caahán yu ña cua tsa tuhun tsihihí añima ñi —catyí ra Jesús tsihin ra naha.

⁵² Tacan tan nacahan ra Israel can naha ra tan catyí ra naha:

—Vityin tsitó vaha ndi tyin yihí tatyí ña vaha tsi un. Tyin ra Abraham tan tandihí ca ra cuví ndusu yuhu Nyoo tsihi ra naha. Tan yooho catyí un tyin nyivi tyaa yahvi tsa caahán un ña cua cúu ñi. ⁵³ ¿A cahnu ca ra cuví yooho tan ñavin ca ra Abraham jutu yo? Maa ra tsihi ra tan tacan tucu ra cuví ndusu yuhu Nyoo. ¿Yóo ra cuví yooho cuñí maa un? —catyí ra naha tsihin ra.

⁵⁴ Tan nacahan ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyooho tuhun tyin Nyoo ndo cuví tsi ra. ⁵⁵ Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyooho. Maa tyin yuhu nditsa tsa nacotó yu tsi ra, tan tyaá yahvi yu tsa caahán ra. ⁵⁶ Ra Abraham tsii tsaahnu yo sii xaan cuñi ra tyin cua nyehe ra quivi cua quitsi yuhu nu ñuhu ñayivi. Nyehe ra quitsi yu tan sii xaan cuñi ra —catyí ra Jesús tsihin ra naha.

⁵⁷ Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, itan catyí un tyin nyehe un tsi ra Abraham!

⁵⁸ Tan nacahan ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

⁵⁹ Tacan tan quihin ra naha yuu tyin cua cañi ra naha tsi ra Jesús. Maa tyin iin yaha ñi quihvi xeehe ra tan yaha ra mahñu ra naha tan quita ra tsitsi vehe ñuhu can cuahán ra.

9

Nu janduvaha ra Jesús tsi iin ra cuaa nda cacu ra

¹ Cuhva tsa yaha ra Jesús iin nu yaha ra, nyehe ra tsi iin ra cuaa nda cacu ra. ² Tan quitsaha tsicá tuhun ra tsicá tsihin ra tsi ra:

—Maestro, ¿nacuvi tyin cuaa ra ihya cacu ra? ¿A tsa cuenda cuatyí jutu ra tan sihi ra, o tsa cuenda cuatyí maa ra? —catyí ra naha tsihin ra.

³ Tan nacahan ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee iñi ra tsi nyivi tsa cuenda ra can. ⁴ Tsa tsinu cahñi, cuñi tsi tsa javaha yu tyiñu ra tsa jaquitsi tsi yu. Tyin tsa yatyin cuii cua cuaa tan ña cua cuví ca jaha tyiñu yo. ⁵ Tsa ndi nyii yu nu ñuhu ñayivi ihya, ñuhu jandunditsín [cuenda nyivi iyó] nu ñuhu ñayivi ihya cuví yu.

⁶ Tsa yaha tsa cahan ra Jesús tacan, tan tiví sii ra nu ñuhu. Tan jatyi ra luxu nyahyu tsihin sii ra tan tyaa ra tinuu ra cuaa can. ⁷ Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sivi can cuñi tsi catyí: “Jacuhun Yu Tsi Un.”

Tacan tan ra cuaa can tshahan ra tsinacatya ra nuu ra. Tan cuhva tsa tsa nyico ra, tsa nyehé ra. ⁸ Tacan tan nyivi iyó yatyin yuvehe ra, tan nyivi tsa nyehe tsi ra tsa ndi cuaa ra catyí ñi:

—¿A ñavin ra ihya cuví ra tuhvá tsinyaá tsicán xuhun? —catyí ñi.

⁹ Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

¹⁰ Tacan tan quitsahá tsicá tuhun ñi tsi ra:

—¿Tan nácaa tyin cuví nyehé un vityin? —catyí ñi.

¹¹ Tan catyí ra:

—Ra tsa nañí Jesús, ra ican jatyi nyahyu tan tyaá ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan yu. Tan tsa yahá nacatya yu nuu yu tan nanyehe yu —catyí ra tsihin ñi.

¹² Tacan tan quitsahá tsicá tuhun ñi tsi ra:

—¿Tan numaa nyí ra can vityin?

Tan catyí ra tsihin ñi:

—Ña tsitó yu —catyí ra.

Nujanahmā ra cuví fariseo naha ra tsi ra cuaq tsa nduvahā

¹³ Tacan tan tsindaca ñi tsi ra tsa nduvahā can nuu ra cuví fariseo naha ra.

¹⁴ Tyin quivi tsa jatyi ra Jesús nyahyu tan janduvahā ra tsi ra can, cuví tsi quivi quitatú nyivi. ¹⁵ Yacan cuenda ra cuví fariseo naha ra tsicā tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaá ra nyahyu tinuu yu, tan nacatya nuu yu tan vityin

nditsin nyehé yu —catyí ra tsihin ra naha.

¹⁶ Tacan tan catyí juhva ra fariseo naha ra:

—Ra tsa javahā yacan ñavin cuenda Nyoo cuví ra, tyin ña tyaá yahvi ra quivi quitatú yo —catyí ra naha.

Maa tyin catyí inga ra naha

—¿Nacaa tsa cuví javahā ra tsa iyo ihya tatun ra iyó cuatyi cuví ra? —catyí ra naha.

Tan siin siin tsa caahán ra naha. Tan natahvi sava ra naha. ¹⁷ Tan tsicā tuhun nyico ra naha tsi ra nduvahā can inga tsaha, tan catyí ra naha tsihin ra:

—¿Tan yooho, náa catyí un tuhun ra tsa janduvahā tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

¹⁸ Maa tyin ra cuví ityi nuu tsihin nyivi Israel ña cuñí ra naha tsinu iñi ra naha tsa cuaá ra can tan nanyehe ra. Nda cuanda canā ra naha tsi jutu ra tan tsi sihi ra. ¹⁹ Tan tsicā tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaá ra cacu ra? ¿Nacaa tsa cuví nyehé ra vityin? —catyí ra naha.

²⁰ Nacahan jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quivi cacu ra. ²¹ Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvahā tinuu ra. Ndaça

tuhun maa ndo tsi ra. Tsa iyó tucu maa cuiya ra. Tan cuví nacatyí tuhun maa ra tsihin ndo —catyí ñi tsihin ra naha.

²² Jutu ra tan sihi ra caahán ñi tacan tsa cuenda tyin yuuhví ñi tsi ra cuví ityi nuu tsihin nyivi Israel naha ra, tyin tsa natuhun tahan ra naha tyin cua tava cuii ra naha tsi nyivi vehe ñuhu, tun cahan ñi tyin ra Jesús cuví ra Cristo, ra tsa jaquitsi Nyoo. ²³ Yacan cuenda catyí ñi: “Ndaça tuhun ndo tsi maa ra. Ra tsa ñihi cuví ra.”

²⁴ Tacan tan cana nyico ra naha tsi ra tsa nduvaha can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

²⁵ Tacan tan nacahan ra tsa nduvaha can tan catyí ra:

—Yuhu ña tsitó yu tatun ra iyó cuatyí cuví ra, a ñavin. Intuhun ñi tsa tsitó yu tyin yuhu ra cuaa cuví yu, maa tyin vi-tyin nditsin nyehé yu —catyí ra.

²⁶ Tan tsica tuhun nyico ra naha tsi ra inga tsaha tan catyí ra naha:

—¿Náa icá ra tsihin un? ¿Nacaa icá ra tan nanyehe un? —catyí ra naha tsihin ra.

²⁷ Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Náa cuenda cuñí ndo tsa cahan yu inga tsaha? ¿A cuñí ndihí ndo cunycun ndo tsi ra can?

²⁸ Tacan tan nduxaan ra naha tsi ra, tan catyí ra naha:

—Yooho tsa yihí un cuenda ra, maa tyin nyuhu cuenda ra Moisés ra tsa tsicoo tsa naha yihí ndi. ²⁹ Nyuhu tsitó ndi tyin Nyoo cahan tsihin ra Moisés tahan tsa naha. Maa tyin ra can, ndi ña tsitó ndi numaa quee ra —catyí ra naha.

³⁰ Tacan tan nacahan ra tsa nduvaha can tan catyí ra:

—¡Naa tsa iyo cahnu cuví tsehe! Nyooho ña tsitó ndo numaa quee ra, tan jananyehe ra tsi yu. ³¹ Tsitó vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icá ra cuhva cuñí ra, tyaá soho Nyoo tsa caahán ra. ³² Ndi iin tsaha tan ñaha ca cuñi yo tatun iyó iin ra jananyehe tsi iin ra cuaá nda cacu ra. ³³ Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

³⁴ Tacan tan catyí ra naha tsihin ra:

—Yooho ra iyó cuatyí cuví un nda cacu un. ¿Tan cuñí un jacuaha un tsi nyuhu? —catyí ra naha.

Tan tava cuii ra naha tsi ra vehe ñuhu.

Nyivi tsa nduve tuhun Nyoo iyó aña tuma tsa cuaa ñi

³⁵ Tsitó ra Jesús tyin tava ra naha tsi ra tsa janduvaha ra vehe ñuhu. Tan tsa ñihí tahan ra tsihin ra tan catyí ra tsihin ra:

—¿A tsinú iñi yooho tsa caahán Rayi tsa quee nda gloria? —catyí ra tsihin ra.

³⁶ Tan nacahan ra tan catyí ra:

—Catyí tuhun tsihin yu, taa, yóo ra cuví ra tyin tsinú ñi yu tsi ra —catyí ra tsihin ra.

³⁷ Tan catyí ra Jesús:

—Tsa nyehe un tsi ra. Tan juvin ra natuhún tsihin un —catyí ra tsihin ra.

³⁸ Tacan tan tsicuiñi tsiti ra tsaha ra Jesús tan catyí ra tsihin ra:

—Tsinú ñi yu tsi un, Jutu Mañi yu —catyí ra tsihin ra Jesús.

³⁹ Tan catyí ra Jesús:

—Yuhu vatsi yu tyin catyí tuhun yu tsa iyó añima nyivi iyó nu ñuhu ñayivi ihya. Tyin nyivi cuaa, ñi ña tsitó tuhun Nyoo cua nanyehe ñi tyin coo tuhun Nyoo añima ñi. Tan nyivi cuñi tyin nditsin nyehe ñi, catyí ñi tyin tsitó ñi tuhun Nyoo, coto ñi tyin cuaa ñi tyin ña tsinú ñi ñi tsi yu —catyí ra Jesús.

⁴⁰ Tacan tan juhva ra fariseo tsa nyecú tsihin ra Jesús tsiñi ra naha tsa caahan ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

⁴¹ Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsiñi ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsitó ndo, yacan cuenda ndoó cuatyí ndo siqui ndo —catyí ra tsihin ra naha.

10

Mbee ticatyí jana Nyoo cuví nyivi yihí cuenda ra, tan tsitó ñi tsi ra tsa jaquitsi Nyoo tyin jahá cuenda ra tsi ñi

¹ Caahan nyico ra Jesús tan catyí ra:

—Tsa nditsa catyí yu tsihin ndo, tatun iin ra cua quihvi tsitsi cora mbee ticatyí, tan ñavin yuhu cora quihví ra, ra ican cuví ñasuhu. ² Maa tyin ra tsa quihví ityi yuhu cora, ra jahá cuenda mbee can cuví ra. ³ Ra nyí yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tavá ra tsi ti ityi tsata cora.

⁴ Tsa yahá tavá ra tsi ti, tan cuahan ra ityi nuu tan nyicún ti naha ti tsi ra, tyin nacotó ti ndusu ra. ⁵ Maa tyin tatun nyivi tsa ña nacotó ti ndusu, tsinú ti nuu ñi tan ña cuahan ti cuanyicún ti tsi ñi.

⁶ Tyehen cahan ra Jesús tsihin nyivi. Maa tyin maa ñi ña cutuñi ñi ñi náa tuhun caahan ra tsa caahan ra tacan.

Ra Jesús cuví ra jahá cuenda vaha mbee ticatyí

⁷ Tacan tan catyí ra Jesús tsihin nyivi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihví nyivi yihí cuenda yu tan cuví ñi tumaa mbee ticatyí jana yu.

⁸ Tandihí ra tsa quitsi tsa ndi cumañi quitsi yu, ra suhu cuví ra naha. Maa tyin mbee

jana yu ña tyaa yahvi ti naha ti tsa cahan ra naha. ⁹ Yuhu cuví yuvehe gloria. Nyivi tsa cua quihvi yuvehe can, cua cacu ñi tan ña cua cahun ca ñi anyaya. Tan cuví ñi tumaa mbee tsa quihvi tan quitá tsitsi cora can. Tan ñihí ti huhu tsatsí ti.

¹⁰ 'Iin ra ñasuhu, vatsí ra, vatsí suhu ra, vatsí cahñi ra, vatsí jativi ra. Maa tyin yuhu vatsí yu tyin coo vaha ndo ñayivi nyitó tsa ña cua naa maa. ¹¹ Yuhu cuví ra vaha jahá cuenda mbee. Tyin ra jahá cuenda mbee tsahá ra ñayivi ra tsa cuenda mbee can. ¹² Maa tyin ra cuví musu, tatun nyehé ra vatsí lobo tsa cuví quití xaan, nacoó ra mbee jana tsitoho ra. Tan tsinú ra. Tyin ñavin jana maa ra cuví tsi ti naha ti. Tacan tan cua tiin quití xaan can tsi mbee can. Tan jacunu ti tsi mbee can ityi can tan ityi ihya. ¹³ Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi ti naha ti.

¹⁴ 'Yuhu cuví ra jahá cuenda vaha mbee jana yu. Tan nacotó yu tsi ti naha ti. Tan nacotó tucu maa ti naha ti tsi yu, ¹⁵ tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayivi yu cuenda mbee jana yu. ¹⁶ Iyó tucu inga mbee jana yu tsa ña yihí tsitsi cora ihya. Cuñí tsi tsa cahun yu cunaquihin yu tsi ti naha ti. Tan cua tyaa yahvi ti tsi yu. Tan iin ñi nu cua quihí tandihí

ti. Tan cua coo intuhun ñi ra cua jaha cuenda tsi ti naha ti.

¹⁷ 'Jutu yu cuñí ra tsi yu tyin tsahá yu ñayivi yu tsacatyí nyivi. Maa tyin yaha can, tan cua nacuhva nyico ra ñayivi yu. ¹⁸ Yoñi cuví quihin nyaá ñayivi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayivi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

¹⁹ Tsa tsiñi nyico ra tsa cuví ityi nuu tsihin nyivi Israel naha ra tsa caahán ra Jesús tacan, natahvi sava nyico ra naha inga tsaha. ²⁰ Tan cuaha xaan ra naha catyí:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

²¹ Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyí ra naha.

Nu ña cuñí ra cuví ityi nuu tsihin nyivi Israel tyaa yahvi ra naha tsi ra Jesús

²² Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnu. ²³ Tan ra Jesús tsicá nuu ra vehe ñuhu can ityi nu nañi corredor ra Salomón. ²⁴ Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan

quitsahā tsicá tuhun ra naha tsi ra:

—¿Ama cua cahan catsi un tsihin ndi tatun juvin un cuví ra Cristo ra tsa jaquitsi Nyoo? Cahān catsi tsihin ndi vityin ihya —catyí ra naha.

²⁵ Tan catyí ra Jesús:

—Tsa yahā cahan yu tsihin ndo, tan ña tsinu ñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu. ²⁶ Maa tyin nyooho ña tsinú ñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo.

²⁷ Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu. ²⁸ Yuhu tsahá yu ñayivi nyito tsa ña cua naa maa coo ti. Tan ña cua cunaa ti. Tan ndi yoñi cuví quihin nyaa tsi ti naha ti tsitsi ndaha yu. ²⁹ Maa Jutu yu tsahā tsi ti naha ti tsi yu. Tan cahnu ca cuví maa ra tan ñavin ca tandihi nyivi. Tan yoñi cuví quihin nyaa tsi ti tsitsi ndaha ra. ³⁰ Yuhu tan Nyoo Jutu yu, iin ñi cuví ndi —catyí ra Jesús.

³¹ Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra. ³² Tan catyí ra Jesús tsihin ra naha:

—Cuaha xaan tsa vaha javahā yu nuu ndo tsihin tunyee ñi Jutu yu. ¿Tan ndáa tsa ña taahán ñi ndo tyin cua cañi ndo tsi yu tsihin yuu? —catyí ra Jesús tsihin ra naha.

³³ Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javahā un cua cañi ndi tsi un tsihin yuu, cua cañi ndi tsi un tsa cuenda tyin tsicoo cu- atyi un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

³⁴ Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo.

³⁵ Tsitó yo tyin tsa caahán tuhun Nyoo, ña cua cuví catyi yo tyin ña nditsa. Tan Nyoo jacunañi ra nyoo tsi nyivi naquihín tsa caahán ra.

³⁶ Tatun maa Nyoo nacatsi tsi yuhu tan jaquitsi ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu? ³⁷ Tatun ña javahá yu tsa javahá Jutu yu, ña tsinu ñi ndo tsi yu. ³⁸ Maa tyin tatun javahá yu, vasu ña cua tsinu ñi ndo tsi yu, maa tyin tsinu ñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

³⁹ Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

⁴⁰ Tacan tan cuanuhu ra ityi nu caná ñicanyii inga tsiyo yutya cahnu Jordán nu ja-coondutyā ra Juan tsa jihna, tan ndoo ra ican. ⁴¹ Cuaha

nyivi tsahan tsinyehe tsi ra, tan catyí ñi:

—Nditsa, vasu ndi intuhun tsa iyo ña javaha ra Juan, maa tyin tandihi tsa cahan ra cuenda ra ihya tan nditsa —catyí ñi.

⁴² Tan cuaha xaan nyivi tsa iyó ityi can tsinu iñi tsa caahán ra Jesús.

11

Nu tsihi ra Lázaro

¹ Ñuu Betania tsicoo iin ra cuuhvi tsa nañi Lázaro. Tan ñuu can iyó ña María tsihin ña Marta tahan ña. ² Ña María, cuhva ra Lázaro, juvin ña cuvi ñaha tsa tyoso ndutya tami tsaha Jutu Mañi yo, tan jana ityi ña tsaha ra tsihin ixi jiñi ña. ³ Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhvi xaan ra.

⁴ Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhvi ra tyin quivi nduvaha ra cua nyehe nyivi tyin cahnu xaan cuvi Nyoo tan tacan tucu Sehe ra —catyí ra Jesús.

⁵ Cuñi xaan ra Jesús tsi ña Marta tan ña tahan ña, tan ra Lázaro cuhva ñi. ⁶ Maa tyin quivi tsa tsiñi ra tyin cuuhvi ra Lázaro, ndoo ra uvi quivi ca nu nyii ra. ⁷ Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

⁸ Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuvi ityi nuu tsihin nyivi Israel naha ra cahñi ra naha tsi un tsihin yuu. Tan vityin, cuñi nyico un cahun un inga tsaha ¿Nacuenda?

⁹ Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhu tsa jandunditsín nu ñuhu ñayivi ihya. ¹⁰ Maa tyin tatun tsacuaa tsicá nuu ra, cuvi nduva ihñi ra tyin nduve ñuhu Nyoo jandunditsín nu cuahan ra.

¹¹ Tacan tan quitsaha catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cahun yu jandoto yu tsi ra —catyí ra tsihin ra naha.

¹² Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

¹³ Maa tyin ra Jesús cuñi ra catyí ra tyin ra Lázaro tsa tsihi ra. Tan ra tsicá tsihin ra, cuñi maa ra naha tyin nditsa tsa quixí ra. ¹⁴ Tacan tan cahan catsi ra Jesús tsihin ra naha:

—Ra Lázaro tsa tsihi ra.

¹⁵ Tan cusii iñi yu tyin yoñi yu nyii ndacan. Tyin tacan vaha ca tsa cuenda nyooho na tsinu iñi ndo tsa caahán yu. Cohon ndo cunyehe yo tsi ra —catyí ra Jesús tsihin ra naha.

¹⁶ Tacan tan ra Tomás, tsa jacunañi ra naha “tinihi”, catyí ra tsihin inga ra tsicá tsihin ra Jesús:

—Cohon ndihí yo tyin cúu yo iin caa ñi tsihin ra —catyí ra.

Ra Jesús cuví ra janandotó tsi yo tan tsahá ra ñayiví nyito coo yo

¹⁷ Tsa tsaá ra Jesús Betania, ñihí tuhun ra tyin tsa cumi quiví nyíí ra Lázaro tsitsi ñuhú. ¹⁸ Ñuu Betania can canyíí tsi yatyin ñi nu canyíí ñuu Jerusalén, tumaa iin cuhva tsa uvi kilómetro sasava. ¹⁹ Tan cuaha ra cuví ityi nuu tsihin nyiví Israel cuahan cua nyehe nu nyíí ña Marta tan ña María cua jatyinyee ra naha tsi ñi tyin tsihí cuhva ñi. ²⁰ Tan ñihí tuhun ña Marta tyin tsa cua tsaá ra Jesús. Tan cuahán ña cua jatahan ña tsi ra. Maa tyin ña María ndoo ña yuvehe. ²¹ Tan catyí ña Marta tsihin ra Jesús:

—Jutu mañi yu, tun tsatyin ihya nyíí maa un, ña cua cúu cuhva yu. ²² Maa tyin yuhu tsitó yu tyin Nyoo cua javaha ra tandihí tsa ndacan un tsi ra —catyí ña tsihin ra.

²³ Tan catyí ra Jesús tsihin ña:

—Cuhva un cua nandoto ra.

²⁴ Tan catyí ña Marta:

—Nditsa, tsitó yu tyin cua nandoto ra quiví nandoto ndiyi nu cua cundihi quiví —catyí ña.

²⁵ Tacan tan catyí ra Jesús tsihin ña:

—Yuhu cuví ra janandotó ndiyi. Tan tsahá yu tsa coo nyitó nyiví. Nyiví tsinú iñi tsa caahán yu, vasu tsa tsihí ñi maa tyin coo nyico ñi. ²⁶ Tan

tandihí ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahán yu ihya? —catyí ra tsihin ña.

²⁷ Tan catyí ña:

—Tsinú iñi yu, Jutu Mañi yu, tyin yoocho cuví ra Cristo Sehe Nyoo, ra tsa nyaá tsa quitsi nu ñuhu ñayiví ihya —catyí ña.

Nu tsacu ra Jesús nu ñaña ra Lázaro

²⁸ Tsa yahá tsa cahan ña Marta tacan, tan tsahan ña tsiquihin ña tsi ña María tahan ña, tan xeehe ñi cahan ña tsihin ña:

—Tsa tsaá Ra Maestro ihya. Tan caná ra tsi un —catyí ña.

²⁹ Tsa tsiñi ña María tsa caahán ña, numi xaan ña nduvita ña, tan cuahán ña nu nyíí ra Jesús. ³⁰ Tan ñaha ca quihvi ra Jesús tsitsi ñuu hora can, ndi nyíí ra nu nañihí ña Marta tsi ra. ³¹ Tan nda yuvehe ña María, yucú ra cuví ityi nuu tsihin nyiví Israel jatyinyee ra naha tsi ñi. Tan nyehe ra naha tyin numi quita ña. Tan cuñi maa ra naha tyin cuahán ña nu ñaña cua vacu ña. Tan cuahán ndihí ra naha tsata ña.

³² Tan cuhva tsa tsaá ña María nu nyíí ra Jesús tsicuiñi tsiti ña tsaha ra, tan catyí ña:

—Jutu Mañi yu, tun tsatyin nyíí un ihya, ña tsihí ra cuhva yu —catyí ña.

³³ Tsa nyehe ra Jesús tyin tsacu ña María tan tsacú ra Israel tsa cuahan tsihin ña, nducuihya xaan cuñi ra.

³⁴ Tan tsica tuhun ra tsi ñi:

—¿Nu maa tinyii ndo tsi ra? —catyí ra.

Tan catyí ñi:

—Jutu Mañi yu, cōhon tan nyehe un —catyí ñi tsihin ra.

³⁵ Tan tsacu ra Jesús.

³⁶ Tacan tan catyí ra Israel can naha ra:

—Nyehe ndo tyin yaha xaan cuñi ra tsi ra —catyí ra naha.

³⁷ Maa tyin catyí juhva ra naha:

—Ra ihya jananyehē ra tsi ra cuaa. ¿Nacuvi tyin ña cuví ica ra iin cuhva tan ña cúu ra Lázaro ihya? —catyí ra naha.

Nu janandoto ra Jesús tsi ra Lázaro

³⁸ Nducuihya xaan cuñi nyico ra Jesús inga tsaha tan natuhva ra nu ñaña can. Tyin tsitsi yavi yuu cuví can.

Tan ndasí iin yuu yuhu can.

³⁹ Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quivi tsa nyii ra ican —catyí ña.

⁴⁰ Maa tyin catyí ra Jesús tsihin ña:

—¿A ña caahán yu tsihin un tyin tatun tsinú iñi un, cua nyehe un tsa cahnu cuví Nyoo? —catyí ra tsihin ña.

⁴¹ Tacan tan jatsiyo ra naha yuu can. Tan nanyehē ndaa ra Jesús ityi andivi, tan catyí ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu. ⁴² Yuhu tsitó yu tyin maa ñi maa tsiñi un tsa caahán yu. Maa tyin

tyehen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsi tsi yu —catyí ra Jesús tsihin Nyoo.

⁴³ Tsa yaha tsa cahan ra tacan, cana tsaa ra, tan catyí ra:

—¡Lázaro, quita nu nyii un juven!

⁴⁴ Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tumaa javahá nyivi Israel tsihin ndiyi. Tan catyí ra Jesús tsihin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tsihin ñi.

Nu nducú cahñi ra naha tsi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Tan cuaha xaan ra cuví ityi nuu tsihin nyivi Israel tsa tsahan tsihin ña María quitsaha tsinú iñi ra naha tsa nyehe ra naha tsa javaha ra Jesús. ⁴⁶ Maa tyin juhva ra naha tsahan ra naha tsijacoto ra naha tsi ra fariseo naha ra tsa javaha ra Jesús. ⁴⁷ Tacan tan ra fariseo can naha ra tan ra cuví ityi nuu tsihin ra jutu naha ra jatitahan ra naha tsi ra tuhva ndu iin naha ra tan catyí ra naha:

—¿Nacaa cua javaha yo? Tyin cuaha xaan tsa iyo javahá ra can. ⁴⁸ Tatun cuhva yo tsa javaha ca ra tacan, tandihi nyivi tan cua tsinu iñi ñi tsi ra. Tan ra cumí tyiñu nda ñuu Roma cua quitsi ra naha tan cua cani ra naha

vehe ñuhu yo tan ñuu yo —catyí ra naha.

⁴⁹ Maa tyin ra Caifás ra tsahnu tsa cuví ityi nuu tsihin ra jutu naha ra cuiya can, cahān ra tan catyí ra tsihin ra naha:

—Nyooho nduve maa náa tsitó ndo. ⁵⁰ Ndi ña cutuñí iñi ndo tyin vaha ca tsa cúu intuhun ñi rayi tsa cuenda tandihi nyivi ñuu, tan ñavin ca tsa cúu tandihi yo —catyí ra Caifás.

⁵¹ Ra Caifás can ñavin tsa cuñí maa ra tan caahán ra, tyin ra cuví ityi nuu tsihin tandihi jutu cuví ra cuiya can, yacan cuenda maa Nyoo jacahān tsi ra nu catyí ra tyin ra Jesús cua cúu ra tsa cuenda tandihi nyivi ñuu Israel. ⁵² Tan ñavin tsa cuenda maa ñi maa nyivi can, maa tyin cua jandu iin ra tsi tandihi nyivi cuví sehe Nyoo tsa iyó tandihi ca ñuu. ⁵³ Tacan tan nda quivi can tan ra cuví ityi nuu tsihin nyivi Israel can naha ra, nducú ra naha cuhva cahñi ra naha tsi ra Jesús.

⁵⁴ Yacan cuenda ña tsicá nuu nditsin ca ra Jesús nu iyó nyivi Israel. Quee ra Judea can. Tan cuahán ra iin ñuu tsa nañí Efraín tsa canyíi yatyin ñi nu tsiqui, nu cuví ñuhu ityi. Tan ndoó ra ican tsihin ra tsicá tsihin ra.

⁵⁵ Ña cuaha ca quivi tan tahan tsi vico cuenda nyivi Israel, vico tsa nañí pascua. Tan cuaha xaan nyivi quee ñi ñuu ñi tan cuahán ñi nda ñuu Jerusalén cua javaha ñi tsa tuhvá maa ñi javahá tsa jan-duvahá ñi tsi ñi nuu Nyoo tsa

ndi cumañi ca tahan tsi quivi vico can. ⁵⁶ Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñí nyoooho? ¿A cua quitsi ra can vico ihya, o ña cua quitsi ra? —catyí ñi.

⁵⁷ Tan ra cuví fariseo tan ra cuví ityi nuu tsihin jutu, catyí ra naha tyin tatun ndáa nyivi tsitó nu nyíi ra Jesús, na catyí tuhun ñi. Tyin cuquihin ra naha tsi ra tyin cunyi ra vehe caa.

12

Nu tyosó ña María ndutya tami tsaha ra Jesús

(Mt. 26.6-13; Mr. 14.3-9)

¹ Cumañi iñu quivi ca tsa tahan tsi vico pascua, tan tsaā ra Jesús ñuu Betania nu iyó ra Lázaro, ra tsa janandoto ra. ² Ican javaha ñi tsa cuxiñi ra Jesús. Ña Marta tyihí ña coho nu mesa. Tan tsinyaa ra Jesús nu mesa. Tan nyaá ndihi tucu ra Lázaro tsihin ra. ³ Tacan tan quihin ña María tumaa sava litru ndutya tami tsa tsinu tsihin maa ñi maa yucu tsa nañí nardo, iin tsa yahvi xaan nyaá. Tan tyiso ña ndutya tami can tsaha ra Jesús. Yahā can tan jana ityi ña tsaha ra tsihin ixi jiñi ña. Naniñi cahnu maa tsitsi vehe can tsitu xico ndutya tami can. ⁴ Tan ican nyíi tucu ra Judas Iscariote, sehe ra Simón. Cuví ra iin ra tsicá tsihin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu.

Tan quitsahā catyí ra Judas can tsihin ñi can:

5 —¿Nacuenda ña xico ndo ndutya tami ihya tsi nyiví, tan cuhva ñi cuenda mil tsi ndo tsa cuenda can, (uñi cientu denario) tan jatyinyee ndo tsi nyiví ndaahví? —catyí ra.

6 Caahán ra Judas yacan tyin ra ñasuhu cuví ra, ñavin tsa cundaahví iñi ra nyehé ra tsi nyiví ndaahví. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can. ⁷ Tacan tan catyí ra Jesús tsihin ra:

—Jaña tsi ña, tyin ñaha ihya javahā ña tyehen tsa cuenda tsa cua quihví cuñu ñuhu yu tsitsi ñuhu. ⁸ Nyiví ndaahví tacan ñi nyecú maa ñi tsihin ndo, maa tyin yuhu ña cua cunyaa ca yu tsihin ndo tacan —catyí ra Jesús tsihin ra Judas.

Nu nducú cahñi ndihi ra Israel naha ra tsi ra Lázaro

⁹ Cuaha xaan nyiví Israel ñihí tuhun ñi tyin ra Jesús nyíí ra Betania, tan tsahan ñi ican. Ñavin intuhun ñi ra Jesús cuñí ñi nyehe ñi tyin cuñí ndihi tucu ñi nyehe ñi tsi ra Lázaro, ra tsa janandoto ra Jesús. ¹⁰ Tacan tan ra cuví ityi nuu tsihin jutu natuhun tahan ra naha tyin cua cahñi ndihi ra naha tsi ra Lázaro. ¹¹ Tyin tsa cuenda ra tan cuaha xaan nyiví Israel quitá tsiyo ñi tan quitsahā tsinú iñi ñi tsi ra Jesús.

Nu quihví ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

¹² Cuaha xaan nyiví tsaā ñi ñuu Jerusalén tsa cuví vico pascua. Tan tsa inga quiví tsito ñi tyin ra Jesús cua tsaā ra ñuu can. ¹³ Tacan tan tsahnyā ñi ndaha ndicaha tan cuahán ñi cua jatahan ñi tsi ra Jesús. Tan caná tsaā ñi, tan catyí ñi:

—¡Cahnu xaan cuví Nyoo! ¡Nasoco xaan Nyoo tsi ra vatsí ihya tsihin tunyee iñi Nyoo! ¡Nasoco xaan Nyoo tsi Rey cuenda yo nyiví Israel! —catyí ñi, caná tsaā ñi.

¹⁴ Tan ñihí ra Jesús iin burru tan tsicoso ra tsi ti tumaa catyí maa nu tutu Nyoo tyehen:

¹⁵ Ña nayuhvi ndo nyiví ñuu Sión

Nyehe ndo, vatsí Rey ndo.

Yosó ra iin burru —catyí tsi nu tutu Nyoo.

¹⁶ Quiví can ra tsi cá tsihin ra Jesús, ña cutuñí iñi ra naha tsa nyaá nu tutu Nyoo. Maa tyin tsa yahā cuanuhu ra Jesús nda gloria, nducuhun iñi ra naha tyin tandihí yacan nyaá can nu tutu Nyoo tyin tacan cua tahan ra. Tan tacan tsa cuii tahan ra.

¹⁷ Nyiví tsa nyehe quiví tsa canā ra Jesús tsi ra Lázaro tsitsi ñaña, quiví janandoto ra tsi ra, nacatyí tuhun ñi tsa nyehe ñi. ¹⁸ Yacan cuenda cuaha xaan nyiví tsijatahan tsi ra Jesús, tyin tsito ñi tsa iyo tsa javahā ra. ¹⁹ Tacan tan

ra cuví fariseo catyí ra naha natuhun tahan ra naha:

—Tsa nyehé maa ndo tyin nduve maa náa cuví javahá yo, tyin tandihi nyivi tan cuahán ñi cuanyicún ñi tsi ra —catyí ra naha.

Nu nanducú juhva ra tsa quee Grecia tsi ra Jesús

²⁰ Yucú tucu juhva ra Grecia mahñu nyivi tsa tsahan tsijacahnü vico ñuu Jerusalén. ²¹ Tacan tan natuhva ra Grecia can naha ra nu nyaá ra Felipe, ra quee ñuu Betsaida tsa canyí Galilea, tan cahan ndaahvi ra naha tsihin ra tan catyí ra naha:

—Taa, cuñí ndi cahan ndi tsihin ra Jesús —catyí ra naha.

²² Tan tsahan ra Felipe tsicahan ra tsihin ra Andrés. Tan tsahan nduvi ra naha tsicatyí tuhun ra naha tsihin ra Jesús tyin ra Grecia can cuñí ra naha cahan ra naha tsihin ra. ²³ Tan nacahan ra Jesús, tan catyí ra:

—Vityin tsa tsaá hora tsa cunuhu nyico yu nda nu quee yu, tan cua jacahnu jutu yu tsi yu, tsa cuví yu Rayí tsa quee nda gloria. ²⁴ Tsa nditsa catyí yu tsihin ndo tyin tatun iin tsiti tan ña cua quihvi tsi ñuhu tan ña tyahyu tsi, intuhun ñi tsiti cua cuvi tsi. Maa tyin tatun tyahyu tsi, ndutsaa tsi inga tsaha tan cua coo cuaha ca tsiti tsi. ²⁵ Nyivi tsa cuñí xaan ñayivi iyó ñi, cua cunaa ñi. Maa tyin nyivi ña cuñí ñayivi iyó ñi nu ñuhu ñayivi

ihya, cua ñihi ñi ñayivi nyitó tsa ña cua naa maa coo ñi. ²⁶ Ndáa nyooho nyivi cuñí javaha tyiñu nuu yu, naha ndo quitsi nyicun ndo tsi yu. Tan nu cunyaa yu, cunyaa ndihi nyooho tsa jahá tyiñu tyiñu yu. Tyin nyivi jahá tyiñu tyiñu yu, cua jacahnu jutu yu tsi ñi.

Nu caahán ra Jesús nácaa cua cúu ra

²⁷ Vityin tsicá xaan iñi yu. Tan ¿náa cua cahan yu? ¿A catyí yu tsihin Jutu yu na jatsiyo ra tundoho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayivi ihya. ²⁸ Vaha ca cahan yu tsihin Jutu yu tan catyí yu: “Jutu Mañi yu, jacahnu sivi un” —catyí ra Jesús.

Tacan tan cahan iin ndusu ityi andivi tan catyí tsi tye-hen:

—Tsa yaha jacahnü yu sivi yu, tan cua jacahnu nyico yu inga tsaha —catyí ndusu can.

²⁹ Tan nyivi nyecú ican, tsiñi ñi ndusu can, tan catyí ñi tyin savi cahan. Tan inga ñi catyí tyin iin ángel cahan tsihin ra.

³⁰ Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahan ndusu can, tyin tsa cuenda tsa vaha tsi maa ndo cuví can. ³¹ Vityin cuví cuhva tsa cua tatsi tuñi Nyoo tsi nyivi iyó nu ñuhu ñayivi. Tan vityin cuví cuhva cua tava cuii Nyoo tsi nu ndacá ñaha nu ñuhu ñayivi ihya. ³² Tan cuhva tsa cua

ticaa nyivi tsi yu nu cruu, yacan cuví cuhva cua ixta yu tandihí nyivi cuhun ñi tsihin yu —catyí ra Jesús.

³³ Caahán ra tacan tsa cuenda tsa cuñí ra cutuñi iñi ñi tyin tacan cua cúu ra. ³⁴Tan nacahan nyivi tan catyí ñi tsihin ra:

—Tuhvá ndi tsiñí cahví ra naha nu libru ley yo tyin ra cuví Cristo cua coo nyitó ra tan ña cua cúu maa ra. ¿Nacaa tsa catyí yooho tyin cua ticaa nyivi tsi Rayí quee nda gloria nu cruu? Tan ¿yóo ra cuví Rayí tsa quee nda gloria tsa caahán un tuhun? —catyí ñi, tsicá tuhun ñi tsi ra.

³⁵ Tacan tan catyí ra Jesús tsihin ñi:

—Ñuhu tsa jandunditsín nu nyecú ndo, juhva ña quivi iyó tsi. Čaca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyivi tsicá nu naa ña tsitó ñi nu maa cuahán ñi. ³⁶ Tsinu iñi ndo tsi yuhu ra cuví ñuhu nditsin, tsitsi tsa ndi nyí yu tsihin ndo. Tacan tan cuví ndo nyivi iyó nu nditsin.

Tsa yaha cahan ra Jesús tacan tan jatsiyó ñi ra tsi ra nuu ñi.

Nu caahán tsi náa cuenda ña tsinú iñi ra cuví ityi nuu tsihin nyivi Israel naha ra tsi ra Jesús

³⁷ Vasu ndi maa cuaha xaan tsa iyo javahá ra Jesús nuu nyivi maa tyin ña tsinú maa iñi ñi tsa caahán ra. ³⁸ Tyin taahán tsi tsa cuví tumaa tsa cahan ra Isaías ra

cuví ndusu yuhu Nyoo, nu cahan ra tyehen:

Jutu Mañi yu, yoñi cuñí tsinu iñi tsa caahán ndi.

Yoñi cutuñi iñi tunyee iñi tsa iyó tsi un, Jutu Mañi yu, catyí ra Isaías tahañ tsanaha.

³⁹ Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaa nyico tucu ra Isaías tyehen:

⁴⁰ Nyoo jacuaa ra tsi ñi. Tan jandundava ra añima ñi,

tan ña cua nyehe ñi tsihin tinuu ñi,

tan ña cua cutuñi iñi ñi tsihin añima ñi,

tan ndi ña cua nacuhva cuenda ñi tsi ñi tsi ra tan janduvaha ra tsi ñi.

⁴¹ Ra Isaías cahan ra tyehen tyin nyehe ra tsa cahnu cuví Jutu Mañi yo Jesús, tan cahan ra tuhun ra.

⁴² Cuaha xaan nyivi Israel tsinú iñi tsi ra Jesús. Tan nda cuanda juhva ra cuví ityi nuu naha ra. Maa tyin ña jandunditsin ra naha tsi ra naha nuu nyivi tyin yuuhví ra naha tsi ra cuví fariseo naha ra. Coto tava cuii ra can naha ra tsi ra naha vehe ñuhu. ⁴³ Tyin cuñi ra naha nduvaha ra naha nuu nyivi tan ñavin nuu Nyoo.

Tuhun cahan ra Jesús cua tatsi tuñi tsi nyivi

⁴⁴ Ñihi caahán ra Jesús, tan catyí ra:

—Nyivi tsa tsinú iñi tsi yu, ñavin tsi maa ñi maa yu tsinú iñi ñi, tyin tsinú ndihí iñi ñi tsi ra tsa jaquitsi tsi yu. ⁴⁵ Tan nyivi tsa nyehé tsi yu, nyehé

ndihí ñi tsi ra tsa jaquitsi tsi yu. ⁴⁶ Yuhu cuví tumaa ñuhu nditsin tan vatsí yu jandunditsín yu nu ñuhu ñayivi ihya, tyin nyivi tsinú iñi tsi yu ña cua ndoo ñi nu naa. ⁴⁷ Maa tyin tatun yihí ndo tsiñí ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyin ña vatsí yu nu ñuhu ñayivi ihya tyin tatsi tuñi yu tsi nyivi. Vatsí yu tyin vatsí jacacú yu tsi ñi. ⁴⁸ Nyivi tsa ña cuñí naquihin vaha tsa caahán yu tan ña cuñí ñi javaha ñi tumaa cuhva cuñí yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihi quivi. ⁴⁹ Tyin ñavin cuenda maa yu caahán yu. Jutu yu, ra tsa jaquitsi tsi yu, tsaha ra tyiñu tsi yu caahán ra náa cua cahan yu tan náa cua jacuaha yu. ⁵⁰ Tan tsitó yu tyin tyiñu tsa tsaha ra, tsahá tsi ñayivi nyitó tsa ña cua naa maa coo nyivi. Yacan cuenda, tandihí tsa caahán yu, caahán yu cuhva catyí maa Jutu yu tsa cahan yu.

13

Nu nacatyá ra Jesús tsaha ra tsicá tsihin ra

¹ Tsa ndi cumañi ca iin quivi tan tahan tsi vico pas-cua, tsa tsitó maa ra Jesús tyin tsa cua tsaa hora tsa cua quita ra nu ñuhu ñayivi ihya tan cunuhu ra nu nyaá Jutu ra. Tacan ñi maa cuñí xaan ra tsi nyivi cuenda ra tsa iyó nu ñuhu ñayivi ihya. Tan vityin cua janaha ra tsi ñi tyin cuñí

xaan ra tsi ñi tyin cua cúu ra tsa cuenda ñi.

² Tan cuxiñi ra Jesús tsihin ra tsicá tsihin ra. Tan quihvi nu ña vaha añima ra Judas Iscariote sehe ra Simón tan natyuhu nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra. ³ Maa tyin ra Jesús tsitó ra tyin tsaha Jutu ra tandihí tyiñu tsi ra tyin quihí ndaha ra. Tan tsitó ra tyin nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñí ra. ⁴ Tacan tan nduvita ra tan tava ra jahma tsa nditsí ra ityi tsata, tan tsahñi ra iin toalla tsitsi ra. ⁵ Tacan tan tyihí ra ndutyá tsitsi iin tsicoho tan quitsaha nacatyá ra tsaha ra tsicá tsihin ra. Tan jana ityi ra tsaha ra naha tsihin toalla can.

⁶ Tan tsa cua nacatyá ra tsaha ra Simón Pedro tan catyí ra Simón tsihin ra:

—Jutu Mañi yu, ¿a yooho cua nacatyá tsaha yu?

⁷ Tacan tan catyí ra Jesús:

—Vityin ña cutuñí iñi un tsa javahá yu, maa tyin cutuñí iñi maa un nu cuahán ca tsi quivi.

⁸ Maa tyin ra Pedro catyí ra tsihin ra:

—Ndi iin tsaha tan ña cua cuhva yu nacatyá un tsaha yu.

Tan catyí ra Jesús tsihin ra:

—Tatun ña cua nacatyá yu tsaha un, ñavin ca cuenda yu cua cuvi un.

⁹ Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

¹⁰ Maa tyin catyí ra Jesús tsihin ra:

—Nyivi tsa ndi tsityi, ña cuñí tsi tsa ndoo nanii cahnu cuñu ñuhu ñi. Tsaha ña ñi cuñí tsi ndoo, tyin tsa ndoo maa nanii ñi. Nyooho tsa ndoo maa ndo, vasu ña tandihi ndo ndoo —catyí ra Jesús.

¹¹ Cahān ra tsa ña tandihi ra naha ndoo tyin tsitó ra yoo cua xico tsi ra tsi nu xaan iñi tsi ra nahnu.

¹² Tsa yahā nacatya ra Jesús tsaha ra tsicá tsihin ra, tan tsinditsi nyico ra jahma ra, tan tsinyaā nyico ra inga tsaha nu mesa tan catyí ra tsihin ra naha:

—¿A cutuñí iñi nyooho tsa javahā yu tsihin ndo?

¹³ Nyooho caahán ndo tsihin yu, “Maestro tan Jutu Mañi yu”, tan nditsa tyin yacan cuví yu. ¹⁴ Yuhu tsa cuví yu Ra Jacuahá tan Jutu Mañi ndo, nacatya yu tsaha ndo, tan tacan cuñí tsi tsa nacatya tahan maa ndo tsaha ndo. ¹⁵ Yuhu tsahā yu iin cuhva tsi ndo tyin javaha ndo tumaa cuhva javahā maa yu. ¹⁶ Tsa nditsa catyí yu tsihin ndo tyin ndi iin musu tan ña cahnu ca cuví ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuví ra tan ñavin ca ra tsa tava tyiñu tsi ra. ¹⁷ Tatun cutuñí iñi ndo yacan, tan javahā ndo can, sii xaan cua coo ndo.

¹⁸ Ñavin tsa cuenda tandihi ndo caahán yu. Yuhu tsitó maa yu yoo nacatsi yu. Maa

tyin cuñí tsi tsa cuvi tumaa caahán tuhun Nyoo tyehen: “Ra tsa tsatsi paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo. ¹⁹ Caahán yu tyehen tsihin ndo tsa ndi cumañi ca cuvi can tyin quivi cua cuvi yacan, cua tsinu iñi ndo tyin yuhu cuví ra tsa iyó nda ndi cumañi ca coo tandihi tsa iyó. ²⁰ Tsa nditsa catyí yu tsihin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuví can. Tan nyivi tsa naquihin vaha tsi yuhu, naquihin vaha ndihi ñi tsi ra tsa jaquitsi tsi yu —catyí ra Jesús.

Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu

(Mt. 26.20-25; Mr. 14.17-21; Lc. 22.21-23)

²¹ Tsa yahā tsa cahān ra Jesús yacan, tan quitsahā nducuihyá xaan cuñi añima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

²² Tacan tan ra tsicá tsihin ra, quitsahā nyehé nuu tahan ra naha, tan ña tsitó ra naha yoo tuhun caahán ra Jesús. ²³ Iin ra tsicá tsihin ra Jesús nyanaá ra tsi ra nu nyaá ra cuxiñí ra. Tan ra ican cuví ra tsa cuñí xaan ra Jesús. ²⁴ Tan ra Simón Pedro javahā ra seña tsi ra can, na ndaca tuhun ra yoo tuhun caahán ra Jesús. ²⁵ Tacan tan ra ican

tsinyaá naa ca ra tsi ra Jesús, tan tsicá tuhun ra tsi ra:

—Jutu Mañi yu, ¿yoó ra cuví ra tsa caahán un tuhun?

²⁶ Tan nacahan ra Jesús tan catyí ra:

—Cua jatyii yu luxu paan, tan ra tsa cua cuhva yu itsi, ra ican cuví ra —catyí ra.

Tacan tan quihin ra luxu paan tan jatyii ra, tan tsaha ra tsi ra Judas Iscariote, sehe ra Simón. ²⁷ Tsa quihin ra Judas paan can tan quihvi nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, janumi javaha can —catyí ra Jesús tsihin ra Judas.

²⁸ Maa tyin ndi intuhun ra tsa nyecú nu mesa can, ña cutuñi iñi ra naha nacuenta cahan ra tacan tsihin ra can.

²⁹ Ra Judas cuví ra yihí ndaha yitin nu yihí xuhun, yacan cuenda yihí ra naha cuñi maa ra naha tyin cuñi ra Jesús tsa kujata ra tsa tsiñi ñuhu tsi ra naha tsa cuenda vico can, a cuhva ra juhva xuhun can tsi nyivi ndaahvi, cuñi maa ra naha. ³⁰ Tsa yahá quihin ra Judas paan can, tacan tan quitá ra. Tan tsacuaa cuví can.

Tyiñu tsaa tsa tava ra Jesús tsi yo: tsa cuñi tahan yo tsi yo

³¹ Tsa yahá tsa cuahán ra Judas, tan catyí ra Jesús:

—Vityin cua nyehe nyivi tsa cahnu cuví yuhu Rayii tsa quee nda gloria. Tan cua nyehe ñi tsa cahnu cuví Nyoo tsa cuenda yu. ³² Tatun Rayii tsa quee nda gloria jacahnú

ra tsi Nyoo, tacan tucu Nyoo cua jacahnu ra tsi ra. Tsa tsaa quivi cua jacahnu ra tsi ra. ³³ Sehe yu, ña naha ca cua cunyi yu tsihin ndo. Nyooho cua nanducu ndo tsi yu, maa tyin tumaa tsa cahan yu tsihin ra cuví ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuví cuhun ndo nu cua cuhun yu. ³⁴ Tsahá yu iin tyiñu tsaa tsi ndo: Cuñi tahan ndo tsi ndo. Tumaa tsa cuñi maa yu tsi ndo, tacan cuñi tsi tsa cuñi tahan ndo tsi ndo. ³⁵ Tatun cuñi tahan ndo tsi ndo, tandihi nyivi tan cua coto ñi tyin nyivi nyicún tsi yu cuví ndo.

Nu caahán ra Jesús tyin ra Pedro cua cahan ra tyin ña nacotó ra tsi ra

(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro tsicá tuhun ra tsi ra Jesús tan catyí ra:

—Jutu Mañi yu, ¿nu maa cua cuhun un? —catyí ra.

Tan nacahan ra Jesús tan catyí ra:

—Nu cuhun yuhu, ña cua cuví cunyicún un tsi yu vityin. Maa tyin nu cuahán ca tsi quivi, tan cunyicun un tsi yu —catyí ra Jesús.

³⁷ Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuví cunyicun yu tsi un vityin? Tan tsa iyó vaha iñi yu tsa cuhva yu ñayivi yu tsa cuenda un —catyí ra.

³⁸ Tan nacahan ra Jesús tan catyí ra:

—¿A nditsa tsa cuhva un ñayivi un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsa tsitooho, yooho cua cahan un uñi tsaha tyin ña nacotó un tsi yu —catyí ra Jesús tsihin ra Pedro.

14

Ra Jesús cuví ityi cuhun yo nu nyaá Nyoo Jutu yo

¹ Tan catyí ra Jesús:

—Ña caca xaan iñi ndo. Tsínu iñi ndo tsi Nyoo, tan tsínu ndihi iñi ndo tsi yu. ² Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyí tuhun yu tsihin ndo. Tan cua cuhun yu cua janduvaha yu iin nu coo ndo. ³ Tsa yahá tsa cuhun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyaa yu. ⁴ Nyooho tsa tsitó maa ndo nu maa cuhun yu, tan tsa tsitó ndo ityi.

⁵ Tan catyí ra Tomás tsihin ra:

—Jutu Mañi yu, ña tsitó ndi nu maa cua cuhun un. Tan ¿nácaa coto ndi ityi? —catyí ra.

⁶ Tan catyí ra Jesús:

—Yuhu cuví ityi tsa cuahán gloria. Tan yuhu cuví tsa nditsa. Tan juvin ñi yuhu cuví ra tsahá ñayivi coo ndo. Tan tsa cuenda yuhu ñi, tan cuví tsa ndo nu nyaá Jutu yu. ⁷ Tan tsa nacotó ndo tsi yu, tan tsa cuenda yacan nacotó ndihi ndo tsi Jutu yu. Nda vityin tan nu cuahán ca tsi ityi nuu, cua nacoto ndihi

ndo tsi ra, tyin tsa nyehé ndo tsi ra —catyí ra Jesús.

⁸ Tacan tan catyí ra Felipe tsihin ra:

—Jutu Mañi yu, cuhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

⁹ Tan nacahan ra Jesús, tan catyí ra:

—Yooho Felipe, tsa naha xaan nyíi yu tsihin ndo, tan ¿nácaa tsa caahán un tsa ña nacotó un tsi yu? Nyivi tsa nyehé tsi yu, nyehé ndihi ñi tsi Nyoo Jutu yu. Tan ¿nácaa tsa caahán un tsihin yu: “Cuhva jihna nyehe ndi tsi Nyoo Jutu yo”? ¹⁰ ¿A ña tsinú iñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyiñu ra tsihin yu. ¹¹ Tsínu iñi ndo tsi yu tyin iin ñi ra cuví yu tsihin Nyoo Jutu yu. Tan Nyoo Jutu yu iin ñi cuví ra tsihin yu. Tatun ña tsinú iñi ndo yacan, cuví tsínu iñi ndo tsi yu tsa cuenda tyiñu Nyoo Jutu yu tsa javahá yu. ¹² Tsa nditsa caahán yu tsihin ndo tyin nyivi tsinú iñi tsi yu, cua javaha ndihi ñi tsa javahá yu. Tan cahnu ca tsa cua javaha ñi, tyin yuhu cuhun yu nu nyaá Nyoo Jutu yu. ¹³ Tan tandihi tsa cua ndacan ndo tsi jutu yu tsihin sivi yu, cua ñihi ndo can tyin tacan tan jacahnu cuaha ca nyivi tsi Nyoo Jutu yu tsa cuenda yuhu tsa cuví yu Sehe ra. ¹⁴ Yuhu cua javaha yu

náa ndihí tsa ndacan ndo tsa cuenda yu.

Nu caahán ra Jesús tyin cuhva ra Tatyí li ra tsi yo

15 'Tatun cuñí ndo tsi yu, tyaa yahvi ndo tsa caahán yu. 16-17 Tan ndacan tahvi maa yu tsi Nyoo Jutu yu na jaquitsi ra iin ra cua cuhva tunyee iñi tsi ndo. Tan ra ican cuví Tatyí li Nyoo, ra tsa caahán tsa nditsa. Tan iin nyita ñi maa cua cunyaa ra tsihin ndo. Maa tyin nyivi tsa taahán ca iñi tsa iyó nu ñuhu ñayivi ihya, ña cua cuví naquihin ñi Tatyí li Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyooho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo. 18 Ña cua nacoo cuii yu tsi ndo. Cua quitsi nyico yu nu yucú ndo. 19 Juhva cuii ña quivi, tan nyivi cuenda nu ñuhu ñayivi ña cua nyehe ca ñi tsi yu. Maa tyin nyooho cua nyehe ndo tsi yu. Tyin yuhu nyito yu, yacan cuenda nyooho cua coo ndihí ndo. 20 Quivi can cua coto ndo tyin yuhu iin ñi cuví yu tsihin Jutu yu. Tan nyooho iin ñi cuví ndo tsihin yu. Tan yuhu iin ñi cuví yu tsihin ndo. 21 Nyivi tsa tyaá yahvi tsa caahán yu, tan javahá ñi cuhva caahán yu, ñi ican cuví ñi tsa cuñí tsi yu. Tan ñi tsa cuñí tsi yu, Jutu yu cua cuñi ra tsi ñi. Tan cuñí ndihí tucu maa yu tsi ñi tan cua janaha yu tsi ñi yóo ra cuví yu—catyí ra Jesús.

22 Tan catyí ra Judas, ñavin ra Judas Iscariote, inga ra.

—Jutu Mañi yu, ¿nácaa tsa nyuhu ñi cua janaha un tsi un, tan ñavin tsi tandihí nyivi iyó nu ñuhu ñayivi?

23 Nacahan ra Jesús tan catyí ra:

—Nyivi cuñí tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi. 24 Nyivi ña cuñí tsi yu, ña javahá ñi tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

25 'Caahán yu tandihí tuhun ihya tsihin ndo tsitsi tsa ndi nyii yu tsihin ndo. 26 Maa tyin nu cuahán ca tsi ityi nuu cua jaquitsi Jutu yu Tatyí li ra tsihin sivi yu. Tan cua jatyinyee ra ican tsi ndo, tan cua cuhva ra tunyee iñi tsi ndo, tan cua janaha ra tandihí tsi ndo. Tan cua janducuhun iñi ra tsi ndo tsa tsa yahá cahan yu tsihin ndo.

27 'Jandoó yu iin tsa taxin coo añima ndo, tumaa tsa taxin cuñí añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Ña caca xaan iñi ndo tan ña nayuhvi ndo. 28 Tsiñi ndo tsa cahan yu nu catyí yu tyin cua cuhun yu tan cua quitsi nyico yu nu yucú ndo. Tatun cuñí ndo tsi yu, cua cusii iñi ndo tyin catyí yu tyin cuahan yu nu nyaá Jutu yu. Tyin cahnu ca cuví Jutu yu tan ñavin ca maa yu. 29 Caahán yu tyehen tsihin ndo tsa ndi cumañi ca

cuhun yu, tyin quiví cuhun yu, cua tsinu iñi ndo tsi yu.

³⁰ 'Ña cuaha ca cua cahan yu tsihin ndo. Tyin vatsí nu ndacá ñaha nu ñuhu ñayiví ihya. Maa tyin ña ndacá ñaha nu tsi yu. ³¹ Tyin tacan tan coto nyiví iyó nu ñuhu ñayiví, tyin yuhu cuñí yu tsi Nyoo Jutu yu, tan javahá yu tyiñu tavá ra tsi yu.

'Nduvita ndo, tan cohon ndo, na cua tsiyo yo ihya.

15

Nu cahan ra Jesucristo tyin cuví ra tumaa yoho tsa cuví uvas

¹ 'Yuhu cuví yoho tsa cuví uvas tsa nditsa. [Tsa cuví uvas cuví tsi tumaa yoho nditsaahan ndiví maa tyin yucu vixi cuví tsi.] Tan Jutu yu cuví ra jahá cuenda yoho can. ² Tsaahnyá ra soco tsa ña tsahá tsiti. Tan nacaunya ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti. ³ Tsa yahá janduvahá Jutu yu tsi nyooho tsihin tsa jacuahá yu tsi ndo. ⁴ Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuví cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyooho, ña cua cuví javaha ndo tsa vaha tatun ña iin ñi cuví ndo tsihin yu.

⁵ 'Yuhu cuví yoho cahnu. Tan nyooho cuví soco yoho can. Nyiví tsa nyanaá tsi yu, tan nyanaá yu tsi ñi, cuaha tsa vaha javahá ñi.

Tyin nduve náa cuví javaha ñi tatun ña nyanaá ñi tsi yu. ⁶ Nyiví tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmí yo.

⁷ 'Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuví ndacan ndo náa cuñí maa ndo tsi yu, tan yuhu cua cuhva yu tsa cua ndacan ndo. ⁸ Tatun cuaha tsa vaha javahá ndo, jacahnú xaan ndo tsi Jutu yu cuví can. Tan tsihin yacan janahá ndo tyin cuví ndo nyiví tsa nditsa nyicún tsi yu. ⁹ Yuhu cuñí yu tsi ndo, tumaa tsa cuñí Jutu yu tsi yu. Ña naa iñi ndo cuhva cuñí yu tsi ndo. ¹⁰ Tatun tyaá yahvi ndo tsa caahán yu, ña cua naa iñi ndo tyin cuñí yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa iñi yu tsa cuñí xaan ra tsi yu.

¹¹ 'Caahán yu tyehen tsihin ndo tyin na cusii iñi ndo tsihin yu. Tan cusii ca iñi ndo. ¹² Tuhun tsa caahán yu tsihin ndo, yacan cuví tsehe: cuñi tahan ndo tsi ndo, tumaa tsa cuñí maa yu tsi ndo. ¹³ Tatun yaha xaan cuñí tahan yo tsi yo, cana maa iñi yo cuhva yo ñayiví iyó yo tsa cuenda inga yo. ¹⁴ Nyooho cuví ra vaha iñi tsi yu tatun javahá ndo tsa caahán yu tsihin ndo. ¹⁵ Ña caahán ca yu tyin musu yu cuví tsi ndo, tyin iin musu ña tsitó ra náa javahá tsi-

toho ra. Caahán yu tyin ra vaha iñi tsi yu cuví ndo, tyin tandihí tsa caahán Jutu yu tsihin yu tan jacotó yu itsi tsi ndo. ¹⁶ Ñavin nyooho nacatsj tsi yuhu tyin maa yu nacatsj tsi ndo. Tan tavá tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan niñi cua coo, tan ña cua tiví maa tsi. Tacan tan cua cuhva Jutu yu tandihí tsa ndacan ndo tsi ra tsihin siví yu. ¹⁷ Tyehen caahán yu tsihin ndo: Cuñi tahan ndo tsi ndo.

Nyivi taahán iñi tsa iyó nu ñuhu ñayivi, ndasi cuñi ñi nyehé ñi tsi ra Jesús tan tsi nyivi nyicún tsi ra

¹⁸ Tatun ndasi cuñi nyivi taahán iñi tsa iyó nu ñuhu ñayivi ihya nyehe ñi tsi ndo, coto ndo tyin jihna ca maa yu ndasi cuñi ñi nyehe ñi. ¹⁹ Tun tsatyin nyivi cuenda nu ñuhu ñayivi ihya cuví ndo, cua cuñi nyivi tsi ndo tumaa tsa cuñi tahan maa ñi tsi ñi. Maa tyin nyooho tsa nacatsj yu tsi ndo mahñu ñi. Yacan cuenda ndasi cuñi ñi nyehe ñi tsi ndo, tyin ñavin ca nyivi cuenda nu ñuhu ñayivi ihya cuví ndo. ²⁰ Nducuhun iñi ndo tsa cahan yu tsihin ndo, tyin ndi iin musu tan ña cahnu ca cuví ra tan ñavin ca tsitoho ra. Tatun tyaá yahvi nyivi tsa caahán yu tsihin ñi, tacan cua tyaa yahvi ndihí ñi tsa jacuahá ndo tsi ñi. Tan tatun ndasí icá ñi tsihin yu, ndasi cua ica ndihí ñi tsihin

ndo. ²¹ Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsj tsi yu.

²² Tun tsatyin ña quitsj yu cahan yu tsihin ñi, nduve cuatyí ñi. Maa tyin vityin nduve náa siqui cua tyaa ñi cuatyí ñi, tyin tsa yahá cahan yu tsihin ñi. ²³ Nyivi tsa ndasi cuñi nyehé tsi yu, ndasi cuñi ndihí ñi nyehé ñi tsi Jutu yu. ²⁴ Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehe ñi tandihí yacan. Vasu ndi maa tsa nyehe ñi can maa tyin ndasi cuñi ñi nyehé ñi tsi yu, tan tsi Jutu yu. ²⁵ Maa tyin tandihí yacan cuví, tyin cuñi tsi cundaa tumaa cuhva caahán nu tutu ley tsa jacuahá ñi tsa caahán tyehen: “Nduve vihi náa tsaha, tan ndasi cuñi ñi nyehe ñi tsi yu”, catyi tsi.

²⁶ Maa tyin cua quitsi Tatyí Ii, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quivi cua tsa yu nu nyaá Jutu yu tan cua jaquitsi ndi Tatyí Ii nu yucú ndo. Tan cua cahan ra tumañi iñi tsa cuenda yu. ²⁷ Tan nyooho tucu cua cahan ndo tumañi iñi tsa cuenda yu, tyin yucú ndo tsihin yu nda quivi quitsahá jahá tyiñu yu.

16

¹ Caahán yu tyehen tsihin ndo tyin tacan tan ña jandihí ndo tsa tsinú iñi ndo tsi yu. ² Cua tava cuii nyivi tsi ndo vehe ñuhu. Tan coo quivi cua cahñi ñi tsi ndo, tan cua cuñi

ñi tyin tyiñu Nyoo javahá ñi.
³ Tacan cua ica ñi tyin ña naco-
 to ñi tsi Jutu yu tan ndi tsi
 maa yu. ⁴ Caahán yu tsehe
 tsihin ndo tyin quivi tsa cua
 cuvi tumaa cuhva caahán yu
 tsihin ndo, cua nducuhun iñi
 ndo tyin tsa yaha cahan yu
 tuhun ihya tsihin ndo.

Ña cahan yu tyehen tsihin
 ndo nda jihna tyin ndi nyii
 maa yu tsihin ndo.

Tyiñu jahá Tatyí Ii Nyoo

⁵ Maa tyin vityin cua cuhun
 yu tyin cunyaa yu tsihin ra
 tsa jaquitsi tsi yu. Ndi in-
 tuhun ndo tan ña tsicá tuhun
 ndo tsi yu nu maa cua cuhun
 yu. ⁶ Tyin tsa nducuihya cuñi
 ndo tsa caahán yu tyehen tsi-
 hin ndo. ⁷ Caahán yu tsa
 nditsa tsihin ndo tyin vaha ca
 tsa cuhun yu cuenda tsa vaha
 tsi maa ndo. Tyin tatun ña
 cuhun yu, ña cua quitsi Tatyí
 Ii tsa cua cuhva tunyee iñi tsi
 ndo. Maa tyin tatun cuhun
 yu, cua jaquitsi yu tsi ra. ⁸ Tan
 quivi quitsi ra, cua jacoto ra
 tsi nyivi iyó nu ñuhu ñayivi
 ihya tyin iyó cuatyí ñi. Tan
 cua janaha ra ityi vaha tsi ñi,
 cuhva coo vaha ñi. Tan cua
 jacoto ra tsi ñi tyin cua cutuñi
 ñi nuu Nyoo. ⁹ Cua jacoto ra
 tsi ñi tyin iyó cuatyí ñi tyin
 ña tsinú iñi ñi tsi yu. ¹⁰ Cua
 jacoto ra tsi ñi tyin iyó ityi
 vaha, cuhva coo vaha ñi tyin
 yuhu cua cuhun yu nu nyaá
 Jutu yu tan ña cua nyehe ca
 ndo tsi yu. ¹¹ Tan cua coto ñi
 tyin cua jandaa Nyoo cuatyí

ñi tyin tsa yaha cunda cu-
 atyi nu cuvi cuihna, nu ndacá
 ñaha nu ñuhu ñayivi ihya.

¹² Tan cuaha ca tsa nyaá
 cahan yu tsihin ndo, maa tyin
 ña cua cutuñi iñi ndo can vi-
 tyin. ¹³ Quivi quitsi Tatyí Ii
 tsa caahán tsa nditsa, maa ra
 cua janaha tandihi tsa nditsa
 tsi ndo. Tyin ñavin cuenda
 maa ra cua cahan ra, tyin
 cua cahan ra tandihi tsa tsiñi
 ra. Tan cua jacoto ra náa
 cua cuvi nu cuahán ca tsi ityi
 nuu. ¹⁴ Cua jacahnu ra tsi yu,
 tyin cua naquihin ra tuhun
 yu tan cua janaha ra can tsi
 ndo. ¹⁵ Tandihi tsa iyó tsi
 Jutu yu, tsii maa yu cuvi ndihi
 can. Yacan cuenda caahán yu
 tyin Tatyí Ii cua naquihin ra
 tuhun yu, tan cua janaha ra
 tsi nyooho.

*Ra tsicá tsihin ra Jesús cui-
 ihyá xaan cuñi ra naha, maa
 tyin nu cuahán ca tsi quivi cua
 cusii iñi ra naha, catyí ra Jesús*

¹⁶ Ña naha cuii ca tan ña
 cua nyehe ca ndo tsi yu, maa
 tyin yaha can tan cua nyehe
 nyico ndo tsi yu, tyin yuhu
 cua cuhun yu nu nyaá Jutu yu
 —catyí ra Jesús.

¹⁷ Tacan tan juhva ra tsicá
 tsihin ra, tsicá tuhun tahan ra
 naha tan catyí ra naha:

—¿Náa cuñi tsi cahan ya-
 can? Catyí ra tsihin yo tyin
 ña naha cuii ca tan ña cua
 nyehe ca yo tsi ra, tan yaha
 can tan cua nyehe nyico yo tsi
 ra inga tsaha tyin cua cuhun
 ra nu nyaá Jutu ra. ¹⁸ ¿Náa
 cuñi tsi catyí tsa “ñá naha cuii
 ca” can? Ña cutuñi iñi yo

náa tuhun caahán ra —catyí ra naha.

¹⁹ Tan tuví iñi ra Jesús tyin cuñí ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo? ²⁰ Tsa nditsa caahán yu tsihin ndo tyin nyooho cua nducuiihya iñi ndo tan cua vacu ndo, maa tyin nyivi cuenda nu ñuhu ñayivi cua cusii iñi ñi. Vasu cuiihya cuñí ndo vityin, tucuiihya iñi can cua nanduvi tsi tsa sii. ²¹ Cuhva tsa cua cacu sehe iin ñaha, nyehé ña tundoho. Maa tyin tsa yaha cacu lee can, ndi ña ñuhu ca iñi ña tsa uhvi can tsa cuenda tsa sii cuñí ña tyin cacu iin lee sehe ña. ²² Tacan tucú nyooho vityin, cuiihya xaan cuñí ndo. Maa tyin cua nyehe nyico yu tsi ndo inga tsaha. Tacan tan cua cusii nyico iñi añima ndo. Tan yoñi cuví quihin nyaa tsa sii can tsi ndo.

²³ 'Quivi can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua kuhva ra tandihi tsa ndacan ndo tsi ra tsihin sivi yu. ²⁴ Nda vityin tan ñaha ca ndacan ndo tsa ndacan ndo tsihin sivi yu. Ndacan ndo tan cua ñihi ndo tan cusii xaan iñi ndo.

Ra Jesucristo cuví jaha canaa ra tsa ña vaha iyó nu ñuhu ñayivi

²⁵ 'Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin kuhva can cua jacuaha yu tsi ndo, maa tyin cua catyí tuhun catsi yu tuhun Jutu yu tsihin ndo. ²⁶ Quivi can tsihin sivi yu cua ndacan ndo tsa ndacan ndo tsi ra. Tan ña tsiñi ñuhu ca tsa cahan ndaahvi yu tsihin Jutu yu tsa cuenda ndo. ²⁷ Tyin maa Nyoo Jutu yu cuñí ra tsi ndo. Cuñí ra tsi ndo tyin nyooho cuñí ndo tsi yu, tan tsinú iñi ndo tyin nu nyaá Nyoo quee yu. ²⁸ Nu nyaá Jutu yu quee yu tyin quitsi yu nu ñuhu ñayivi ihya. Maa tyin vityin cua naco yu ñuhu ñayivi ihya tyin cua cunuhu nyico yu nu nyaá ra —catyí ra Jesús.

²⁹ Tacan tan catyí ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin kuhva caahán un tsihin ndi. ³⁰ Vityin nyehé ndi tyin tsitó un tandihi cuii maa, tan ña tsiñi ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyí ra naha tsihin ra Jesús.

³¹ Tan catyí ra Jesús:

—Tan vityin ¿a tsinú iñi ndo tsi yu? ³² Maa tyin caahán yu tsihin ndo tyin tsa vatsí hora. Tan vityin cuví hora tsa cua cahun ndo siin siin ityi. Tan cua naco ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu. ³³ Caahán yu tandihi tsehe tsihin ndo na

coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayivi ihya cua nyehe ndo tundoho, maa tyin janyee ndo iñi ndo, tyin yuhu tsa jahā canaa yu tsa ña vaha tsa iyó nu ñuhu ñayivi ihya.

17

Nu tsicán tahvi ra Jesús tsi Nyoo tsa cuenda ra tsicá tsihin ra

¹ Tsa yahā cahān ra Jesús yacan, nanyehē ndaa ra ityi andivi tan catyi ra:

—Jutu Mañi yu, tsa tsaā hora vityin. Jācahnu tsi yu tsa cuví yu sehe un, tyin tacan tan jaca hnu tucu maa yu tsi un. ² Tyin tavā tyiñu un tsi yu tsa quihi ndaha yu tandihi nyivi, tan cuhva yu ñayivi nyitó tsa ña cua naa maa tsi tandihi nyivi tsa tsahā un tsi yu. ³ Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsi un, tacan tan cuví coo ñi ñayivi nyitó tsa ña cua naa maa.

⁴ Tsa jaca hnu yu tsi un nu ñuhu ñayivi ihya tan tyiñu tsa tavā tyiñu un tsi yu tsa ndihi tsi javahā yu. ⁵ Tan vityin, Jutu Mañi yu, cua quitsi nuhu nyico yu nu nyaá un, tan cuñi yu tyin nacuhva un tsa cahnu cuví yu tsihin un tsi yu, tumaa tsa tsicoo maa tsi yu nda ndi cumañi ca tsinu ñuhu ñayivi.

⁶ Tandihī ra tsa tsahā un tsi yu naha ra, ra tsa natavā vaha un mahñu nyivi iyó nu ñuhu ñayivi ihya, jacoto yu tsi

ra naha yóo ra cuví yooho. Tsi maa un cuví tsi ra naha tan tsahā un tsi ra naha tsi yu. Tan tyaá yahvi ra naha tsa caahān un. ⁷ Vityin tsitó ra naha tyin tandihī tsa tsahā un tsi yu, nu nyaá un quee tsi. ⁸ Tyin catyi tuhun yu tsihin ra naha tsa cahān un tsihin yu, tan naquihīn vaha ra naha itsi. Tan tsitó ra naha tyin nditsa tsa quee yu nu nyaá un, tan tsinú iñi ra naha tyin maa un jaquitsi tsi yu.

⁹ Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihī nyivi, maa tyin tsicán tahvi yu tsa cuenda ra tsa tsahā un tsi yu naha ra, tyin tsi maa un cuví ra naha. ¹⁰ Tandihī nyivi tsa cuví tsi un, tsahā tucu un tsi ñi tsi yu. Tan maa ñi janahā tsa cahnu cuví yu.

¹¹ Yuhu ña cua ndoo ca yu nu ñuhu ñayivi ihya, maa tyin maa ra naha cua ndoo ra naha nu ñuhu ñayivi ihya. Tan yuhu cua cunyaa nyico yu tsihin un. Jaha cuenda tsi ra tsa tsahā un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yo. ¹² Quivi tsinyii yu nu ñuhu ñayivi ihya tsihin ra naha, jahā cuenda yu tsi ra tsa tsahā un tsi yu naha ra tsihin tunyee iñi tsa iyó tsi un. Tan jahā cuenda yu tsi ra naha. Tan ndi intuhun ra naha tan ña tsinaā ra naha. Maa tyin ra tsa tsa nyaá maa tsa cunaa, ra ican ñi cuví ra cuanaā tan quita cuhva tu-

maa tsa catyí nu tutu maa un.

13 'Vityin tsa cua quítsi yu nu nyaá un, maa tyin tsitsi tsa ndi nyíi yu nu ñuhu ñayivi ihya, caahán yu tsehe, tyin na cusii iñi ra naha tumaa tsa sii cuñi maa yu. 14 Yuhu cahan yu tsihin ra naha tsa caahán un, maa tyin nyivi cuenda nu ñuhu ñayivi ndasi cuñi ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayivi cuví ra naha. Tumaa yuhu, ñavin ra cuenda nu ñuhu ñayivi cuví yu. 15 Ña tsicán yu tsi un tsa tava un tsi ra nyicún tsi yo naha ra nu ñuhu ñayivi ihya, maa tyin jaha cuenda tsi ra naha coto náa jaha nu ña vaha tsi ra naha. 16 Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha. 17 Jacu ii tsi ra naha tsihin tsa nditsa, na javaha ra naha maa ñi maa cuhva cuñi maa un. Tyin tsa caahán un, yacan cuví tsa nditsa. 18 Tumaa tsa jaquitsi un tsi yuhu nu yucú nyivi iyó nu ñuhu ñayivi, tacan cua jacuhun ndihi tucu yuhu tsi ra tsa nyicún tsi yo, nahan ra naha tuhun yo tsihin nyivi tsa ñaha ca coto tuhun yo. 19 Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

20 Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihi tucu yu tsi un tsa cuenda nyivi tsa cua tsinu iñi tsi yu, tsa cuenda

tsa cua cahan ra ihya naha ra ityi nuu ca. 21 Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yooho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihi nyivi iyó nu ñuhu ñayivi cua tsinu iñi ñi tyin maa un jaquitsi tsi yu. 22 Yuhu tsaha yu tsa cahnu cuví un tsi ñi nyicún tsi yo. Juvín ñi maa tsa cahnu cuví un tsa tsaha un tsi yu tyin tsihin yacan na iin ñi cuví ñi, tumaa yooho tsihin yuhu, iin ñi cuví yo. 23 Yuhu nyíi yu tsihin ñi. Tan yooho nyaá un tsihin yu tyin tacan tan iin ña nyivi cua cuví ñi. Tan coto tandihi nyivi iyó nu ñuhu ñayivi tyin maa un jaquitsi tsi yu, tan cuñi xaan un tsi ñi nyicún tsi yo, tumaa tsa cuñi maa un tsi yu.

24 'Jutu Mañi yu, maa un tsaha tsi ñi tsi yu. Tan cuñi yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsaha un tsi yu, tyin cuñi un tsi yu nda ndi cumañi ca tsinu ñuhu ñayivi. 25 Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu. 26 Tsa cahan yu tsihin ra naha yóo ra cuví un, tan cua cahan nyico tucu yu inga tsaha, tyin tumaa cuhva cuñi un tsi yu, tacan cua cuñi tahan ra naha tsi ra naha. Tan yuhu cunyaa yu añima ra naha.

18

Nu cua tyihi ra Israel naha ra tsi ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Tsa yaha tsa cahan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra. ² Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra. ³ Tan ican tsaá ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaá ra naha ican, nyisó ra naha mityi, tan nyisó ra naha lámpara tan ñuhu yiti. ⁴ Tan ra Jesús tsa tsitó maa ra tandihi tsa cua tahan ra. Quita ra tan tsica tuhun ra tsi ra naha:

—¿Yóo nanducú ndo? —catyí ra.

⁵ Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xico tsi ra Jesús tsi nu xaan iñi tsi ra nahnu, nyíí ndihi ra tsihin ra naha. ⁶ Cuhva tsa cahan ra Jesús: “Yuhu cuví”, tandihi ra naha nacaca tsata ra naha tan nduva ra naha nu ñuhu. ⁷ Tacan tan tsica tuhun nyico ra Jesús tsi ra naha inga tsaha, tan catyí ra:

—¿Yóo nanducú ndo?

Tan catyí ra naha:

—Ra Jesús ra ñuu Nazaret.

⁸ Tan catyí ra Jesús:

—Tsa cahan yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicá tsihin yu naha ra na cunuhun ra naha —catyí ra Jesús tsihin ra naha.

⁹ Yacan cahan ra Jesús tyin na cundaa tsa cahan ra nda ityi tsata ca nu catyí ra: “Ra tsa tsaha Jutu yu tsi yu, ndi intuhun ra naha tan ña tsinaá ra naha.” ¹⁰ Tacan tan tava ra Simón Pedro mityi tsa ndahá ra tan tsahnya ra soho cuaha iin ra tsa nañi Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra. ¹¹ Maa tyin ra Jesús catyí ra tsihin ra Pedro:

—Natyihi mityi un tsitsi vena un. Tatun Nyoo Jutu yu tan cuñi ra tsa nyehe yu tundoho, taahán tsi tsa nyehe yu can —catyí ra Jesús tsihin ra.

Nu tsindaca ra naha tsi ra Jesús nuu ra cuví ityi nuu tsihin jutu naha ra

(Mt. 26.57-58; Mr. 14.53-54; Lc. 22.54)

¹² Tacan tan andaru can tsihin capitán ra naha, tan vitya cuenda vehe ñuhu naha ra, tñin ra naha tsi ra Jesús, tan tsahñi ra naha tsi ra, ¹³ tacan tan tsindaca ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu. ¹⁴ Ra Caifás can cuví ra tsa cahan tsihin ra cuví ityi nuu tsihin nyivi Israel naha ra tyin vaha ca

tsa cúu intuhun ñi rayi tsa cuenda tandihi nyivi ñuu.

Nu caahán ra Pedro tyin ña nacotó ra tsi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro tan inga ra tsa tsicá tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihvi ra can tsihin ra Jesús nuquehe ra jutu can. ¹⁶ Maa tyin ra Pedro ndoo ra ityi tsata vehe. Yacan cuenda quitá ra tsa nacotó ra jutu can, tan cahán ra tsihin ñaha tsa nyaá yuvehe can. Tan jayahá ra tsi ra Pedro ityi tsitsi nuquehe can. ¹⁷ Tacan tan ñaha tsa nyaá yuvehe can tsicá tuhun ña tsi ra Pedro, tan catyí ña:

—¿A ñavin yooho cuví iin ra tsicá tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

¹⁸ Tacan tan ra cuví musu tan ra vitya naha ra tsa yucú ican, jatahán ra naha ñuhú tyin vitsin xaan. Tan nyecú nyityi ra naha tuñu ra naha ñuhú. Tan nyii ndihi tucu ra Pedro tuñu ra ñuhú tsihin ra naha ican.

Nu janahmá ra jutu tsaahnu tsi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tacan tan ra jutu tsaahnu can quitsahá tsicá tuhun ra tsi ra Jesús yoo ra

cuví ra tsicá tsihin ra, tan náa jacuahá ra tsi nyivi. ²⁰ Tan catyí ra Jesús tsihin ra:

—Yuhu nuu tandihi nyivi cahán yu. Tan jacuahá yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá tandihi nyivi Israel ndu iin. Tan nduve nu cahán xeehe yu. ²¹ ¿Nacuenda tsicá tuhun un tsi yuhu? Vaha ca ndaca tuhun un tsi nyivi tsa tsiñi tsa cahán yu, tan maa ñi cua catyi tuhun náa cahán yu tsihin ñi tyin maa ñi tsitó náa cahán yu —catyí ra Jesús tsihin ra.

²² Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

²³ Tan catyí ra Jesús:

—Tatun cahán yu iin tsa ña vaha, cahán tsihin yu nda tsa ña vaha cahán yu. Maa tyin tatun cahán yu tsa vaha, ¿nacuvi tyin cañi un tsi yu? —catyí ra Jesús tsihin ra can.

²⁴ Yahá can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

Nu caahán nyico ra Pedro inga tsaha tyin ña nacotó ra tsi ra Jesús

(Mt. 26.71-75; Mr. 14.66-72; Lc. 22.58-62)

²⁵ Tan nyaá nyityi ra Pedro tuñu ra ñuhú. Tan catyí ra naha tsihin ra:

—¿A ñavin yoocho cuví iin ra tsicá tsihin ra can? —catyí ra naha tsihin ra.

Tan ra Pedro tyihí xeehe ra, tan catyí ra:

—Ñavin. Ñavin yu cuví —catyí ra.

²⁶ Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyivi ra tsa tsahnya ra Pedro soho, quitsaha tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyí ra tsihin ra Pedro.

²⁷ Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitoocho.

Nu cutuñi ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yahá can tan quitá ra naha tsihin ra Jesús yuvehe ra Caifás tan tsindaca ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihvi ra naha tsitsi vehe tyiñu can tyin ñavin vehe nyivi Israel cuví can. Tyin ica tsa quihvi ñi Israel vehe ndavaha ñi tyin coto ña cua cuví cuxiñi ñi quivi vico pascua. ²⁹ Yacan cuenda quitá ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo siquí ra ihya? —catyí ra Pilato tsihin ra cuví ityi nuu tsihin nyivi Israel naha ra.

³⁰ Tan nacahan ra Israel naha ra tan catyí ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

³¹ Tacan tan catyí ra Pilato tsihin ra naha:

—Quihin ndo tsi ra, tan tatsi tuñi ndo tsi ra tumaa catyí maa ley ndo.

Tan nacahan ra Israel can naha ra tan catyí ra naha:

—Maa tyin nyuhu nyivi Israel nduve ndatu iyó tsi ndi tsa cahñi ndi tsi nyivi —catyí ra naha.

³² Tacan cundaá tsa cahan ra Jesús nácaa cua cúu ra.

³³ Yahá can tan quihvi nyico ra Pilato tsitsi vehe tyiñu can inga tsaha. Tan caná ra tsi ra Jesús tan tsicá tuhun ra tsi ra:

—¿A yoocho cuví rey cuenda nyivi Israel? —catyí ra tsihin ra.

³⁴ Tan catyí ra Jesús:

—¿A tsa cuñi ñi maa un tsicá tuhun un tsehe tsi yu o iyó inga nyivi natyuhu tsi un cuhva cahan un tsihin yu? —catyí ra Jesús tsihin ra Pilato.

³⁵ Tan catyí ra Pilato:

—Ñavin ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsaha cuenda tsi un tsi yu. ¿Náa javaha un? —catyí ra tsihin ra Jesús.

³⁶ Tacan tan nacahan ra Jesús tan catyí ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra

naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuví tsi —catyí ra Jesús tsihin ra Pilato.

³⁷ Tacan tan catyí ra Pilato tsihin ra:

—¿Tun tacan, rey cuví maa un? —catyí ra Pilato tsihin ra Jesús.

Tan nacahan ra Jesús tan catyí ra:

—Rey cuví yu tumaa tsa caahán maa un. Yacan cuenda cacū yu tan vatsí yu nu ñuhu ñayivi ihya, tyin cahan yu tsa nditsa. Tandihí nyivi tsa tyaá yahvi tsa nditsa, tyaá soho ñi tsa caahán yu —catyí ra Jesús.

³⁸ Tan catyí ra Pilato tsihin ra:

—¿Tan náa cuví tsa nditsa? —catyí ra.

Tsa yahā tsa tsicā tuhun ra Pilato yacan, quitā ra tsicahan nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi intuhun cuatyí ra ihya.

Nu cua cahñi ra naha tsi ra Jesús

(Mt. 27.15-31; Mr. 15.6-20; Lc. 23.13-25)

³⁹ Maa tyin nyooho iyó ndo tuhun tsa tsicán ndo na tava yu tsi iin ra nyíi vehe caa tsa iyó vico pascua ihya. ¿A cuñí ndo tava yu tsi ra tsa cuví rey cuenda ndo tsa cuví ndo nyivi Israel? —catyí ra Pilato tsihin ra naha.

⁴⁰ Tacan tan quitsahā caná tsaa tandihí ra naha tan catyí ra naha:

—¡Ña tava un tsi ra can! ¡Tava tsi ra Barrabás! —catyí ra naha.

Tan ra Barrabás can cuví ra iin ñasuhu.

19

¹ Tacan tan quihin ra Pilato tsi ra Jesús tan tava tyiñu ra na cañi andaru tsi ra. ² Tan andaru can javahā ra naha iin corona iñu tan tyihí ra naha jiñi ra Jesús. Tan jacunditsi ra naha iin jahma tunduuhva tsi ra, tahan tsa tuhvá ra cuví rey tsinditsí. ³ Tacan tan natuhva ra naha nu nyáá ra tan caahán nyaa ra naha tsi ra, tan catyí ra naha:

—¡Nacumi tsi un yooho Rey cuenda nyivi Israel! —catyí ra naha, tan cañí ra naha nuu ra.

⁴ Tacan tan quitā nyico ra Pilato inga tsaha tan catyí ra tsihin ra naha:

—Nyēhe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

⁵ Tan quitā ra Jesús yihí corona iñu jiñi ra, tan nditsí ra jahma tunduuhva can. Tacan tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

⁶ Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quitsahā caná tsaa ra naha tan catyí ra naha:

—¡Tyāa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan cahñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

⁷ Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñi tsi tsa cúu ra tyin jahá ra tsa Sehe Nyoo cuví tsi ra —catyí ra naha.

⁸ Tsa tsiñi ra Pilato yacan, tan nayuhvi xaan ca ra. ⁹ Tan quihvi nyico ra inga tsaha tsitsi vehe tyiñu, tan tsica tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

¹⁰ Tacan tan catyí ra Pilato tsihin ra:

—¿Nacuenda ña caahán un tsa caahán yu? ¿A ña tsitó un tyin ra cumi tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

¹¹ Tan nacahan ra Jesús tan catyí ra:

—Tun tsatyin ña tsaha Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

¹² Tsa ndihi cahan ra Jesús yacan, tan quitsaha nducú ra Pilato cuhva jaña ra tsi ra, maa tyin ra Israel caná tsa

ra naha tsata ra, tan catyí ra naha:

—¿Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihi ra tsa caahán tyin rey cuví ra naha, ra xaan iñi tsi rey cahnu cuví ra naha —catyí ra naha.

¹³ Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaa ra Pilato nu nañi Gabata nu tuhvá ra jandaá cuatyí nyivi. Tan tsihin yuhu hebreo cuñi tsi catyí: “Nu canyii yuu”. ¹⁴ Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¿Ihya nyaá rey ndo!

¹⁵ Maa tyin caná tsa ra Israel naha ra tan catyí ra naha:

—¿Na cúu ra! ¿Na cúu ra! ¿Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yoñi ca rey iyó. Intuhun ñi maa ra César, ra cuví rey cahnu —catyí ra naha.

¹⁶ Tacan tan tsaha cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihin andaru tsi ra, cuahán ra tsihin ra naha.

Nu tsihi ra Jesucristo nu cruu

(Mt. 27.32-44; Mr. 15.21-32; Lc. 23.26-43)

17 Tan nyisó ra Jesús cruu ra, cuahán ra iin nu nañi: “Yiqui Jiñi Ndiyi”. Tan tsihin yuhu hebreo nañi tsi Gólgota. 18 Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaa ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaa ra naha tsi ra Jesús mahñu. 19 Tan tava tyiñu ra Pilato na cunyaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.” 20 Tan cuaha nyivi Israel cahvi ñi tsa caahán can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín. 21 Yacan cuenda ra cuví ityi nuu tsihin jutu cahán ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

22 Maa tyin catyí ra Pilato:

—Tsa tsa yaha tyaa yu, nandoo maa tsi tacan —catyí ra tsihin ra naha.

23 Tsa yaha tyaa ra andaru can naha ra tsi ra Jesús nu cruu, naquihin ra naha jahma ra. Tsa cumi taahan ra naha quihin luxu luxu jahma ra. Tan ndoo jahma ra tsa quicu cañi ñi tsa tsindasi ra. 24 Tan andaru can natuhún tahan ra naha:

—Ña cua cahnya yo itsi. Jasiqui suuhva jihna yo na nyehe yo yoo cua jaha canaa jahma can —catyí ra naha.

Tacan cuví tumaa caahán nu tutu Nyoo nu catyí tsi tyehen: “Tsatsa tahan ra naha luxu luxu jahma yu tan jasiqui suuhva ra naha tsihin tsi, nyehe ra naha yoo ra jaha canaa itsi.” Tan yacan cuví tsa javaha ra andaru can naha ra.

25 Tan nyaá sihi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasihi ra Cleofas, tan ña María quee ñuu Magdala. 26 Tan nanyehe ra Jesús tsi sihi ra, nyaá ña yatyin ñi. Tan nanyehe tucu ra tsi ra tsa tsica tsihin ra, ra tsa cuñi xaan ra. Tan catyí ra tsihin sihi ra:

—Miya, va ra sehe un nyaá tsihin un juvin —catyí ra.

27 Tacan tan catyí ra tsihin ra tsa cuñi xaan ra:

—Tsa, va sihi un nyaá tsihin un juvin —catyí ra tsihin ra.

Nda quivi can tan quihin ra tsi ña, cuahan tsihin ra yuvehe ra. Tan jahá cuenda ra tsi ña.

Nu tsihi ra Jesús

(Mt. 27.45-56; Mr. 15.33-41; Lc. 23.44-49)

28 Tsa yaha yacan, tsa nyehe ra Jesús tyin tsa ndihí tyiñu jahá ra. Tacan tan catyí ra:

—Na ityi iñi yu —catyí ra.

Tan tsihin yacan cundaa tsa nyaá nu tutu Nyoo nu caahán tsi nácaa cua cúu ra.

29 Tan ican nyaá iin quiyi nu yihí vinu iya. Tacan tan jatyi ra naha tsa cuví yahma tumaa caa catyi tsihin vinu iya can. Tan tyaa ra naha yacan nu iin yutun hisopo. Tan jandaá ra naha tan tyanaá ra naha can yuhu ra. 30 Tsihi ra Jesús vinu can tan catyí ra:

—Tsa iyó vaha tandihí vi-tyin —catyí ra.

Tacan tan nacañi nuu ra jiñi ra tan tsihi ra.

Nu tutsi ra andaru yoco xaan yiqui naha ra Jesús

31 Tsa ndi cumañi intuhun ña quivi tan tahan tsi quivi vico cahnu pascua, tan ra cuví ityi nuu tsihin nyivi Israel ña cuñi ra naha tsa ndoo cuñu ñuhu ra tsa tsihi can naha ra nu cruu quivi quitatú, tyin quivi quitatú, quivi ii cuví tsi tsa cuenda ra naha. Yacan cuenda tsican ra naha tumañi iñi tsi ra Pilato na tava tyiñu ra na cahnu andaru sihin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha. 32 Tacan tan cuahán andaru nu nyecú cruu can. Tan tsahnú ra naha sihin iin ra ticaá iin tsiyo xiin ra Jesús. Tan tsahnú nyico ra naha sihin inga ra tsa ticaa inga tsiyo xiin ra. 33 Maa tyin cuhva tsa natuhva ra naha nu ticaá ra Jesús, nyehe ra naha tyin tsa tsihi maa ra. Yacan cuenda ña tsahnú ca ra naha sihin ra.

34 Maa tyin iin andaru can tutsi ra yoco xaan yiqui naha ra Jesús. Tan quita niñi tan

ndutya. 35 Ra tsa nacatyí tuhun yacan, ra tsa nyehe vaha cuví ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho. 36 Tacan cuví tyin tacan tan cundaa tsa catyí tuhun Nyoo nu catyí tsi: “Ndi intuhun yiqui ra tan ña tahnu.” 37 Tan iyó inga nyico nu catyí tsi nu tutu Nyoo tyehen: “Cua nyehe nyivi tsi ra tsa tutsi ra naha yoco xaan.”

Nu quihvi ñuhu ra Jesús
(Mt. 27.57-61; Mr. 15.42-47; Lc. 23.50-56)

38 Tsa yaha yacan, ra José ra ñuu Arimatea tsican ndatu ra tsi ra Pilato na cuhva ra tsa naquihin ra cuñu ñuhu ra Jesús. Tan ra José can cuví ra iin ra yihí cuenda ra Jesús vasu tsa xeehe ñi tsa cuenda tsa yuuhví ra tsi ra cuví ityi nuu tsihin nyivi Israel. Tacan tan tsaha ra Pilato ndatu tsi ra, tan tsahan ra José tsinaquihin ra cuñu ñuhu ra Jesús. 39 Tsahan ndihi tucu ra Nicodemo, ra tsa tsahan tsicahan tsihin ra Jesús tsa tsa cuaa. Tsaá ra tsihin ndutya tami. Tan iin ndutya tami tsa nañi mirra nasaca nuu tsihin inga tsa nañi áloe. Tan quita tsi tumaa oco utsi kilu tsa tandihí tsi. 40 Tacan tan ra José tsihin ra Nicodemo quihin ra naha cuñu ñuhu ra Jesús tan cava nuu ra naha tsi ra tsihin jahma cuiñi tsa tyihí ra naha ndutya tami can, tumaa iyó maa nyivi Israel tun cua cutsi ñi ndiyi tsitsi ñuhu.

41 Yatyin nu tsahñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsaá nu ñaha ca cuyucu ndi intuhun ndiyi. 42 Ican ñi tinyi ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi qui vi quitatú nyi vi Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

1 Tsa naa ca tsa cuvi tumingu, ña María quee ñuu Magdala tsahan ña nu ñaña ra Jesús. Tan nyehe ña tyin nduve ca yuu ndasí yuhu ñaña can. 2 Tacan tan tsinú xaan ña cuahán ña nu nyi ra Simón Pedro tan inga ra tsica tsihin ra Jesús, ra tsa cuñi xaan ra Jesús. Tan catyí ña tsihin ra naha:

—Quihin nyi vi cuñu ñuhu Jutu Mañi yo tsitsi ñaña, tan ña tsitó yo nu maa tsindaca ñi itsi —catyí ña María tsihin ra Pedro tan tsihin inga ra can.

3 Tacan tan ra Pedro tan inga ra can cuahán ra naha nu ñaña. 4 Tan cuahán nduyi taahan ra naha iin caa ñi, tsinú ra naha. Maa tyin ñihi ca tsinú inga ra can tan ñavin ca ra Pedro, jihna ca ra can tsaá nu ñaña. 5 Quitsaha nyehé ihñi ra tsitsi ñaña, tan nyehe ra jahma cuiñi tsa cava nuu cuñu ñuhu ra Jesús, canyí can. Maa tyin ña quihvi ra tsitsi ñaña. 6 Yaha can tan tsaá ndihi ra Simón Pedro tsata ra, tan ra ican quihvi ra tsitsi ñaña can.

Juvin ñi nyehe ndihi ra can jahma can canyí tsi. 7 Tan juvin ñi nyehe ndihi ra tyin jahma tsa tsindasi jiñi ra Jesús, ña iin ñi nu canyí can tsihin inga jahma can, yihí tahnu can tan cayucú siin can. 8 Tacan tan quihvi ndihi inga ra tsica tsihin ra Jesús can, ra tsa tsaá tsa jihna nu ñaña can. Tan nyehe ra tsa cuvi can, tan tsinu iñi ra. 9 Tyin tsa jihna, ña cutuñi iñi ra naha tsa caahán nu tutu Nyoo, tyin ra Jesús cuñi tsi tsa nandoto ra tsa yaha cúu ra. 10 Tacan tan cuanuhu ra tsica tsihin ra Jesús nda yuvehe ra naha.

Nu quituyi ra Jesús nuu ña María quee ñuu Magdala
(Mr. 16.9-11)

11 Maa tyin tsa tsaá nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehé ihñi ña tsitsi ñaña can. 12 Tan nyehe ña uvi taahan ángel nditsí ra naha jahma cuitsin, nyecú ra naha nu tsicava cuñu ñuhu ra Jesús. Iin ra nyaá ityi nu tsicava jiñi ra, tan inga ra nyaá ityi nu tsicava tsaha ra. 13 Tan tsica tuhun ra ángel can naha ra tsi ña tan catyí ra naha:

—¿Nacuvi tsacú xaan un?

Tan catyí ña:

—Tsacú maa yu tyin quihin nyi vi tsi Jutu Mañi yu, tan ña tsitó yu nu maa tinyi ñi tsi ra —catyí ña tsihin ángel can.

14 Ndi caahán ca ña yacan, tan nanyico coo ña tan nyehe ña tsi ra Jesús ican. Maa tyin

ña tsitó ña tatun ra Jesús cuví ra. ¹⁵Tacan tan tsicā tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuñí maa ña tyin ra jahá cuenda cora yutun tata can cuví ra. Tan catyí ña:

—Tatta, tatun yooho quihín tsi ra Jesús, cahan tsihin yu nu maa tsindaca un tsi ra, tyin cunaquihin yu tsi ra —catyí ña tsihin ra.

¹⁶ Tacan tan catyí ra Jesús tsihin ña:

—¡María! —catyí ra tsihin ña.

Tan nanyehé ña tan cahan ña tsihin ra tsihin yuhu hebreo, tan catyí ña:

—¡Raboni! —Tan cuñí tsi catyí can: “Maestro”.

¹⁷ Tan catyí ra Jesús tsihin ña:

—Ña tñin un tsi yu, tyin ñaha ca cahun yu nu nyaá Jutu yu. Maa tyin cuaahan tan cahan un tsihin tandihí yañi yu tyin cuahan yu nu nyaá Jutu yu, tan juvin ñi Jutu ndihí ndo cuví tsi ra. Cuahan yu nu nyaá Nyoo yu, tan juvin ñi Nyoo ndo cuví tsi ra —catyí ra Jesús tsihin ña.

¹⁸ Tacan tan tsahan ña María ñuu Magdala can tsijacotó ña tsi ra tsicā tsihin ra Jesús tyin nyehe ña tsi ra tan cahan ra yacan tsihin ña.

Nu quituvi ra Jesús nuu ra tsicā tsihin ra

(Mt. 28.16-20; Mr. 16.14-18; Lc. 24.36-49)

¹⁹ Juvín ñi maa quivi can nu quitsaha vitya, tsa cua cuaa

tan ndu ijin ra tsicā tsihin ra Jesús. Tan ndasi vaħa yuvehe nu yucú ra naha tsa cuenda tsa yuuhví ra naha tsi ra cuví ityi nuu tsihin nyivi Israel. Tan ra Jesús quituvi ra tan tsinyaā nyityi ra mahñu ra naha. Tan tsaha ra nacumi tsi ra naha, tan catyí ra:

—Na coo tsa taxin añima ndo —catyí ra.

²⁰ Tsa yaha tsa cahan ra yacan tan janaha ra ndaha ra tan xiin ra tsi ra naha. Tan ra ican naha ra sii xaan cuñí ra naha tsa nyehe ra naha tsi Jutu Mañi yo. ²¹ Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumaa tsa tava Jutu yu tyiñu tsi yu, tacan tava nyico tucu yuhu tyiñu tsi nyooho —catyí ra tsihin ra naha.

²² Tacan tan tiví ra tsi ra naha tan catyí ra tsihin ra naha:

—Naquihin ndo Tatyí li Nyoo. ²³ Nyivi tsa jahá ndo tucahnu iñi, iyó tucahnu iñi tsi ñi. Tan nyivi tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tsihin ra naha.

Nu nyehe ra Tomás tsi Jutu Mañi yo tsa yaha nandotó ra

²⁴ Maa tyin ra Tomás, iin rq tsicā tsihin ra Jesús, ra tsa catyí ñi: “ra tñihí”, yoñi ra nyii tsihin ra naha tsa tsahan ra Jesús. ²⁵ Yaha can tan nacatyí tuhun ra tsicā tsihin ra Jesús tsihin ra:

—Nyehe ndi tsi Jutu Mañi yo —catyí ra naha tsihin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihví nduyu, tan ña cuaxin yu nundaha yu nu yihí nduyucan, tan ña cuaxin yu ndaha yu yiquí naha ra, ña cua tsinu íñi yu —catyí ra Tomás.

²⁶ Tsa yaha una quiví yucú nyico ra tsicá tsihin ra Jesús tsitsi iin vehe. Tan nyíí ra Tomás tsihin ra naha. Tacan tan vasu ndi maa ndasi vaha yuvehe, maa tyin ra Jesús quihví ra tan tsinyaa nyityi ra mahñu ra naha. Tan tsaha ra nacumi tsi ra naha tan catyí ra:

—Na coo tsa taxin añima ndo.

²⁷ Tacan tan quitsaha catyí ra tsihin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiquí naha yu. Tan ña cuví un ra ndava íñi. Tsinu íñi —catyí ra Jesús tsihin ra Tomás.

²⁸ Tacan tan nacahan ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

²⁹ Tan catyí ra Jesús tsihin ra:

—Yooho Tomás, vityin tsinú íñi un tyin nyehé un tsi yu. Si ca cuñí nyívi tsa nduve tsa nyehe tan tsinú íñi ñi —catyí ra Jesús tsihin ra Tomás.

Nu jacoto ra Juan nacuenda tsinu libru ihya

³⁰ Cuaha ca tsa iyo javaha ra Jesús nuu ra tsicá tsihin ra, maa tyin ña tandihí tsi nyaá nu libru ihya. ³¹ Tsinyaa tsa nyaá tyin tacan tan tsinu íñi ndo tyin ra Jesús cuví ra

Cristo, ra cuví Sehe Nyoo, tan coo ndo ñayívi nyitó tsa ña cua naa maa.

21

Nu quituví ra Jesús nuu utsa taahan ra tsicá tsihin ra

¹ Tsa yaha can tan quituví ra Jesús nuu ra tsicá tsihin ra inga tsaha. Tyehen quituví ra yatyin ñi yuhu miñi Tiberias:

² Iin ñi nu yucú ra Simón Pedro tan ra Tomás tsa nañi: “ra tñihí”, tan ra Natanael, ra ñuu Caná nu cuví Galilea. Tan yucú ndihí sehe ra Zebedeo naha ra tan uvi taahan ca ra tsicá tsihin ra Jesús. ³ Tan catyí ra Simón Pedro tsihin ra naha:

—Cuahan yu cua tñin yu tyaca —catyí ra.

Tan catyí ra naha tsihin ra:

—Cuhun ndihí ndi tsihin un —catyí ra naha.

Cuahán ra naha tan quihví ra naha tsitsi iin yutun ndoo, maa tyin tsacuaa can ndi intuhun maa tyaca ña ñihí ra naha. ⁴ Tsa cuñi cunditsin tan quituví ra Jesús nu nyíti yuhu miñi can. Maa tyin ra tsicá tsihin ra, ña nacoto ra naha tsi ra. ⁵ Tacan tan catyí ra tsihin ra naha:

—Nyooho ra cuatyí, ¿a ñaha ca ñihí ndo tyaca?

Tan nacahan ra naha tan catyí ra naha:

—Ñaha ca ñihí ndi.

⁶ Tacan tan nacahan ra Jesús tan catyí ra:

—Cuaxin ndo traya ndo tsiyo cuaha yutun ndoo juvin, tan cua ñihí ndo tyaca —catyí ra Jesús tsihin ra naha.

Tacan icā ra naha. Yaha can tan ndacua ña cuvī ca tava ra naha traya can nu ndutyā, tsa cuenda tsa cuaha tyaca yihī tsitsi can. ⁷ Tan ra tsa cuñī xaan ra Jesús catyí ra tsihin ra Pedro:

—Jutu Mañi yo cuvī ra!
—catyí ra tsihin ra Pedro.

Tsa tsiñi ra Simón Pedro tyin Jutu Mañi yo cuvī ra, tsinditsi ra jahma ra, tyin tava ra can tsa cua tiin ra tyaca, tan quihvi ra cuahán ra tsitsi ndutyā can. ⁸ Tan inga ra tsa tsicā tsihin ra Jesús tsaā ra naha nda yuhu miñi can tsihin yutun ndoo, ixtá ra naha traya can tyin tsitu cuii can tsihin tyaca, tyin yatyin ñi yuhu miñi can yucu ra naha tumaa iin cientu metru ñi. ⁹ Tsa nuu ra naha nu ñuhu, nyehe ra naha iin nu cayú tuun ñuhu. Tan canyii iin tyaca tsihin paan nuu tuun ñuhu can. ¹⁰ Tan catyí ra Jesús tsihin ra naha:

—Ndaça ndo taahan tyaca tsa ndi tiin ndo —catyí ra Jesús tsihin ra naha.

¹¹ Tan ndaa ra Simón Pedro nu yutun ndoo tan quitsaha ixtá caa ra traya tyin tsitu cuii can yihī tyaca nahnu. Cientu uvi xico utsi uñi ti yihī tsitsi can. Tan vasu cuaha xaan ti, maa tyin ña tanī traya can. ¹² Tacan tan catyí ra Jesús tsihin ra naha:

—Naha ndo tyin curumusa ndo —catyí ra Jesús tsihin ra naha.

Tan ndi intuhun ra tsicā tsihin ra, ña canā iñi ra naha ndaca tuhun ra naha yoo ra cuvī ra tyin tsitó ra naha

tyin Jutu Mañi yo cuvī ra. ¹³ Tacan tan natuhva ra Jesús tan quihin ra paan can, tan tsaha ra tsi ra naha. Tan juvin ñi tacan icā ra tsihin tyaca.

¹⁴ Yacan cuvī nu tsinu uñi tsaha quituvi ra Jesús nuu ra tsicā tsihin ra tsa yaha nan-doto ra.

Nu caahán ra Jesús tsihin ra Simón Pedro

¹⁵ Tsa yaha tsa curumusa ra Jesús, tan tsicā tuhun ra tsi ra Simón Pedro:

—Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacahan ra Pedro tan catyí ra:

—Tacan Jutu Mañi yu, maa un tsitó tyin cuñi yu tsi un —catyí ra Pedro.

Tan catyí ra Jesús tsihin ra:

—Cuhva tsa catsi mbee nyihi jana yu —catyí ra Jesús tsihin ra Pedro.

¹⁶ Tsicā tuhun nyico ra Jesús tsi ra inga tsaha:

—Simón, sehe ra Jonás, ¿a cuñi un tsi yu? —catyí ra Jesús tsihin ra.

Nacahan ra Pedro tan catyí ra:

—Jutu Mañi yu, maa un tsitó tyin cuñi yu tsi un —catyí ra Pedro tsihin ra.

Tan catyí ra tsihin ra:

—Jaha cuenda mbee jana yu —catyí ra Jesús tsihin ra.

¹⁷ Tan tsinu uñi tsaha tsicā tuhun nyico ra tsi ra:

—Simón, sehe ra Jonás, ¿a cuñi un tsi yu? —catyí ra Jesús tsihin ra.

Cuhva tsa tsicā tuhun ra tsi ra tsa tsinu uñi tsaha tatun

cuñí ra tsi ra, ra Pedro nducuihya xaan cuñí ra, tan catyí ra tsihin ra:

—Jutu Mañi yu, maa un tsitó nácaa añima yu tan maa un tsitó tyin cuñí yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu. ¹⁸ Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñí un cuhun un. Maa tyin tatun tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaça ra tsi un nu ña cuñí un cuhun un —catyí ra Jesús tsihin ra Pedro.

¹⁹ Tsa cahan ra Jesús yacan, cuñí ra cahan ra nácaa cua cúu ra Pedro tan cua jacahnu ra tsi Nyoo tacan. Yaha can tan catyí ra Jesús tsihin ra Pedro:

—iNaha quitsi nyicun un tsi yu! —catyí ra tsihin ra.

Nu caahán ra Juan tuhun maa ra

²⁰ Tacan tan natsico coo ra Pedro tan nyehe ra tyin nyicún inga ra tsa tsicá tsihin ra Jesús tsi ra naha, ra tsa cuñí xaan ra Jesús. Juvín ra tsinyanaa tsi ra Jesús tsa cuxiñi ra quivi can. Tan tsicá tuhun ra tsi ra tan catyí ra: “Jutu Mañi yu, ¿yóo ra cua xico tsi un?” catyí ra, tsicá tuhun ra quivi tsa ndi cumañi ca cúu ra Jesús. ²¹ Cuhva tsa nyehe ra Pedro tsi ra, tsicá tuhun ra tsi ra Jesús:

—Jutu Mañi yu, tan ra ihya, ¿náaa cua tahan ra? —catyí ra tsihin ra.

²² Nacahan ra Jesús tan catyí ra:

—Tatun cuñí maa yu tsa coo ra nda cuanda quitsi yu inga tsaha, ¿náaa cuenda yoocho? Cohon yoocho tsihin yu —catyí ra Jesús tsihin ra Pedro.

²³ Tacan tan iin yaha ñi tsinu tuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñí yuhu tsa coo ra nda cuanda quitsi yu inga tsaha, ¿náaa cuenda yoocho?”

²⁴ Yuhu cuví ra can, ra tsa cahan ra Jesús tuhun. Tan nyehe yu tandihí cuii maa tsa cuví tan tyaa yu nu libru ihya. Yuhu tsitó yu tyin tandihí tsa tyaa yu, tsa nditsa caahán tsi.

²⁵ Iyó cuaha ca tsa javaha ra Jesús. Tun tsatyin tsicun-yaá tandihí can nu libru, tsicá iñi yu tyin ndi ña cua cutahan can naní cahnu nu ñuhu ñayivi.

Tan na cuví tsi tacan ñi.

Tyiñu Tsa Javaha Ra Apóstol: Ra Tsa Tava Tyiñu Ra Jesucristo

*Nu catyí ra Jesús tyin cua
quitsi Tatyí Ii Nyoo*

¹ Yooho Teófilo, quivi tsa jacuhun yu tutu tsa jihna ñi can tsi un, tyaa yu tandihi tsa quitsaha javahá ra Jesús tan tandihi tsa jacuaha ra nda quivi jihna ñi, ² tan nda quivi nandaq ra andivi. Tan tsa ndi cumañi ca nandaq ra andivi, nacatsi ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra. ³ Tan cuaha xaan tundoho nyehe ra Jesús tan tsihi ra. Tan tsa yaha tsa tsihi ra, nandoto ra tan quituvi ra nu yucú ra tsa tava tyiñu ra. Tan tsitsi tsa uvi xico quivi, cuaha xaan tsaha quituvi ra nu yucú ra naha, tyin na coto ra naha tyin nditsa tsa nyito ra. Tan cahan ra Jesús tsihin ra naha nácaa ndacá ñaha Nyoo tsi yo.

⁴ Tsa ndi nyii ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahan yu tsihin ndo quivi can. ⁵ Nditsa tyin tsihin ndutya jacoondutya ra Juan tsi nyivi. Maa tyin

nyooho ña cuaha ca quivi tan coondutya ndo tsihin Tatyí Ii Nyoo —catyí ra Jesús tsihin ra naha.

Nu nandaq ra Jesús andivi

⁶ Tsa ndu iin ra tava tyiñu ra Jesús, tan tsica tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

⁷ Tan nacañan ra Jesús tan catyí ra tsihin ra naha:

—Ña taahán tsi coto nyooho ndáa quivi cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi. ⁸ Tyin quivi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihi ñuu tsa cayucú Judea tan Samaria, tan nda cuanda nanñi cahnu ñuhu ñayivi —catyí ra Jesús tsihin ra naha.

⁹ Tan tsa yaha tsa cahan ra Jesús tuhun ihya, tan tsitsi tsa nyehé ra naha tsi ra, nandaq ra andivi, tan quihvi ra tsitsi vico. Tacan tan ña nyehe ca ra naha tsi ra.

¹⁰ Tan cuhva tsa nyehé ndaá ra naha andivi, quituvi uvi taahan ángel Nyoo tsa nditsi jahma cuitsin yatyin ñi nu nyecú ra naha. ¹¹ Tan catyí ángel can naha ra tsihin ra tava tyiñu ra Jesús:

—Nyooho ra Galilea, ¿nacuenda nyehé ndaa xaan ndo andivi? Ra Jesús tsa

nyehē ndo nandaā ihya, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tsihin ra naha.

Nu nacatsi ra tava tyiñu ra Jesús tsi ra Matías tyin jaha tyiñu ra tyiñu tsa javaha ra Judas

¹² Tacan tan quitā ra tava tyiñu ra Jesús nu tsiyucu ra naha yucu nu iyó yutun olivo. Tan cuanuhu ra naha ñuu Jerusalén. Tan yatyin ñi canyií ñuu can, tumaa sava hora ñi tan tsaa yo. Tyin sava hora ñi cuví caca nyivi quivi quitatú ñi, tyin tacan catyí maa ley tsa tyaā ra Moisés. ¹³ Tsa tsaā ra naha ñuu Jerusalén can, ndaa ra naha nu tsinu uvi pisu vehe nu iyó ra naha. Tan ra tsa yucú can, cuví ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñí tsa nasama ra ndacá ñaha, tan tsihin ra Judas yañi ra Jacobo. ¹⁴ Tan tandihí ra ican naha ra ndu iín ra naha tandihí quivi tan tsicán tahvi ra naha tsi Nyoo. Tan yucú ndihí tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

¹⁵ Tan tsa tandihí nyivi tsa ndu iín quivi can quitá maa cientu oco ñi. Tacan tan nduvitā ra Pedro. Tan catyí ra tsihin ñi:

¹⁶ —Nyooho yañi, tsa nyaá tucu maa tsa tahañ ra Jesús cuhva ihya tan vityin tsa cundaā tsa cahañ ra David jaha

Tatyí li Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra. ¹⁷ Tan ra Judas cuví ra iin ra tsa tsinyií tsihin yo. Tan iin caa ñi jaha tyiñu ra tsihin yo. ¹⁸ Maa tyin tsahañ ra, tan jata ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacava ra tsihin jiñi ra, tan ndata tsitsi ra tan quitā tandihí tsiti ra. ¹⁹ Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñí tsi catyí Ñuhu cuenda tsa Tsañi Niñi Nyivi. ²⁰ Tyin nu libru Salmo catyí tsi cuenda ra Judas tyehen:

Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javaha ra.

²¹⁻²² Tan vityin yucú ra tsa cutahañ tsihin yo quivi tsinyií Jutu Mañi yo Jesucristo tsihin yo; nda quivi jacoondutyā ra Juan tsi ra, tan nda quivi nandaā ra cuahán ra andivi. Tan vityin ñiñi cuñí tsi tsi inga ra cuvi tsandaa tsihin yo tsa cuenda tsa nandoto ra Cristo —catyí ra Pedro.

²³ Tacan tan canā ra naha tsi uvi taahan ra naha. Canā ra naha tsi ra José tsa nañí Barsabás, tan juvin ñi nañí tucu ra Justo; tan canā tucu ra naha tsi ra Matías. ²⁴ Tan tsican tahvi ra naha tsi Nyoo tan catyí ra naha tyehen:

—Jutu Mañi yu, yooho tsitó un tsa tsicá iñi ndi tsihin añima ndi. Janaha tsi ndi

tsitsi tsa uvi taahan ra ihya naha ra, ndáa ra tsa nacatsi maa un, ²⁵ tyin cuiso ra tyiñu tsa jacunaā ra Judas tsa cuenda cuatyí ra, tan cuahán ra nu taahán maa tsi cuhun ra —catyí ra naha, tsican tahvi ra naha tsi Nyoo.

²⁶ Tacan tan tava cuenda ra naha ndáa ra cua tahan tsi cuiso tyiñu can. Tan tahan tsi tsi ra Matías. Ra ican cuví ra tahan tsi cutahan tsihin tsa utsi iin ra tsa tava tyiñu ra Jesús.

2

Nu nuu Tatyí Ii Nyoo

¹ Tsaā quivi vico Pentecostés, tan ndu iin tandihi nyivi tsa tsinú iñi tsi ra Jesús.

² Tan sana iñi ñi tan tsiñi ñi cucayu ityi andivi. Tumaa cucayu tsa vatsí tatyí xaan. Tan iyo xaan cuví tsitsi vehe nu yucú ñi. ³ Tacan tan quituví tumaa iin ñuhu tan tsaā tsi siqui intuhun intuhun ñi. ⁴ Tan tandihi ñi tsitu ñi tsihin Tatyí Ii Nyoo. Tan quitsaha caahán ñi inga yuhu cuhva tsa jacahan maa Tatyí Ii Nyoo tsi ñi.

⁵ Tan quivi can cuaha xaan ra ñuu Israel tsaā ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihi ñuu tsa cayucú nu ñuhu ñayivi. ⁶ Tan tsa tsiñi ra can naha ra tsa iyo xaan cuví nu yucú nyivi cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra yuhu ra naha tsa

caahán ñi jahá Tatyí Ii Nyoo. ⁷ Iyo xaan cuñi ra naha tan quitsaha natuhún tahan ra naha tan catyí ra naha:

—¿A ñavin nyivi ñuhu Galilea cuví tandihi ñi tsa caahán ihya? ⁸ ¿Nacuenda tyin tsiñi yo caahán ñi cuhva caahán intuhun intuhun yo? ⁹ Ihya yucú yo tsa cuví yo nyivi quee Partia, Media, Elam, Mesopotamia, Judea, Capadocia, Ponto, Asia, ¹⁰ Frigia, Panfilia, Egipto, tan nyivi quee ityi nuu ca Cirene ityi Africa. Tan yucú tucu yo tsa cuví yo nyivi ñuu Roma tan iyó yo ñuu ihya. Tan juhva yo cuví yo nyivi Israel nda quivi cacu yo. Tan inga yo cuví yo nyivi nanduví cuenda nyivi Israel tan nyicún yo ley tsa tyaa ra Moisés. ¹¹ Iyó tucu yo tsa cuví yo nyivi quee Creta tan Arabia. Maa tyin tandihi yo tan tsiñi yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

¹² Tandihi ra naha, iyo xaan cuñi ra naha, tan tsicá tuhun tahan ra naha tan catyí ra naha:

—¿Náa cuñi tsi catyí tandihi tsa cuví ihya? —catyí ra naha.

¹³ Maa tyin inga ra jacuñi nyaa ra naha tsi ñi, tan catyí ra naha tyin tsiñi ñi.

Nu caahán ra Pedro tsihin nyivi

¹⁴ Tacan tan nduvita ra Pedro tsihin tsa utsi iin ca ra

tava tyiñu ra Jesús. Tan ñihi cahān ra tan catyí ra:

—Nyooho yañi, tsa cuví ndo ra ñuu Israel, tan tandihi nyooho tsa iyó ñuu Jerusalén ihya. Cuñí tsi tsa coto ndo tuhun ihya. Tan tyaa soho vaha ndo tsa cua cahān yu tsihin ndo. ¹⁵ Tyin cuñí maa ndo tyin tsiñí ndi. Maa tyin ñavin nyixi tsihi ndi, tyin ña tuhvá nyivi coho nyixi hora ihya, tyin ndi jatyaan. ¹⁶ Maa tyin tsa cuví ihya cuví tsa cahān ra Joel, ra cuví ndusu yuhu Nyoo tahañ tsanaha. Tyin catyí ra:

¹⁷ Nu cua ndihi quivi, catyí Nyoo,

cua jaquitsi yu Tatyí Ii yu siqui tandihi nyivi.

Tan cua cahān sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi.

Tan nyivi tsahnu cua nyehe ñi ñumaahna jaha yu.

¹⁸ Cua jacuhun yu Tatyí Ii yu siqui ñi tsa jaha tyiñu tsa cuenda yu.

Tan cua cahān ñi tsa cuenda yu, catyí Nyoo.

¹⁹ Tan catyí ra tyin cua janaha ra tsa iyo cua nyehe nyivi ityi andivi.

Tan ityi nu ñuhu ñayivi cua javaha ra tsa iyo, seña niñi, seña ñuhu, tan vico yuhma.

²⁰ Tan ñicanyii cua ndunaa tsi. Tan yoo cua nducuaaha tsi tumaa cuaaha niñi.

Tandihi tuhun caahān ra ihya cua cuví tsi tsa ndi cumañi ca tahan tsi

quivi quitsi Jutu Mañi yo.

Tan quivi cua quitsi ra, iyo xaan cua cuvi.

²¹ Tan tandihi nyivi tsa tsicán tahvi tsi ra cua cacu ñi, catyí ra Joel jahā Nyoo.

²² Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyooho ra Israel, tyaa soho ndo tsa cua cahān yu ihya. Ra Jesús, ra ñuu Nazaret, maa Nyoo nacatsi tsi ra, tan tsa janaha Nyoo tsi yo tyin nditsa tsa nacatsi ra tsi ra, tsahā ra tunyee iñi tsi ra tan cuaha xaan tsa iyo tan tsa nyityi tan seña javaha ra. Tan tsa tsitó maa ndo tandihi tsa caahān yu ihya.

²³ Maa tyin quivi nacuhva cuenda ndo tsi ra, javaha ndo tumaa cuhva tyaa maa Nyoo cuhva nda quivi jihna ñi. Tyin tsahā cuenda ndo tsi ra tsi ra caquiñi. Tan ticaā ra naha tsi ra nu cruu. Tsahñi ra naha tsi ra jahā ndo. ²⁴ Maa tyin Nyoo janandoto ra tsi ra. Jacacu ra tsi ra tyin ña cuvi cundaca ñaha tuhun tsihi tsi ra. ²⁵ Tyin ra David cahān ra tuhun cahān ra Cristo tahañ tsanaha, tan catyí ra:

Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuví jayuhvi tsi yu.

²⁶ Yacan cuenda si xaan cuñi yu. Tan jacahnú yu tsi Nyoo tsihin tsa si cuñi yu.

Tan cuñu ñuhu yu cua quitatu tsi tyin tsitó yu tyin cua nandoto yu inga tsaha.

27 Tyin yooho, Nyoo Jutu
yu, ña cua nacoo ihñi
un añaima yu nu yucú
añaima nyivi tsa tsihi,

tan ndi ña cua cuhva un tsa
tyahyu cuñu ñuhu yu.

Tyin sehe ii maa un cuví tsi
yu.

28 Tan janaha un tsi yu ityi
nu coo yu ñayivi ña cua
naa maa.

Tan cua jacutu un tsi yu tsi-
hin tusi iñi tyin maa
un nyaá tsihin yu, catyi
ra David cahan ra tsa
cahan ra Cristo tahan
tsanaha.

29 Nyooho yañi, tsitó vaha
yo tyin ra David tsii tsaahnu
yo tsihi ra tan quihvi ra tsitsi
ñuhu. Tan ñaña ra ndi nyaá
tsi ihya vityin. 30 Maa tyin ra
David cuví ra iin ndusu yuhu
Nyoo. Tan tsitó ra tyin Nyoo
catyi ra tyin juvin ñi tata maa
ra cua cuví ra Cristo. Tan ra
Cristo, cuví ra cua cundaca
ñaha tumaa tsa tsindaca ñaha
ra David. 31 Tan ra David
tumaa tsa tyin nyehé ra tsa
cua cuví nu cuahan ca tsi ityi
nuu. Tan cahan ra tuhun tsa
cahan ra Cristo. Tan catyi
ra tyin ña cua ndoo añaima ra
nu yucú añaima nyivi tsa tsihi.
Tan ndi ña cua tyahyu cuñu
ñuhu ra, catyi ra. 32 Tan ra
Jesús can janandoto Nyoo tsi
ra. Tan tandihi maa ndi cuví
ndi tsandaa tsa cuenda tsa
nandoto ra. 33 Jutu Nyoo jac-
ahnu ra tsi ra Jesús, tan tsihin
ndaha cuaha ra cañihí ra tsi
ra nda gloria. Tan ra Jesús
naquihin cuenda ra Tatyí li
tsa catyi Jutu yo Nyoo tahan
tsanaha tyin cuhva ra tsi yo.

Tan yacan cuví tsa tsaḥa ra
tsi ndi vityin. Juvín tsi cuví
tsa nyehé ndo tan tsiñí ndo.

34 Tyin ñavin ra David nan-
daa ityi andivi. Maa tyin maa
ra David cahan ra tuhun ra
Jesús, tan catyi ra:

Jutu Mañi yo Nyoo catyi ra
tsihin Jutu Mañi yu ra
Cristo: “Cunya xii
cuaha yu

35 tsitsi tsa cua caquin yu tsi
ra xaan iñi tsi un tsaḥa
un”, catyi ra David
jaha Nyoo.

36 Tacan cahan ra Pedro tsi-
hin ra naha, tan catyi tucu ra:

—Nyooho tan tandihi ca
nyivi Israel, coto vaha ndo
tyin tuhun ra Jesús, yacan
cuví tsa caahan yu tsihin ndo
ihya. Ticaa ndo tsi ra nu cruu.
Maa tyin cuví ra Jutu Mañi
yo, tan cuví tucu ra Cristo ra
ndaca ñaha tsi yo jaha Nyoo
—catyi ra Pedro.

37 Cuhva tsa tsiñi ra naha
tsa cahan ra Pedro tuhun
ihya, cuihya xaan cuñi ra
naha cuví. Tan tsica tuhun
ra naha tsi ra Pedro tan tsi
tandihi ca ra tava tyiñu ra
Jesús, tan catyi ra naha:

—Yañi, ¿naca javaha ndi
vityin? —catyi ra naha tsihin
ra tava tyiñu ra Jesús.

38 Tacan tan catyi ra Pedro
tsihin ra naha:

—Intuhun intuhun ndo
ndu uvi iñi ndo cuatyí ndo
tan nasama ndo cuhva iyó
ndo. Tan coondutya ndo
tsihin sivi ra Jesucristo. Tan
cua jaha ra tucahnu iñi cuatyí
ndo. Tacan tan cua cuhva
Nyoo Tatyí li ra tsi ndo.

39 Tyin tahan tsanaha catyi

Nyoo tyin cuhva ra Tatyí lí ra tsi yo, tan tsi sehe yo, tan tsi nyívi tsa cañi iyó. Tyin tandihí nyívi tsa cua nacana Jutu Nyoo cua cuhva ra Tatyí lí ra tsi ñi —catyí ra Pedro.

⁴⁰ Tsihin tuhun ihya tan tsihin inga ca tuhun, ra Pedro tsahá cuenda ra tsi ra naha tan catyí ra tsihin ra naha:

—Nducu ndo cuhva na jacacu Nyoo tsi ndo, coto cunaa ndo tsihin nyívi caquiñi iyó nu ñuhu ñayívi ihya —catyí ra tsihin ra naha.

⁴¹ Tacan tan tandihí ra tsa tyaa yahvi tuhun cahān ra Pedro tsicoondutyā ra naha. Tan quitá tumaa uñi mil nyívi tsa tandihí ñi, tan ndu iin ñi tsihin nyívi yihí cuenda ra Jesucristo. ⁴² Tan tandihí quívi ndu iin tandihí ñi, tan ñi iñi ñi tyaá soho ñi tsa jacuahá tandihí ra tava tyiñu ra Jesucristo tsi ñi. Tan iin ñi cuví ñi tsihin tahan ñi, tan tsicān tahvi ñi tan tsatsí ñi paan tan tsihí ñi vinu tyin tacan tan ña cua naa iñi ñi tyin tsihí ra Cristo tsa cuenda cuatyí ñi.

Cuhva iyó nyívi yihí cuenda Jutu Mañi yo Jesucristo quívi can

⁴³ Tan cuaha tsa iyo javaha tandihí ra tsa tava tyiñu ra Jesucristo jahā Nyoo. Tan tandihí ñi iyo cuñi ñi.

⁴⁴ Tandihí ñi yihí cuenda ra Cristo iin caa ñi iyó ñi tsihin tsa iyó tsi ñi. ⁴⁵ Xicó ñi tsa iyó tsi ñi. Tan tsatsá ñi xuhun ñi tsi nyívi tahan ñi cuhva tsa tsiñi ñuhu tsi intuhun intuhun ñi. ⁴⁶ Tandihí quívi tan ndu iin ñi nda vehe ñuhu

cahnu. Tan nda yuvehe ñi iin caa ñi tsatsí ñi paan tan tsihí ñi vinu. Tan siñi cuñi ñi tsatsí ñi tyin iin ñi cuví ñi. ⁴⁷ Tan jacahnú ñi tsi Nyoo. Tan vaha caahān tandihí nyívi tuhun ñi. Tan iin tan iin quívi tan nducuahá ca nyívi quihví cuenda Jutu Mañi yo Jesús tyin jacacú ra tsi ñi.

3

Nu nduvahā iin ra coxo

¹ Iin quívi cuahān ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyívi Israel cuahān cuandacān tahvi tsi Nyoo.

² Tan iin ra ndaahvi, coxo ra nda quívi cacū ra, nyaá ra yuhu cora vehe ñuhu cahnu can tandihí maa quívi. Tyin tsindacá ñi tsi ra na ndacan ra xuhun tsi nyívi quihví yuhu cora can, tan nañi tsi Yuhu Cora Siñi Caá. ³ Tacan tan nyehe ra coxo can tsi ra Pedro tsihin ra Juan tsa cua quihví ra naha yuhu cora can. Tan tsicān ra xuhun tsi ra naha.

⁴ Tan nyehe ra Pedro tan ra Juan tsi ra. Tan ra Pedro catyí ra tsihin ra:

—Nyehe tsi ndi —catyí ra.

⁵ Tacan tan quitsahā nyehe ra coxo can tsi ra naha. Cuñi maa ra tyin iyó tsa cua cuhva ra naha tsi ra. ⁶ Maa tyin ra Pedro catyí ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sívi ra Jesucristo ra ñuu Nazaret, nduvita tan

caça —catyí ra Pedro tsihin ra.

⁷ Tacan tan tñin ra Pedro ndaha cuaha ra tan cañihí ra tsi ra. Tan juvin ñi cuhva can nacoḡ tunyee iñi nduvi taahan tsaha ra tan jucun tsaha ra. ⁸ Tacan tan ra coxo can ndava ra, tan nduvita ra tsinyaá nyityi ra. Tan quitsaha tsicá ra. Tan quihví ra tsihin ra naha tsitsi cora vehe ñuhu can, tsicá ra, tan ndavá ra, jacahnú ra tsi Nyoo. ⁹ Tandihí nyivi nyehe ñi tsi ra tyin tsicá ra tan jacahnú ra tsi Nyoo. ¹⁰ Tan iyo xaan cuñí ñi tan yuuhví ñi tsa cuenda tsa nduvaha ra can. Tyin nacotó ñi tsi ra. Tyin juvin ra cuví ra tsa tuhvá tsinyaá Yuhu Cora Sií Caá can tsicán ra xuhun tsi nyivi.

Nu caahán ra Pedro tuhun ra Cristo tsihin nyivi nu cuví corredor cuenda ra Salomón

¹¹ Ra coxo tsa nduvaha can, ña jañá maa ra tsi ra Pedro tan ra Juan. Tan tandihí nyivi iyo cuñí ñi, tan tsinú xaan ñi tsaá ñi nu cuví corredor cuenda ra Salomón tyin cua nyehe ñi tsi ra coxo can tyin tsa nduvaha ra. ¹² Tsa nyehe ra Pedro yacan, tan catyí ra tsihin nyivi can:

—Nyooho ra Israel, ¿nacuenda iyo xaan cuñí ndo? Tan ¿nacuenda nyehe xaan ndo tsi nyuhu? ¿A cuñí maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuví janduvaha ndi tsi ra coxo ihya? ¹³ Ñavin maa nyuhu janduvaha tsi

ra. Nyoo ra cuví Nyoo tsii tsaahnu yo, ra Abraham, ra Isaac tan ra Jacob, ra ican jacahnú tsi Sehe ra tan tsaḡ ra tunyee iñi tsi ra, ra tsa tsaḡ cuenda ndo tsi ra Pilato, ra cumí tyiñu. Tan ra Pilato cuñí ra jaña ra tsi ra. Maa tyin nyooho ña tsaḡ ndo. ¹⁴ Tahan tsi tsa ndacan ndo tsa jaña ra tsi ra vaha, tan ra ii can, maa tyin nyooho tsican ndo tsa jaña ra tsi iin ra tsaññi ndiyi. ¹⁵ Tan nyooho tsaññi ndo tsi ra tsa tsaḡ ñayivi nyito coo yo tsihin Nyoo. Maa tyin Nyoo Jutu yo janandoto ra tsi ra. Tan ña ndoḡ ra nu yucú añima nyivi tsa tsihi. Tan nyuhu cuví ndi tsandaa tsa cuenda tsa nandoto ra. ¹⁶ Tan juvin ra Jesús cuví ra tsa tsaḡ tunyee iñi tsi ra coxo ihya tan nduvaha tsaha ra, tyin tsinú iñi ndi tyin iyó tunyee iñi tsi ra Jesús. Yacan cuenda nduvaha tsaha ra ihya, tan nacotó vaha ndo tsi ra. Tan tandihí nyooho nyehe ndo tyin nduvaha ra tsa cuenda tsa tsinú iñi ndi.

¹⁷ 'Tsitó yu, —catyí ra Pedro— tyin quivi tsa tsaññi ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuví ityi nuu tsihin ndo, ña tsitó ra naha. ¹⁸ Maa tyin tacan jacuvi ndo tan cundaḡ tsa caḡan ra cuví ndusu yuhu Nyoo tahan tsanaha, tyin catyí ra naha tyin ra Cristo cua nyehe ra tundoho. ¹⁹ Yacan cuenda ndu uvi iñi ndo cuatyí ndo, tan nacuhva

cuenda ndo aña ndo tsi Nyoo, na ndatsi cuatyí ndo. Tacan tan sii xaan cua cuñi aña ndo jaha tunyee iñi Jutu Mañi yo. ²⁰ Tacan tan cua jaquitsi ra tsi ra Jesús ra cuví Cristo, na quitsi ra inga tsaha. Tyin nda quivi jihna ñi tyaa Nyoo cuhva tyin quitsi ra tsa cuenda yo. ²¹ Taahán tsi tsa ndoó ra Jesucristo gloria tsa vityin nda cuanda quivi cua jandutsaa Nyoo tandihi maa tsa iyó. Tumaa cuhva catyí ra cuví ndusu yuhu Nyoo tahañ tsanaha. ²² Tyin tacan catyí ra Moisés tsihin tsii tsaahnu yo: “Cua jaquitsi Jutu yo Nyoo tsi ra tsa cua cahan tuhun ra. Tan juvin ñi nyivi yo cua cuvi ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandihi tsa cua cahan ra tsihin ndo. ²³ Tyin tandihi nyivi tsa ña cua tyaa soho tsa cua cahan ra, cua cunaa ñi, tyin ña cua cutahan ñi tsihin nyivi tsa nacatsi Nyoo”, catyí ra Moisés.

²⁴ Tan tacan tucu tandihi ra cuví ndusu yuhu Nyoo nda quivi tsicoo ra Samuel tan nda cuanda vityin, jacoto ra naha tsa cuví vityin. ²⁵ Tandihi tsa catyí Nyoo tyin cuhva ra tsi yo, cahan ra cuví ndusu yuhu Nyoo tahañ tsanaha. Tandihi can tsii maa ndo cuví can. Tan tyiñu tsa ndoo Nyoo tsihin ra Abraham tsii tsaahnu yo, juvin ñi tsa cuenda maa ndo cuví yacan. Tyin catyí Nyoo tsihin ra Abraham: “Tandihi nyivi tsa iyó nu ñuhu ñayivi cua

nasoco yu tsi ñi tsa cuenda nyivi tata un.” ²⁶ Tan yacan cuenda quivi janandoto Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo naco ndo tsa caquiñi iyó ndo —catyí ra Pedro tsihin ñi.

4

Nu tñn ra cuví ityi nuu vehe ñuhu cahnu naha ra tsi ra Pedro tan ra Juan

¹ Ndi caahán ca ra Pedro tan ra Juan tsihin nyivi, tan tsaá ra cuví jutu naha ra tsihin ra cuví ityi nuu tsihin ra jahá cuenda vehe ñuhu, tan tsihin ra cuví saduceo naha ra. ² Nduxaan xaan ra naha tyin ra Pedro tan ra Juan jacuahá ra naha tsi nyivi tan catyí ra naha tyin nditsa tsa cua nandoto nyivi tsa tsa tsihi, tyin ra Jesús nandoto ra. ³ Tacan tan tñn ra naha tsi nduvi taahan ra tava tyiñu ra Jesús can naha ra. Tan tyihí ra naha tsi ra naha vehe caa. Tan ndoo ra naha nda cuanda inga quivi tyin tsa cueñi cuví cuhva can. ⁴ Maa tyin cuaha ñi tsa tsiñi tuhun caahán ra Pedro quit-saha tsinú iñi ñi. Tan ndu iin ñi tsihin nyivi yihí cuenda ra Jesús. Tan tsa tandihi ñi quitá maa uhun mil cuví tsa maa ñi maa rayi naha ra.

⁵ Tsa tuvi inga quivi, nda ñuu Jerusalén ndu iin tandihi ra cumí tyiñu cuenda nyivi Israel, tan tsihin ra tsahnu, tan tsihin ra cuví maestro cuenda ley tsa tyaa ra Moisés. ⁶ Tan nyii tucu ra Anás ra

jutu tsaahnu cuví ityi nuu. Tan nyii tucu ra Caifás, tan ra Juan, tan ra Alejandro. Tan yucú ndihi tucu tandihi rayii tsa cuví nyivi ra jutu tsaahnu cuví ityi nuu. ⁷ Tacan tan tavā tyiñu ra naha na cuquihin ra naha tsi ra Pedro tan ra Juan. Tan tsindaçā ra naha tsi ra naha nda mahñu nu yucú ra naha. Tan tsicā tuhun ra naha tsi ra naha, tan catyi ra naha:

—¿Yóo tsaḥā ndatu tsi ndo tsa janduvaha ndo tsi ra can? ¿Yóo tsaḥā tunyee iñi tsi ndo tsa javaha ndo tyehen? —catyi ra naha tsihin ra Pedro tan ra Juan.

⁸ Tan ra Pedro tsitú ra tsihin Tatyí Ii Nyoo. Tan nachañ ra tsihin ra naha:

—Nyooḥo ra ndacá ñaha Israel ñuu yo ihya, tan nyooḥo ra tsaḥnu. ⁹ Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihya, tyin cuñí ndo coto ndo nácaa nduvahā ra. ¹⁰ Yacan cuenda cua catyi tuhun ndi tsihin ndo na coto tandihi nyivi Israel. Tyin ra ihya nyaá ra nuu tandihi ndo, tyin nduvahā ra tsihin tunyee iñi tsi ra Jesucristo, ra ñuu Nazaret, ra tsa tsaḥā cuenda ndo na cúu ra nu cruu. Maa tyin Nyoo janandoto ra tsi ra. ¹¹ Tan juvin ra Jesús cuví yuu tsa tsiñí ñuhu ca tsa ña cuñí ra javahá vehe cuatyíñu ra, tumaa cuhva catyi nuu tutu Nyoo. Tan nyooḥo cuví ra javahá vehe tan ña cuñí ndo yuu tsa tsiñí ñuhu ca can. ¹² Yoñi inga ra cuví jacacú tsi yo. Tyin intuhun ñi maa ra

tsaḥā Nyoo tyin jacacu ra tsi yo —catyi ra Pedro tsihin ra can naha ra.

¹³ Tan ra cumí tyiñu can naha ra iyo xaan cuñí ra naha tsiñí ra naha tsa caahán ra Pedro tan ra Juan tyin ñi xaan iñi ra naha caahán ra naha, tan ñavin ra cahvi scuela cuví ra naha. Tacan tan nacoto ra naha tsi ra naha tyin ra ican naha ra cuví ra tsa tsicā tsihin ra Jesús quivi can. ¹⁴ Tan ra tsa nduvahā can, nyaá nyityi ra tsihin ra naha. Yacan cuenda ña cuví cahan ra cumi tyiñu can naha ra tsa ndavaha ñi siqui ra Pedro tan ra Juan. ¹⁵ Tacan tan catyi ra cumi tyiñu naha ra tsihin ra naha:

—Quita nduñi taahan nyooḥo tsata vehe.

Tan quita ra naha. Tan ndoḥo ra cumi tyiñu can naha ra natuhún tahan ra naha. ¹⁶ Tan catyi ra naha:

—¿Náa javaha yo tsihin ra ihya naha ra? Tyin tandihi maa nyivi Jerusalén tsitó ñi tsa iyo tsa javahā ra naha. Tan ña cua cuví catyi yo tyin ña nditsa. ¹⁷ Maa tyin ña cuñí yo tsa cuaha ca nyivi coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyivi —catyi ra cumi tyiñu naha ra.

¹⁸ Tacan tan canā ra cumí tyiñu tsi ra Pedro tan ra Juan. Tan catyi ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyivi. ¹⁹ Maa tyin ra

Pedro tan ra Juan nacahan ra naha tan catyí ra naha:

—Tyihí tuñi ndo iñi ndo tan nyehe ndo tatun vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo. ²⁰ Tyin nyuhu ña cuví tsa jandihí ndi tsa nacatyí tuhun ndi tsa nyehe ndi tan tsa tsiñi ndi —catyí ra naha.

²¹ Tacan tan tyasi nyico ra cumi tyiñu naha ra tsi ra Pedro tan ra Juan. Tan jaña ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihí nyivi tan jacahnú ñi tsi Nyoo tsa cuenda tsa cuví can. ²² Tyin rayi tsa nduvaha can, tsa yaha uvi xico cuiya ra, tan tacan cuiya taha ra tundoho tan nduvaha ra jaha Nyoo.

Nu tsican nyivi yihí cuenda ra Cristo tunyee iñi Nyoo

²³ Tan tsa quitá ra Pedro tan ra Juan, cuahan ra naha nu yucú nyivi yihí cuenda ra Jesús. Tan nacatyí tuhun ra naha tandihí tsa cahan ra tsahnu naha ra tan ra jutu tsa cuví ityi nuu naha ra tsihin ra naha. ²⁴ Cuhva tsa tsiñi tandihí ñi, tan iin caa ñi quit-saha tsicán tahvi ñi tsi Nyoo. Tan catyí ñi:

—Jutu Mañi yu, yooho javaha un andivi tan ñuhu ñayivi. Javaha un ndutya ñuhu. Tan tandihí ca tsa iyó, maa un javaha. ²⁵ Tan yooho tsihin Tatyí Ii un jacahan un tsi ra David taha tsanaha. Tan catyí ra:

¿Nacuenda tsa nduxaán nyivi ña tsitó tsi Nyoo?

¿Nacuenda tsicá iñi ñi tuhun tsa nduve yahvi nyaá?

²⁶ Rey naha ra tan tsihin ra tsa ndacá ñaha nu ñuhu ñayivi ihya nduvita ra naha

siqui un, Jutu Mañi yu, tan siqui ra Cristo, ra nyisó tyiñu maa un, catyí ra David.

²⁷ Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi ra naha tsi ra Jesús Sehe ii un, tsa nacatsi vaha maa un.

²⁸ Tan tacan javaha ra naha, tumaa kuhva tsa catyí maa un taha tsanaha tyin cua cuví. ²⁹ Tan vityin, Jutu Mañi yu, nyehe tyin cuñi ra naha casi ra naha tsi ndi. Tan kuhva tsa ñi coo iñi ndi tyin tyiñu maa un javahá ndi, Jutu Mañi yu. Tan na ña nayuhvi ndi cahan ndi tuhun maa un. ³⁰ Tan tsihin tunyee iñi maa un tan cua nduvaha nyivi cuuhví, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyí ñi, tsicán tahvi ñi tsi Nyoo.

³¹ Tan kuhva tsa ndihí tsican tahvi ñi tsi Nyoo tan taan nu yucú ñi. Tan tandihí ñi tsitu ñi tsihin Tatyí Ii Nyoo tan cahan ñi tuhun Nyoo tsihin tsa ña yuhvi ñi.

Nduve tsa cumañi tsi nyivi yihí cuenda ra Cristo

³² Tandihí ñi tsa tsinú iñi, iin ñi cuví ñi, tan iin ñi kuhva

tsicá iñi ñi. Ndi intuhun ñi tan ña catyí ñi tyin tsa tsii maa ñi cuví tsa iyó tsi ñi, tyin tsii tandihi ñi cuví can. ³³ Tan tsihin tunyee iñi cahnu, caahán ra tava tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihi ra naha. ³⁴ Tan ndi intuhun ñi tan nduve tsa cumañi tsi ñi tyin tandihi ñi tsa iyó vehe o ñuhu ñi, xicó ñi can. Tan cua ndaca ñi xuhun can ³⁵ tsi ra tava tyiñu ra Jesús. Tan maa ra naha natsatsá xuhun can tsi intuhun intuhun nyivi cuhva tsa tsiñi ñuhu tsi ñi. ³⁶ Tacan javaha iin ra tsa nañi José. Ra ican cuví ra tata ra Leví. Tan cacu ra ñuhu Chipre tsa canyii mahñu ndutya ñuhu. Tan ra tava tyiñu ra Jesús jacunañi ra naha tsi ra Bernabé. Tan siyi can cuñi tsi catyí: ra jandu iin iñi nyivi. ³⁷ Tan ra Bernabé can xico ra ñuhu ra. Tan tsaha ra xuhun can tsi ra tava tyiñu ra Jesús.

5

Cuatyi ra Ananías tsihin ña Safira

¹ Maa tyin iin ra tsa nañi Ananías tsihin ña Safira, ñasihi ra, xico ñi iin ñuhu. ² Tan tyihí xeehe ñi juhva xuhun. Tacan tan ra Ananías tsindaca ra xuhun tsa ndoo ña tsi ra tava tyiñu ra Jesús. Tan catyí ra tyin tandihi xuhun tsa cuyahvi ñuhu cuví can. ³ Tacan tan catyí ra Pedro tsihin ra:

—Yooho Ananías, ¿nacuenda tsa tsaha un tsa quihvi nu ña

vaha añima un? Tyin cuñi un jandavi ñaha un tsi Tatyí Ii Nyoo, tan catyí un tyin tandihi xuhun tsa cuyahvi ñuhu can cuví tsehe, tan ña nditsa un tyin ndoo juhva xuhun can tsi un. ⁴ Tsi un cuví ñuhu can, tan tsii un cuví xuhun tsa ñihí un cuenda ñuhu can. ¿Nacuenda tsa cuñi un jandavi ñaha un tsi Nyoo tan catyí un tyin tandihi xuhun can tsaha un? Maa tyin ñavin tsi nyuhu jandavi ñaha un, tyin tsi maa Nyoo jandavi ñaha un —catyí ra Pedro tsihin ra Ananías.

⁵ Tsa tsiñi ra Ananías tuhun tsa cahan ra Pedro, nduva ra tan tsihi ra. Tan tsa tsito nyivi tuhun ihya tan nayuhvi xaan ñi. ⁶ Tacan tan tsaq ra cuatyí naha ra tan cava nuu ra naha jahma cuñu ñuhu ra Ananías. Tan tsahan ra naha tsindaca ra naha tsi ra nu ndaa cumi santu. ⁷ Yahá uñi hora tan tsaq ñasihi ra Ananías tan quihvi ña nu yucú ra tava tyiñu ra Jesús, tyin ña tsitó ña tsa cuví. ⁸ Tan quitsaha tsicá tuhun ra Pedro tsi ña tan catyí ra tsihin ña:

—¿A tyehen ñi cuví xuhun tsa cuyahvi ñuhu ndo? —catyí ra Pedro tsihin ña.

Tacan tan nacahan ña tan catyí ña tsihin ra:

—Tacan ñi cuví xuhun tsa cuyahvi tsi —catyí ña tsihin ra.

⁹ Tacan tan catyí ra Pedro tsihin ña:

—¿Nacuenda tsa natuhun tahan ndo tan cuñi ndo jandavi ñaha ndo tsi Tatyí Ii Jutu Mañi yo Nyoo? Ican vatsí ra tsa tsahan tsindaca

tsi yⁱⁱ un nu ndaa cumi santu. Tan vityin cua cundaca ndihⁱ ra naha tsi un —catyí ra Pedro tsihin ña Safira.

¹⁰ Tan juvin ñi cuhva can tan nduva ña tsaha ra Pedro, tan cueta tsihⁱ ña. Tan quihvⁱ ra cuatyí can naha ra, tan nyehe ra naha tyin canyí ña tsihⁱ ña. Tan cañihⁱ ra naha tsi ña, tan tsindacá ra naha tsi ña nu ndaa cumi sandu. Tan tinyⁱⁱ ra naha tsi ña xiin yⁱⁱ ña. ¹¹ Tan tandihⁱ nyivⁱ yihⁱ cuenda ra Cristo, tan tandihⁱ nyivⁱ tsa tsit^o tuhun can, nayuhvⁱ xaan ñi.

Cuaha xaan tsa iyo tan seña javahá ra tava tyiñu ra Jesús

¹² Cuaha seña tan tsa iyo javahá ra tava tyiñu ra Jesús nu yucú nyivⁱ. Tan tandihⁱ ñi yihⁱ cuenda ra Cristo ndu iín ñi nu cuví corredor cuenda ra Salomón. ¹³ Tan nyivⁱ tsa inga cuenda ña caná iñi ñi cutahan ñi tsihin ñi yihⁱ cuenda ra Cristo. Maa tyin nyivⁱ can vaha caahán ñi siqui ñi yihⁱ cuenda ra Cristo. ¹⁴ Tan cuaha xaan nyivⁱ quitsahá tsinú iñi tsi Jutu Mañi yo Jesús, tahan ñi rayⁱⁱ tan ñaha. ¹⁵ Tan nda cuanda tavá ñi tsi nyivⁱ cuuhvⁱ ityi cahnu, tsaquín ñi tsi ñi nu tsito. Tyin tatun cua yaha ra Pedro tan yaha tixahñu ra siqui ñi cua nduvaha ñi. ¹⁶ Tacan tucu nyivⁱ iyó yatyin ñi ñuu Jerusalén can, cuandacá ñi tsi nyivⁱ cuuhvⁱ tan nyivⁱ tsa yihⁱ tatyí ña vaha. Tan nduvahá tandihⁱ ñi.

Nu nyehé ra Pedro tan ra Juan tundoho

¹⁷ Tacan tan ra jutu tsaahnu tsa cuví ityi nuu, tan ra yihⁱ cuenda ra cuví saduceo naha ra, ndasi cuñí ra naha nyehé ra naha tsi ra tava tyiñu ra Jesús tsa cuenda tsa vaha tsa javahá ra naha tsihin tunyee iñi tsa tsaha Nyoo tsi ra naha. ¹⁸ Tacan tan tñⁿ ra naha tsi ra naha. Tan tyihⁱ ra naha tsi ra naha vehe caa. ¹⁹ Maa tyin tsa cuaa can quitsⁱ iin ángel tsa jaquitsⁱ Jutu Mañi yo, tan nuñá ra yuvehe caa can. Tan tava ra tsi ra naha. Tan catyí ra tsihin ra naha:

²⁰ —Cuaahan ndo tan cunyacu nyityi ndo vehe ñuhu cahnu. Tan nacatyí tuhun ndo tsihin nyivⁱ nácaa coo ñi ñayivⁱ nyito tsa iyó ndo —catyí ángel can tsihin ra naha.

²¹ Tsa tsiñi ra naha tsa cahán ra ángel can, tan cuahán ra naha. Tan tsa tuvⁱ inga quivⁱ can nañihⁱ nyivⁱ tsi ra naha vehe ñuhu cahnu. Tan quitsahá jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iñⁿ ra jutu tsaahnu tsa cuví ityi nuu tan ra tsa yucú tsihin ra. Tan caná ra naha tsi ra cumi tyiñu cuenda nyivⁱ Israel tyin coo ra naha junta. Tacan tan tava tyiñu ra naha na cuquihin ra naha tsi ra tava tyiñu ra Jesús nu yucú ra naha vehe caa can. ²² Maa tyin cuhva tsa tsaá ra vitya naha ra tsitsi vehe caa can, ña

nañihí ra naha tsi ra naha. Tan cuanuhú ra naha cua nacatyí tuhun ra naha tsihin ra jutu tsaahnu tsa cuví ityi nuu. ²³ Tan catyí ra naha tsihin ra:

—Ndasí yuvehe caa can tan tsaá ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuñá ndi yuvehe can, yoñi maa nañihí ndi —catyí ra naha tsihin ra jutu tsaahnu tsa cuví ityi nuu.

²⁴ Tacan tan ra jutu tsaahnu tsa cuví ityi nuu can tsihin ra yihí ndaha tsi tandihí ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñi ra naha tsa cahan ra vitya naha ra tsihin ra naha tan iyo xaan cuñi ra naha. Tan natuhun tahan ra naha nácaa javaha ra naha tan cundihí tuhun can. ²⁵ Tacan tan tsaá iin ra tan catyí ra:

—Ra tsa tyihí ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

²⁶ Tacan tan ra yihí ndaha tsi ra jahá cuenda vehe ñuhu can, tsaahan ra tsihin ra vitya naha ra, tan tsiquihin ra naha tsi ra tava tyiñu ra Jesús tsihin tsa vii ñi tan ña cañi ra naha tsi ra naha, tyin yuuhví ra naha tsi nyivi coto cañi ñi yuu tsi ra naha. ²⁷ Tsindaca ra naha tsi ra tava tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityi nuu catyí ra tsihin ra tava tyiñu ra Jesús:

²⁸ —Nyuhu tsa cahan vaha xaan ndi tsihin ndo tyin ña cahan ca ndo tuhun ra Jesús. Maa tyin nyooho ña tyaa soho ndo tsa cahan ndi. Tan tsa ndihi maa tsitsi ñuu Jerusalén jacotó ndo tuhun ra. Tan cuñi ndo tyaa ndo cuatyí can siqui ndi tyin tsihi ra —catyí ra jutu tsaahnu tsa cuví ityi nuu tsihin ra naha.

²⁹ Tacan tan nacahan ra Pedro tan inga ra tava tyiñu ra Jesús, tan catyí ra naha:

—Taahán tsi tyaa yahvi jihna ndi tsi Nyoo tan ñavin ca tsi nyooho. ³⁰ Nyoo cuenda tsi tsaahnu yo juvin ra janandoto tsi ra Jesús, ra tsa ticaá ndo nu cruu tan tsahñi ndo. ³¹ Tan ra Jesús cuví ra tsa jacahnu xaan Nyoo, tan tyaa ra tsi ra xiin cuaha ra, tyin cua cundaca ñaha ra tandihí maa. Tan intuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi iñi yo cuatyí yo tan jaha ra tucahnu iñi cuatyí yo. ³² Tan nyuhu cuví ndi tsandaa tsa cuenda tandihí yacan. Tan tacan cuví tucu Tatyí li Nyoo tsa tsahá Nyoo cunyaa añima nyivi tyaá yahvi tsi ra —catyí ra Pedro tsihin ra naha.

³³ Tan tsa tsiñi ra naha tsa cahan ra Pedro, nduxaan xaan ra naha. Tan cuñi ra naha cahñi ra naha tsi ra naha. ³⁴ Maa tyin tsihin ra cumi tyiñu can naha ra nyii iin ra cuví fariseo tsa nañi Gamaliel. Tan cuví ra maestro cuenda ley Nyoo tsa tyaa ra Moisés. Tan nyivi tyaá yahvi xaan ñi tsi ra. Tan

ra Gamaliel can, nduvitā nyityi ra. Tan caahán ra na quita ra tava tyiñu ra Jesús tañi ñi. Tacan tan quita ra naha. ³⁵ Tan quitsahā caahán ra Gamaliel can tsihin tandihī ca ra cumí tyiñu naha ra, tan catyí ra:

—Yoo, ra tsa ndacá ñaha tsi nyivi Israel, jaha yo cuenda tsi yo tsihin tsa cua javaha yo tsi ra ican naha ra. ³⁶ Ndūcuhun iñi ndo tyin tsa iyó juhva quivi nduvitā iin ra tsa tsinañi Teudas. Tan catyí ra tyin cuví ra iin ra vaha. Tan quita maa tumaa cumi cientu rayi tsinyicun tsi ra. Maa tyin yahā can tsahñi nyivi tsi ra. Tan tandihī ra tsa tsinyicun tsi ra cuanuhu ra naha ñuu ra naha. Tan tsindihī tuhun can. ³⁷ Yahā can tan nu cuahán ca tsi ityi nuu, quivi nacahvi ra gobiernu tsi nyivi, tan nduvitā ra Judas ra ityi Galilea. Tan cuaha xaan nyivi tsinyicun tucu tsi ra can. Maa tyin juvin ñi tsahñi nyivi tsi ra. Tan tandihī ñi tsa tsinyicun tsi ra cuanuhu ñi ñuu ñi. ³⁸ Yacan cuenda jaña yo tsi ra ihya naha ra. Tan ña cua tyihī yo tsi yo tsihin ra naha tyin tatun tuhun iin rayi ñi cuví tsa jacuahá ra naha, cua cundihī tuhun can. ³⁹ Maa tyin tatun nditsa tyin tuhun Nyoo cuví tsa jacuahá ra naha, ña cua cuví casi yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

⁴⁰ Tandihī ra naha ndoꝝ ra

naha vaha tsa ña cua cahñi ra naha tsi ra naha. Tacan tan canā ra naha tsi ra tava tyiñu ra Jesús. Tan catyí ra cumí tyiñu naha ra tsihin ra vitya naha ra na cañi ra naha tsi ra naha. Tan tyasi ra naha nu cahan ra naha tuhun ra Jesús. Tacan tan jaña ra naha tsi ra naha. ⁴¹ Tan quita ra naha nuu ra cumí tyiñu. Tan sii xaan cuñi ra naha tyin tsahā Nyoo ndatu tyin nyehé ra naha tundoho tsa cuenda ra Jesús. ⁴² Tan ña jandihī ra naha tsa caahán ra naha. Tan tandihī quivi jacuahá ra naha tuhun ra Jesucristo vehe ñuhu tan vehe nyivi.

6

Nu nacatsí nyivi yihí cuenda ra Jesús utsa taahan ra naha tyin jaha cuenda ra naha náa tsa tsiñi ñuhu tsi ñi

¹ Tan nu cuahán ca tsi quivi cuaha xaan nyivi yihí cuenda ra Cristo cuví. Tacan tan nyivi tsa caahán yuhu griego quitsahā caahán ñi siqui nyivi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandihī quivi ña jahá vaha ra naha cuenda tsi ñi ndaahvi grecia tsa tsihi yii. ² Tacan tan tandihī tsa utsi uvi taahan ra tava tyiñu ra Jesús jandu iin ra naha tsi tandihī nyivi yihí cuenda ra Cristo. Tan catyí ra naha tsihin nyivi can:

—Ña vaha tsa jandihī ndi tsa caahán ndi tuhun Nyoo tan tsa tsatsá ndi tsa catsi ndo. ³ Yacan cuenda, nyooho

yañi, nanducu ndo utsa taa-
han ra nu yucú yo ihya, ra
vaha iyó tsihin Nyoo, ra tsa
iyó tsa tsiñituñi iñi, ra tsitú tsi-
hin Tatyí Ii Nyoo. Tan cuhva
yo tyiñu ihya tsi ra naha.
4 Tan nyuhu cua jañihi ndi
ndacan tahvi ndi tsi Nyoo,
tan cua jacuaha ca ndi tuhun
Nyoo —catyí ra naha.

5 Tandihí ñi tan ndoo ñi
vaha. Tan nacatsj ñi tsi ra
Esteban. Tyin tsinú xaan iñi
ra tsi Nyoo. Tan tsitú ra tsihin
Tatyí Ii Nyoo. Tan nacatsj
tucu ñi tsi ra Felipe, tan ra
Prócoro, tan ra Nicanor, tan
ra Timón, tan ra Parmenas,
tan ra Nicolás tsa cuví ra iin
ra ñuu Antioquía, tan nan-
duví ra iin ra Israel. 6 Tacan
tan tsindacá ñi tsi ra naha nu
nyecú ra tavá tyiñu ra Jesús.
Tan tyiso ndaha ra naha jiñi
intuhun intuhun ra naha tan
tsican tahvi ra naha tsi Nyoo
tsa cuenda ra can naha ra.

7 Tan tsityá ca tuhun
Nyoo. Tan nducuahá ca ñi
yihí cuenda ra Cristo ñuu
Jerusalén. Tan cuaha xaan ra
cuví jutu cuenda nyivi Israel
natsinú ndihí iñi ra naha
tuhun ra Cristo.

*Nu tyihí ra naha tsi ra Esteban
vehe caa*

8 Ra Esteban cuví ra iin
ra tsa tsitú tsihin tunyee
iñi Nyoo. Tan vaha xaan
nyivi cuví ra tyin tsitú añima
ra tsihin tsa vaha tsi Nyoo.
Tan cuaha xaan tsa iyo tan
seña javahá ra nu yucú nyivi.
9 Tacan tan juhva ra tsa tsicá
vehe ñuhu ñuu Israel tsa nañi
Vehe Ñuhu Cuenda Nyivi

Ndoó Nuña cutahan ra naha
tsihin juhva ra ñuu Cirene
naha ra, tan cutahan ndihí
juhva ra ñuu Alejandría naha
ra, tan ra ityi Cilicia naha ra,
tan ra ityi Asia naha ra. Tan
quitsahá caahán yuhu tahan
ra naha tsihin ra Esteban.
10 Maa tyin ña cuví jahá canaa
ra naha tsi ra, tyin ra Esteban
caahán ra tsihin tsa tsiñituñi
jiñi ra tsa tsahá Tatyí Ii Nyoo
tsi ra. 11 Tacan tan tyahví ra
can naha ra tsi juhva ra na
cahan ra naha cuendu siquí
ra Esteban tan catyí ra naha
tyin ra Esteban caahán ra
ndavaha ñi siquí ra Moisés,
tan siquí Nyoo. 12 Yacan
cuenda tandihí nyivi can
quitsahá cuvaá ñi tan tsihin
ra tsahnu naha ra tan ra cuví
maestro cuenda ley Nyoo.
Tacan tan tñin ra naha tsi ra
Esteban. Tan tsahan ra naha
tsindacá ra naha tsi ra nu
ndu iín ra cumí tyiñu cuenda
vehe ñuhu nyivi Israel. 13 Tan
nducu ra naha tsi ra cahan
cuendu siquí ra Esteban. Tan
maa ra naha catyí ra naha
tyehen:

—Ra Esteban ihya, ña
jandihí ra tsa caahán ra
ndavaha ñi siquí vehe ñuhu
yo tan siquí ley Nyoo tsa tyaa
ra Moisés. 14 Tan tsiñi ndi
tsa caahán ra tyin ra Jesús,
ra Nazaret can, cua caní ra
vehe ñuhu cahnu ihya. Tan
cua nasama ra cuhva iyó yo
tsa jacuahá ra Moisés tsi yo
—catyí ra tsa caahán cuendu
siquí ra Esteban.

15 Tacan tan ra cumí tyiñu
naha ra tan ra nyecú ican

nyehē ra naha tsi ra Esteban tyin tumaa caá nuu iin ángel, tacan caá nuu ra.

7

Nu caahán ra Esteban tuhun Nyoo tsihin nyivi nducú cahñi tsi ra

¹Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyi ra:

—¿A nditsa tsa caahán ra ihya naha ra siqui un?

²Tacan tan nacahan ra Esteban tan catyi ra:

—Nyooho yañi, tan nyooho ra tsahnu, tyaa soho ndo tuhun tsa cua cahan yu. Jutu yo Nyoo, ra cahnu ca, quituvi ra nuu tsii tsaahnu yo, ra Abraham, quivi nyii ra ityi Mesopotamia tsa ndi cumañi ca cahun ra coo ra nda ñuu Harán. ³Tan catyi ra tsihin ra: “Nacoo ñuu un, tan tsi tandihi nyivi un. Tan cahun cun inga ñuu tsa cua janaha yu tsi un” catyi Nyoo tsihin ra Abraham.

⁴Tacan tan ra Abraham quita ra nu iyó nyivi Caldea ityi Mesopotamia, tan cuahán ra nda ñuu Harán. Tan ndacan cuví nu tsihi jutu ra. Yaha can jaquitsi Nyoo tsi ra ñuhu nu iyó yo ihya vityin. ⁵Maa tyin nduve ñuhu tsaha Nyoo tsi ra quivi can. Ndi luxu maa nu cuañi ra tan ña tsaha Nyoo. Maa tyin catyi ra tsihin ra Abraham tyin cua cuhva ra. Tan tsa cua cúu ra tan Nyoo cua cuhva ra ñuhu tsi sehe ra. Tacan cahan Nyoo tsihin ra Abraham, vasu tsa ñaha ca coo sehe ra quivi can.

⁶Tan inga tucu tuhun cahan

Nyoo tsihin ra tyin nyivi tata ra cua coo ñi inga ñuu. Tan cua cuvi ñi musu nyivi ñuu can. Tan maa nyivi ñuu can cua quihí ndaha ñi tsi ñi. Tan cua nyehe ñi tundoho cumi cientu cuiya. ⁷Maa tyin cahan tucu Nyoo tsihin ra tyehen: “Nyivi tata un cua nyehe ñi tundoho jaha nyivi ñuu can. Yacan cuenda yuhu cua tatsi tuñi yu tsi nyivi ñuu can. Tan tsa cua yaha yacan tan cua quita nyivi cuvi tata un ñuu can tan cua quitsi ñi ihya. Tan cua jacahnu ñi tsi yu” catyi Nyoo tsihin ra Abraham.

⁸Tacan natuhun Nyoo tsihin ra. Tan ndoo ra tuhun tsihin ra. Tan Nyoo tsaha ra iin cuhva tsa cua javaha ñi coto naa iñi ñi tsa cahan ra. Tsaha cuenda ra tyin tandihi ñi sehe yii ñi tsa cua coo tan cuñi tsi cunyaa tuñi ra itsi naha tsi. Tan tsa yaha una quivi tsa cacu ra Isaac, sehe ra Abraham, tacan javaha ra tsi ra. Tan juvin ñi tacan javaha ndihi tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaa ra tuñi can tsi intuhun intuhun sehe yii ra. Tan ra ican naha ra cuví tsii tsaahnu yo.

⁹Tan tsa utsi iin taahan ca sehe ra Jacob ndasi cuñi ra naha nyehe ra naha tsi ra José yañi ra naha, tsa cuenda tyin cuñi ca jutu ra naha tsi ra can. Yacan cuenda xico ra naha tsi ra José na cuvi ra iin musu nda Egipto. Maa tyin ra José, ña nacoo Nyoo tsi ra. ¹⁰Tan

jacacu ra tsi ra nu nyehé ra tundoho. Tan tsahā ra tsa nyityi jiñi ra tsi ra José. Tan tsahā ra tsa vaha coo ra nuu ra Faraón, ra cuvī rey Egipto. Tan rey can tsahā ra tsa cuvī ra José ra cumí tyiñu ñuu tsa cayucú Egipto can. Tan tsindacā ñaha ndihi tucu ra vehe maa rey.

11 'Tacan tan tsicoo tama nanii cahnu ityi Egipto tan ityi Canaán. Tan nyehe xaan nyivi tundoho. Tan tandihi tsii tsaahnu yo ña ñihī ra naha tsa catsi ra naha. 12 Maa tyin quivi tsito ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsahan ra naha iin tsaha. 13 Tan tsa tsinu uvi tsaha tsa tsahan ra naha, ra José jacoto ra tsi ra naha tyin yañi ra naha cuvī tsi ra. Tacan tan tsito ra Faraón yóo tata cuvī ra José. 14 Tacan tan tavā tyiñu ra José na quitsi ra Jacob jutu ra, tsihin tandihi nyivi ra. Tan cuvī ñi uñi xico tsahun taahan nyivi. 15 Tan tacan cuvī tsa cuahán ra Jacob cua coo ra ñuhu Egipto can. Yaha can tan tsihi ra ndacan. Tan tsihi ndihi tucu tandihi sehe ra, ra cuvī tsii tsaahnu yo naha ra. 16 Tacan tan tsaa quivi tsa tsindacā ñi yiqui ra Jacob tan yiqui sehe ra nda Siquem. Tan ican quihvi yiqui tandihi ra naha tsitsi ñuhu nu jata ra Abraham iin ñaña tsi sehe ra Hamor tahan tsanaha.

17 'Maa tyin tsa ndi cumañi ca quita nyivi Egipto, nyivi ra Abraham tsa iyó Egipto can

cuaha xaan ñi cuvī. Tan tsa nyanaa yatyin quivi tsa cua cuhva Nyoo ñuhu tsi ñi tumaa tsa cahān catsi ra tsihin ra Abraham. 18 Tacan tan quit-sahā ndacā ñaha iin rey tsa ña nacoto tsi ra José. 19 Rey can jandavi ñaha ra nyivi yo. Tan janyehē xaan ra tundoho tsi ñi, tan jañiñi ra tsi ñi na naco ñi tsi sehe ñi tsa ndi cacú tyin na cúu tsi. 20 Tan juvin ñi quivi can cacū ra Moisés. Tan tahan xaan iñi Nyoo tsi ra. Tan uñi yoo jacuahnu sihi ra tsi ra nda yuvehe ña. 21 Yaha can ña cuvī ca tyihi xeehe sihi ra tsi ra. Tan naco ña tsi ra tsitsi iin tyica yuhu yutya. Tacan tan sehe sihi ra rey Egipto can nañihī ña tsi ra. Tan naquihin ña tsi ra. Tan jacuahnu ña tsi ra, tumaa tsa sehe maa ña cuvī tsi ra. 22 Yacan cutuhva ra Moisés tandihi tsa tsito ñi Egipto. Tan vaha xaan cahān ra tan vaha javahā ra jahā tunyee iñi tsa tsahā Nyoo tsi ra.

23 'Tan tsa quita uvi xico cuiya ra Moisés cuñi ra cahun ra cunyehe ra nu iyó nyivi Israel, nyivi ra. 24 Tacan tan iin quivi nyehe ra nu cañi iin ra Egipto can tsi iin ra Israel. Tacan tan tsahñi ra Moisés tsi ra Egipto can tyin cañi xaan ra tsi ra Israel, ra ñuu ra. 25 Cuñi maa ra Moisés can tyin nyivi Israel can cutuñi iñi ñi tyin Nyoo jaquitsi tsi ra tyin jacacu ra tsi ñi. Maa tyin ña tuvī iñi ñi tsa tacan cua cuvī. 26 Tacan tan tsa inga quivi can nyehe ra Moisés tsi uvi taahan ra Israel, cañi

tahan ra naha. Tan ra Moisés, cuñi ra tsa ña cañi tahan ca ra naha, tan quitsahā catyí ra: “Ña vaha tsa cañi un tsi ra yañi un” catyí ra tsihin ra naha. ²⁷ Tacan tan ra tsa cañi tsi inga ra can tindahñi ra tsi ra Moisés, tan catyí ra tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndi? ²⁸ ¿A cuñi un cahñi un tsi yu tumaa tsa tsañi un tsi ra Egipto icu?” catyí ra tsihin ra Moisés. ²⁹ Cuhva tsa tsiñi ra Moisés tsa cahan ra can, tsinu ra. Tan cuahán ra nda ñuu Madián. Ndacan ñihí ra ñasihí ra. Tan ndacan tsicoo uvi taahan sehe ra.

³⁰ 'Yahā uvi xico cuiya. Tacan tan iin quivi tsicá nuu ra Moisés nu tsiqui yatyin yucu tsa nañi Sinaí. Tan nyehe ra cayú iin yutun iñu. Tacan tan quituvi iin ángel tsitsi ñuhu tsa cayú can. ³¹ Iyo xaan cuñi ra Moisés tsa nyehé ra yacan. Tan natuhvā ra nu cayú iñu can tyin nyehe vaha ra, tan tsiñi ra ndusu Jutu Mañi yo. Tan catyí ndusu can tyehen: ³² “Yuhu cuví Nyoo cuenda tsii tsaahnu un, Nyoo cuenda ra Abraham, tan ra Isaac, tan ra Jacob” catyí ndusu can tsihin ra. Tacan tan ra Moisés quitsahā nihí ra tsihin tsa yuuhví ra. Tan ña canā iñi ra nanyehe ra. ³³ Tan quitsahā catyí tucu Jutu Mañi yo tsihin ra: “Tava nditsan tsaha un tyin ñuhu nu tsañi un, ñuhu ii cuví tsi. ³⁴ Yuhu nyehé yu tandihí tundoho tsa nyehé nyivi cuenda yu ñuhu Egipto can. Tan tsiñi

yu ndusu ñi tsa tsacú tsa ñi. Yacan vatsí nuú yu tyin jacacu yu tsi ñi. Naha, tyin jacuhun yu tsi un nda Egipto” catyí Nyoo tsihin ra Moisés.

³⁵ 'Quivi can ña cuñi nyivi Israel tsi ra Moisés tsa cundaca ñaha ra tsi ñi, tan catyí ñi tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndi?”, catyí ñi tsihin ra. Vasu ña cuñi ñi tsa cundaca ñaha ra tsi ñi, maa tyin Nyoo tava tyiñu ra tsi ra tyin cuvi ra nuu tsihin ñi, tan jacacu ra tsi ñi. Tyin tacan catyí ángel tsa quituvi nuu ra nu iñu tsa cayú can. ³⁶ Tan ra Moisés can tava tsi nyivi Israel ñuhu Egipto can tsihin tsa javahā ra tsa iyo tan seña ñuu can, tan nu yahā ñi nda nu Nduya Ñuhu Cuaaha, tan nu tsicā nuu ñi nu tsiqui tsitsi tsa uvi xico cuiya.

³⁷ 'Tan juven ñi maa ra Moisés can cuví ra tsa cahan tsihin nyivi Israel tan catyí ra tyehen: “Nyoo cua jaquitsi ra tsi iin ra cuví ndusu yuhu ra tumaa jaquitsi ra tsi maa yu. Tan cua cuví ra iin ra Israel tumaa maa yo. Tan taahán tsi tyaa yahvi yo tsi ra” catyí ra Moisés. ³⁸ Tan maa ra Moisés can cuahán ra tsihin nyivi tsii tsaahnu yo nu tsicā nuu ñi nu tsiqui can. Tan ra ican cuví ra tsa cahan ángel tsihin nda yucu Sinaí. Tan ra ican naquihin cuenda ra tuhun Nyoo nácaa coo nyivi, tan tyaa ra tuhun can nu tutu tyin tacan tan coto yo.

³⁹ 'Maa tyin nyivi tsii tsaahnu yo ña tyaa yahvi ñi

tsi ra. Tava tsiyo ñi tsi ra. Tan cuñi ñi cunuhu ñi nda Egipto. ⁴⁰ Yacan cuenda cuhva tsa nyii ra Moisés yucu Sinaí, tan cahān nyivi tsihin ra Aarón tan catyi ñi: “Javaha taahan nyoo cahun ityi nuu ndi. Tyin ña tsitó yo náa taha ra Moisés, ra tsa tava tsi yo Egipto” catyi ñi. ⁴¹ Tacan tan javaha ñi iin indiqui xuhun cuaan. Tan tsahñi ñi quitit tyin cuhva cuenda ñi tsi tsitoho can. Tan si xaan cuñi ñi tsicoo ñi vico cuenda tsitoho tsa javaha ñi tsihin ndaha ñi. ⁴² Tacan tan Nyoo jatsiyo ra tsi ñi. Tan jaña ndaha ra tsi ñi tyin cua jacahnu ñi ñicanyii, tan yoo, tan tandihi tiñuu tsa iyó ityi andivi. Tyin tyehen tyaa ra cuvi ndusu yuhu Nyoo nu libru taha tsanaha:

Nyooho nyivi Israel, ¿A tsahñi ndo quitit tyin cuhva cuenda ndo tsi maa yu tsitsi tsa uvi xico cuiya tsa tsica nuu ndo nu tsiqui? Ñavin.

⁴³ Tyin jacahnú ndo tsi nyoo tsa nañi Moloc,

tan jacahnú ndihi tucu ndo tsi nyoo tsa nañi Renfán tsa caá tumaa caá iin tiñuu tsa iyó andivi.

Juvin ñi maa ndo javaha tsitoho can, tan jacahnú tucu ndo.

Yacan cuenda yuhu cua tava yu tsi ndo ñuu ndo, tan cua jacahun yu tsi ndo iin nu cañi ca ityi nuu ñuu Babilonia, catyi Nyoo tsihin ñi.

⁴⁴ Nu tsica nuu tsii tsaahnu yo nu tsiqui can, tsicumj ra naha iin vehe ñuhu tsa tsinu tsihin ñi quitit. Tan tsitsi vehe can tsicumj ra naha tabla yuu tsa nyaá ley Nyoo nuu. Tan ra Moisés tava tyiñu ra na javaha ñi vehe ñuhu can ityi tsata, tumaa cuhva janaha maa Nyoo tsi ra. ⁴⁵ Yaha can tan ra Josué cuvi ra ityi nuu tsihin ñi. Tacan tan quihin ñi vehe ñuhu can tan vatsi ñi tsihin tsi nu iyó yo ihya vityin. Tyin Nyoo tava ra tsi nyivi tsicoo ñuhu ihya tan nacuhva cuenda ra ñuhu ihya tsi ñi Israel, nyivi yo. Tan tsatyiñu ñi vehe ñuhu can nda cuanda quivi tsicoo ra rey David. ⁴⁶ Tan ra rey David ñihi ra tumañi iñi nuu Nyoo. Tan cuñi ra javaha ra iin vehe vaha nu coo Nyoo. Juvin ñi Nyoo jacahnú ra Jacob taha tsanaha. ⁴⁷ Maa tyin ra Salomón javaha ra vehe Nyoo. ⁴⁸ Vasu ña iyó Nyoo tsitsi vehe ñuhu tsa javaha nyivi. Tumaa cahān ra cuvi ndusu yuhu Nyoo taha tsanaha tyehen:

⁴⁹ Andivi cuvi tyayu nu nyaá yu ndacá ñaha yu.

Tan ñuhu ñayivi, yacan cuvi nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

⁵⁰ ¿A ña tsitó ndo tyin maa yu javaha andivi tan ñuhu ñayivi? catyi ra cuvi ndusu yuhu Nyoo jaha Nyoo.

51 Maa tyin nyooho —catyí ra Esteban— tacan ñi tuhvá maa ndo jandavá ndo iñi ndo. Tan ña cuñi ndo naquihin ndo tuhun caahán Nyoo. Tacan ñi ña tyaa yahvi ndo tsi Tatyí li Nyoo. Inducu ñi caá ndo tsihin tsi saahnu yo. 52 Tsi saahnu yo cuxaan ra naha tan tsahñi ra naha tsi tandihí ra cuví ndusu yuhu Nyoo tahañ tsanaha. Tan ra ican naha ra catyí tyin cua quitsi iin ra vaha. Tan tsa quitsi ra vityin, nyooho xico ñaha ndo tsi ra tsi ra xaan iñi tsi ra, tan tsahñi ndo tsi ra. 53 Nyooho naquihin cuenda ndo ley Nyoo tsa tsaha ángel tsi ndo, maa tyin ña cuñi ndo tyaa yahvi ndo tsa caahán ley can —catyí ra Esteban.

Nu tsihi ra Esteban

54 Tsa tsiñi ra cumí tyiñu vehe ñuhu cahnu naha ra tuhun ihya, xaan xaan cuñi ra naha, ndacua jacahyu nuhu ra naha nyehé ra naha tsi ra Esteban. 55 Maa tyin ra Esteban tsitú ra tsihin Tatyí li Nyoo tan nanyehe ra ityi andivi. Tan nyehe ra tsa cahnu cuví Nyoo. Tan nyehe tucu ra tsi ra Jesús nyaá nyityi ra xiin cuaha Nyoo. 56 Tacan tan catyí ra Esteban:

—¡Ihna ndo! Nyehé yu andivi tan ticohó tsi. Tan nyehé yu tsi ra Jesús, Rayi tsa quee nda gloria, nyaá nyityi ra xiin cuaha Nyoo —catyí ra Esteban.

57 Maa tyin ra can naha ra tyasi ra naha soho ra naha, tsa ña cua tyaa soho ra naha tsa caahán ra Esteban. Tacan

tan iin vaa ñi cana tsa ra naha. Tan tandihí ra naha cuahán ra naha siqui ra Esteban. 58 Tacan tan tava ra naha tsi ra yuhu ñuu. Tan tsahñi ra naha tsi ra tsihin yuu. Tan ra tsa javahá tsa ña vaha can naha ra, nacoo ra naha jahma tsa nyaá tsata ra naha tyin jaha cuenda iin ra tyuvaa tsa nañi Saulo. 59 Tan tsitsi tsa cañi ra naha yuu tsi ra Esteban, quitsaha tsiacán tahvi ra Esteban tsi Nyoo, tyin tuví iñi ra tyin tsa cua cúu ra. Tan catyí ra tyehen:

—Jutu Mañi yu Jesús, naquihin añima yu —catyí ra.

60 Yaha can, tan tsicuiñi tsi ra, tan tsa cana tsa ra tan catyí ra:

—Jutu Mañi yu, ña tñin cuenda un cuatyí tsa javahá ra naha —catyí ra.

Tsa yaha cahan ra tacan, tan tsihi ra.

8

Nu tsinyaq ndaha ra Saulo tsi nyivi yihí cuenda ra Cristo

1 Tan ra Saulo ña tsinú iñi ra tsi ra Jesús, tan ndoo ra vaha tsa tsahñi ra naha tsi ra Esteban.

Tan juvin ñi quivi can quitsaha nducú xaan nyivi tsi ñi yihí cuenda ra Cristo ñuu Jerusalén tyin cahñi ñi tsi ñi. Tan tandihí ñi yihí cuenda ra Cristo tsinu ñi, cuahán ñi cua coo ñi tandihí ñuu tsa cayucú Samaria, tan tandihí ñuu tsa cayucú Judea. Maa tyin ra tava tyiñu ra Jesús ña quita ra naha. Ndoos ra naha Jerusalén. 2 Tan juhva

ra tsa nyicún vaha tsi Nyoo ñuu Jerusalén can, tsahan ra naha tsicutsi ra naha cuñu ñuhu ra Esteban nda nu ndaa cumi santu. Tan tsacu xaan ra naha tsa cuenda tsa tsihi ra. ³ Tan ra Saulo can quitsaha nyaá ndaha ra tsi nyivi yihí cuenda ra Cristo. Tan tsahan ra tan iin tan iin vehe ñi. Tan ixta caa ra tsi ñi, tan tsaha cuenda ra tsi ñi tyin cuhun ñi vehe caa, tahan ñi rayi tan ñaha.

Nu caahán ra Felipe tuhun ra Cristo nu cuví Samaria

⁴ Tan tandihi ñi tsa quita ñuu Jerusalén can, caahán ñi tuhun Nyoo nácaa jacacú ra Cristo tsi yo, tandihi ñi ityi nu cuahán ñi. ⁵ Iin ra tsa nañí Felipe tsaá ra iin ñuu canyií Samaria. Tan quitsaha caahán ra tuhun ra Cristo tsihin nyivi iyó ican. ⁶ Tan tandihi ñi ñi cuñí ñi tan tyaá soho ñi tsa caahán ra. Tyin nyehé ñi tsa iyo tsa javahá ra. ⁷ Tyin cuaha xaan nyivi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quita nahnu tan cana tsaá nahnu cuahán nahnu. Tan cuaha xaan nyivi coxo tan nyivi tsa ña cuví canda tan ña cuví caca, nduvahá ñi. ⁸ Yacan cuenda nyivi ñuu can, si xaan cuñí ñi.

⁹ Tan Samaria can iyó iin ra tasi nañí Simón. Tuhvá ra jandaví ñaha tsi nyivi. Catyí ra tyin cahnu xaan cuví ra. ¹⁰ Tandihi maa nyivi, ñi cuca tan ñi ndaahvi, tyaá soho ñi tsa caahán ra. Tan catyí ñi:

—Nditsa nditsa, tyin tunyee ñni Nyoo iyó tsihin ra ihya —catyí ñi.

¹¹ Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi. ¹² Tacan tan quitsi ra Felipe. Tan jacoto ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsaha tsinú ñni ñi tsi ra Cristo, rayi tan ñaha. Tan tsicoondutyá ñi. ¹³ Nda cuanda ra Simón can, tan natsinu ñni ra tsi ra Cristo, tan tsicoondutyá ra. Tan quitsaha tsicá nuu ra tsihin ra Felipe. Tan iyo xaan cuñí ra nyehé ra tsa iyo tan seña tsa javahá ra Felipe.

¹⁴ Tacan tan ra tava tyiñu ra Jesús tsa iyó ñuu Jerusalén can ñihí tuhun ra naha tyin tsinú ñni nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria. ¹⁵ Tan tsa tsaá ra naha, quitsaha tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihin ñi Tatyí Ii Nyoo. ¹⁶ Tyin ñi can, ñaha ca nuu Tatyí Ii Nyoo siqui ñi. Maa tsa tsicoondutyá ñi ñi tsihin sivi Jutu Mañi yo Jesús. ¹⁷ Tacan tan ra Pedro tan ra Juan tyiso ndaha ra naha jiñi ñi, tan naquihin ñi Tatyí Ii Nyoo. ¹⁸ Tan ra Simón can nyehé ra nu tyiso ndaha ra tava tyiñu ra Jesús jiñi ñi, tan naquihin ñi Tatyí Ii Nyoo. ¹⁹ Tan quitsaha caahán ra Simón tan catyí ra:

—¿Najava xuhun cuñí ndo

tan cuhva ndo tunyee iñi tsi yu, cuvi tyiso ndaha yu jiñi nyivi, tan naquihin ñi Tatyí li Nyoo? —catyí ra Simón tsihin ra naha.

²⁰Tacan tan nacahan ra Pedro tan catyí ra:

—Jaha cuenda coto cu-naa un tsihin xuhun cun. ¿Nacuenda tsicá iñi un tyin cuví jata yo ndatu tsa tsahá Nyoo tsi yo? Ña cuví.

²¹Yooho, ña taahán tsi tyihi un tsi un tsihin tyiñu ihya. Tyin añima un ña vaha nuu Nyoo. ²²Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un. ²³Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsahá coto un tsa vaha —catyí ra Pedro tsihin ra Simón.

²⁴Tacan tan nacahan ra Simón tan catyí ra:

—Ndacan tahvi maa ndo tsi Jutu Mañi yo tsa cuenda yu, na ña quitsi tandihi tsa caahán un tsihin yu siqui yu —catyí ra Simón tsihin ra Pedro.

²⁵Tsa yaha can tan ra tava tyiñu ra Jesús tsaha cuenda ra naha tandihi tsa nyehe ra naha tsa javaha ra Cristo nu tsicá ra nu ñuhu ñayivi. Tan cahan ra naha tuhun Nyoo. Tacan tan cuanuhu ra naha nda ñuu Jerusalén. Tan tandihi ñuu tsa cayucú Samaria nu yaha ra naha jacoto ra naha nácaa javahá yo tan cacu yo.

Nu caahán ra Felipe tuhun Nyoo tsihin iin ra ñuu Etiopía

²⁶Tsa yaha yacan tan cahan iin ángel Nyoo tsihin ra Felipe, tan catyí ra:

—Nduvita tan cuhun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yaha nu tsiqui. ²⁷Tacan tan ra Felipe nduvita ra tan cuahán ra. Tan ityi cuahán ra ñihí tahan ra tsihin iin ra ñuu Etiopía. Tan cuví ra can eunuco [tyin ña cuví coo ñasihí ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnu ra tsi Nyoo nda ñuu Jerusalén. ²⁸Tan ityi cuanuhú ra nda ñuu ra nyaá ra siqui carreta ra. Tan cahví ra nu libru tsa tyaá ra Isaías, ra cuví ndusu yuhu Nyoo tahañ tsanaha. ²⁹Tacan tan Tatyí li Nyoo cahan tsihin ra Felipe:

—Ntuhva nu carreta can.

³⁰Tan cuhva tsa natuhva ra Felipe nu carreta can, tsiñi ra tyin cahví ra Etiopía can nu libru tsa tyaá ra Isaías. Tan tsicá tuhun ra Felipe tsi ra tan catyí ra:

—¿A cutuñí iñi un tsa caahán tsi? —catyí ra.

³¹Tacan tan nacahan ra Etiopía can tan catyí ra:

—¿Nacaa cutuñi iñi yu tan yoñi jacuahá tsi yu? —catyí ra tsihin ra Felipe.

Tan tsican ra tsi ra Felipe na ndaa ra tan cunyaa ra tsihin ra.

³² Tan nu cuahán cahví ra, catyí tsi tyehen:

Tsahñi ra naha tsi ra tumaa tuhvá ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti,

tacan cuví ra can tyin nyehe ra tundoho tan nduve náa cahán ra.

³³ Janduluhlu ra tsi ra nuu ra naha tan yoñi cuñi javaha iin tsa vaha tsihin ra.

Tan tsa cuenda nyivi cuví tata ra, yoñi caahán tsa cuenda ñi.

Tyin ña tsicoo sehe ra tan tsihi ra.

Tacan catyí tsi nu tutu tsa cahví ra can.

³⁴ Tacan tan ra Etiopía quitsahá tsicá tuhun ra tsi ra Felipe, tan catyí ra:

—Jaha tumañi iñi tsi yu, tan catyí tuhun un luxu tsihin yu, ¿yoo tuhun caahán ra ndusu yuhu Nyoo ihya? ¿A tuhun maa ra, o yoo tuhun caahán ra? —catyí ra tsihin ra Felipe.

³⁵ Tacan tan ra Felipe quitsahá caahán ra siqui tuhun tsa tsa yaha cahvi ra can, tan tsahá cuenda ra tsi ra tyin tuhun ra Jesús caahán ra ndusu yuhu Nyoo can. Tan tsahá cuenda ra tyin ra Jesús cuví ra jacacú tsi yo. ³⁶ Tacan tan tsa cua yaha ra naha nu yihí ndutya. Tan ra Etiopía

can quitsahá caahán ra tsihin ra Felipe tan catyí ra:

—Ihya yihí ndutya. ¿A ña cuví coondutya yu ihya? —catyí ra.

³⁷ Tacan tan nacahan ra Felipe tsihin ra Etiopía, tan catyí ra:

—Tatun tsinú iñi un tsihin tsa ñi añima un, cuví coondutya un —catyí ra tsihin ra.

Tacan tan nacahan ra can, tan catyí ra:

—Tsinú iñi yu tyin Sehe Nyoo cuví tsi ra Jesucristo —catyí ra.

³⁸ Tacan tan ra can caahán ra tsihin musu ra na jacuñi ra carreta can. Tan nduvi taahan ra naha nuu ra naha. Tan quihvi ra naha tsitsi ndutya. Tacan tan jacoondutya ra Felipe tsi ra Etiopía. ³⁹ Tan cuhva tsa quitá ra naha tsitsi ndutya can, tan Tatyí Ii Jutu Mañi yo naquihin ra tsi ra Felipe. Tan ra Etiopía can ña nyehe ra numaa ityi cuahán ra Felipe. Maa tyin sii xaan cuñi ra, cuanuhú ra. ⁴⁰ Tan ra Felipe tsaá ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tsihin nyivi nda cuanda tsa tsaá ra ñuu Cesarea.

9

Nu natsinu iñi ra Saulo tsi ra Cristo
(Hechos 22.6-16; 26.12-18)

¹ Tan tsicá ra Felipe caahán ra tuhun ra Cristo tsihin nyivi, tan ra Saulo ña jandihí maa ra tsa nducú cahñi ra tsi nyivi yihí cuenda Jutu Mañi yo. Tan tsahan ra nu nyaá ra jutu saahnu cuví ityi nuu,

² tsindac̄an ra iin tutu tsi ra jutu, tyin nacuhva ra ndatu tsa cuhun ra vehe ñuhu ñuu Damasco, tan tiin ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayii tan ñaha. Ñih̄i ra Saulo tutu can tan cuahán ra. ³ Tan tsa cua tsa a ra ñuu Damasco, sana iñi ra, tan quitsi ñuhu ityi andivi, jandunditsin tsi tanih̄i cahnu maa nu cuahán ra. ⁴ Tacan tan ra Saulo nduva ra nu ñuhu. Tan tsiñi ra iin ndusu tsa catyí tyehen:

—Saulo, Saulo, ¿nacuvi tyin nyaá ndaha un tsi yu? —catyí ndusu can tsihin ra.

⁵ Tacan tan nacahan ra Saulo:

—¿Yóo cuví yooho, taa? —catyí ra, tsicá tuhun ra.

Tacan tan nacahan ndusu can tsihin ra, tan catyí tsi:

—Yuhu cuví ra Jesús, ra tsa nyaá ndaha un. Juvín ñi tsi maa un jañicuehé un, tumaa jañicuehé indiqui tsi ti tsa tsañi ihñi ti nu tsa tutsi ra naha tsi ti —catyí ra Jesús tsihin ra.

⁶ Tacan tan quitsah̄a nih̄i ra Saulo tsihin tsa yuuhví ra. Tan catyí ra:

—Jutu Mañi yu, ¿náa cuñi un tyin javaha yu? —catyí ra.

Tacan tan Jutu Mañi yo nacahan ra tsihin ra tan catyí ra:

—Nduvita tan cuhun un tsitsi ñuu Damasco. Tan ican cua cahan iin ra tsa cua cahan tsihin un náa taahan tsi javaha un —catyí ra Jesús tsihin ra Saulo.

⁷ Tan ra tsa cuahán tsihin ra Saulo, nayuhvi xaan ra naha. Tan ña ñih̄i ra naha náa tuhun

cahan ra naha tyin tsiñi ra naha ndusu can maa tyin yoñi nyehe ra naha. ⁸ Tacan tan ra Saulo nduvita ra. Tan tsa nuña ra tinuu ra, ña cuvi maa nanyehé ra tyin cuaa ra jah̄a Nyoo. Yacan cuenda, ra tsa cuahán tsihin ra tiin ra naha ndaha ra tan tsindaca ra naha tsi ra ñuu Damasco. ⁹ Ican tsinyi ra uñi quivi. Tan ña cuvi maa nanyehé ra. Tan ña tsatsi ra, tan nduve maa náa tsih̄i ra.

¹⁰ Ñuu Damasco can iyó iin ra tsinú iñi tsi Nyoo, nañi ra Ananías. Tan nyehe ra iin tsa nyehe ra nu cahan Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahan ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

¹¹ Tacan tan Jutu Mañi yo catyí ra:

—Nduvita, tan cuhun cun ityi cahnu tsa nañi Ndoó ñi. Tan nanducu un vehe ra tsa nañi Judas. Tan ndaca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu. ¹² Tan nyehe ra iin tsa nyehe ra, tan nyehe ra tsi yooho, Ananías, tyin tsaá un nu nyaá ra, tan tyiso ndaha un jiñi ra tyin tacan tan nanyehé ra inga tsaha —catyí Jutu Mañi yo tsihin ra Ananías.

¹³ Tacan tan nacahan ra Ananías tan catyí ra:

—Jutu Mañi yu, cuaha xaan nyivi caahan ñi tsihin yu tyin nyivi yih̄i cuenda un

ñuu Jerusalén cuaha xaan tsa ña vaha javahā ra Saulo can tsihin ñi. ¹⁴ Tan vityin vatsí ra ihya tyin tsahā ra jutu tsaahnu tsa cuví ityi nuu ndatu tsi ra tsa tyihí ra tsi nyívi tsicán tahvi tsi un vehe caa —catyí ra Ananías tsihin Jutu Mañi yo.

¹⁵ Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsi vaha yu tsi ra Saulo can, tyin cua cahan ra tuhun yu tsihin nyívi inga ñuu, tan tsihin rey nyívi can, tan juvin ñi cahan ndihí ra tuhun yu tsihin nyívi Israel. ¹⁶ Yuhu cua jacuaha yu tsi ra nácaa tsa cuaha tundoho cua nyehe ra tsa cuenda yu —catyí Jutu Mañi yo tsihin ra Ananías.

¹⁷ Tacan tan cuahán ra Ananías vehe nu nyii ra Saulo. Tsaā ra yuvehe can tan quihvi ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituví nuu un ityi vatsí un, ra ican jaquitsi tsi yu tyin nanyehe un inga tsaha. Tan cua jacutu ra tsi un tsihin Tatyí li ra —catyí ra Ananías tsihin ra Saulo.

¹⁸ Tan juvin ñi cuhva can tan coyō tsa caá tumaa caa yaa tyaca tsa tyasi tinuu ra Saulo. Tacan tan cuví nanyehe ra. Yahā can tan tsicoondutyā ra. ¹⁹ Yahā can tan nacatsi ra, tan ndunyeē cuñu ñuhu ra inga tsaha. Tan ndoō ra juhva quívi tsihin nyívi tsa yihí cuenda ra Cristo ñuu Damasco.

Nu quitsahā caahán ra Saulo tuhun ra Cristo tsihin nyívi ñuu Damasco

²⁰ Tacan tan numi ñi quitsahā caahán ra Saulo tuhun ra Cristo tsihin nyívi tandihí vehe ñuhu nyívi Israel ñuu Damasco. Tan catyí ra tyin ra Jesús, Sehe Nyoo cuví tsi ra. ²¹ Tandihí maa nyívi tsa tsiñí tsa caahán ra, iyo xaan cuñí ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaa ndaha tsi nyívi tsicán tahvi sivi ra Jesús ityi ñuu Jerusalén? ¿A ñavin juvin ra cuví ra tsa vatsí tñin tsi nyívi iyó ihya tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

²² Maa tyin ra Saulo ñihi ca caahán ra tuhun ra Cristo tsihin tsa ñii ñni ra. Tan janahá ra tsi nyívi Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

Nu tsinu xeehe ra Saulo nuu ra Israel naha ra

²³ Tsa yahā juhva quívi, tan ra Israel tsa ña tsinú ñni tsi ra Cristo natuhún tahan ra naha tyin cua cahñi ra naha tsi ra Saulo. ²⁴ Ñiñu tan nduvi ndatú ra naha tsi ra yuvehe cahnu ñuu can. Maa tyin ra Saulo tsito ra tuhun can. ²⁵ Tacan tan nyívi tsa tsinú ñni tsi ra Cristo ñuu can tyihí ñi tsi ra tsitsi iin tyica cahnu. Tan tsacuaa januu ñi tsi ra ityi ventana iin vehe tsa nyaá yuhu cora ñuu can. Tacan tan tsinu ra cuahán ra.

*Nu nyii ra Saulo ñuu
Jerusalén*

²⁶ Quivi tsa tsaá ra Saulo ñuu Jerusalén, cuñi ra ndu iin ra tsihin nyivi tsa yihí cuenda ra Cristo. Maa tyin tandihí maa ñi tan yuuhví ñi nyehé ñi tsi ra. Tyin ña tsinú iñi ñi tsa yihí ra cuenda ra Jesús. ²⁷ Maa tyin iin ra tsa nañi Bernabé, quihin ra tsi ra. Tan tsaḥa cuenda ra tsi ra tsi ra tava tyiñu ra Jesús. Tan nacatyí tuhun ra tsihin ra naha nácaa nyehé ra Saulo tsi Jutu Mañi yo ra Cristo ityi ñuu Damasco; tan nacatyí tuhun ra nácaa caḥan Jutu Mañi yo tsihin ra. Tan nácaa caḥan ra tuhun ra Cristo tsihin tsa ña yuuhví ra nda ñuu Damasco. ²⁸ Tacan tan ndoo ra Saulo ñuu Jerusalén tsihin nyivi tsa yihí cuenda ra Cristo. ²⁹ Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra. ³⁰ Maa tyin tsito ra hermano can naha ra tyin tacan tsicá iñi ra can naha ra. Yacan cuenda tsindacá ra hermano naha ra tsi ra Saulo nda ñuu Cesarea. Tacan tan jacuhun ra naha tsi ra nda Tarso, ñuu ra.

³¹ Tacan tan nyivi yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, sii xaan cuñi ñi tyin ña cuxaán ca nyivi tsi ñi. Tan ndunyeē ca iñi ñi tsihin tunyee iñi tsi Nyoo tyin tyaá yahvi vaha ñi

cuhva caḥan ra, tyin yuuhví ñi coto ña cua javaha ñi cuhva cuñi ra. Iyó ñi tsihin tsa jatyinyeé Tatyí li Nyoo tsi ñi. Tan nducuahá ca ñi tan iin tan iin quivi.

Nu nduvahá ra Eneas

³² Tacan cuvi tan ra Pedro tuhvá ra cuahán cua nyehé nácaa yucú ra hermano naha ra tan iin tan iin ñuu. Tan tsaḥan tucu ra tsinyehé ra nu iyó nyivi yihí cuenda ra Jesucristo ñuu Lida. ³³ Ican nañihí ra tsi iin ra cuuhví, nañi ra Eneas. Tan tsa una cuiya canyií ra tan ña cuvi maa nacandá ra tyin naxii cuñu ñuhu ra. ³⁴ Tan ra Pedro catyi ra tsihin ra:

—Yooho Eneas, ra Jesucristo janduvahá ra tsi un. Nduvita tan natuvi yuvi un —catyi ra tsihin ra.

Tan juvin ñi cuhva can tan nduvita ra Eneas. ³⁵ Tan nyehé tandihí nyivi ñuu Lida can tyin tsa nduvahá ra. Tan nyehé tucu nyivi ñuu Sarón. Tacan tan ñi can, natsinu iñi ñi tsi Jutu Mañi yo. Tan nacoó ñi tuhun tsahnu tsa tsinu iñi ñi nda ndi cumañi ca coto ñi tuhun ra Cristo.

Nu nandoto ña Dorcas

³⁶ Quivi can tsicoó iin ñaha tsinú iñi tsi ra Cristo ñuu Jope. Tan nañi ña Tabita, tan tsihin yuhu griego, nañi ña Dorcas. Tan tuhvá ña javahá tsa vaha tsihin nyivi, jatyinyeé ña tsi nyivi ndaahvi. ³⁷ Tan quivi can ña Dorcas quihin cuehe tsi ña tan tsihi ña. Tan tsa yahá jacutyí ñi tsi ña, tsi-caquin ñi tsi ña tsitsi cuarto

nu tsinu uvi pisu. ³⁸ Yatyin ñi canyíi ñuu Jope tsihin ñuu Lida, nu nyíi ra Pedro. Tan nyívi tsa yihí cuenda ra Cristo ñuu Jope can tsito ñi tyin nyíi ra Pedro ñuu Lida. Tacan tan jacuhun ñi tsi uvi taahan ra na cucana ra naha tsi ra Pedro tyin na cuhun ra ñuu Jope tsa numi ñi. Tan tsaá ra naha nu nyíi ra tan catyí ra naha tsihin ra:

—Janumi ñi tan cuhun un tsihin ndi nda ñuu Jope —catyí ra naha tsihin ra.

³⁹ Tacan tan ra Pedro nduvita ra tan cuahán ra tsihin ra naha. Tan cuhva tsa tsaá ra naha, tsindaca ra naha tsi ra nda cuarto nu canyíi ndiyi can. Tan tandihí maa ñiñaha tsa tsihí yíi natuhva ñi tsata ra, tan tsacú tsaá ñi. Tan janahá ñi jahma tsa quicu ña Dorcas tsa tsicoo ña. ⁴⁰ Tacan tan ra Pedro tava ra tsi tandihí nyívi cuarto can. Tan tsicuiñi tsiti ra tan quitsahá tsicán tahvi ra tsi Nyoo. Tacan tan nanyehe ra tsi ñaha tsa tsihí can canyíi ña. Tan quitsahá catyí ra tsihin ña:

—Hermana Tabita, nduvita —catyí ra tsihin ña.

Tacan tan nanyehe ña. Tan tsa nyehe ña tsi ra Pedro, tsinyaa ña. ⁴¹ Tacan tan ra Pedro tijn ra ndaha ña tan janduvita ra tsi ña. Tacan tan cana ra tsi ra hermano naha ra, tan tsihin ñiñaha tsa tsihí yíi. Tan nacuhva cuenda ra tsi ña tsi ñi tyin tsa nandoto ña. ⁴² Yaha can tan tandihí maa nyívi ñuu Jope tsito ñi tyin nandoto ña can. Tan cuaha xaan ñi natsinu iñi tsi

Jutu Mañi yo. ⁴³ Tan ra Pedro ndoo ra juhva quívi ñuu can, nyíi ra yuvehe iin ra tsa janduvita ñi quiti, nañi ra Simón.

10

Ra Pedro tsihin ra Cornelio

¹ Ñuu Cesarea iyó iin ra tsa nañi Cornelio. Tan cuví ra ra yihí ndaha iin cientu andaru. Tan tsa tandihí andaru tsa yihí ndaha ra can nañi tsi Italiano. ² Tan ra Cornelio can yuhví ra tsi Nyoo. Maa ra tan tsihin tandihí nyívi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyívi ndaahvi ñuu Israel, tan tandihí quívi tsicán tahvi ra tsi Nyoo. ³ Tan iin quívi cuhva caa uñi tsa tseñi, nyehe ra iin tsa nyehe ra. Tan ican cuví nu catsi xaan nyehe ra iin ángel tsa jacuhun Nyoo nu nyíi ra, tan catyí tsi tsihin ra:

—¡Yooho Cornelio! —catyí ángel can tsihin ra.

⁴ Tacan tan nanyehe ra Cornelio tsi ángel can. Tan nayuhvi xaan ra. Tan quitsahá tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsahá caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán iñi ra tyin jatyinyeé xaan un tsi nyívi ndaahvi. ⁵ Tan vityin cuñi tsi tsa tava tyiñu un na cuquihin tyiñu tsi iin ra tsa nañi Simón Pedro nda ñuu Jope. ⁶ Ra ican cua

cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvitá ñi quiti. Tan iyó vehe ra yuhu ndutya ñuhu —catyí ángel can tsihin ra Cornelio, tan cuahán ángel can.

⁷ Tsa yaha cuahán ángel can, ra Cornelio cana ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo. ⁸ Tandihí maa tsa cahan ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Joje.

⁹ Tuví inga quivi tan cuahán ra can naha ra. Tan tsa ndi cumañi ca tsaa ra naha ñuu Joje, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can. ¹⁰ Tan tsaá soco tsi ra tan tsisocó xaan ra. Maa tyin tsitsi tsa tsinú tsa catsi ra, quitsaha nyehé ra iin tsa janahá Nyoo tsi ra. ¹¹ Tan nyehe ra tyin ticohó andivi. Tan nyehe ra andivi tyin vatsí nuú iin jahma cahnu xaan ityi nu ñuhu. Tan tandihí tsa cumí tutun tsi nuuhñi nuuhñi ñi. ¹² Tan tsitsi jahma can yihí tandihí maa nuu quiti tsa cumi taahan tsaha, tan tandihí nuu coo, tan saa. ¹³ Tacan tan tsiñi ra iin ndusu tsa caahán tsihin ra:

—Pedro, nduvita tan cahñi quiti ihya, tan catsi un —catyí ndusu can tsihin ra.

¹⁴ Maa tyin ra Pedro nacahan ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi quiti tsa catyí ley tyin ña vaha catsi ndi —catyí ra Pedro.

¹⁵ Tacan tan quitsaha caahán nyico ndusu can tsihin ra inga tsaha:

—Ña catyí un tyin ña catsi un tsa tsa janduvaha yu —catyí ndusu can tsihin ra.

¹⁶ Uñi taahan tsaha nyehe ra yacan jahá Nyoo. Tacan tan jahma cahnu can nandaá nyico can ityi andivi. ¹⁷ Tan tsitsi tsa tsicá iñi ra Pedro náa cuñi tsi catyí tsa nyehe ra can, tsaá musu tsa jacuhun ra Cornelio naha ra. Tan tsicá tuhun ra naha numaa tahan iyó vehe ra nañi Simón.

¹⁸ Tan tsa tsaá ra naha ityi yuvehe tsicá tuhun ra naha tatun ican iyó iin ra tsa nañi Simón Pedro. ¹⁹ Tan ra Pedro tsicá xaan iñi ra náa cuñi tsi catyí tsa nyehe ra. Tacan tan Tatyí Ii Nyoo quitsaha caahán tsihin ra, tan catyí tsi:

—Nyehe Pedro, uñi taahan ra vatsí nanducú tsi un. ²⁰ Nduvita tan chun cun tsihin ra naha, tan ña caça iñi un tyin maa yu jaquitsí tsi ra ihya naha ra —catyí Tatyí Ii Nyoo tsihin ra Pedro.

²¹ Tacan tan ra Pedro nuu ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

²² Tacan tan nacahan musu ra Cornelio tan catyí ra naha:

—Ra Cornelio, ra yihí ndaha tsi ndi, ra ican jaquitsí

tsi ndi. Vaha xaan nyivi cuví ra. Tan tyaá yahvi xaan ra tsi Nyoo. Tan tandihí maa ra ñuu Israel tsa iyó itiyí Judea ihya cuñí ra naha tsi ra tsa cuenda tsa vaha nyivi cuví ra. Tan iin ángel Nyoo cahan tsihin ra tyin na cana ra tsi un, tyin cuhun un yuvehe ra tyin tacan tan tyaá soho ra tuhun tsa cua cahan un tsihin ra —catyí musu ra Cornelio tsihin ra Pedro.

²³ Tacan tan tsaḥa ra Pedro quihvi ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quivi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

²⁴ Tsa inga quivi tsaḥa ra naha nda ñuu Cesarea nu ndatú ra Cornelio tsi ra naha tsihin tandihí nyivi ra, tan tsihin tandihí ra vaha iñi tsi ra. ²⁵ Cuhva tsa tsaḥa ra Pedro yuvehe ra Cornelio, quita ra Cornelio tan caahán ra tsihin ra. Tan tsicuiñi tsiti ra nuu ra Pedro tan quitsaḥa jacahnú ra tsi ra. ²⁶ Maa tyin ra Pedro cañihí ra tsi ra, tan catyí ra tsihin ra:

—Nduvita tyin tahan ñi cuví yooho cuví tucu yuhu; ñavin Nyoo cuví yu —catyí ra tsihin ra.

²⁷ Tan tsitsi tsa caahán ra Pedro tsihin ra, tan quihvi ra tsitsi vehe tan nanyehe ra tyin cuaha xaan nyivi ndu iin tsitsi vehe can. ²⁸ Tacan tan catyí ra Pedro tsihin ñi:

—Nyooho tsitó ndo tyin ley nyuhu tsa cuví ndi nyivi Israel, catyí tsi tyin ña taahán tsi tsa ndu iin ndi tsihin nyivi

tsa ñavin nyivi Israel cuví. Tan ndi tsitsi vehe ñi ña cuví quihvi ndi. Maa tyin Nyoo janaha ra tsi yu, tan catyí ra: “Yooho, ña catyí un tsihin nyivi tyin ndi intuhun ñi tan ña vaha ñi” catyí Nyoo tsihin yu. ²⁹ Yacan cuenda quivi tsa cana ndo tsi yu, numi ñi vatsí yu. Tan vityin cuñí yu coto yu nacuenda cana ndo tsi yu —catyí ra Pedro.

³⁰ Tacan tan nacahan ra Cornelio, tan catyí ra:

—Tsa iyó cumi quivi vityin, tumaa cuhva ihya tsa nyaá yu yuvehe tan ña tsatsi yu tan tsicán tahvi yu tsi Nyoo tsa tseñi. Tan quituvi iin rayi nuu yu. Nditsí ra jahma xiñu. ³¹ Tan catyí ra tsihin yu: “Yooho Cornelio, Nyoo tsiñi ra tsa tsicán tahvi un tsi ra. Tan nducuhun iñi ra tsa javahá un tyin jatyinyeé xaan un tsi nyivi ndaahvi. ³² Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyíi ra yuvehe ra tsa nañi Simón, iin ra tsa janduvitá ñi quiti. Tan vehe ra can nyaá tsi yatyin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyí ángel can tsihin yu. ³³ Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsí un. Tan vityin tandihí yo ndu iin yo nuu Nyoo. Tan cuñí ndi tyaá soho ndi tandihí tsa catyí Jutu Mañi yo tsihin un tyin cuhva cuenda un tsi ndi —catyí ra Cornelio tsihin ra Pedro.

Nu caahán ra Pedro tuhun ra Cristo yuvehe ra Cornelio

³⁴ Tacan tan quitsahá caahán ra Pedro tan catyí ra:

—Vityin cutuñí ñi yu tyin Nyoo cuñí ra tsi tandihí nyívi, tahañ ñi nyívi Israel, tan nyívi tsa ñavin nyívi Israel cuví. Ña tavá tsiyo ra tsi ndi intuhun maa yo. ³⁵ Tyin naquihín ra tsi yo tatun tyaá yahvi yo tsi ra, tan javahá yo tsa vaha. ³⁶ Nyoo cahañ ra tsihin nyuhu tsa cuví ndi tata ra Israel, tan jacoto ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihí maa yo. ³⁷ Nyooho tsitó vaha ndo tandihí tsa cuví ñuu nyívi Israel ñuu yu, nácaa quitsahá tsi nu cuví Galilea tsa yahá tsa cahañ ra Juan tuhun Nyoo tsihin nyívi, tan jacoondutya ra tsi ñi. ³⁸ Tsító ndo nácaa tsaha Nyoo tunyee ñi Tatyí Ii ra tsi ra Jesús, ra ñuu Nazaret. Tan tsica ra javahá ra tsa vaha, janduvahá ra tsi tandihí nyívi tsa nyehé tundoho jahá nu ña vaha. Tyehen javahá ra Jesús tyin Nyoo nyaá ra tsihin ra. ³⁹ Nyuhu cuví ndi tsandaa tsa cuenda tandihí tsa javahá ra Jesús ñuu Jerusalén tsihin tandihí ca ñuu tsa cayucú Judea. Yahá can tan ticaá ra naha tsi ra nu cruu tan tsahñí ra naha tsi ra. ⁴⁰ Maa tyin tsa tsinu uñi quívi janandoto Nyoo tsi ra. Tan quituví ra nuu ndi. ⁴¹ Ña quituví ra nuu tandihí nyívi. Maa tyin quituví ra nuu nyuhu tyin nacatsí ra tsi ndi nda tsanaha

tyin cuví ndi tsandaa cuenda ra. Nyuhu tsatsí ndi tan tsihi ndi tsihin ra tsa yahá tsa nandoto ra. ⁴² Tan tava tyiñu ra tsi ndi tyin cahan ndi tuhun ra tsihin nyívi. Tan cuví ndi tsandaa tyin Nyoo tava tyiñu ra tsi ra Jesús tyin cuví ra juez tsi nyívi tsa nyito tan nyívi tsa tsihi. ⁴³ Tan tacan tucu nda tsanaha, cahañ tandihí ra cuví ndusu yuhu Nyoo tuhun ra Jesús. Tan catyí ra naha tyin tandihí nyívi tsa tsinú ñi tsi ra Jesús, cua jaha Nyoo tucahnu ñi cuatyí ñi tsa cuenda maa ra.

Nu naquihín nyívi Tatyí Ii Nyoo tan ñavin nyívi Israel cuví ñi

⁴⁴ Ndi caahán ca ra Pedro tan nuu Tatyí Ii Nyoo siqui tandihí ñi tsa tyaá soho tsa caahán ra. ⁴⁵ Tan ra Israel tsa yihí cuenda ra Jesús tsa tsaá tsihin ra Pedro iyo xaan cuñí ra naha tyin tsaha ndihí tucu Nyoo Tatyí Ii ra tsi nyívi tsa ñavin nyívi Israel cuví. ⁴⁶ Tyin tsiñí ra naha caahán ñi inga yuhu tan jacahnú ñi tsi Nyoo. ⁴⁷ Tacan tan quitsahá caahán ra Pedro tsihin ra tsa tsaá tsihin ra:

—Ña cuví casi yo nu coondutya nyívi ihya. Tyin tsa naquihín ñi Tatyí Ii Nyoo tumaa tsa naquihín tucu maa yo —catyí ra tsihin ra naha.

⁴⁸ Tacan tan tava tyiñu ra Pedro tsi ñi tsa ndi ñihí Tatyí Ii Nyoo na coondutya ñi tsihin sívi ra Jesucristo. Tacan tan caahán ndaahvi ñi tsihin ra Pedro na ndoo ra taahan quívi tsihin ñi.

11

Nu nacatyí tuhun ra Pedro tsihin ra yihí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu

¹ Ra tava tyiñu ra Jesús tan inga ra yihí cuenda ra Jesús tsa iyó Judea, ñihí tuhun ra naha tyin nda cuanda nyivi tsa ñavin nyivi Israel cuví tan naquihín ñi tuhun Nyoo.

² Tacan tan tsaá nyico ra Pedro ñuu Jerusalén. Tan ra tsa catyí tyin tsiñí ñuhu tsa cunyaa tuñi Nyoo tsi tandihí rayii, xaan xaan cuñí ra naha nyehé ra naha tsi ra Pedro.

³ Tan catyí ra naha tsihin ra:

—¿Nacuenda tsahan un yuvehe nyivi tsa ñavin nyivi Israel cuví tan tsatsi un tsihin ñi? —catyí ra naha.

⁴ Tacan tan ra Pedro nacatyí tuhun ra nda nu quitsahá tandihí tsa cuví tsi ra, tan catyí ra:

⁵ —Yuhu nyii yu ñuu Jope. Tan tsa tsicán tahvi yu tsi Nyoo tan nyehe yu iin tsa janahá Nyoo tsi yu tyin iin jahma cahnu quee ityi andivi. Tan tandihí tsa cumi tutun tsi nuuhñi nuuhñi ñi tan vatsi nuú tsi ityi nu ñuhu nu nyii yu. ⁶ Tan nyehe vaha yu tsa yihí tsitsi jahma can. Tan nyehe yu quití tsa cumi tsaha, quití cuuhu, coo, tan saa.

⁷ Tan tsiñi yu iin ndusu tsa caahán tsihin yu: “Nduvita Pedro. Cahñi quití ihya tan çatsi un” catyí ndusu can tsihin yu. ⁸ Tan nacahan yu tan catyí yu tyehen: “Jutu Mañi yu, ña catsi yu, tyin ña

tuhvá yu catsi quití tsa catyí ley tyin ña vaha catsi ndi.”

⁹ Tacan tan ndusu can nacahan tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yaha janduvaha yu” catyí ndusu can tsihin yu.

¹⁰ Uñi tsaha cuví yacan. Yaha can tan nandaá nyico tandihí quití can tsihin jahma can ityi andivi. ¹¹ Tan juvin ñi cuhva can tsaá uñi taahan ra naha yuvehe nu nyii yu, quee ra naha ñuu Cesarea tan nanducú ra naha tsi yu. ¹² Tan Tatyí li Nyoo cahan tsihin yu na cuhun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihí iñu taahan ra yañi yo ihya naha ra tsihin yu. Tan tsa tsaá ndi nda ñuu Cesarea, quihvi ndi tsitsi vehe iin ra tsa nañi Cornelio. ¹³ Tan nacatyí tuhun ra can tsihin ndi nácaa nyehe ra tsi iin ángel tsitsi vehe ra. Nyaá nyityi ángel can tan catyí ra tsihin ra tyin na jacuhun ra musu ra ñuu Jope na cucana ra naha tsi yu. ¹⁴ Tyin yuhu cua cuhva cuenda yu tsi ra nácaa cuví cacu ra tsihin tandihí nyivi ra, catyí ángel can tsihin ra, catyí ra tsihin ndi. ¹⁵ Tan javahá ra can tumaa cuhva catyí ángel can tsihin ra. Tan tsa tsaá yu yuvehe ra quitsahá caahán yu tsihin nyivi tsa ndu iin yuvehe ra. Tan quitsi Tatyí li Nyoo siqui ñi tumaa tsa nuu tsi siqui yo tsa jihna ñi. ¹⁶ Tacan tan ndu-

cuhun iñi yu tsa catyí Jutu Mañi yo quivi can. Tan catyí ra tyehen: “Nditsa tyin ra Juan jacoondutyā ra tsi nyivi tshin ndutyā. Maa tyin nyooho cua coondutyā ndo tshin Tatyí Ii Nyoo”, catyí ra. 17 Nyoo tsahā ndihi tucu ra Tatyí Ii ra tsi ñi can tumaa tsa tsahā ra Tatyí Ii ra tsi yo quivi tsa natsinu iñi yo tsi Jutu Mañi yo Jesucristo. Tan tsa tacan çyóo ra cuví yuhu tan casi yu tsa javahá Nyoo? —catyí ra Pedro tshin ra hermano can naha ra.

18 Tacan tan tsa tsiñi ra ñuu Jerusalén tuhun can, ña cahān ca ra naha. Tan jacahnú ra naha tsi Nyoo, tan catyí ra naha:

—Tun tacan cuví, cuñí tsi catyí tyin Nyoo tsahá ndihi tucu ra ndatu tsi nyivi tsa ñavin nyivi Israel cuví tyin na ndu uvi iñi ñi cuatyí ñi, tan coo ñi ñayivi nyito tsa ña cua naa maa —catyí ra naha.

Nyivi yihí cuenda ra Cristo ñuu Antioquía

19 Quivi tsa tsahñi ra naha tsi ra Esteban, quitsahā nyaá ndaha ra naha tsi inga ca nyivi yihí cuenda ra Cristo. Tan yihí ñi tsinu ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyí mahñu ndutyā ñuhu. Tan yihí ñi tsaā ñi ñuu Antioquía. Tan tandihi ñi caahán ñi tuhun ra Cristo tshin nyivi, maa tyin iin ñi maa tshin nyivi Israel. 20 Tan tshin ñi tsa cuahán can, yihí nyivi ñuhu

Chipre, tan yihí tucu juhva nyivi ñuu Cirene. Tan tsa tsaā ñi ñuu Antioquía, tan quitsahā caahán ñi can tuhun ra Cristo tshin nyivi tsa ñavin nyivi Israel cuví. Tan jacoto ñi tuhun vaha Jutu Mañi yo ra Jesús. 21 Tan tunyee iñi Jutu Mañi yo iyó tshin ñi. Tan yacan cuenda cuaha nyivi nacoq ñi tuhun tsahnu. Tan quitsahā tsinú iñi ñi tsi Jutu Mañi yo. 22 Tacan tan tsaā tuhun can nda ñuu Jerusalén. Tan nyivi yihí cuenda ra Cristo jacuhun ñi tsi ra Bernabé na cuhun ra nda ñuu Antioquía. 23 Tan tsa tsaā ra Bernabé Antioquía can, nyehe ra nácaa nasocó Nyoo tsi ñi. Tan si xaan cuñí ra. Tan catyí ra tshin ñi na cunyicun ñi tsi Jutu Mañi yo tshin tsa ñi iñi ñi. 24 Tacan javahā ra Bernabé tyin cuví ra iin ra vaha. Tsitú ra tshin Tatyí Ii Nyoo, tan tsinú xaan iñi ra tsi Nyoo. Yacan cuenda cuaha xaan nyivi quihvi cuenda Jutu Mañi yo. 25 Tsa yahā can tan cuahán ra Bernabé cua nanducu ra tsi ra Saulo nda ñuu Tarso. Tan tsa nañihí ra tsi ra, tsindaca ra tsi ra nda ñuu Antioquía. 26 Tan tsiyucu ra naha tshin nyivi yihí cuenda ra Cristo ñuu can iin cuiya tan cuaha xaan nyivi jacuahā ra naha tuhun Nyoo. Tan juvin ñi ñuu Antioquía can cuví nu quitsahā catyí nyivi tyin nyivi Cristiano cuví ñi, o ñi yihí cuenda ra Cristo.

27 Tan quivi can tsaā taahan ra cuví ndusu yuhu

Nyoo. Quee ra naha ñuu Jerusalén tan tsaá ra naha ñuu Antioquía. ²⁸ Tan iin ra can nañí ra Agabo tsicunyaá nyityi ra tyañu nyivi yihí cuenda ra Cristo tan cañan ra tsa tsaḥa Tatyí Ii Nyoo tsi ra. Tan catyí ra tyin cua quitsi iin tama nñi cahnu nu ñuhu ñayivi. Tan tacan cuví quivi tsa cuví ra Claudio rey cahnu. ²⁹ Tacan tan nyivi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó ñi intuhun intuhun ñi, tyin cua jatyinyee ñi tsi nyivi yihí cuenda ra Cristo tsa iyó ñuu tsa cayucú Judea. ³⁰ Tacan javahá ñi tan jacuhun ñi juhva xuhun tsi ra tsa cuví ityi nuu tsihin nyivi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindaca ra naha xuhun can.

12

Nu tsihi ra Jacobo tan nu quihvi ra Pedro vehe caa

¹ Tan quivi can quitsaha nyaá ndaha ra cuví rey Herodes tsi juhva nyivi yihí cuenda ra Cristo. ² Tan tava tyiñu ra tyin na cañi ra naha tsi ra Jacobo, yañi ra Juan, tsihin mityi. ³ Tan nyehe ra Herodes tyin tahan xaan ñi nyivi Israel tsa javahá ra tacan, tan tava tyiñu ra tyin tñi ndihí ra naha tsi ra Pedro. Tan cuví tsi quivi vico pascua nu tuhvá nyivi tsatsí paan tsa nduve yutsan iya yihí. ⁴ Tsa yaha tsa tñi ra naha tsi ra

Pedro, tyihí ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihví tucu inga cumi taahan andaru. Tan tyaá ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua. ⁵ Tan tacan nyii ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyii ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa nñi ñi ñi.

Nu jacacu Nyoo tsi ra Pedro vehe caa

⁶ Tan tyaá ra Herodes cuhva tyin inga quivi can cua tava ra tsi ra Pedro nuu nyivi. Tan juvin ñi tsacuaa can, tan ra Pedro quixí xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe. ⁷ Tan sana ñi ra tan quituvi iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tñi ra xiin ra Pedro, jandoto ra tsi ra. Tan catyí ra tsihin ra:

—Janumi. Nduvita —catyí ángel can tsihin ra.

Tacan tan ndatsi cadena tsa nuuhñi ndaha ra. ⁸ Tan ángel can catyí ra tsihin ra:

—Nacuhñi vaha tsitsi un tan tyihí nditsan un tsaha un —catyí ángel can tsihin ra.

Tacan javahá ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

⁹ Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuví can, tan cuñi maa ra tyin iyó iin tsa janaha Nyoo tsi ra.

¹⁰ Maa tyin cuahán ra tsata ángel can tan yaha ra naha iin nu jahá cuenda ra andaru. Tacan tan yaha tucu ra naha inga nu jahá cuenda ra naha. Yaha can tacan tan tsaá ra naha yuvehe caa cahnu nu quitá nyivi. Tan yuvehe can nuña maa tsi. Tan quita ra naha. Tan tsa yaha yaha ra naha iin ityi, tan nacoó ángel can tsi ra. ¹¹ Tacan tan nacoto ra Pedro tyin nditsa, tan quitsaha tsicá iñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsi iin ángel tyin jacacu ra tsi yu ndaha ra Herodes tan ndaha ra ñuu Israel naha ra —cuñi ra Pedro.

¹² Tsicá iñi ra yacan ityi cuahán ra, tan tsaá ra yuvehe ña María sihi ra Juan Marcos. Tan cuaha xaan nyivi yucú ican tsicán tahvi ñi tsi Nyoo.

¹³ Tan tsa cañi ndaha ra Pedro yuvehe nuquehe, tan quita iin ñaha tyuvaa tsa nañi Rode, tsinyehé ña yoo cañi ndaha yuvehe can. ¹⁴ Maa tyin

cuhva tsa tsiñi ña ndusu ra Pedro, sii xaan cuñi ña, tan naa iñi ña nuña ña yuvehe can, tyin tsinú ña cuahán ña cua cahan ña tsihin nyivi tsa yucú tsitsi vehe can. Tan catyí ña tyin ra Pedro nyaá

ra yuvehe. ¹⁵ Tacan tan quitsaha catyí ñi tsihin ña:

—Iñi yooho ña vaha cuñi —catyí ñi tsihin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavin ra Pedro cuví ra, iin ángel cuenda ra cuví, catyí ñi tsihin ña.

¹⁶ Tan ra Pedro jañihí ca ra cañi ndaha ra yuvehe. Tan cuhva tsa nuña ñi yuvehe tan nyehe ñi tsi ra, iyo xaan cuñi ñi tan nayuhvi ñi. ¹⁷ Maa tyin javaha ra seña tsihin ndaha ra na cutaxin ñi. Tan nacatyí tuhun ra tsihin ñi nácaa tava Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihya tsihin ra Jacobo tan tsihin inga ra yañi yo naha ra —catyí ra Pedro.

Tan quita ra tan cuahán ra.

¹⁸ Cuhva tsa cunditsin, iyo xaan cuñi ra andaru tsa jahá cuenda tsitsi vehe caa can naha ra, tyin ña tsitó ra naha nácaa quita ra Pedro. ¹⁹ Tacan tan tava tyiñu ra Herodes na cunanducu ra naha tsi ra, tan ña nañihí ra naha tsi ra. Tacan tan tava tyiñu ra tsi ra naha na cañi ra naha tsi ra jahá cuenda vehe caa can naha ra. Yaha can tan quita ra Herodes Judea can tan cuahán ra cua coo ra ñuu Cesarea.

Nu tsihi ra Herodes

²⁰ Tan ra Herodes cuxaán xaan ra tsihin nyivi ñuu Tiro tan nyivi ñuu Sidón. Maa tyin cuñi ñi tsa coo vaha ñi tsihin ra tyin ñuu tsa ndacá ñaha ra, ican queé tsa tsatsí ñi. Tacan

tan ndu iin ñi tan cuahán ñi cua cutahan ñi tsihin iin ra tsa nañi Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes. ²¹ Tacan tan catyí ra Herodes tyin cuhun ñi nu nyaá ra iin quivi. Tan tsaá quivi can tan tsicunditsi ra jahma sii caá ra tsa jahá tyiñu ra. Tan tsicunyaá ra nu tyayu ra. Tan cahan ra tsihin ñi. ²² Tacan tan quitsaha caná tsaá ñi, tan catyí ñi:

—Ra tsa caahán ihya ñavin rayií cuví ra, tyin Nyoo cuví ra—catyí ñi.

²³ Tan juvin ñi cuhva can tan tñin cuehe tsi ra Herodes jahá ángel Jutu Mañi yo tyin tsaá ra tsa catyí nyivi tyin Nyoo cuví ra. Tan quihvi tin-dacu tsi ra, tan tsihi ra.

²⁴ Maa tyin tuhun Nyoo nducuahá ca tsi. Tan jañihí ca nyivi caahán ñi tuhun Nyoo tandihí ñi ityi. ²⁵ Quivi tsa ndihí tyiñu jahá ra Bernabé tsihin ra Saulo nda ñuu Jerusalén, cuanuhu ra naha ñuu Antioquía. Tan cuahán ndihí tucu ra Juan Marcos tsihin ra naha.

13

Nu quitsaha tsicá ra Saulo tan ra Bernabé tyiñu Nyoo

¹ Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihya naha ra: Ra Bernabé, ra Simón Tuun, ra Lucio ra ñuu Cirene, ra

Manaén tsa tsahnü iin nducu ñi tsihin ra Herodes tsa cuví rey ityi Galilea, tan ra Saulo. ² Tan iin quivi yucú tandihí ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahan Tatyí Ii Nyoo tsihin ra naha:

—Tava siin ndo tsi ra Bernabé tsihin ra Saulo tsa cuenda tyiñu tsa caná yu tsi ra naha—catyí Tatyí Ii Nyoo can tsihin ra naha.

³ Tacan tan tsa ndihí tsi-coo nyitya ra naha, tan tyiso ndaha ra naha jiñi ra Bernabé tsihin ra Saulo, tan tsican tahvi ra naha tsi Nyoo tsa cuenda ra naha. Tan cahan tsihin tahan ra naha, tsahan cuahán ra naha.

Nu caahán ra tava tyiñu ra Jesús tuhun Nyoo ñuhu Chipre

⁴ Yaha can tan jacuhun Tatyí Ii Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihvi ra naha tsitsi iin yutun ndoo tan cuahán ra naha nda ñuhu Chipre tsa canyií mahñu ndutya ñuhu. ⁵ Tacan tan tsaá ra naha ñuu Salamina tsa canyií yuhu ndutya ñuhu. Tan quitsaha caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyinyee ra tsi ra naha. ⁶ Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuanda tsa tsaá ra naha ñuu tsa nañi Pafos. Tan ican nañihí ra naha tsi iin ra ñuu Israel tsa nañi Barjesús. Tan tsitó ra

tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra. ⁷Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan cana ra tsi ra Bernabé tsihin ra Saulo, tyin cuñí ra tyaa soho ra tuhun Nyoo tsa caahán ra can naha ra. ⁸Tan ra tasi can ñañí tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo. ⁹Tacan tan ra Saulo tsa ñañí tucu Pablo, tsitú ra tsihin Tatyí li Nyoo. Tan ñihi xaan nanyehé ra tsi ra Elimas can. ¹⁰Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñí un jatívi un tandíhi tsa vaha. Tan tacan ñi tyasí un ityi vaha Jutu Mañi yo. ¹¹Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuvi nyehe un ñuhu ñicanyii juhva quívi —catyí ra Pablo tsihin ra Elimas.

Tacan tan juvin ñi kuhva can cuaa ra. Tan ndoo ra nu naa. Tan nducu ra iin ra tiin ndaha ra tyin ña nditsin nyehé ra. ¹²Tsa nyehe ra cumí tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñí ra nyehé ra tsa javahá Jutu Mañi yo.

Nu cuahán ra Pablo tan ra Bernabé nda ñuu Antioquía tsa canyii Pisidia

¹³Ra Pablo tan ra vaha iñi tsi ra quihví ra naha tsitsi iin yutun ndoo ñuu Pafos. Tan cuahán ra naha

nda ñuu Perge tsa canyii Panfilia. Maa tyin ra Juan Marcos nacoó ihñi ra tsi ra naha tan cuanuhu ra nda ñuu Jerusalén. ¹⁴Yaha can tan quee ra naha Perge can, tan cuahán ra naha ñuu Antioquía tsa canyii Pisidia. Ican quihví ra naha tsitsi vehe ñuhu nyívi Israel tan cuví tsi iin quívi quitatú ñi. Tan tsinyecu ra naha. ¹⁵Tacan tan quitsaha cahví nyívi nu libru ley Nyoo tsa tyaa ra Moisés. Tan cahví tucu ñi libru tsa tyaa ra cuví ndusu yuhu Nyoo tahañ tsanaha. Yaha can tan ra cuví ityi nu vehe ñuhu naha ra catyí ra naha tsihin ra hermano tsa nyecú ican, tyin tatun cuñí ra naha cahan ra naha tsihin nyívi, cuví cahan ra naha. ¹⁶Tacan tan nduvita ra Pablo tan javaha ra iin seña tsihin ndaha ra tyin na cutaxin ñi. Tan catyí ra:

—Tyaa soho nyooho, ra ñuu Israel, tan nyooho nyívi tsa tyaa yahvi tsi Nyoo. ¹⁷Nyoo cuenda yo, tsa cuví yo nyívi Israel, nacatsi vaha ra tsi tsii tsaahnu yo. Tan quívi tsa iyó ca ra naha Egipto, javaha ra iin ñuu cahnu tsi ra naha. Vasu ñavin nyívi ñuu can cuví ra naha, maa tyin janducuaha ra tsi ra naha. Yaha can tan tava ra tsi ra naha ityi can tsihin tunyee iñi tsa iyó tsi ra. ¹⁸Tan cunyeé iñi Nyoo tandíhi kuhva tsicoo ra naha nu tsica nuu ra naha nu tsiqui tsitsi tsa uvi xico cuiya. ¹⁹Tan janaa ra utsa taahan ñuu nahnu tsa cayucú

ni cahnū Canaán, tyin tsaha ra ñuhu can tsi tsii tsaahnu yo. ²⁰ Yahā can tan quit-saha ndacá ñaha juez tsi nyivi can jahā Nyoo. Tumaa cumi cientu sasava cuiya tsindacā ñaha juez tsi ñi, nda cuanda quivi tsindacā ñaha ra Samuel ra cuví ndusu yuhu Nyoo tsi ñi. ²¹ Tacan tan maa ñi tsican ñi iin rey tsa cundaca ñaha tsi ñi. Tan Nyoo tsaha ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacā ñaha ra tsi ñi. ²² Yahā can tan Nyoo tava ra tsi ra Saúl tsa cuví ra rey. Tan tsaha ra tyiñu can tsi ra David. Tan catyí ra: “Nyehé yu tyin ra David, sehe ra Isaí, cuví ra iin rayi tsa taahán iñi yu cuhva iyó. Tan cua javaha ra tandihi tsa cuñi yu” catyí Nyoo tuhun ra David. ²³ Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsi tsi ra tyin jacacu ra tsi yo tsa cuví yo nyivi Israel, tumaa catyí ra tsihin tsii tsaahnu yo tañan tsanaha. ²⁴ Tan ndi cumañi ca quitsi ra Jesús, ra Juan, ra jacoondutyā tsi nyivi, cañan ra tsihin tandihi nyivi Israel. Tan catyí ra tsihin ñi tyin cuñi tsi tsa ndu uvi iñi ñi cuatyí ñi, tan coondutyā ñi. ²⁵ Tan tsa cua ndihi tyiñu jahá ra Juan tan catyí ra: “¿A cuñi maa ndo tyin yuhu cuví ra cahnū xaan tsa ndatú ndo? Ñavin yuhu cuví ra cahnū can. Tyin tsata tsa yaha yuhu tan vatsi inga ra. Tan ndi nditsan tsa

nyaá tsaha ra, nduve yahvi nyaá yu tan tava yu itsi. Tyin cahnū xaan ra cuví ra”, catyí ra Juan.

²⁶ Tan caahán ca ra Pablo tan catyí ra:

—Yañi, nyooho nyivi tata ra Abraham tan tandihi inga ndo tsa tyaá yahvi tsi Nyoo. Tsa cuenda nyooho cuví tuhun ihya tyin jacuahá Nyoo tsi yo nácaa cacu yo. ²⁷ Nyivi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñi iñi ñi tuhun tsa tyaá ra cuví ndusu yuhu Nyoo tañan tsanaha, vasu jacuahá xaan ñi tuhun can tandihi quivi tsa quitatu ñi, maa tyin ña cutuñi iñi ñi. Tan quivi tsahñi ñi tsi ra Jesús cuví tsi tumaa cuhva catyí ra cuví ndusu yuhu Nyoo. ²⁸ Tyin vasu nduve cuatyí ra Jesús nañihi ñi, maa tyin tsican ñi tsi ra Pilato na tyihi ra tyiñu tyin cañi ra naha tsi ra Jesús. ²⁹ Tan tsa yahā janyehe ñi tundoho tsi ra tumaa catyí maa tuhun ra nu libru, tan tsihi ra. Tacan tan januu ñi tsi ra nu cruu. Tan tsicutsi ñi tsi ra. ³⁰ Maa tyin Nyoo janandotō ra tsi ra inga tsaha. ³¹ Tan tsitsi tsa cuaha quivi tan quituvi ra nuu ra tsa cuahán tsihin ra quivi quitā ra ityi Galilea, tan tsaá ra Jerusalén. Tan ra ican naha ra cuví ra tsa caahán tuhun ra tsihin nyivi vityin. ³² Tan yacan cuenda nyuhu caahán ndi tuhun vaha tsa catyí Nyoo tsihin tsii tsaahnu yo tyin cuhva ra tsi yo. ³³ Tyin

tsa cuenda tsa vaha tsi maa yo tsa cuví yo nyívi tata ñi, javahá maa Nyoo tsa catyí ra. Tyin janandoto ra tsi ra Jesús tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayívi coo un vityin” catyí Nyoo tsihin ra. ³⁴ Nyoo tyaá ra cuhva tyin janandoto ra tsi ra, tyin tacan tan ña cua tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahan yu tsihin ra David tyin cua cuhva yu tsi ndo.” ³⁵ Yacan cuenda catyí tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyí tsi. ³⁶ Ra David jahá tyiñu ra tsa cuenda nyívi tsa tsicoo quívi tsicoo ra, tandihi tsa catyí Nyoo tsihin ra tyin javaha ra, javahá ra. Yahá can tan tsihi ra tan tsicutsi ñi tsi ra tumaa tsicutsi ñi tsi jutu ra. Tan tyahyu cuñu ñuhu ra. ³⁷ Maa tyin ra tsa janandoto Nyoo, ña tyahyu cuñu ñuhu ra. ³⁸ Yañi, cuñí tsi tsa coto ndo tyin tsa cuenda cuatyí yo tan quítsi ra Jesús tan tsihi ra tyin jahá ra tucahnu iñi cuatyí yo. ³⁹ Tan tsa cuenda ra Jesús jahá Nyoo tucahnu iñi tsi tandihi ñi tsa tsinú iñi tsi ra, tyin ley Nyoo tsa tyaá ra Moisés ña cuví janduvaha tsi tsi yo nuu Nyoo. ⁴⁰ Jahá ndo cuenda coto ndoo tsa tyaá ra cuví ndusu yuhu Nyoo siqui ndo. Tyin catyí ra naha tyehen:

⁴¹ Nyehe nyooho, ra tsa tsacú nducu, taahán

tsi tsa nayuhvi ndo tan taahán tsi cunaa ndo.

Tyin yuhu cuví Nyoo, tan javahá yu iin tsa cahnu quívi tsa iyó ndo vityin.

Maa tyin ña cua tsinu iñi ndo tandihi tsa javahá yuhu vasu nacatyí tuhun nyívi tsihin ndo, catyí Nyoo.

⁴² Ndihi cahan ra Pablo tan quitá ra tsata vehe ñuhu can tsihin ra vaha iñi tsi ra. Tacan tan nyívi tsa ñavin nyívi Israel cuví quítsahá catyí ñi tsihin ra, tyin na cahan nyico ra tuhun can tsihin ñi inga vitya quívi tsa quitatú ñi. ⁴³ Cuhva tsa ndihi ndu iin ñi, cuaha xaan nyívi Israel tan nyívi tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cahun ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.

⁴⁴ Tsa inga vitya quívi quitatú ñi, ndu iin nyico ñi. Tan tsa yatyin tandihi ña maa nyívi ñuu can ndu iin tsihin ñi tan tyaá soho ñi tuhun Nyoo. ⁴⁵ Maa tyin cuhva tsa nyehe ra Israel naha ra, cuxaán ra naha tyin nyehé ra naha tyin cuaha nyívi nyicun tsi ra hermano can naha ra. Tan quítsahá caahán ra naha tsi ra Pablo, tan cahan ra naha ndavaha ñi siqui ra. ⁴⁶ Maa tyin ra Pablo tan tsihin ra Bernabé ña yuhvi maa ra naha tan quítsahá caahán ñihi ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyooho tsa cuví ndo nyiví Israel. Maa tyin ña cuñí ndo naquihin ndo tsa caahán ndi. Tan nyooho ña cuñí ndo tsa coo ñayiví nyito tsa ña cua naa maa tsi ndo. Yacan cuenda cua huhun ndi cucahan ndi tsihin nyiví tsa ñavin nyiví Israel cuví. ⁴⁷ Tyin tacan catyí Jutu Mañi yo tsihin ndi tan catyí ra tyehen:

Tyaa yu tsi un tumaa iin ñuhu tsa jandunditsín nu iyó nyiví naní cahnu nu ñuhu ñayiví.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

⁴⁸ Tsa tsiñi ra tsa ñavin ra Israel cuví naha ra, sií xaan cuñí ra naha. Tan quitsaha catyí ra naha tyin tuhun Nyoo vaha xaan tsi. Tan natsinu iñi tandihi nyiví tsa nacatsi maa Nyoo, tyin coo ñi ñayiví nyito tsa ña cua naa maa. ⁴⁹ Tacan tan nducuahaca tuhun Nyoo tandihi ityí ñuu can. ⁵⁰ Maa tyin ra Israel cahan ra naha tsihin juhva ñaha cuca tsa nyicún ley Nyoo tsa tyaa ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsaha nyaá ndaha nyiví tsi ra Pablo tan ra Bernabé, nda cuanda tsa tava ñi tsi ra naha ñuu can. ⁵¹ Tacan tan naquisi ra naha nyaca tsaha ra naha tumaa iin seña tyin ndoo cuatyí nyiví can siqui maa ñi. Tan cuahán ra naha ñuu Iconio. ⁵² Maa

tyin ñi yihí cuenda ra Cristo ñuu Antioquía can sií xaan cuñí ñi. Tan tsitú ñi tsihin Tatyí Ii Nyoo.

14

Nu nyii ra Pablo tan ra Bernabé ñuu Iconio

¹ Ra Pablo tan ra Bernabé yucú ra naha ñuu Iconio. Tan quihvú ra naha tsitsi vehe ñuhu nyiví Israel. Tan vaha xaan cahan ra naha tuhun Nyoo tsihin nyiví can. Tan cuaha xaan ñi natsinu iñi ñi tsi ra Cristo, nyiví Israel tan nyiví tsa ñavin nyiví Israel cuví. ² Maa tyin ra Israel tsa ña tsinú iñi tsi ra Cristo natyuhú ra naha tsi nyiví tsa ñavin nyiví Israel cuví tyin na caca ña vaha iñi ñi nyehe ñi tsi ra yihí cuenda ra Cristo.

³ Yacan cuenda ra Pablo tan ra Bernabé ndoo ra naha ican cuaha quiví. Tan tsihin tsa nií iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsaha Jutu Mañi yo tunyee iñi tsi ra naha tyin javaha ra naha seña tan tsa iyo na coto nyiví tyin nditsa tsa caahán ra naha. ⁴ Maa tyin nyiví ñuu ña iin tsicá iñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tava tyiñu ra Jesús. ⁵ Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumí tyiñu, tyin cua cahan ra naha ndavaha ñi siqui ra tava tyiñu ra Jesús,

tan cua cañi ra naha yuu tsi ra naha. ⁶ Maa tyin ra Pablo tan ra Bernabé ñihí tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Lистра, tan nda ñuu Derbe ityi Licaonia. Tan tsicá nuu ra naha ityi ñuu can. ⁷ Tan cahān nyico tucu ra naha tuhun Nyoo nácaa jacacú ra tsi yo.

Nu cañi nyivi yuu tsi ra Pablo nda ñuu Lистра

⁸ Nda Lистра iyó iin rayi tsa coxo tyin nda quivi cacú ra tan ña cuví caca ra, tyin pehe nduvi taahan tsaha ra. ⁹ Tan ra pehe tsaha can tyaá soho ra tsa caahán ra Pablo. Tan ra Pablo, tuví iñi ra tyin tsinú iñi ra can tyin cuví nduvaha ra. ¹⁰ Tacan tan ra Pablo caahán ra tsihin tsa ñihí ndusu ra, tan catyí ra:

—Nduvita tan cunyaa nyityi un —catyí ra Pablo tsihin ra.

Tan ra ican, intuhun ñi ndava ra, tan tsinyaa nyityi ra. Tan quitsahā tsicá ra. ¹¹ Tsa nyehé nyivi tyin javahā ra Pablo tacan, quitsahā caná tsa ñi tsihin yuhu Licaonia, tan catyí ñi:

—Ra tsa tsaā nu yucú yo ihya, nyoo cuví ra naha, maa tyin tumaa caá rayi, caá ra naha —catyí ñi.

¹² Tan catyí ñi tyin ra Bernabé cuví ra nyoo tsa nañi Júpiter, tan ra Pablo cuví nyoo tsa nañi Mercurio, tyin ra ican cuví ra tsa caahán. ¹³ Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyivi tsitoho Júpiter.

Tan quitsi ndaca ra indiqui tan ita tyin maa ra tan nyivi cuñi ñi jacahnu ñi tsi ra Pablo tsihin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñi ñi tyin nyoo cuví ra naha. ¹⁴ Maa tyin cuhva tsa tuví iñi ra naha tsa tsicá iñi ñi, quitsahā tsaahnyá ra naha jahma ra naha. Tan javahā ra naha tacan tumaa iin seña tyin ña ndoó ra naha vaha. Tan quihvi ra naha tyañu nu tuví nyivi, tan canā tsa ra naha, ¹⁵ Tan catyí ra naha:

—Nyooho tata, ¿nácaa tsa javahá ndo tyehen? Nyuhu juvin ñi rayi ñuu ñayivi ihya cuví ndi. Tumaa cuví nyooho cuví tucu nyuhu. Tan vatsí cahan ndi tsihin ndo tyin na jaña ndo tsa javahá ndo tyehen tyin ña tsiñi ñuhu yacan tsi ndo, tan na cunyi-cun ndo tsi Nyoo nyito. Juvin ra tsa javahā andivi tan ñuhu ñayivi. Tan javahā ra ndutya ñuhu tan tandihi maa tsa iyó tsitsi ndutya ñuhu can. ¹⁶ Tan tahañ tsanaha nda cuanda vityin, Nyoo jaña ndaha ra tsi nyivi na javaha maa ñi cuhva cuñi ñi, ¹⁷ vasu tandihi quivi jacuahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsahá ra tsa coo vaha tsa tatsí yo quivi taahán tsi. Tan tsahá ra tsa catsi yo. Tan tsahá ra tsa cusii cuñi yo —catyí ra naha tsihin nyivi can.

¹⁸ Maa tyin vasu catyí ra naha tacan, yii xaan tan tyasi ra naha tsa cahñi ñi indiqui

can, tyin cuñí ñi jacahnu ñi tsi ra naha tsihin can.

¹⁹ Tacan tan tsaꝯ juhva ra Israel, ra tsa ña tsinú iñi tsi ra Cristo, ra ñuu Antioquía, tan ra ñuu Iconio. Tan natyuhꝯ ra naha tsi nyivi, na cañi ñi yuu tsi ra Pablo. Tan tacan javahꝯ ñi, tan cuñí maa ñi tyin tsa tsihi ra. Tacan tan ixtꝯ caa ñi tsi ra tan tsindacꝯ ñi tsi ra nda yuhu ñuu. ²⁰ Maa tyin ndu iin ra yihí cuenda ra Cristo nu canyíi ra Pablo. Tan nduvitꝯ nyico ra. Tan quihvi nyico ra inga tsaha tsitsi ñuu can. Tan tsa inga quivi can cuahán ra ñuu tsa nañi Derbe tan cuahán ra Bernabé tsihin ra.

²¹ Tan cahꝯ tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyivi nacuhvꝯ ñi tsi ñi tsi Nyoo. Yahꝯ can tan cuanuhꝯ ra naha ityi quitsi ra naha. Tan yahꝯ nyico ra naha ñuu Listra tan ñuu Iconio inga tsaha, tan tsaꝯ nyico ra naha nda ñuu Antioquía. ²² Tan tandihí ñuu can jandu iin ra naha iñi nyivi tsa yihí cuenda ra Cristo. Tan catyí ra naha tsihin ñi na cahun ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñi yo tsa cundaca ñaha Nyoo tsi yo, cuñi tsi tsa nyehe yo tundoho.

²³ Tan natyisꝯ ra naha tsi ra cua cuvi ityi nuu tsihin nyivi tsa yihí cuenda ra Cristo tan iin tan iin vehe ñuhu. Tan tsi-coꝯ nyitya ra naha tan tsicꝯ tahvi ra naha tsi Nyoo tsa cuenda ra tsa cua cuvi ityi

nuu tsihin nyivi vehe ñuhu can naha ra. Yahꝯ can tan catyí ra Pablo naha ra tsihin ra cuvi ityi nuu vehe ñuhu can naha ra:

—Tsinu iñi ndo tsi Jutu Mañi yo. Tyin maa ra cua jaha cuenda tsi ndo—catyí ra Pablo naha ra tsihin ra naha.

Nu cuanuhꝯ nyico ra Pablo tan ra Bernabé ñuu Antioquía ityi Siria

²⁴ Yahꝯ can tan yahꝯ ra Pablo tsihin ra Bernabé ñuu tsa cayucú Pisidia, tan tsaꝯ ra naha nda cuanda Panfilia. ²⁵ Cahꝯ ra naha tuhun Nyoo ñuu Perge. Yahꝯ can tan tsahꝯ ra naha ñuu Atalia. ²⁶ Ican quihvi ra naha tsitsi iin yutun ndoo tan cuanuhꝯ ra naha nda ñuu Antioquía. Ican cuvi ñuu nu natyisꝯ ñi tsi ra naha tyin cua javaha ra naha tyiñu Nyoo, tan vi-tyin tsa tsaꝯ nuhu ra naha. ²⁷ Tsa tsaꝯ nyico ra naha ñuu Antioquía jandu iin ra naha tsi nyivi yihí cuenda ra Cristo. Tan nacatyí tuhun ra naha tsihin ñi tandihí tsa javahꝯ Nyoo tsihin ra naha, tan nácaa nuñꝯ Jutu Mañi yo ityi tyin tsinú tucu iñi ñi tsa ñavin nyivi Israel cuvi. ²⁸ Tan naha xaan ndoo ra Pablo tan ra Bernabé tsihin ñi yihí cuenda ra Cristo ñuu can.

15

Nu jandaꝯ ra tava tyiñu ra Jesús tyiñu nda ñuu Jerusalén

¹ Ndi nyíi ca ra Pablo tan ra Bernabé ñuu Antioquía, tan tsaꝯ taahan ra naha queꝯ ra

naha nda Judea. Tan quit-sahā jacuahá ra naha tsi ra yihí cuenda ra Cristo. Tan catyí ra naha tyin cuñí tsi tsa cunyaa tuñi Nyoo tsi ra naha, tumaa cuhva catyí ra Moisés, tyin tacan tan cua cacu ra naha. ²⁻³ Tan ñihi xaan cahan yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin cahun ra naha ñuu Jerusalén, cujandaa ra tyiñu can tsihin ra tavā tyiñu ra Jesús tan tsihin ra cuví ityi nuu tsihin nyivi vehe ñuhu ñuu Jerusalén can naha ra. Tacan tan cuahán ra naha. Tan ityi cuahán ra naha, yahā ra naha ityi Fenicia tan Samaria. Tan nacatyí tuhun ra naha tsihin nyivi yihí cuenda ra Cristo nácaa jañá nyivi tsa ñavin nyivi Israel cuví tuhun tsahnu tsa tsinú iñi ñi, tyin nacuhvá cuenda ñi tsi ñi tsi Nyoo. Tan tandihi ra hermano sii xaan cuñí ra naha tsa tsitō ra naha yacan.

⁴ Quivi tsaā ra Pablo tan ra Bernabé ñuu Jerusalén, cuahán ra naha nu ndu iin nyivi yihí cuenda ra Cristo. Tan tandihi ñi tan ra cuví ityi nuu tsihin ñi, tan tsihin ra tavā tyiñu ra Jesús, tsahā ñi yaha ra naha tyin nacatyí tuhun ra naha tsa javahā Nyoo tsihin ra naha. ⁵ Maa tyin juhva ra fariseo tsa tsinú iñi tsi ra Cristo, nduvitā ra naha tan catyí ra naha:

—Tandihí ra tsa ñavin ra Israel cuví tan tsinú iñi ra naha tsi ra Jesús, cuñí tsi tsa cunyaa tuñi Nyoo tsi ra naha. Tan cuñí tucu tsi tsa javaha ra naha cuhva catyí ley Nyoo tsa tyaa ra Moisés —catyí ra naha.

⁶ Tacan tan ndu iin ra cuví ityi nuu tsihin ñi yihí cuenda ra Cristo tan ra tavā tyiñu ra Jesús tyin natuhun tahan ra naha tuhun can. ⁷ Tsa yahā tsa cahan yuhu xaan ra naha, tan nduvitā ra Pedro, tan catyí ra:

—Yañi, tsitó ndo tyin tsitsi tsa tandihí yo, nacatsi Nyoo tsi yuhu ra ndaahvi quivi can, tyin cahan yu tuhun ra tsa jacacú tsi yo tsihin nyivi tsa ñavin nyivi Israel cuví, tan na tsinu iñi ñi tsi Jutu Mañi yo. ⁸ Tan Nyoo, ra tsitó añima tandihí nyivi, janahā ra tsi yo tyin cuñí ra tsi ñi ican. Yacan cuenda tsahā ra Tatyí Ii ra tsi ñi, tumaa tsa naquihin tucu maa yo Tatyí Ii ra tahan tsanaha. ⁹ Nyoo inducu ñi cuñí ra tsi nyivi. Yacan cuenda ña tyaa tsiyo ra tsi ñi ican tan ndi tsi yoo. Janduvahá ra tsi ñi tsa cuenda tsa tsinú iñi ñi tsi ra tumaa maa yo. ¹⁰ Vityin ¿nacuenda ña tsinú iñi ndo tsa javahā Nyoo tsihin ñi can? Tyin ña vaha tsa tyisó yo ley Nyoo tsa tyaa ra Moisés siqui ñi. Tyin ndi maa tsii tsahnu yo tan ndi maa yo tan ña cuví naquihin vaha yo ley can. ¹¹ Ñavin tacan cacú yo. Yoo tsitó yo tyin cacú yo tsihin tumañi iñi tsa javahá Jutu Mañi yo ra

Jesús tsihin yo. Tan tacan tucu ñi can —catyí ra Pedro tsihin tandihí ra can naha ra.

¹² Tacan tan taxin ñi cuví tandihí ra naha. Tan tyaa soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javahá Nyoo nu cahán ra naha tuhun ra nu yucú nyívi tsa ñavin nyívi Israel cuví. ¹³ Tsa ndihí cahán ra naha, quitsahá caahán ra Jacobo, tan catyí ra:

—Nyooho yañi, tyaa soho ndo tsa cua cahan yu tsihin ndo. ¹⁴ Tsa catyí tuhun ra Simón Pedro tsihin yo nácaa quitsahá tsahá Nyoo tumañi ñi tsi ñi tsa ñavin nyívi Israel cuví. Tyin nacatsí tucu ra tsi juhva ñi tyin cuví ñi nyívi cuenda ra. ¹⁵ Tan ndu iin tuhun ihya tsihin tuhun tsa cahán ra cuví ndusu yuhu Nyoo tahañ tsanaha, tumaa cuhva nyaá maa nu tutu Nyoo nu catyí ra:

¹⁶ Yahá tandihí tuhun ihya tan cua quitsi nyico yu nu yucú ndo.

Quívi tsa tsicoo ra David, vaha xaan jacahnu nyívi tsi yu.

Maa tyin yahá can jandihí nyívi tsa jacahnú ñi tsi yu.

Maa tyin cua quitsi nyico yu inga tsaha tan cua cañihi yu vehe ñuhu ra David.

Tyin cua jacahnu nyico nyívi tsi yu.

¹⁷ Tyin tacan tan cuví nanducú tandihí inga ca nyívi tsi yu,

tandihí ñi tsa ñavin nyívi Israel cuví tan tsinú ñi tsi yu.

¹⁸ Tacan catyí Jutu Mañi yo, tan jacuahá ra tuhun ihya tsi nyívi tsicoo tahañ tsanaha tan tsihin nyívi tsa iyó vityin.

¹⁹ Yacan cuenda catyí yu tyin ña vaha tsa jatyañu yo tsi nyívi tsa ñavin nyívi Israel cuví, ñi tsa nacoo tuhun tsahnu ñi tan quihví ñi cuenda ra Cristo. Ña vaha catyí yo tyin cuñi tsi tsa tyaa yahvi ñi ley tsahnu yo. ²⁰ Vaha ñi maa tsihin tsa jacahun yo carta tsi ñi. Tan catyí yo tsihin ñi tyin ña cua catsi ñi cuñu tsa tsahá cuenda nyívi tsi tsitoho. Tan ña cuví coo rayíi tsihin ñaha tun ña tindaha ra. Tan ndi ñiñaha ña cuví coo ñi tsihin rayíi tun ña tindaha ñi. Rayíi tsa iyó ñasihi ña cuví coo ra tsihin inga ñaha, tacan tucu ñiñaha tsa iyó yíi, ña cuví coo ñi tsihin inga rayíi. Tan catyí tucu yo tsihin ñi quihví cuenda ra Cristo tan ñavin nyívi Israel cuví ñi tyin ña cua catsi ñi cuñu quiti tsa tsihí tsa cava ñi jucun tatun ña tsatí niñi ti. Tan ña cua catsi ñi niñi quiti. ²¹ Tyin nda tyembu tsahnu tan nda cuanda vityin iyó maa ra jacuahá ley Nyoo tsa tyaa ra Moisés vehe ñuhu nyívi Israel. Tan jacuahá ra naha tuhun can tan iin tan iin ñuu, tan tahan tahan una quívi, quívi tsa quitatú ñi —catyí ra Jacobo tsihin ra naha.

22 Tacan tan ra tava tyiñu ra Jesús tan ra cuví ityi nuu tsihin ñi vehe ñuhu tsihin tandihí ñi yihí cuenda ra Cristo, nacatsi ñi tsi taahan ra naha. Tan yaha can tan jacuhun ñi tsi ra naha tyin cuhun ra naha ñuu Antioquía tsihin ra Pablo tan ra Bernabé. Tan ra tsa natyiso ñi cuví ra: Judas tsa nañí Barsabás, tan ra Silas. Ra ican cuví iin ra tsa nyisó tyiñu vehe ñuhu nda ñuu Jerusalén. 23 Tan tsihin ra naha jacuhun ñi iin carta. Tan catyí carta can tyehen:

“Nyuhu ra tava tyiñu ra Jesús, tan tsihin ra cuví ityi nuu tsihin ñi vehe ñuhu tan tsihin ra yañi ndo cuenda ra Cristo, tandihí ndi tsahá ndi nacumi tsi nyooho tsa ñavin ra Israel cuví ndo. Tyin yañi ndi cuví tsi ndo vasu ñavin nyivi Israel cuví ndo. Tandihí nyooho tsa iyó ndo ñuu Antioquía, tan nyooho nyivi Siria, tan tsihin nyooho nyivi Cilia, jaquitsí ndi carta ihya tsi tandihí ñi ndo. 24 Tsitó ndi tyin quita taahan ra ityi nu yucú ndi ihya. Tan vatsí ra naha nu yucú ndo. Maa tyin ña catyi nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyi ra naha tyin cuñí tsi tsa cun-yaa tuñi Nyoo tsi ndo, tan naquihin vaha ndo ley Nyoo tsa tyaá ra Moisés. Maa tyin ñavin nyuhu cahán tsihin ra naha tyin quitsi cahán ra naha yacan tsihin ndo. 25 Yacan cuenda ndu iin ndi tan ndoq ndi tuhun cuenda

tyiñu can tan tsicá iñi ndi tyin vaha tsa jaquitsi ndi tsi ra hermano ihya naha ra tsihin ra Pablo tan ra Bernabé nu yucú ndo. 26 Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñí nyivi cahñi ñi tsi ra naha, maa tyin ña jandihí ra naha tsa jacotó ra naha tuhun Jutu Mañi yo ra Jesucristo. 27 Yacan cuenda jaquitsí ndi tsi ra Judas tan ra Silas. Tan maa ra naha cua cahan ra naha tsihin yuhu ra naha tsihin ndo, tyin cua cuhva cuenda ra naha tandihí tsa tyaá ndi nu tutu ihya. 28 Tyin ndi Tatyí Ii Nyoo tan ndi nyuhu ña cuñí ndi tyiso ndi tundoho siqui ndo. Maa tyin ñiñi ca cuñí tsi tsa naquihin vaha ndo tuhun ihya: 29 Ña cua catsi ndo cuñu tsa tsahá cuenda nyivi tsi tsi-toho. Tan ña cua catsi ndo ñiñi quití, ndi cuñu quití tsa tsihi tsa cava ñi jucun tan ña tsati ñiñi ti. Ña caca nuu ndo tsihin ñaha. Tan nyooho ñiñaha ña caca nuu ndo tsihin rayi. Tatun na quihin vaha ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyí ra naha nu carta can.

30 Tan cuahán ra tsa jacuhun ra naha, tan tsaá ra naha ñuu Antioquía. Tan jandu iin ra naha tsi tandihí nyivi yihí cuenda ra Cristo tan nacuhva cuenda ra naha carta can. 31 Tsa cahvi ñi carta can, si xaan cuñí ñi tyin vaha xaan caahán tsi. 32 Tan ra Judas tsihin ra Silas cuví tucu ra naha ndusu

yuhu Nyoo. Tan jandu iin ra naha iñi nyivi can tsihin tsa cahan ra naha. ³³ Tan tsa yaha tsiyucu ra naha juhva quivi tan cuanuhu nyico ra naha nda nu yucu nyivi tsa jacuhun tsi ra naha. Tan tandihi nyivi yihí cuenda ra Cristo ñuu Antioquía can catyí ñi tyin na cuhun vaha ra naha. ³⁴ Maa tyin ra Silas catyi ra tyin cua ndoo ra. ³⁵ Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihi ca ra naha cahan ra naha tuhun Jutu Mañi yo tsihin nyivi can tan jacuahá ra naha tsi ñi.

Nu tsinu uvi tsaha cuahán ra Pablo tuhun Nyoo, tan nu quitá tsiyo ra nuu ra Bernabé

³⁶ Tan tsa yaha juhva quivi, tan cahan ra Pablo tsihin ra Bernabé:

—Cohon inga tsaha cunyehe yo nu yucu nyivi yihí cuenda Jutu Mañi yo ra Cristo tandihi ñuu nu cahan yo tuhun ra, tyin nyehe yo nácaa yucu ñi—catyí ra Pablo tsihin ra.

³⁷ Tan ra Bernabé cuñi ra tsa cuhun nyico ra Juan Marcos tsihin ra naha. ³⁸ Maa tyin ra Pablo ña taahán iñi ra tsa cuhun ra Juan tsihin ra naha, tyin naco ihñi ra tsi ra naha nda Panfilia quivi tsa tsahan ra tsihin ra naha. Tan ña tsahan ca ra tsijaha tyiñu ra tsihin ra naha. ³⁹ Tan cahan yuhu tahan ra naha, tan ndusiin ra naha. Ra Bernabé cuahán ra tsihin ra Juan Marcos. Tan quihvi ra

naha tsitsi iin yutun ndoo tan cuahán ra naha ñuhu Chipre. ⁴⁰ Tan ra Pablo nacatsi ra tsi ra Silas. Tan tsa yaha tsican tahvi ra hermano naha ra tsi Nyoo tsa cuenda ra naha tyin na jatyinyee Nyoo tsi ra naha, tacan tan cuahán ra naha. ⁴¹ Tan yaha ra naha ñuu tsa cayucu Siria tan Cilicia, tan jandu iin ra naha iñi nyivi tsa yihí cuenda ra Cristo tan iin tan iin ñuu.

16

Nu cuahán ra Timoteo tsihin ra Pablo tan ra Silas

¹ Ra Pablo tsihin ra Silas tsaá ra naha ñuu Derbe, tan ñuu Listra. Tan ican nañihi ra naha tsi iin ra yihí cuenda ra Cristo. Nañi ra Timoteo. Tan sihi ra cuví ña iin ñaha Israel. Tan yihí ndihi ña cuenda ra Cristo. Maa tyin jutu ra, ra Grecia cuví ra. ² Tan ra Timoteo vaha xaan tsicá ra tuhun Nyoo, catyí nyivi yihí cuenda ra Cristo ñuu Listra tan ñuu Iconio. ³ Tan ra Pablo cuñi ra tsa cuhun ra Timoteo tsihin ra. Tan tyaa ra naha tuñi Nyoo tsi ra Timoteo jaha ra Pablo. Tyin coto ndasi cuñi nyivi Israel nyehe ñi tsi ra. Tyin tandihi ñi tsitó ñi tyin jutu ra cuví ra ra Grecia. ⁴ Tacan tan cuahán ra naha tan iin tan iin ñuu. Tan caahán ra naha tsihin nyivi yihí cuenda ra Cristo tsahá cuenda ra naha tuhun tsa tsaha ra tava tyiñu ra Jesús tan tsihin ra cuví ityi nuu tsihin nyivi vehe ñuhu Jerusalén tsi ra naha. ⁵ Tacan tan ndu iin iñi nyivi yihí cuenda ra Cristo tan ñihi ca tsinú iñi ñi

tsi ra Cristo. Tan iin tan iin quivi tan cuahán nducuahá ca ñi.

Nu janahq Nyoo iin tsa janahq ra tsi ra Pablo cuenda iin ra Macedonia

⁶ Ña tsaha Tatyí li Nyoo tsa cahan ra naha tuhun Nyoo ñuu tsa cayucú Asia. Yacan cuenda yahq sava ra naha ñuhu cuenda Frigia tan Galacia. ⁷ Tan tsaa ra naha Misia. Tan cuñí ra naha cahun ra naha Bitinia, maa tyin Tatyí li ra Jesucristo ña tsaha cahun ra naha. ⁸ Tacan tan nda sava ñi yahq ra naha ñuu tsa cayucú Misia tan cuahán ra naha ñuu Troas tsa canyií yuhu ndutya ñuhu. ⁹ Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin rayi tsa iyó iin ñuu tsa canyií Macedonia. Nyaá nyityi ra nuu ra tan caahán ndaahvi ra tsihin ra, tan catyí ra: “Naha ihya, tyin jatyinyee un tsi ndi” catyí ra. ¹⁰ Tan tsa nyehe ra Pablo can, yuhu ra Lucas tsihin ra Pablo tan inga ra janduvahq ndi tsi ndi tan cuahán ndi nda Macedonia can. Tyin tsitó vaha ndi tyin Nyoo cana ra tsi ndi, tyin cahan ndi tuhun ra nácaa jacacú ra tsi yo tsihin nyivi ityi can.

Nu nyii ra Pablo tsihin ra Silas ñuu Filipos

¹¹ Quihvi ndi iin yutun ndoo ñuu Troas. Tan cuahán ndoo ityi ñi ndi nda Samotracia, iin ñuhu luhlu tsa canyií mahñu ndutya ñuhu. Tan tsa inga quivi tsaa ndi

ñuu Neápolis. ¹² Tan ican quee ndi tan cuahán ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahnu ca tsa nuu tandihi ñuu tsa cayucú Macedonia. Tan ican tsiyucu ndi taahan quivi. ¹³ Iin quivi tsa quitatú nyivi, tan quita ndi ityi tsata ñuu, yatyin iin yutya nu tuhvá nyivi tsicán tahvi tsi Nyoo. Tsinyecu ndi, tacan tan cahan ndi tuhun Nyoo tsihin ñiñaha tsa ndu iin ican. ¹⁴ Iin ñaha nañi ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduuhva. Yacan cuví tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiñi ña tsa caahán ra Pablo. Tan Nyoo nuña ra aña ña na tyaa yahvi ña tsa caahán ra. ¹⁵ Tan tsicoondutya ña tsihin nyivi ña. Tan yahq can tan cahan ndaahvi ña tsihin ndi, tan catyí ña:

—Tatun nyehé ndo tyin nditsa tsa tsinú iñi yu tsi Jutu Mañi yo, çohon ndo, ndoo ndo yuvehe yu —catyí ña tsihin ndi.

Tan jañiñi xaan ña tsi ndi na ndoo ndi yuvehe ña.

¹⁶ Tan cuví iin tsaha tsa cuahán ndi nu tsicán tahvi ndi. Tan tsitsi tsa cuahán ndi, tahañ ndi tsi iin ñaha tyuvaa tsa yihí tatyí ña vaha tsi. Yacan cuenda cuví nacoto ña náa ndihi tsa cua cuví ityi nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña. ¹⁷ Tan ñaha tyuvaa can quit-

sahá nyicún ña tsi ndi, nyuhu tsihin ra Pablo. Tan caná tsaa ña tan catyí ña:

—Rayi ihya ra jahá tyiñu tyiñu Nyoo cahnu, cuví ra naha. Tan caahán ra naha tuhun nácaa cuví cacu yo —catyí ña.

¹⁸ Cuaha quivi javahá ñaha tyuvaa can tacan. Tacan tan ra Pablo ña cunyeé ca iñi ra, tan nanyico coo ra tan catyí ra tsihin tatyí ña vaha tsa yihí tsi ña:

—Tsihin sivi ra Jesucristo, catyí yu tsihin un tyin quita un tsi ñaha tyuvaa ihya —catyí ra.

Tan nu tatyí ña vaha can quita nu tsi ña juvin ñi cuhva can.

¹⁹ Maa tyin tsa nyehe ra cuví tsitoho ña tyin ña cua cuvi ca jaha canaa ra naha xuhun tsihin ña, tñin ra naha tsi ra Pablo tsihin ra Silas tan tsindacá ra naha tsi ra naha nda vehe tyiñu. ²⁰ Tan tsican ra naha cuatyí tsaha ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tsihin nyivi ñuu yo tan jativí ra naha ñuu yo. ²¹ Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyivi cuenda ñuu Roma cuví yo —catyí ra naha.

²² Tacan tan nduxaan nyivi tsi ra Pablo tan ra Silas. Tan ra cumí tyiñu can tsahnya ra naha jahma ra Pablo naha ra tan tava tyiñu ra cumí tyiñu na cañi ra vitya tsi ra Pablo naha ra tsihin yutun. ²³ Tsa yahá tsa cañi xaan ra naha

tsi ra Pablo tan ra Silas, tan tsindacá ra vitya can tsi ra naha vehe caa. Tan tava tyiñu ra vitya tsi ra jaha cuenda tsi ra naha na jaha vaha ra cuenda tsi ra naha. ²⁴ Quihin ra cua jaha cuenda can tyiñu tan tyihí ra tsi ra naha nda tsitsi cuii vehe caa. Tan tyihí vaha ra tsaha ra naha tyañu vitu. ²⁵ Yahá can tan maa ñuu ra Pablo tan ra Silas quitsahá tsicán tahvi ra naha tsi Nyoo. Tan quitsahá tsitá xaan ra naha cantu Nyoo. Tan ra yucú vehe caa can naha ra tyaá soho ra naha. ²⁶ Tan saná iñi ra naha tan quitsi tsa taán ñihi xaan. Tan naquisi tsi tsaha vehe caa can, tan juvin ñi cuhva can tan nuña tandihi yuvehe, tan ndatsi cadena tsa yihí tsi tandihi ra tsa yucú vehe caa can naha ra. ²⁷ Tan tsa ndoto ra tsa jahá cuenda vehe caa can, nyehe ra tyin ticohó tandihi maa yuvehe can. Tacan tan tava ra mityi ra tyin cua cahñi ra tsi ra. Tyin tsicá iñi maa ra tyin tandihi ra tsa yucú vehe caa can quita. ²⁸ Maa tyin ra Pablo caná tsaa ra tsi ra, tan catyí ra:

—Ña cahñi un tsi un, tyin tandihi ndi tan yucú ndi ihya —catyí ra tsihin ra.

²⁹ Tacan tan ra jahá cuenda vehe caa can tsican ra ñuhu. Tan tsinu ra quihvi ra nu yucú ra naha. Tan nihí ra tsihin tsa yuuhvi ra. Tan tsicuiñi tsiti ra nuu ra Pablo tan ra Silas. ³⁰ Numi xaan tava ra tsi ra naha nu yucú ra

naha ican. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

³¹ Tan ra Pablo tsihin ra Silas nacahan ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihi nyivi un —catyí ra naha tsihin ra jahá cuenda vehe caa can.

³² Tan cahān ra naha tuhun Jutu Mañi yo tsihin ra tan tsihin tandihi nyivi tsa yucú yuvehe ra. ³³ Tan juvin ñi maa tsacuaa can ra jahá cuenda vehe caa can nacatya ra nu uhvi nu cañi ra vitya tsi ra naha. Yahā can tan juvin ñi tsacuaa can tsicoondutya ra tsihin tandihi nyivi ra.

³⁴ Tacan tan tsindaca ra tsi ra naha nda vehe ra. Tan tsaha ra tsa catsi ra naha. Tan maa ra tsihin nyivi ra sii xaan cuñi ñi tyin tsinú iñi ñi tsi Nyoo. Tacan tan cuanuhu ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

³⁵ Tsa tuvī inga quivi tan tava tyiñu ra cumí tyiñu tsi ra vitya na cunyehe ra naha nu nyii ra jahá cuenda vehe caa can, tan catyí ra naha tyin na jaña ra tsi ra Pablo tsihin ra Silas. ³⁶ Tacan tan ra jahá cuenda vehe caa can catyí ra tsihin ra Pablo:

—Tsa tyiñu tsi yu jahā ra cumí tyiñu, tsa jaña yu tsi ndo. Yacan cuenda vityin tsa cuvī quita ndo —catyí ra tsihin ra naha.

³⁷ Maa tyin ra Pablo catyí ra:

—Nyuhu tsa cuvī ndi ra cuenda ñuu Roma cañi ra naha tsi ndi nu tuvi nyivi. Tan ndi ña tatsi tuñi ra naha tsi ndi tumaa cuhva taahán tsi. Tan tyihī ra naha tsi ndi vehe caa. Tan vityin cuñi ra naha tava xeehe ra naha tsi ndi. Maa tyin ña cuñi ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

³⁸ Tan ra vitya nacatyi tuhun ra tsihin ra cumí tyiñu naha ra. Tan ra ican naha ra nayuhvi xaan ra naha tsa tsito ra naha tyin ra cuenda ñuu Roma cuvī ra Pablo.

³⁹ Tan tsahan ra cumí tyiñu naha ra tsindacan ra naha tucahnu iñi nuu ra Pablo tan ra Silas. Tacan tan ra cumí tyiñu tava ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can. ⁴⁰ Tan tsa quita ra naha vehe caa can, tsahan ra naha vehe ña Lidia. Tan yahā can tan tsinyehē ra naha tsi ra hermano naha ra tan jandu iin ra naha iñi ra naha tan cuahán ra naha.

17

Nu quitsaha caahán yuhu tahan nyivi ñuu Tesalónica

¹ Nu cuahán ra Pablo tsihin ra Silas, yahā ra naha ñuu Anfípolis, tan ñuu Apolonia. Yahā can tan tsaā ra naha ñuu Tesalónica nu nyaá iin vehe ñuhu nyivi Israel. ² Tan tsahan ra Pablo vehe ñuhu can, tumaa cuhva tuhvá maa ra tsaahán tan iin tan iin ñuu.

Tan cahān ra tuhun Nyoo tsihin nyivi tsicá vehe ñuhu can uñi taahan quivi quitatú ñi. ³ Tan cahvi ra nu libru Nyoo tan tsaha cuenda ra tuhun ra Cristo tsi ñi nu catyí tsi tyin cua nyehe ra tundoho tan cua cúu ra. Yahā can tan cua nandoto ra. Tan catyí ra tsihin ñi:

—Ra Jesús tsa caahán yu tuhun tsihin ndo juvin ra cuví ra Cristo.

⁴ Tan juhva nyivi Israel can tsinu ñi ñi tsa caahán ra. Tan ndu iin ñi tsihin ra naha. Tan cuaha xaan nyivi Grecia tsa tuhvá jacahnú tsi Nyoo tan natsinu ndihi ñi ñi. Tan cuaha ñiñaha cuca tsa iyó ñuu can natsinu ndihi ñi ñi tsa caahán ra tuhun ra Cristo. ⁵ Maa tyin ra ñuu Israel tsa ña tsinú ñi, ndasi cuñí ra naha nyehé ra naha tyin cuaha xaan nyivi nyicún tsi ra Pablo. Tan jandu iin ra naha tsi taahan ra caquiñi tsa tsicá nuu jutsan ñi maa. Tan quitsaha caahán yuhu tahan nyivi ñuu can jahā ra naha. Tan quihvi ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñí ra naha tsa quita ra Pablo naha ra. Tyin ra caquiñi can cuñí ra naha nacuhva cuenda ra naha tsi ra Pablo naha ra tsi nyivi. ⁶ Maa tyin tsa ña nañihí ra naha tsi ra Pablo tan ra Silas ican, quihin ra naha tsi ra Jasón. Tan ixtā caa ra naha tsi ra. Tan quihin ndihi ra naha tsi taahan ca ra hermano tan cuahán ra naha nuu ra cumí tyiñu ñuu can. Tan canā tsaa ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná ñi tandihi nyivi nani cahnu ñuhu ñayivi. Tan vityin tsaā ndihi tucu ra naha ihya. ⁷ Tan ra Jasón can tsaha ra yuvehe ra na cuyucu ra naha. Tan tandihi maa ra naha tan ña tyaá yahvi ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañi Jesús —catyí ra naha.

⁸ Tsa tsiñi nyivi tan ra cumí tyiñu tsa caahán ra caquiñi can naha ra quitsaha caahán yuhu tahan ñi. ⁹ Maa tyin ra Jasón tan inga ra naha tsaha ra naha xuhun tan jañā ra cumí tyiñu tsi ra naha.

Nu cuahán ra Pablo tsihin ra Silas ñuu Berea

¹⁰ Tan juvin ñi tsacuaa can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaā ra naha, tsahan ra naha vehe ñuhu nyivi Israel. ¹¹ Tan nyivi Israel tsa iyó ñuu Berea can vaha ca nyivi cuví ñi tan ñavin ca nyivi ñuu Tesalónica tyin tsihin tsa ñi ñi ñi tan naquihin ñi tuhun Nyoo. Tan tandihi quivi nanducú ñi nuu tutu Nyoo, nyehé ñi tatun nditsa tsa caahán ra Pablo. ¹² Yacan cuenda cuaha xaan ñi natsinu ñi ñi tsi ra Cristo tsihin tucu nyivi Grecia tahan ñi ñiñaha cuca tan rayi naha ra. ¹³ Maa tyin tsa tsitō ra Israel tsa iyó ñuu Tesalónica tyin ra Pablo nyií ra Berea caahán ra tuhun Nyoo, tan cuahán ra naha tan natyuhu ra naha tsi nyivi Berea can. ¹⁴ Maa tyin ra hermano numi

ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndoo ra naha ñuu Berea. ¹⁵ Tan ra tsa cuahán tsihin ra Pablo tsindaca ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahan ra Pablo tsihin ra naha, tyin na janumi ra naha tan cahun ra naha nu nyii ra.

Nu nyii ra Pablo ñuu Atenas

¹⁶ Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi añima ra tsa nyehé ra tyin cuaha xaan tsitoho iyó ñuu can. ¹⁷ Yacan cuenda cahan ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihi quivi caahán ra tsihin nyivi tsa cuahán nuyahvi. ¹⁸ Tan ñihí tahan ra tsihin nyivi tsa cahví tuhun tsa jacuahá nyivi tsa nañi epicúreo. Tan ñihí tahan tucu ra tsihin nyivi tsa cahví tuhun tsa jacuahá nyivi tsa nañi estoico. Tan cahan ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahan ra tsihin yo?
—catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahan ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyivi

tatun cua cúu ñi. ¹⁹ Tacan tan tsindaca ra naha tsi ra Pablo iin nu nañi Areópago, nu tuhvá ra cumí tyiñu naha ra ndu iin. Tan catyí ra naha tsihin ra:

—Cuñi ndi coto ndi tuhun tsa tsa jacuahá un. ²⁰ Tyin jacotó un tuhun tsa ña tsitó ndi. Tan cuñi tucu ndi coto ndi náa cuñi tsi catyí tandihi tuhun ihya —catyí ra naha tsihin ra.

²¹ Tyin tandihi nyivi Atenas tan nyivi inga ñuu tsa iyó ican taahán xaan iñi ñi tyaa soho ñi tan nacatyí tuhun ñi náa ndihi tuhun tsa.

²² Tacan tan ra Pablo nduvita nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo.

²³ Tyin tsahan yu tsinyehé yu nu tuhvá ndo ndu iin. Tan nyehe yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvín Nyoo can cuví tsa caahán yu tuhun tsihin ndo. ²⁴ Nyoo tsa javaha ñuhu ñayivi tan tandihi tsa iyó nu ñuhu ñayivi ihya, tsii maa ra cuví andivi tan ñuhu ñayivi. Tan ña iyó ra tsitsi vehe ñuhu tsa javahá nyivi. ²⁵ Tan ña nyitá iñi ra tsa jatyinyeé nyivi tsi ra. Tyin maa ra tsaha ñayivi coo tandihi yo. Tan tsahá ra tatyí tsa ixtá tatyí yo. Tan maa ra tsahá tandihi tsa tsiñi ñuhu tsi yo. ²⁶ Javaha Nyoo tsi intuhun rayii. Tan

tsa yahā can tsicoo cuaha nyivi tata ra. Tan maa ra naha cuvī tsi tsaahnu tandihī yo. Yacan cuenda intuhun ñi ñiñi nyisó tandihī yo. Tan tsahā Nyoo tsa coo yo nani cahnu ñuhu ñayivi. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayivi ihya. Tan catyí tucu ra maa nda cua coo intuhun intuhun yo. ²⁷Tacan javahā ra tyin na quitsaha nanducu yo tsi ra. Tumaa iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihi yo tsi ra tyaā ra kuhva. Vasu ndi maa ña cañi nyaá ra tsihin intuhun intuhun yo. ²⁸Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra. ²⁹Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinu tsihin xuhun cuaan, a xuhun cuitsin, a tsihin yuu vaha. Tan ndi ñavin Nyoo tsa tsinu tsihin tsa tsiñituñi iñi nyivi cuví ra. ³⁰Tahan tsanaha Nyoo ña cuxaan ra tsi nyivi tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyivi tandihī ñi ityi tyin na ndu uvi iñi ñi cuatyí ñi tan na nasama ñi kuhva iyó ñi. ³¹Tyin tsa tyaā ra kuhva tyin cua coo iin quivi tsa cua tatsi tuñi ra tsi nyivi iyó nu ñuhu ñayivi. Tan tsa cua tsa quivi can, ra tsa nacatsj vaha maa ra cua tatsi tuñi tsi ñi jaha ra.

Tan tsa janahā ra tsi yo tyin nditsa tsa ra ihya cua tatsi tuñi tsi nyivi, tyin janandoto ra tsi ra can nu tsihi ra —catyí ra Pablo.

³²Tsa tsiñi nyivi tuhun tsa nandotó nyivi tsa tsihi, yihí ñi tsacú nducu ñi, tan yihí tucu nyivi catyí ñi:

—Quitsi un inga tsaha tan cahan un tuhun ihya tsihin ndi —catyí ñi.

³³Tacan tan cuahán ra Pablo. ³⁴Maa tyin yihí ñi ndu iin ñi tsihin ra, tan natsinu iñi ñi tsi ra Cristo. Tan iin ra tsa natsinu iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsinu ndihī tucu iñi ña, tan tsihin inga ca ñi.

18

Nu nyii ra Pablo ñuu Corinto

¹Yahā can tan quita ra Pablo ñuu Atenas tan cuahán ra ñuu Corinto. ²Tan ican nañihi ra tsi iin ra Israel tsa nañi Aquila. Tan ñuu Ponto cacu ra. Tan maa ra tsihin ñasihi ra, ña Priscila, quita ñi Italia nu tsicoo ñi, tyin ra Claudio, ra cuví rey cahnu ñuhu can, tava ra tsi tandihī nyivi Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto. ³Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin jahá tyiñu ra iin caa ñi tsihin ñi. ⁴Tan quivi quitatú nyivi Israel tahan iin

vitya, ra Pablo cuahán ra vehe ñuhu ñi. Tan natuhún tahan ra tsihin nyívi Israel tan tsihin nyívi tsa ñavin nyívi Israel cuví. Tyin nducú ra cuhva tsa tsinu iñi ñi tsi ra Jesucristo.

⁵ Tan quívi tsaá ra Silas tan ra Timoteo tsa quee ra naha Macedonia, ra Pablo nacoq ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyívi Israel tyin ra Cristo, tsa ndatú xaan ñi, juvin ra cuví ra Jesús. ⁶ Maa tyin ñi ican xaan cuñi ñi. Tan quitsaha caahán ñi ndavaha ñi siqui Jutu Mañi yo. Tacan tan ra Pablo naquisi ra jahma ra tumaa iin seña tyin cua ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun cuhun ndo anyaya. Ñavin ca cuatyí yuhu tyin tsa cahan yu tsihin ndo tan maa ndo ña tsiñu iñi. Vityin tan ityi nuu ca cua cuhun yu cahan yu tuhun ihya tsihin nyívi tsa ñavin nyívi Israel cuví—catyí ra tsihin ñi.

⁷ Tan quitá ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra. ⁸ Tan iin ra tsa nañi Crispo, ra cuví ityi nu vehe ñuhu can, natsinu iñi ra tsi Jutu Mañi yo tan tacan tucu tandihi nyívi ra. Tan cuaha ca nyívi iyó ñuu Corinto can, tsa yaha tsa tsiñi ñi tsa caahán ra Pablo, natsinu iñi ñi tsi ra Jesús, tan tsicoondutya ñi. ⁹ Tacan tan

iin tsacuaa nyehe ra Pablo iin tsa janaha Nyoo tsi ra. Tan cahan Jutu Mañi yo tsihin ra, tan catyí ra:

—Ña nayuhvi un. Jañihi ca cahan un tuhun yu tan ña jandihí un tsa cahan un. ¹⁰ Tyin yuhu nyaá yu tsihin un, tan yoñi cuví javahá tsa caquiñi tsi un. Tyin cuaha xaan nyívi yu iyó ñuu ihya tan nyaá cua jacacu yu tsi ñi—catyí Jutu Mañi yo tsihin ra Pablo.

¹¹ Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyívi.

¹² Maa tyin quívi tsa ndacá ñaha ra Galión tsi nyívi ñuu tsa cayucú Acaya, ndu iin ra Israel naha ra siqui ra Pablo. Tan tsican ra naha cuatyí tsaha ra nuu ra Galión. ¹³ Tan catyí ra naha tsihin ra Galión can:

—Ra ihya natyuhú ra tsi nyívi na jacahnu ñi tsi Nyoo iin cuhva tsa ñavin cuhva catyí ley—catyí ra naha.

¹⁴ Tacan tan cuhva tsa cua nacahan ra Pablo, tan nacahan ñi ra Galión, tan catyí ra tsihin ra Israel can naha ra:

—Nyooho ra Israel, cuví jandaa yu cuatyí ra tatun cuatyí cahnu o cuatyí ndiyi cuví. ¹⁵ Maa tyin maa ñi maa tuhun caahán cuví tuhun ihya. Tan yuhu ña cuñi yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñi yu cuví yu juez tsa cuenda tuhun ihya

—catyí ra Galión can tsihin ra naha.

¹⁶ Tan tava ra tsi ra Israel naha ra nu cuví vehe tyiñu ra.

¹⁷ Tacan tan tandihí ra Grecia tñn ra naha tsi ra Sóstenes, ra cuví ityi nu vehe ñuhu nyívi Israel. Tan cañi ra naha tsi ra juvin ñi maa nuu ra Galión, ra yihí ndaha tsi nyívi Acaya. Tan ra Galión can ña cañan maa ra.

Nu cuanuhú ra Pablo ñuu Antioquía tan cuahán ra tsa tsinu uñi tsaha cua cahan ra tuhun Nyoo

¹⁸ Tan ra Pablo ndoo ra ñuu Corinto can cuaha quívi. Yahá can tan catyí ra tsihin ra hermano naha ra tyin tsa cua cahun ra. Tan cuahán ra Aquila tan ña Priscila tsihin ra. Tacan tan tsaá ñi ñuu Cencia. Tan ra Pablo xatya ndii ra jiñi ra tumaa iin seña tyin tsa yahá javahá ra tsa catyí ra tyin cua javahá ra nuu Nyoo. Tacan tan quihví ñi tsitsi iin yutun ndoo tsa cuahán nda Siria. ¹⁹ Tan tsa tsaá yutun ndoo can nda ñuu Éfeso, quita ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyívi Israel, tan cañan ra tsihin nyívi tsa ndu iin ican. ²⁰ Tan cañan ndaahvi ñi tsihin ra tyin na ndoo ra taahan ca quívi tsihin ñi. Maa tyin ña cuñí ra. ²¹ Tan catyí ra tsihin ñi tyin tsa cuahán ra, tan catyí tucu ra tyehen:

—Cuñí tsi tsa cahun yu ñuu Jerusalén tyin jacahnu yu vico tsa vatsí tahan. Maa tyin tatun Nyoo cuñí, cua quitsi

yu inga tsaha nu yucú ndo —catyí ra tsihin ñi.

Tacan tan cuahán ra, quihví ra tsitsi iin yutun ndoo tsa cuahán nda Siria. ²² Quívi tsa tsaá nyico ra ñuu Cesarea cuenda Siria, tsahan ra ñuu Jerusalén tsicuhvá ra nacumi tsi nyívi yihí cuenda ra Cristo tsa iyó ican. Yahá can tan cuahán nyico ra ñuu Antioquía. ²³ Tan tsa yahá tsinyií ra juhva quívi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihí nyívi yihí cuenda ra Cristo.

Nu caahán ra Apolos tuhun Nyoo ñuu Éfeso

²⁴ Quívi can tsaá iin ra Israel ñuu Éfeso. Nañí ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru. ²⁵ Tan vaha xaan cutuhvá ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutyá ra Juan ñi tsitó ra. ²⁶ Tan quitsahá caahán ra tsitsi vehe ñuhu tsihin tsa ñi iñi ra. Tan cuhva tsa tsiñi ra Aquila tan ña Priscila, tava sñn ñi tsi ra tan tsahá cuenda vaha ca ñi tuhun Nyoo tsi ra. ²⁷ Tacan tan quitsahá cuñí ra Apolos cahun ra ityi Acaya. Tan ra hermano jatinyee ra naha tsi ra. Tan jacuhun ra naha iin carta tsi nyívi yihí cuenda

ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsa ra. Tacan tan cuahán ra. Tan cuhva tsa tsaá ra Acaya can, jatyinyeé xaan ra tsi nyivi yihí cuenda ra Cristo, ñi tsa natsinú iñi tsa cuenda tumañi iñi tsa javaha Nyoo tsi ñi. ²⁸ Tyin nu tuvi nyivi ñihi xaan cahan yuhu ra Apolos tsihin ra Israel naha ra tyin cuhva tsinú iñi nyivi Israel, ña nditsa. Tan jacuahá ra tsa catyí nu tutu Nyoo tyin ra Cristo, ra tsa ndatú xaan ñi, juvin ra cuví ra Jesús.

19

Nu cuahán nyico ra Pablo ñuu Éfeso

¹ Tsitsi tsa nyii ra Apolos ñuu Corinto, ra Pablo yaha ra ityi yucu tan tsaá ra nda ñuu Éfeso. Tan ican nañihí ra tsi taahan ra yihí cuenda ra Cristo. ² Tan tsicá tuhun ra tsi ra naha:

—¿A naquihin ndo Tatyí Ii Nyoo quivi tsa natsinú iñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí Ii Nyoo.

³ Tacan tan ra Pablo tsicá tuhun ra tsi ra naha:

—¿Nacaa tsicoondutyá ndo? —catyí ra.

Tan nacahan ra naha tan catyí ra naha:

—Cuhva tsa jacoondutyá ra Juan, tacan tsicoondutyá ndi —catyí ra naha.

⁴ Tacan tan catyí ra Pablo tsihin ra naha:

—Ra Juan jacoondutyá ra tsi nyivi tsa ndu uvi iñi cuatyí. Maa tyin catyí tucu ra tsihin ñi tyin cuñí tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

⁵ Tsa tsiñi ra naha tsa cahan ra Pablo tuhun ihya, tacan tan tsicoondutyá ra naha inga tsaha tsihin sivi Jutu Mañi yo Jesús. ⁶ Tan tsa tyiso ndaha ra Pablo jiñi ra naha, tacan tan naquihin ra naha Tatyí Ii Nyoo. Tan quitsaha caahán ra naha inga yuhu. Tan tsahá cuenda ra naha tuhun tsa tsahá Tatyí Ii Nyoo tsi ra naha tsi nyivi. ⁷ Tan tsa tandihi ra naha quita maa utsi uvi taahan ra naha.

⁸ Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi iñi ra. Tan jacuahá ra tsi ñi na nacuhva ñi tsi ñi tsi Nyoo na cundaca ñaha ra tsi ñi. ⁹ Maa tyin yihí ñi jandava ñi añima ñi, tan ña cuñí ñi tsinu iñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyó nyaha ra nu yucú ñi. Tan tsindacá ra tsi ñi tsinú iñi tsi ra Cristo nda iin escuela ra tsa nañi Tiranno. Tan ican caahán ra tuhun ra Cristo tsihin nyivi tandihi quivi. ¹⁰ Tan tacan ñi tsicá ra tsitsi tsa uvi cuiya. Tan tandihi nyivi tsa iyó ñuu tsa cayucú Asia, tsiñi ñi tuhun Jutu Mañi yo

ra Jesús, tahan ñi nyivi Israel tan nyivi tsa ñavin nyivi Israel cuví. ¹¹ Tan nahnu tsa iyo javaha ra Pablo jaha Nyoo. ¹² Tyin nda cuando jahma tsa tñin ra Pablo tan tsindacá ñi tsi nyivi tan quitá cuehe tsi ñi, tan quitá ndihi tucu tatyí ña vaha tsi ñi.

¹³ Tan iyó juhva ra Israel tsa tsicá nuu tan iin tan iin ñuu tavá ra naha tatyí ña vaha tsi nyivi. Tan cuñí ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

¹⁴ Tacan javaha tsa utsa taahan sehe iin ra Israel tsa nañí Esceva. Tan ra Esceva can cuví ra iin ra cuví ityi nuu tsihin ra jutu. ¹⁵ Tan tsa cahán ra can naha ra tsihin nu tatyí ña vaha, nacahán nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan ¿yóo ra cuví tucu nyooho? —catyí nu tatyí ña vaha can tsihin sehe ra Esceva naha ra.

¹⁶ Tacan tan ra tsa yihí tatyí ña vaha can ndava ra siqui ra can naha ra. Tan tsihin tsa cuaha tunyee ñi nu tatyí ña vaha can tan cuví cunyeé ra tñin tahan ra tsihin tandihi ra can naha ra. Tan tsahnya cuatyí ra jahma ra naha. Tan jañicueehé ra tsi ra naha. Tan jacuhun tandii ra tsi ra naha jaha nu tatyí can. ¹⁷ Tacan

tan tandihi nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsitó ñi tuhun can. Tan yuuhví xaan ñi cuví. Tan jacahnú ñi sivi Jutu Mañi yo Jesús.

¹⁸ Tan cuaha xaan nyivi tsa natsinu ñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandihi maa tsa ña vaha tsa icá ñi tahan tsanaha. ¹⁹ Tan cuaha ñi tsa cahví tuhun tasi, tsindaca ñi libru ñi. Tan tsahmí ñi libru can nuu tandihi nyivi. Tan tava cuenda ñi nácaa yahvi libru can. Tan yahvi tsa tandihi libru can quitá tsi uvi xico utsi mil xuhun cuitsin. ²⁰ Tan tacan ñi tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee ñi iyó tsi ra.

²¹ Tan tsa yaha tuhun ihya, ra Pablo tyaa ra cuhva tsa cahun ra ñuu tsa cayucú Macedonia tan Acaya. Yaha can tan cua cunuhu ra nda ñuu Jerusalén, tyaa ra cuhva. Tan catyí ra tyin yaha can tan cuñi tsi tsa cahun ra nda ñuu Roma. ²² Tacan tan jacuhun ra tsi uvi taahan ra jatyinyeé tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoo maa ra Pablo juhva ca quivi Asia can.

Nu quitsaha cuvaá nyivi Éfeso

²³ Tan juvin ñi quivi can quitsaha cuvaá nyivi ñuu Éfeso tsa cuenda tuhun Nyoo, ²⁴ tyin iin ra tsa nañí Demetrio natyuhu ra tsi ñi.

Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsitoho Diana tsihin xuhun cuitsin can. Tan cuaha xuhun jahá canaa ra tan tsihin ra jatyinyeé tsi ra. ²⁵ Tan cana ra Demetrio can tsi ra tsa jahá tyiñu tsihin ra. Tan cana tucu ra tsi ra tsa jahá tyiñu iin ñi tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo. ²⁶ Maa tyin nyooho nyehé ndo tan tsiñí ndo nácaa javahá nu Pablo can ñuu yo ihya, tan tandihi ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu. ²⁷ Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña. Tan tandihi nyivi ñi cahnu Asia tsihin nyivi naní cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

²⁸ Tan cuhva tsa tsiñi ra naha tsa cahán ra, xaan xaan cuñí ra naha. Tan quitsaha caná tsa ra naha tan catyí ra naha:

—Cahnu xaan cuví ña Diana tsa cuví ña nyoo cuenda

yo tsa cuví yo nyivi Éfeso ihya —catyí ra naha.

²⁹ Tan cuvaq tandihi nyivi ñuu can. Tan tijn ñi tsi ra Gayo, tan tsihin ra Aristarco, uvi taahan ra tsa quee Macedonia tan tsicá ra naha tsihin ra Pablo. Tan tandihi ñi can ixta caa ñi tsi ra naha nda cuanda nu tuhvá ñi ndu iin. ³⁰ Tan ra Pablo cuñi ra quihvi ra nu yucú ñi tyin cahan ra tsihin ñi. Maa tyin ra hermano ña tsaha ra naha tsa cuhun ra. ³¹ Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tava tyiñu ra naha tsi ra tyin ña taahán tsi tyihi ra tsi ra ican. ³² Tan nu ndu iin nyivi ican, juhva ñi caná tsa iin tuhun, tan inga ñi caná tsa inga tuhun, tyin cuvaá ñi. Tan cuaha xaan ñi ndi ña tsitó ñi nacuenda yucú ñi ican. ³³ Tacan tan nyivi Israel tava tyiñu ñi tsi iin ra tsa nañi Alejandro na yaha ra ityi nuu. Tan juhva ñi tsa yucú ican, tsaha cuenda ñi tsi ra nácaa cua cahan ra. Tacan tan javaha ra seña tsihin ndaha ra tyin na cutaxin ñi tyin cuñi ra cahan ra tyin nduve cuatyí nyivi Israel. ³⁴ Maa tyin cuhva tsa tsitó nyivi tyin ra Israel cuví ra, tandihi maa ñi cana tsa ñi. Tan tsitsi tsa uvi hora caná tsa ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsa ñi.

³⁵ Tacan tan ra secretario ñuu can cuví jacutaxin ra nyivi, tan caahán ra tsihin ñi,

tan catyí ra:

—Nyooho nyivi ñuu Éfeso ihya, tandihi nyivi tsitó ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsi-toho ña tsa quee andivi tan nacava nu ñuhu ihya. ³⁶ Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo. ³⁷ Tyin ra tsa tsindaca ndo ihya nduve náa tsa suhu ra naha vehe ñuhu yo. Tan ndi ña caahán ra naha ndavaha ñi siqui nyoo yo. ³⁸ Tatun ra Demetrio tan ra tsa jahá tyiñu tsihin ra, tsicán ra naha cuatyí tsaha iin ra, na cahun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can. ³⁹ Tan tatun inga tuhun tsicán ndo, cuñi tsi tsa ndaca ndo can tsi ra cumí tyiñu, tumaa cuhva catyí ley. ⁴⁰ Tyin tatun coto ra ndaca ñaha tan cana ra tsi yo tsa cuenda tsa cuví ihya, tan ña cua ñihi yo tuhun cahan yo tatun ndaca tuhun ra tsi yo nacuenda cuvaá yo —catyí ra cuví secretario can.

⁴¹ Tan tsa yaha cahan ra, tacan tan catyí ra tyin na cunuhu ñi nda yuvehe ñi.

20

Nu yaha ra Pablo Macedonia tan cuahán nyico ra nda Grecia

¹ Tsa yaha tsa cuvaá nyivi ñuu Éfeso can, cana ra Pablo tsi tandihi nyivi tsa yihí cuenda ra Cristo, tyin cahan

ra juhva tsihin ñi tan cuhva ra tunyee iñi tsi ñi, tyin tsa tsaá quivi tsa cua cahun ra inga ñuu. Tan cahan ra tsihin ñi. Tacan tan cuahán ra Macedonia. ² Tan tsaahan ra tandihi ityi can tan tsihin tuhun caahán ra jandu iin ra iñi tandihi nyivi yihí cuenda ra Cristo tsa iyó ityi can. Tacan tan tsaá ra ityi Grecia. ³ Tan ican ndoo ra uñi yoo. Tan tsa nyaá tsa cua quihin ra yutun ndoo tan cahun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaá iñi ra tsa cua cahun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia. ⁴ Tan cuahán ra Sópater, ra ñuu Berea tsihin ra. Tan cuahán ndihi ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahán ndihi ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófimo. ⁵ Ra hermano ihya yaha ra naha ityi nuu tan ndatú ra naha tsi ndi nda ñuu Troas. ⁶ Tan nyuhu ndatu ndi nda tsa yaha vico pascua nu tuhvá nyivi Israel tsatsí paan tsa nduve yutsan iya yihí. Tacan tan quee ndi ñuu Filipos tsihin yutun ndoo. Tan nu tsinu uhun quivi tan titahan ndi tsihin ra tsa cuahán ityi nuu nda ñuu Troas naha ra. Tan ican ndoo ndi utsa quivi.

Nu caahán ra Pablo tuhun Nyoo ñuu Troas

⁷ Tan tsa cuví tumingu can ndu iin ndi tsihin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun iñi ndi tyin tsihi ra Cristo tsa cuenda cattyi yo. Tan ra Pablo caahán ra tsihin ñi, tan tahan ñuu, tyin tsa nyaá tsa cahun ndi inga quivi can. ⁸ Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhú candili cayú. ⁹ Tan iin ra tyuvaa tsa nañí Eutico nyaá ra ventana tyaá soho ra, maa tyin ña cunyeé iñi ra ñumaahna, tyin ra Pablo, naha xaan caahán ra. Quixí ra Eutico, tan ña tsito ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tsihi ra. ¹⁰ Tacan tan ra Pablo nuu ra tan tsaá ra nu canyii ra tyuvaa can. Tan tyihí jucun ndaha ra tsi ra tyuvaa can, tan cattyí ra tsihin tandihí ra hermano naha ra:

—Ña nayuhvi ndo, tyin ra ihya nyito ra —cattyí ra.

¹¹ Tacan tan ndaa nyico ra Pablo tan tsatsi ndi paan tan tsihi ndi vinu. Tan ra Pablo caahán ca maa ra tuhun Nyoo nda cuanda cunditsin. Tsa-han cuahán ra. ¹² Tan ra tyuvaa can nandoto ra tan cuanuhú ra nda yuvehe ra. Tan sii xaan cuñí ñi cuví.

Nu quitá ra Pablo ñuu Troas tan cuahán ra nda ñuu Mileto

¹³ Nyuhu yahá ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihi tahan ndi tsihin ra Pablo, tyin tacan jandaá maa ndi tyiñu tsihin ra, tyin maa ra cuñí ra cahun ra ityi nu ñuhu tsihin tsaha ra. ¹⁴ Tan tsa ñihí tahan nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahán ndi nda ñuu Mitilene. ¹⁵ Tsa quitá ndi ñuu can tacan tan yahá ndi ityi nuu iin ñuhu luhlu tsa nañí Quío, canyii tsi mahñu ndutya ñuhu. Tan tsa inga quivi can tsaá ndi inga ñuhu luhlu tsa nañí Samos. Yahá ndi ican tan tsaá ndi ñuu Trogilio nu quitatu ndi. Tan tsa inga quivi tsaá ndi nda ñuu Mileto. ¹⁶ Tacan cuví tyin ra Pablo ña cuñí ra tsa cunyii naha ra ityi Asia. Tan ña cuñí ra cahun ra ñuu Éfeso tyin numi ñi cuñí ra tsaá ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

Nu caahán ra Pablo tsihin ra ñuu Éfeso naha ra tyin cua cahun ra tan ña cua quitsi ca ra

¹⁷ Tan tsa yucú ndi ñuu Mileto, caná ra Pablo tsi ra cuví ityi nuu tsihin nyivi yihí cuenda Nyoo ñuu Éfeso. ¹⁸ Tan tsa tsaá ra naha, tan caahán ra Pablo tsihin ra naha tan cattyí ra:

—Maa ndo tsitó ndo nácaa cuhva tsicá yu nda quivi jihna ñi tsa tsaá nuu yu Asia ihya. ¹⁹ Tandihí quivi tsa tsinyii yu tsihin ndo tan tyiñu Jutu Mañi yo jahá yu tsihin

tsa nducú yu cuhva tsa ña cahnu xaan ñi cuví yu, vasu cuaha tundoho tan tucuihya iñi nyehe yu. Tan cuaha tundoho quítsi síqui yu jaha nyívi Israel. ²⁰ Maa tyin ña jandihí yu tsa caahán yu tuhun Nyoo tsihin ndo. Tyin yacan cuví tandihí tsa tsiñí ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iñi ndo tan nda yuvehe ndo. ²¹ Tan jacuahá yu tuhun ihya tsi nyívi Israel tan tsi nyívi tsa ñavin nyívi Israel cuví, na nasama ñi cuhva iyó ñi nuu Nyoo tan na tsinu iñi ñi tsi Jutu Mañi yo, ra Jesucristo. ²² Tan vityin cua cuhun yu nda ñuu Jerusalén tyin maa Tatyí Ii Nyoo catyí. Tan ña tsitó yu náa cua cuví tsi yu ndacan. ²³ Maa tyin intuhun ñi tsa tsitó yu tyin tandihí ñi nu cuahán yu, Tatyí Ii Nyoo caahán tsihin yu tyin ndatú vehe caa tsi yu, tan cuaha tundoho cua nyehe yu. ²⁴ Maa tyin ndi intuhun yacan tan ña tsicá iñi yu. Tan ndi ñayívi yu nduve yahvi nyaá can tsa cuenda yu, tyin tacan tan tsihin tsa síi cuñí yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tava tyiñu ra tsi yu. Tan jañihi ca yu jacuahá yu tuhun vaha nácaa cuñí maa Nyoo tsi yo.

²⁵ Tan vityin tsitó vaha yu tyin tandihí nyoocho tsa cahan yu tuhun Nyoo tsihin ndo, ña cua nyehe ca ndo tsi yu. ²⁶ Yacan cuenda cuñí yu cahan yu tsihin ndo vityin tyin nduve ca cuatyí yuhu

tsa cuenda ndi intuhun ndo. ²⁷ Tyin ñiñi cuñí yu tan cahan yu tandihí tuhun Nyoo tsihin ndo tan nduve náa tsa tyihí xeehe yu. ²⁸ Yacan cuenda jaha cuenda ndo tsi ndo. Tan jaha cuenda ndihí ndo tsi tandihí nyívi yihí cuenda Nyoo. Tyin maa Tatyí Ii Nyoo tava tyiñu tsi ndo na jaha cuenda ndo tsi nyívi tsicá vehe ñuhu Jutu Mañi yo. Maa ra jata ra tsi ñi tsihin ñiñi ra. ²⁹ Tan tsitó yu tyin quívi cuhun yu, cua quítsi inga ra naha. Tan cua cuñi ra naha jatívi ra naha tsi nyívi yihí cuenda Jutu Mañi yo. Tumaa lobo xaan tsa tsahñí tsi mbee, tacan cua quítsi ra can naha ra. ³⁰ Tan juvin ñi nu yucú ndo, cua nduvita taahan ra. Tan cua jacuahá ra naha tsi ndo tuhun tsa ña nditsa tyin cunyicun ndo tsi ra naha. ³¹ Yacan cuenda jaha vaha ndo cuenda. Nducuhun iñi ndo tyin tsitsi tsa uñi cuiya ña jandihí yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñí yu, coto nacoo ihñi ndo tuhun Nyoo.

³² Tan vityin nyoocho yañi, tyaá yu tsi ndo ndaha Nyoo. Naquihin vaha ndo tandihí tuhun caahán ra tsihin yo. Tyin jacotó ra tsi yo tyin cuñí xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyívi vaha tsihin tandihí inga nyívi tsa nacuhva cuenda tsi ñi tsi ra. ³³ Yuhu ña nyiyó iñi yu

tša iyó tsi ndi intuhun ndo. Ndi xuhun ndo, ndi jahma ndo. ³⁴ Nyooho tsitó vaha ndo tyin jaha tyiñu xaan yu tsihin ndaha yu tan ñihí yu tša tsiñí ñuhu tsi yu tsihin ra tsicá tsihin yu naha ra. ³⁵ Tacan ñi janahá yu tsi ndo tyin cuñí tsi tša jaha tyiñu ndo tan jatyinyee ndo tsi nyiví iyó náa tša tsiñí ñuhu tsi ñi. Tan nducuhun iñi ndo tša caahán Jutu Mañi yo Jesús, nu catyí ra tyehen: “Si ca cuñí nyiví tša tsahá, tan ñavin ca nyiví tša ñihí ndaahvi” catyí Jutu Mañi yo.

³⁶ Tša yaha tša cahan ra Pablo tuhun ihya, tsicuiñí tsiti ra. Tan tsican tahvi ra tsihin tandihí ra naha. ³⁷ Tan tandihí ra naha nducuihya xaan iñi ra naha tan tsacu xaan ra naha. Tan tsinumí nyaa ra naha tsi ra. ³⁸ Tyin ra Pablo catyí ra tyin cua cuhun ra inga ñuu tan ña cua cuhun ca ra nu yucú ra naha. Tacan tan tsindaca ra naha tsi ra nda nu quihví ra tsitsi yutun ndoo.

21

Nu cuahán ra Pablo ñuu Jerusalén

¹ Tacan tan nacoó ndi tsi ra hermano naha ra tan quihví ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tša canyí mahñu ndutya ñuhu. Tan tša inga quiví tsaá ndi nda Rodas tša cuví inga ñuhu luhlu ñi. Tacan tan cuahán ndi nda ñuu Pátara. ² Tan ñuu Pátara, nyehe ndi inga yutun ndoo tša cuahán nda Fenicia. Tan

quihví ndi tsitsi can, tacan tan cuahán ndi. ³ Tan ityi nu cuahán ndi, nyehe ndi nu canyí ñuhu Chipre ityi ndaha satyin yo. Tan yaha ñi ndi cuahán ndi ityi nuu ca, nda ityi Siria. Tan tsaá ndi nda ñuu Tiro tyin ican cua tava ra naha ndaha tyiñu tša yihí tsitsi yutun ndoo can. ⁴ Tan tša nañihí ndi tsi nyiví yihí cuenda Nyoo ñuu can, ndoo ndi tsihin ñi utsa quiví. Tan catyí ñi tsihin ra Pablo tyin ña taahán tsi tša cuhun ra ñuu Jerusalén tyin tacan cahan Tatyí Ii Nyoo tsihin ñi. ⁵ Maa tyin tša quita utsa quiví can, quita ndi ñuu can. Tan nu cua quita ndi tandihí ra hermano naha ra tsihin ñasíhi ra naha tan tsihin sehe ra naha tsindaca ñi tsi ndi nda cuenda yuhu ñuu. Tan nu nyiti yuhu ndutya ñuhu can tsicuiñí tsiti ndi, tan tsican tahvi ndi tsi Nyoo. ⁶ Tacan tan tsinumí nyaa tahan ndi tsi ndi. Tsa-han quihví ndi tsitsi yutun ndoo. Tan ra hermano can naha ra cuanuhú ra naha yuvehe ra naha.

⁷ Tan tša quee ndi ñuu Tiro, cuahán ndi nda ñuu Tolemaida. Tan ican tsaá ndi nacumi tsi nyiví yihí cuenda ra Cristo. Tan ndoo ndi tsihin ñi iin quiví. ⁸ Tan tša inga quiví quita ndi cuahán ndi nda ñuu Cesarea. Tan ican tsaahan ndi vehe ra Felipe, ra tša jacotó xaan tsi nyiví nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tša utsa taahan ra naha. Tan ndoo ndi

yuvehe ra. ⁹ Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuví ñi. ¹⁰ Tan tsa cuaha ñi quívi tsa yucú ndi ican, tan tsaá iin ndusu yuhu nyoo tsa quee nda Judea. Nañí ra Agabo. ¹¹ Quitsi nyehe ra nu yucú ndi. Tan quihin ra cinturón ra Pablo, tsáhñi ra tsaha ra tan ndaha ra, tan catyí ra:

—Tatyí li Nyoo catyí tsihin yu tyin tyehen cua cunuhñi tsitoho cinturón ihya nda ñuu Jerusalén. Tan cua cuhva cuenda nyívi Israel tsi ra tsi ra inga ñuu naha ra —catyí ra Agabo.

¹² Tsa tsiñi ndi tsa caahán ra, nyuhu tan ra ñuu Cesarea naha ra caahán ndaahvi ndi tsihin ra Pablo na ña cahun ra ñuu Jerusalén. ¹³ Maa tyin ra Pablo catyí ra:

—¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cahun yu tyiñu tsa cuenda Jutu Mañi yo Jesús —catyí ra tsihin ndi.

¹⁴ Tan tsa nyehe ndi tyin ña cuví tsa jahá ndi tsi ra, jaña ndi. Tan catyí ndi:

—Na cuví maa cuhva cuñi Jutu Mañi yo.

¹⁵ Tsa yahá yacan na ica vahá ndi tsi ndi tan cuahán ndi nda ñuu Jerusalén. ¹⁶ Tan cuahán taahan ra ñuu Cesarea ra yihí cuenda ra Cristo, tsihin ndi. Tan cuahán tucu iin ra ñuhu Chipre. Nañí ra Mnasón. Cuaha xaan cuiya

tsinú iñi ra tsi ra Cristo. Tan tsindaca ra tsi ndi yuvehe ra tsa iyó ñuu Jerusalén tyin cuyucu ndi.

Nu cua nyehe ra Pablo nu nyí ra Jacobo

¹⁷ Tsa tsaá ndi ñuu Jerusalén, nyívi yihí cuenda ra Cristo sii xaan cuñi ñi caahán ñi tsihin ndi. ¹⁸ Tan inga quívi can cuahán ndi tsihin ra Pablo cua nyehe ndi nu nyí ra Jacobo. Tan ican yucú tucu tandihí ra cuví ityi nuu tsihin nyívehe ñuhu. ¹⁹ Tsaá ra Pablo nacumi tsi ra naha. Yaha can tan nacatyí tuhun ra tandihí nácaa tsatyíñu Nyoo tsi ra nu cahan ra tuhun Nyoo tsihin nyívi tsa ñavin nyívi Israel cuví. ²⁰ Tsa tsiñi ra naha tuhun ihya, jacahnu ra naha tsi Nyoo, tan catyí ra naha tsihin ra Pablo:

—Vaha yañi, nyehé un tyin cuaha xaan nyívi Israel tsinú iñi tsi ra Cristo. Tan tandihí ñi catyí ñi tyin taahán tsi tsa javaha yo cuhva catyí ley tsa tyaa ra Moisés. ²¹ Tan ñihí tuhun ñi tyin yoocho jacuahá un tsi tandihí nyívi Israel tsa iyó inga ñuu tyin na ña cuita ca iñi ñi ley tsa jacuahá ra Moisés, tan catyí tucu un tsihin ñi tyin ña cuñi ca tsi tsa cunyaa tuñi Nyoo tsi sehe yí ñi, tan ndi ña cua javaha ca ñi tuhun tsahnu cuhva tsa iyó maa yo tahañ tsanaha. ²² ¿Nacaa javaha yo vityin? Tyin nyívi cua ñihi tuhun ñi tyin tsaá un ihya. ²³ Vaha taxin ca tsa javaha un tsa cua cahan ndi tsihin un. Ihya iyó

cumi taahan rayi tsa nyaá javaha tsa catyi ra tsihin Nyoo tyin cua javaha ra naha. ²⁴ Cuaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndi ra naha jiñi ra naha cuhva catyi ley. Tan tsa javaha un tacan, tan coto tandihi nyivi tyin ña nditsa tsa caahán ñi siqui un, tyin cua nyehe ñi tyin ña naco un ley tsa tyaa ra Moisés. ²⁵ Tan tsa cuenda nyivi tsa ñavin nyivi Israel cuví, tan tsinu iñi ñi tsi ra Cristo, tsa jacuhun ndi tutu tsi ñi, tan catyi ndi tsihin ñi tyin ña taahán tsi caca xaan iñi ñi tsa cuenda ley can. Catyi ndi tyin ña cua catsi ñi cuñu tsa jamañi nyivi tsi tsitoho. Ndi ña cua catsi ñi niñi quití, tan ndi cuñu quití tsa cava ñi jucun tan ña tsati niñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayi —catyi ra tsahnu vehe ñuhu can naha ra tsihin ra Pablo.

Nu quitsaha caahán yuhu tahan nyivi Israel siqui ra Pablo

²⁶ Tacan tan tsa tuví inga quivi tan cuahán ra Pablo tsihin tandihi tsa cumi taahan ra can naha ra. Tan janduvaha ra tsi ra nuu Nyoo iin caa ñi tsihin ra can naha ra. Tacan tan quihvi ra tsitsi vehe ñuhu cahnu tyin jacoto ra cuví jutu ama cundihí tsa utsa quivi tsa nduvaha tsa cumi taahan ra can naha ra, tan cua jamañi ra tsa jamañi

ra nuu Nyoo. ²⁷ Tacan tan tsa cuñi ndihí tsa utsa quivi can, tan taahan ra Israel tsa queenda Asia nyehe ra naha tsi ra Pablo tsitsi vehe ñuhu. Tan cuvaá xaan tandihi nyivi jahá ra naha, tan tñin ra naha tsi ra Pablo. ²⁸ Tan caná tsa ra naha tan catyi ra naha:

—Nyooho nyivi Israel, jatyinyee ndo tsi ndi. Juvín ra ihya cuví ra tsa tsicá nuu tandihi ñi ityi. Tan jacuahá ra tsi tandihi nyivi. Catyi ra tyin ña vaha cuhva iyó yo. Tan catyi ra tyin ña vaha ley tsa tyaa ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsi jativi ra naha —catyi ra naha caná tsa ra naha.

²⁹ Tacan catyi ra naha tyin nda nu quitsi tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañi Trófimo. Tan cuñi maa ra naha tyin ra Pablo tsindaca tsi ra tsitsi vehe ñuhu. ³⁰ Tan tandihi nyivi ñuu quitsaha cuvaá ñi. Tan tsinú xaan ñi tsaá ñi. Tacan tan tñin ñi tsi ra Pablo. Tan ixta caa ñi tsi ra cua ndaca ñi ityi tsata vehe ñuhu, tan numi ñi nacasi ñi yuvehe ñuhu can. ³¹ Tsa cuñi cahñi ñi tsi ra, tan ñihí tuhun ra comandante cuenda andaru tyin tandihi nyivi ñuu Jerusalén iyo xaan caahán yuhu tahan ñi. ³² Tacan tan ra comandante can jandu iin ra tsi ra capitán naha ra tan tsihin andaru naha ra. Tan

tsinú ra naha cuahán ra naha nu yucú nyívi. Cuhva tsa nyehe ñi tsi ra comandante can tsihin andaru can naha ra, jaña ñi tsa cañi ñi tsi ra Pablo. ³³ Tacan tan natuhva ra comandante can nu nyii ra Pablo. Tan tava tyiñu ra tsi andaru naha ra tyin na tiin ra naha tsi ra, tan na cuhñi ra naha tsi ra tsihin uvi taahan cadena. Yahá can tan tsica tuhun ra comandante can tsi ra yóo ra cuví ra, tan náa javahá ra. ³⁴ Maa tyin nyívi siin siin tuhun caná tsaa ñi. Tan ra comandante can ña cutuñi maa iñi ra tsa cuenda tsatyin ñihi xaan cuvaá jahá ñi. Tan tava tyiñu ra tsi andaru tyin cundaca ra naha tsi ra Pablo nda vehe nu yucú andaru. ³⁵ Cuhva tsa tsaá ra naha nu cuayi vehe can, tan quitsahá nducaña nyívi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra. ³⁶ Tyin tandihí ñi nyicún ñi tsi ra naha, tan caná tsaa ñi tan catyí ñi:

—¡Na cúu ra! —catyí ñi.

Nu juvin ñi maa ra Pablo jacacú tsi ra nuu nyívi

³⁷ Cuhva tsa cua tyihi ra naha tsi ra Pablo tsitsi vehe can, tan quitsahá caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego? ³⁸ Tun tacan caa, ñavin yooho cuví ra ñuu Egipto tsa quitsi quívi can tan jacañi tahan ra tsi nyívi

siqui ra ndacá ñaha tan tava ra cumi mil ra tsahñi ndiyi tsindaca ra tsi ra naha ityi ñuhu ityi —catyí ra comandante can tsihin ra Pablo.

³⁹ Tacan tan ra Pablo catyí ra tsihin ra:

—Yuhu ra Israel cuví yu tan cacu yu ñuu Tarso tsa cuví iin ñuu cahnu ityi Cilicia. Maa tyin jahá tumañi iñi cuhva un ndatu cahan yu luxu tsihin nyívi —catyí ra Pablo tsihin ra comandante.

⁴⁰ Tacan tan tsa tsahá ra comandante can ndatu tsi ra, nduvita nyityi ra nu cuayi can tan javahá ra iin seña tyin na cutaxin ñi. Tan tsa cutaxin nyívi quitsahá caahán ra tsihin yuhu hebreo, tan catyí ra:

22

1 —Nyooho tata, tan nyooho yañi, tyaa soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tsihin nyívi can.

² Tsa tsiñi ñi tsa caahán ra tsihin ñi tsihin yuhu hebreo, taxin cuii ña tsinyacu ñi. Tan ra Pablo catyí ra:

³ —Yuhu ra Israel cuví yu tumaa maa ndo. Tan cacu yu ñuu Tarso tsa canyí Cilicia. Maa tyin Jerusalén ihya tsahnú yu. Tan ra Gamaliel jacuahá ra tsi yu náca tyaa yahvi yu ley tsii tsaahnu yo. Tan tacan ñi nducú yu cuhva javahá yu tyiñu nuu Nyoo tsihin tsa ñi iñi yu, tumaa tsa javahá ndo vityin ihya. ⁴ Yuhu, nu quitsi tsi tsinyaa ndaha yu tsi nyívi yihí cuenda

ra Cristo. Tan tsindaca yu tsi ñi tsa cúu ñi. Tan cuaha ñi rayi tan ñaha tiin yu tsa cahun ñi tsitsi vehe caa. ⁵ Ra jutu tsaahnu tsa cuví ityi nuu tsihin ra cuví mandoñi naha ra, cuví ra naha tsandaa tyin ra ican naha ra tsaha tutu tsi yu tyin cuví tiin yu tsi ra yañi yo, ra yihí cuenda ra Cristo ñuu Damasco. Tsahan yu ican tsinanducu yu tsi nyivi tsinú iñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi ñi nda ñuu Jerusalén ihya tyin tatsi tuñi ra tsahnu naha ra tsi ñi.

Nu nacatyí tuhun ra Pablo nácaa natsinu iñi ra tsi ra Cristo

(Hechos 9.1-19; 26.12-18)

⁶ Maa tyin cuhva tsa cuahán yu ityi tsa cua tsa yu ñuu Damasco, maa ora cuví tsi. Tan sana iñi yu tan ndunditsin taniñi cahnu nu cuahán yu jahá iin ñuhu tsa quitsi ityi andivi. ⁷ Tacan tan nduva yu nu ñuhu. Yahá can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenda nyaá ndaha un tsi yu?” catyí ndusu can tsihin yu. ⁸ Tacan tan tsicá tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra. ⁹ Tandihí ra tsa cuahán tsihin yu nyehe ra naha ñuhu can, tan nayuhvi xaan ra naha. Maa tyin ña tsiñi ra naha ndusu tsa cahan tsihin yu. ¹⁰ Tacan tan quitsaha caahán

yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cahun un nda ñuu Damasco. Tan ican cua cahan iin ra tsihin un tandihí tsa taahán tsi javaha un” catyí Jutu Mañi yo tsihin yu. ¹¹ Tan cuaa yu jahá ñuhu can, yacan cuenda ra tsa cuahán tsihin yu tiin ra naha ndaha yu tan cuahán ndi nda ñuu Damasco.

¹² Tan ican iyó iin ra tsa nañi Ananías. Tan jacahnú xaan ra tsi Nyoo cuhva catyí ley tsa tyaá ra Moisés. Tan tandihí nyivi Israel tsa iyó ñuu Damasco catyí ñi tyin vaha xaan iñi ra. ¹³ Tsahan ra can tsinyehé ra tsi yu. Tan cuhva tsa tsaá ra, catyí ra tsihin yu: “Yañi Saulo, nanyehe inga tsaha” catyí ra tsihin yu. Tan juvin ñi cuhva can tan nanyehe yu. Tan cuví nyehe yu tsi ra. ¹⁴ Tan catyí ra tsihin yu: “Nyoo cuenda jutu yo nacatsi ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra. ¹⁵ Tyin yooho cua cahan un tuhun ra nuu tandihí nyivi. Cua nacatyí tuhun un tsa nyehe un tan tsa tsiñi un. ¹⁶ Tan vityin, ña cuatu ca un. Nduvita tan cõndutya un. Tan ndacan tahvi un tsi Jutu Mañi yo tyin na jaha ra tucahnu iñi cuatyí un” catyí ra Ananías tsihin yu —catyí ra Pablo tsihin ñi.

Nu nacatyí tuhun ra Pablo nácaa tsaha Nyoo tyiñu tsi ra

tyin cuhun ra inga ñuu cucahan ra tuhun ra Cristo

¹⁷Yaha can tan vatsí nuhu yu ñuu Jerusalén ihya tan cuhva tsa tsaa yu, tsahan yu vehe ñuhu cahnu tsindacan tahvi yu tsi Jutu Mañi yo. Tan janaha ra iin tsa nyehe yu. ¹⁸Nyehe yu tsi ra. Tan catyí ra tsihin yu: “Janumi. Quita ñi ñuu Jerusalén ihya tyin ña cua tsinu iñi nyivi tuhun yu tsa cahan un” catyí ra tsihin yu. ¹⁹Tacan tan quitsaha caahan yu tsihin ra tan catyí yu: “Jutu Mañi yu, maa ñi tsitó ñi tyin yuhu tsahan yu tandihi vehe ñuhu. Tan tiin yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi. ²⁰Tan quivi tsa tsihi ra Esteban ra tsa cahan cuenda un, yuhu nyii ndihi yu ican. Tan ndoo yu vaha tsa tsahni ra naha tsi ra. Tan jahá cuenda yu jahma ra can naha ra” catyí yu tsihin Jutu Mañi yo. ²¹Tacan tan catyí ra tsihin yu: “Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyivi tsa ñavin nyivi Israel cuví” catyí Jutu Mañi yo tsihin yu.

Nu nyaá ra Pablo ndaha ra comandante cuenda ñuu Roma

²²Tyaá soho ñi yacan ña tan quitsaha caná tsaa ñi tan catyí ñi:

—¡Cahni ndo tsi ra! Tyin ña taahán ca tsi tsa coo ra ñayivi —catyí ñi.

²³Tan caná tsaa ca ñi. Tan javicó ñi jahma ñi. Tan javitá ñi nyahyu nu tatyí tsa

cuenda tsa xaan xaan cuñi ñi. ²⁴Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsaa nyivi tsata ra. ²⁵Maa tyin tsa yaha tsahni ra naha tsi ra tan cua cañi ra naha tsi ra, tacan tan ra Pablo cahan ra tsihin ra capitán tsa nyaá nyityi ican tan catyí ra:

—¿A iyó ndatu tsi nyooho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaquee yuhu ra juez tsi yu, tan cuñi ndo cañi ndo tsi yu —catyí ra Pablo tsihin ra.

²⁶Tsa tsihi ra capitán tsa caahan ra Pablo, tsahan ra tsijacoto ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

²⁷Tacan tan ra comandante can cuahan ra nu nyii ra Pablo. Tan tsicá tuhun ra tsi ra tatun nditsa tyin ra ñuu Roma cuví ra. Tan ra Pablo catyí ra:

—Juvín.

²⁸Tacan tan catyí ra comandante can tsihin ra:

—Yuhu cuaha xaan xuhun tyahvi yu tan cuví cuu yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

²⁹Tacan tan andaru tsa cua cañi tsi ra jatsiyó nyaha ra

naha tsi ra naha nu nyii ra Pablo. Tan nda cuanda ra comandante tan nayuhvi ra tsa cuenda tsa tsahñi ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

Nu tsahan ra Pablo nu ndu iin ra ñuu Israel naha ra

³⁰ Tan tsa tuví inga quivi can tan ra comandante can cuñí ra coto ra náa cuatyí tyaá nyivi Israel tsi ra Pablo. Tan jaña ra tsi ra Pablo. Tan tava tyiñu ra na ndu iin tandihi ra jutu tsa cuví ityi nuu naha ra, tan tsihin tandihi ra cumí tyiñu cuenda nyivi Israel. Tacan tan tava tyiñu ra na quita ra Pablo vehe caa tan cuhun ra nu iyó junta can.

23

¹ Tan ra Pablo nyehe ra tsi tandihi ra tsa ndu iin can naha ra, tan catyí ra tsihin ra naha:

—Nyooho yañi, tandihi quivi nda cuanda vityin nducú yu cuhva javaha yu cuhva cuñí Nyoo. Yacan cuenda vaha cuñí yu —catyí ra Pablo.

² Tacan tan ra Ananías, ra jutu tsaahnu tsa yihí ndaha tsi inga ca ra naha, tava tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra. ³ Tan ra Pablo nacahan ra tan catyí ra:

—¡Jihna ca tsi maa un cua cañi Nyoo, tyin jahá xaan un tyin ra vaha cuví un nyaá un juvin! ¿A cutuñí yu nuu un tumaa cuhva catyí ley? ¿Nacuenda tsa tava tyiñu un na cañi ra naha tsi yu? Tan

ñavin tacan catyí ley —catyí ra Pablo.

⁴ Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsaahnu tyin cahnu cuví ra nuu Nyoo —catyí ra naha tsihin ra Pablo.

⁵ Tacan tan ra Pablo catyí ra:

—Yañi, ña tsitó yu tatun ra ihya cuví ra jutu tsaahnu. Tyin catyí tuhun Nyoo tyin ña cahan nyaa yo tsi ra yihí ndaha ñuu yo —catyí ra.

⁶ Tacan tan tuví iñi ra Pablo tyin juhva ra cuenda junta can naha ra, yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahan ra tsihin tsa ñihi ndusu ra tan catyí ra:

—Nyooho yañi, yuhu ra fariseo cuví yu tumaa jutu yu. Tan tatsí tuñí ndo tsi yu tsatyin tsinú iñi yu tyin nyivi tsa tsihi nandoto ñi —catyí ra Pablo.

⁷ Cuhva tsa cahan ra tuhun ihya, ra tsa cuví fariseo naha ra tan ra saduceo naha ra, quitsaha caahán yuhu tahan ra naha tan natahvi sava ra naha. ⁸ Tyin ra saduceo catyí ra naha tyin ña cua nandoto nyivi tsa tsihi. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú iñi ra naha tandihi tuhun ihya. ⁹ Tandihi ra naha quitsaha caná tsa ra naha. Tan nduvitá juhva ra cuví maestro cuenda ley tsa tyaá ra Moisés tsa cutahán tsihin ra

fariseo naha ra, tan catyí ra naha:

—Nyēhe ndo, nduve tsa ña vaha javahá ra ihya, tyin tatun ángel cahan tsihin ra, jaha yo cuenda tyin ña vaha cahan yo siqui Nyoo —catyí ra naha.

¹⁰ Tsa tsiñi tandihi ra naha yacan, quitsaha nduvaá nyico ra naha. Nda cua nayuhvi ra comandante can coto cahnaya cuatyí ra naha tsi ra Pablo. Yacan cuenda tava tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru. ¹¹ Tan tsacuaa can quituvi Jutu Mañi yo nuu ra Pablo tan catyí ra tsihin ra:

—Jandu iin iñi un, Pablo. Tyin tumaa caahán un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

Nu ndoo ra Israel naha ra tyiñu tyin cua cahñi ra naha tsi ra Pablo

¹² Tsa inga quivi, juhva ra Israel natuhun tahan ra naha tan ndoo ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahñi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha. ¹³ Yaha uvi xico ra naha ndoo ra naha tyiñu ihya. ¹⁴ Tsañan ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahan ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyí ndi. ¹⁵ Tan vityin nyooho jacoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsa ra ihya, cua cahñi ndi tsi ra —catyí ra naha tsihin ra jutu naha ra.

¹⁶ Maa tyin sehe cuhva ra Pablo tsiñi ra tsa natuhun tahan ra naha. Tan tsañan ra vehe andaru nu nyii ra Pablo tsicatyí tuhun ra tsihin ra. ¹⁷ Tacan tan ra Pablo cana ra tsi iin ra capitán. Tan catyí ra tsihin ra:

—Cuandaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyí ra Pablo tsihin ra capitán.

¹⁸ Tacan tan tsindaca ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyii vehe caa cana ra tsi yu tan catyí ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

¹⁹ Tacan tan ra comandante tñan ra ndaha ra luhlu can tan tava sin ra tsi ra tan catyí ra tsihin ra:

—¿Náa cuñi un cahan un tsihin yu?

20 Tan ra luhlu can catyí ra tsihin ra:

—Ra Israel ndoo ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo. 21 Maa tyin ña cua tsiñu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuví cahñi ra naha tsi ra, vaha taxín ca na cúu tandihí maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

22 Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunuhu ra tsi ra luhlu can.

Nu cacu ra Pablo ndaha ra Israel naha ra tan cuahán ra nuu ra ndacá ñaha tsa nañí Félix

23 Tacan tan ra comandante cana ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cahun ndo ñuu Cesarea cuhva caa iin tsa tsacuaa. Cua cahun uvi cientu andaru tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza. 24 Janduvaha ndo cuayu coso ra Pablo. Tan jaha cuenda vaha ndo tsi ra ityi cahun ndo na tsaa vaha ra nu nyaá ra Félix, ra ndacá

ñaha —catyí ra comandante tsihin ra capitán can naha ra.

25-26 Tacan tan javaha ra iin carta cundaha ra naha nacuhva ra naha tsi ra Félix. Tan tuhun tsa tyaá ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyivi cuví un. Ihya vatsí nacumi tsi un.

27 ‘Ra Pablo ihya, tñin ra Israel naha ra tsi ra. Tan cuñi ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuví ra, tsahan yu tsihin andaru tan jacacu yu tsi ra. 28 Tan cuñi yu coto yu náa cuatyí tyaá nyivi tsi ra, tsindaca yu tsi ra nu iyó junta tandihí ra cuví mandoñi nyivi Israel. 29 Tan nyehe yu tyin xaan xaan cuñi nyivi Israel nyehé ñi tsi ra tyin ña tyaá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihi yo tsi ra vehe caa. 30 Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihí ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa javaha ra.

31 Tacan tan quihñin ra naha tsi ra Pablo tumaa cuhva catyí ra Claudio tsihin ra naha, tan juven ñi tsacuaa can tsindaca ra naha tsi ra nda ñuu Antípatris. 32-33 Tsa inga quivi, ra tsa cuahán

tsihin tsaha, sava ityi ñi tsahan ra naha, tan tsaꝯ nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaꝯ ra naha, nacuhvá ra naha carta can tsi ra Félix, tan tsaꝯ cuenda ndihi ra naha tsi ra Pablo tsi ra. ³⁴ Tsa yaha tsa cahví ra Félix carta can, quitsaha tsicá tuhun ra tsi ra Pablo nu maa cuví ñuu ra. Tan tsa tsitó ra tyin ra Cilicia cuví ra. ³⁵ Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javaha ra Herodes tahan tsanaha.

24

Nu cutuñí ra Pablo nuu ra Félix

¹ Yaha uhun quivi tan ra Ananías, ra jutu tsaahnu tsa yihí ndaha inga ca ra jutu, tsaꝯ ra ñuu Cesarea can tsihin taahan ra cuví mandoñi naha ra, tan tsihin iin ra tsa nañí Tértulo. Ra tsa caahán ndaahvi tsaha nyivi cuví ra. Tsaꝯ ra can naha ra nuu ra Félix tyin cua ndacan ra naha cuatyí tsaha ra Pablo.

² Tacan tan tava tyiñu ra Félix na quitsi ndaca andaru tsi ra Pablo. Tacan tan quitsaha tsicán ra Tértulo cuatyí tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi,

tan vaha iyó ndi tyin yihí ndaha vaha un nyivi ñuu ndi.

³ Nacuhvá xaan ndi tyahvi nyoo tsi yooho tata Félix, tyin vaha xaan iñi un. ⁴ Tan ña cuñí yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu.

⁵ Tyin tsitó ndi tyin rayi ihya ñavin ra vaha cuví ra. Tandihí ñi ityi jacuvaá ra tsi nyivi Israel. Tan juven ra cuví ityi nuu tsihin nyivi tsa nyicún tsi ra Jesús ra ñuu Nazaret.

⁶ Tan cuñí ra javaha ra tsa ndavaha ñi tsitsi vehe ñuhu cahnu. Tan yacan cuenda tin ndi tsi ra, tyin tatsi tuñi ndi tsi ra tumaa cuhva catyí ley maa ndi.

⁷ Maa tyin ra Licias, ra cuví comandante ñihi xaan tyasi ra tan quihin nyaa ra tsi ra tsi ndi. ⁸ Tan catyí ra tyin tun cuñí ndi ndacan ndi cuatyí tsaha ra, cuñí tsi tsa cahan jihna ndi tsihin un. Yacan nyehe maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

⁹ Tacan tan ra Israel tsa yucú ican, catyí ra naha tyin tandihí maa tsa caahán ra Tértulo tan nditsa. ¹⁰ Tacan tan ra Félix janaha ndaha ra nu nyaá ra Pablo tyin naca-han ra. Tan ra Pablo quitsaha caahán ra tan catyí ra:

—Si xaan cuñí yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyivi iyó ñuu ihya. ¹¹ Tatun cua nducu tuhun un, cua coto un tyin tsa iyó ñi utsi uvi quivi

tsa tsahan̄ yu ñuu Jerusalén tsijacahn̄ yu tsi Nyoo. ¹²Tan ña cahan̄ yuhu tahan̄ yu tsihin̄ ndī intuhun̄ nyivī. Tan ndī ña jacuvā yu tsi ñi tsitsi vehē ñuhū cahnu. Nduve maa náa javah̄ yu tandīhi ca vehē ñuhu, tan ndī inga ca ityī tsitsi ñuu. ¹³Tan cuatyí tsa tyaá ra ihya naha ra siqui yu, ña nditsa. Tyin tandīhi maa tsa caahán ra tan ñavin tsa nditsa cuví tsi. ¹⁴Maa tyin tsa cua catyi yu tsihin un cuví tsehe: tyin yuhu jacahnú yu tsi Nyoo. Juvín ra tsa jacahnú tsi tsaahnu yu. Tan jacahnú yu tsi ra tumaa cuhva jacuahá ra Jesucristo. Tan ra ihya naha ra catyi ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandīhi tsa nyaá nu libru ley tsa tyaá ra Moisés, tan tsinú iñi yu. Tan tandīhi tsa tyaá ra cuví ndusu yuhu Nyoo tan tsinú iñi yu. ¹⁵Tan tsinú iñi yu tumaa tsa tsinú iñi ra ihya naha ra tyin nyivī tsa tsihī cua nandoto ñi inga tsaha, tahan̄ ñi nyivī vaha tan nyivī caquiñi. ¹⁶Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyivī.

¹⁷Tan tsa yah̄ juhva cuiya tsa tsic̄a yu tandīhi ñi ityi, tsahan̄ tsā nuhu yu nda Israel ñuu yu tyin nacuhva cuenda yu xuhun tsa tsah̄ nyivī tsi yu tsi nyivī ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo. ¹⁸Yacan javahá yu tsitsi vehe ñuhu cahnu. Tan tsa yah̄ tsa

janduvah̄ yu tsi yu tumaa catyī ley ndi, tan juhva ra Israel ra tsa queē ityī Asia, nyehē ra naha tsi yu ndacan. Maa tyin nduve nyivī cuaha yucú, tan nduve náa javah̄ ñi. ¹⁹Tan ra tsa nyehē tsi yu ndacan naha ra, taahán tsi tsa quitsi maa ra naha cahan̄ ra naha náa cuví tsa javah̄ yu o náa cuatyí tyaá ra naha siqui yu. ²⁰Tatun ña tacan, na catyī tuhun ra tsa nyecú ihya naha ra tatun náa iin cuatyí yu nañih̄i ra naha quivī janahm̄a ra cuví ityi nuu tsihin nyivī Israel naha ra tsi yu. ²¹¿A ñavin cuenda tsatyin cahan̄ yu iin tuhun tsihin ra tsa yucú junta can? Tan catyī yu: “¿A tatsí tuñi ndo tsi yu tsa cuenda tyin tsinú iñi yu tsa nandoto nyivī tsa tsihī?” —catyī ra Pablo.

²²Tan tsa tsiñī ra Félix tsa cahan̄ ra tacan, tan catyī ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyī ra.

Cahan̄ ra tacan tyin tsitó ra nácaa cuahán tuhun nyivī nyicún tsi ra Cristo.

²³Tacan tan tavā tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyiī ra, tan cahan̄ ra naha tsihin ra.

²⁴Tsa yah̄ juhva quivī tan tsā nyico ra Félix inga tsaha tsihin ña Drusila ñasihī ra.

Tan ñaha Israel cuví ña. Tan tava tyiñu ra na quitsi ra Pablo tyin cuñí ñi tyaa soho ñi nácaa tuhun tsa tsinú iñi ra tsi ra Jesucristo. ²⁵ Tan ra Pablo quitsaha caahán ra tuhun nácaa taahán tsi javaha yo tsa vaha cuhva cuñí Nyoo, tan ña cuví javaha yo tsa ña vaha tsa cuñí cuñu ñuhu yo. Tan coo quivi cua tatsi tuñi Nyoo tsi tandihi nyivi. Tan ra Félix nayuhvi xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

²⁶ Tan ra Félix cuñí maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra. ²⁷ Tan tsa yaha uvi cuiya, tacan tan nacosó tyiñu tsi ra Porcio Festo tyin cundaca ñaha ra. Tyin tsa quita ra Félix. Tan ra Félix ña cuñí ra tsa cahan nyivi Israel tsi ra, yacan cuenda nacoó ra tsi ra Pablo vehe caa.

25

Nu jandaá ra Festo cuatyí ra Pablo

¹ Tan tsa quihvi ra Festo tsa cua jaha tyiñu ra, tacan tan tsa tsinu uñi quivi quita ra ñuu Cesarea can tan cuahán ra nda ñuu Jerusalén. ² Tan tsa tsaá ra ñuu Jerusalén, tacan tan tsaá ra jutu tsa cuví ityi nuu, tan ra cumí tyiñu tsa yihí ndaha tsi nyivi Israel. Tan tsican ra naha cuatyí tsaha ra Pablo. ³ Tan tsican

ra naha tumañi iñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucahñi ra naha tsi ra Pablo ityi cua quitsi ra. ⁴ Maa tyin ra Festo nacahan ra, tan catyí ra:

—Ra Pablo nyii ra vehe caa nda ñuu Cesarea. Tan yuhu tyaá yu cuhva tsa yatyi ñi cua cunuhu nyico yu. ⁵ Yacan cuenda, nyooho tsa cuví ndo ra cumí tyiñu ñuu ihya, cuví cahun ndo tsihin yu, tan ndacan ndo cuatyí tsaha ra tatun iyó tsa ña vaha javaha ra —catyí ra Festo tsihin ra naha.

⁶ Tacan tan ra Festo ndoo ra ñuu Jerusalén una quivi o utsi quivi ñi tan cuanuhu nyico ra nda ñuu Cesarea. Tan tsa inga quivi tsaá ra tsitsi vehe tyiñu ra tan tsinyaa ra tsa cua tatsi tuñi ra tsi ra iyó cuatyí naha ra. Tacan tan tava tyiñu ra na quitsi ra Pablo. ⁷ Cuhva tsa quihvi ra Pablo, nu yucú ra naha natuhva ra Israel tsa quee nda ñuu Jerusalén, tan quitsaha tyaá ra naha cuatyí cahnu siqui ra. Maa tyin nduve tsandaa tava ra naha. ⁸ Tacan tan cahan ra Pablo tan catyí ra:

—Yuhu ndi intuhun cuatyí ñaha ca javaha yu, ndi siqui ley nyivi Israel, ndi siqui vehe ñuhu cahnu ñuu Jerusalén, ndi siqui ra cuví rey cahnu tsa nyaá ñuu Roma —catyí ra.

⁹ Maa tyin ra Festo cuñí ra coo vaha ra tsihin ra Israel

naha ra, yacan cuenda tsica tuhun ra tsi ra Pablo:

—¿A cuñí un cuhun un ñuu Jerusalén tyin jandaa yu tyiñu un ndacan? —catyí ra tsihin ra.

¹⁰ Tan ra Pablo nacahan ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javaha yu tsi nyivi Israel. ¹¹ Tun tsatyin javaha yu iin cuatyí cahnu tsa taahán tsi cúu yu, ña cua nducu yu cuhva cacu yu. Maa tyin ña nditsa maa tuhun tsa caahán ra ihya naha ra. Ndi nyooho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tsihin ra Festo.

¹² Tacan tan ra Festo, tsa yaha tsa natuhun tahan ra tsihin ra jatyinyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

Nu nacatyí tuhun ra Festo tuhun ra Pablo tsihin ra Agripa

¹³ Tsa yaha juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyíí ra Festo tyin cua cuhva ñi nacumi

tsi ra. ¹⁴ Tan ndoo ñi ican juhva quivi, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoó ra tsi iin ra vehe caa ihya. ¹⁵ Tan tsa tsahan yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsican ra naha cuatyí tsaha ra can nuu yu tyin na cuhva yu ndatu tsa cúu ra. ¹⁶ Tan yuhu catyí yu tsihin tandihi ra naha tyin ña tuhvá ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi cuhva jacacu ñi tsi ñi. ¹⁷ Yacan cuenda, tsa quitsi ra cuví ityi nuu tsihin nyivi Israel can naha ra ihya, ña ndatu yu. Tan juvin ñi inga quivi can tan tsahan yu vehe tyiñu. Tan tsa yaha tsi-cunyaá yu tan cana yu tsi ra can. ¹⁸ Maa tyin ra tyaá cuatyí siqui ra, nduve náa tuhun ñiñi cahan ra naha. Tsa cuñí maa yu tyin cahnu cuatyí cua tyaa ra naha siqui ra. ¹⁹ Maa tyin tuhun tsa cahan ra naha cuví tsa cuenda cuhva iyó maa ra naha cuhva tsinú ñi ra naha. Tan cahan ra naha tuhun ra tsa nañí Jesús. Tan catyí ra naha tyin tsa tsihi ra. Maa tyin ra Pablo catyí ra tyin nyito ra. ²⁰ Tan tsa ña ñihí yu nácaa tatsi tuñi yu tsi ra tsa cuenda tuhun can, tsica tuhun yu tsi ra tan catyí yu tsihin ra tatun cuñí ra cuhun ra cutuñi ra nda ñuu Jerusalén. ²¹ Maa tyin catyí ra tyin vaha ca tatun cutuñi

ra nuu ra Augusto nda ñuu Roma. Yacan cuenda tava tyiñu yu na cunyi ra juhva ca quivi tsitsi vehe caa, nda cuanda cuvi jacuhun yu tsi ra nuu ra Augusto —catyí ra Festo tsihin ra Agripa.

²² Tacan tan ra Agripa catyí ra tsihin ra Festo:

—Cuñí tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

²³ Tsa inga quivi can tan tsaá ra Agripa tsihin ña Berenice. Iyo xaan caá ñi quihvi ñi tsitsi vehe, tyin rey cuví ñi. Tan quihvi ndihi tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo.

²⁴ Tacan tan quitsaha catyí ra Festo:

—Yooho Rey Agripa, tan nyooho tata, tsa yucú ndo ihya. Nyehe ndo tsi ra ihya. Tandihí ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandihí ra naha tsa catyí ra naha tsihin yu tyin taahán tsi cúu ra. ²⁵ Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan. ²⁶ Maa tyin nduve náa cuatyí ra nañihí yu, yacan cuenda ña ñihí yu tuhun tyaa yu nu carta tsa cua jacuhun

yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu. ²⁷ Tyin ña vaha tsa jacuhún yu tsi ra tatun nduve náa tuhun caahán yu náa cuatyí javaha ra.

26

Nu quitsaha caahán ra Pablo nuu ra rey Agripa

¹ Tacan tan ra Agripa catyí ra tsihin ra Pablo:

—Cuví cahan un vityin —catyí ra tsihin ra.

Tan ra Pablo jandaá ra ndaha ra tan catyí ra tyehen:

² —Si xaan cuñí yu tyin cuví cahan yu nuu yooho, rey Agripa, tan cuví catyí yu tsihin un nácaa tandihí cuatyí tsa tyaá ra Israel naha ra siqui yu. ³ Tyin yooho tsitó un tandihí tuhun tsa iyó yo tsa cuví yo nyivi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

Nu catyí tuhun ra Pablo tsihin ra Agripa nácaa ñayivi tsi-coo ra tsa ndi cumañi ca quihvi ra cuenda ra Cristo

⁴ Tandihí nyivi Israel tsitó ñi nácaa tsicoo yu nda ñuu yu quivi tsa ndi luhlu yu. Tan tsitó tucu ñi nácaa tsicoo yu nda ñuu Jerusalén. ⁵ Cuaha xaan cuiya nacotó ñi tsi yu. Tatun cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra

fariseo cuví ra tsa vaha xaan tyaá yahvi ley tsahnu yo tan ñavin ca tandihí nyívi. ⁶ Tan vityin cuñí nyívi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyívi tsa tsihi, tumaa catyí ra tsihin tsi tsaahnu yo naha ra tahañ tsanaha. ⁷ Tandihí nyívi tsa cuví tata tsa utsi uvi taahan sehe ra Israel ndatú tucu ñi nyehe ñi nu cua janandoto Nyoo tsi nyívi tsa tsihi. Tan yacan cuenda ña jandihí ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaá ra Israel naha ra cuatyí siqui yu vityin, yooho rey Agripa. ⁸ ¿A ña tsinú iñi nyooho tyin Nyoo cua janandoto ra tsi nyívi tsa tsa tsihi?

Nu tsaha cuenda ra Pablo tsi ra Agripa cuhva tsinyaa ndaha ra tsi nyívi yihí cuenda ra Cristo

⁹ Tahañ tsanaha juvin ñi maa yu tsica iñi yu tyin vaha tsa tatsi tuñi yu tsi nyívi tsinú iñi tsi ra Jesús, ra ñuu Nazaret. ¹⁰ Tan tacan javaha yu nda ñuu Jerusalén tsihin ndatu tsa tsaha ra jutu tsa cuví ityi nuu naha ra. Tan cuaha nyívi tsa tsinú iñi tsi ra Cristo tyihí yu vehe caa. Tan tatun tsahñi ra naha tsi ñi, vaha xaan cuñí yu. ¹¹ Tan cuaha xaan tundoho nyehe ñi jaha yu. Tan nducu yu cuhva jañiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javaha yu tandihí maa vehe ñuhu nyívi Israel. Javaha yu tacan tsa cuenda tsa xaan

cuñí yu nyehé yu tsi ñi. Tan tandihí inga ñuu tsahan yu tsinyaa ndaha yu tsi ñi.

Nu nacatyí tuhun nyico ra Pablo nácaa nanduví ra, rayihí cuenda ra Cristo
(Hechos 9.1-19; 22.6-16)

¹² Tan tsa cuenda yacan cuahán yu nda ñuu Damasco quívi can tyin tsaha ra jutu tsa cuví ityi nuu naha ra ndatu tsi yu. ¹³ Maa tyin ityi cuahán yu cuhva ora cuví tsi, yooho Rey. Tan quitsi ñuhu ityi siqui. Tan jandunditsin tsi nu cuahán yu tsihin tandihí ra tsa cuahán tsihin yu. Maa tyin yaha ca nditsin tsi tan ñavin ca ñuhu ñicanyii. ¹⁴ Tacan tan tandihí ndi nduva ndi nu ñuhu. Tan tsiñi yu iin ndusu tsa caahán tsihin yu, tsihin yuhu yo, tan catyí tsi tsihin yu: “Saulo, Saulo, ¿nacuenta nyaá ndaha un tsi yu? Tumaa iin quití tsañi nyaá ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicueehé un”, catyí ndusu can tsihin yu. ¹⁵ Tacan tan catyí yu: “¿Yóo yooho cuví un taa?” Tan Jutu Mañi yo catyí ra tsihin yu: “Yuhu cuví ra Jesús, juvin ra tsa nyaá ndaha un. ¹⁶ Nduvita nyityi. Tyin quituví yu nuu un ihya tyin tacan tan cua jaha tyiñu un nuu yu, tan cua cuví un tsandaa tsa cuenda tsa nyehé un ihya tan tsa cuenda tsa cua nyehe un ityi nuu ca. ¹⁷ Yacan cuenda vityin jacuhún yu tsi un nu iyó nyívi tsa ñavin nyívi Israel cuví tan juvin ñi maa yu

cua jacacu yu tsi un ndaha ra Israel naha ra, tan ndaha nyivi tsa ñavin nyivi Israel cuví. ¹⁸ Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndihi tucu ñi tsa vaha tsa tsahá Nyoo tsi nyivi tsa nacuhvá cuenda tsi ñi tsi yu”, catyí Jutu Mañi yo tsihin yu.

¹⁹ Yacan cuenda yooho rey Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu. ²⁰ Tacan tan tsa jihna ñi quitsahá caahán yu tuhun ra nda ñuu Damasco. Yaha can tan cahán yu tsihin nyivi ñuu Jerusalén tan tandihi ca ñuu tsa cayucú Judea. Tan caahán ndihi yu tsihin nyivi tsa ñavin nyivi Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaa yahvi ñi tsi Nyoo na javaha ñi tsa vaha tumaa javahá nyivi tsa tsinú iñi tsi ra Cristo. ²¹ Tan tsa cuenda tuhun ihya tñin ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu. ²² Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandihi nyivi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuví nu cuahán ca tsi, yacan caahán

yu. ²³ Tyin catyí ra naha tyin taahán tsi tsa cua nyehe ra Cristo tundoho. Tan tsa yaha tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyivi tyin cua jacoto ra nácaa cua cacu ñi, tahan ñi nyivi Israel tan nyivi tsa ñavin nyivi Israel cuví —catyí ra Pablo.

Nu nducú ra Pablo cuhva tsa tsinu iñi ra rey Agripa tsi ra Cristo

²⁴ Cuhva tsa catyí ra Pablo tuhun ihya, ra Festo caná tsa ra, tan catyí ra:

—¡Iñi yooho ña vaha cuñi, Pablo!, tsa cuenda tsa cuaha xaan cahví un tan ndusaná iñi un —catyí ra Festo tsihin ra.

²⁵ Maa tyin ra Pablo catyí ra tsihin ra:

—Ñavin iñi yu ña vaha cuñi, yooho tata Festo. Tyin tsa caahán yu, maa ñi tsa nditsa tan tsa vaha cuví tsi. ²⁶ Ihya nyaá ra rey Agripa. Tan tsitó vaha ra tuhun ihya. Yacan cuenda ña yí caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi. ²⁷ Yooho rey Agripa, ¿a tsinú iñi un tuhun tsa tyaa ra cuví ndusu yuhu Nyoo tahán tsanaha? Yuhu tsitó yu tyin tsinú iñi un —catyí ra Pablo tsihin ra Agripa.

²⁸ Tacan tan ra Agripa catyí ra tsihin ra:

—¿A cuñi yooho tsa natsinu iñi yu tsa caahán un tan quihvi yu cuenda ra Jesús?

—catyí ra rey Agripa tsihin ra Pablo.

²⁹ Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yooho ñi, tyin na tsinu ndihi tucu iñi tandihi nyivi tsa yucú tyaá soho tsa caahán yu ihya. Intuhun ñi tsa ña cuñi yu, tsa quihí cadena ndaha ndo tumaa maa yu vityin —catyí ra Pablo.

³⁰ Tsa yaha tsa cahan ra Pablo tuhun ihya, nduvita rey tan ra ndacá ñaha tan ña Berenice, tan tandihi ra yucú ican naha ra. ³¹ Tan tsa yaha quita ñi, tan quitsaha natuhún tahan ñi:

—Nduve cuatyí ra ihya tsa ñihi xaan. Ña taahán tsi cúu ra. Tan ndi ña taahán tsi cunyi ca ra vehe caa —catyí ñi.

³² Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsican ra tsa cutuñi ra nuu ra cuví rey cahnu —catyí ra.

27

Nu jacuhun ra Festo tsi ra Pablo nda ñuu Roma

¹ Quivi tsa tyaá ra Festo tan ra Agripa cuhva tyin jacuhun ra naha tsi ndi nda ñuu Roma tsa canyí Italia, nacuhva cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañi Julio. Yihí ra batallón andaru, tsa nañi Cuenda Ra Augusto. ² Tan cuahán ndihi tucu ra Aristarco tsihin ndi. Ra tsa quee ñuu Tesalónica

tsa canyí ityi Macedonia cuví ra. Tacan tan quihvi ndi tsitsi iin yutun ndoo tsa quee ñuu Adramitio tyin tsa yatyin cuii cuhun nyico tsi ñuu tsa cayucú Asia yatyin ñi yuhu ndutya ñuhu. ³ Tsa inga quivi tsaá ndi puerto Sidón. Tan ra Julio vaha nyivi cuví ra tsihin ra Pablo. Tan tsaha ra tsa cuhun ra Pablo nu iyó ra vaha iñi tsi ra ñuu can tan jatyinyee ra naha tsi ra. ⁴ Yaha can tan quita ndi ñuu Sidón tan jandaá ra naha jahma tsa nyisó yutun ndoo can tan tsihin tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yaha tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can. ⁵ Tacan tan yaha sava ndi nu ndutya ñuhu ityi nuu Cilicia tan Panfilia, tan tsaá ndi iin ñuu tsa nañi Mira tsa canyí Licia. Tan quita ndi tsitsi yutun ndoo can.

⁶ Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cuhun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahán ndi. ⁷ Cuaha quivi tsica ndi tyin cuee ñi cuahán ndi. Tsihin tundoho tan tsaá ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsaha tsi tsa cuhun ca ndi ityi nuu, tan yaha ndi yatyin ñi ñuu Salmón tsa canyí ñuhu

Creta. Tan navico_ ndi ityi yuhu ñuhu Creta. ⁸ Nducu_ ndi cuhva tsa cuhun ndi yuhu ndutya ñuhu, maa tyin tsihin tundoho tan tsaã ndi nu nañí Buenos Puertos yatyin ñi ñuu Lasea.

⁹ Tsa cuaha xaan quiví yaha tyin cuee xaan tsicá ndi tsa cuenda tatyí tan ica xaan nanduví tsa yaha ndi nu ndutya ñuhu. Tyin tsa yaha quiví vico nu iyó nyitya nyiví Israel. Tan tsa cua cuyatyin yoo vitsin. Yacan cuenda ra Pablo tsaḥa cuenda ra tsi ra jacacá yutun ndoo can naha ra, ¹⁰ tan catyí ra:

—Tandihí nyooḥo ra yucú ihya, tyaa soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuví iñi yu tyin cua cunaa yutun ndoo tsihin tandihí tsa nyisó tsi, tan nda cuanda maa yo cuví cunaa yo. Vaha ca tatun ndoo yo ihya —catyí ra tsihin ra naha.

¹¹ Maa tyin ra capitán cuenda andaru can tyaa yahvi ca ra tsi ra jacacá yutun ndoo tan ra cuví tsitoho yutun ndoo tan ñavin ca tsi ra Pablo. ¹² Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandihí ra naha:

—Vaha ca tsa quita yo ihya tan nducu yo cuhva cuhun yo nda ñuu Fenice tsa canyíí juvin ñi ñuhu Creta ihya. Yacan cuví iin nu vaha cunyaa yutun ndoo tyin ña ñihi xaan yihí tatyí tyin ñuu can canyíí

tsi tsiyo cana ñicanyii —catyí ra naha.

Nu ñihi xaan yihí tatyí nu ndutya ñuhu

¹³ Tacan tan quitsaha yihí luxu tatyí tsa quitsí ityi sur. Tan cuñí maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatyin ñi yuhu ñuhu Creta can. ¹⁴ Ña cuaha ñi tsicá ndi tan quitsaha yihí tatyí xaan tsa quitsí ityi norte. Tan tandahá tsi yutun ndoo inga ityi. ¹⁵ Tan ña cuví ca cuhun ndi ityi nuu ca tsa cuenda tatyí can. Tan jaña ndaha ndi na cuhun maa yutun ndoo tsihin tatyí ndáa ityi cuñí maa tsi. ¹⁶ Tan yaha ndi ityi tsata iin ñuhu luhlu tsa nañí Clauda tyin ña ñihi xaan yihí tatyí ityi can. Tan tsihin tundoho naquihin ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutya. ¹⁷ Tan tsa yaha natyihí ra naha yutun ndoo luhlu can, tacan tan sutya ra naha xuu yutun ndoo cahnu tan tsahñí ra naha yutun ndoo can tsihin taahan yoho tyin coo tunyee iñi itsi. Tan yuuhví ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañí tsi Sirte. Yacan cuenda januu ra naha jahma yutun ndoo can tan tsaḥa ra naha tsa cuhun tsi cuhva tandahá tatyí. ¹⁸ Tan tsa inga quiví

juvin ñi ñihi xaan yihí tatyí. Yacan cuenda quitsahá tyihí ra naha carga tsa yihí tsitsi yutun ndoo can nuu ndutya ñuhu. ¹⁹ Tan tsa tsinu uñi quivi quihin ndi ndaha tyiñu yutun ndoo can tan tyihí ndi nu ndutya ñuhu. ²⁰ Tan cuaha quivi ña nyehe ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaá ca ndi cuhva tsa cua cacu ndi.

²¹ Cuaha quivi yahá tan ña tsatsí ndi. Tacan tan catyí ra Pablo tsihin tandihí ra naha:

—Nyehe ndo, vaha ca tun tsatyin tyaá yahvi ndo tuhun tsa cahan yu quivi can, tan ndoo yo ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaá yo.

²² Tan cua cunaa ndihí yutun ndoo ihya, maa tyin ña cacu iñi ndo tyin ndi intuhun yo tan ña cua cúu yo. ²³ Tyin Nyoo cuví ra yihí ndaha tsi yu, tan jahatyíñu yu tyiñu ra, juvin ra janahá ra iin tsa janahá tsi yu cuñi. Tan quituvi iin ángel nuu yu.

²⁴ Tan catyí ángel can tsihin yu: “Ña nayuhvi un, Pablo. Tyin cuñi tsi tsa cahan un tuhun Nyoo nuu ra rey cahnu Augusto nda ñuu Roma. Tan tsa cuenda un cua jacacu Nyoo tandihí ra yucú tsihin un tsitsi yutun ndoo”, catyí ángel can tsihin yu. ²⁵ Yacan cuenda nyooho tsa yucú tsitsi yutun ndoo ihya jandu iin ndo iñi ndo. Tyin yuhu tsinú iñi yu tsi Nyoo. Tan tsitó vaha yu tyin cua cuvi tumaa

cuhva catyí ángel can tsihin yu. ²⁶ Vasu cua nyee yutun ndoo ihya, maa tyin cua tsaá yo iin ñuhu luhlu —catyí ra Pablo tsihin tandihí ndi.

²⁷ Tan tsa ndihí tsahun quivi tsa tsica ityi ndi. Iin tsacuaa yucú ndi nu ndutya ñuhu Adria. Tan tsata can tsata ihya tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuví iñi ra jacacá yutun ndoo can naha ra tyin cua tsaá ndi iin ñuhu.

²⁸ Tacan tan tyihí cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihí cuhva ra naha inga tsaha. Tan iyó oco utsa metru. ²⁹ Tan yuuhví ra naha coto nañi yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cahun ca tsi ityi nuu. Tan tsa cuñi ra naha tsa cunditsin.

³⁰ Tan ra jacacá yutun ndoo can naha ra tyaá ra naha cuhva cunu xeehe ra naha. Tan yacan cuenda quitsahá januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha. ³¹ Maa tyin ra Pablo jacoto ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyooho ña cua cuvi cacu ndo —catyí ra tsihin ra naha.

³² Tacan tan andaru tsahnyá ra naha yoho yutun ndoo

luhlu can. Tan jacanacava ra naha can nu ndutya. ³³ Tan tsa naa ca ra Pablo catyí ra tsihin tandihí ra naha:

—Tsa iyó utsi cumi quivi tsa ña tsatsí ndo tan ña quixí ndo. ³⁴ Catyí yu tsihin ndo, catsi ndo vityin. Ñiñi xaan cuñí tsi tsa catsi yo tyin tacan tan ndunyee cuñu ñuhu yo. Tyin cua cacu yo tan ndi in-tuhun ixi jiñi yo tan ña cua cunaa.

³⁵ Tan tsa catyí ra Pablo tuhun ihya, quihín ra iin paan tan nacuhva ra tyahvi nyoo tsi Nyoo nuu tandihí ra naha. Tacan tan tahvi ra tan quitsaha tsatsí ra. ³⁶ Tacan tan tandihí ra naha ndu iin ca iñi ra naha tan tsatsí ndihí ra naha. ³⁷ Tan tsa tandihí ndi tsa yucú ndi tsitsi yutun ndoo can, quitá uvi cientu uñi xico tsahun iin ndi. ³⁸ Cuhva tsa ndihí tsatsí ra naha cuhva cuñí ra naha tan jacuhun ra naha yitin tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsa tsi yatyin ñi yuhu ndutya.

Nu nyee yutun ndoo

³⁹ Yaha can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaa ra naha cuhva nyehe ra naha tatun cuví jacuhun ra naha yutun ndoo ican. ⁴⁰ Tsahnya ra naha yoho tsa nuuhñí caa vee can. Tan nacoo ra naha can tsitsi ndutya ñuhu. Tan

jandutaya ra naha vitu tsa janavicó yutun ndoo. Tacan tan jandaá ra naha jahma tsa tuhvá ticaá ityi nuu tsi. Tan quitsaha quihín tatyí jahma can, tan jacuhún tsi yutun ndoo nda nu iyó nyiti can. ⁴¹ Tan tsaá tsi nu tatahán ndutya. Tan nyee jiñi tsi tsitsi nyiti. Tan ña cuví ca tava ra naha itsi. Tan ityi xuu tsi quitsaha tahví cuatyí can tsa cuenda tsa ñihi xaan cañí ndutya ñuhu can. ⁴² Tacan tan andaru cuñí ra naha cahñi ra naha tsi ra cuahán cua cutuñi naha ra tyin coto cunu ra naha. ⁴³ Maa tyin capitán andaru cuñí ra jacacu ra tsi ra Pablo. Yacan cuenda ña tsaha ra tsa cahñi ra naha tsi ra can naha ra. Tan catyí ra tyin ndáa ra tsitó sutya, na cuhun cuee ñi ra naha nu ndutya tan quita ra naha nda ñuhu ityi. ⁴⁴ Tan tandihí ca ra tsa ña cuví sutya, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahví cuatyí jahá ndutya ñuhu. Tan tacan cacu tandihí ndi tan quitá ndi ñuhu ityi.

28

Nu nyii ra Pablo ñuhu Malta

¹ Cuhva tsa tsa yaha cacu ndi tan catyí nyivi iyó ñuhu can tyin nu yucú ndi can nañí tsi Malta, o Melita. ² Tan vaha xaan natuhún ñi tsihin ndi. Tan jatahan ñi ñuhu tyin cuún savi tan vitsin xaan. Tan catyí ñi tsihin tandihí ndi, na natuhva ndi yuhu ñuhu can tyin quita tsa vitsin tsí ndi.

³Tacan tan ra Pablo naquih̄in ra juhva nducu ityi. Tan tsitsi tsa tyihí ra can nu ñuhu, quita iin coo tsitsi nducu can, tsa cuenda tsa ihñi. Tan tsatsi yihí ti ndaha ra, tan ticaá tsico ti ndaha ra. ⁴Cuhva tsa nyehe nyivi ñuhu can tyin ticaá coo can ndaha ra, quit-saha natuhún tahan ñi tan catyí ñi:

—Ra ihya nyivi tsahñi ra, tun cuvi, tyin vasu cacu ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyí ñi.

⁵Maa tyin ra Pablo naquisi ra tsi coo can, tan canacava ti nu ñuhu, tan nduve náa tahan ra. ⁶Tandihí ñi ndatú ñi náa cuhva ndaa nu tyaa ti, a náa cuhva cua cúu ra. Maa tyin tsa yaha ndatu xaan ñi, tan nyehe ñi tyin nduve maa náa tahan ra. Tacan tan nasama ñi cuhva tsicá iñi ñi, tan quit-saha catyí ñi:

—Ra ihya cuvi iin nyoo —catyí ñi.

⁷Yatyin ñi can canyí ñuhu ra yihí ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuú ra tsi ndi, tsa uñi quivi tsa yucú ndi vehe ra. ⁸Tan jutu ra ñihi xaan cuuhví ra tsihin cahñi tan tsa tsiyó ra. Tan tsahan ra Pablo tsinyehe ra nu canyí ra. Tan tsican tahvi ra tsa cuenda ra, tan tyiso ndaha ra jiñi ra. Tacan tan nduvaha ra. ⁹Yaha can tan quitsaha tsaá cuaha nyivi cuuhví tsa iyó ñuu can. Tan nduvaha ndihí ñi. ¹⁰Tan tandihí ñi vaha xaan tyanuú ñi tsi ndi.

Tan quivi quihvi ndi tsitsi iin yutun ndoo tsa cua cuhun ndi, tsaha ñi tandihí tsa cua cutyiñu ndi ityi cuhun ndi.

Nu tsaq ra Pablo ñuu Roma

¹¹Uñi yoo tsiyucú ndi ñuhu Malta can. Tacan tan quihvi ndi tsitsi iin yutun ndoo tsa quee nda ñuu Alejandría tsa canyí nu cuví Egipto. Tan ndoo tsi Malta nda yaha yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux. ¹²Tan tsaq ndi ñuu Siracusa. Tan ican ndoo ndi uñi quivi. ¹³Tacan tan quita ndi tan cuahán ndi ityi yuhu ndutya ñuhu nda cuanda tsaq ndi ñuu Regio. Tan tsa inga quivi can ñihi xaan yihí tatyí tsa quitsi ityi sur tan tsica ndi uvi quivi tan tsaq ndi ñuu Puteoli. ¹⁴Ican ñihí tahan ndi tsihin juhva ra hermano naha ra. Tan catyí ra naha tsihin ndi tyin ndoo ndi iin vitya tsihin ra naha. Yaha can tan cuahán ndi nda ñuu Roma. ¹⁵Tan nyivi yihí cuenda ra Cristo ñuu Roma can ñihí tuhun ñi tyin cua tsaq ndi. Tan tsahan ñi tsijatahan ñi tsi ndi ityi. Juhva ñi ndatu tsi ndi Nuyahví Apio. Tan inga ñi ñihí tahan ñi tsihin ndi nda nu nañi Tres Tabernas. Tan tsa nyehe ra Pablo tsi ñi, nacuhva ra tyahvi nyoo tsi Nyoo. Tan ndu iin ca iñi ra. ¹⁶Cuhva tsa tsaq ndi ñuu Roma can, ra capitán can nacuhva cuenda ra tsi ra iyó cuatyí can naha ra tsi ra yihí ndaha vehe caa. Tan tsaha ra can tsa coo siin ra Pablo.

Tan jahá cuenda intuhun ñi andarú tsi ra.

Nu caahán ra Pablo tuhun Nyoo ñuu Roma

¹⁷ Tsa yahá uñi quivi tsa tsaá ndi ican, tacan tan tava ra Pablo tyiñu na quitsi ra cuví ityi nuu tsihin nyivi Israel tsa iyó ñuu Roma can naha ra. Tan cuhva tsa ndu iin ra naha, quitsahá catyí ra tsihin ra naha:

—Nyooho yañi, vasu nduve náa javahá yu tsi nyivi Israel tahan yo, tan ndi nduve náa javahá yu siqui tuhun tsahnu cuhva iyó yo, maa tyin tsahá cuenda ra Israel naha ra tsi yu tsi ra ñuu Roma naha ra. Tan tsinyij yu vehe caa ñuu Jerusalén ndaha ra ñuu Roma naha ra. ¹⁸ Tan tsa jaquee yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javahá yu. ¹⁹ Maa tyin ra Israel tsa iyó nda ñuu Jerusalén naha ra nduxaan xaan ra naha tan yacan cuenda tsican yu tsa cutuñi yu nuu ra cuví rey cahnu. Vasu nduve cuatyí cua tyaa maa yu siqui ra naha. ²⁰ Yacan cuenda caná yu tsi nyooho tyin nacoto yu tsi ndo, tan catyí tuhun yu tsihin ndo tyin nuuhñi yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyivi Israel —catyí ra Pablo.

²¹ Tacan tan catyí ra Israel naha ra tsihin ra Pablo:

—Ña tsitó ndi tuhun yooho. Tan yoñi jacoto tsi ndi, ndi tsihin carta, tan ndi ra ñuu

yo tsa quee nda Judea ña cahán ra naha tuhun yooho, tan nduve náa cahán ra naha siqui un. ²² Maa tyin cuñi ndi tyaa soho ndi tuhun tsicá iñi un. Tyin tsitó ndi tyin tandiñi ñi ityi tan caahán nyivi siqui tuhun tsa ihya —catyí ra Israel naha ra tsihin ra Pablo.

²³ Tacan tan natuhun tahan ra naha ndaa quivi cua cuhun ra naha inga tsaha. Tsa tsaá quivi can, tsaá cuaha nyivi nu iyó ra Pablo. Tan quitsahá caahán ra nda tsa tuvi tan nda cuanda tsacuaa nácaa ndacá ñaha Nyoo. Tan tsihin ley Nyoo tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javahá ra Pablo tyin cuñi ra tsa tsinu iñi ñi tsi ra Jesús. ²⁴ Yihí ñi tsinú iñi ñi tsa caahán ra. Tan inga ñi ña tsinú iñi ñi. ²⁵ Tan ña iin tsicá iñi ñi, siin siin tuhun caahán ñi. Tan quitsahá tsinuhú ñi. Tan ra Pablo catyí ra tsihin ñi:

—Nditsa tsa cahán Tatyí Ii Nyoo tsihin ra Isaías ra cuví ndusu yuhu ra tahan tsanaha, tyin na cahan ra tsihin tsii tsaahnu yo. Tan catyí ra:

²⁶ Cuaahan tan cahan un tyehen tsihin nyivi ihya:

Nyooho cua cuñi ndo tuhun Nyoo, maa tyin ña cua cutuñi iñi ndo.

Cua nyehe ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

²⁷ Tyin añaima ñi tsa ndundava
xaan tsi.

Tsiñí ñi, maa tyin ña tyaa
yahvi ñi.

Tan ndasí tinuu ñi, tyin tacan
tan ña cua cuvi nyehe
ñi.

Tan ña cua cuñi ñi tsihin soho
ñi.

Tan ña cua cutuñi iñi ñi tsihin
añaima ñi.

Yacan cuenda ña cuñí ñi
quihvi ñi tsitsi ndaha
yu na janduvaha yu tsi
ñi.

Tacan catyí ra Isaías jaha
Tatyí li Nyoo tahan
tsanaha.

²⁸ Coto vaha nyooho tyin
vityin tan ityi nuu ca cuhun
yu cua jacoto yu tsi nyivi tsa
ñavin nyivi Israel cuví tyin ja-
cacú Nyoo tsi ñi. Tan maa
ñi cua tyaa soho ñi —catyí ra
Pablo tsihin ñi.

²⁹ Cuhva tsa catyí ra Pablo
tyehen, ra Israel cuahán ra
naha juvin ñi caahán yuhu
tahan ra naha tsa cuenda
tuhun tsa cahán ra Pablo tsi-
hin ra naha.

³⁰ Uvi cuiya ndoo ra Pablo
vehe nu nyíí ra cuenda yoo
ñuu Roma can. Tan vaha
caahán ra tsihin tandihí nyivi
cuahán vehe ra. ³¹ Tan tsihin
tsa ñi iñi ra tan caahán ra
tuhun nácaa ndacá ñaha Nyoo
tsi yo. Tan jacuahá ra tuhun
Jutu Mañi yo ra Jesucristo.
Tan yoñi tyasí nu caahán ra.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

Nu quitsaha tyaá ra Pablo carta

¹ Yuhu ra Pablo cuví yu iin ra jahá tyiñu tyiñu ra Jesucristo. Cana Nyoo tsi yu, tan nacatsi ra tsi yu tyin caca yu jacoto yu tuhun tsa jacacú ra tsi yo tsi nyivi. ² Tan tuhun ihya cuví tsa cahan Nyoo tsihin ra cuví ndusu yuhu ra tahañ tsanaha tyin tyaa ra naha nu tutu ra. ³ Juvín tuhun ihya caahán tyin Jutu Mañi yo Jesucristo, Sehe Nyoo, quitsi ra nu ñuhu ñayivi tan nanduvi ra tumaa maa yo. Tan cuví ra tata ra rey David. ⁴ Tan Nyoo jacoto ra tsi yo tsihin Tatyí Ii ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra. ⁵ Tan tsa cuenda ra Jesucristo tsaha Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó nanhi cahnu nu ñuhu ñayivi tsi ra tan na tyaa yahvi ñi tsi ra. ⁶ Tan juhva ñi ican cuví tucu nyoocho tyin tsa nacatsi ra Jesucristo tsi ndo tyin cuví ndo nyivi cuenda ra.

⁷ Jaquitsí yu carta ihya tsi tandihí nyoocho tsa iyó ñuu Roma. Nyoo cuñí xaan ra tsi ndo tan cana ra tsi ndo tyin

cuví ndo nyivi ra tan jacahnu ndo tsi ra. Naquihin ndo tsa vaha tan na coo tsa taxin añima ndo jahá Jutu yo Nyoo tan Jutu Mañi yo Jesucristo.

Nu catyí ra Pablo tyin cuñí ra cuhun ra ñuu Roma

⁸ Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyoocho tyin tandihí ñi ityi caahán nyivi tyin tsinú xaan iñi ndo tsi ra Jesucristo. ⁹ Jahá tyiñu yu tyiñu Nyoo tsihin tsa ñi iñi añima yu. Tan caahán yu tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo. ¹⁰ Tan tsicán yu tsi ra na cuví cuhva cuñí ra, tan quitsi yu nu yucú ndo, tyin tsanaha xaan cuñí yu quitsi yu. ¹¹ Tyin cuñí yu jatyyinyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihi ca ndo tsi ra. ¹² Tsa cuñí yu cahan yu tsihin ndo cuví tuhun ihya: tsa jandu iin tahan yo iñi yo tsihin tsa tsinú iñi yo tsi ra.

¹³ Yañi, cuñi yu tsa coto ndo tyin cuaha xaan tsaha cuñí yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñí yu quitsi yu ñuu ndo tyin cuñí yu cahan ca yu tuhun Nyoo tsihin nyivi tyin tacan tan nducuaha ca ñi tsinu iñi tsi ra, tumaa javaha yu tsihin nyivi inga ca ñuu. ¹⁴ Tyin tsa ñiñi cuñí tsi cahan yu tuhun tsa

jacacú ra Cristo tsi yo tsihin nyívi Grecia tan nyívi inga ñuu; tahan ñi nyívi tsa tsitó xaan tan nyívi soho. ¹⁵ Yacan cuenda, cuñí yu cahan yu tuhun ra Cristo tsihin nyooho tsa iyó ndo Roma ihya.

Tuhun Nyoo iyó xaan tunyee iñi itsi

¹⁶ Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihi nyívi tsa tsinú iñi tsi ra Cristo. Tsa jihna ñi maa ñi maa tsihin nyívi Israel cahan ndi tuhun ra Cristo, maa tyin vityin caahán ndihi tucu ndi tsihin nyívi tsa ñavin nyívi Israel cuví. ¹⁷ Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvin ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyívi tsa janduvahá Nyoo añima, iyó ñi ñayívi tsa tsihin tsa tsinú iñi ñi tsi ra.”

Tandihí nyívi tan iyó cuatyí ñi

¹⁸ Nyehé yo tyin Nyoo, ra nyaá gloria, tatsí tuñi ra tsi nyívi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyívi tsa nditsa. ¹⁹ Tsitó ñi tsa iyó Nyoo tyin juvin ñi maa ra janahá can tsi ñi. ²⁰ Ña cuví catyí yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihí tsa

javahá ra. Tsanaha javahá ra ñuhu ñayívi tan yacan janahá tsi yo tyin iyó Nyoo tan iyó tunyee iñi tsi ra. Nyívi tsa ña cuñí coto tsi Nyoo ña cua coo tucahnu iñi tsi ñi. ²¹ Vasu ndi maa tsitó ñi tsa iyó Nyoo tsihin tsa nyehé ñi tandihí tsa javahá ra, ña cuñí ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayívi tyaá jiñi ñi. Tan tsa cuenda yacan ndusohó ñi. ²² Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi. ²³ Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyívi tuhvá tsihi, tan nda cuanda tsitoho tsa caá tumaa caá saa, tan coo, tan quití iyó cumi tsaha.

²⁴ Yacan cuenda nacoó Nyoo tsi ñi nu tsa caquiñi tsa javahá ñi. Tan javahá ndihi tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu. ²⁵ Ña cuñí ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahvi ñi tsa javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñí tsi jacahnu yo tacan ñi maa. Na cuví tsi tacan.

²⁶ Yacan cuenda jaña ndaha Nyoo tsi ñi na javaha ñi tsa tsahá ticanuu tsi ñi. Tyin nda cuanda ñiñaha tan tsicoó ñi tsihin ñi nduyii, tan ña vaha tacan. ²⁷ Tan juvin ñi tacan javahá tucu rayii,

nacoó ra naha tsa iyó ra naha tsihin ñasihi ra naha, tan iyó ra naha tsihin ra ndusihi naha ra tan tsahá ra naha ticanuu tsi yañi ra naha. Tan tsa cuenda can tatsí tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

²⁸ Tan tsa cuenda tsa ña cuñí ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñí maa ñi. ²⁹ Tyin tandihi nuu tsa ña vaha javahá ñi. Ñiñaha tsicoó ñi tsihin rayi tan ña tindaha ñi. Rayi tsicoó ra naha tsihin ñaha tan ña tindaha ra naha. Maa ñi tsa caquiñi javahá ñi. Cuñí ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyivi. Tsahñí ñi nyivi. Cañí tahan ñi tsihin nyivi ñi. Jandaví ñaha ñi. Quiñi iyó ñi tan caahán ñi cuendu. ³⁰ Caahán ñi ndavaha ñi siqui inga nyivi. Ndasí cuñí ñi nyehe ñi tsi Nyoo. Caahán nyaa ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndi tsi sihi ñi. ³¹ Ña cuñí ñi cutuñi iñi ñi. Ña javahá ñi tsa catyi ñi tyin cua javaha ñi. Ña cuñí maa ñi tsi ndi intuhun nyivi. Ña tsitó ñi jahá ñi tuc-ahnu iñi tan ña cundaahví iñi ñi nyehe ñi tsi nyivi. ³² Tsitó vaha ñi tyin Nyoo ña cuñí ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihí ñi tsa

javahá ñi can, tan tatun inga nyivi javahá tacan, si xaan cuñí ñi.

2

Tatsí tuñi Nyoo tsi nyivi maa tyin tsihin tsa nditsa

¹ Nyooho tsa nyehé cuatyí tsa javahá inga nyivi, iyó cuatyí ndo tyin jacutuñí ndo tsi ñi tsa cuenda cuatyí javahá ñi. Yoñi jaha ndáa nyooho cuví ndo. Tyin tsa jacutuñí ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihi ndo cuatyí tsa javahá ñi. ² Tsitó yo tyin Nyoo tatsí tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsí tuñi ra. ³ Nyooho tsa jacutuñí tsi nyivi tan javahá ndo juvin ñi tsa javahá ñi, cua tatsí tuñi Nyoo tsi ndo. ⁴ ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñí ra tsa nasama ndo cuhva iyó ndo. ⁵ Maa tyin nyooho jandavá xaan ndo aña ndo. Tan ña cuñí ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsí tuñi ra tsi ndo tsa cuenda can quivi cua tatsí tuñi ra tsi nyivi tsihin tsa ndaa tan tsa nditsa. ⁶ Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo. ⁷ Nyoo cua cuhva ra ñayivi tsa ña cua naa maa coo nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñí

ñi coo cuii ñi tsihin ra. Cua ñihi ñi tandihi yacan tyin nanducú ñi can. ⁸ Maa tyin cuaha ca tsa uhvi cua janyehe ra tsi nyivi tsa javahá tsa cuñi maa ñi, ñi tsa ña tyaá yahvi tuhun nditsa, tan javahá ñi tsa ña vaha. ⁹ Cuaha xaan tundo tan tsa uhvi cua nyehe tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihi ra tsi nyivi tsa ñavin ñi Israel cuví. ¹⁰ Maa tyin tandihi nyivi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva ra tsa taxin coo añima ñi. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihi ñi tandihi can.

¹¹ Tyin Nyoo inducu ñi cuñi ra nyehé ra tsi iin yo tan tsi inga yo. Ña tavá tsiyo ra ndi intuhun yo. ¹² Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can. ¹³ Tyin nyivi tsa javahá cuhva catyí ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyí ley can, ña cua cacu ñi. ¹⁴ Nyivi tsa ñavin ñi Israel cuví ña tsitó ñi ley, maa tyin tun tacan ñi

javaha maa ñi tsa catyí ley, juvin ñi maa ñi cuví ley ñi. ¹⁵ Tyin tsihin cuhva iyó ñi, janahá ñi tyin iyó ley Nyoo tsitsi añima ñi. Tsa tsiñi tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi. ¹⁶ Tacan cua cuví quivi cua jacutuñi ra Jesucristo cuatyí tandihi nyivi jaha Nyoo. Cua cutuñi tandihi maa nyivi tsa javahá xeehe cuhva tsicá iñi ñi. Tumaa catyí tuhun Nyoo tsa caahán yu tsihin ndo.

Nyivi Israel nyicún ñi ley Nyoo tsa tyaá ra Moisés

¹⁷ Maa tyin nyooho nyivi Israel cuví ndo, catyí ndo. Tan nyitá iñi ndo ley Nyoo tsa tyaá ra Moisés. Tan nduyaá ñi maa ndo tyin catyí ndo tyin nyivi Nyoo cuví ndo. ¹⁸ Tan tsitó ndo cuhva cuñi Nyoo tan ley can janahá tsi tsi ndo tsa nacatsí ndo tsa vaha. ¹⁹ Tan cuñi tucu ndo tyin vaha jaquihín ityi ndo tsi nyivi cuaa, ñi tsa ña tsitó ley. Jandunditsín ndo nu yucú nyivi nu naa, cuñi maa ndo. ²⁰ Tan cuñi tucu ndo tyin tsitó ndo tandihi ley Nyoo tan jaquihín ityi ndo tsi nyivi tsa ña tsitó, ñi tsa ñaha ca caca vaha tsihin Nyoo. ²¹ Tatun tsitó ndo jacuahá ndo tsi inga nyivi, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhú ndo? ²² Juvin ñi catyí ndo tyin ña vaha coo inga ñaha tsi iin rayii, o inga rayii tsi iin ñaha, ¿nacuenda tyin maa ndo javahá ndo tacan?

Ndasí cuñí ndo nyehe ndo tsitoho, ¿nacuenda tyin suhú ndo ndaha tyiñu tsa iyó tsitsi vehe ñuhu can? ²³ Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra. ²⁴ Yacan cuenda catyí tuhun Nyoo tyehen: “Nyivi tsa ñavin nyivi Israel cuví, caahán ñi ndavaha ñi siqui Nyoo tsacatyí nyooho.”.

²⁵ Nditsa tyin circunción tsa cuví tuñi Nyoo, tsa janahá tyin cuví yo nyivi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can. ²⁶ Maa tyin rayii tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatyin nyisó ra tuñi can. ²⁷ Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo. ²⁸ Vasu ndi maa cuví ndo nyivi Israel tan nyisó ndo tuñi ra, ña cuví cuví ndo nyivi Nyoo tun nduve ley ra iyó aña ndo. ²⁹ Tyin nyivi iyó ley Nyoo aña, ñi ican cuví nyivi Nyoo. Tyin maa Tatyí Ii Nyoo tyaá tuñi ra aña ñi, tan ñavin cuñu ñuhu ñi. Tatyí Ii Nyoo javaha can, ñavin ley tsa tyaá ra Moisés. Nyivi ihya cua cuví nyivi vaha nuu Nyoo, tan ñavin nuu nyivi.

3

¹ ¿Nacaa jatyinyee tsa cuví yo nyivi Israel tsi yo? ¿O nácaa jatyinyee tuñi Nyoo tsi yo? ² Cuaha cuhva jatyinyee tsi tsi yo. Iin cuhva jatyinyee tsi tsi yo tyin Nyoo tsaha ra ley maa ra tsi yo tsa cuví yo nyivi Israel. ³ ¿Náa cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsinú iñi yo tsi ra? ⁴ ¿Ña cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyivi vatya ñi, ra ican javahá ra tandihí tsa caahán ra. Tyin catyí nu tutu ra tyehen: Jutu Mañi yu, cua nyehe nyivi tyin ña vatya un.

Tan cua coto ñi tyin nditsa tsa caahán un.

⁵ Tsa caquiñi tsa javahá tandihí yoo, tsa iyó nu ñuhu ñayivi ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyí yo tumaa catyí nyivi tyin ña vaha tsa tatsi tuñi Nyoo tsi yo tyin janahá yo tyin vaha ra? ⁶ Nyivi catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

⁷ Tatun javahá nyivi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa. ⁸ Tun tsatyin nditsa

tša caahán ñi can, vaha ca javaha yo maa ñi maa tša caquiñi tacan tan nyehe nyivi tyin Nyoo vaha ra. Yihí ñi catyí ñi tyin tacan jacuahá ndi. Tan ñi tša caahán tye-hen cua tatsi tuñi Nyoo tsi ñi tsacatyí tša caahán ñi cuendu siqui ndi.

Tandihí yo tan iyó cuatyí yo

⁹ Tan nácaa ja vaha ca yoo tša cuví yo nyivi Israel tan ñavin ca inga nyivi? Ña vaha ca yo. Tyin tša yahá janahá yu tsi ndo tyin tandihí yo tan iyó cuatyí yo. An cuví yo nyivi Israel, o ña cuví yo nyivi Israel, maa tyin ndacá ñaha cuatyí tsi yo. ¹⁰ Tacan catyí nu tutu Nyoo, nu catyí tsi tye-hen:

Ndi intuhun nyivi vaha nduve iyó.

¹¹ Nduve nyivi cuñi cutuñi iñi tuhun Nyoo.

Yoñi cuñi nanducu tsi ra.

¹² Tandihí ñi nacoq ñi tsi Nyoo, tan tandihí ñi tan cuanaq ñi.

Ndi intuhun ñi tan ña javahá ñi tša vaha.

¹³ Jucun ñi cuví tsi tumaa iin ñaña ndiyi tša ticohó.

Tan tsihin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

¹⁴ Maa ñi tša ndvaha ñi caahán ñi.

¹⁵ Yatyí xaan tsahñi ñi tsi tahan ñi.

¹⁶ Janyehé ñi tundoho tan tucuihya iñi tsi nyivi tsihin cuhva iyó ñi.

¹⁷ Tan ña tsitó ñi nácaa coo taxin ñi tsihin Nyoo, tan ndi tsihin nyivi.

¹⁸ Ndi ña tsicá iñi ñi tatun coo iin quivi cua tatsi tuñi Nyoo tsi ñi, catyí tuhun Nyoo nu tutu ra.

¹⁹ Tsitó yo tyin tandihí tša caahán ley Nyoo tša tyaq ra Moisés, cuví tsi tša cuenda nyivi tša yihí ndaha ley can, tyin tacan tan ña cuvi catyí ñi tyin nduve cuatyí ñi iyó. Maa tyin coto tandihí nyivi iyó nu ñuhu ñayivi tyin cua tatsi tuñi Nyoo tsi ñi tša cuenda cuatyí ñi. ²⁰ Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

Tša cuenda tša tsinú iñi yo tsi Nyoo tan nduvaha yo nuu ra

²¹ Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tša cuenda ley tan nduvahá yo. Ley ihya tan ra cuvi ndusu yuhu Nyoo janahá nácaa coo vaha yo tsihin Nyoo. ²² Tyin tša cuenda tša tsinú iñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyivi Israel o ñavin. ²³ Tandihí yo tan iyó cuatyí yo, tan tša cuenda yacan ña cuvi quihvi yo nu ndacá ñaha Nyoo. ²⁴ Maa tyin tsahá maa ra tša vaha ra tsi yo, tan yacan jahá tša naquihin cuenda ra tsi yo tumaa tsatyin vaha yo, tyin tša yahá tyahvi ra Cristo Jesús tša cuenda cuatyí yo. Tan

yacan cuenda ña tsicán ca ra yahvi tsi yo. ²⁵ Nyoo jaquitsi ra tsi ra Cristo tyin cúu ra nu cruu tan cati ra ñiñi ra tsa cuenda cuatyí yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuví, tyin nyehe nyivi tyin Nyoo javahá ra tsa vaha. Tahan tsanaha, Nyoo ña tiin cuenda ra cuatyí nyivi tsa cuenda tyin cua quitsi ra Cristo tan janaa ra cuatyí ñi. ²⁶ Tan tacan cuví tyin vityin nyehé nyivi tyin Nyoo tacan ñi maa vaha ra, tan naquihin ra tsi tandihi yo tsa tsinú iñi tsi ra Jesús tumaa tsatyin vaha yo.

²⁷ ¿A cuví nduyaa yo vityin? Ña cuví. ¿Nacuenda? Tsa cuenda tyin ña cuví catyí yo tyin javahá yo tandihi tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra. ²⁸ Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

²⁹ ¿A Nyoo cuenda nyivi Israel ñi cuví Nyoo? ¿A ñavin juvin ñi cuví tucu ra Nyoo nyivi tsa ñavin ñi Israel cuví? Juvín ñi cuví tucu ra Nyoo ñi can. ³⁰ Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyivi Israel,

o nduve. ³¹ Tatun tacan, ¿a cuñi tsi catyí tyin nduve ca yahvi nyaá ley tsahnu can? ¡Ñavin tsa nduve yahvi nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

4

Cuhva tsicoq ra Abraham janahá tsi tsi yo nácaa nduvahá yo nuu Nyoo

¹ ¿Náa catyí yo tsa cuenda ra Abraham, tsi tsaahnu yo? ¿Nacuenda naquihín cuenda Nyoo tsi ra tumaa tsatyin vaha ra? ² Tun tsatyin naquihín cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo. ³ ¿Náa catyí nuu Nyoo? Catyí tsi tyin ra Abraham tsinú iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra. ⁴ Vaha, vityin cua cuhva yu iin cuhva tsi ndo: Ra jahá tyiñu, quihín ra yahvi tsa cuenda tyiñu jahá ra tan ña tuhvá nyivi cuhva maa xuhun tsi ra tun ña jahá tyiñu ra. ⁵ Maa tyin iin ra tsa ña jahá tyiñu tan ñihi ra tsa ñihi ra, ñihi ndaahvi ra itsi cuví can. Tacan cuví nyivi iyó cuatyí tsa ña nducú cacu tsihin tsa javahá ñi cuhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatyin vaha yo tun tsinú iñi yo tsi ra. ⁶ Ra David cahan ra siqui tsa sih cuví tsi nyivi tsa naquihín cuenda

Nyoo tumaa tsatyin vaha ñi tan ña tñin cuenda ra cuatyí tsa javahá ñi. ⁷ Tyehen catyí ra David:

Sii xaan cuví tsi nyívi tsa jahá Nyoo tucahnu iñi tsi tan ña jahá ra cuenda cuatyí ñi.

⁸ Sii xaan cuví tsi ñi tsa ña tñin cuenda Nyoo cuatyí.

⁹ ¿A cuñí maa ndo tyin tsa cuenda nyívi nyisó tuñi Nyoo ñi cuví tusii iñi ihya, o cuví tucu tsi tsa cuenda nyívi ña nyisó tuñi can? Tsa yaha catyí yo tyin Nyoo jahá ra tyin vaha ra Abraham tsa cuenda tsa tsinú iñi ra tsi ra. ¹⁰ ¿Ama javahá Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yaha? Ñavin tsa tsa yaha, tyin tsa ndi cumañi ca. ¹¹ Yaha tsa naquihin Nyoo tsi ra Abraham tumaa tsatyin vaha ra, tacan tan tsinyaá tuñi can tsi ra tumaa iin seña tyin tsa yaha nduvahá ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihi yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo. ¹² Nditsa tyin ra Abraham cuví tucu ra jutu nyívi Israel, tandihi ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinú iñi maa ra Abraham, tsii tsahnu yo, quívi tsa ñaha ca cunyaa tuñi can tsi ra.

Tsihin tsa tsinú iñi yo ñihí yo tsa tsahá Nyoo tsi yo

¹³ Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayívi tsihin ra. Maa tyin tsa cahán Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihin ra tsi ra tumaa tsatyin vaha ra. ¹⁴ Tun tsatyin maa ñi maa nyívi tsa javahá cuhva catyí ley, cua ñihi tsa cua cuhva Nyoo, nduve náa catyí tsinú iñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra. ¹⁵ Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo cuhva catyí tsi. Maa tyin tun tsatyin nduve ley iyó, ña cua coo cuatyí yo.

¹⁶ Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihi yoo tsa cuví tata ra Abraham. Ñavin maa ñi nyívi tsinú iñi tsi Nyoo tan tyaá yahvi ley tsa tyaá ra Moisés cua ñihi tsa cua cuhva Nyoo, tyin cua ñihi ndihi tucu nyívi tsa ña nyitá iñi ley, tatun tsinú iñi ñi tsi ra tumaa tsa tsinú iñi ra Abraham. Ra ihya cuví jutu tandihi nyívi tsa tsinú iñi tsi Nyoo. ¹⁷ Tyin catyí ra nu tutu ra tyehen: “Yooho cua cuví tumaa jutu nyívi cuaha tsa cua coo nu ñuhu ñayívi”, catyí ra tsihin ra Abraham. Tan tsa catyí ra tacan, cuñí tsi catyí tyin

cuví yo tata ra Abraham nuu Nyoo. Tsinu iñi ra tsi Nyoo, tyin Nyoo janandotó ra ndiyi tan caahán ra tuhun tsa ñaha ca coo tumaa tsatyin tsa iyó tsi.

¹⁸ Ra Abraham tsa tsahnu xaan ra quivi tsa catyi Nyoo tyin cua coo sehe ñasihí ra, tan tsitó ra tyin ña cuví ca coo sehe ñi. Maa tyin tsinu iñi ra tan ñihí ra tsa cahan Nyoo tsihin ra. Tan cuví ra jutu nyivi cuaha, tumaa cahan maa Nyoo tsihin ra: “Tyehen cua nducuaha nyivi tata un”. ¹⁹ Vasu ndi maa tsa yatyin ña iin cientu cuiya ra Abraham, ña jandihí ra tsa tsinú iñi ra. Tahan ñi maa ra tan ña Sara ñasihí ra, ña cuví ca coo sehe ñi, tyin tsa cuyatyin cuui cúu ñi tyin tsahnu xaan ñi. ²⁰ Maa tyin ña ndu uví iñi ra tsa cua ñihi ra tsa catyi Nyoo tyin cuhva ra tsi ra. Tsinu iñi ra tsihin tsa ñii iñi añima ra. Tan ña jandihí ra tsa nyitá iñi ra tsi Nyoo. Tan jacahnú ra tsi Nyoo, ²¹ tsa cuenda tyin tsitó vaha ra tyin Nyoo iyó tunyee iñi tsi ra tsa javaha ra tsa catyi ra tsihin ra. ²² Yacan cuenda Nyoo naquihín ra tsi ra tsa cuenda tsa tsinu iñi ra tsi ra.

²³ Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinu iñi ra tsi ra, ñavin tsa cuenda ra Abraham ñi cuví tsi, ²⁴ tyin tsinyaa tucu tsi tsa cuenda yoo. Tyin naquihín Nyoo tsi yo tsa cuenda tsa tsinú iñi yo tsi ra, tyin juvin ra janandotó tsi ra Jesús, Jutu Mañi yo.

²⁵ Ra Jesús quitsi ra quitsi cúu ra tsa cuenda cuatyí yo, tan nandotó ra tyin tacan tan cuvi nduvaha yo nuu Nyoo.

5

Tsa cua ñihi yo tsa cuenda tsa nacoq vaha yo tsihin Nyoo

¹ Tsa yaha nduvaha yo nuu Nyoo tsa cuenda tsa tsinú iñi yo tsi ra. Tan vityin iyó vaha yo tsihin ra jaha Jutu Mañi yo Jesucristo. ² Tyin tsa cuenda ra Cristo ñihí yo tsa vaha Nyoo tyin tsinú iñi yo tsi ra. Tan iin cuñí yo tyin tsa naquihín yo can. Tan sii cuñí yo tyin cua cuhva ra tsa cahnu cuvi yo tan javaha yo tsa cuñí maa ra tyin javaha yo. ³ Tan ñavin tsa cuenda yacan ñi taahán tsi cusí iñi yo, tyin taahán tucu tsi cusí iñi yo tun nyehé yo tundoho. Tyin tsitó yo tyin tun cunyee iñi yo nyehé yo tundoho, tacan cua cunyee iñi yo cuatu yo nda cuanda ñihi yo tsa cua cuhva Nyoo tsi yo. ⁴ Tatun cunyeé iñi yo yaha yo tandihí tundoho, sii cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra. ⁵ Tatun tsitó yo tyin cua quita vaha yo nuu ra, ña taahán tsi nducahan nuu yo nyehé yo tsi ra, tyin Tatyí Ii ra tsa tsaha ra coo añima yo janahá tsi tsi yo tyin cuñí xaan ra tsi yo.

⁶ Tsanaha yoo ña ñihí yo cuhva jacacu maa yo tsi yo. Tacan tan quivi taha maa tsi quitsi ra Cristo, quitsi cúu ra tsa cuenda cuatyí yo. ⁷ Tsitó

yo tyin ndi intuhun yo tan ña cana iñi yo cúu yo tsa cuenda inga nyivi, vasu ndi maa vaha ñi. Maa tyin tun vaha xaan iñi nyivi can vasiqui cahnya iñi iin yo cúu yo tsa cuenda ñi. ⁸ Maa tyin Nyoo jaquitsi ra tsi ra Cristo, tan yacan janahá tsi yo tyin cuñi xaan ra tsi yo. Quitsi ra quitsi cúu ra tsa cuenda yo vasu ndi maa iyó xaan cuatyí yo. ⁹ Tan tsa cuenda tsa tsihi ra Cristo, nacoó vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quivi cua tatsi tuñi Nyoo tsi nyivi ña tsinú iñi tsi ra. ¹⁰ Tahan tsanaha xaan iñi yo tsi Nyoo, maa tyin vityin iyó vaha yo tsihin ra tsa cuenda tsa tsihi ra Cristo, Sehe ra. Yacan cuenda tsa nyitá vaha iñi yo tyin cua jacacu ra tsi yo tsa cuenda tsa iyó yo ñayivi Sehe ra, tyin tsa iyó vaha yo tsihin ra. ¹¹ Tan ñavin yacan ñi, taahán tucu tsi cusii iñi yo tsihin Nyoo tyin tsa cuenda Jutu Mañi yo Jesucristo tan nduvaha iyó yo tsihin ra.

Ra Adán tan ra Cristo

¹² Tsanaha intuhun ñi rayii tsicoó cuatyí, tan tsa cuenda intuhun ñi ra can tsaá cuatyí nanii ñuhu ñayivi tan tsicoó tuhun tsihi. Tan tuhun tsihi can nacuñá can tyin tandihi nyivi tan tsicoó cuatyí ñi. ¹³ Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyivi, maa tyin ña tiiñ cuenda Nyoo cuatyí ñi tsa cuenda tyin nduve ley iyó. ¹⁴ Maa

tyin nda cuanda quivi tsicoó ra Adán tan nda cuanda quivi tsicoó ra Moisés, tsindaca ñaha tuhun tsihi tsi tandihi nyivi tyin iyó cuatyí tandihi ñi, vasu ndi maa ña javahá ñi tumaa javahá ra Adán tsa ña tyaa yahvi ra tsa cahan Nyoo tsihin ra. Ra Adán quitsi ra tsihin cuatyí, maa tyin ra Cristo quitsi ra jacacu ra tsi yo.

¹⁵ Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihi cuaha nyivi. Tacan tucu vityin, Nyoo jacacú ra tsi yo tsa cuenda intuhun rayii, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihi nyivi cuví tsi. ¹⁶ Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandihi nyivi. Maa tyin vityin Nyoo ña cuñi ra yahvi tan jacacú ra tsi yo. Naquihín ra tsi yo tumaa tsatyin vaha yo, vasu ndi maa cuaha cuatyí yo tsicoó. ¹⁷ Nditsa tyin quitsahá ndacá ñaha tuhun tsihi tsi tandihi nyivi jahá cuatyí tsa javahá ra can, maa tyin vityin ña cuví ca quihí ndaha can tsi ñi tsa tsa nduvaha nuu Nyoo, ñi tsa iin nyita ñi naquihín tsa vaha ra. Ñi ican iyó ñi ñayivi tsaa tan yihí ndaha ñi tsi ñi tan tsi nu ña vaha jahá intuhun rayii, ra Jesucristo.

¹⁸ Nyoo tatsí tuñi ra tsi tandihi nyivi iyó nu ñuhu

ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javaha ra Jesucristo. ¹⁹ Cuñí tsi catyí tyehen: Tsa cuenda tsa ña tyaa yahvi iin rayii tsa cahan Nyoo, cuaha xaan nyivi tsicoo cuatyí. Ra ican cuví ra Adán. Tan vityin cuaha xaan nyivi cua nduvaha nuu Nyoo tsa cuenda tsa tyaa yahvi inga ra tsa cahan Nyoo. Tan ra ican cuví ra Cristo.

²⁰ Nyoo tsaha ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu iñi iyó tsi ra tsihin yo. ²¹ Tahān tsanaha, cuatyí yo quitsi ndaca tuhun tsihi, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

6

Ña cua javaha ca yo tsa caquiñi tyin cua javaha yo cuhva catyí ra Cristo

¹ ¿Naa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu iñi tsi ra tsihin yo? ² Ña vaha. Tyin yoo tsa tsa ndu uví iñi cuatyí tumaa tsa tsihi cuatyí yo cuví

can. Tan yacan cuenda, ña cuví ca javaha yo tsa caquiñi vityin. ³ ¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñí tsi catyí tyin tsa yaha tsihi yo tsihin ra.

⁴ Tsa quihví yo tsitsi ndutyá tsa tsicoó ndutyá yo cuví tsi tumaa tsa tsihi yo tan quihví ñuhu yo tsihin ra Cristo tsa tsihi ra. Tan tumaa tsa nandoto ra Cristo jahā Nyoo tsihin tunyee iñi ra, tacan nandoto tucu yo tsa quitá yo tsitsi ndutyá tsa tsicoondutyá yo. Tan vityin iyó yo ñayivi tsa tsihin ra.

⁵ Tumaa tsa tsihi ra Cristo, tacan tsihi tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihi yo tsihin ra, tacan cua nandoto tucu yo tumaa nandoto ra. ⁶ Tan tsitó yo tyin tandihi cuhva tsicoo yo tahān tsanaha, tsa yaha tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí. ⁷ Tyin nyivi tsa tsa yaha tsihi, ña cuví ca javaha ñi tsa caquiñi. ⁸ Tan yoo tsa tsa tsihi tsihin ra Cristo, nyitá iñi yo tyin cua coo yo tsihin ra. ⁹ Tsitó yo tyin ra Cristo nandoto ra tsa yaha tsihi ra, tan vityin ña cúu ca ra tyin nduve ca tunyee iñi iyó tsi tuhun tsihi tsa cahñi can tsi ra. ¹⁰ Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cúu ca ra. Vityin iyó ra, tan iyó ra tsa cuenda maa Nyoo. ¹¹ Tan tacan tucu nyooho, ña

javaha ca ndo tsa caquiñi. Ña naa iñi ndo tyin tsa yaha tsihi ndo tan tsa tsindihí cuatyí ndo. Tan coo ndo cuhva cuñí Nyoo tsihin tsa iin ñi cuví ndo tsihin ra Cristo Jesús Jutu Mañi yo.

¹² Yacan cuenda ña cūhva ca ndo tsa jaha canaa cuñu ñuhu cuatyí ndo tsi ndo. Ña cūhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñí tsi. ¹³ Ña cūhva ndo ndatu tsi cuñu ñuhu ndo tsa javaha ndo tsa caquiñi. Naçuhva cuenda ndo tsi ndo tsi Nyoo, tyin tsa yaha tsihi yo tan nandoto yo. Cūhva cuenda ndo cuñu ñuhu ndo tsi Nyoo tyin tacan tan javaha ndo tsa vaha. ¹⁴ Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaá ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

Musu tsa javahá tsa vaha

¹⁵ ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin. ¹⁶ Nyooho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahvi. Tun tyaá yahvi yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaá yahvi yo tsi can.

Maa tyin tun tyaá yahvi yo tsi Nyoo, cua cuví yo nyivi vaha nuu ra. ¹⁷ Tyahvi nyoo tsi Nyoo, tyin vasu ndi maa nu quitsi tsi cuví ndo musu tsa caquiñi maa tyin vityin tyaá yahvi ndo tuhun Nyoo tsa cutuhvá ndo tsihin tsa ñi iñi añima ndo. ¹⁸ Tsa yaha ndatsi cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo. ¹⁹ (Caahán yu tsihin ndo cuhva tsa ña yihí ñi cutuñi iñi ndo tyin nyooho ñaha ca cutuñí vaha iñi ndo tuhun Nyoo.) Tumaa tsa tsahá cuenda ndo cuñu ñuhu ndo tsi tsa caquiñi tahañ tsanaha tan javahá ndo tsa ña vaha; tacan tucu vityin cūhva cuenda ndo cuñu ñuhu ndo tsi Nyoo tyin tacan tan coo ndo ñayivi cuiti, tan javaha ndo maa ñi maa tsa vaha nuu ra.

²⁰ Quivi tsiquihí ndaha cuñu ñuhu cuatyí ndo tsi ndo, musu can cuví ndo, tan ña yihí ndaha tsa vaha Nyoo tsi ndo. ²¹ Maa tyin nduve náa ñihí ndo tsihin can, tan vityin cahán nuu ndo tsa cuenda tsa javahá ndo tsanaha, tyin maa ñi tuhun tsihi tsahá can. ²² Maa tyin vityin ña ndacá ñaha ca cuatyí tsi ndo tyin tsa tsahá cuenda ndo tsi ndo tsi Nyoo. Tan vaha xaan tyin maa ñi tsa cuñí Nyoo javahá ndo. Tan nu cua ndihí tuhun cua coo cuii ndo tsihin Nyoo. ²³ Nyivi tsa javahá tsa caquiñi, cua cúu ñi. Maa tyin Nyoo tsahá maa ra ñayivi tsa ña cua naa maa coo yo tsa cuenda tsa iin ñi cuví yo tsihin ra Cristo Jesús, Jutu

Mañi yo.

7

Ley tsahnu ña ndacá ñaha ca tsi tsi nyivi yihí cuenda ra Cristo

¹ Yañi, nyooho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi. ²⁻³ Tumaa iin ñaha tsa iyó yii, catyí ley tyin coo ña tsihin yii ña nda cuanda cúu ra. Maa tyin juvin ñi catyí tucu ley tun cúu yii ña tan nandoo ndaahvi ña, ña cua quihí ndaha ca ley can tsi ña. Tan cuvi tindaha ña tsihin inga rayii tan ña cua coo cuatyí ña. Maa tyin tsitsi tsa ndi iyó yii ña, ña cuvi coo ña tsihin inga rayii, tyin tun cua javaha ña tacan, cua coo cuatyí ña nuu Nyoo.

⁴ Tan tacan tucu nyooho yañi. Tsanaha ley Nyoo tsa tyaá ra Moisés yihí ndaha tsi tsi ndo tumaa yihí ndaha iin rayii tsi ñasihi ra. Maa tyin vityin tsa yaha tsihi ndo tan ña ndacá ñaha ca ley can tsi ndo. Tyin vityin ndacá ñaha inga rayii tsi ndo tan juvin ra cuví ra Cristo, ra tsa nandotó jahá Nyoo. Tyehen cuví tsehe tyin tacan tan cuatyíñu Nyoo tsi yo. ⁵ Tahān tsanaha tsicoo yo cuhva cuñí cuñu ñuhu yo tan ley tsahnu tsa tyaá ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsaha cuñí ca yo javaha yo tsa caquiñi tsa cuñí cuñu ñuhu yo. Tan yacan tsaha tuhun tsihi tsi yo. ⁶ Maa tyin vityin ña ndacá

ñaha ca ley tsahnu can tsi yo, tyin tsa yaha tsihi cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí li Nyoo tsi yo, na jaha tyiñu yo tyiñu Nyoo tan ña javaha ca yo tumaa javaha yo quivi yihí ndaha ley tsahnu tsi yo.

Ley Nyoo janahá tyin iyó cuatyí yo

⁷ ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsaha Nyoo ley can, ña cua coto yu náa cuví cuatyí. Tan ndi ña cua coto yu tyin ña vaha nyiyo iñi yu tsa tsii inga nyivi, tun tsatyin ña catyí ley can tyin ña vaha nyiyo iñi yo. ⁸ Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsitó yu ley Nyoo, quivi can quitsaha tsicá iñi yu javahá yu tsa ña vaha. Nu nduve ley iyó, ña tsitó nyivi náa cuví tsa ña vaha. ⁹ Quivi tsa ña tsitó yu náa cuñí tsi catyí ley Nyoo tsa tyaá ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu tyin nuu Nyoo tsa tsihi yu jahá cuatyí yu. ¹⁰ Catyí ley can tyin tatun tyaá yahvi nyivi itsi, cua coo cuñi ñi ñayivi nyito. Maa tyin yuhu tsihi yu nuu Nyoo jahá ley can tyin ña tyaá yahvi yu itsi. Tyin catyí tsi tyin nyivi tsa ña tyaá yahvi itsi, taahán tsi cunaa ñi nuu Nyoo. ¹¹ Cuatyí yu

tsatyĩñu can ley can, tan jan-davĩ ñaha can tsi yu, tyin catyĩ ley tyin tatun ña tyaa yahvi yo itsi, taahán tsi cunaa yo nuu Nyoo.

¹² Ley can ii xaan tsi tyin tuhun tsaha maa Nyoo cuvĩ tsi, tan tandihĩ tsa catyĩ ra tyin javaha yo, vaha tsi, tan cuiti xaan tsi. ¹³ Tan ñavin ley vaha ihya jacunaã tsi yu. Tyin tsa ña vaha tsa javaha yu, yacan jacunaã tsi yu. Yacan cuenda cunaã yu nuu Nyoo tyin ley vaha can janaha tsi yu tyin cuatyĩ cuvĩ tsa javaha yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuvĩ cuatyĩ javahá yo.

Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

¹⁴ Tan tsitó yo tyin maa Tatyĩ Ii Nyoo tsaha ley can, yacan cuenda vaha tsi. Maa tyin yuhu iyó cuatyĩ yu tyin ra ñayivĩ cuvĩ yu. Javahá yu tsa caquiñi tyin maa cuatyĩ can ndacá ñaha tsi yu. ¹⁵ Ña cutuñĩ iñi yu náa taahán yu, tyin tsa vaha tsa cuñĩ yu javaha yu, ña javahá yu can. Maa tyin javahá yu tsa ña vaha tsa ña cuñĩ yu javaha yu. ¹⁶ Tan tsa javahá yu tsa ña cuñĩ yu javaha yu, tsihin yacan nacotó yu tyin ley Nyoo vaha tsi. ¹⁷ Yacan cuñĩ tsi catyĩ tyin ñavin maa yu javahá tsa ña vaha, tyin cuatyĩ tsa iyó tsi yu, yacan javahá tsa ña vaha. ¹⁸ Yuhu

tsitó yu tyin cuñu ñuhu yu nduve tsa vaha iyó. Vasu ndi maa cuñĩ yu javaha yu tsa vaha, ña cuvĩ javaha yu can. ¹⁹ Ña javahá yu tsa vaha tsa cuñĩ yu javaha yu, jañihĩ ca yu javaha yu tsa ña vaha tsa ña cuñĩ yu javaha yu. ²⁰ Tan tatun javahá yu tsa ña cuñĩ yu javaha yu, ñavin ca maa yu javahá can, tyin cuatyĩ tsa yihĩ ndaha tsi yu, yacan javahá can.

²¹ Nacotó yu tsa taahán yu: tun cuñĩ yu javaha yu tsa vaha, yatyĩ xaan ca javahá yu tsa ña vaha. ²² Tsitsi añima yu taahán xaan iñi yu ley Nyoo. ²³ Maa tyin iyó inga ley tan yacan yihĩ ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yihĩ ndaha can tsi yu tumaa yihĩ ndaha ra vitya tsi iin ra nyiĩ vehe caa. ²⁴ ¡Ndahvi yuhu ra ndaahvi! ¿Yóo cua jacacu tsi yu ndaha tsa ña vahá tsa cuñĩ cuñu ñuhu yu tan ña cuhun yu anyaya? ²⁵ Tsahá yu tyahvi nyoo tsi Nyoo tsa cuenda ra Jesucristo tyin in-tuhun ñi maa ra cuvĩ jacacu tsi yu. Vityin cutuñĩ iñi yu tyin cuñĩ tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihĩ tsa ña vaha tsa cuñĩ cuñu ñuhu yu javaha yu, yacan cua quihi ndaha tsi yu.

8

Tatyĩ Ii Nyoo jatyinyee tsi tsi yo tan cuvĩ coo yo ñayivĩ

tsaa

¹ Maa tyin vityin, Nyoo ña tatsi tuñi ca ra tsi nyivi tsa iin ñi cuví tshin ra Cristo Jesús, ñi tsa ña iyó ca cuhva cuñí cuñu ñuhu ñi tyin iyó ñi cuhva cuñí Tatyí Ii ra. ² Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí Ii Nyoo tsi yo. Tan juvin tsi tsahá ñayivi tsa coo yo tsa cuenda tsa iin ñi cuví yo tshin ra Cristo Jesús. ³ Nyoo javaha ra tsa ña cuvi javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyivi. Yacan cuenda Nyoo jaquitsí ra tsi Sehe ra. Cuví ra tumaa rayi ñuu ñayivi tan tyahví ra tsa cuenda cuatyí yo tyin tacan tan cundihí tsa javahá yo cuhva cuñí cuñu ñuhu yo. ⁴ Javaha ra tyehen tyin tacan tan cuví javaha yo cuhva catyí ley tan ñavin cuhva cuñí cuñu ñuhu yo tyin vityin iyó yo cuhva cuñí Tatyí Ii Nyoo.

⁵ Nyivi tsa iyó cuhva cuñí cuñu ñuhu, maa ñi cuhva cuñí cuñu ñuhu ñi tsicá iñi ñi, maa tyin nyivi tsa iyó cuhva cuñí Tatyí Ii Nyoo tsicá iñi ñi cuhva cuñí Tatyí Ii Nyoo. ⁶ Nyivi tsa tsicá iñi maa ñi maa tsa cuñí cuñu ñuhu ñi, cua cunaa ñi. Maa tyin yoo tsa tsicá iñi cuhva cuñí Tatyí Ii ra, cua coo yo ñayivi tsa, tan cua coo tsa taxin añaima yo. ⁷ Nyivi tsa tsicá iñi cuhva cuñí cuñu ñuhu ñi, ñi xaan iñi tsi Nyoo cuví ñi can, tyin ña cuñí ñi javahá ñi cuhva catyí ley

ra tan ndi ña cuví javaha ñi can. ⁸ Yacan cuenda nyivi tsa nducú tsa cuñí cuñu ñuhu ñi, ña cuví javaha ñi cuhva taahán iñi Nyoo.

⁹ Maa tyin nyooho ña iyó ca ndo cuhva cuñí cuñu ñuhu ndo, tyin iin ñi cuví ndo tshin Tatyí Ii Nyoo, tun nditsa tsa iyó Tatyí Ii Nyoo añaima ndo. Nyivi tsa nduve Tatyí Ii ra Cristo iyó añaima, ñavin nyivi cuenda ra Cristo cuví ñi. ¹⁰ Maa tyin tun iyó ra Cristo añaima ndo, nyitó añaima ndo tyin janduvaha Nyoo tsi ndo nuu ra. Maa tyin cuñu ñuhu ndo tumaa tsa tsihi tsi jaha cuatyí. ¹¹ Nyoo janandoto ra tsi ra Jesús tsa yaha tsihi ra. Tan tacan tucu nyooho, tatun iyó Tatyí Ii ra añaima ndo, cua janandoto ra cuñu ñuhu ndo tshin Tatyí Ii ra tsa iyó añaima ndo.

¹² Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñí cuñu ñuhu yo. ¹³ Tyin tatun maa ñi maa cuhva cuñí cuñu ñuhu ndo iyó ndo, cua cunaa ndo nuu Nyoo. Maa tyin tatun tshin Tatyí Ii Nyoo tan cuahán jandihí ndo tsa javahá ndo tsa caquiñi tsa cuñí cuñu ñuhu ndo, cua coo nyito ndo.

¹⁴ Tyin tandihí yoo tsa javahá cuhva jaquihín ityi Tatyí Ii Nyoo, sehe Nyoo cuví tsi yo. ¹⁵ Nyooho ña naquihín cuenda ndo Tatyí Ii Nyoo tsa cundaca ñaha tsi ndo tan cuvi ndo tumaa musu. Tyin naquihín ndo Tatyí Ii Nyoo tsa tsahá tsa cuvi

ndo sehe Nyoo. Tan juvin ñi Tatyí li Nyoo tsahá tsa cahan yo tyehen tsihin Nyoo: “Tyatya”. Yacan cuenda ña taahán tsi nayuhvi ndo. ¹⁶ Tan Tatyí li ra tsa naquihín yo ndu iin tsi tsihin tsa nyíto yo tan jacotó tsi naha tsi tsi yo tyin cuví yo sehe Nyoo. ¹⁷ Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quívi cua tahan tsi, Nyoo cua jacahnu ra tsi yo iin caa ñi tsihin ra Cristo.

¹⁸ Tsitó yu tyin tundoho tsa nyehé yo vityin, luhlu cuii ñi cuví tsi tan ña cuví jandu inducu yo itsi tsihin tsa sii caá tsa cua nyehe yo quívi tahan tsi. ¹⁹ Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñí tsi naha tsi nyehe tsi naha tsi tsi nyívi cuví sehe ra. ²⁰ Tandihí tsa javahá ra, tsa iyó nu ñuhu ñayívi tan andívi, tsa tiví tsi. Vasu ña cuñí tsi tiví tsi, maa tyin Nyoo tsahá ra tsa tiví tsi tsa cuenda c- atyí tsa javahá nyívi. Maa tyin catyí ra tyin coo quívi cua ndutsaa nyico tsi. ²¹ Tandihí tsa javahá Nyoo tan cua ndut- saa tsi inga tsaha, cua quita nuña tsi tan ña cua tiví ca tsi, tyin cua nasama Nyoo cuhva caá tsi vityin. Tan sii xaan cua cuñí tsi iin caa ñi tsi- hin tandihí sehe Nyoo tyin ña cua tiví ca tsi. ²² Tsitó yo tyin tandihí tsa javahá Nyoo

tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña. ²³ Tacan tucu yoó tsa naquihín cuenda Tatyí li tsa tsahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñí yo tsa tahan ñi tsi quívi tsa nasama Nyoo cuhva iyó cuñu ñuhu yo tan nyehe tandihí tsa javahá ra tyin cuví yo sehe ra. ²⁴ Vasu ndi maa ñaha ca ñihí yo tandihí can maa tyin tsitó yo tyin cua ñihí yo can tyin tsinú iñi yo. Tyin juvin ñi tsihin tsa tsinú iñi yo tan cacú yo. Tatun tsa nyehé yo tsa ndatú yo, nduve yahvi nyaá cuatu ca yo can tyin tsa iyó maa can tsi yo. ²⁵ Maa tyin ndita iñi yo tsa cua ñihí yo tsa ña nyehe yo, cuñí tsi tsa cunyeé iñi yo cuatu yo can.

²⁶ Tan juvin ñi tacan jatyinyeé Tatyí li Nyoo tsi yo tun nduve tunyeé iñi iyó tsi yo tan ña tsitó yo nácaa ndacan tahvi yo tsi Nyoo cuhva taahán maa tsi. Tatyí li tsa iyó añima yo tsicán tahvi tsi tsi Nyoo tsa cuenda yo tsihin tuhun tsa ña cutuñí iñi yo. ²⁷ Tsitó maa Nyoo náa iyó añima yo, tan tsitó ra náa tsicán Tatyí li ra, tsa cuenda yoo tsa cuví yo nyívi ra tyin tsicán tsi cuhva cuñí maa ra ndacan yo tsi ra.

Tsa cuenda ra Cristo tan cuví jaha canaa yo síqui tundoho

²⁸ Tsitó yo tyin tandihí tun- doho tsa nyehé nyívi tsa cuñí tsi Nyoo jatyinyeé can tsi ñi, tyin maa Nyoo cuví ra nacatsí

tsi ñi, tumaa cuhva tyaḡ maa ra cuhva. ²⁹ Tyin nda quiví jihna ñi, tan tsa tsitó Nyoo yóo nyiví cua cunyicun tsi ra. Tan tyaḡ ra cuhva tyin cuvi ñi sehe ra tan coo ñi cuhva cuñí ra. Maa tyin ra Jesucristo cuví ra cua cuvi ra tsitsa tsa nuu tandihí ca yañi ra. Tan yañi ra cuví ñi yihí tuhun Nyoo. ³⁰ Tan ñi tsa tyaḡ Nyoo cuhva tyin cuvi ñi sehe ra, cana ra tsi ñi. Tan ñi tsa cana ra, naquihin cuenda ra tsi ñi tumaa tsatyin vaha ñi. Tan ñi tsa naquihin cuenda ra tsaha ra tsa cahnu cuvi ñi tsihin ra.

³¹ Yacan cuenda, ¿náa cua catyi yo? Tatun Nyoo tan nyaá ra tumañi iñi tsihin yo, ¿yóo cuví jaha canaa tsi yo? Yoñi. ³² Nyoo ña catyi ra tsa ña cua cuhva cuenda ra Sehe ra, tyin tsaha cuenda ra tsi ra tyin cúu ra tsa cuenda tandihí yo. Tun tacan tsaha ra Sehe ra tsa cuenda yo, ¿a ña cua cuhva ra tandihí ca tsa tsiñi ñuhu tsi yo? Cuhva ra. ³³ ¿Yóo cuví xico ñaha tsi yo tsa cuví yo nyiví nacatsi Nyoo? Yoñi. Tyin Nyoo tsa naquihin cuenda ra tsi yo tumaa tsatyin vaha yo.

³⁴ ¿Yóo cuví catyi tyin cuhun yo anyaya? Yoñi. Tyin ra Cristo tsa tsihi ra tsa cuenda cuatyí yo, tan nandoto ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo. ³⁵ Nduve náa cuví quihin nyaa tsa cuñí xaan ra Cristo tsi yo. ¿A cuví quihin nyaa tundoho itsi, a tsihi, a tsa caahán nyiví tsi yo tsa cuenda tuhun Nyoo, a

tama, a tun nduve jahma yo, a tsa yuuhví, a tuhun tsihi? Ndi intuhun tsehe tan ña cuvi quihin nyaa can tsa cuñí ra Cristo tsi yo. ³⁶ Tumaa catyi nu tutu Nyoo tyehen:

Jutu Mañi yu, tandihí ñi quiví tan cuñí nyiví cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyi tsi.

³⁷ Vasu ndi maa cuaha tundoho yahá yo, maa tyin tandihí ñi tsaha tsa nyehé yo tundoho tan jahá canaa yo, tyin ra tsa cuñí xaan tsi yo jatyinyeé tsi yo. ³⁸ Yacan cuenda tsitó vaha yo tyin nduve maa náa cuví quihin nyaa tsa cuñí xaan Nyoo tsi yo. Ndi tuhun tsihi, ndi ñayiví iyó yo, ndi ángel, ndi tatyí ña vaha, ndi tsa cuví vityin, ndi tsa cua cuvi ityi nuu ca, ndi intuhun can tan ña cuví jandusin can tsi yo tsihin Nyoo. ³⁹ Ndi tsa iyó nu sucun, ndi tsa iyó nu cunu, ndi inga tsa javaha Nyoo, ña cuví jandusin can tsi yo tsihin Nyoo, ra tsa cuñí xaan tsi yo tsa cuenda ra Cristo Jesús Jutu Mañi yo.

9

Nyoo nacatsi ra tsi nyiví Israel

¹ Yuhu tsinú iñi yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí Ii Nyoo jaquihín ityi tsa tsicá iñi yu. Yacan cuenda tsitó vaha yu tyin tsa nditsa caahán yu tun

catyí yu ² cuiihya xaan cuñí yu tan uhvi xaan cuñí añima yu ³ tsa cuenda nyivi ñuu yu, ñi Israel. Cuñí xaan yu tsi ñi. Tan nda cuanda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuví cacu ñi tsihin can. ⁴ Tata ra Israel cuví ñi. Tan Nyoo naquihin cuenda ra tsi ñi tumaa tsa sehe ra tsi ñi. Tan janaha ra tsa cahnu cuví ra tsi ñi, tyin tsinyaa ra tsihin ñi. Tan ndoo ra tuhun tsihin ñi, tan tsaha ra ley ra tsi ra Moisés na cuhva ra tsi ñi. Tan janaha ra tsi ñi nácaa cuñí ra tsa jacahnu ñi tsi ra. Tan catyí ra tsihin ñi nácaa cua javaha ra tsa vaha tsihin ñi nu cuahán ca tsi. ⁵ Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juvin ra ndacá ñaha tandihi tsa iyó. ¡Na jacahnu yo tsi ra tacan ñi maa! ¡Tan na cuví tsi tacan ñi!

⁶ ¿A catyí yu tyin ña javaha Nyoo tumaa cuhva catyí ra tsihin nyivi Israel tahañ tsanaha? Ñavin. Cuñí tsi coto yo tyin ña tandihi nyivi Israel tan cuví ñi nyivi Israel tsa nditsa. ⁷ Tan tacan tucu ña tandihi tata ra Abraham tan cuví ñi tata ra tsa nditsa. Tyin tsa cahan Nyoo tsihin ra, cahan tsi tuhun intuhun ñi sehe ra. Tyin catyí Nyoo tsihin ra tyehen: “Tsa cuenda ra Isaac sehe un tan cua coo nyivi tata un.” ⁸ Tsehe janaha tsi yo tyin ñavin tsa cuenda tsa cuví ñi nyivi tata ra Israel tan cuví ñi nyivi Nyoo. Tyin nyivi tsa tsinú iñi tsa cahan Nyoo tyin cua javaha ra, ñi

ican cuví sehe ra. Tumaa ra Abraham, tyin ra Abraham tsinú iñi ra tsa cahan Nyoo tsihin ra ⁹ Tan tyehen cahan Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyí Nyoo tsihin ra.

¹⁰ Tan ñavin yacan ñi. Tyin cahan ndihi tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuví tsii tsaahnu yo, ra Isaac. ¹¹⁻¹² Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyí Nyoo tsihin ña Rebeca tyin ra Esaú, sehe nuu ña, cua cuví ra musu ra tsa tsinu uvi. Javaha Nyoo tacan tyin nacatsí ra tsi nyivi tsa cuñí maa ra nacatsi ra, tan ñavin tsa cuenda tsa javahá ñi. ¹³ Tumaa catyí ra nu tutu ra tyehen: “Cuñi ca yu tsi ra Jacob, tan ñavin ca ra Esaú.”

¹⁴ ¿Tun tacan náa cua catyí yo? ¿A catyí yo tyin ña vaha tsa javahá Nyoo? ¡Ña cuví! ¹⁵ Tyin catyí ra tsihin ra Moisés: “Cua cundaahvi iñi yu yóo nyivi cuñí maa yu cundaahvi iñi yu.” ¹⁶ Tacan javahá ra; cundaahví iñi ra tsi nyivi tsa cuñí maa ra cundaahví iñi ra. Tan ña cundaahví iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahvi iñi yóo cuñí maa ra. ¹⁷ Tumaa catyí nu tutu ra, nu caahán ra tyehen tsihin ra rey ñuhu Egipto: “Tsaḥa yu tsa cuví un rey

tyin tacan tan coto un tyin iyó tunyee iñi tsi yu. Tan nacoto tucu tandihí nyívi yóo ra cuví yuhu”, catyí Nyoo. ¹⁸ Tan tsihin tsehe tsitó yo tyin Nyoo cundaahví iñi ra tsi nyívi cuñí maa ra. Tan jandundavá tucu ra añima nyívi cuñí maa ra jandundavá ra añima.

¹⁹ Tan vasiqúi yoocho cua catyí un: “Yoñi cuví javaha tsa cuñí maa ñi javaha ñi tun ña tsaha Nyoo tyin javaha ñi can.” ¿Nacuenda tyin tyaa Nyoo cuatyí siqúi ñi? ²⁰ Maa tyin ña vaha tun tsicá iñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yoocho tan naca-han un nu caahán Nyoo? ¿A cuví catyí iin quisi tsihin ra javahá itsi: “Ña taahán iñi yu cuhva javahá un tsi yu”? Ña cuví. ²¹ Tyin nyívi tsa javahá ndaha tyiñu, iyó ndatu tsi ñi tsa javaha ñi náa cuñí maa ñi tsihin ñuhu quisi can. Tan iin ñi ñuhu quisi can tsatyíñú ñi juvin ñi tsihin can javaha ñi quisi vaha tan quisi peehe.

²² Ña cuví catyí yo tyin ña vaha Nyoo tsa cuenda tsa tsatyíñú ra tsi nyívi tsa cua cuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyívi caquiñi. ²³ Javahá ra tacan tyin tacan tan coto yoo tsa cuví yo nyívi tsa cundaahví iñi ra tyin nda tsanaha tan tsa nacatsj maa ra tsi yo tyin cuhva ra tsa cahnu cuví ra tsi yo. ²⁴ Yacan cuenda nacatsj

ra tsi yo. Tan yihí yo cuví yo nyívi Israel, tan nyívi tsa ñavin ñi Israel cuví. ²⁵ Tumaa catyí Nyoo nu tutu tsa tyaa ra Oseas:

Nyívi tsa ñavin nyívi ñuu yu cuví cua catyí yu tyin nyívi yu cuví ñi.

Ñi tsa ña cuñi yu, cua cuñi yu tsi ñi, catyí Nyoo.

²⁶ Tan nu catyí Nyoo: “Nyoocho ñavin nyívi yu cuví ndo.” Juvin ñi ican cua catyí ra tsihin ñi: “Yuhu cuví Nyoo nyito, tan nyoocho cuví sehe yu.” ²⁷ Maa tyin ra Isaías catyí ra tyehen tsa cuenda nyívi Israel: “Vasu ndi maa cuaha xaan nyívi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu. ²⁸ Tan tsa yatyin cuii cua jandaa Jutu Mañi yo tandihí tsa cahán ra tan cua tatsi tuñi ra tsi tandihí nyívi iyó nu ñuhu ñayívi.” ²⁹ Tumaa catyí tucu ra Isaías tahán tsanaha:

Tun tsatyin Jutu Mañi yo, ra ndacá ñaha tandihí tsa iyó andívi, tan ña jacacú ra tsi juhva yo, tsa naa tandihí yo,

Tumaa naa nyívi ñuu Sodoma tan ñuu Gomorra tahán tsanaha.

Nyívi Israel ña ñihí ñi cuhva nduvaha ñi nuu Nyoo,

³⁰ ¿Náa cua catyí yo? Nyívi tsa ñavin ñi Israel cuví, ña nducú ñi cuhva coo vaha ñi tsihin Nyoo, maa tyin Nyoo naquihín cuenda ra tsi ñi tumaa tsatyin vaha ñi tsa cuenda tsa tsinú iñi ñi tsi ra. ³¹ Tan nyívi Israel tsa nducú

coo vaha tsihin Nyoo tsihin tsa javahá ñi cuhva catyí ley, ña cuví coo vaha ñi tsihin ra. ³² ¿Nacuenda? Tsa cuenda tyin cuñí ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihí tsaha ñi yuu tan nduva ñi cuví can. ³³ Yuu can caahán Nyoo tuhun nu tutu ra tan catyí ra:

Tsaquín nyaa yu iin yuu nda ñuu Sión, tan janduvá tsi tsi nyivi.

Tan yuu can cuví ra Jesu-cristo.

Tan nyivi tsa tsinú iñi tsi ra tsa cuví yuu can, ña cua nduva ñi, catyí Nyoo nu tutu ra.

10

¹ Yañi, tsihin tsa ñi iñi añima yu tan tsicán tahvi yu tsa cuenda nyivi Israel tyin cuñí yu tsa cacu ñi. ² Tsandaa cuví yu tyin cuñí ñi jacahnú ñi tsi Nyoo, maa tyin ña ñihí ñi cuhva javahá ñi can. ³ Tyin ña tsitó ñi tyin juvin ñi maa Nyoo cuví ra janduvahá tsi nyivi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi. ⁴ Tyin ra Cristo tsa quitsi ra tan javahá ra tandihi tsa catyí ley, tyin tacan tan tandihi nyivi tsa cua tsinu iñi tsi ra, naquihin cuenda Nyoo tsi ñi tumaa tsatyin vaha ñi.

⁵ Catyí ra Moisés tyin cuví nduvaha nyivi nuu Nyoo, tatun tyaá yahvi ñi tandihi tsa catyí ley, tyin tyaá ra

tyehen: “Nyivi tsa tyaá yahvi tandihi tsa catyí ley, cua coo ñi ñayivi tsa ña cua naa maa.” ⁶ Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyí tutu ra tyehen: “Ña catyi un: ¿Yóo cundaa andivi? tyin tun cahan un tacan cuñí tsi catyi tyin januu un tsi ra Cristo nda nu ñuhu ñayivi tan jacacu ra tsi yo.” Ña cahan un tacan tyin ra Cristo tsa yahá quitsi ra. ⁷ Tan ndi ña catyi un: “Cuñí tsi tsa nuu iin ra nda nu yucú ndiyi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa yahá nandoto ra. ⁸ Ña catyi un tacan tyin tyehen catyí nu tutu Nyoo: “Tuhun Nyoo yatyin iyó tsi tsihin ndo, iyó tsi yuhu ndo tan tsitsi añima ndo.” Tuhun ihya taahán tsi tsinu iñi ndo tyin juvin ñi tsi jacuahá tucu nyuhu. ⁹ Tatun catyi un tsihin yuhu un tyin ra Jesús cuví Jutu Mañi yo, tan tsinu iñi un tsihin añima un tyin Nyoo janandoto tsi ra tsa yahá tsihi ra, cua cacu un. ¹⁰ Tyin tsihin añima yo cuñí tsi tsinu iñi yo tsi ra Cristo tan cuvi nduvaha yo nuu Nyoo, tan tsihin yuhu yo cuñí tsi catyi yo tyin tsinú iñi yo, tyin tacan tan cacu yo. ¹¹ Tuhun Nyoo catyí tsi tyehen: “Ndi intuhun nyivi tsa tsinú iñi tsi ra tan ña cua tahan ñi ticanuu.” ¹² Tyin Nyoo inducu ñi cuñí ra nyehé ra tsi nyivi Israel tan nyivi inga ñuu. Tyin intuhun ñi maa ra ndacá ñaha tsi tandihi yo. Tan

nasocó ra tsi tandihí nyiví tsa tsicán tahvi tsi ra. ¹³ Tyin tyehen catyí tuhun Nyoo: “Tandihí nyiví tsa tsicán tahvi tsi Jutu Mañi yo cua cacu ñi.” ¹⁴ Maa tyin ¿nácaa cua ndacan tahvi ñi tsi ra tatun ñaha ca tsinu iñi ñi tsi ra? Tan ¿nácaa cua tsinu iñi ñi tsi ra tatun ñaha ca cuñi ñi tuhun ra? Tan ¿nácaa cua cuñi ñi tuhun ra tatun yoñi cahan tuhun ra tsihin ñi? ¹⁵ Tan ¿nácaa cahun nyiví cahan ñi nácaa coo taxin nyiví, tatun yoñi jacuhun tsi ñi? Tumaa catyí nu tutu Nyoo: “Sii xaan cuví nu tsaá ñi caahán tuhun vaha.” ¹⁶ Maa tyin ña tandihí nyiví tan tyaá yahvi ñi tuhun tsa jacacú Nyoo tsi yo. Tumaa catyí ra Isaías: “Jutu Mañi yu, yoñi cuñi tsinu iñi tuhun caahán ndi”, catyí ra. ¹⁷ Yacan cuenda cuñi tsi tsa tyaá soho jihna yo tuhun ra Cristo, tacan tan tsinu iñi yo tsi ra.

¹⁸ Maa tyin tsicá tucu iñi yu: ¿A ña tsiñi nyiví Israel tuhun Nyoo? ¿Tsiñi ñi! Tumaa catyí nu tutu Nyoo:

Jutu Mañi yu, nyiví tsa jacotó tuhun un tsa jacotó ñi tuhun un naní cahnú nu ñuhu ñayiví,

tan ña nacoó ihñi ñi ndi in-tuhun ñuu luhlu, catyí tsi nu tutu Nyoo.

¹⁹ Tan tsicá nyico tucu iñi yu: ¿A ña cutuñi iñi nyiví Israel tyin cua cacu nyiví tsa ñavin ñi Israel cuví? ¿Cutuñi iñi ñi! Tyin tsa jihna ñi ra Moisés tyaá ra tuhun cahan Nyoo tsihin ñi Israel nu tutu tyehen:

Nyooho, ndasi cua cuñi ndo tyin cua cuhva yu tsa vaha tsi nyiví tsa ñavin nyiví ñuu yu cuví.

Tan cua cúu ndo tisihi nyehé ndo tsi ñi, catyí Nyoo.

²⁰ Tan ra Isaías caná iñi ra cahan ra:

“Nyiví tsa ña nanducú tsi Nyoo, nañihí ñi tsi ra.

Tan janahá ra tsi ra tsi ñi tsa ña tsicá tuhun tuhun ra.”

²¹ Tan tyaá tucu ra Isaías tuhun cahan Nyoo tsihin ñi Israel tyehen: “Tandihí ñi quiví caná yu tsi nyiví yu, na nacuhva cuenda ñi tsi ñi tsi yu, maa tyin ña tyaá yahvi ñi. Tan jandavá xaan ñi iñi ñi”, catyí Nyoo.

11

Nyiví Israel tsa ñihí cuhva cacu

¹ ¿A ña cuñi ca Nyoo tsi nyiví Israel? Ñavin tsa ña cuñi ca ra tsi ñi, tyin juvin ñi ra Israel cuví tucu yuhu. Tyin tata ra Abraham tan tata ra Benjamín cuví yu. ² Tahan tsanaha nacatsi Nyoo tsi ñi Israel tyin cuví ñi nyiví ra. Tan vityin ñavin tsa jatsiyó cuíi ra tsi ñi. ¿A ña ñuhú iñi ndo tyin catyí nu tutu Nyoo tyin ra Elías, ra cuví ndusu yuhu Nyoo, catyí ra tyin ña vaha nyiví Israel tan tsicán tahvi ra tsi Nyoo tyehen? ³ “Jutu Mañi yu, nyiví Israel tsahñi ñi tsi ra cuví ndusu yuhu maa un naha ra, tan tsaní ñi nu jacahnú nyiví tsi un. Tan in-tuhun ña maa yu ndoo, tan cuñi ndihí ñi cahní ñi tsi yu”,

catyí ra. ⁴ Maa tyin nacahan Nyoo tan catyí ra tsihin ra Elías: “Ñavin maa ñi maa un ndoo. Tyin utsa mil ca nyivi naquihin vaha yu, ñi tsa ña jacahnú maa tsitoho Baal”, catyí Nyoo tsihin ra. ⁵ Tan juvin ñi tacan vityin, ndoo juhva nyivi jacahnú tsi Nyoo. Tan tsa cuenda tsa vaha Nyoo nacatsi ra tsi ñi tyin jaha ra tucahnu iñi tsi ñi. ⁶ Tan ña jahá ra tucahnu iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnu iñi tsi yo tsa cuenda tsa javahá yo tsa vaha, cuñí tsi catyi tyin ña jacacú ra tsi yo tsihin tsa vaha ra.

⁷ Tan ¿nácaa? Nyivi Israel nducu ñi cuhva nduvaha ñi nuu Nyoo, maa tyin ña ñihí ñi cuhva. Juhva ñi ñihí ñi cuhva. Tan ñi tsa ñihí cuhva can cuví ñi tsa nacatsi maa Nyoo. Tan ñi tsa ña ñihí cuhva cacu, ndundavá añima ñi. ⁸ Tumaa catyí nu tutu Nyoo tyehen: “Nyoo tsaḥa ra tsa ña cutuñi iñi ñi. Tan vasu ndi maa iyó tinuu ñi, ña tsahá ra tsa nyehé ñi. Iyó soho ñi, maa tyin ña cutuñi iñi ñi tsa tsiñí ñi. Tacan iyó ñi nda cuanda vityin.” ⁹ Tan juvin ñi catyi tucu ra David tyehen:

Javahá ñi vico tan cusii iñi ñi, maa tyin yacan cua jativi tsi ñi.

Tan cua tatsi tuñi Nyoo tsi ñi tyin cuví can tumaa iin trampa tsa cuenda ñi.

¹⁰ Tan cua cuaa ñi na ña nyehe ca ñi tsa nditsa.

Tan nacosó tsa vee siqui ñi, catyí ra David tuhun nyivi Israel tsa ña tsinú iñi tsi Nyoo.

Nacaa nduvahá nyivi tsa ñavin ñi Israel cuví nuu Nyoo

¹¹ Tan vityin tsicá tuhun yu: ¿A tsa cuenda tsa ña tyaa yahvi nyivi Israel tsa cahan Nyoo, tan ndoo cuii ñi tsa ña cua cacu ñi? Ñavin tsa ndoo cuii ñi. Ndoó nuu ñi maa ñi, tyin jacacú jihna Nyoo tsi nyivi tsa ñavin ñi Israel cuví. Tyin tacan tan tsa cua nyehe ñi yacan, ndasi cuñi ñi tan natsinu ndihi iñi ñi tsi Nyoo. ¹² Tatun cuaha nyivi tsa ñavin ñi Israel cuví tan natsinu iñi ñi tsi Nyoo tsa cuenda cuatyí tsa javahá ñi Israel, cuaha ca ñi cua natsinu iñi quivi tsa cua cuví nyico tandihi nyivi Israel nyivi Nyoo.

¹³ Cuñí yu cahan yu juhva tsihin nyooḥo tsa ñavin ñi Israel cuví. Ra Jesús tava tyiñu ra tsi yu tsa quitsi yu nu iyó ndo. Tan tsitó yu tyin cuñí tsi tsa javaha yu tyiñu ihya tyin cahnu xaan cuví tsi. Cahnu jahá yu itsi ¹⁴ tan caahán yu tuhun Nyoo tsihin ndo tyin na nyehe nyivi ñuu yu, ñi Israel, nácaa tsinú iñi ndo tsi Nyoo, tyin vasiqui tacan tan natsinu ndihi iñi ñi tan cacu ñi. ¹⁵ Tyin tun tsa cuenda tsa ña natin cuenda Nyoo tsi nyivi Israel tan nduvahá iyó nyivi inga ñuu tsihin Nyoo, quivi cua naquihin cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi. ¹⁶ Iin cuhva tatun

vaha quitá paan tsa javaha yo tsa jihna ñi tsihin yutsan paan, vaha tandihí ca yutsan can. Tan tatun iin yoho yutun tan vaha tun, vaha tandihí ca soco tun. Tacan tucu nyiví Israel nyaá yahvi ñi nuu Nyoo tyin tsií tsaahnu ñi yihí ra naha cuenda ra.

¹⁷ Tan nyiví Israel cuví ñi tumaa soco yutun olivo. Tan nyooho cuví ndo tumaa soco yutun olivo cuuhu. Tumaa tuhvá nyiví tsaahnya iin soco yutun tan natyaa ñi inga soco yutun, tacan javaha Nyoo tyin jatsiyó ra tsi nyiví Israel tan tyaa ra tsi nyooho tsa cuví ndo nyiví inga ñuu. Tacan cuví tan tsaá ndo cuví ndo nyiví cuenda Nyoo tan naquihín ndo tandihí tsa vaha tsa iyó tsi ra. ¹⁸ Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

¹⁹ Vasiquí cua catyí ndo: “Juvín, maa tyin Nyoo tsahnya ra soco yutun can tan natyaa ra tsi nyuhu.”

²⁰ Nditsa. Maa tyin jatsiyó nuu ñi ra tsi nyiví Israel tsa cuenda tsa ña tsinú iñi ñi tsi ra. Tan tyacu ra tsi nyooho tsa cuenda tsa tsinú iñi ndo tsi ra. Yacan jaha ndo cuenda tsa ña nduyaa ndo tsihin can.

²¹ Tyin tatun ña jahá Nyoo tucahnu iñi tsi ñi tsa cuví soco vaha can, ndí nyooho tan ña cua jaha ra tucahnu iñi tatun ña tsinú vaha iñi ndo tsi ra.

²² Nyehe ndo tyin vaha xaan iñi Nyoo, maa tyin xaan tucu ra tsihin nyiví tsa ña naquihín cuenda tumañi iñi tsa tsahá ra tsi ñi. Vaha iñi ra tsihin nyooho yacan tyaa yahvi ndo tsa vaha tsa tsahá ra tsi yo. Tyin tatun ña tyaa yahvi ndo itsi, cua jatsiyó nyico ra tsi ndo tsaha yutun olivo ra.

²³ Tyin tatun natsinu nyico iñi nyiví Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha. ²⁴ Nyooho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihín ra tsi ndo tan tyaa tahan ra tsi ndo tsihin yutun olivo vaha tsa cumí ra. Tacan cua javaha ra quiví cua cuñi ra iin yaha ñi cua tyaa tahan nyico ra soco yutun vaha nu tsinyaa jihna maa tsi.

Nyiví Israel cua cacu nda nu ndihí

²⁵ Yañi, cuñi yu tsa coto ndo iin tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaha xaan nyiví Israel ndundavañi ñi, nda cuanda cacu tandihí nyiví inga ñuu tsa nyaa tyin cacu. ²⁶ Tsa yaha cua cacu ñi, tacan tan cua cacu tandihí nyiví Israel tyin catyí nu tutu Nyoo tyehen:

Ra tsa jacacú tsi nyiví, nda Sión cua quee ra.

Tan cua quihin nyaa ra cuatyí nyiví ra Jacob.

²⁷ Tuhun ihya cuví tsa cua ndoo yu tsihin ñi

quivi cua quihin nyaa yu cuatyí ñi, catyí Nyoo nu tutu ra.

²⁸ Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyooho. Tahān tsanaha nacatsi Nyoo tsi ra Abraham, tan ra Isaac, tan ra Jacob tyin tsinu iñi ra naha tsi ra. Tan cuñi ndihi ra tsi nyivi Israel tyin tata ra naha cuví tsi ñi. ²⁹ Tyin tsa tsa tsaha Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo. ³⁰ Tsanaha nyooho ña tyaá yahvi ndo tsi Nyoo. Maa tyin vityin tyaá yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyaá yahvi nyivi Israel tsi ra. ³¹ Nyivi Israel ña tyaá yahvi ñi tsi Nyoo vityin tumaa tsa ña tyaá yahvi nyooho tsi ra tahān tsanaha. Maa tyin cua cundaahvi iñi ra nyehe ra tsi ñi tumaa tsa cundaahví iñi ra nyehé ra tsi nyooho. ³² Yihí tsaha tandihi nyivi tan nacoó ñi tsa tyaá yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahvi iñi ra tsi tandihi yo.

³³ ¡Cahnu xaan cuví tsa cuca tan tsa tsitó Nyoo tan tsa tsiñi tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iin sava quivi ña cua cutuñi iñi yo tandihi cuhva javahá ra. ³⁴ ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi

ra? Yoñi. ³⁵ Tyin yoñi cuví cuhva jihna iin tsa vaha tsi ra, tan tsa cuenda can tan cuita iñi ñi tyin cua naquihin ñi yahvi cuenda can. ³⁶ Tyin tandihi maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

12

Na javaha yo cuhva cuñi Nyoo tsihin ñayivi iyó yo

¹ Yacan cuenda yañi, tsitó ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahvi yu tsihin ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin nditsa tsa jacahnú yo tsi ra. Yacan cuví tsa taahán iñi ra. ² Na cōo ca ndo cuhva iyó nyivi ñuu ñayivi ihya. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndihi tsa vaha tan tsa cuiti.

³ Nyoo, tsa cuenda tsa vaha iñi ra, tan tavá tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyí yu tsihin tandihi nyooho tyin ndi intuhun ndo tan ña caca iñi ndo tyin vaha xaan ndo. Maa tyin caca iñi ndo nácaa iyó ndo tan náa cuví tsa vaha tsa tsaha Nyoo tsi ndo iin caa ñi tsihin tsa tsinú iñi ndo tsi ra. ⁴ Tumaa soho yo tan tinuu yo

iin ñi cuví tsi tsihin tandihí ca tahan tsi tsa iyó iin cuñu ñuhu. Tan tsa intuhun intuhun tsi siin siin tyiñu javahá tsi. ⁵ Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

⁶ Siin siin ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñí maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusu yuhu ra, na tsinu iñi yo tyin tyiñu can tsahá ra tsi yo, tan na javaha yo itsi. ⁷ Tatun tsahá ra ndatu tsi iin yo tsa jatyinyee yo tsi nyívi, na javaha yo itsi tsihin tsa ñi iñi añima yo. Tatun tsi inga yo tsahá ra tsa jacuahá yo tsi nyívi, na jacuaha yo tsi ñi tsihin tsa ñi iñi yo. ⁸ Tatun tsahá ra tsi inga yo tsa cuví jandu iin yo iñi nyívi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyinyee yo tsi nyívi tsihin xuhun, na jatyinyee yo tsi ñi, maa tyin ña cuita iñi yo tyin natyahví ñi tsi yo. Tatun inga yo ñihí tsa jaquihín ityi yo tsi nyívi yihí cuenda Nyoo tsihin yo, na jaha yo cuenda cuhva jaquihin ityi yo tsi ñi. Tatun inga yo ñihí tsa jatyinyee yo tsi nyívi tsa iyó tsa tsiñí ñuhu, na jatyinyee yo tsi ñi tsihin tsa si cuñí yo.

Náa taahán tsi javaha nyívi yihí cuenda ra Cristo

⁹ Cuñi tahan ndo tsi ndo tsihin tsa ñi iñi añima ndo. Ndasí cuñi ndo nyehé ndo tsa ña vaha. Tan cuanyicun ndo tsa vaha. ¹⁰ Cuñí tsi tsa cuñi tahan yo tsi yo tumaa tsa cuñí yo tsi nyívi yo. Tan tyaa yahví tahan ndo tsi ndo tan jaha tahan ndo tsa ñayívi tsi ndo.

¹¹ Ndücu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi iñi añima ndo.

¹² Coo ndo ñayívi ihya tsihin tsa si, tyin tsitó ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndacan tahvi ndo tsi Nyoo iin nyita ñi.

¹³ Cuhva ndo tsa tsiñí ñuhu tsi nyívi yihí cuenda Nyoo tsihin ndo. Vaha tyanu ndo tsi nyívi tsaá vehe ndo.

¹⁴ Tatun caahán nyívi ndavaha ñi tsi ndo, vaha cahan ndo tsihin ñi, tan ña cahan ndasí ndo tsi ñi. Ndacan tahvi ndo tsi Nyoo tsa cuenda ñi, na nasoco ra tsi ñi.

¹⁵ Si cuñi ndo tsihin nyívi si cuñí. Vacu ndo tsihin nyívi tsa tsacú jahá tucuihaya iñi.

¹⁶ Ña cañi tahan ndo. Iin ñi cuví ndo tsihin tahan ndo. Ña cahnu jaha ndo tsi ndo; jandundaahvi ndo tsi ndo tumaa iyó nyívi ndaahvi; ña jaha ndo tsa tsitó xaan ndo.

¹⁷ Ña javaha ndo tsa ña vaha tsihin nyívi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihí nyívi.

¹⁸ Ndücu ndo cuhva coo

taxin ndo tsihin tandihí nyívi. ¹⁹ Yañi, cuñí yu tsi ndo. Tatun javahá nyívi tsa ña vaha tsihin ndo, ña t̄atsi tuñi ndo tsi ñi; nat̄yaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyívi tan tyahvi tsi ñi”, catyí Jutu Mañi yo. ²⁰ Tan juvin ñi catyí tucu ra: “Tatun nyívi xaan iñi tsi ndo tan t̄sisocó ñi, c̄uhva ndo tsa catsi ñi, tan tatun na ityi iñi ñi, c̄uhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.” ²¹ Ña c̄uhva ndo tsa cundaca ñaha t̄sa ña vaha tsi ndo, maa tyin j̄andu iin ndo iñi añima ndo. J̄avaha ndo tsa vaha tan cas̄i ndo nu vatsí tsa ña vaha tsihin can.

13

¹ Tandihí nyívi cuñí tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumi tyiñu tan Nyoo tsah̄ tyiñu can tsi ra naha. Ra cumi tyiñu tsa iyó, maa Nyoo tsah̄ tsi ra naha tsa cuví ra naha tyiñu. ² Yacan cuenda, nyívi tsa ña tyaá yahvi tsi ra naha, cuñí tsi catyi tyin ña tyaá yahvi ñi tsa caahán Nyoo. Ñi tsa javahá tacan, tsicoō cuatyí ñi tsa cuenda can, tan cua cutuñi ñi. ³ Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyívi tsa javahá tsa vaha. Nyisó tyiñu ra naha tsa tatsi tuñi ra naha tsi nyívi tsa javahá

tsa ña vaha. Tun ña cuñí un tsa jayuhvi ra cumi tyiñu naha ra tsi un, c̄oo vaha, tyin tacan tan cua nyehe ra naha tyin vaha iyó un tan vaha nyívi cuví un. ⁴ Tyin ra cumi tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuvi nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyívi javahá tsa ña vaha, tyin tyiñu can tyaa Nyoo tsi ra naha. ⁵ Yacan cuenda ñiñi cuñí tsi tsa tyaa yahvi ndo tsi ra cumi tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo. ⁶ Tan inga tuhun tsa cuenda can tyahví ndo xuhun tsa tavá ra cumi tyiñu naha ra tsa cuenda tsa jandu-vahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

⁷ C̄uhva ndo tsa taahán tsi tsi intuhun intuhun nyívi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyívi tsa taahán tsi tyaa yahvi ndo. J̄aha ndo tsa ñayívi tsi nyívi tsa taahán tsi jaha ndo tsa ñayívi tsi. ⁸ Ña cunyaa cuenda ndo tsi ndi intuhun nyívi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihí tsa catyí ley Nyoo tsa tyaa ra Moisés tyin javaha yo. ⁹ Catyí ley Nyoo tyehen:

“Tun iyó ñasiihi ndo o yii ndo ña cōo inga ñaha o rayii tsi ndo. Ña cahñi ndo. Ña suhu ndo. Ña cahan ndo cuendu siqui ndi intuhun nyivi. Ña nyiyo iñi ndo tsa tsii inga nyivi.” Tandihii tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo. ¹⁰ Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihii tsa catyí ley Nyoo tsa tyaa ra Moisés.

¹¹ Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahan tsi cuhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra. ¹² Tsa yaha tsa tsacuaa, tan tsa cua tuvi. Yacan cuenda cuñi tsi jandihii ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa tsaha Nyoo tsi ndo; javaha ndo cuhva javahá nyivi iyó nu nditsin. ¹³ Cuñi tsi cuiti coo yo tyin nu nditsin Nyoo iyó yo. Tan ña coho ndo nyixi, ña javaha ndo vico tan coho ndo nyixi. Nyooho rayii, ña caça nuu ndo tsihin ñaha. Tan nyooho ñaha ña caça nuu ndo tsihin rayii. Ña cōo viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi. ¹⁴ Maa tyin cōo ndo tsihin Jutu Mañi yo Jesucristo, tumaa tsinditsí yo jahma tacan na cunditsi yo tsi ra. Tan ña caça iñi ndo javaha ndo

cuhva cuñi cuñu ñuhu ndo.

14

Na ña cahan nyaa yo tsi nyivi

¹ Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña cahan ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi. ² Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihii maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihi vaha nyaá tsihin Nyoo. ³ Maa tyin ñi tsa tsatsí tandihii can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña cahan nyaa ñi tsi inga ñi can. Tyin Nyoo naquihin cuenda ra tsi ñi can. ⁴ Tan ¿yóo nyivi cuví yooho tan cahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduve quivi cahnu cuví tan quivi ña cahnu cuví. Inducu ñi quivi cuñi ñi, yacan cuenda intuhun intuhun maa yo tan cuñi tsi tyihi tuñi vaha iñi

yo. ⁶ Ñi tsa naquihín vaha quiví, naquihín vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihín vaha can, juvin ñi jacahnú tucu ñi tsi Nyoo tyin ña naquihín vaha ñi can. Tan ñi tsa tsatsí tandihí can, juvin ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsahá ra tsa catsi ñi. Tan ñi tsa ña tsatsí tandihí, ña tsatsí ñi tsa cuenda tsa jacahnú ñi tsi Jutu Mañi yo tan juvin ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsihí yo. ⁸ Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsihí yo, tsihí yo tsa cuenda Jutu Mañi yo tan naquihín ra añima yo. Yacan cuenda tsii maa Jutu Mañi yo cuví tsi yo vasu ndi maa nyito yo o tsihí yo. ⁹ Tyin ra Cristo tsihí ra tan nandoto ra tyin cundaca ñaha ra tsi nyiví nyito tan nyiví ña nyito.

¹⁰ Maa tyin yooho, ¿nacuenda nyehé nyaa un tsi ra yañi un? ¿O nacuenda ña naquihín cuenda un tsi ra?, tan tsitó vaha un tyin tandihí yo tan cua tahan tsi quiví cuhva cuenda yo tsi yo nuu ra Cristo tyin tatsi tuñi ra tsi yo. ¹¹ Tumaa tsa catyí Nyoo nu tutu ra tyehen:

Yuhu nditsa tsa nyito yo. Tan tumaa tsa nditsa tsa nyito yo, tacan nditsa

tsa cuñí tsi cuiñi tsiti tandihí nyiví nuu yo.

Tandihí ñi tan cua nacoto ñi tsi yo tsa cuví yo Nyoo.

Tan nuu tandihí nyiví cua jacahnú ñi tsi yo, catyí Nyoo.

¹² Yacan cuenda intuhun intuhun yo tan cua nacuhva cuenda yo tyiñu javahá yo tsi Nyoo.

Ña janacava ndo tsi yañi ndo nu cuatyí

¹³ Yacan cuenda, ña taahán tsi cahan nyaa ca ndo tsi nyiví. Maa tyin nducu ndo cuhva tsa ña janacava ndo tsi ñi nu cuatyí coto jandihí ñi tsa tsinú iñi ñi tsi ra Cristo.

¹⁴ Yuhu tsitó yo tyin cuví catsi yo tandihí tyin tsinú vaha iñi yo tsi Jutu Mañi yo Jesucristo, tan maa ra jacuahá tsi yo. Maa tyin ñi tsa tsicá iñi tyin ña cuví catsi ñi tandihí, tsa cuenda maa ñi ña cuví catsi ñi can. ¹⁵ Maa tyin tatun tsa cuenda tsa tsatsí ndo tan ndasi cuñí yañi yo, ña nditsa tsa cuñí ndo tsi ra. Ña cuhva ndo tsa tiví yañi yo tsihin tsa tsatsí ndo tyin ra Cristo tsihí ra tsa cuenda ra. ¹⁶ Ña cuhva ndo tsa cahan nyiví ndavaha ñi siqui tsa tsahá Nyoo ndatu tyin catsi yo. ¹⁷ Tatun ndacá ñaha Nyoo tsi yo ña ñiñi xaan náa tsatsí yo o náa tsihí yo. Tsa ñiñi ca cuví tsa vaha iyó yo nuu ra, tan tsihin tsa siñ cuñí yo, tan taxin iyó añima yo jahá Tatyí Ii ra. ¹⁸ Nyiví jahá tyiñu tyiñu ra Cristo tacan, siñ cuñí Nyoo nyehé ra tsi ñi, tan tacan tucu nyiví siñ cuñí ñi nyehé ñi tsi ñi.

¹⁹ Yacan cuenda cuñí tsi jañiñi yo tsi yo tan coo vaha yo tsihin nyivi. Tyin tacan tan cuví jatyinyee tahan yo tsi yo na cuahnu ca yo tsihin tuhun Nyoo. ²⁰ Ndi intuhun ndo tan ña jativi ndo tyiñu jahá Nyoo tsitsi aña inga nyivi tsihin tsa tsatsí ndo. Nditisa tyin tandihi tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatun tsihin can janacava yo tsi nyivi nu cuatyí. ²¹ Yacan cuenda, vaha tsa ña catsi yo cuñu, ndi ña coho yo vinu tatun ndasi cuñi yañi yo nyehe ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo. ²² Cuhva tsa tsinú iñi yo tsa cuenda tandihi yacan ña cañan yo tuhun can tsihin inga nyivi. Na coto intuhun ñi maa yo can tsihin Nyoo. Si xaan cuñí yo tatun ña uvi tsicá iñi yo javahá yo tsa tsahá Nyoo ndatu tyin javahá yo. ²³ Maa tyin nyivi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihi tsa javahá yo tsihin tsa ña tsiñú iñi yo tyin tsahá Nyoo ndatu javaha yo can, cuatyí cuví.

15

Na javaha yo tsa taahán iñi nyivi yihí tuhun Nyoo tsihin yo, tan ñavin tsa taahán iñi ñi maa yo

¹ Yoo tsa vaha cuanyicún tsi Nyoo, cuñí tsi tsa jatyinyee

yo tsi nyivi tsa ñaha ca tsinú vaha iñi tsi ra. Jatyinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo. ² Intuhun intuhun yo cuñí tsi tsa javaha yo cuhva taahán iñi inga nyivi tatun cuví tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo. ³ Tyin ndi ra Cristo tan ña javahá ra cuhva taahán iñi maa ra, maa tyin tahan ra tumaa catyí nu tutu Nyoo tyehen: “Tandihí tsa ndavaha ñi tsa cañan nyivi siqui Nyoo, siqui ra Cristo ndoo can”, catyí tsi. ⁴ Tyin tandihí tsa tsinyaa nu tutu Nyoo tahan tsanaha, tsinyaa tsi tsa cuenda tsa cutuhva yo itsi. Tan juvin tsi jatyinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iin tsi iñi yo. ⁵ Tan juvin ñi maa ra tsahá tsa cunyeé iñi yo cuatu yo, tan tsahá ra tsa vaha cuñí aña yo. Na jatyinyee ca ra tsi yo coo vaha yo tan iin ñi cuví yo tumaa taahán iñi ra Cristo Jesús. ⁶ Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

Nyivi tsa ñavin ñi Israel cuví, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacahnu yo tsi Nyoo. ⁸ Tan catyí yu tsihin ndo: ra Cristo quitsi ra quitsi jatyinyee ra tsi nyuhu tsa

cuví nyívi Israel, tyin tacan catyí Nyoo tsihin tsi tsaahnu ndi tyin cua javaha ra. Tan tacan janaha ra Cristo tyin tandihi tsa catyí Nyoo tyin cua javaha ra, javahá ra itsi. ⁹ Quitsí ra Cristo tyin tacan tan jacahnu tucu nyívi tsa ñavin ñi Israel cuví tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehe tandihi nyívi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

¹⁰ Tan inga tucu nu catyí tsi tyehen:

Nyooho tsa ñavin ñi Israel cuví, sii cuñi ndo tsihin ñi Israel, nyívi Nyoo.

¹¹ Tan inga tucu nu catyí tsi tyehen:

Jacahnu ndo tsi Jutu Mañi yo, nyooho nyívi tsa ñavin ñi Israel cuví.

Çata tandihi ndo yaa tan jacahnu ndo tsi ra.

¹² Ra Isaías tyaá tucu ra nu tutu Nyoo tyehen:

Cua cacu iin ra tsa cuvi tata ra Isaí.

Cua quitsi ra cua cundaca ñaha ra tsi nyívi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

¹³ Juvín ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusii iñi ra. Tan na coo taxin añima ndo tsa cuenda tsa tsinú iñi ndo tsi ra,

tyin tacan tan tsihin tunyee iñi Tatyí Ii ra tan cuita vaha iñi ndo tyin cua ñihi ndo tsa cua cuhva ra tsi ndo.

¹⁴ Yañi, tsitó vaha yu tyin nyooho vaha iñi ndo tan cutuñi vaha iñi ndo, tan tsitó vaha ndo cuhva cuhva cuenda tahan ndo tsi ndo.

¹⁵ Maa tyin nu carta ihya ñihi xaan caahán yu siqui juhva tsa tyaá yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahá ra tsa vaha ra tsi yu ¹⁶ tsa jaha tyiñu yu tyiñu ra Jesucristo nu iyó nyívi tsa ñavin ñi Israel cuví. Tan tyiñu tsa javahá yu cuví tsa caahán yu tuhun Nyoo nácaa jacacú ra tsi nyívi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuvi ñi iin ofrenda tsa taahán iñi ra, tyin tsa nduvahá ñi nuu ra jahá Tatyí Ii ra.

¹⁷ Yuhu tsa tsinú iñi yu tsi ra Cristo Jesús, sii cuñi yu jahá tyiñu yu tyiñu Nyoo tyin tsitó yu tyin tyiñu vaha javahá yu. ¹⁸ Yuhu ña caná iñi yu cahan yu tsa ña javahá ra Cristo tsihin yu. Maa tyin tsahá cuenda yu tsi ndo tyin nyívi tsa ñavin ñi Israel cuví, tsinú iñi ñi tsi Nyoo tyin Nyoo tsatyíñu ra tsi yu tan vityin tyaá yahvi ñi tsi ra tsa cuenda tsa tsinú iñi ñi tuhun cahan yu tan nyehe ñi tsa javahá yu ¹⁹ tsihin tunyee iñi seña tan tsa iyo tsa javahá yu jahá Tatyí Ii Nyoo. Tsihin tandihi yacan cunyeé cahan yu tuhun ra Cristo tan nácaa jacacú ra tsi yo tsihin nyívi.

Quitsahā yu nda Jerusalén tan inga ca ñuu nda cuanda tsā yu ñuu tsa cayucú Ilírico. ²⁰ Tacan nducú yu cuhva caahán yu tsa jacacú ra Cristo tsi yo nu ñaha ca coto nyivī tuhun ra, tyin ña cuñī yu jaha tyiñu yu nu tsa yaha cahan inga ra tuhun ra Cristo. ²¹ Tumaa catyí nu tutu Nyoo tyehen:

Nu nduve maa tuhun Nyoo iyó, cua tsa tuhun Nyoo tan cua cutuñī iñi nyivī iyó can itsi, catyí tsi.

Nu tyaá ra Pablo cuhva tyin cuhun ra ñuu Roma

²² Yacan cuenda ña cuvī quitsī yu quitsī nyehē yu nu yucú ndo, vasu ndi maa cuaha xaan tsaha cuñī yu quitsī yu. ²³ Maa tyin vityin tsa ndih̄ī jah̄ tyiñu yu ityī ñuu ihya. Tan tsa cuaha xaan cuiya cuñī yu quitsī yu nu yucú ndo tan ndoo yu juhva quivī tsihin ndo.

²⁴ Nyehe jihna yo tatun cuvī yaha yu nu yucú ndo quivī cua cuhun yu España. Tsa yaha tsa cunyī yu juhva quivī tsihin ndo, nyehe yo tatun cuvī jatyinyee ndo tsi yu tan tsa yu nu cuhun yu.

²⁵ Maa tyin vityin cuahán yu ñuu Jerusalén tan nyisó yu ofrenda tsa cuenda nyivī yih̄ī cuenda ra Cristo tsa iyó ndacan. ²⁶ Tyin nyivī tsicá vehe ñuhu tsa iyó ityī Macedonia tan ityī Acaya natuhun tahan ñi tan tavā ñi juhva xuhun jacuhun ñi tsi nyivī ndaahvī tsa iyó

Jerusalén, ñi yih̄ī cuenda ra Cristo. ²⁷ Tyehen cuñī ñi javahā ñi. Tan nditsa tyin taahán tsi javaha ñi tacan. Tyin nyivī Israel, ñi tsinú iñi tsi ra Cristo, tsā ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatyinyee ñi tsi ñi Israel tsihin tsa iyó tsi ñi. ²⁸ Yacan cuenda, tatun tsa yaha jandaa yu tyiñu ihya, tan tsa yaha nacuhva cuenda yu xuhun ihya tsi nyivī Jerusalén, tacan tan cuhun yu nda España tan cua yaha yu nu yucú ndo. ²⁹ Tsitó vaha yu tyin quivī cua quitsī yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

³⁰ Yañi, Tatyí Ii Nyoo tsā tsa cuñī ndo tsi yu tan tsi ra Jesucristo, yacan cuenda caahán ndaahvī yu tsihin ndo ndacan tahvī ndo tsi Nyoo tsa cuenda yu tan tsa cuenda tyiñu jahá yu. ³¹ Ndacan tahvī ndo tsa cuenda yu, na jacacu Nyoo tsi yu ndaha nyivī Judea tsa ña tsinú iñi tsi ra Cristo. Tan ndacan tahvī ndo tsa cuenda nyivī yih̄ī cuenda ra Cristo ñuu Jerusalén, na tñin cuenda vaha ñi ofrenda tsa ndahá yu. ³² Tan ndacan tahvī ndo na cuvī cuhva cuñī Nyoo tan cuvī quitsī yu quitsī nyehē yu nu yucú ndo tsihin tsa sīī cuñī yu tan cuvī quitatú vaha yu. ³³ Tan Nyoo, ra tsāhá tsa taxin coo añima yo, na cunyaa ra tsihin tandih̄ī ndo. Tan na cuvī tsi tacan.

Nu tsahq̄ ra Pablo nacumi tsi nyiv̄i vaha iñi tsi ra

1 Jacotó yu tsi ndo tyin ña hermana Febe jatyinyeé xaan ña tsi nyiv̄i yih̄i cuenda Nyoo ñuu Cencrea. 2 Naquihin vaha ndo tsi ña tumaa naquih̄in Jutu Mañi yo tsi yo, tumaa taahán tsi javaha ñi yih̄i cuenda Nyoo. Jatyinyee ndo tsi ña tsihin tandih̄i tsa tsiñi ñuhu tsi ña, tyin maa ña cuaha xaan nyiv̄i jatyinyeé ña, tan nda cuanda maa yu.

3 Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús. 4 Tsahnyā iñi ñi ñayiv̄i ñi quiv̄i jacacu ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandih̄i tucu nyiv̄i tsa ñavin ñi Israel cuv̄i, ñi tsa yih̄i cuenda Nyoo, tsahá ñi tyahvi nyoo tsi ñi. 5 Cuhva tucu ndo nacumi tsi ñi yih̄i cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juv̄in ra cuv̄i ra tsa tsin̄u jihna iñi tsi ra Cristo ityi Acaya. 6 Cuhva ndo nacumi tsi ña María. Jahá tyiñu xaan ña nu yucú ndo. 7 Cuhva ndo nacumi tsi nyiv̄i ñuu yu, ra Andrónico tan ra Junias, ra yañi yu tsa tsiyucu tsihin yu vehe caa. Cahnu tyiñu jahá tyiñú ra naha cuenda Jutu Mañi yo tsihin tandih̄i ca ra jahá tyiñu cuenda Nyoo. Tan jihna ca ra naha natsin̄u iñi tsi ra Cristo tan ñavin ca yuhu.

8 Cuhva ndo nacumi tsi ra Amplias ra vaha iñi tsi yu cuenda Jutu Mañi yo. 9 Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu. 10 Cuhva ndo nacumi tsi ra Apeles. Nyehé yo tyin nditsa tsa tsinú iñi ra tsi ra Cristo. Tan tsahá tucu yu nacumi tsi nyiv̄i ra Aristóbulo. 11 Cuhva ndo nacumi tsi ra Herodión ñuu yu tan tsi nyiv̄i ra Narciso, ñi tsa tsinú iñi tsi Jutu Mañi yo. 12 Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo. 13 Cuhva ndo nacumi tsi ra Rufo, iin ra cahnu cuv̄i nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuv̄i tumaa sihi yu. 14 Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha. 15 Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpás tan tsi tandih̄i ñi yih̄i cuenda Nyoo tsa yucú tsihin ñi.

16 Cuhva tahan ndo nacumi tsi ndo. Tandih̄i nyiv̄i yih̄i cuenda ra Cristo tsa iyó ityi ihya jaquitsi ñi nacumi tsi ndo.

17 Yañi, caahán ndaahvi yu tsihin ndo, jahá ndo cuenda tsi ndo tsihin ñi cuñi jas̄in tsi ndo, tan nducú ñi cuhva

tša nduva ndo tsihin tuhun Nyoo, tyin ñavin tacan cu-tuhva ndo tuhun ra Cristo. Ña cutahan ndo tsihin ñi can. ¹⁸ Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñi maa ñi javahá ñi. Tan jandahví ñaha ñi añima nyivi ndaahvi tsihin tša vita caahán ñi. ¹⁹ Tandihí nyivi tsitó ñi tyin tyaá yahvi ndo tsi Nyoo. Yacan cuenda si xaan cuñi yu tsihin ndo, tan cuñi yu tša yatyi javaha ndo tša vaha. Maa tyin ña yatyi javaha ndo tša ña vaha. ²⁰ Nyoo ra iyó tandihí tša taxin añima, na cuhva ra tša jaha canaa ndo tsi nu ña vaha tša yatyi, tan na cuhva ra tša cuañi ndo siqui nu. Na nasoco Jutu Mañi yo Jesucristo tsi ndo.

²¹ Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihí ra ñuu yu can jaquitsí ra naha nacumi tsi ndo.

²² Yuhu ra Tercio javahá yu tutu ihya tša cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

²³ Jaquitsí tucu ra Gayo nacumi tsi ndo. Vehe ra iyó yu. Juvin ñi ihya ndú iin tandihí ñi yihí cuenda Nyoo. Ra Erasto ra cuví tesorero ñuu ihya, jaquitsí ra nacumi tsi ndo, tan yañi yo ra Cuarto tucu.

²⁴ Na ndoo Jutu Mañi yo Jesucristo tsihin tandihí ndo.

Tan na cuví tsi tacan ñi.

Nu ndihí caahán ra Pablo tan jacahnú ra tsi Nyoo

²⁵ Tan vityin na jacahnu yo tsi Nyoo, tyin maa ra cuví ra cua cuhva tša ndu iin iñi añima ndo, tyin tacan tan ña jandihí ndo tša tsinú iñi ndo tuhun ra tša jacacú tsi yo. Tsehe cuví tuhun caahán yu tan tuhun tša jacuahá yu tša cuenda ra Jesucristo. Iin ñi cuví tsi tsihin tuhun tša ñuhu xeehe tañan tsanaha nda ndi cumañi ca tsinu ñuhu ñayivi. ²⁶ Maa tyin vityin jacuahá Nyoo tsi yo tša cuenda tutu tša nacoq ra cuví ndusu yuhu ra, ra tsaha cuenda tuhun ra tañan tsanaha. Catyí Nyoo, ra tša ña cua cundihí maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaá yahvi ñi tša caahán ra. ²⁷ Intuhun ñi maa Nyoo iyó, tan iyó xaan tša tsiñi tuñi tsi ra. Tan na ña jandihí yo tša jacahnú yo tsi ra tša cuenda ra Jesucristo.

Tan na cuví tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta tsa cuenda nyivi yihí cuenda Nyoo ñuu Corinto

¹ Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo, ² jaquitsí ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduvi ndo nyivi vaha cuenda ra, tsihin tandihi nyivi tsa jacahnú tsi Jutu Mañi yo Jesucristo tandihi ñi ityi. Tyin cuví ra Nyoo cuenda ñi tan cuenda tucu maa yo. ³ Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo aña ndo.

Nacaa nasocó Nyoo tsi nyivi yihí cuenda ra

⁴ Tandihi ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús. ⁵ Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihi tucu ra tsa coto xaan

ndo. ⁶ Tan tandihi tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo cuhva iyó ndo. ⁷ Tan yacan cuenda nduve tsa cumañi tsi ndo tyin iyó tandihi tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo. ⁸ Nyoo cua jaha cuenda ra tsi ndo nda cuanda naa ñuhu ñayivi tyin tacan tan yoñi cuví tyaá cuatyí tsi ndo quivi cua quitsi Jutu Mañi yo Jesucristo. ⁹ Nyoo tacan ñi maa javahá ra cuhva catyí ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

Nyivi yihí cuenda Jutu Mañi yo, ña vaha quita siin ñi

¹⁰ Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusin ndo. Tan iin ñi cuhva caca iñi ndo, tan iin ñi tuhun quihí iñi ndo. ¹¹ Caahán yu tacan tsihin ndo, yañi, tyin catyí nyivi ra Cloé tsihin yu tyin iyó tsihi nu yucú ndo. ¹² Tyin nyooho siin siin cuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu.” ¹³ ¿A cuñi ra Cristo tsa quita siin yo? ¿A maa yu tsihi nu cruu tsa cuenda ndo? ¿A tsicoondutyá ndo tsihin sivi yu? Ñavin. ¹⁴ Tyahví nyoo tsi Nyoo tyin ra Crispo

tan ra Gayo ñi jacoondutyā yu tan ña jacoondutyā yu tsi ndi intuhun ca nyooho, ¹⁵ yacan ña cuvi cahan ndo tyin tsicoondutyā ndo tsihin sivi yu. ¹⁶ Aan, jacoondutyā tucu yu tsi nyivi ra Estéfnas, maa tyin ña nducuhún iñi yu tun jacoondutyā yu tsi inga ndo. ¹⁷ Tyin ra Cristo ña tava tyiñu ra tsi yu tsa jacoondutyā yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya caahán yu, tyin coto catyi nyivi tyin nduve yahvi nyaá tsa tsihi ra Cristo cuenda cuatyí yo.

Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi

¹⁸ Nyivi tsa cua cuhun anyaya tsiñi ñi tuhun tsa tsihi ra Cristo nu cruu, tan ña tsinú iñi ñi tsi ra, yacan cuenda cuñi maa ñi tyin nduve yahvi nyaá tsa tsihi ra. Tan tsa cuenda yoo tsa cua cacu, tunyee iñi Nyoo cuví tsa tsihi ra. ¹⁹ Tyin tacan catyi maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyi Nyoo.

²⁰ Nduve yahvi nyaá ra tsa tsitó xaan, tan ra maestro, tan ra caahán náa ndihi tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduví can jahā Nyoo. ²¹ Nyoo tsihin tsa tsiñi tuñi tsa iyó tsi ra tyaa

ra cuhva tyin ña cuvi nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaa tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñi ñi tyin nduve yahvi nyaá tsi.

²² Nyivi Israel cuñi ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi. ²³ Maa tyin nyuhu jacotó ndi tuhun ra Cristo, ra tsa tsihi nu cruu. Tan tsa tsiñi nyivi Israel tuhun ra ndasi xaan cuñi ñi. Tan ñi tsa ñavin ñi Israel cuví, cuñi ñi tyin nduve yahvi nyaá tsi. ²⁴ Maa tyin tsa cuenda nyivi tsa nacatsi Nyoo, cuví ñi nyivi Israel, a nyivi Grecia, ñi ican cutuñi iñi tyin ra Cristo iyó tandihi tunyee iñi Nyoo tsi ra, tan tsahá ra tsa cutuñi iñi ñi tsa tsiñi tuñi Nyoo. ²⁵ Vasu ndi maa inga nyivi cuñi tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñi tucu ñi tyin ña ñihi tunyee iñi Nyoo. Maa tyin ñihi ca tsi tan ñavin ca tunyee iñi tsa iyó nu ñuhu ñayivi ihya. ²⁶ Yañi, cuñi tsi tsa cutuñi iñi ndo tyin Nyoo nacatsi ra tsi ndo vasu ndi maa ña cuaha ndo cuví nyivi tsitó, tan nyivi cahnu cuví o nyivi ndacá ñaha nu ñuhu ñayivi ihya. ²⁷ Nacatsi ra tsi nyivi tsa catyi nyivi tyin soho xaan ñi, tyin cuhva ra ticanuu tsi nyivi tsitó xaan. Tan nacatsi ra tsi nyivi nduve

tunyee iñi iyó tsi tyin cuhva ra ticanuu tsi nyivi cuñi tyin iyó xaan tunyee iñi tsi ñi. ²⁸ Tan nacatsí ra tsi nyivi ndaahvi tsa cuñi nyivi tyin ña tsiñi ñuhu ñi, tan nyivi tsa ña cuñi nyivi nyehe ñi, tan janduluhú ra tsi nyivi jahá tyin cahnu cuví ñi. ²⁹ Javahá ra tacan tyin tacan tan yoñi cuvi nduyaa nuu ra. ³⁰ Tan juvin ñi maa ra jandu iin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jatá ra tsi yo tsihin niñi ra, quihin nyaara tsi yo ndaha nu ña vaha tan cacú yo tan nduvahá yo jahá ra tan jacu ií ra tsi yo. ³¹ Yacan cuenda na javaha yo cuhva catyí tuhun Nyoo nu catyí tsi tyehen: “Ña cuví nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

2

Tuhun ra Cristo, ra tsihi nu cruu

¹ Maa tyin yañi, quivi tsa quitsi yu cahan yu tuhun Nyoo tsihin ndo, ña cahan yu tuhun tsa tsiñi tuñi tsa iyó nu ñuhu ñayivi ihya tumaa caahán ra tsitó xaan naha ra. ² Tyin maa ñi maa tuhun ra Jesucristo, nácaa tsihi ra nu cruu tsa cuenda cuatyí yo tyaa iñi yu tan cahan yu tsihin ndo. ³ Tan tsa tsaa yu nu yucú ndo ñihi níhi yu jahá tsa yuuhví yu. ⁴ Tan tsa cahan yu tsihin ndo, ña cahan yu tsihin tuhun si caa

tumaa caahán ra tsitó xaan naha ra. Maa tyin tsihin tunyee iñi Tatyí Ii Nyoo cahan yu tsihin ndo. ⁵ Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

Juvin ñi maa Tatyí Ii Nyoo tsahá tsa nacoto yo tsi Nyoo

⁶ Maa tyin nditsa caahán ndi tuhun tsa tsiñi tuñi tsihin nyivi tsa ñihi nyaá tsihin tuhun Nyoo. Maa tyin ñavin tsa tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahán ndi tsa tsiñi tuñi Nyoo ⁷ tsa tsicumí xeehe ra tsa ndi cumañi ca javaha ra ñuhu ñayivi ihya. Tyaa ra cuhva tsa jacacu ra tsi yo tan cunyecu cuí yo tsihin ra nda gloria. ⁸ Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaa ra naha tsi Jutu Mañi yo, ra ndacá ñaha gloria, nu cruu. ⁹ Maa tyin cuví tsi tumaa catyí maa tuhun Nyoo: Yoñi nyehe tan yoñi tsiñi tan tsicá iñi tuhun vaha tsa javahá Nyoo tsa cuenda nyivi cuñi tsi ra, catyí tsi.

¹⁰ Maa tyin Nyoo tsahá ra Tatyí Ii ra tsi yo tan jacotó Tatyí Ii ra tuhun ihya tsi yo, tan juvin ra jacotó tandihi ca tuhun xeehe tsa tsicá iñi Nyoo tsi yo.

¹¹ Intuhun intuhun yo tsitó yo nácaa tsicá iñi yo, maa tyin

inga nyiví ña tsitó ñi tsa tsicá iñi yo. Tan tacan tucu in-tuhun ñi Tatyí Ii Nyoo tsitó ra tsa tsicá iñi maa Nyoo. ¹² Yoo ñavin tsa tsiñi tuñi tsa iyó nu ñuhu ñayiví naquihín yo, tyin naquihín yo Tatyí Ii Nyoo, tan juvin ra jacotó tandihí tsa ñihí yo jahá Nyoo. ¹³ Tan tsa caahán ndi tsihin ndo ihya, tuhun tsa jacuahá maa Tatyí Ii Nyoo tsi ndi cuví. Ñavin tsa cutuhva maa ndi tsihin tsa tsiñi tuñi jiñi ndi. Nacatyí tuhun ndi tsa jacuahá Tatyí Ii Nyoo tsi ndi tsi nyiví tsa yihí Tatyí Ii Nyoo.

¹⁴ Maa tyin nyiví tsa nduve Tatyí Ii Nyoo iyó tsihin, ña naquihin vaha ñi tan ndi ña cutuñí iñi ñi tsa jacuahá Tatyí Ii Nyoo tsi ñi. Tan cuñí maa ñi tyin nduve yahvi nyaá tsi, tyin nduve Tatyí Ii Nyoo iyó tsihin ñi. ¹⁵ Maa tyin nyiví yihí Tatyí Ii Nyoo cuví cutuñi iñi ñi. Tan tsitó ñi tatun vaha a ña vaha náa iin tuhun. Maa tyin ña cuví catyi inga nyiví tatun vaha a ña vaha tsa iyó añima ñi. ¹⁶ Tyin tuhun Nyoo catyí tsi: “Yoñi tsitó tsa tsicá iñi Jutu Mañi yo Nyoo. Yoñi cuví jacuahá tsi ra”, catyí tuhun Nyoo. Maa tyin yoó tsitó yo tsa tsicá iñi ra tyin iyó tsa tsiñi tuñi ra Cristo tsi yo.

3

Ña taahán tsi cunyicun yo tsi iin rayihí tuhun Nyoo tsihin yo, na cunyicun yo tsi Nyoo

¹ Yañi, quiví tsa quítsi yu nu yucú ndo ña cuví cahán yu tsihin ndo tumaa caahán

yu tsihin nyiví jaquihín ityi Tatyí Ii Nyoo. Cahán yu tsihin ndo tumaa caahán yu tsihin nyiví ña tsitó tsi Nyoo, tyin ndi lee xaan ndo tsihin ra Cristo. ² Cahán yu tsihin ndo tsihin tuhun tsa ña yii ñi cutuñi iñi ndo. Tumaa tsahá yo letsí coho lee tsa ñaha ca cuví catsi nyayu, tacan javahá yu tsihin ndo, tyin nyoo ñaha ca cuví cutuñi vaha iñi ndo. ¡Tan ndi vityin tan ña cutuñi iñi ndo! ³ Tyin ndi tsicá ca iñi ndo tsa cuñí cuñu ñuhu ndo. Nyiyó iñi ndo, tan iyó tsihi nu yucú ndo, tan ndusín ndo. Ndi tsicá iñi ndo tuhun tsicá iñi nyiví cuenda nu ñuhu ñayiví ihya, tan javahá ndo tumaa cuñí cuñu ñuhu ndo. ⁴ Tyin yihí ndo catyí ndo: “Cuenda ra Pablo yihí yu.” Tan inga ndo catyí ndo: “Cuenda ra Apolos yihí yu.” Yacan cuñí tsi catyí tyin javahá ndo tumaa javahá nyiví iyó ityi tsata.

⁵ Tyin ¿yoó ra cuví yuhu, ra Pablo? Tan ¿yoó ra cuví ra Apolos? tyin cañí tahan ndo tsaha ndi. ¿A ñavin musu Nyoo ñi cuví ndi? Juvín. Tan cahán ndi tuhun Nyoo tsihin ndo tan natsinü iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyi maa Nyoo tyin javaha ndi. ⁶ Yuhu tatsi tuhun Nyoo añima ndo, tan ra Apolos tyosó. Maa tyin Nyoo jacuahnú ra tuhun ra añima ndo. ⁷ Tan yacan cuenda ndi ra tsa tatsí tan ndi ra tsa tyosó, nduve ra cuví ra. Maa tyin Nyoo cuví ra tandihí tyin

maa ra jacuahnú tuhun ra añima yo. ⁸ Ra tsa tatsí tan ra tsa tyosó, iin ñi ra cuví ra naha. Tan Nyoo cua tyahvi tsi intuhun intuhun ra naha cuhva tyiñu jahá ra naha. ⁹ Tan nyuhu, cuví ndi musu tan jahá tyiñu ndi tyiñu Nyoo. Tan nyoocho cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo. ¹⁰ Tsaḥa Nyoo tsa vaha tsi yu tyin yuhu cuví yu tumaa iin ra cuví ityi nuu tsa samá vehe. Tyin tsaquin yu cuhva vehe can tan tyihí yu tsaha tsi tsitsi ñuhu. Tan inga ra tsa cua sama ityi siquí cuví ra jacuahá, tan cuñí tsi jahá ra cuenda nácaa jacuahá ra tuhun Nyoo. ¹¹ Tan yoñi cuví caquin inga cuhva tyin tsa canyií cuhva can. Tan yacan cuví ra Jesucristo. ¹² Tan siquí cuhva can cuví sama ra jacuahá tsihin xuhun cuaan, tsihin xuhun cuitsin, tsihin yuu vaha. Tan cuví tucu javaha ra vehe tsihin yutun, tsihin vitsin, a tsihin tiyama. ¹³ Maa tyin quivi nacuhva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhu can cua nducu cuhva tsi tyiñu javahá ra naha. ¹⁴ Tan vehe tsa ña cua cayu, cua ndoo tsi. Tan ra tsa javahá vehe can cua naquihin ra yahvi tsa taahán tsi tsi ra. ¹⁵ Maa tyin tun ndihi tyiñu javahá ra naha cayu, nduve náa cua ñihi ra naha. Vasu cua cacu maa ra naha tumaa cacu iin

ra tsa cuñi cayu tan tsinu ra nu cayu ñuhu.

¹⁶ ¿A ña tsitó ndo tyin vehe ñuhu Nyoo cuví ndo, tan iyó Tatyí Ii Nyoo tsitsi añima ndo? ¹⁷ Tatun iin nyivi jativi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

¹⁸ Ndi intuhun ndo tan ña jandavi ñaha ndo tsi ndo. Tyin tatun cuñi ndo tyin tsitó xaan ndo tsihin tsa tsiñi tuñi tsa iyó nu ñuhu ñayivi ihya, cuñi tsi tsa jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo. ¹⁹ Tyin tsa tsiñi tuñi tsa iyó nu ñuhu ñayivi ihya nduve yahvi nyaá can nu Nyoo. Tyin catyí tuhun Nyoo: “Janacavá ra tsi ra tsitó, juven ñi maa nu tsa nyityi javahá ra.” ²⁰ Tan catyí tucu tsi: “Jutu Mañi yo tsitó ra tyin tsa tsicá iñi ra tsitó, nduve yahvi nyaá can.” ²¹ Yacan cuenda ndi intuhun ndo tan ña taahán tsi cu iyo iñi ndo nyehe ndo tsi iin ra jacuahá tsi ndo tyin maa Nyoo tsaḥa tsi ra naha tsa jacuahá ra naha tuhun vaha tsi ndo tan tsaḥa ndihi ra tandihi tsa iyó tsi ndo. ²² Yuhu ra Pablo, ra Apolos, ra Pedro, maa Nyoo tsaḥa tsi ndi tsa cahan ndi tuhun ra tsihin ndo. Tan ñuhu ñayivi ihya, tan ñayivi iyó yo, tan tuhun tsihi, tan tsa cuví vityin, tan tsa cua cuví nu cuahán ca tsi, tandihi maa tuhun ihya tsaḥa Nyoo tsi ndo. ²³ Tan inga tucu tuhun tyin cuví ndo tsa tsii ra Cristo, tan ra Cristo, tsii Nyoo cuví

ra.

4

Ñajacahnu yo tsi yo tan ndi tsi yañi yo

¹ Yacan cuenda ña taahán tsi nyehe ndo tsi ra Cristo, tyin musu ñi ra cuví ndi. Tyin tava tyiñu Nyoo tsi ndi tsa jacuaha ndi tuhun xeehe ra. ² Tan ra tsa tava tyiñu Nyoo cuñi tsi tsa tyaá yahvi ra tandihí tsa caahán ra tsihin ra. ³ Yacan ña ndihí iñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu. ⁴ Vasu ndi maa tuví iñi yu tyin nduve cuatyí yu, maa tyin ña cuñi tsi catyi tyin nduve cuatyí yu nuu Nyoo. Tyin maa Jutu Mañi yo cua catyi tun iyó cuatyí yu o nduve. ⁵ Yacan cuenda, ña cahan ndo tsi yu. Cúatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

⁶ Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehe ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyi tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihí nyivi. ⁷ Ndi intuhun

ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsahá can tsi ndo.

⁸ Tan cuñi ndo tyin tsa tsitó maa ndo tandihí tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsiñi ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu. ⁹ Nyuhu tsa cuví ndi ra tsicá tyiñu ra Cristo, tumaa tsa nacoó Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi. ¹⁰ Nyivi tsicá iñi maa ñi tyin tsa cuenda ra Cristo tan ndusoho ndi. Tan nyooho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyooho iyo xaan cuñi ndo tyin iyó tunyee iñi tsi ndo. Tun ndasi cuñi nyivi nyehé ñi tsi nyuhu, jaha xaan ca ñi tsa ñayivi tsi nyooho. ¹¹ Nda cuanda vityin nyehé ndi tundoho; tsisocó ndi, tan na ityi iñi ndi, cumañi jahma ndi, nduve vehe ndi iyó, tan nyivi jacuu ñi tsa uhvi tsi ndi. ¹² Tan tsitatú ndi tsa jahá tyiñu ndi tsihin ndaha ndi. Caahán nyivi tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé iñi ndi. ¹³ Caahán ñi

ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuanda vityin ihya.

¹⁴ Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu. ¹⁵ Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahan tuhun ra Cristo Jesús tsihin ndo nda jihna ñi tan natsinu iñi ndo tsi ra. ¹⁶ Tan tsa cuenda tsehe tsicán yu tsi ndo tsa javaha ndo tumaa javahá maa yu.

¹⁷ Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nii xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo cuhva iyó yu tsihin ra Cristo tan cuhva jacuahá yu tandihí ñi vehe ñuhu nu cuahán yu. ¹⁸ Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo. ¹⁹ Maa tyin tun Jutu Mañi yo tan cuñi ra, yatyi cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatun caahán ñi maa ra naha. ²⁰ Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi

ra naha. Maa tyin cua tuvi iñi yo tyin nditsa iyó tunyee iñi Nyoo tsi ra naha. ²¹ ¿Náa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

5

Nu tavq tyiñu ra Pablo tyin cutuñi iin ra tsicoq tsihin sihi quiin

¹ Ñihí tuhun yu tyin iin ra nyii tsihin ndo iyó ra tsihin sihi quiin ra. Tan yacan cuví cuatyi cahnu xaan, tyin ndi nyivi iyó ityi tsata tan ña javahá ñi tacan tyin tsitó ñi tyin ña vaha. ² Taahán tsi cui-ihyá cuñi ndo tsa cuenda cuatyi can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo. ³⁻⁴ Vasu nduve yu nyii tsihin ndo, maa tyin tumaa tsa nyii ñi yu tsihin ndo tyin ñuhú iñi yu tsi ndo, tan tsihin sivi Jutu Mañi yo Jesucristo jandaq yu tyiñu ra tsa javaha cuatyi can. Yacan cuñi tsi tsa ndu iin ndo. Tan jaha ndo tuhun tyin nyii yu tsihin ndo. Tan cunyaa tunyee iñi Jutu Mañi yo Jesús tsihin ndo. ⁵ Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá tsa caquiñi ihya, tyin vasiqi tacan tan cua jandihí ra tsa javahá ra can. Tacan tan quivi quitsi Jutu Mañi yo Jesucristo cacu añima ra.

⁶ Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú

vehe ñuhu ndo. ¿A ña tsitó ndo tyin vasu luxu ñi yutsan iya, jandaá tsi tandihí yutsan paan? Tan tacan ñi cuñí yo cuví tucu yacan. ⁷ Tava ndo yutsan iya tsahnu tsa jativí tsi ndo. Tacan tan cuví ndo tumaa paan tsa tuhvá nyiví javahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuví tucu nyooho tyin maa ra Cristo cuví mbee ticatyi luhlu tsa tsihi tsa cuenda cuatyi yo. ⁸ Yacan cuenda taahán tsi catsi coo yo tyin tsihi ra Cristo tsa cuenda yo. Tan jandoó yo tsa caquiñi tsa javahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa ñi ñi yo tyin cuví tsi tumaa paan tsa nduve yutsan iya yihí.

⁹ Nu inga carta tsa jaquitsi yu tsi ndo, catyi yu tyin ña taahán tsi cunyanaa ndo tsi ra tsicá nuu tsihin ñaha. ¹⁰ Tan tsa caahán yu tyehen tsihin ndo, ñavin tsa cunu ndo nu nyiví tsa iyó ityi tsata, ñi tsa iyó tsihin rayii a ñaha, ñi tsa nyiyó ñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñí tsi tsa quita ndihí ndo nu ñuhu ñayiví ihya. ¹¹ Maa tyin tsa cuñí yu catyi yu tsihin ndo ña cunyaa naa ndo tsi nyiví tsa catyi: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayii, o nyiyó ñi ñi, o jacahnú ñi tsitoho, o caahán ñi cuendu, o tsihi ñi nyixi, o suhú ñi. Ñi tsa

javahá iin tsa ña vaha ihya, ndi ña cunyecu ndo catsi ndo tsihin ñi. ¹²⁻¹³ Tyin yoo ña taahán tsi tatsi tuñi yo tsi nyiví ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñí tsi tatsi tuñi ndo tsi nyiví yihí cuenda Nyoo. Yacan cuenda tavá ndo tsi ra iyó cuatyi nu yucú ndo.

6

Ña cua ndacan yo cuatyi tsaha iin yañi yo cuenda Nyoo nuu ra cumí tyiñu

¹ ¿Nacuenda tyin tsicán ndo cuatyi tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndáa ra iyó cuatyi? ² ¿A ña tsitó ndo tyin juvin ñi maa yo cua jandaa cuatyi tandihí nyiví iyó nu ñuhu ñayiví ihya nu cuahán ca tsi? Tan tatun maa yo cua jandaa cuatyi can, ¿nacuvi tyin ña cuví jandaa ndo cuatyi nyihi ihya? ³ ¿A ña tsitó ndo tyin cua jandaa yo cuatyi nda cuanda ángel? Tun tacan, ¿a yii jandaa yo cuatyi nyihi tsa iyó nu ñuhu ñayiví? ¡Ña yii jandaa yo can! ⁴ Yacan cuenda tatun iyó tsihi nu yucú ndo, ¿nacuenta tyin cuahán ndo nuu ra cumí tyiñu tsa ña yihí tuhun Nyoo? ⁵ Caahán yu tyehen tsihin ndo na nducahan nuu ndo. ¿A nduve cuii vasu intuhun ra jandaa cuatyi yañi ndo nu yucú ndo? ⁶ Tyin cuahán ndo cua ndacan ndo cuatyi tsaha

yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

7 Ña vaha tsa iyó tsihi nu yucú ndo. Vaha taxin ca cunyeey iñi ndo tatun javaha nyivi tsa ña vaha tsi ndo. Tan jaña ndo na suhu maa ñi tsa tsii ndo. 8 ¡Maa tyin nyooho javahá ndo tsa ña vaha tan suhú ndo nda cuanda tsa tsii yañi ndo!

9-10 ¿A ña tsitó ndo tyin nyivi quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha tsa tsicá nuu tsihin rayii, ndi ñi jacahnú tsi-toho, ndi ra iyó ñasihi tan iyó inga ñaha tsi ra, tacan tucu ñiñaha tsa iyó yii tan iyó inga rayii tsi ñi, ndi ra ndusihi, ndi ñi nduyii, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihi nyixi, tan ndi ñi tsit; o jandavi ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi. 11 Tyin tacan javaha juhva nyooho. Maa tyin tsa ndatsi cuatyí ndo tan ndu ij ndo tan nduvaha ndo nuu Nyoo jahá Jutu Mañi yo Jesucristo tan Tatyí Ii Nyoo.

Cuñu ñuhu yo cuví vehe ñuhu Nyoo

12 Catyí tsi tyin nuña maa javaha yo tandihí náa cuñí maa yo. Tan nditsa tucu maa, maa tyin ña tandihí tan vaha. Cuví javaha yo náa cuñí maa yo, maa tyin cuñí tsi jaha yo cuenda tun vaha a ña vaha, tan ña cuhva yo tsa cundaca

ñaha can tsi yo. 13 Catyí nyivi tyin Nyoo javahá ra tsa tsatsí yo tsa cuenda tsitsi yo. Tan javaha ra tsitsi yo tsa cuenda tsa tsatsí yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu ñuhu yo ña nditsa tsa javaha ra itsi tyin coo yo tsihin ñaha a tsihin rayii, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo. 14 Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

15 ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jativí yu tsihin iin ñaha tsicá nuu? Ña taahán tsi javaha yu tacan. 16 ¿A ña tsitó ndo tyin tun iin rayii tan iyó ra tsihin iin ñaha tsicá nuu intuhun ña cuñu ñuhu nanduví ra tsihin ña? Tyin nu tutu Nyoo catyí tsi tyehen: “Tsa nduvi ñi, iin ña nyivi cuví ñi.” 17 Maa tyin tatun iin nyivi tan nacuhva ñi añima ñi tsi Jutu Mañi yo, iin ñi cuví ñi tsihin ra tyin quihvi Tatyí Ii ra añima ñi.

18 Jandihí ndo tsa iyó ndo tsihin ñaha a tsihin rayii tun ñavin ñasihi ndo a ñavin yii ndo cuví. Tyin tandihí inga nu cuatyí tsa javahá nyivi ña jativí can cuñu ñuhu ñi. Maa tyin tsa tsicá nuu ñi tsi-

hin ñaha a tsihin rayii, jativí can cuñu ñuhu ñi. ¹⁹ ¿A ña tsitó ndo tyin cuñu ñuhu yo cuví vehe ñuhu Tatyí Ii tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo. ²⁰ Tyin Nyoo yahvi xaan jata ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiñi tuñi iñi yo tyin nduvi taahan tuhun ihya tsii maa Nyoo cuví.

7

Nu tsahá cuenda ra Pablo nácaa taahán tsi coo nyivi tindahá

¹ Tan vityin cua cahan yu tsa tsica tuhun ndo tsi yu nu carta tsa jaquitsi ndo tsi yu. Nditsa tyin vaha tsa ña tindaha yo. ² Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayii. Yacan cuenda cuñí tsi tsa coo ñasihi tsa intuhun intuhun ra naha, tacan tucu ñiñaha taahán tsi coo yii tsa intuhun intuhun ñi. ³ Na javaha rayii cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yii ña. ⁴ Ñiñaha ña cuví cundaca ñaha ñi maa ña cuñu ñuhu ña, tyin tsii yii ña cuví cuñu ñuhu ña. Tacan tucu maa yii ña, ña cuví cundaca ñaha ñi maa ra cuñu ñuhu ra tyin tsii ñasihi ra cuví cuñu ñuhu ra. ⁵ Ña vaha tun ña cuhva iin ndo tsi ndo tsi inga ndo. Tatun cuñí ndo coo ndo oración, vaha ca

natuhun tahan jihna ndo tyin ña cua coo tsihin tahan ndo quivi tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayii inga ñaha o ñaha nducu ña inga rayii tan javaha ndo tsa ña vaha jaha nu ña vaha.

⁶ Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñí yu tsi ndo tsa tindaha ndo. Maa tyin cuví tindaha ndo tatun cuñí ndo. ⁷ Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

⁸ Tsahá cuenda yu tuhun ihya tsi tandihi nyooho tsa ñaha ca tindaha tan nyooho ñi tsihi yii tyin vaha ca cuví tsi ndo tun ña tindaha ndo tumaa maa yu. ⁹ Maa tyin tatun ña cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

¹⁰ Maa tyin caahán yu tsehe tsihin nyooho ñiñaha tsa tsa tindaha: ña nacoo ndo yii ndo tyin tuhun caahán yu ihya, ñavin tsa cuñí maa yu cuví, tyin maa Jutu Mañi yo tsahá itsi tyin cuhva cuenda yu tsi ndo. ¹¹ Maa tyin tatun iin ñaha tan nacoo ña yii ña, cuñí tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yii ña. Tan tacan tucu rayii, ña

taahán tsi nacoo ra ñasihi ra.

12 Tan cuñi yu cahan yu inga tuhun ihya tsihin inga ndo, maa tyin ñavin Nyoo tsaha itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoó ña vaha tsa cunyaa ña tsihin ra, nduve ndatu tsa nacoo ra tsi ña. 13 Tan tatun iin ña hermana, tan ña tsinú iñi yí ña tsi Nyoo, ndoó ra vaha tsa cunyaa ra tsihin ña, nduve ndatu tsa nacoo ña tsi ra. 14 Tyin tsa yaha nasoco Nyoo tsi rayii tsa ña tsinú iñi can tsa cuenda tsa iin ñi cuví ra tsihin ñaha tsa tsinú iñi. Tan tsa yaha nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuenda sehe ñi ña cuví tsi naha tsi tumaa cuví sehe nyivi tsa ña tsinú iñi tsi Nyoo, tyin tsa nasoco ndihi Nyoo itsi naha tsi. 15 Maa tyin tatun rayii an ñaha tsa ña tsinú iñi tsi Nyoo, tan cuñi ñi nacoo ñi tsi tahan ñi tsa tsinú iñi tsi Nyoo, na nacoo maa ñi. Tacan tan ra hermano a ña hermana ndoo nuña ñi. Tyin maa Nyoo cuñi tsa coo vaha yo tsihin tsa nduve tsihi. 16 Tyin ña tsitó iin ñaha tatun cacu yí ña. Tan ndi rayii ña tsitó ra tatun cacu ñasihi ra.

17 Tan catyí yu tsihin ndo coo ndo tsihin ndatu tsa tsaha Jutu Mañi yo tsi ndo tan cuhva iyó ndo quivi cana ra tsi ndo. Tan tsehe cuví tsa jacuahá yu tandihi vehe ñuhu tan iin tan iin ñuu. 18 Tatun tsa yaha tsinyaa tuñi Nyoo cuñu ñuhu ndo tan cana Nyoo tsi ndo ña caca iñi ndo tsa

cuenda yacan. Maa tyin tun ña tyaa ñi tuñi can tsi ndo, tan cana Nyoo tsi ndo, nduve cuenda; ña javaha ca ndo can. 19 Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuví tsa tyaa yahvi yo tuhun caahán Nyoo. 20 Tan intuhun intuhun ndo taahán tsi jahá tyiñu ndo juvin ñi tyiñu tsa tuhvá ndo javahá quivi tsa cana Nyoo tsi ndo. 21 Tyin tatun musu cuví ndo quivi tsa cana Nyoo tsi ndo, ña caca iñi ndo. Maa tyin tatun tsahá tsi cuhva tsa ndoó nuña ndo, nducu ndo cuhva. 22 Iin ra tsa cuví musu tan quihvi ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihvi ra cuenda Jutu Mañi yo, vityin cuví ra musu tsa cuenda ra. 23 Nyoo yahvi xaan jata ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo. 24 Tan catyí yu tsihin ndo, yañi, jaha tyiñu ndo tyiñu tsa tuhvá ndo javahá quivi cana Nyoo tsi ndo.

25 Tan tsa cuenda nyivi tsa ñaha ca tindaha, nduve tuhun tsaha Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsaha ra tucahnu iñi tsi yu tan maa ra yihí ndaha tsi yu. 26 Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó. 27 Maa tyin tatun tsa iyó ñasihi ndo,

ña nducu ndo cuhva tsa naco ndo tsi ñi. O tatun nduve ñasihi ndo iyó, vaha ca ña tindaha ndo. ²⁸ Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñí yu tsa nyehé ndo tundoho.

²⁹ Yañi, cuñí yu cahan yu tuhun ihya tsihin ndo: Juhva cuii ña quivi iyó yo. Yacan vityin tan ityi nuu tandihi ra tsa iyó ñasihi cuñí tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó. ³⁰ Tan nyooho tsa iyó tucuihaya iñi, ña tyaa yahvi ndo tucuihaya iñi can. Tan nyooho tsa sii cuñi, ña tyaa yahvi ndo tusii iñi can. Tan nyooho tsa jata ndaha tyiñu taahán tsi coo ndo tumaa tsa nduve ndaha tyiñu ndo. ³¹ Tan nyooho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndihi ñuhu ñayivi ihya.

³² Cuñí yu tyin nyooho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñí maa Jutu Mañi yo. ³³ Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasihi ra. ³⁴ Tan tacan tucu ñiñaha, siin siin cuhva iyó ñi, tyin ñaha

tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jacahnu ña tsi Nyoo tsihin cuñu ñuhu ña, tan tsihin tsa nii iñi añima ña. Maa tyin ñaha tsa iyó yii, maa ñi cuhva coo vaha ña tsihin yii ña nducú ña.

³⁵ Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñi yu tsi ndo. Maa tyin coo ndo iin ñayivi cuii tsihin tsa nduve tsa jatyañú tsi ndo. Tan javaha ndo iin ñi tyiñu Nyoo.

³⁶ Maa tyin ndáa nyooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñí tsi; ñavin cuatyí cuví can. ³⁷ Maa tyin ndáa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa. ³⁸ Ñi tsa cuñí tindaha sehe ñi, vaha javahá ñi. Tan ñi tsa ña cuñí tindaha sehe ñi, vaha ca javahá ñi.

³⁹ Maa tyin ley Nyoo catyí tsi na cundacá ñaha rayii tsi ñasihi ra tsitsi tsa ndi iyó ra. Tatun tsa tsihi ra, tacan tan cuví ndoo nuña ña tan tindaha ña yóo tsihin cuñí maa ña. Maa tyin tun cua tindaha ña, na tindaha ña tsihin ra yihí tuhun Nyoo. ⁴⁰ Maa tyin sii xaan ca cua cuví tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñí yu tyin maa Tatyí li Nyoo, tsaha tuhun ihya tsi yu, tan tsahá cuenda yu tsi ndo.

8

Nu jacuahá ra Pablo tyin ña vaha janacava yo tsi nyivi nu cuatyí

¹ Tan vityin cua cahan yu tsihin ndo cuenda nyayu tsa jamañi nyivi nu tsitoho. Tandihí yo tan cuñi yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñi yo tan nduyaá yo tsihin can. Tan ndi nduve nu jatinyee can tsi yo. Maa tyin tsa cuñi tahan yo tsi yo jacuahnú tsi tsi yo tsihin Nyoo. ² Ra tsa cuñi tyin tsitó xaan ra, nduve náa tsitó ra. ³ Maa tyin Nyoo tsitó ra ndáa nyivi cuñi tsi ra tsihin tsa niñi ñi ñi.

⁴ Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó. ⁵ Vasu ndi maa juhva nyivi catyí ñi tyin iyó cuaha nyoo tsa ndacá ñaha nu ñuhu ñayivi ihya tan andivi, ⁶ maa tyin tsa cuenda yoo, intuhun ñi Nyoo Jutu yo iyó. Tan juvin ra javahá tandihí cuii maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javahá tandihí maa tsa iyó, nda cuanda tsi maa yo.

⁷ Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá ñi ñi tyin nyito tsitoho can. Tan cuñi ñi tyin nyayu, tsa jamañi nyivi tsi tsitoho

can, ica tsi. Tan cuñi ñi tyin tun catsi ñi nyayu can cua coo cuatyí ñi nu Nyoo. ⁸ Maa tyin Nyoo nduve cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo. ⁹ Maa tyin nyooho tsa tsitó tyin nduve cuatyí tsa catsi yo nyayu tsa jamañi nyivi nuu tsitoho, jaha ndo cuenda coto janacava ndo tsi ñi tsa ndi quihvi tuhun Nyoo nu cuatyí, tyin ñi ican tsicá ñi ñi tyin tun catsi ñi tsa jamañi nyivi nu tsitoho, cua coo cuatyí ñi nuu Nyoo. ¹⁰ Tyin tatun yooho tsa tsitó un tuhun ihya, tan cunyaa un catsi un tsa iyó vehe tsitoho, tan iin ra yañi yo tsa ndi quihvi cuenda Nyoo tan nyehe ra tyin tsatsí un tsa jamañi nyivi nu tsitoho, cua cuñi ndihí ra catsi ra. ¹¹ Tan cua tiví ñi ñi ra tyin cuñi maa ra tyin tsicoo cuatyí ra. Tan ra ican tsihi ra Cristo tsa cuenda ra. Tan yooho tsa tsitó un, siqui un cua cahun cuatyí can. ¹² Tyin tun janacava yo tsi yañi yo tsa ndi quihvi cuenda Nyoo, tsicoo cuatyí yo nuu ra Cristo. ¹³ Yacan cuenda tatun janacava yu tsi iin yañi yo nuu cuatyí tsihin tsa tsatsí yu nyayu, vaha ca tsa ña cua catsi ca yu nyayu ndi sava ca quivi, tyin ña cuñi yu tsa janacava yu tsi yañi yo nuu cuatyí.

9

Tsa taahán tsi javahá iin ra

tava tyiñu ra Jesucristo

¹ Nditsa tsa cuví yu iin ra tava tyiñu ra Jesucristo. Tan yofi nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juvin ñi maa ndo cuví tsandaa tsa cuenda tyiñu javahá yu, tyin tsinú iñi ndo tuhun ra tsa jacotó yu tsi ndo. ² Vasu yihí nyivi ña tsinú iñi ñi tyin ra Jesucristo tava tyiñu tsi yu, maa tyin nyooho taahán tsi tsinu iñi ndo, tyin juvin yu cahan tuhun ra tsihin ndo tan natsinu iñi ndo tsi ra. Yacan cuenda juvin ndo cuví tsandaa.

³ Tyehen cuví tsa cua cahan yu tsihin nyivi tsa caahán nyaa tsi yu. ⁴ Iyó ndatu tsa quihín yu tandihi tsa tsahá ñi catsi yu tan tsa tsahá ñi coho yu. ⁵ Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandihi ca ra tava tyiñu ra Jesucristo. ⁶ ¿O tsicá iñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiñi ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo? ⁷ Ra tsa cuví andarú iyó yahví ra naha. Tan ra tsa tatsí yava nducuaa tsatsí ra tucuaa tsa queé nu nducuaa ra. Tan ra tsa jahá cuenda indiqui tsihi ra letsi ti. ⁸ Tan ña cuñi ndo tyin tuhun ihya tsa tsiñi tuñi jiñi maa yu cuví, tyin nu ley Nyoo tsa tyaa ra Moisés catyí tsi tyehen: ⁹ “Ra tsa tatsí trigu ña taahán tsi tyihi ra yoho

yuhu indiqui tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Nditsa tyin Nyoo ña cahan ra tyehen tsa cuenda indiqui ñi. ¹⁰ Maa tyin na cutuñi iñi yo tyin tumaa ra tahví ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha. ¹¹ Tan tacan cuví tucu nyuhu, quitsi cahan ndi tuhun Nyoo tsihin ndo, tumaa tsa quitsi tatsi ndi tsiti tsitsi añima ndo cuví can. Tan taahán tsi tsa jatyinyeé ndo tsi ndi tsa cuenda tsa jacotó ndi tuhun Nyoo tsi ndo. ¹² Tatun jatyinyeé ndo tsi inga ra tsa ña quitsi tyihi tuhun Nyoo nu yucú ndo, taahán tsi tsa cuaha ca jatyinyeé ndo tsi nyuhu, tyin nyuhu tyihi tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihi. Ña tsicán ndi tsa tsiñi ñuhu tsi ndi tsi ndo tyin coto jandihí ndo tsa tyaa yahví ndo tuhun ra Cristo tsa jacuahá ndi. ¹³ Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tavá sñin ra naha juhva cuñu quití tyin catsi ra naha. Tan tandihi ca cuñu can cua cahmi ra naha tumaa catyí maa Nyoo tsihin ra naha. ¹⁴ Tan juvin ñi tacan caahán Jutu Mañi yo, tyin taahán tsi jatyinyeé ñi yihí cuenda Nyoo tsi ra caahán tuhun Nyoo tsihin ñi. ¹⁵ Maa tyin yuhu, ndi iin tsaha tan ñaha ca ndacan yu tsa taahán

tsi tsi yu. Tan ndi ña tyaá yu tuhun ihya tyin cuñí yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndihí tsa sii cuñí yu caahán yu tuhun ra Cristo tsihin ndo vasu ndi maa nduve náa jatinyeé ndo tsi yu.

16 Ña cuví nduyaa yu tsihin tsa caahán yu tuhun Nyoo tyin maa ra Cristo tava tyiñu tsi yu tsa cahan yu tuhun ra. Maa tyin ndahvi yu tun ña cahan yu tuhun Nyoo ihya. 17 Yacan cuenda tatun cahan yu tsihin tsa ñiñi yu, cua ñihi yu yahvi yu. Vasu ña cuñí yu cahan yu, tsa ñiñi cuñí tsi cahan yu, tyin tyiñu tsahá maa Nyoo tsi yu cuví tsi. 18 Tan tsa sii cuñí yu caahán yu tuhun ra Cristo yacan cuví yahvi yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

19 Vasu ñavin musu cuví yu, maa tyin nanduví yu musu tandihí nyívi tyin tacan tan cuví jaha canaa yu cuaha ca nyívi cuenda ra Cristo. 20 Tatun nyíi yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaá ra Moisés. Tan tsa cuñí yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu. 21 Maa tyin tatun cuñí yu jaha canaa yu tsi nyívi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa

yu tsi ñi. Tan tsa javahá yu cuhva javahá ñi, ña cuñí tsi catyí tyin ña tyaá yahvi yu ley Nyoo tyin tyaá yahvi yu ley ra Cristo. 22 Tatun nyíi yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyee ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyívi, tyin tacan tan tyaá soho ñi tuhun Nyoo tsa caahán yu tsihin ñi tan cacu ñi. 23 Javahá yu tacan tyin tacan tan cacu nyívi tan nasoco ndihí tucu maa Nyoo tsi yu.

24 Tsitó ndo tyin tatun cua cunu suuhva nyívi, tandihí ñi tsinú, maa tyin intuhun ñi ñi jaha canaa. Tacan tucu maa yo, cuñí tsi tsa ñihi cun- yicun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo. 25 Tandihí nyívi tsa tsinú su- uhva, nacoó ñi tandihí tsa jatyañú tsi ñi tyin cuñí ñi jahá canaa ñi. Tan nyívi can cua jaha canaa ñi intuhun corona ndaha yutun tsa iin yaha ñi na ityí. Maa tyin yoo nducú yo cuhva jaha canaa yo tsa ña cua tiví maa. 26 Tsa cuenda yuhu ña tsinú soho ñi yu, tan ndi ña cañí tahan soho ñi yu. 27 Maa tyin ñihi ndacá ñaha yu tsi cuñu ñuhu yu. Tan jañiñí yu tyaá yahvi yu tsi Nyoo, coto juvin ñi maa yu tsa yaha jacuahá yu tsi inga nyívi, tan ndoo yu.

10

Nu jacuahá ra Pablo tyin ña vaha jacahnú yo tsitoho

¹⁻² Yañi, ña cuñi yu tsa naa iñi ndo tsa cuví tsi tsii tsaahnu yo tahañ tsanaha. Nyoo jacuhun ra iin vico ityi nuu ñi. Tan yaha sava ñi nu ndutyá ñuhu iin caa ñi tsihin ra Moisés, ra cuví ityi nuu tsihin ñi. Tan tsa tacan, tumaa tsa tsicoondutyá ñi tsihin vico tan tsihin ndutyá ñuhu tan ndu iin ñi tsihin ra Moisés. ³ Tan Nyoo tsañá ra iin ñi tsa tsatsi tandihi ñi. ⁴ Tan tsihi ñi ndutyá tsa quita tsata cava tsa cuahán tsihin ñi tan cava can cuví ra Cristo, tan tandihi ñi iin ñi ndutyá can tsihi ñi. ⁵ Maa tyin vasu cuaha tsa iyo javaha Nyoo nyehé ñi, cuaha ñi ña tyaa yahvi ñi tuhun cañan ra tsihin ñi. Tan tsihi ñi nu tsiqui can.

⁶ Tandihí tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javaha ñi can. ⁷ Yacan cuenda ña jachanu ndo tsitoho, tumaa javaha juhva ñi can, tyin catyí nu tutu Nyoo tyehen: “Tsinyecu ñi, tsatsi ñi, tan tsihi ñi. Yaha can tan nduvita ñi, tsahan quitsaha tsañi ñi [jacahnú ñi indiqui xuhun cuaan tsa javaha ñi].” ⁸ Ña coo ndo tsihin iin ñaha tun ñavin ñasihi ndo cuví. Tacan tucu ñiñaha ña taahán tsi coo ñi tsihin rayi tumaa javaha nyivi can. Tan tsihi oco uñi mil ñi tsa iin quivi. ⁹ Jutu Mañi yo vita xaan iñi ra, maa tyin ña taahán tsi nducú

cuhva yo tsi ra tumaa javaha juhva ñi can. Tan tsihi ñi tsa cañan coo tsi ñi. ¹⁰ Tan ña cañan ndo ndavaha ñi siqui Nyoo, tumaa tsa cañan juhva ñi can. Tan jaquitsi ra ángel ra tsahñi tsi ñi.

¹¹ Tandihí yacan tahañ tsi tsaahnu yo tsa tsicoo tahañ tsanaha. Tan tsinya tsi nu libru Nyoo tyin tacan tan yoo tsa iyó yo nu cua ndihí ñuu ñayivi ihya vityin coto yo tyin ña taahán tsi javaha yo tandihí tsa javaha ñi can. ¹² Tan nyooho tsa cuñi tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha]. ¹³ Tundoho tsa nyehé ndo, cuñi maa ndo tyin intuhun ñi maa ndo nyehé can. Maa tyin inducu ñi nyehé tandihí ca nyivi. Cuita iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuví cunyeé iñi ndo. Tyin tun nyehé ndo tundoho, nducú ra cuhva tsa quita ndo tsitsi tundoho can tan cunyeé iñi ndo.

¹⁴ Yacan cuenda yañi, ña jachanu ndo tsitoho. ¹⁵ Caahán yu tsihin ndo tumaa caahán yu tsihin ra tsa cutuñi iñi. Yacan cuenda jaha ndo cuenda tsa caahán yu tsihin ndo tan nyehé ndo tun nditsa a ña nditsa tsa caahán yu. ¹⁶ Quivi tsa nducuhún iñi yo tyin tsihi ra Cristo nu cruu, tsihi yo vinu tan tsatsi yo paan. Tan vinu can cuñi tsi catyi tyin iin ñi cuví yo tsihin ra Cristo tsa cuenda niñi ra. Tan paan can cuñi tsi

catyi tyin iin ñi cuví yo tsihin ra tsa cuenda cuñu ñuhu ra. ¹⁷ Tyin vasu cuaha yo, maa tyin tandihi yo tan tsatsí yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

¹⁸ Tyihi tuñi iñi ndo cuhva iyó nyívi Israel. Tsatsí ñi quití tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra. ¹⁹ Ñavin caahán yu tyin iyó yahvi nyaá tsitoho tsa jacahnú nyívi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can. ²⁰ Tsa caahán yu cuví: Tun jamañi nyívi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha. ²¹ Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha. ²² Ña cuhva yo tisihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

Tun cua javaha yo náa javaha yo, na javaha yo tsa cuenda tsa vaha tsi inga ca nyívi

²³ Nditsa tsa caahán nyívi: “Cuví javaha yo náa cuñi maa yo.” maa tyin ña tandihi can tan jacuahnú can tsi yo tsihin Nyoo tan ndi ña cuví can tsa vaha tsi yo. ²⁴ Ña cuví caca iñi yo tsa cuenda maa ñi maa yo, tyin cuñi tucu tsi tsa caca

iñi yo tsa cuenda inga ca nyívi tan nducu yo tsa vaha tsi ñi.

²⁵ Çatsi nyooho tandihi cuñu tsa cuyahví nu nuyahvi. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo. ²⁶ Tyin ñuhu ñayívi tan tandihi tsa iyó nuu tsi, tsii maa Nyoo cuví.

²⁷ Tan tatun iin nyívi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñi ndo cuhun ndo, vaha maa cuhun ndo, çatsi nyooho tandihi tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho. ²⁸⁻²⁹ Maa tyin tatun ndáa nyívi caahán tyehen tsihin ndo: “Nyayu ihya, nyayu tsa jamañi nyívi nuu tsitoho cuví tsi”; ña çatsi ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñi tsi tsa jahá yu cuenda tsi yu tsa catyi tsa tsicá iñi inga ca nyívi? ³⁰ ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsí yu”, catyí ndo. ³¹ Vaha maa, tun tsatsí ndo, tan tsihi ndo, o javahá ndo inga ca tsa javahá ndo; javaha nyooho maa tyin cuhva taahán iñi Nyoo. ³² Tan ña javaha ndo tsa cuví janduva tsi inga ca nyívi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo. ³³ Tumaa yuhu, ña nducú yu tsa vaha tsi maa yu. Maa

tyin nducú yu tsa vaha tsi inga nyívi tan nácaa cuví cacu añima ñi.

11

¹ Nyehe ndo tumaa javahá yu kuhva javahá ra Cristo, tacan taahán tucu tsi javaha nyooho kuhva javahá yuhu.

Nacaa taahán tsi javaha ñiñaha nu iyó culto

² Yañi, sii xaan cuñí yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo. ³ Maa tyin cuñí yu tsa coto ndo tyin ra Cristo cuví jiñi tsihin intuhun intuhun rayii tyin juvin ra cuví ityi nuu tsihin ra, tan rayii cuví jiñi tsihin ñasihi ra, tumaa cuví Nyoo jiñi tsihin ra Cristo. ⁴ Tatun iin rayii tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra. ⁵ Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya ndii jiñi ña cuví can. Tan tsahá ña ticanuu tsi yii ña tyin juvin ra cuví jiñi tsihin ña. ⁶ Tatun iin ñaha tan ña tyasí ña jiñi ña, vaha taxin ca xatya ña tandihi ixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña. ⁷ Ña taahán tsi tsa casi rayii jiñi ra. Tyin kuhva caá Nyoo caá ra, tyin ndacá ñaha ra tsi ñasihi ra, tumaa tsa ndacá ñaha maa Nyoo tsi ra. Maa tyin iin ñaha

jacahnu ña tsi yii ña tsihin tsa tsahá ña tsa cundaca ñaha ra tsi ña. ⁸ Tyin quívi javahá Nyoo tsi rayii, ña javahá ra tsi ra tsihin yiqui naha ñaha. Tyin tsihin yiqui naha rayii javahá ra tsi ña. ⁹ Tan tsacatyí rayii, tan tsinu ñaha, tan ñavin tsacatyí ñaha tan tsinu rayii. ¹⁰ Yacan cuenda ñiñaha cuñí tsi tsa cundasi jiñi ñi. Tyin cuñi tsi catyi tyin ndacá ñaha yii ñi tsi ñi. Tan cuví tsi tsa vaha tsi ra ángel naha ra. ¹¹ Maa tyin tyaá Nyoo kuhva tyin tsiñi ñuhu rayii tsi ñaha. Tan tsiñi ñuhu ñaha tsi rayii. ¹² Nditsa tyin ñaha tsinu ña tsihin yiqui naha rayii jahá Nyoo. Maa tyin nda cuanda quívi can tan quitsahá tsahá Nyoo tsa coo sehe yii ña. Tan nda cuanda vityin juvin ñi maa Nyoo tsahá tsa coo nduvi taahan ñi, rayii tan ñaha.

¹³ Tyihi tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu? ¹⁴ Tsitó yo tyin ticanuu cuví tsi tsa cuenda rayii tatun nañi jiñi ra. ¹⁵ Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi. ¹⁶ Maa tyin tatun yóo cuñi cañi tahan tsa catyi tuhun ihya, cuñi tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

Nu caahán ra Pablo tsihin nyívi Corinto tyin ña vaha kuhva tsatsí ñi Santa Cena

¹⁷ Yañi, inga tuhun cua cahán yu tsihin ndo tyin ña

sii cuñi yu tsihin ndo; tyin tsa javahá ndo nu ndu iin ndo, ña tsahá tsi tsa vaha tsi ndo, tan jativí tsi tsi ndo. ¹⁸ Tyin catyí nyivi tsihin yu tyin cuhva tsa ndu iin ndo tsa cua coo ndo culto, tan natahví sava ndo. Tan tsicá tucu iñi yu tyin vasiqui nditsa tsa caahán ñi. ¹⁹ ¡Vasiqui cuñi maa ndo tyin tsihin tsa natahví sava ndo tan quituvi ndáa nyooho tsinú vaha iñi tsi Nyoo! ²⁰ Maa tyin tatun tacan ñi iyó tsihi nu yucú ndo, ñavin Santa Cena cuví can. ²¹ Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda cuanda ndu iin tandihi nyivi. Tan yihí ndo cuaha tsatsí ndo, tan nda cuanda tsiñi ndo tsihin vinu. Tan yihí nyivi ña ñihí ñi tsa catsi ñi jahá ndo. ²² ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyivi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

Ra Pablo tsahá cuenda ra tsi ñi, nácaa taahán tsi coo ñi Santa Cena
(Mt. 26.26-29; Mr. 14.22-25; Lc. 22.14-20)

²³ Tyin Jutu Mañi yo jacuahá tuhun ihya tsi yu. Tan juvin yacan tsa yahá jacuahá yu tsi ndo. Tyin tsacuaa tsa ndi cumañi ca nacuhva cuenda ra Judas tsi

Jutu Mañi yo tsi nu xaan iñi tsi ra, quihin ra iin paan. ²⁴ Tan tsa yahá nacuhva ra tyahvi nyoo tsi Nyoo tan tsahnu ra paan can. Tan catyí ra: “Catsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyí ra Jesús. ²⁵ Tan tsa yahá tsa cuxiñi ra naha tan quihin ra Jesús vasu vinu tan catyi ra: “Tsihin vinu ihya ndoó Nyoo tyiñu tsihin ndo vityin, tyin vinu tsa yihí tsitsi vasu ihya, niñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun iñi ndo tsi yu”, catyi ra Jesús tsacuaa can. ²⁶ Tan tahan ñi tsa ndu iin yo tan tsatsí yo paan tan tsihi yo vinu jacotó yo tsi nyivi tyin tsacatyí cuatyí yo tsihi Jutu Mañi yo. Tan tacan jacotó yo tsi nyivi nda cuanda quivi quitsi nyico ra.

Ra Pablo tsahá cuenda ra tsi yo nácaa taahán tsi coo yo Santa Cena

²⁷ Tatun tsatsí yo paan tan tsihi yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsihi ra Cristo nu cruu tan tsa tsati niñi ra. ²⁸ Yacan cuenda cuñi tsi jaha yo cuenda tatun vaha cuahán yo tsihin Nyoo tsa ndi cumañi ca catsi yo paan tan coho yo vinu. ²⁹ Tyin Nyoo tatsí tuñi ra tsi yo tun tsatsí yo tan tsihi yo tan ña tsicá iñi yo tsa cuenda tsa tsihi ra Cristo. ³⁰ Tan tsa cuenda yacan cuaha xaan

ndo cuuhví ndo tan nduve tunyee iñi iyó tsi ndo, tan juhva nyívi tahan ndo tsa yahá tsihi ñi. ³¹ Maa tyin tatun jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo. ³² Maa tyin tatun tatsi tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyívi iyó cuenda nu ñuhu ñayívi ihya.

³³ Tan tacan nyooho yañi, tatun cua ndu iin ndo tsa cua catsi ndo Santa Cena, cuatu tahan ndo tsi ndo tan catsi ndo tan cōho ndo iin caa ñi. ³⁴ Maa tyin tatun ndáa nyooho tsisocó ndo, catsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quívi tsa quitsi nyehe yu nu yucú ndo tan jandaa yu inga ca tuhun.

12

Ndatu tsa tsahá Tatyí Ii Nyoo tsi yo

¹ Yañi, cuñí yu tsa coto ndo náa ndihi ndatu tsahá Tatyí Ii Nyoo tsi tsa intuhun intuhun yo.

² Tsitó ndo tyin quívi tsa ñaha ca nacoto ndo tsi Nyoo, tsahá ndo tsa cundaca ñaha tsitoho tsa ña cuví cahan tsi ndo. ³ Yacan cuenda cuñí yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyí ra tyin ra Cristo cuví Jutu Mañi yo.

⁴ Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá

itsi yo. ⁵ Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo. ⁶ Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyeé tsi tandihi yo tan javahá yo can. ⁷ Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee yo tsi tandihi ca nyívi yihí cuenda ra. ⁸ Tsi juhva yo tsahá Tatyí Ii Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo. ⁹ Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí Ii ra tsahá tunyee iñi tsi inga yo tsa janduvaha yo tsi nyívi cuuhví. ¹⁰ Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyívi. Tan tsi inga yo tsahá ra tsa cuví nacoto yo tun Tatyí Ii Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyívi. ¹¹ Tan tandihi yacan tsahá intuhun ñi maa Tatyí Ii Nyoo. Maa tyin siin siin tsa tsahá ra tsi tsa intuhun intuhun yo, nácaa cuñí maa ra.

Tandihí yo tan cuví yo intuhun ñi cuñu ñuhu tsihin ra Cristo

12 Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihi tsi tan cuví tsi intuhun ñi cuñu ñuhu. Tan tacan cuví tucu maa yo tsihin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo. 13 Tan tacan tucu tandihi yo, a cuví yo nyivi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutyá yo tan nanduvi yo intuhun ña cuñu ñuhu ra Cristo tyin tsaha ra intuhun ñi maa Tatyí li ra coo tsihin tandihi yo.

14 Tyin cuñu ñuhu yo ña cuví tsi intuhun ñi maa tinuu tyin cuñí tsi tsa cunyecu tandihi ca tsa cutahan tsihin tsi tan cuví tsi cuñu ñuhu ñi. 15 Tun tsatyin cuví cahan tsaha yo tan catyí tsi: “Yuhu nduve yahvi nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can. 16 O tun tsatyin cuví cahan soho yo tan catyí tsi: “Yuhu nduve yahvi nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can. 17 Tun tsatyin naní cuñu ñuhu yo cuví tsi tinuu tan nduve soho yo, ¿nácaa cua cuñi yo? O tun tsatyin naní cuñu ñuhu yo cuví tsi soho, ¿nácaa cua tahni yo? 18 Maa tyin Nyoo tyaa ra tan iin tan iin can nu cuñí maa ra. 19 Tatun nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can. 20 Maa tyin tsa ndu iin soho, tinuu, jiñi, ndaha, tan tandihi

ca maa, tacan tan cuví tsi intuhun cuñu ñuhu.

21 Tinuu yo ña cuví catyi tsi tsihin ndaha yo: “Ña tsiñí ñuhu yoocho tsi yu.” Tan ndi jiñi yo tan ña cuví catyi tsi tsihin tsaha yo: “Ña tsiñí ñuhu yoocho tsi yu.” 22 Ña vaha tsa cahan tsi tacan tyin vasu iin tsa lihli tsa cuñí maa yo tyin ña tsiñí ñuhu tsi yo, yacan cuví tsa tsiñí ñuhu ca. 23 Tan nu cuñí yo tyin ña sii caá, tyasí yo. Tan nu ña taahán tsi nyehé nyivi, yacan tyasí vaha ca yo. 24 Tan nu sii caá, ña tyasí yo. Tacan javaha Nyoo cuñu ñuhu yo, tyin tacan tan jacahnú ca yo nu cuñí maa yo tyin ña sii caa. 25 Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusin tsi. 26 Tatun luxu cuñu ñuhu yo nyehé tundoho, nyehé ndihi taní ca cuñu ñuhu yo tundoho. Tan tatun sii cuñí luxu tsi, sii cuñí taní tsi.

27 Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo. 28 Tan Nyoo natyisó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyisó ra tsi ra caca tyiñu ra. Tsa tsinu uvi, natyisó ra tsi ra cuví ndusu yuhu ra. Tan tsa tsinu uñi, natyisó ra tsi ra jacuaha. Yaha can, tan natyisó ra tsi ra tsa javaha tsa iyo, tan natyisó tucu ra tsi ra tsa janduvaha nyivi cuuhví, tan ra tsa jatyinyee tsi nyivi, tan

ra jaha cuenda vehe ñuhu, tan ra caahán inga yuhu tsa ña tsitó ra. ²⁹ Ña tandihí yo tan tsicá yo tyiñu ra Cristo. Ña tandihí yo tan cuví yo ndusu yuhu ra. Ña tandihí yo tan cuví yo ra jacuahá. Ña tandihí yo tan javahá yo tsa iyo. ³⁰ Ña tandihí yo tan tsahá Nyoo tunyee iñi tsa janduvahá yo tsi nyívi cuuhví. Ña tandihí yo tan caahán yo inga yuhu tsa ña tsitó yo. Ña tandihí yo tan cuví nacotó yo tan nacatyí tuhun yo náa cuñí tsi catyí tsa caahán inga nyívi. ³¹ Nducundo cuhva naquihin ndo tsa vaha ca tsa tsahá Nyoo. Maa tyin cua janaha yu iin cuhva vaha ca tsi ndo.

13

Nu janahá ra Pablo nácaa taahán tsi cuñi yo tsi nyívi

¹ Tatun yuhu tan cuví cahan yu cuaha ñi yuhu tsa caahán nyívi iyó nu ñuhu ñayívi ihya, tan cuví cahan tucu yu yuhu tsa caahán ángel, maa tyin tatun ña cuñí yu tsi Nyoo tan ndi tsi nyívi, cuví yu tumaa tyombo tsa nañí ñi maa o iin caa tsa tsacú ndaxin ñi maa. ² Tatun cuví cuhva cuenda yu tuhun caahán Nyoo, tan cuví coto yu tandihí tuhun xeehe, tan tsitó yu tandihí tuhun, maa tyin tatun ña cuñí tucu yu tsi Nyoo tan ndi tsi nyívi, nduve náa catyí javaha yu tandihí yacan. Tatun tsinú xaan iñi yu tsi Nyoo nda cuanda cuví cahan yu tsihin yucu na cuhun tsi inga ityi,

tan cua cuhun tsi, maa tyin tatun ña cuñi yu tsi Nyoo tan ndi tsi nyívi, nduve náa ra cuví yu. ³ O tatun cuhva yu tandihí tsa iyó tsi yu tsi nyívi ndaahvi, tan cuhva yu nda cuanda ñayívi yu tyin cucayu cuñu ñuhu yu, maa tyin tatun ña cuñi yu tsi Nyoo tan ndi tsi nyívi, nduve náa cua jatyinyee can tsi yu.

⁴ Tatun nditsa tsa cuñí yo tsi Nyoo tan tsi nyívi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo. ⁵ Tatun nditsa tsa cuñí yo tsi Nyoo tan tsi nyívi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoó tisihi tsitsi añima yo. ⁶ Tatun nditsa tsa cuñí yo tsi Nyoo tan tsi nyívi, ña sii cuñí yo náa ndihí tsa ña vaha javahá ñi, maa tyin cusii iñi yo tsihin tsa vaha tan tsa nditsa. ⁷ Tatun nditsa tsa cuñí yo tsi Nyoo tan tsi nyívi, cunyeé iñi yo nyehe yo tundoho jahá ñi, tan tsinú iñi yo tyin cua javaha ñi tsa vaha tan ndatú yo tsa nasama ñi cuhva iyó ñi, tan ña cundihí iñi yo.

⁸ Tsa cuñí yo tsi Nyoo tan tsi nyívi ña cua cundihí maa tsi, maa tyin coo quívi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiñi ñuhu ca can tsi yo. ⁹ Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyívi,

¹⁰ maa tyin quiví quitsi nyico ra Cristo, cua cundihí tsa tsitó yo luxu ñi tyin cua coto yo tandihí maa.

¹¹ Quiví tsa luhlu yu caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin quiví tsahnú yu nacoó yu tsa yu cuhva javahá ra nyihi. ¹² Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndihí tsi yaa. Maa tyin quiví cua quitsi ra Cristo, cua coto yo tandihí maa. Luxu ñi tsitó yu vityin, maa tyin quiví quitsi nyico ra, tandihí cuii maa tan cua coto yu, tumaa nacotó maa ra tsi yu vityin. ¹³ Iyó uñi taahan tsa ña cua ndihí maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandihí tsa cahan Nyoo tyin cuhva ra tsi yo, tan tsa cuñí yo tsi Nyoo tan tsi nyiví. Tan tsitsi tsa nduñi taahan tsehe, tsa tsiní ñuhu ca cuví tsa cuñí yo tsi Nyoo tan tsi nyiví.

14

Nu jacuahá ra Pablo nácaa cahan yo inga yuhu tsa ña tsitó yo

¹ Jañihi ca ndo cuñí ndo tsi Nyoo tan tsi nyiví. Tan nducu ndo cuhva naquihin ndo ndatu tsa tsahá Tatyí Ii Nyoo tsi yo. Nducu jihna ndo tsa cuhva cuenda ndo tuhun Nyoo tsi nyiví. ² Tyin tun caahán yo inga yuhu tsa ña tsitó yo, tsihin Nyoo caahán yo, tan ñavin tsihin nyiví. Tyin ndi intuhun ñi tan ña cutuñí iñi ñi, tyin

tuhun xeehe caahán yo jahá Tatyí Ii Nyoo. ³ Maa tyin tun tsahá cuenda yo tuhun Nyoo tsi nyiví, cutuñí iñi ñi tan ñihi ca tsahnú ñi tsihin tuhun Nyoo. Tan ndu iin ca iñi ñi jahá yo tan ndunyeé ca iñi ñi. ⁴ Tatun caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahán Nyoo tsihin yo tsihin nyiví, tandihí ñi tsahnú.

⁵ Yuhu cuñí yu tsa cahan tandihí ndo inga yuhu tsa ña tsitó ndo. Maa tyin vaha xaan ca tun cuvi cuhva cuenda ndo tsa caahán Nyoo, tyin jatyinyeé ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatun iin ndo cuví nacoto ndo nácaa caahán inga ndo tsihin inga yuhu, nacatyí tuhun ndo tsihin ñi. Tacan tan cuví jatyinyee tsi tsi tandihí ñi. ⁶ Yacan cuenda yañi, tatun yuhu tan tsaa yu nu yucú ndo, tan cahan yu inga yuhu, ña cua jatyinyee tsi tsi ndo. Maa tyin tun cahan yu tsa janahá Nyoo tsi yu, o tsa jacoto ra tsi yu, o tsa tsahá ra tyin cuhva cuenda yu tsi ndo, o tsa jacuaha yu tsi ndo, cua jatyinyee tsi tsi tandihí ndo.

⁷ Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo. ⁸ Tan tatun nu iyó cuatyí tan ña vaha tiví ra cutu, yoñi cua coto náa cuhva cua cañi tahan ra naha. ⁹ Tan tacan tucu yoo, tatun caahán yo inga yuhu tsa ña

cutuñí iñi nyivi, ña cua coto ñi náa caahán yo. Tan cua catyi ñi tyin jiñi yo ña vaha cuñí, yacan caahán maa yo. ¹⁰ Cuaha xaan yuhu caahán nyivi nu ñuhu ñayivi ihya. Tan intuhun intuhun nuu yuhu tan iyó iyó ñi tsa cuñí tsi catyí. ¹¹ Maa tyin tun ña cutuñí iñi yu yuhu tsa caahán inga nyivi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyivi inga ñuu tsa cuenda yu. ¹² Yacan cuenda nyooho tsa cuñí xaan naquihin ndatu tsa tsahá Tatyí Ii Nyoo, nducu ndo cuhva naquihin ndo tunyee iñi tsa cuvi jatyinyee vaha ca tsi nyivi yucú vehe ñuhu.

¹³ Tacan tucu nyooho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyivi náa cuñí tsi catyi. ¹⁴ Tyin tatun tsicán tahvi yu tsi Nyoo tsihin iin yuhu tsa ña cutuñí iñi yu, añima yu tsicán tahvi tsi Nyoo, maa tyin tsa tsiñi tuñi jiñi yu ña cutuñí iñi tsi. ¹⁵ Yacan cuenda cuñí tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñí iñi yu. Tan cuñí tsi tsa cata yu yaa tsihin yuhu tsa ña cutuñí iñi yu. Tan cata ndihi tucu yu yaa tsihin yuhu tsa cutuñí iñi yu. ¹⁶ Tyin tatun jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñí iñi nyivi tsa ña tsitó náa cuvi yacan. Tan ña cua cuvi jacahnu ñi

tsi Nyoo tsihin un. ¹⁷ Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyee tsi tsi inga nyivi tyin ña cutuñí iñi ñi tsa caahán un. ¹⁸ Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca tandihi nyooho. ¹⁹ Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñí iñi ndo.

²⁰ Tsahnu caca iñi ndo, yañi. Tan ña lee xaan caca iñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi. ²¹ Catyí Nyoo nu libru ley ra tyehen: “Cua cahan yu tsihin nyivi ihya tsihin yuhu nyivi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo. ²² Yacan cuenda tsa caahán yo inga yuhu cuví tsi tumaa iin seña tsa cuenda nyivi tsa ña tsinú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyivi tsa tsinú iñi tsi ra. ²³ Tyin tatun tandihi ndo caahán ndo inga yuhu nu ndu iin ndo, tan quihvi iin nyivi tsa ña yihí cuenda Nyoo, o ñi tsa ña cutuñí iñi tuhun Nyoo, cua catyi ñi tyin jiñi ndo ña

vaha cuñí. ²⁴ Maa tyin tatun tandihí ndo tsahá cuenda ndo tsa caahán Nyoo tan quihví iin nyívi tsa ña yihí cuenda Nyoo, a ñi tsa ña cutuñí iñi tuhun Nyoo, cua coto ñi tyin iyó cuatyí ñi tsa cuenda tsa cutuñí iñi ñi tsa caahán ndo. ²⁵ Tan tandihí tsa iyó tsitsi añima ñi cua nacoto ñi, tan cua cuiñí tsiti ñi jacahnu ñi tsi Nyoo. Tan cua catyí ñi tyin nditsa nditsa cuii tsa nyaá Nyoo tsihin ndo.

Nacaa javahá yo culto iin cuhva vaha

²⁶ Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuaha ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhun ndo naa cuñí tsi catyí inga yuhu can. Maa tyin tandihí yacan taahán tsi cuví tsi iin tsa tsahá tunyee iñi maa Nyoo tsi tandihí ndo tsa yihí ndo cuenda ra. ²⁷ Tatun cua cahan ndo inga yuhu nu ndu iin ndo, cuñí tsi tsa cahan uvi ndo a uñi ñi ndo, maa tyin intuhun intuhun ñi ndo cahan; ña cahan tandihí ndo juvin ñi cuhva tsa caahán inga ndo. Tan inga tucu tuhun cuñí tsi tsa nacatyí tuhun inga ndo tsa caahán ndo. ²⁸ Maa tyin tun yoñi cuví nacatyí tuhun tsa caahán ndo, vaha taxin ca, ña cahan ndo tsihin inga yuhu nu ndu iin ndo. Caahan ndo tsihin Nyoo tsihin

inga yuhu tun cuñí ndo, maa tyin ndihí cuhva tsiñi ñi maa ndo. ²⁹ Tacan tucu tatun tsahá cuenda yo tsa caahán Nyoo. Caahan uvi ndo, a uñi ñi ndo. Tan tandihí ca ndo jaha ndo cuenda tun vaha tsa caahán yañi ndo. ³⁰ Maa tyin tatun jacoto Nyoo náa inga ca tuhun tsi inga nyívi tsa yucú tsiñi tuhun caahán ndo, tacan tan ra tsa nyaá caahán can, cuñí tsi jandihí ra tsa caahán ra tan cahan inga ñi. ³¹ Tan tacan tandihí nyooho tsa naquihín tuhun tsa tsahá Nyoo cuví nacatyí tuhun intuhun intuhun ndo, tyin tacan tan cutuhva tandihí nyooho tsa ndu iin vehe ñuhu tan ndu iin ca iñi ndo. ³² Nyooho tsa tsahá cuenda tsa caahán Nyoo, cuví cuatu nuu ndo nda cuanda ndihí cahan inga nyívi, ³³ tyin Nyoo ña cuñí ra tsa tavi tahan ña cahan ndo, tyin maa ra catsi iyó ra.

Quihin ndo cuhva iyó inga ca vehe ñuhu nu ndu iin nyívi yihí cuenda ra Cristo, ³⁴ tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yí ñi tumaa catyí ley Nyoo. Tan tacan taahán tucu tsi javaha nyooho. ³⁵ Tatun náa cuñí ñi coto ñi, na ndaca tuhun ñi tsi yí ñi nda yuvehe ñi, tyin ña vaha tsa cahan ñiñaha nu ndu iin ndo.

³⁶ Tatun siin cuhva tsicá iñi ndo, cuñí tsi nducuhún iñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo. ³⁷ Tatun ndáa nyooho cuñí tyin ndusu yuhu

Nyoo cuví ndo, o cuñí ndo tyin Tatyí Ii Nyoo jaquihín ityi tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuví. ³⁸ Maa tyin tatun ña cuñí ndo naquihín ndo tuhun ihya, ndi nyuhu tan ña cua naquihin ndi tuhun caahán nyooho.

³⁹ Tan tacan, yañi, nducu ndo cuhva cuhva cuenda ndo tuhun Nyoo tsi nyívi. Tan ña cási ndo nu cahan nyívi inga yuhu. ⁴⁰ Maa tyin javaha ndo tandihí tsihin tsa víi tan tsa catsi.

15

Nacaa nandoto ra Cristo

¹ Vityin yañi, cuñí yu tsa nducuhun iñi ndo tuhun ra Cristo, tsa jacacú tsi yo, tsa cahan yu tsihin ndo quívi can. Tan naquihín ndo itsi tan nñi iñi añima ndo tsinú iñi ndo. ² Tan juvin tsa cuenda tuhun ra Cristo cacú añima ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduve yahvi nyaá tsa natsinu iñi ndo tsi ra Cristo.

³ Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyí yu tyin tsihí ra tsacatyí cuatyí yo, tumaa catyí nu libru Nyoo tyin cua cuví. ⁴ Tan quihví cuñu ñuhu ra tsitsi ñuhu. Maa tyin tsinu uñi quívi nandoto ra tumaa catyí nu libru Nyoo. ⁵ Tan tsa yahá tan quituví ra nuu ra Pedro tan quituví

ndihí ra nuu tandihí ra tsicá tyiñu ra. ⁶ Yahá can tan quituví ra nuu yaha ca uhun cientu nyívi yihí cuenda ra. Tan juhva ñi can tsa tsihí ñi, maa tyin ndi iyó cuaha ca ñi nda cuanda vityin. ⁷ Yahá can tan quituví ra nuu ra Jacobo. Tacan tan quituví ndihí ra nuu tandihí ra tsicá tyiñu ra.

⁸ Tan nu ndihí ña quituví ndihí ra nuu yuhu, tsa cuví yu tumaa iin lee tsa cacú yutya. ⁹ Tyin tsa nuu tandihí ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaá ndaha xaan yu tsi nyívi yihí cuenda ra. ¹⁰ Maa tyin Nyoo vaha iñi ra tsihin yu. Yacan cuenda tsahá ra ndatu tsa cuví yu ra tsicá tyiñu ra tan ña cuatu tsahá ra tyiñu tsi yu, tyin cuaha ca tyiñu javahá yu tsihin tsi tan ñavin ca tandihí ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can. ¹¹ Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuví tuhun tsa tsinú iñi ndo.

Nu jacuahá ra Pablo tyin nditsa tsa cua nandoto ndiyí

¹² Tsa caahán ndi tsihin ndo yacan cuví tsa nandoto ra Cristo tsa yahá tsihí ra tan ¿Nacuenda yihí ndo catyí ndo tyin ña nandoto ndiyí? ¹³ Tyin tatun ña cua nandoto ndiyí, ndi ra Cristo tan ña nandoto ra quívi can. ¹⁴ Tun tsatyin

ña nandotoꝝ ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra. ¹⁵ Tan tun tsatyin ña nditsa tsa janandotoꝝ Nyoo tsi ra Cristo, cuví ndi iin ra vatya tyin catyí ndi tyin janandotoꝝ Nyoo tsi ra. Tan tatun ña nditsa tsa nandoto ndiyi, ña nditsa tsa janandotoꝝ Nyoo tsi ra Cristo. ¹⁶ Tyin tun ña cua nandoto ndiyi, ndi ra Cristo tan ña nandotoꝝ ra. ¹⁷ Tan tatun ña nandotoꝝ ra Cristo, ndi iyó cuatyí ndo, tan nduve yahvi nyaá tsinú iñi ndo tsa jahá ra tucahnu iñi cuatyí ndo. ¹⁸ Tan ndi nyívi tsa tsihi tsa yihí cuenda ra ña cacú ñi tun ña nditsa tsa nandotoꝝ ra. ¹⁹ O tun nu ñuhu ñayívi ihya ñi jatyinyeé ra tsi yo, tan ña cua quitsi ra inga tsaha, nduve yahvi nyaá tsinú iñi yo tan cuví yo nyívi soho ca tsa nuu tandihi ca nyívi.

²⁰ Maa tyin tsitó vaha yo tyin nditsa tsa nandotoꝝ ra Cristo. Tan juvin ra cuví ra tsa nandotoꝝ jihna ca tsitsi tsa tandihi ca ndiyi tsa cua nandoto. ²¹ Tyin tsacatyí cuatyí ra Adán tan tsicoo tuhun tsihi. Tan yacan tsihi nyívi nda cuenda vityin. Maa tyin tsa cuenda tsa nandotoꝝ ra Cristo cua nandoto tandihi nyívi yihí cuenda ra. ²² Tyin tumaa tsa tandihi yo tsihi tyin cuví yo tata ra Adán, tacan tucu cua nandoto tandihi yo tan coo yo ñayívi nyito tyin cuví yo nyívi ra Cristo. ²³ Maa tyin cua nandoto yo quívi taahán tsi

tsi yo. Jihna ca ra Cristo nandoto. Tan quívi quitsi ra inga tsaha cua nandoto ñi yihí cuenda ra. ²⁴ Yaha can tan cua naa ñuhu ñayívi ihya tan ña cua cundaca ñaha ca ra cumí tyiñu naha ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee iñi tsa iyó tsi tandihi nahnu, tan cua nacuhva cuenda ra can tsi Nyoo Jutu ra. ²⁵ Tyin ra Cristo cua cundaca ñaha ra nda cuanda quívi cuhva Nyoo tsa cuvi jaha canaa ra tsi tandihi nu xaan iñi tsi ra nahnu. ²⁶ Tan nu tsa cua janaa ra nu ndihi ña, nu ican cuví tuhun tsihi. ²⁷ Tyin tsa tsahá Nyoo tsa quívi ndaha ra tandihi maa tsa iyó. Maa tyin nu catyí tyin tandihi nacuhva cuenda Nyoo tsi ra Cristo, ña cuñi tsi catyí tyin quívi ndaha ndihi ra tsi maa Nyoo tyin maa Nyoo cuví ra tsahá tsa quívi ndaha ra tandihi maa tsa iyó. ²⁸ Maa tyin quívi jaha canaa ra Cristo tandihi can, tacan tan maa ra, tsa cuví ra Sehe Nyoo, cua nacuhva cuenda nyico ra tandihi tsa tsahá Nyoo tsi ra. Tyin tacan tan cundaca ñaha Nyoo tandihi maa tsa iyó.

²⁹ Tun tsatyin ña nandoto ndiyi, ¿nacuenta tyin juhva nyívi tsicoondutyá ñi tsa cuenda ndiyi? ¿Tan nacuenta javahá ñi tyehen tun ña tsinú iñi ñi tyin coo quívi cua nandoto ndiyi?

³⁰ Tan tacan tucu maa ndi, tun ña cua nandoto ndi, ¿nacuenta tyin ndoó ndi vaha

tsa nyehé ndi tundo ho ndihi quiví ñi? ³¹ Tandihí ñi quiví nducú nyiví tsi yu cahñi ñi, tan tsa nditsa cuví tsi, yañi, tumaa tsa nditsa tsa sií cuñí yu tsihin ndo, tsa cuenda tsa tsinú iñi ndo tsi Jutu Mañi yo Jesucristo. ³² Nduve náa catyí tsa nyehe yu tundo ho tsa cuñi cahñi nyiví tsi yu ñuu Éfeso tun ña cua nandoto yo. Tatun tacan, nditsa maa tsa caahán nyiví: “Catsi yo, cōho yo tyin tyaan isa cua cúu yo”, catyí ñi tsa ña tsitó.

³³ Tan catyí tucu ñi tyin: “Tun cutahán yo tsihin nyiví caquiñi jativí ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyiví tsi ndo. ³⁴ Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyehen tsihin ndo na nducahan nuu ndo.

Nu jacuahá ra Pablo nácaa cua janandoto Nyoo tsi yo quiví quitsi nyico ra Cristo

³⁵ Maa tyin yihí ndo cua ndaca tuhun ndo: “¿Nacaa cua nandoto ndiyi? ¿Nacaa cuñu ñuhu ñi cua cuví?” ³⁶ ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñí tsi tsa tyahyu jihna tsi? Tacan tan cana nuu tsi. ³⁷ Tyin tsa tatsi yo nuñi, ñavin tsa cuví maa tsi itu tan tatsi yo. Tyin nuñi cuví tsi tatsi yo tan tacan ñi cuñí tucu yo tsihin náa inga

ca tsiti. ³⁸ Nyoo javahá ra nácaa cuñí maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuví nanduví tsi inga ca tsiti. ³⁹ Tan tacan tandihí cuñu ñuhu, ña inducu caá tsi, tyin cuñu ñuhu nyiví, siin caá tsi, tan cuñu ñuhu quití nahnu, siin caá tucu can, tan cuñu ñuhu saa, siin caá tucu yacan, tan tyaca siin caá tucu can. ⁴⁰ Tan tacan tucu tsa iyó andiví, siin caá tsi. Tan siin caá tucu tsa iyó nu ñuhu ñayiví ihya. Sií xaan caá tsa iyó nda andiví, tan siin tyaqui tucu tsa iyó nu ñuhu ñayiví ihya. ⁴¹ Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu. ⁴² Tan tacan tucu tuhun tsa cua nandoto ndiyi. Tuhvá yo tsi-cutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo. ⁴³ Cuñu ñuhu tsa iyó tsi yo vityin nduve tunyee iñi iyó tsi can, nacuhví can, tan tsihi can. Maa tyin cua nandoto iin tsa sií caá tan iyó ca tunyee iñi tan ña cua cúu ca can. ⁴⁴ Tsa tsihi yo tsi-cutsí yo cuñu ñuhu tsa naquihín yo nu ñuhu ñayiví ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayiví. Tan iyó tucu cuñu ñuhu cuenda gloria.

⁴⁵ Catyí tutu Nyoo tyin ra Adán ra tsa tsicoo tsa jihna ñi, tshahá Nyoo ñayiví coo ra.

Tan ra Cristo cuví ra tumaa ra Adán maa tyin ñavin cuñu ñuhu tsahá ra tsi yo tyin tsahá ra ñayivi nyito coo yo, tyin juvin ra cuví Tatyí Ii. ⁴⁶ Tsa jihna ñi taahán tsi coo yo tsihin cuñu ñuhu cuatyí yo, yaha can tan coo yo cuenda Tatyí Ii Nyoo. ⁴⁷ Rayíi tsa tsinu tsa jihna ñi, tsihin nyaca ñuhu tsinu ra. Tan cuví ra cuenda ñuhu ñayivi. Maa tyin ra Cristo cuví ra tumaa rayíi tsa tsinu uvi tan cuví ra cuenda gloria. ⁴⁸ Tandihí yo iyó cuñu ñuhu yo tumaa tsicoo cuñu ñuhu ra Adán tsa tsinu tsihin nyaca ñuhu. Maa tyin tsa cua nandoto yo cuñu ñuhu yo cua nanduvi tsi tumaa cuñu ñuhu ra Cristo ra iyó nda andivi. ⁴⁹ Tumaa ndacu yo tsi rayíi, ra tsa tsinu tsihin nyaca ñuhu, tacan tucu cua ndacu yo tsi ra Cristo ra iyó nda gloria.

⁵⁰ Tan cuñí yu cahan yu tsihin ndo, yañi, tyin cuñu ñuhu yo ña cuví quihvi tsi nu ndacá ñaha Nyoo, tyin iin tsa yatyi tiví ña cuví quihvi can nu yihí tsa ña tuhvá tiví. ⁵¹ Tan cuñí tucu yu tsa coto ndo iin tsa xeehe tsa yoñi maa tsitó. Ña tandihí yo cua cúu, maa tyin tandihí yo tan cua nasama cuhva caá yo. ⁵² Tan nu cua ndihí tiví ángel trompeta, cua nandoto ndiyi iin yaha cuii ñi tumaa tsa ndaahvá tinuu yo. Tyin cua tiví ra trompeta tan cua nandoto nyivi tsihi tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo. ⁵³ Tyin cuñí tsi tsa nasama Nyoo cuñu ñuhu yo tsihin iin

tsa ña cua naa maa. ⁵⁴ Tan quivi cua nasama cuñu ñuhu yo tan cua ñihi yo iin tsa ña cua tiví maa, cua cundaa tsa caahán tuhun Nyoo nu catyi tsi tyehen:

“Nyoo jahá canaa ra tsi tuhun tsihi.”

⁵⁵ Yooho, Tuhun Tsihi, ¿náa tunyee iñi tsa tsicoo tsi un tyin cahñi un tsi ndi?

¿Náa jahá canaa un, yooho Tuhun Tsihi?

⁵⁶ Tyin cuatyí yo tsahá can tsa cahñi tuhun tsihi tsi yo, tyin ley tsahnu tsahá tunyee iñi tsi can. ⁵⁷ Maa tyin tyahví nyoo tsi Nyoo, yañi, tyin jaquitsi ra tsi Jutu Mañi yo Jesucristo tan tsahá ra tunyee iñi tsi yo tsa jaha canaa yo tsi nu tuhun tsihi can.

⁵⁸ Yacan cuenda yañi, cunyaa naa vaha ndo tsi Nyoo tsihin tsa ñi iñi añima ndo. Tan jañihi ca ndo jaha tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

16

Nu tsahá cuenda ra Pablo tsi nyivi nácaa taahán tsi jatyinyee ñi tsi inga ñi yihí cuenda Nyoo

¹ Tan tuhun tsa jatyinyee ndo xuhun tsi nyivi ndaahvi, ñi yihí cuenda Nyoo, javaha ndo tumaa tsahá cuenda yu tsi nyivi tsicá vehe ñuhu ñuu tsa cayucú Galacia. ² Jandu iin ndo xuhun tsa taahán tsi cuhva ndo tsi ñi tahan tahan una quivi nácaa tsahá maa Nyoo tsi ndo. Tan ña cuatu

ndo nda tsaá yu. ³Tan nacatsi ndo ndáa ra cuñí maa ndo tyin cundaca xuhun can. Tan tsa tsaá yu, cua javaha yu iin carta tyin cundaha ndíhi ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén. ⁴Tan tatun tahan tucu tsi tsa cuhun yu, cuhun ra naha tsihin yu.

Nu caahán ra Pablo ndáa ndíhi nu cua cahan ra tuhun ra Cristo

⁵Tsa cua quitsi yu nu yucú ndo ñuu Corinto, cua yaha yu ityi Macedonia. ⁶Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatyinyeé ndo luxu tsi yu tan cuhun yu inga ñuu. ⁷Ña iin yaha ñi cua yaha yu nu yucú ndo tyin cuñí yu ndoo yu juhva quiví tsihin ndo tatun Jutu Mañi yo tan cuñí ra. ⁸Maa tyin cua cunyi yu ñuu Éfeso ihya nda cuanda yaha quiví vico Pentecostés tsa jacahnú nyiví Israel. Tacan tan cua quitsi yu nu yucú ndo. ⁹Cua ndoo yu juhva quiví ihya tyin tsahá xaan tsi cuhva caahán yu tuhun Nyoo tsihin nyiví vasu ndi maa cuaha ñi ña taahán iñi ñi tuhun ra.

¹⁰Tatun tsaá ra Timoteo nu yucú ndo, na cunyi ra tsihin ndo. Tan vaha tyánuu ndo tsi ra tyin juvin ñi tyiñu Jutu Mañi yo jahá tyiñu ra tumaa maa yu. ¹¹Tan vaha cuñi ndo nyehé ndo tsi ra. Tan jatyinyee ndo tsi ra na quitsi ra nu nyii yu tyin ndatú yu

tsi ra tsihin inga ca ra yañi yo naha ra.

¹²Tan ra Apolos yañi yo, cahan ndaahvi xaan yu tsihin ra na quitsi ra nu yucú ndo tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

Nu tsahá ra Pablo nacumi tsi tandíhi nyiví yihí cuenda Nyoo ñuu Corinto

¹³Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo. ¹⁴Tandíhi tsa javahá ndo, javaha ndo tsa cuenda tsa cuñí ndo tsi Nyoo tan tsi nyiví yihí cuenda ra.

¹⁵Yañi, tsitó ndo tyin jihna ca nyiví ra Estéfanas natsinu iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano. ¹⁶Tan cuñi yu tsa jaha ndo tsa ñayiví tsi nyiví tsa iyó tumaa iyó nyiví ra Estéfanas, tan tsi tandíhi ca ñi tsa jatyinyeé tan jahá tyiñu cuenda Nyoo. ¹⁷Tan sii xaan cuñi yu tyin quitsi ra Estéfanas, ra Fortunato, tan ra Acaico. Tan jatyinyeé ra naha tsi yu tyin nyooho ña cuví quitsi ndo tyin cañi xaan ñuu ndo. ¹⁸Maa tyin maa ra naha quitsi ra naha. Tan jandunyeé ca ra naha iñi yu tsihin tuhun Nyoo, tumaa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

¹⁹ Tan vatsí nacumi tsi ndo jahá tandihí nyívi yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iín yuvehe ñi.

²⁰ Vatsí nacumi tsi ndo jahá tandihí ra yañi yo, tan cūhva ndo nacumi tsi tsa intuhun intuhun ndo nu yucú ndo juvin.

²¹ Tan yuhu ra Pablo tsahá yu nacumi tsi ndo tan tyaa yu itsi tsihin ndaha yu.

²² Tatun ndáa nyívi ña cuñí tsi Jutu Mañi yo Jesucristo, na cūhun ñi anyaya. Maa tyin yuhu catyí yu: ¡Jutu Mañi yu, ñaha!

²³ Tan na nasoco Jutu Mañi yo Jesucristo tsi tandihí ndo.

²⁴ Tan catyí yu tsihin ndo tyin yuhu cuñí yu tsi tandihí ndo tsa cuenda ra Cristo Jesús.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Nyivi Yihi Cuenda Nyoo Ñuu Corinto

Nu tyaá ra Pablo iin carta cuenda nyivi yihí cuenda Nyoo ñuu Corinto

¹ Yuhu ra Pablo, cuví yu iin ra tavá tyiñu ra Cristo Jesús tyin maa Nyoo nacatsi tsi yu. Yuhu tan ra Timoteo, yañi yo, jaquitsí ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihi ca nyivi yihí cuenda Nyoo tsa iyó inga ñuu tsa cayucú nani cahnu Acaya. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu nyehé xaan ra Pablo tundoho nu tsicá ra caahán ra tuhun ra Cristo

³ Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusí ra iñi yo tandihi ñi tsaha. ⁴ Nyuhu nyehé xaan ndi tundoho maa tyin maa ra jandusí iñi ndi. Tyin tacan tan cuví jandusí ndi iñi nyivi nyehé tundoho tumaa jandusí maa ra iñi ndi. ⁵ Tyin nyehé ndi tundoho

tsa cuenda ra Cristo, tan juvin ñi tsa cuenda ra jandusí Nyoo iñi ndi. ⁶ Yacan cuenda tatun nyehé ndi tundoho tsa cuenda tsa jacoto ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusí Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyoocho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi. ⁷ Tyin tsitó vaha ndi tyin jandusí ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

⁸ Yañi, cuñí ndi tsa coto ndo tyin cuaha xaan tundoho nyehé ndi tsa tsiyucu ndi ñuhu Asia. Ñihi xaan nducu cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñi maa ndi tyin cua cúu ndi tsa ndi cumañi ca quita ndi ican. ⁹ Tsa nyehé ndi tyin tsa cuñí cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñi iñi ndi tyin cuñí tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi. ¹⁰ Nyoo jacacu tsi ndi quivi can, tan juvin ra jacacú tsi ndi nda cuanda vityin. Tan tsitó ndi tyin tacan ñi maa cua jacacu ra tsi ndi, ¹¹ tun nyoocho tan ña jandihí ndo tsa jatyinyeé ndo tsi ndi tsihin tsa tsicán tahvi

ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

Nu caahán ra Pablo nacuenda ña tsahán ra ñuu Corinto

¹² Iyó iin tuhun tsa tsahá tsa sii xaan cuñí ndi tan tuhun ihya cuví tsa cuítí iyó ndi, tan ndaa iyó ndi tsihin tandihi nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi. ¹³⁻¹⁴ Nu tutu tsa tsa yaha jaquitsi ndi tsi ndo, tyaá ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñi ndi tsa cutuñi vaha ca iñi ndo tandihi tuhun can tyin tacan tan sii cua cuñi ndo tsihin ndi quivi quitsi Jutu Mañi yo Jesucristo. Tan sii cua cuñi tucu nyuhu tsihin nyooho.

¹⁵⁻¹⁶ Tsa cuenda tsa tsitó vaha yu tyin tacan cua cuvi: tyaá yu cuhva tyin tsa cua cuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cuhun yu Macedonia tyin tacan tan cuví cusii iñi ndo. Tan tsicá tucu iñi yu tyin yaha can tan cuví jatyinyee ca ndo tsi yu tan cuhun yu Judea. Tyehen tyaá yu cuhva javaha yu, maa tyin ña cuví. ¹⁷ ¿A cuñi maa ndo tyin ña tyaá yu cuhva quitsi

yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyí ñi tyin vaha, maa tyin tsitsi aña ñi catyí ñi tyin ña vaha. Caahán ñi nduvi tuhun can tsa iin ñi cuhva. ¹⁸ Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu.

¹⁹ Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra. ²⁰ Tan tsa cuenda ra ñihí yo tandihi tsa vaha tsa catyí Nyoo tyin cuhva ra tsi yo. Yacan cuenda tsa jacahnú yo tsi Nyoo, catyí yo tyehen: “Na cuvi tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo. ²¹ Nyoo cuví ra tsahá tunyee iñi tsi nyuhu tsa cuenda ra Cristo, tan tsahá ndihi tucu ra tunyee iñi tsi nyooho. Nacatsi ra tsi yo, ²² tan tsahá ra Tatyí li ra coo aña yo, tan cuví tsi tumaa iin tuñi tsa tyaá ra tsi yo tan janahá tsi tsi yo tyin cua ñihi yo tsa cua cuhva ra tsi yo.

²³ Ñaha ca maa quitsi nyico yu nu yucú ndo, tyin ña cuñi yu janducuihaya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe maa Nyoo náa cuñi ra tsihin yu. ²⁴ Caahán ndi tandihi tuhun ihya tsihin ndo tsa cuenda tsa cuñi ndi jatyinyee tahan yo tsi yo tan coo ca tusii iñi

Nyoo tsi ndo. Ña cuñi ndi quihí ndaha ndi tsi ndo tyin nyooho tsa tsinú vaha maa iñi ndo tsi Nyoo.

2

¹ Yacan cuenda ña cuñi yu quitsi yu tyin tacan tan ña cuhva ca yu tucuihya iñi tsi ndo. ² Tyin tatun yuhu tan janducuihyá yu iñi ndo, yofni cua jandusi iñi tsi maa yu. Tyin nyooho ña cuvi ca jandusi ndo iñi yu tun tsa yahá janducuihya yu iñi ndo. ³ Yacan cuenda carta ñi jaquitsi yu tsi ndo. Ña cuñi yu quitsi yu tyin ña cuñi yu janducuihya ndo iñi yu tsihin cuhva iyó ndo. Tyin taahán tsi jandusi ndo iñi yu. Tyin tatun si cuñi yuhu, tsitó yu tyin tandihí yo tan si cuñi yo. ⁴ Quivi tsa tyaa yu carta can tsa cuenda ndo, tsica xaan iñi yu. Cuihya xaan cuñi yu tan nda cuenda tsacu yu. Jaquitsi yu carta can tsi ndo maa tyin ñavin tsa cuenda tsa janducuihya yu iñi ndo. Jaquitsi yu can tsa cuenda tsa cuñi yu tsa coto ndo tyin cuñi xaan yu tsi ndo.

Nu tsahá cuenda ra Pablo tsi nyivi nácaa taahán tsi jaha ñi tucahnu iñi

⁵ Ra tsa tsahá tucuihya iñi, ñavin yuhu ñi janducuihya ra iñi. Tyin janducuihya tucu ra luxu iñi nyooho. Caahán yu tyehen tyin tacan tan ña cuñi ndo tyin ña cuvi coo tucahnu iñi tsi ra javahá tacan. ⁶ Tsa iyó vaha ñi. Ña cahan ca ndo tsi ra can. Ña tatsi tuñi ca ndo tsi ra. ⁷ Vityin taahán

tsi jaha ndo tucahnu iñi tsi ra tan naquihin ndaahvi ndo tsi ra, tyin tacan tan ña cuihya xaan ca cuñi ra. ⁸ Yacan cuenda cuñi yu tsa cahan ndo tsihin ra tan janaha ndo tsi ra tyin ndi cuñi ndo tsi ra. ⁹ Jaquitsi yu carta can tsi ndo quivi can tyin cuñi yu coto yu tatun cua tyaa yahvi ndo tsa tsahá cuenda yu tsi ndo. ¹⁰ Tan vityin nyivi tsa jahá nyooho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo. ¹¹ Tyin tacan tan ña cuvi jaha canaa nu ña vaha tsi yo. Tyin tsitó vaha yo nácaa cuñi nu jandavi ñaha nu tsi yo.

Ra Pablo ña ndoo ra ñuu Troas tyin ña nañihí ra tsi ra Tito

¹² Quivi tsaá yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo. ¹³ Maa tyin tuñu xaan cuñi yu, tyin ña nañihí yu tsi ra Tito, yañi yo. Yacan cuenda vatsí yu ityi Macedonia ihya tan ña ndoo yu ndacan cahan yu tsihin nyivi.

Nu caahán ra Pablo tuhun ra Cristo tsihin tsa ñi iñi añima ra

¹⁴ Maa tyin tyahvi nyoo tsi Nyoo tyin tacan ñi jahá canaa yo tsihin tunyee iñi ra Cristo Jesús tan tsahá ra tsa caahán ndi tuhun ra tsihin nyivi. Tan

tuhun ra tsa caahán ndi, cuví tsi tumaa iin xico tami tsa caná tandihí ñi ityi nu cuahán ndi. ¹⁵ Tyin nyuhu cuví ndi tumaa xico tami ra Cristo tsa cuenda Nyoo. Tan tandihí ñi ityi cuahán ndi tan ñihí nyivi xico tami can, tahan ñi nyivi tsa cua cacu tan ñi tsa ña cua cacu. ¹⁶ Maa tyin tsa cuenda nyivi tsa ña cua cacu, ndasi caná tsi, tan cuñí maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú iñi ñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin ¿yóo cuví jaha tyiñu tyiñu ihya? ¹⁷ Nyuhu ña javahá ndi tumaa javahá ra tsicá nuu cuaha naha ra. Ra ícan naha ra cuñí ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi iñi añima ndi tyin iin ñi cuví ndi tsihin ra tan maa Nyoo tava tyiñu tsi ndi tsa cahan ndi tyin cuenda ra Cristo yihí ndi.

3

Tuhun tsa tsa ndoo ra Cristo tsihin yo

¹ Tsa caahán ndi tuhun ihya, ¿a cuñí maa ndo tyin caahán ndi tacan tsa cuñí ndi nduyaa ndi? Ñavin. ¿A cuñí tsi cuhva ndi iin carta tsa catyí tyin vaha nyivi cuví ndi? ¿O cuñí tsi ndacan ndi carta tsi ndo tumaa javahá juhva nyivi? ² Ña cuñí tsi. Tyin tsa

tyaa Nyoo tsi ndo añima ndi, tan maa ndo cuví carta tsa cuenda ndi. Yacan cuenda ña tsiñí ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo. ³ Tan catsi nyehé ñi tyin cuví ndo carta tsa tyaa ra Cristo tsa cuenda ñi, tan nyuhu nacuhva cuenda ndi carta can tsi ñi. Tan ña tyaa ra Cristo itsi tsihin tyinta maa tyin tyaa ra itsi tsitsi añima ndo tsihin Tatyí Ii Nyoo nyito. Tan ñavin nu yuu tsinyaa tsi.

⁴ Caahán ndi tyehen tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatyinyeé ra Cristo tsi ndi. ⁵ Ña cana iñi ndi caca iñi ndi tyin javahá ndi náa javahá ndi tsihin tunyee iñi maa ndi. Tyin tsitó ndi tyin tandihí tsa javahá ndi tan maa Nyoo javahá can. ⁶ Tan tsahá ra tunyee iñi tsi ndi tsa cahan ndi tuhun ra Cristo, tan tuhun ihya cuví tuhun tsa tsa tsahá ñayivi tsa coo yo tyin iyó Tatyí Ii ra añima yo. Ley tsa tsahá Nyoo tsi ra Moisés ña tsahá tsi ñayivi tsa coo yo tyin janahá ñi tsi tsi yo tyin iyó cuatyí yo tan taahán tsi cúu yo.

⁷ Ley tsahnu can tsinyaa nu yuu tsihin letra, tan cahnu xaan cuví tsi. Yacan cuenda tsa tsa ra Moisés tsihin tsi nu yucú nyivi Israel, nayuhvi xaan ñi nyehé ñi nuu ra tyin xiñu xaan nuu ra cuví. Maa tyin tsindihí tsa xiñu can. Tatun tacan cuví quivi quitsi

ley tsa tsahá tuhun tsiihí,
 8 iyaha ca cahnu cuví tuhun
 tsa ndoó Nyoo tsihin yo tsa
 tsahá Tatyí Ii ra tsi yo! 9 Tatun
 cahnu cuví ley tsahnu tsa
 jacuhún tsi yo anyaya, yaha
 ca cahnu cuví tuhun tsa
 tsa ndoó Nyoo tsihin yo tyin
 janduvahá tsi tsi yo nuu ra.
 10 Nditsa tyin cahnu cuví
 ley tsahnu can. Maa tyin
 vityin tsitó yo tyin yaha ca
 cahnu cuví tuhun ra Cristo
 tsa jacacú tsi yo nuu Nyoo.
 11 Tyin tatun cahnu cuví tsa
 tsicoó juhva ñi tyembu, yaha
 ca cahnu cuví tsa ña cua
 cundihi maa.

12 Tsitó vaha ndi tyin ña
 cua cundihi tsi. Yacan cuenda
 caahán ndi tsihin tsa ñi iñi
 añima ndi. Ña cahan nuu
 ndi tan ña yuuhví ndi caahán
 ndi. 13 Tan ña javahá ndi tu-
 maa javahá ra Moisés. Tyin
 ra Moisés tyasí ra nuu ra tsi-
 hin jahma, tyin tacan tan ña
 nyehe nyivi Israel nu cua naa
 tsa xiñu nuu ra. 14 Quivi can
 ña cutuñi iñi ñi. Nda cuanda
 vityin tan ña cutuñi iñi ñi.
 Tyin tatun cahví ñi ley tsahnu
 ña cutuñi iñi ñi itsi tyin ndasí
 tsa tsiñi tuñi jiñi ñi tumaa
 tsindasí nuu ra Moisés quivi
 can. Yoñi maa cuví jatsiyo
 yacan tyin intuhun ñi maa ra
 Cristo cuví jatsiyo can. 15 Nda
 cuanda vityin tan ña cutuñi
 iñi ñi ley tsa tyaa ra Moisés
 tun cahví ñi itsi. Tyin ndasí
 tsa tsiñi tuñi iñi ñi. 16 Maa
 tyin tatun nacuhva cuenda
 ñi tsi ñi tsi Jutu Mañi yo,
 maa ra cua nuña tsa tsiñi
 tuñi iñi ñi. 17 Tyin Jutu Mañi
 yo, Tatyí Ii cuví ra. Tan

tatun iyó Tatyí Ii Jutu Mañi
 yo añima yo, tsitó yo tyin ña
 yihí ndaha ca ley tsahnu tsi
 yo. 18 Yacan cuenda tandihi
 yo tan ña ndasí ca nuu yo. Tan
 vityin cuví yo tumaa inu, tyin
 cuví nyehe nyivi tsa cahnu
 cuví Jutu Mañi yo jahá yo.
 Tan cuahán nduvahá ca yo
 jahá Tatyí Ii ra.

4

1 Nyoo nyehe ndaahvi ra
 tsi ndi, tan tava tyiñu ra tsi
 ndi tsa cahan ndi tuhun ra
 tsihin nyivi yacan cuenda ña
 ndu uvi iñi ndi. 2 Tandihi
 tsa javahá ndi, ña tuhvá ndi
 javahá xeehe itsi, tan ndi ña
 javaha ndi tsa tsahá ticanuu.
 Ña tsicá nuu ndi jandaví ñaha
 ndi tsi nyivi. Maa ñi maa
 tuhun Nyoo jacuahá ndi. Ña
 sacá nuu ndi tuhun Nyoo
 tsihin inga ca tuhun. Tan
 caahán ndaahvi ndi tsihin
 tandihi ñi nyivi, na jaha vaha
 ñi cuenda tyin tandihi tsa
 caahán ndi, tan nda maa nuu
 Nyoo javahá ndi, tan maa
 ñi maa tsa nditsa cuví tsi.
 3 Nyuhu ña tyihí xeehe ndi
 tuhun Nyoo. Maa tyin yihí
 xeehe tsi tsa cuenda nyivi
 ndasí tsa tsiñi tuñi iñi, ñi tsa
 cua cunaa. 4 Nu ña vaha,
 nu ndacá ñaha tsi nyivi iyó
 nu ñuhu ñayivi ihya, juven nu
 tyasí tsa tsiñi tuñi iñi ñi, tyin
 tacan tan ña tsinu iñi ñi tsi
 Nyoo, tan ña nyehe ñi tsa
 nditsin ra, tan ña cutuñi iñi
 ñi nácaa jacacú ra Cristo tsi
 yo, ra iin ñi cuví tsihin Nyoo.
 5 Ñavin tuhun maa ndi caahán
 ndi. Tyin tuhun ra Jesucristo

caahán ndi tsihin nyivi tyin juvin ra cuví Jutu Mañi yo. Tan nyuhu musu ñi ndo cuví ndi tyin cuñi ndi tsi ra. ⁶ Nyoo catyi tyin ndunditsin nu naa quivi tsinu ñuhu ñayivi. Tan juvin ñi ra jandunditsin tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

Iyó yo ñayivi tsa tsihin tsa tsinú iñi yo tsi Nyoo

⁷ Tsa cuca Nyoo, tsa cuví tunyee iñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisi ñuhu tan naquihín yo itsi. Juvín tsi janahá tsi nyivi tyin maa Nyoo tsahá tunyee iñi ra tsi yo tan ñavin tunyee iñi maa yo cuví tsi. ⁸ Yacan cuenda vasu ndi maa nyehé xaan ndi tundoho tandihí ñi nu cuahán ndi, ña ndu uví iñi ndi. Yihí tsaha ña tsitó ndi nácaa quita ndi nu tundoho nyehé ndi, maa tyin nyitá iñi ndi tyin cua quita vaha ndi. ⁹ Vasu ndi maa nyaá ndaha nyivi tsi ndi, maa tyin ña nacoo ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyivi, maa tyin ña tsiihí ndi. ¹⁰ Tandihí ñi nu cuahán ndi tan nyicún tuhun tsiihí tsi ndi tsa cuenda tsa caahán ndi tuhun ra Jesús. Tyin tacan tan nyehe nyivi tyin iyó ndi ñayivi ra. ¹¹ Tsitsi tsa ndi iyó ndi nu ñuhu ñayivi ihya tandihí ñi quivi tan ndatú ndi tuhun tsiihí tyin tandihí ñi quivi tan nducú

nyivi cahñi ñi tsi ndi tsa cuenda ra Cristo. Tan tsihin tsa taahán ndi janahá tyin iyó ñayivi ra añima ndi. ¹² Yacan cuenda nyuhu tandihí ñi tsaha nyicún tuhun tsiihí tsi ndi tyin caahán ndi tuhun ra Cristo tsihin nyivi. Maa tyin nyooho, iyó ndo ñayivi ra Cristo tsa cuenda tuhun ra tsa cahan ndi tsihin ndo.

¹³ Tsinú iñi ndi tsi Nyoo tumaa tsinu iñi ra David tsi ra. Tumaa catyi ra nu libru Salmos: “Tsinú iñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú iñi ndi tsi Nyoo, yacan cuenda caahán ndi tuhun ra. ¹⁴ Tyin tsitó ndi tyin Nyoo, ra janandoto tsi Jutu Mañi yo Jesucristo, cua janandoto ndihí ra tsi ndi. Tan cua ndu iin ndo tsihin ndi, tsahan cua cundaca ra tsi yo iin caa ñi nda gloria. ¹⁵ Tandihí tuhun ihya cuví tsa cuenda tsa vaha tsi nyooho tan tsa vaha tsi cuaha ca nyivi. Tyin tun cuaha ndo naquihin tsa vaha Nyoo, cuaha xaan ndo cua nacuhva tyahvi nyoo tsi ra, tan cua jacahnu ndo tsi ra.

¹⁶ Yacan cuenda ña ndu uví maa iñi ndi, vasu ndi maa cuahán ndutsahnú cuñu ñuhu ndi, tyin ñayivi tsa tsa iyó ndi ndutsaá tsi tan iin tan iin quivi. ¹⁷ Tundoho tsa nyehé ndi nu ñuhu ñayivi ihya, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria. ¹⁸ Yacan cuenda ña tyaá iñi ndi tsa cuví nyehe yo. Tyin nyitá iñi ndi tsa ña cuví nyehé yo. Tyin

tsa cuví nyehé yo juhva cuii ñi tyembu tsicoó can. Maa tyin tsa ña cuví nyehé yo, ña cua cundihi maa tsa iyó tsi.

5

¹ Tsitó yo tyin quivi cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihi maa tsa cuenda intuhun intuhun yo. Tan ican cua cuyucu añima yo. Iyó can nda gloria tan ñavin ra ñuhu ñayivi ihya javaha can. ² Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñí yo cuhun yo coo yo tsitsi cuñu ñuhu vaha tsa cua cuhva Nyoo tsi yo. ³ Cuhun añima yo tsitsi tsa tsahá Nyoo. Tan cua cunditsi yo itsi tumaa nditsi yo jahma tyin tacan tan ña cua cutandii añima yo. ⁴ Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñí yo. Maa tyin ña ndaahvi cuñí yo tsa cuenda tsa cuñí yo quita añima yo tsitsi cuñu ñuhu yo tan cutandii tsi. Ndaahvi cuñí yo tsa cuenda tsa cuñí yo coo añima yo tsitsi tsa ña cua cundihi maa, tyin tacan tan coo cuii yo. Tan cua cundihi tsa tañi ñi tsicoo jaha tsa ña cua cundihi maa. ⁵ Tan Nyoo tyaá ra cuhva tyin tacan cua javaha ra tsihin yo. Tan tsahá jihna ñi ra Tatyí Ii ra tsi yo tyin tacan tan cuita iñi yo tyin cua cuhva ra tandihi ca tsa cua cuhva ra tsi yo.

⁶ Yacan cuenda nyitá iñi ndi tsi Nyoo tsihin tsa ñi iñi añima ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria. ⁷ Vasu ndi maa ña cuví nyehe yo tsi ra, maa tyin iyó yo nu ñuhu ñayivi ihya tsihin tsa tsinú iñi yo tsi ra. ⁸ Nyitá iñi ndi tsi ra tan cuñí ndi quita ndi tsitsi cuñu ñuhu ihya tan cuhun ndi coo ndi tsihin Jutu Mañi yo. ⁹ Yacan cuenda tsitsi tsa ndi iyó ndi tsihin cuñu ñuhu ihya, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tsihin Jutu Mañi yo nda gloria. ¹⁰ Tyin tandihi yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javaha yo quivi tsicoo yo tsitsi cuñu ñuhu yo cuenda nu ñuhu ñayivi ihya.

Nu tsahá cuenda ra Pablo nácaa cuví coo vaha yo tsihin Nyoo

¹¹ Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa caahán ra. Yacan cuenda nducú ndi cuhva cahan ndi tsihin nyivi na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñí ndi tsa coto tucu nyooho. ¹² Caahán ndi tyehen, maa tyin ñavin tsa cuñí ndi nduyaa ndi tyin caahán ndi tsa cuenda

t_{sa} cuñí ndi t_{sa} nducuhun iñi ndo tyin caahán ndi t_{sa} nditsa, tan cusii ca iñi ndo tan ñihi ndo cuhva cahan ndo tsihin inga ca ra t_{sa} nduyaá naha ra. Catyí ra naha tyin vaha iyó ra naha tsihin Nyoo, maa tyin tsitsi añima ra naha maa ñi t_{sa} ña nditsa iyó. ¹³ Tatun caahán ndi tuhun Nyoo, catyí juhva nyivi tyin jiñi ndi sana. Nditsa, sana iñi ndi maa tyin t_{sa} cuenda Nyoo, tyin tuhun maa ra caahán ndi. Tan tatun vaha cuñí ndi, t_{sa} cuenda nyooho vaha cuñí ndi. ¹⁴ Tan tsitó ndi tyin intuhun ñi ra Cristo tsihi t_{sa} cuenda tandihi nyivi ñuu ñayivi. Tacan tan tsihi tandihi yo. [T_{sa} tsihi yo cuñí tsi catyi tyin nacoó yo t_{sa} javahá yo cuhva cuñí maa yo.] Tan t_{sa} tyehen tsitó yo t_{sa} tsihi ra Cristo t_{sa} cuenda t_{sa} cuñí xaan ra tsi yo, jañiñi tsi tsi yo t_{sa} cahan yo tuhun ra tsihin nyivi. ¹⁵ Ra Cristo tsihi ra t_{sa} cuenda tandihi yo tyin tacan tan coo yo cuhva cuñí maa ra tan ñavin cuhva cuñí maa yo tyin tsihi ra tan nandoto ra t_{sa} cuenda tandihi yo. ¹⁶ Vityin tan ityi nuu, ña caca ca iñi yo nyehe yo cuhva iyó nyivi tumaa tsicá iñi nyivi ña tsitó tsi Nyoo. Tsicoo quivi tacan tsicá iñi yo nyehe yo tsi ra Cristo cuñi yo tyin ra ñuhu ñayivi ñi cuví ra. Maa tyin vityin ña tsicá ca iñi yo tacan. ¹⁷ Tyin quivi nacuhva cuenda yo tsi yo tsi ra Cristo, jandutsaa ra añima yo. Tan nanduví yo nyivi t_{sa} jahá ra. Tan tandihi tuhun t_{sa} tsicá iñi yo nu quitsi ca tsi, ña tsicá

ca iñi yo can vityin ihya tyin t_{sa}h_a ra t_{sa} tsiñi tuñi t_{sa} tsi yo.

¹⁸ Maa Nyoo javahá tandihi yacan tyin vityin iyó vaha yo tsihin ra jahá ra t_{sa} cuenda ra Cristo Jesús. T_{sa}h_a cuenda ra tsi yo tyin cuñí tsi jacoto yo tsi nyivi nácaa javaha ñi tan cuví coo vaha ñi tsihin ra. ¹⁹ Tyin maa ra t_{sa} yahá nduvahá iyó ra tsihin ñi t_{sa} cuenda t_{sa} tsihi ra Cristo t_{sa} cuenda cuatyí ñi. Nyoo jahá ra tyin nduve ca cuatyí ñi nuu ra. Tan tava tyiñu ra tsi yo t_{sa} jacoto yo tuhun ihya tsi ñi. ²⁰ Yacan cuenda cuví ndi ra tava tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin sivi ra Cristo, na nduvaha coo ndo tsihin Nyoo. ²¹ Ra Cristo ña javahá ra ndi intuhun cuatyí. Maa tyin Nyoo jaquitsi ra tsi ra nu ñuhu ñayivi ihya; quitsi cúu ra t_{sa} cuenda tandihi cuatyí yo. Tyin tacan tan cuví jacacu ra tsi yo, tan t_{sa} cuenda ra Cristo, nduvahá yo jahá t_{sa} vaha Nyoo.

6

¹ Yañi, iin caa ñi jahá tyiñu yo tyiñu Nyoo. Yacan cuenda caahán ndaahvi xaan ndi tsihin ndo tyin cuatyíñu ndo tandihi t_{sa} vaha t_{sa} t_{sa}h_a ra tsi intuhun intuhun ndo. ² Tyin catyí Nyoo nu tutu ra tyehen:

Quivi tahañ tsi t_{sa} jacacu yu tsi un, tsiñi yu t_{sa} cahan un

tan jatyinyee yu tsi un, catyí Nyoo.

Jaha ndo cuenda tyin vityin cuví quivi taahán tsi. Tan vityin cuví quivi jacacú Nyoo tsi yo.

³ Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyivi tyiñu Nyoo tsa javahá ndi. ⁴ Tan cuñí ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé iñi ndi náa ndihi tsa taahán ndi, náa tundoho, tan náa tisihi. ⁵ Vasu ndi maa cañi nyivi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan iñi ndi. Tan ñihi xaan jahá tyiñu ndi nda cuanda tsi-coó nyito ndi, tan tsi-socó ndi.

⁶ Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan iñi ndi nyehé ndi tandihi maa nuu tundoho tan ña tsihihi ndi tisihi. Vaha iñi ndi, tan cuñi xaan ndi tsi nyivi tyin iyó Tatyí Ii Nyoo aña ndi. ⁷ Caahán ndi maa ñi maa tuhun Nyoo tsa nditsa.

Iyó tunyee iñi ra tsihin ndi. Tan tsatyíñu ndi tandihi tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha. ⁸ Yihí quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihí tsaha catyí ñi tyin cuendu caahán ndi tan inga tucu tsaha catyí ñi tyin tsa

nditsa caahán ndi. ⁹ Iyó tsaha jahá ñi tyin ña nacotó ñi tsi ndi, tan yihí tsaha jacahnú tucu ñi tsi ndi. Iyó quivi tsa yatyin ña cúu ndi, maa tyin ña tsihihi ndi tan ndi iyó ca ndi. Iyó quivi tatsi tuñi nyivi tsi ndi, maa tyin ña tsahñi tucu ñi tsi ndi. ¹⁰ Vasu ndi maa cuihya cuñi ndi iyó tsaha, maa tyin ña tsindihí tsa sihi cuñi ndi. Iyó tsaha ndaahvi ndi, maa tyin cuaha nyivi janducucá ndi tsihin tuhun Nyoo. Vasu nduve náa iyó tsi ndi, maa tyin tandihi maa tsa iyó tan tsihi maa ndi cuví.

¹¹ Nyooho nyivi ñuu Corinto; caahán catsi ndi tsihin ndo tsihin tsa ñi iñi aña ndi tyin nditsa tsa cuñi xaan ndi tsi ndo. ¹² Nyuhu, ña ndasi cuñi ndi nyehé ndi tsi ndo, Maa ndo cuví ndo ndasi cuñi nyehé tsi ndi. ¹³ Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo aña ndo, tumaa tsa javahá maa yu tsihin ndo. Tan ña ndasi ca cuñi ndo nyehé ndo tsi ndi, tyin maa ndi ña ndasi cuñi ndi nyehé ndi tsi ndo.

Vehe Nyoo nyito cuví yo tyin iyó ra aña ndo

¹⁴ Ña ndu iin ndo tsihin nyivi ña tsinú iñi tsi Nyoo tyin ña nacatsi tahan aña ndo tsihin aña ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa. ¹⁵ Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú iñi tsi ra, ña cuví ndu iin yo tsihin nyivi ña tsinú iñi tsi

ra. Tyin tun ndu iin yo tsihin ñi ña cua nacatsi tahan coo yo tsihin ñi. ¹⁶ Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña jachanu ndo tsitoho tyin vehe Nyoo nyito cuví yo, tumaa catyí maa ra tuhun yo tahan tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuvi Nyoo ñi, tan maa ñi cua cuvi nyívi yu, catyí ra.

¹⁷ Yacan cuenda catyí ra:

Quita ndo mahñu nyívi ña tsinú iñi tsi yu.

Ña cutahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

¹⁸ Tan cuvi yu jutu ndo.

Tan cuvi ndo sehe yu, catyí Jutu Mañi yo, ra iyó tandihi tunyee iñi tsi.

7

¹ Yañi, yacan cuví tsa tsahá Nyoo tsi yo, yacan cuenda cuñí tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca iñi yo tsa ña vaha. Cuiti coo yo tyin tyaá yahvi yo tsi Nyoo.

Nu nacatyí tuhun ra Pablo nácaa nasama cuhva iyó nyívi yihí cuenda Nyoo ñuu Corinto

² Yañi, caahán ndaahvi yu tsihin ndo, vaha cuñi ndo nyehe ndo tsi ndi tyin nduve maa náa javaha ndi tsi ndi intuhun ndo. Tan ndi ña jativí ndi tsi ndi intuhun ndo. Tan ña jandaví ñaha ndi tsi ndi

intuhun ndo. ³ Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyí yu tsihin ndo nda nu quitsí ca tsi, tyin nditsa tsa cuñí yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuví yo tsihin ra; o tatun cúu yo, iin ñi cua cuvi tucu yo tsihin ra. ⁴ Tsitó vaha yu tyin cua javaha ndo tsa vaha, yacan cuenda si xaan cuñí yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca iñi añima ndi. Tan si xaan ca cuñí ndi.

⁵ Nda quívi tsaá ndi Macedonia ihya, tan ñaha ca maa quitatu ndi. Tyin cuaha xaan tsihi tan tundoho nyehé ndi tandihi ñi ityi cuahán ndi. Cañi tahan nyívi tsihin ndi. Tan tsicá xaan iñi ndi tyin ña tsitó ndi tun cua quita vaha tyiñu jahá ndi. ⁶ Maa tyin Nyoo, tacan ñi maa jandu iin ra iñi yo tun cuiihya cuñi yo. Tan jandu iin xaan ra iñi ndi quívi tsaá ra Tito nu yucú ndi ihya. ⁷ Tan ñavin tsa cuenda tsa tsaá ñi ra, maa tyin si cuñí tucu ndi tsa cuenda tsa jandu iin xaan ndo iñi ra. Nacatyí tuhun ra tsihin ndi tyin cuñí xaan ndo nyehe ndo tsi ndi. Tan catyí tucu ra tyin tsacú xaan ndo tsa cuenda tsa cuiihya cuñí ndo. Tan ñuhú xaan iñi ndo tsi yu. Tsa tsito yu yacan, si xaan ca cuñí yu cuví.

⁸ Quívi can tsicá xaan iñi yu tyin tsaha yu tucuiihya iñi tsi ndo tsihin carta tsa jaquitsí yu tsi ndo. Tan ndu

uv̄i iñi yu tsa jaquits̄i yu carta can tsi ndo. Maa tyin juhva ñi quiv̄i nducuiihya iñi ndo. Tan vityin ña tsicá ca iñi yu tsa cuenda tucuiihya iñi tsa tsah̄a yu tsi ndo. ⁹ Tan vityin s̄i xaan cuñi yu. Ñavin tsa cuenda tsa tsicoo ndo tucuiihya iñi, tsa cuenda tsa ndu uv̄i iñi ndo cuatyí ndo jah̄a tucuiihya iñi can. Tan cunyeē xaan iñi ndo nyehe ndo tucuiihya iñi kuhva taahán maa iñi Nyoo. Yacan cuenda vaha javah̄a ndi tsa tsah̄a ndi tucuiihya iñi tsi ndo. ¹⁰ Tyin tun cunyeē iñi yo nyehe yo tucuiihya iñi kuhva cuñi maa Nyoo, cua nasama kuhva iyó yo tacan tan cua cacu yo. Yacan cuenda na s̄i cuñi yo tun nyehé yo tucuiihya iñi kuhva cuñi maa Nyoo. Tyin tucuiihya iñi tsa iyó tsi nyiv̄i tsa ña tsitó tsi Nyoo maa ñi anyaya ñihí ñi tsihin can. ¹¹ Nyooho cunyeē iñi ndo nyehe ndo tucuiihya iñi tumaa kuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuiihya iñi can. Jandāa vaha ndo cuatyí ra can. Cuxaan ndo tsi ra. Tan nayuhv̄i tucu ndo tsi Nyoo. Tsah̄a cuenda vaha ndo nácaa cuahán tyiñu can. Yaha can tan nda cuanda cuñi ndo nyehe ndo tsi yu. Tan tats̄i tuñi ndo tsi ra can. Tan tsa cuenda tsa javah̄a ndo tumaa cuñi maa Nyoo, cuñi tsi catyí tyin nduve cuatyí ndo tsa cuenda yacan. ¹² Yacan cuenda quiv̄i jaquits̄i yu carta can tsi ndo

ña jaquits̄i yu itsi tsa cuenda tsa tsicá xaan iñi yu cuenda ra tsa javah̄a cuatyí can. Tan ndi ñavin tsa cuenda ra tsa tah̄an ticanuu can. Maa tyin tsa cuenda maa ndo, tyin cuñi yu tsa coto ndo nácaa ñuhú iñi ndo tsi ndi nuu Nyoo tan nácaa cuñi ndo jatyinyeé ndo tsi ndi. ¹³ Yacan cuenda nduvah̄a cuñi añima ndi. Tan s̄i xaan cuñi ndi tyin tsitó ndi tyin cuñi ndo tsi ndi.

Tsa nyehe ndi tyin s̄i xaan cuñi ra Tito, ndusī ca iñi ndi tyin tsah̄a xaan ndo tunyee iñi tsi ra. Tan vaha xaan naquih̄in cuenda ndo tsi ra. ¹⁴ Catyí yu tsihin ra Tito tsa ndi cumañi ca quitsi ra nu yucú ndo tyin cua tyaa soho vaha ndo tuhun tsa jaquits̄i yu tsihin ra. Tan vityin s̄i cuñi yu tyin cundāa tsa cah̄an yu tsihin ra. Tyin maa ñi maa tsa nditsa tuhv̄a yu caahán. Tan tacan tucu ndunditsa tsa cah̄an yu tsihin ra. ¹⁵ Cuñi xaan ra tsi ndo tsa nducuhún iñi ra tyin javah̄a ndo tandih̄i cuii maa tsa cah̄an ra tsihin ndo. Tan tsa tsaa ra nu yucú ndo, ndaahvi jah̄a ndo tsi ndo nuu ra. Tan vaha xaan cah̄an ndo tsihin ra. Tan vaha xaan tyaa yahvi ndo tsi ra. ¹⁶ Tan s̄i xaan cuñi yu tyin tsitó yu tyin tacan ñi javahá ndo tsa vaha.

8

Najatyinyeé yo tsi nyiv̄iyihí cuenda Nyoo tsihin tsa n̄i iñi añima yo

¹ Vityin yañi, cuñi ndi nacatyí tuhun ndi tsihin ndo

nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya. ² Vasu ndi maa cuaha xaan tundoho nyehé ñi, maa tyin sñi cuñí ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsahá ñi, tumaa tsatyin cuca ñi. ³ Tan cuví yu tsandaa tyin nyehé yu tyin tsahá ñi cuaha tsa iyó tsi ñi tsihin tsa ñi iñi ñi tan nda cuanda yaha ca tsahá ñi. ⁴ Caahán ndaahvi xaan ñi tsihin ndi na cuhva ndi ndatu tsa jatyinyee ndihi ñi tsi nyivi yihí cuenda Nyoo tsa iyó ñuu Jerusalén. ⁵ Cuaha ca javahá ñi tan ñavin ca tsa tsicá iñi maa ndi. Tyin tsa jihna ñi, nacuhva cuenda ñi tsi ñi tsi Nyoo tsihin tsa ñi iñi añima ñi. Tacan tan nacuhva cuenda tucu ñi tsi ñi tsi nyuhu tsa quihí ndaha ndi tsi ñi tumaa cuñí maa Nyoo. ⁶ Tsa nyehe yu tyin tacan javahá nyivi Macedonia, tacan tan catyí yu tsihin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tsa quitsahá tavá ndo jahá ra. ⁷ Tyin nyooho vaha xaan javahá ndo tandihi tyiñu. Tsinú xaan iñi ndo tsi Nyoo. Vaha xaan caahán ndo tuhun ra. Vaha cutuñí iñi ndo. Tan tsihin tsa ñi iñi añima ndo javahá ndo tyiñu ra. Tan cuñí xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

⁸ Ña jañiñí yu tsi ndo tsa

javaha ndo tsa caahán yu. Caahán yu tyehen tsihin ndo tsa cuenda tsa cuñí yu tsa nyehe ndo tsa vaha javahá nyivi yihí cuenda Nyoo Macedonia. Tyin tacan tan javaha ndihi ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan iñi ndo. ⁹ Tyin tsa tsitó maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsi ra nu ñuhu ñayivi ihya tan jandundaahvi ra tsi ra tsa cuenda tsa cuñí ra tsi yo tyin tacan tan cuví janducuca ra tsi yo.

¹⁰ Yuhu cuñí yu tsa vaha tsa cuenda ndo, yacan cuenda cua cahan yu tsihin ndo tsa tsicá iñi yu tsa cuenda tuhun ihya. Nyooho cuví nyivi tsa quitsahá jandu iin jihna xuhun cuyava. Ñavin nyivi tavá tyiñu tsi ndo javaha ndo tacan. Javahá ndo tacan tyin tacan tsicá iñi maa ndo. ¹¹ Yacan vityin cuñí yu tsa jañihi ca ndo javaha ndo tumaa javahá maa ndo nda nu quitsahá nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo. ¹² Tyin tatun iin nyivi tan cuñi ñi cuhva ñi tandihi cuhva iyó tsi ñi tan cuhva ñi can tsihin tsa ñi iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñí ra tsi yo cuhva yo tun nduve náa iyó tsi yo.

¹³ Caahán yu tyehen tsihin ndo, maa tyin ñavin tsa cuenda tsa cuñí yu tsa

jatyinyee ndo tsi nyivi tan ndoo ndaahvi ndo tan ñi ican coo tsa coo tsi ñi. ¹⁴ Tyin vityin tsa iyó luxu tsi ndo, taahán tsi jatyinyee ndo tsi nyivi ndaahvi tsihin can. Tyin tacan tan inducu ñi coo tandihi yo. Tan inga tsaha, maa ñi cua jatyinyee tucu tsi maa ndo tun cumañi tsa cumañi tsi ndo. Tyehen taahán tsi jatyinyeé tahan yo tsi yo tsihin tsa iyó tsi yo tyin tacan tan ña nyehe ndi intuhun yo tundoho. ¹⁵ Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativí ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyí tsi nu tutu Nyoo.

Nu tyaá ra Tito naha ra cuha cuhun ra naha ñuu Corinto

¹⁶ Tyahvi nyoo tsi Nyoo tyin tsaha ra tsa vaha iyó añima ra Tito tan tsicá ñi ra tuhun ndo tumaa tsicá ñi maa yu tuhun ndo. ¹⁷ Tsa cahan yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñi tucu maa ra ñuhú ñi ra tsi ndo. Yacan cuenda vityin vatsí ra nu yucú ndo tsihin tsa iyó ñi maa ra.

¹⁸ Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú ñi ra tsi Nyoo, tan tacan caahán tucu tandihi nyivi yihí cuenda Nyoo. ¹⁹ Tan inga tucu tuhun tyin nacatsi vaha nyivi yihí cuenda Nyoo tsi ra yañi yo ihya tyin cuhun ndihi ra tsihin ndi cundaca ndi xuhun tsi nyivi ndaahvi iyó ñuu

Jerusalén. Cuñi xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatyinyee ndi tsi tandihi nyivi yihí cuenda Nyoo. ²⁰ Tsihin cuenda xaan javahá ndi tyiñu ihya, tyin tacan tan ña cahan nyivi tsi ndi tsa cuenda tsa tavá ndi xuhun cuenda nyivi ndaahvi. ²¹ Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

²² Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin ñi xaan ñi ra. Tan cuaha ñi tsaha janahá ra tyin cuñi xaan ra tsi Jutu Mañi yo. Tan vityin tsa tsa tsitó ra tuhun ndo, sñi cuñi ra tyin tsitó ra tyin cua javaha ndo tsa vaha nuu Nyoo. ²³ Tatun yóo tsicá tuhun tuhun ra Tito, catyí ndo tsihin ñi tyin ra vaha ñi tsi yu cuví ra, tan jahá tyiñu ra tsihin yu, tan jatyinyeé ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihya naha ra, catyí ndo tyehen tsihin ñi:

—Maa nyivi yihí cuenda Nyoo jaquitsi tsi ra naha. Tan vaha xaan jahá tyiñu ra naha tyiñu ra Cristo —catyí ndo.

²⁴ Yacan cuenda janaha ndo tsi ra ihya naha ra nu tuvi tyin nditsa tsa cuñi ndo tsi ra naha. Tyin tacan tan

coto tandihí nyiví yihí cuenda Nyoo tyin nditsa tsa caahán yu tyin vaha javahá ndo.

9

Nu tsahá cuenda ra Pablo nácaa taahán tsi jatyinyee yo tsi nyiví ndaahvi yihí cuenda Nyoo

¹ Tan cuenda xuhun tsa jandu iín ndo tsa cuenda nyiví ndaahvi yihí cuenda Nyoo, ña ñiñi xaan cuñí tsi cahan yu tuhun can tsihin ndo. ² Tyin tsitó yu tyin cuñí xaan ndo javaha ndo tsa vaha. Yacan cuenda sii cuñí yu nacatyí tuhun yu tuhun ndo tsihin nyiví iyó Macedonia, tyin nyoocho tsa iyó ñuu Corinto tsa canyí Acaya, nda cuyava tan quitsahá cuñí ndo jatyinyee ndo tsi nyiví ndaahvi. Tan tsa cuenda yacan cuaha xaan nyiví yihí cuenda Nyoo Macedonia ndu iín ca iñi ñi tan cuñí ndihí tucu maa ñi jatyinyee ñi tsi nyiví ndaahvi. ³ Vasu ndi maa tsitó yu tyin vaha tsicá iñi ndo, maa tyin jaquitsí yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñí ndo javaha ndo tsa vaha. Tyin tacan tan ña cua catyi nyiví Macedonia tyin ña nditsa yu tsa caahán yu. ⁴ Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javahá ndo. Tan

vihi ca maa ndo. Tyin tsa yahá catyi yu tyin cuñí xaan ndo jatyinyee ndo tsi nyiví ndaahvi. ⁵ Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iín ndo xuhun tsa tyihí ndo cuhva tyin cuhva ndo. Tyin tacan tan quiví quitsi yu tandihí tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñí tsi ndo.

⁶ Nducuhun iñi ndo tuhun tsa catyí tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra. ⁷ Tan intuhun intuhun yo cuñí tsi cuhva yo cuhva iyó iñi maa yo. Ñavin uvi caca iñi yo tan cuhva yo o cuhva yo tsa cuenda tyin jañiñí nyiví tsi yo. Tyin Nyoo cuñí ra tsi nyiví tsahá tsihin tsa sii cuñí ñi. ⁸ Nyoo cuví cuhva ra tandihí nuu tsa vaha tsi ndo, tyin tacan tan ña cumañi náa cumañi tsi ndo. Tan cuví jatyinyee tucu maa ndo tsi inga ca nyiví. ⁹ Tumaa catyí tuhun Nyoo tyehen:

Iin ra vaha tsahá ra, tsihin tsa
ñi iñi ra, tsa iyó tsi ra
tsi nyiví ndaahvi.

Tan tumañi iñi tsa javahá ra,
ñi tsinaá tsi nuu Nyoo,
catyí tsi.

¹⁰ Nyoo, ra tsahá tsiti tatsi yo, tsahá tucu ra tandihí tsa tsatsí yo. Tan cua cuhva tucu ra cuaha ca tsiti tsa tatsi ndo tan vaha cua cuvaha

tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyívi. ¹¹ Tan coo ca tandihí nuu tsa cuca tsi ndo, tyin tacan tan cuví jatyinyee ca ndo tsi nyívi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi. ¹² Tyin tsa jatyinyeé yo tsi nyívi yihí cuenda Nyoo tsihin tsa tsahá yo tsa tsiñí ñuhu tsi ñi, tsahá tucu yo tsa nacuhva ñi tyahvi nyoo tsi Nyoo. ¹³ Tan cua jacahnu ñi tsi Nyoo. Tyin tsihin tsa jatyinyeé ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyeé xaan ndo tsi maa ñi tan tsi tandihí ca nyívi. ¹⁴ Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi ndo tsa cuenda tsa vaha tsa tsahá ndo tsi ñi jahá Nyoo. ¹⁵ Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

10

Ra Pablo iyó ndatu tsi ra tsa jaha cuenda ra tsi nyívi tsa jacoto ra tuhun Nyoo

¹ Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yihí ndo catyí ndo tyin tun tsahá cuenda yu tsi ndo tsihin carta, ñihi xaan caahán yu tsihin ndo, maa tyin tun nyívi yu tsihin ndo, ndaahvi xaan

jahá yu tsi yu, catyí ndo. ² Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quívi quitsi yu nu yucú ndo tyin tsitó yu tyin cuñí tsi tsa cuxaan ñihi yu tsi juhva ndo. Tyin yihí ndo catyí ndo tyin javahá yu tumaa javahá ra ña yihí cuenda ra Jesucristo. ³ Nditsa tyin ra ñuu ñayívi cuví ndi. Maa tyin ña cañi tahan ndi tumaa cañi tahan nyívi iyó nu ñuhu ñayívi ihya. ⁴ Tyin tsa xaan tsa tsatyíñu ndi tsa cañi tahan ndi, ñavin tsa xaan tsa iyó nu ñuhu ñayívi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siqui tandihí ca tunyee iñi tsihin tsi tan nda cuanda tunyee iñi tsa iyó tsi tatyí ña vaha. ⁵ Tan tacan cuví jaha canaa ndi tsi tandihí tsa caahán ndasi nyívi siqui tuhun Nyoo, tan tandihí tsa ña vaha tsa tyasí nu tyaa yahvi nyívi tuhun Nyoo. Tan tsahá ndi tsa cundaca ñaha ra Cristo tandihí cuhva tsicá iñi ndi tyin tacan tan tyaá yahvi ca ndi tsi ra. ⁶ Quívi cutuhva tandihí nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaá ndi cuhva tsa tatsi tuñi ndi tsi ndo.

⁷ Nyooho jahá ndo cuenda cuhva iyó nyívi. Tan ña jahá ndo cuenda nácaa iyó añima ñi. Tatun tsitó vaha ndo tyin cuenda ra Cristo yihí ndo, taahán tsi coto ndihí tucu ndo tyin cuenda ra yihí

tucu nyuhu. ⁸ Ña cahán nuu yu caahán yu tsa tsahá Nyoo ndatu tsi yu tsa quihí ndaha yu tsi ndo, vasu ndi maa yaha caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñí yu jativi yu tsi ndo. ⁹ Ña cuñí yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo. ¹⁰ Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaá nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu. ¹¹ Maa tyin nyooho tsa caahán tacan cuñí tsi coto ndo tyin tumaa caahán yu nu carta, tacan cua javaha tucu yu tsa tsaá yu nu yucú ndo.

¹² Nditsa ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahvi nyaá caahán ra naha can tyin javahá ra naha cuhva javahá inga nyivi tan ñavin cuhva cuñí Nyoo. Tan cuñí ra naha tyin vaha tsa jandu inducú ra naha tsi ra naha tsihin inga nyivi. ¹³ Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo. ¹⁴ Tun tsatyin

ña jihna ca maa ndi cahan tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindacá tuhun ra Cristo nu yucú ndo. ¹⁵ Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuvi jacuaha cuaha ca ndi tuhun ra Cristo tsi ndo, maa tyin tandihi ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi. ¹⁶ Tan tsicá iñi ndi cahun ndi cucahan ndi tuhun ra Cristo nu ña tsitó nyivi tuhun ra. Tyin tacan tan ña cua catyí nyivi tyin nduyaá ndi tsihin tyiñu javahá inga ra naha.

¹⁷ Nyooho tsa cuñí nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo. ¹⁸ Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

11

Nu tsahá cuenda ra Pablo tsi nyivi ñuu Corinto na jaha cuenda ñi tsi ñi na ña jandaví ñaha ra vatya naha ra tsi ñi

¹ Vaha xaan tun ña cundihí iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihí iñi ndo tsihin yu vasu ndi maa tuhun maa yu cuví tsi.

2 Yuhu cuiñú xaan yu tsi ndo. Tan maa Nyoo tsahá tsa cuiñu yu tsi ndo, tyin juvin yu cahan̄ tuhun ra Cristo tsihin̄ ndo nda jihna. Tan cuiñí yu tsa cuiñi ndo tsi intuhun̄ ñi maa ra tumaa cuiñí iin̄ ñaha yoco tsi ra tsa cua cuví yí ña. Tyin iin̄ ñaha yoco cuiñí ña tsi intuhun̄ ñi maa ra tsa cua cuví yí ña. ³ Maa tyin tsicá xaan iñi yu tsa cuenda ndo, coto tahan̄ ndo tumaa tahan̄ ña Eva. Tyin ña Eva jandaví ñaha nu coo tsi ña tsihin̄ maña nu. Tan yuhu ña cuiñí yu tsa jandaví ñaha nyívi tsi ndo tan nasama ndo cuhva tsicá iñi ndo tuhun ra Cristo, tan jandihi ndo tsa jacahnú ndo tsi intuhun̄ ñi maa ra. ⁴ Tyin nyooho yatyi xaan nasamá ndo cuhva tsinú iñi ndo tuhun ra Jesús tun̄ siin̄ cuhva caahán nyívi tuhun ra. Tyin ñavin̄ tuhun ra Jesús tsa jacoto ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsí tahan̄ tsihin̄ tuhun Tatyí Ii Nyoo tsa naquih̄in̄ ndo nda jihna. Yatyi xaan natsinú iñi ndo tuhun caahán nyívi tan ñavin̄ tuhun, tsa jacacú ra Cristo tsi yo, tsa cahan̄ ndi tsihin̄ ndo. ⁵ Ra tsa catyí, “Nyuhu cuví ndi ra vaha caahán tuhun ra Cristo”, tsicá iñi yu tyin ña cahnu ca cuví ra can naha ra tan ñavin̄ ca maa yu. Tan nyooho nyicún ndo tsi ra naha. ⁶ Vasu ndi maa ña ñihí vaha yu cuhva caahán yu, maa tyin cutuñí vaha iñi yu tuhun Nyoo. Tan yacan cuví tsa jacuahá ndi tsi ndo tsihin̄ tandihi cuhva javahá ndi.

⁷ ¿O cuiñí maa ndo tyin ña vaha javahá yu tsa ña quih̄in̄ yu yahvi quívi cahan̄ yu tuhun tsa jacacú Nyoo tsi yo tsihin̄ ndo? Tacan javahá yu tyin tacan tan ña cahnu xaan jaha ndo tsi yu tan nducahnu maa ndo nuu Nyoo. ⁸ Nyívi tsa tsicá tuhun Nyoo vehe ñuhu inga ñuu jatyinyee tsi yu tsihin̄ xuhun. Tan xuhun tsa tsahá ñi tsi yu tsatyíñu yu can quívi quítsi yu quítsi cahan̄ yu tuhun ra Cristo tsihin̄ ndo. ⁹ Vasu ndi maa yíhí tsaha cumañi tsa cumañi tsi yu tsa tsinyii yu tsihin̄ ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandihi tsa cumañi tsi yu. Tacan jahá cuenda yu tsi yu tyin ña cuiñi yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu. ¹⁰ Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyívi iyó nanií Acaya. ¹¹ ¿Nacuenda caahán yu tyehen cuiñí maa ndo? ¿A tsa cuenda tsa ña cuiñi yu tsi ndo? Ñavin. Tyin nda maa Nyoo tan tsitó ra tyin cuiñi xaan yu tsi ndo.

¹² Ña cua jandihi yu javahá yu tsa tuhvá yu javahá. Tyin tacan tan ña coo ndatu cahan̄ ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha.

13 Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra naha tan jahá ra naha tyin ra tsicá tyiñu ra Cristo cuví ra naha. 14 Tan tsa javahá ra ican naha ra ñavin tsa iyo cuñí yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu. 15 Yacan cuenda ña iyo cuñí yo tun ra nyicún tsi nu tan jahá ra naha tyin javahá ra naha tsa vaha. Coo quivi cua tatsi tuñi Nyoo tsi ra naha tsa cuenda tsa ña vaha tsa javahá ra naha.

Tundoho tsa nyehé ra Pablo nu tsicá ra caahán ra tuhun Nyoo

16 Inga tsaha caahán yu tsihin ndo: Ndi intuhun ndo tan ña caca iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndihi tucu yuhu luxu. 17 Caahán yu tumaa caahán ra sana iñi tyin tacan tan cuví nduyaa yu. Ñavin maa Jutu Mañi yo catyí tsihin yu tsa javahá yu tyehen. 18 Cuaha xaan ra naha catyí ra naha tyin cahnu cuví ra naha tan nduyaá ra naha tsihin tsa iyó nu ñuhu ñayivi ihya. Yacan cuenda cua jacahnu ndihi tucu yuhu tsi yu. 19 Nyooho catyí ndo tyin tsitó xaan ndo. Tun nditsa ndo, ¿nacuenda tyin yatyi xaan tyaá soho ndo tsa caahán ra sana

iñi can naha ra? 20 Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñi ra naha tsi ndo tsa cuví ndo musu ra naha. Suhú ra naha tsa tsii ndo. Ndacá ñaha ra naha tsi ndo. Ndasí cuñí ra naha nyehé ra naha tsi ndo. Tan nda cuanda cañí ndaha ra naha nuu ndo. 21 ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu. 22 Catyí ra can naha ra tyin nyivi Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyivi Israel; juvin ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu. 23 Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehen caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyivi tsi yu tsihin yoho tan ñavin ca ra can naha ra. Cuaha ca tsaha tsinyi yu vehe caa. Tan cuaha tsaha cuñi cúu yu, maa tyin ña tsihi yu. 24 Uhun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha

tsata yu. ²⁵ Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu tsihin. Tan tsa uñi tsaha tsa nyee yutun ndoo tsitsi ndutya, iin tsaha ndoo yu nu ndutya ñuhu iin quivi tan iin tsa cuaa. ²⁶ Tandihí ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tahañ yu. Quita ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juvin ñi tacan javaha nyivi inga ñuu tsihin yu. Cuaha tsa tahañ yu tsitsi ñuu, nu tsiqui, nu ndutya ñuhu. Cuaha tsa tahañ yu jahá ra catyí tyin yañi yo cuví tsi ra nahañ tan ña nditsa ra naha. ²⁷ Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihí yu ndutya coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañi jahma tsi yu.

²⁸ Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandihí nyivi yihí cuenda Nyoo, nyooho tan nyivi inga ñuu tucu. ²⁹ Tyin tun iin ndo tan vita cuñi ndo, tacan vita cuñi tucu yuhu. Tatun javahá iin ndo tsa ña vaha jahá nyivi, cahán nuu yu tan xaan cuñi yu. ³⁰ Tatun cuñi tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin

tuhun yu tsa janahá tyin ña cuví javahá yu náa javaha yu tsihin tunyee iñi maa yu. ³¹ Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu. ³² Quivi tsinyij yu ñuu Damasco ra cumí tyiñu tsa jahá tyiñu tyiñu ra rey Aretas, tyacu ra andaru yuhu cora ñuu can, tyin jaha cuenda ra naha coto quita yu tan tiin ra naha tsi yu tan cundaca ra naha tsi yu vehe caa. ³³ Maa tyin nyivi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumí tyiñu ñuu can.

12

Tsa nyehe ra Pablo nda nu tsinu uñi gloria jahá Nyoo

¹ Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehe yu jahá ra. ² Nacotó yu iin ra yihí cuenda ra Cristo tsa tsahañ andivi. Tsa iyó utsi cumí cuiya tsa quihin Nyoo tsi ra tsahañ ra nda nu tsinu uñi andivi. Maa tyin ña tsitó yu tatun tsahañ ra tsihin cuñu ñuhu ra o ñavin. Intuhun ñi maa Nyoo cuví ra tsitó. ³⁻⁴ Tsitó yu tyin tsindaca Nyoo tsi ra nda paraiso nu iyó nyivi tsihi tsa tsinu iñi tsi Nyoo. Maa tyin ña tsitó yu tatun tsahañ ra tsihin cuñu ñuhu ra o ñavin. Intuhun ñi

maa Nyoo cuví ra tsitó. Nu tsahan ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyivi tsa nacatyí tuhun ñi tuhun can. ⁵ Cuví nduyaa yu tsihin tsa janaha Nyoo tsi yu quivi can. Maa tyin ña nduyaá yu tsihin tsa javahá yu tyin nduyaá yu maa ñi maa tsihin tsa nduve tunyee iñi maa yu iyó tsi yu. ⁶ Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñi yu cahan yu can coto cahnu xaan jaha nyivi tsi yu. Vaha ca nanyehe maa ñi kuhva iyó yu tan kuhva jacuahá yu, tacan tan coto ñi tatun vaha yu o ña vaha yu.

⁷ Nyoo ña cuñi ra tsa nduyaa yu tsihin tsa janaha ra tsi yu. Yacan cuenda tsaha ra tsa nyehé xaan yu tundoho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuví nduyaa yu tsihin tsa janaha Nyoo tsi yu. ⁸ Tan tsican yu uñi tsaha tsi Jutu Mañi yo na quihin nyaa ra tundoho can siqui yu. ⁹ Maa tyin catyí Jutu Mañi yo tyehen tsihin yu: “Yuhu cuñi xaan yu tsi un, tan yacan ñi cuví tsa tsiñi ñuhu tsi un. Tyin nyivi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyí ra. Yacan cuenda sii xaan cuñi yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin

yu. ¹⁰ Yacan cuenda sii xaan cuñi yu tsa nduve tunyee iñi maa yu iyó tsi yu. Vasu ndi maa caahan nyivi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuví tsi yu, maa tyin sii xaan cuñi yu tsa nyehé yu tundoho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

Tsicá iñi ra Pablo tuhun nyivi yihí cuenda Nyoo ñuu Corinto

¹¹ Tsa caahan yu tuhun maa yu nanduví yu tumaa ra sana iñi. Maa tyin maa ndo cuñi tsa cahan yu tacan tyin ña jahá ca ndo tsa ñayivi tsi yu. Maa ndo taahan tsi vaha cahan tuhun yu, vasu ndi maa ña cahnu xaan cuví yu. Tatun yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñi maa ra naha tyin vaha xaan ca ra naha tan ñavin ca inga ra tsicá tyiñu Nyoo. ¹² Yuhu cunyeé xaan iñi yu nyehe yu tandihí tundoho quivi tsinyij yu jaha tyiñu yu tyiñu Nyoo nu yucú ndo. Cuaha xaan tsa iyo javaha yu jaha Nyoo tyin tacan tan coto ndo tyin nditsa tsa cuví yu ra tava tyiñu ra. ¹³ ¿A vaha ca tyaá nuu yu tsi inga nyivi tsa iyó inga ñuu tan ñavin ca nyooho? Ñavin. Inducu ñi tyaá nuu yu tsi tandihí ndo. Intuhun ñi tsa ña javaha yu tsihin ndo tsa tsinyij yu tsihin ndo cuví tsa ña tsican yu xuhun cuita

catsi yu tsi ndo. Ña taahán tsi ndacan yu tucahnu iñi tsi ndo tyin tsitó ndo tyin vaha javahá yu.

¹⁴ Vityin tsa iyó vaha tandihí tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu yu tsa iyó tsi ndo tyin maa yu cua jatyinyee tsi ndo. Tyin iin ra iyó sehe, ñavin sehe ra tsahá tsa tsiñi ñuhu tsi ra. Tyin maa ra taahán tsi cuhva tsa tsiñi ñuhu tsi sehe ra. Tan tacan yuhu. ¹⁵ Sii xaan cuñi yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayivi yu tsa cuenda ndo. Tan tsicá tucu iñi yu tyin tun jañihí ca yu cuñi yu tsi ndo, nyooho ña cuñi vaha ndo tsi yu.

¹⁶ Tandihí ndo tan tsitó ndo tyin ña tsahá yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahá ndo cuenda. ¹⁷ ¿O cuñi maa ndo tyin cahan yu cuendu tsihin ra jaquitsi yu nu yucú ndo tan jandaví ñaha ra naha tsi ndo jahá yu? ¹⁸ ¿A jandaví ñaha ra Tito tan inga ra naha tsi ndo quivi quitsi ra naha nu yucú ndo jahá yu? Ña jandaví ñaha ra naha tsi ndo tyin nyuhu ña tuhvá ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí Ii Nyoo iyó tsi nduvi ndi?.

¹⁹ Vasiqui tsicá iñi maa ndo tyin tandihí tsa caahán ndi,

tan caahán ndi can tsa cuñi ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihí tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñi xaan ndi tsi ndo. ²⁰ Tsicá iñi yu coto ña cua tahan iñi yu cuhva yucú ndo quivi tsaay yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsaay yu nu yucú ndo tan ña cuiti ña ndaa yucú ndo. ²¹ Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihí ndo ña jandihí ndo tsa javahá ndo tsa ña vaha tsa quitsahá javahá ndo nu quitsi ca tsi tyin rayi ndi tsicá nuu ra tsihin ñaha tan ñaha ndi tsicá nuu ña tsihin rayi tan náa ndihí ca maa tsa ña vaha.

13

Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha cuahán ñi tsihin Nyoo

¹ Tsinu uñi tsaha cuví tsi tsa cua quitsi yu ihya. Nda tacan tan cuví cundaa tyiñu

ñi tsa javahá tsa ña vaha. Maa tyin cuñí tsi uvi o uñi taahan ra cua cuvi tsandaa. ² Tyin quivi quitsi yu nu yucú ndo, catyi yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyi tucu yu inga tsaha tsihin ñi, tan tsihin tandihí ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo. ³ Tacan tan cua coto ndo tsa cuñí xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra añima ndo. Tyin iyó xaan tunyee iñi ra tsi ndo. ⁴ Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuvi jatyinyee ndi tsi nyooho.

⁵ Nducu kuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo añima ndo tun nditsa tsa tsinú iñi ndo tsi ra? ⁶ Maa tyin cuñí yu tsa coto ndo tyin nyuhu ña vatya ndi. ⁷ Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuñí ndi catyi nyivi tyin vaha ndi. Caahán ndi tyehen tyin cuñí ndi tsa javaha ndo

maa ñi maa tsa vaha. Nduve cuenda ndi tun catyi nyivi tyin vaha ndi o ña vaha ndi. ⁸ Tyin nyaá tsi siqui ndi tsa javaha ndi tsa vaha. Ña cuvi tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa. ⁹ Yacan cuenda sii cuñí ndi tsa nduve tunyee iñi iyó tsi ndi, tan nyee cuñí nyooho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo na cunycun vaha ca ndo tsi ra nda cuanda ña cumañi ca tsa cumañi tsi ndo. ¹⁰ Jaquitsi yu carta ihya tsi ndo tsa ndi cumañi ca quitsi yu nu yucú ndo tyin janduvaha ndo tsi ndo. Tyin tacan tan ña cua cuñi tsi cuxaan yu tsi ndo quivi tsa yu nu yucú ndo. Tyin nditsa tsa tsaha Nyoo ndatu tsi yu tsa quihí ndaha yu tsi ndo. Maa tyin ña tsaha ra ndatu can tsi yu tsa janducuiiya ndihí ca yu iñi ndo. Ñihí yu ndatu can tsa cuenda tsa jatyinyee yu tsi ndo.

¹¹ Yañi, nu ndihí caahán yu ihya, catyi yu tsihin ndo, nducu ndo kuhva ña cumañi tsa cumañi tsi ndo nuu Nyoo. Sii cuñi ndo. Jandu iin ndo iñi ndo. Coo mañi tahan ndo. Tan Nyoo, ra cuñí xaan tsi ndo tan tsahá tsa taxin coo añima yo, na cunyaa ra tsihin ndo. ¹² Cuhva tahan ndo nacumi tsi ndo tsihin tsa sii cuñi ndo nyehé ndo tsi ndo. ¹³ Tan jaquitsi tandihí nyivi yihí cuenda Nyoo ñuu ihya nacumi tsi ndo.

¹⁴ Naquihin ndo tsa vaha coo añima ndo jaha Jutu Mañi

yo Jesucristo. Tan na coto
ndo tyin Nyoo cuñí xaan ra
tsi ndo. Tan nacoto tucu ndo
tyin iyó Tatyí li ra tsihin ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Cayucú Galacia

Nu tyaá ra Pablo iin carta tsa cuenda nyivi yihí cuenda Nyoo ñuu cayucú Galacia

¹ Yuhu ra Pablo cuví yu iin ra tsa tava tyiñu ra Jesucristo. Ñavin nyivi jaquitsi tsi yu tyin maa ra Jesucristo tan maa Nyoo Jutu yo jaquitsi tsi yu tan tsaha ra tyiñu ihya tsi yu. Tan juvin ra cuví ra tsa janandoto tsi ra Cristo tsa yaha tsihi ra. ² Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ñuhu iyó ñuu cayucú Galacia. ³ Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo tsi yo coo añima ndo. ⁴ Maa ra Jesucristo nacuhva cuenda ra tsi ra nu cruu tsacatyí cuatyí yo Tan javaha ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ñuhu ñayivi ihya. ⁵ Yacan cuenda na jacahnu yo tsi maa Nyoo tacan ñi maa. Tan na cuví tsi tacan.

Nduve ca inga cuhva cuví cacu yo

⁶ Iyo xaan cuñí yu tyin nyooho numi xaan nacoq ndo tsi Nyoo. Juvín ra nacana tsi ndo tyin coo vaha ndo tsihin ra tsa cuenda tsa javaha ra Cristo tsa cuenda yo. Tan vi-tyin siin tuhun tsinú iñi ndo. Cuñí maa ndo tyin cua jacacu yacan tsi ndo. ⁷ Maa tyin nduve ca inga cuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñí ra naha jativi ra naha tuhun Nyoo tsa jacacú ra Cristo tsi yo. ⁸ Tun iyó yóo caahán tuhun ra Cristo tsihin ndo tan ña nacatsi tahan can tsihin tuhun tsa cahan ndi tsihin ndo, na cuhun ñi anyaya. Yoñi jaha, vasu maa ndi cuví, o iin ángel quee andivi cuví. ⁹ Tsa yaha cahan yu tuhun ihya tsihin ndo, maa tyin cuñí yu cahan nyico yu itsi tsihin ndo inga tsaha. Tatun yóo nyivi caahán tuhun Nyoo tsihin ndo tan siin cuhva caahán ñi, na jacuhun Nyoo tsi ñi anyaya.

¹⁰ Ña caahán yu tacan tsihin ndo tsa cuenda tsa cuñí yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñí yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

Nacaa quitsaha tsicá ra Pablo tyiñu Nyoo

¹¹ Cuñí yu tsa coto ndo yañi, tyin tuhun ra Cristo tsa caahán yu tsihin ndo, ñavin tuhun nyivi cuví tsi. ¹² Ñavin nyivi tsaha tuhun ihya tsi yu.

Tyin juvin ñi maa ra Cristo jacotó itsi tsi yu.

¹³ Nyooho tsiñi ndo nácaa javaha yu quivi can. Tan tsitó ndo tyin tsinyaa ndaha xaan yu tsi nyivi yihí cuenda Nyoo quivi tsa tsinyi yu cuenda ñi Israel ñuu yu. Tan nducu yu kuhva jandu uvi yu iñi ñi tsinú iñi tsi ra Cristo. ¹⁴ Tan tsicoo yu kuhva iyó ñi Israel, tan yuhu cuvi ra cuahán ityi nuu ca tan ñavin ca juhva ra yihí tahan tsihin yu tsa iin ñi cuiya ndi. Tyin yuhu cuñi xaan ca yu javaha yu kuhva javaha tsii tsaahnu ndi. ¹⁵ Maa tyin tsa ndi cumañi ca cacu yu tan Nyoo tsa nacatsi maa ra tsi yu tyin cuñi xaan ra tsi yu. Tan nda tsa tsaá maa quivi tsa tyaá ra kuhva, tan nacana ra tsi yu. ¹⁶ Tacan tan janaha ra tsi Sehe ra tsi yu tan nacoto yu tsi ra, tyin tacan tan cuvi cahan yu tuhun ra nácaa jacacú ra tsi yo tsihin nyivi tsa ñavin nyivi Israel cuvi. Tan quivi can ña nducu yu nyivi jacuaha tsi yu nácaa taahán tsi javaha yu. ¹⁷ Tan ndi ña tsahan yu ñuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsahan yu nda Arabia. Tacan tan cuanuhu nyico yu inga tsaha nda ñuu Damasco.

¹⁸ Tsa yaha uñi cuiya tan tsahan yu nda Jerusalén, tan nacoto yu tsi ra Pedro. Tan ndoo yu tsihin ra tsahun quivi. ¹⁹ Maa tyin ña nyehe yu tsi inga ra tsa tava tyiñu ra Cristo. Intuhun ñi ra Jacobo

yañi Jutu Mañi yo, nyehe yu. ²⁰ Tan nda nuu Nyoo tan caahán yu tsihin ndo tyin tuhun tsa tyaá yu nu tutu ihya, tsa nditsa cuvi tsi.

²¹ Tsa yaha tsa tsahan yu ñuu Jerusalén tan tsahan yu nda Siria tan nda Cilicia. ²² Tan ra yañi yo tsa yucú vehe ñuhu ra Cristo tsa iyó ñuu tsa cayucú Judea, ña nacotó ra naha tsi yu. ²³ Maa tyin ñihí tuhun ra naha tsa caahán nyivi tuhun yu, tyin catyí ñi: “Ra tsa tsinyaa ndaha tsi yo quivi can, vityin caahán ndihi ra tsihin nyivi na tsinu iñi ñi tsi ra Cristo. Tan quivi can cuñi ra jativi ra tuhun ra Cristo”, catyí ñi, ñihí tuhun ra naha. ²⁴ Tan jacahnu ra naha tsi Nyoo tsa cuenda tsa javaha Nyoo tsihin yu.

2

Ra cuvi ityi nuu tsihin nyivi vehe ñuhu ñuu Jerusalén, ndoo ra naha vaha kuhva jahá tyiñu ra Pablo

¹ Tsa yaha utsi cumi cuiya, tan tsahan yu ñuu Jerusalén inga tsaha tsihin ra Bernabé. Tan tsahan ndihi tucu ra Tito tsihin ndi. ² Tsahan yu ndacan tyin maa Nyoo janaha tsi yu tyin taahán tsi tsa cuhun yu. Tan ndacan quita sñin yu tsihin ra cuvi ityi nuu tsihin nyivi vehe ñuhu naha ra. Tan tsaha cuenda yu tsi ra naha nácaa tuhvá yu caahán tuhun ra Cristo tsihin nyivi tsa ñavin ñi Israel cuvi. Tyin tacan tan coto yu tun ndoo ra naha vaha tsihin kuhva

jacuahá yu. Tyin tun ña ndoo ra naha vaha, cuatu xaan jahá tyiñu yu. ³Maa tyin ndoo ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuví ra. ⁴Nditsa tyin juhva ra naha cuñi ra naha tsa cunyaa tuñi can tsi ra Tito. Tan ra ican naha ra quihvi xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu kuhva iyó nuña yo jahá ra Cristo cuví ra naha. Tan cuñi ra naha tyin taahán tsi tsa cundaca ñaha ley tsahnu tsi yo. ⁵Maa tyin ndi luxu tan ña tsahá ndi tsa cundaca ñaha ra can naha ra tsi ndi. Tyin ña cuñi ndi tsa jaña ndo tuhun nditsa tsa jacacú ra Cristo tsi yo.

⁶Maa tyin ra cuví ityi nuu tsihin nyivi vehe ñuhu, nduve tuhun tsa tsahá ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yoñi jaha. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo. ⁷Ra cuví ityi nuu vehe ñuhu naha ra, nduve inga tuhun tsahá cuenda ra naha tsi yu tyin nacotó ra naha tyin maa Nyoo jaquitsi tsi yu tyin cahan yu tuhun ra Cristo tsihin nyivi tsa ñavin nyivi Israel cuví. Tumaa tsa jaquitsi ra tsi ra Pedro tyin cahan ra tsihin nyivi Israel. ⁸Tyin juvin ñi maa Nyoo tava tyiñu tsi ra Pedro tyin cahan ra tuhun ra Cristo tsihin nyivi Israel. Tan tava tyiñu tucu ra tsi yuhu tyin ca-

han yu tuhun ra tsihin nyivi tsa ñavin nyivi Israel cuví.

⁹Yacan cuenda ra cuví ityi nuu naha ra, ra Jacobo, ra Pedro tan ra Juan, nacotó ra naha tyin Nyoo tsahá ra tunyee iñi tsi yu tsa cahan yu tuhun ra Cristo tsihin nyivi. Tan tsahá ra naha ndaha ra naha tñin ndi, tsihin ra Bernabé tyin ndoo ra naha vaha tsa cahan ndi tuhun ra Cristo tsihin nyivi tsa ñavin nyivi Israel cuví, tan maa ra naha cahan tucu ra naha tsihin nyivi Israel. ¹⁰Tan cahan ra naha iin tuhun tsihin ndi, na nducuhun iñi ndi tsi nyivi ndaahvi tan na jatyinyee ndi tsi ñi. Tan yacan cuví tsa nducú xaan yu kuhva javahá yu tandihi ñi quivi.

Nu nduxaan ra Pablo tsi ra Pedro tyin ña vaha tsa javahá ra

¹¹Maa tyin quivi tsahan ra Pedro ñuu Antioquía, nuu nuu ra tan cuxaan yu tsi ra tyin ña vaha tsa javahá ra. ¹²Tyin tsa jihna ñi vaha javahá ra tyin tsatsi ra tsihin ñi tsa ñavin nyivi Israel cuví. Maa tyin tsa tsaá juhva ra Israel naha ra tsa jaquitsi ra Jacobo, tacan tan quitsahá jatsiyó ra tsi ra tan ña cuñi ca ra catsi ra tsihin ñi ican. Javahá ra tacan tyin yuuhvi ra cotó cuxaan ra tsa tsaá can naha ra tsi ra tyin ndi nyitá iñi ra can naha ra tuñi Nyoo. ¹³Tacan tan inga ra Israel tsa yihí cuenda ra Cristo, ndu iin ra naha tsihin ra Pedro. Tan javahá ndihi ra naha tsa ña vaha can. Tyin javahá ra naha tumaa javahá

ra Pedro vasu tsitó ra naha tyin ña vaha can. Tan nda cuanda ra Bernabé tan ndu iin ra tsihin ra naha. ¹⁴ Tan nyehe yu tyin ña vaha javahá ra naha. Ñavin tumaa cuhva catyí tuhun ra Cristo. Yacan cuenda cahān yu tsihin ra Pedro nuu tandihí ra yucú ican: “Yooho cuví un iin ra Israel. Tan iyó un tumaa iyó nyívi tsa ñavin nyívi Israel cuví. ¿Nacaa tsa cuñí un jañiñi un tsi nyívi tsa ñavin nyívi Israel cuví na coo ñi cuhva iyó ñi Israel? [Tan ndi maa un tan ña javahá un tacan]”, catyí yu tsihin ra.

¹⁵ Maa yo nda ndi cacu yo tan cuví yo ra ñuu Israel ña javahá xaan yo cuatyí tumaa javahá ñi tsa ñavin nyívi Israel cuví. ¹⁶ Maa tyin tsitó yo tyin ña cuví janduvaha yo tsi yo nuu Nyoo tsihin tsa nducú yo cuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi iñi yo tsi ra Jesucristo. Yacan cuenda tsinú iñi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo cuhva tyaa yahvi yo tsa catyí ley can. Tyin ndi intuhun yo tan ña nduvahá yo nuu Nyoo tsihin tsa nducú yo cuhva javaha yo cuhva catyí ley tsahnu can.

¹⁷ Maa tyin vityin tatun nducú yo cuhva nduvaha yo nuu Nyoo tsa cuenda ra Cristo, cuñí tsi catyí tyin nacoto yo tyin iyó tucu cuatyí yo tumaa iyó cuatyí ñi tsa ñavin nyívi Israel cuví. Tatun

tacan, ¿a cuñí tsi catyí tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan. ¹⁸ Maa tyin tun cua cuita nyico iñi yo ley tsa tsa yahā nacoo yo, yacan nditsa cua coo cuatyí yo. ¹⁹ Tyin ley can janahá tsi tsi yu tyin taahán tsi cúu yu tsa catyí cuatyí yu, tan yacan cuenda ña nducu ca yu cuhva cacu yu tsihin ley can, tyin tacan tan cuví coo yu tsa cuenda Nyoo. ²⁰ Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó aña yu vityin. Tan cuhva iyó yu vityin, iyó yu tsihin tsa tsinú iñi yu tsi ra tsa cuví ra Sehe Nyoo. Tyin maa ra cuñí ra tsi yu, tan tsihi ra tsacatyí cuatyí yu. ²¹ Ña cuñí yuhu tyaa tsiyo yu tunyee iñi tsa tsahā Nyoo tsi yo. Tyin tun tsatyin cuví cacu yo jaha ley tsahnu, nduve nacatyí tsihi ra Cristo.

3

Naquihín yo Tatyí Ii Nyoo tsa cuenda tsa tsinú iñi yo tsi ra Cristo

¹ ¡Náa tsa soho iyó nyooho, nyívi Galacia! ¿Yóo tsa jatívi tsi ndo tan ña tyaa yahvi ca ndo tsa nditsa? Catsi xaan tsahā cuenda ndi tuhun ra Jesucristo tsi ndo. Tan cutuñi vaha iñi ndo nacuenta tsihi ra nu cruu. ² Intuhun ñi tsa cuñí yu nducu tuhun yu tsi ndo. ¿A naquihín ndo Tatyí Ii Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo

tuhun ra Cristo tan tsinú iñi ndo tsi ra? ³ ¿Nacaa tsa soho xaan iyó ndo vityin? Tan quivi jihna ñi vaha xaan tyaa yahvi ndo tsi Nyoo tsihin tunyee iñi Tatyí li ra. Tan vityin, ¿nacaa cuñi ndo coo ndo tsihin tunyee iñi maa ndo? ⁴ ¿A tsa cuatu ñi nyehē ndo nacaa jatyinyee Tatyí li Nyoo tsi ndo nu nyehē ndo tundoho? Ñavin tsa cuatu ñi cuví yacan, cuñi yuhu. ⁵ ¿Nacaa tsahá Nyoo Tatyí li ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo kuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñi ndo tuhun ra Cristo tan tsinú iñi ndo tsa caahán ra.

⁶ Ra Abraham, tsinú iñi ra tsa cahan Nyoo tsihin ra, yacan cuenda Nyoo naquihin tsi ra tumaa tsatyin vaha ra. ⁷ Yacan cuenda taahán tsi coto ndo tyin nyivi tsa nditsa cuví tata ra Abraham, juvin ñi cuví ñi tsa tsinú iñi tsi Nyoo. ⁸ Tan tsanaha ndoq tuhun Nyoo nu tutu. Tan catyí tsi tyin nu cuahán ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú iñi ñi tsi ra. Yacan cuenda catyí Nyoo tsihin ra Abraham tsanaha: “Tandihí maa nyivi cua nasoco yu tsi ñi tsa cuenda un”, catyí Nyoo tsihin ra. ⁹ Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinú iñi tucu maa ra.

¹⁰ Nyivi tsa nyitá iñi ley tsa tyaa ra Moisés, cua tatsi

tuñi Nyoo tsi ñi. Tyin tuhun Nyoo catyí tsi. “Tandihí nyivi tsa ña tyaa yahvi tandihí ley tsa nyaá nu libru ley Nyoo, cua tatsi tuñi Nyoo tsi ñi.”

¹¹ Tan nditsa tyin yoñi nduvahá jaha Nyoo tsa cuenda tsa nyitá iñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú iñi ra, juvin ra cua coo ñayivi tsa ña cua naa maa”, catyí tuhun Nyoo. ¹² Tan ley ra Moisés ña catyí tsi tun taahán tsi tsinu iñi yo. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

¹³ Ley can catyí tyin taahán tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tava nuña ra tsi yo. Tan maa ra naquihin tandihí cuatyí yo. Tyin catyí tuhun Nyoo: “Tandihí maa ra tsa ticaá nu yutun, tatsi tuñi Nyoo tsi ra.”

¹⁴ Tacan cuví tyin tsa cuenda ra Cristo Jesús tan nasocó Nyoo tsi nyivi tsa ñavin nyivi Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihín yo Tatyí li tsa catyí Nyoo tyin kuhva ra tsi yo.

Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo

¹⁵ Yañi, cua cahan yu iin kuhva tsihin ndo, kuhva iyó yo nu ñuhu ñayivi ihya. Tatun iin ra tan catyí ra tyin cua

cuhva ra tsa cuhva ra tsi inga ra, tan tatun tsa yaha tyihj ra firma ra, yoñi ca cuví quihin nyaa can. Tan yoñi ca cuví natyiso juhva ca siqui can. ¹⁶ Tan Nyoo catyj ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyj tsi nu tutu Nyoo tun cuhva ra tsi tandihj ra cuví tata ra, tyin intuhun ñi ra cua cuhva ra. Tan juvin ra can cuví ra Cristo. ¹⁷ Tsa caahán yu, cuví tsehe: Nyoo natuhun tahan ra tsihin ra Abraham. Tan ndoo vaha ra tuhun tsihin ra. Tacan tan yaha cumi cientu oco utsi cuiya tan tsa ley tsa tyaa ra Moisés. Maa tyin ña cuví can ley can tuhun tsa ndoo Nyoo tsihin ra Abraham. Tan ña cuví casi tsi nu naquihín yo tsa catyj Nyoo tyin cuhva ra tsi yo. ¹⁸ Tun tsatyin tsa cuenda ley ra Moisés tan naquihín yo tsa taahán tsi tsi yo, cuatu xaan ndoo Nyoo tuhun tsihin yo. Maa tyin tsitó yo tyin ñihj ra Abraham tsa ñihj ra tyin tsa Nyoo tsa catyj ra tyin cuhva ra tsi ra.

¹⁹ Tatun tacan, ¿nacuenta vaha ley ra Moisés? Tsa jihna ñi Nyoo catyj ra tyin cuhva ra tsa vaha tsi ra Abraham. Yaha can tan tsa ra ley can tsi ra Moisés tan janahá tsi tyin iyó cuatyí yo. Tan ángel Nyoo tsa ra cuenda ley can tsi ra Moisés. Tan ra Moisés tsa ra cuenda can tsi nyivi. Tan ndoo tsi nda cuanda quivi tsa quitsj ra Cristo, ra cuví tata ra Abraham. Juvin ra cuví ra tsa catyj

Nyoo tyin cua cuhva tsa vaha tsi yo. ²⁰ Tan juvin ñi maa Nyoo cahan tsihin ra Abraham quivi can. Tan ña tsiñi ñuhu tsa nducu sin ra iin ra nacatyí tuhun tsihin ra Abraham.

²¹ ¿A cuñi tsi catyj tyin ley tsa tyaa ra Moisés ña nacatsi tahan tsi tsihin tsa catyj Nyoo tyin cuhva ra tsi yo? Ñavin. Tun tsatyin cuví coo yo ñayivi nyito jaha ley can, cuví nduvaha yo nuu Nyoo tsa cuenda tsi. Maa tyin ña cuví. ²² Tyin catyj nu tutu Nyoo tyin iyó cuatyí tandihj nyivi. Tyin tacan tan nyivi tsa tsinú iñi tsi ra Jesucristo cuví ñihj ñi ñayivi nyito tsa catyj Nyoo tyin cuhva ra tsi yo.

²³ Tsa ndi cumañi ca tsinú iñi yo tsi ra Cristo, ley can yihj ndaha tsi yo tumaa tsa tsinyi yo vehe caa. Tacan cuví nda cuanda janaha Nyoo tsi yo nácaa tan tsinu iñi yo tsi ra. ²⁴ Tan ley can cuví tsi tumaa iin nyivi jahá cuenda tsa nyihi. Tyin jahá cuenda tsi tsi yo nda cuanda quivi quitsj ra Cristo. Tan cuví tsinu iñi yo tsi ra tan nduvaha yo nuu Nyoo. ²⁵ Tan vityin tsa tsa quivi tsa tsinú iñi yo tsi ra Cristo, yacan cuenda ña jahá cuenda ca ley can tsi yo.

²⁶ Tyin tandihj yo cuví yo sehe Nyoo tyin tsinú iñi yo tsi ra Cristo Jesús. ²⁷ Tan tandihj yo tsicoondutyá yo tan ndu iin yo tsihin ra Cristo, tan nanduvj yo tumaa maa ra. ²⁸ Ña ñihj xaan ca tsa cuví yo nyivi Israel, a cuví yo nyivi Grecia; a cuví yo musu, a

ñavin musu cuví yo; a cuví yo rayi, a ñaha. Yoñi ca caahán tuhun yacan, tyin tsa iin ñi cuví yo tsihin ra Cristo, in-tuhun ña nyivi cuví yo tsihin ra. ²⁹ Tan tatun cuenda ra Cristo yihí ndo, nditsa tsa tata ra Abraham cuví ndo. Tan ñihí ndo tsa catyí Nyoo tsihin ra Abraham tyin cuhva ra tsi ra.

4

¹ Cua cahan yu iin cuhva tsihin ndo. Tatun iin ra luhlu tan tsihi jutu ra, tan nacoj jutu ra tandihi tsa cuca ra tsi ra, ra luhlu can cua cutyiñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandihi tsa cuca jutu ra. ² Iyó ra jahá cuenda tsi ra nda cuanda tsa cuiya ra tsa catyí jutu ra tyin cua naquihin ra ndaha tyiñu tsa nacoj ra tsi ra. ³ Tan tacan cuví maa yo. Tsa ndi cumañi ca quitsí ra Cristo, cuví yo musu cuhva iyó nyivi iyó nu ñuhu ñayivi ihya. ⁴ Maa tyin quivi tahan tsi, Nyoo jaquitsí ra tsi Sehe ra. Tan jacacu iin ñaha tsi ra. Tan tsindaca ñaha ley tsahnu Nyoo tsi ra. ⁵ Jaquitsí Nyoo tsi ra tyin jacacu ra tsi yo tsa ña quihí ndaha ca ley tsi yo. Tyin tacan tan naquihín cuenda Nyoo tsi yo tumaa sehe ra.

⁶ Tan tsa cuenda tsa nanduví yo sehe ra, Nyoo jaquitsí ra Tatyí Ii ra Cristo cunyaa añima yo. Tan tsa cuenda Tatyí Ii ra caná tsa yo tsi Nyoo tan catyí yo: “Tyatya”. ⁷ Yacan cuenda sehe Nyoo

cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

Tsicá iñi ra Pablo tsa cuenda nyivi yihí cuenda Nyoo

⁸ Tan quivi tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví. ⁹ Maa tyin vityin tsa nacotó ndo tsi Nyoo. Vaha ca catyi yu, maa Nyoo nacotó ra tsi ndo. ¿Nacaa tsa cuñí ndo quihin nyico ndo tuhun ndaahvi tsa nduve tunyee iñi iyó tsi, tan cuvi nyico ndo musu? ¹⁰ Nyooho ndi jacahnú ca ndo quivi vico, quivi nduyutyá yoo, tan vico tandihi ñi cuiya. ¹¹ Yuuhví xaan yu coto iin tsa cuatu ñi cuví tyiñu jahá yu tsihin ndo.

¹² Yañi, caahán ndaahvi yu tsihin ndo cjo ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñí yu tsa caca iñi ndo tyin jativí ndo tsi yu. ¹³ Tan tsa tsitó ndo tyin quivi quitsí jihna yu ñuu ndo iyó iin cuehe tsi yu, yacan cuenda ndoo yu juhva quivi tsihin ndo, tan cahan yu tuhun ra Cristo tsihin ndo. ¹⁴ Tan vasu ndi maa tsa cuuhví yu tsihin cuehe can vaha naquihin cuenda ndo tsi yu tan ña tyaa tsiyo ndo tsi yu. Naquihin cuenda ndo tsi yu tumaa tun cuví yu iin ángel tan tumaa tun ra Cristo cuví yu. ¹⁵ Tan vityin

¿numaa cuahán tsa sîi xaan cuñi ndo tsihin yu quivi can? Tyin yuhu cuvi yu tsandaa tyin quivi can, nda cuanda cuñi ndo tava ndo tinuu ndo tan cuhva ndo tsi yu, tun tsatyin cuvi nduvaha yu tsihin yacan. ¹⁶ Tan vityin, ¿a nanduvij yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

¹⁷ Nyivi can, cuñi xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñi ñi tsa cunyicun ndo tsi ñi tan ña tsinu ca iñi ndo tuhun caahán yu. ¹⁸ Vaha tsa cuñi yo tsi nyivi, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyií ñi yu tsihin ndo. ¹⁹ Nyooho ra cuaryi sehe yu, nyehé nyico yu tundoho tan tsa uhvi tsa catyi ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehe yu tundoho nda cuanda cuahnu ndo tsihin tunyee iñi maa ra Cristo. ²⁰ Vaha xaan tun tsatyin cuvi cunyi yu tsihin ndo vityin ihya. Tyin tacan tan cuvi nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

Na coo yo tsa cuenda Nyoo tan ñavin tsa cuenda ley tsahnu

²¹ ¿A ñaha ca cahvi ndo tsa caahán ley tsa tsaha Nyoo tsi ra Moisés? tyin cuñi ndo cundaca ñaha can tsi ndo, caryi tuhun ndo tsihin yu tun ñaha ca cahvi ndo can. ²² Catyí

tsi tyin ra Abraham tsicoq uvi taahan sehe ra. Tsicoq iin sehe ra tsihin ña Agar tsa cuvi musu ñasihi ra. Tan tsicoq inga sehe ra tsihin ña Sara ñasihi vaha maa ra. ²³ Cacú sehe ñaha tsa cuvi musu can tumaa cacú tandihi ca maa lee. Maa tyin sehe ñasihi ra Abraham cacú ra tumaa catyi maa Nyoo tsihin ra tyin cua cuvi. ²⁴ Tan tuhun can iyó tsa cuñi tsi catyi tsi tsihin yo. Nduvi taahan ñi ñaha can cuvi ñi tumaa nduvi taahan tuhun tsa ndoo Nyoo tuhun tsihin yo. Intuhun tuhun can cuvi cuenda yucu Sinaí. Tan nyivi yihí cuenda ley can cuvi ñi tumaa ña Agar, tyin iin musu ñi cuvi ña tsihin sehe ña. ²⁵ Tumaa ña Agar, tan tumaa yucu Sinaí tsa canyií Arabia, tacan cuvi ñuu Jerusalén nda quivi vityin. Tyin nyivi ñuu can yihí ndaha ley tsahnu tsi ñi. Tan cuvi ñi tumaa musu ley can. ²⁶ Maa tyin nda gloria iyó inga Jerusalén, tsa cuvi ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuvi tumaa sihi yo. ²⁷ Tan catyi tuhun Nyoo tyehen:

Cusi iñi yooho, ñaha tsa ña cuvi coo sehe. Yooho tsa nduve sehe iyó.

Çana tsaa tsihin tsa sîi cuñi un, tyin ña tsito un tsa uhvi cacú sehe un.

Cusi iñi tyin cua cuhva cuaha ca yu sehe un

tan ñavin ca ñaha iyó yîi, catyí tuhun Nyoo.

28 Yañi, yoo cuví yo tumaa ra Isaac, sehe ra Abraham tyin cacu ra cuhva catyí maa Nyoo tsihin jutu ra. 29 Ra sehe ñaha tsa cuví musu can, xaan iñi ra tsi ra Isaac sehe ñasihi ra Abraham. Tacan cuví tucu vityin ihya. Ra tsa cuñí tyin javaha yo tsa catyí ley, xaan iñi ra naha tsi yo tsa cuví yo nyivi cacu tsa tsihin Tatyí li Nyoo. 30 Tan ¿náa catyí tuhun Nyoo? Catyí tsi: “Tava tsiyo tsi ñaha tsa cuví musu can tsihin sehe ña, tyin ña cuvi naquihin sehe ña tsa taahán tsi tsi sehe ñaha tsa ñavin musu cuví”, catyí tuhun Nyoo. 31 Yacan cuenda, yañi, ña cuvi yo tumaa cuví sehe ñaha tsa cuví musu can. Tyin cuví yo tumaa cuví sehe ñasihi ra Abraham, tyin ñavin musu cuví yo. [Tan Nyoo naquihin cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

5

Na tyaá yahvi yo tuhun ra Cristo tan ña cuhva yo cundaca ñaha ley tsahnu tsi yo

1 Ra Cristo tsa yahá jacacu ra tsi yo ndaha ley tsahnu can. Yacan cuenda jaha ndo cuenda tsi ndo, coto nanduvi ndo musu inga tsaha.

2 Tyaá soho ndo, yuhu ra Pablo caahán tsihin ndo. Tatun cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuvi jatyinyee ra Cristo tsi ndo. 3 Cuñí yu cahan yu tsihin ndo inga

tsaha tuhun ihya: Tandihí ra tsa cuñí cacu tsihin tsa cunyaa tuñi Nyoo tsi ra naha, cuñí tsi javaha ra naha tandihí maa tsa catyí ley ra Moisés. 4 Tandihí nyooho tsa nducú nduvaha nuu Nyoo tsihin tsa javaha ndo cuhva catyí ley can, tsa quita tsiyo ndo nuu ra Cristo. Tan jaña ndaha ndo tsa vaha tsa tsahá Nyoo tsi ndo. 5 Maa tyin yoo tsihin tsa jatyinyee Tatyí li Nyoo tsi yo tan tsinú iñi yo tsi ra Cristo, tan nyitá iñi yo nduvahá yo nuu Nyoo. 6 Tyin tatun iin ñi cuví yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuví tsa tsinú iñi yo tsi ra Cristo. Tan tsihin tsa tsinú iñi yo cuvi coo yo, tan cuñí tahan ca yo tsi yo.

7 Nyooho vaha xaan cuahán ndo quivi can. ¿Tan vityin yoo jandu uvi iñi ndo? Tan ña tyaá yahvi ca ndo tsa nditsa. 8 Tuhun tsa janahá ñi can, ñavin tuhun Nyoo, ra tsa caná tsi yo, cuví can. 9 Tyin tumaa ndaá yutsan paan jahá luxu ñi yutsan iya, tacan cuví iin nyivi caquiñi, cuaha ca nyivi cuvi jativi ñi. 10 Nyoo cua tatsi tuñi ra tsi nyivi jandu uvi iñi ndo. Nduve cuenda ra yoo ñi cuví ñi. Maa tyin yuhu tsitó vaha yu tyin Jutu Mañi yo cua jatyinyee ra tsi ndo tan ña cua tyaá iñi ndo inga cuhva tsa ña janahá yu tsi ndo.

11 Tan tsa cuenda yuhu, yañi, tun tsatyin catyí yu tyin ra tsinú iñi tsi ra Cristo cuñí

tsi tsa cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tsa caahán yu tuhun ra Cristo, ra tsa tsihi nu cruu tsacatyí cuatyí yo. ¹²Maa tyin ra tsa cuñi jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuví ca jandu uvi iñi ra naha tsi ndo.

¹³Nyooho, yañi, cana Nyoo tsi ndo tsa ña cundaca ñaha ca ley tsi ndo. Tan ñavin tsa cuenda tsa iyó nuña ndo tan cuví javaha ndo náa ndihi tsa cuñi cuñu ñuhu ndo. Maa tyin taahán tsi tsa jatyinyee tahan ndo tsi ndo tsa cuenda tsa cuñi tahan ndo tsi ndo. ¹⁴Tyin iyó iin ley Nyoo, tan catyí tsi: “Cuñi tahan ndo tsi ndo tumaa cuñi ndo tsi maa ndo”, catyí tsi. Tan tatun nditsa tsa cuñi tahan yo tsi yo, tsa javahá ndihi yo tandihi ca tsa caahán ley tsahnu. ¹⁵Jaha ndo cuenda tyin tatun caahán nyaa tahan ndo tsi ndo tan ndasi cuñi ndo nyehe tahan ndo tsi ndo, cua tiví nu yucú ndo.

Cuhva cuñi cuñu ñuhu yo tan cuhva iyó yo tsihin Tatyí Ii Nyoo

¹⁶Tsa cuñi yu cahan yu tsihin ndo cuví tuhun ihya: Coo ndo tsihin tunyee iñi Tatyí Ii Nyoo. Tacan tan ña cua javaha ca ndo tsa ña vaha tsa cuñi cuñu ñuhu ndo. ¹⁷Tyin tsa javahá yo tsa ña vaha tsa cuñi cuñu ñuhu yo, ñavin cuhva cuñi Tatyí Ii Nyoo javahá yo. Tyin Tatyí Ii Nyoo cuñi tsi tsa javahá yo

tsa vaha. Tan cuñu ñuhu yo ña cuñi tsi javahá tsi cuhva cuñi Tatyí Ii Nyoo. Tsa cuñi Tatyí Ii Nyoo cañi tahan can tsihin tsa cuñi cuñu ñuhu yo. Yacan cuenda yii javaha yo tsa cuñi yo javaha yo. ¹⁸Maa tyin tatun tsahá yo tsi yo tsa jaquihin ityi Tatyí Ii Nyoo tsi yo, ña cua cundaca ñaha ca ley tsahnu tsi yo.

¹⁹Ña yii nacoto yo tsi nyivi javahá cuhva cuñi cuñu ñuhu ñi. Yihí rayii, iyó ñasihi ra naha tan iyó inga ñaha tsi ra naha. Tan yihí ñiñaha iyó yii ñi tan iyó inga rayii tsi ñi. Tan yihí rayii quixí ra tsihin ñaha tan ña cuñi ra tindaha ra tsihin ña, tan juvin ñi tacan javaha juhva ñiñaha. ²⁰Yihí ñi jacahnú ñi tsitoho. Yihí ñi tasi ñi. Yihí ñi ndasi cuñi ñi nyehe ñi nyivi. Yihí ñi cañi tahan ñi. Yihí ñi cuiñu ñi. Tan yihí ñi iin yaha ñi cuxaan ñi. Yihí ñi tsicá iñi ñi maa ñi tsa vaha tsi maa ñi. Tan yihí ñi natahví sava ñi nu yucú ñi tyin cañi tahan ñi. Tan tacan tan quita siin ñi. ²¹Tan yihí ñi nyiyó iñi ñi tsa iyó tsi inga nyivi. Tan yihí ñi tsahñi tahan ñi. Tan yihí ñi tuhva ñi tsiñi. Tan yihí ñi cuaha xaan tsatsi ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahan yu tsihin ndo quivi can. Tyin tandihi ñi tsa javahá yacan, ña cua cuví naquihin cuenda ñi nu ndacá ñaha Nyoo.

²²Maa tyin tsa tsahá Tatyí Ii Nyoo tsi yo, cuví tsa cuñi yo

tsi Nyoo tan tsi nyivi, tsa sii cuñí yo, tsa taxin cuñí añima yo, tsa nyee xaan iñi yo, tsa vaha iñi yo, tsa vaha nyivi cuví yo, tsa ña cundihi iñi yo javahá yo tsa vaha tsihin nyivi, tsa tsinú iñi yo tsi ra Cristo. ²³ Tan inga tsa tsahá Tatyí li Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñí cuñu ñuhu yo. Tatun javahá yo tandihi tsa vaha ihya, ndi intuhun ley tan ña cua cuvi catyi tsi tyin iyó cuatyí yo. ²⁴ Tan yoo tsa yihí cuenda ra Cristo Jesús, tsa yahá jandihí yo tuhun tsa javahá yo tsa ña vaha tsa cuñí cuñu ñuhu yo. ²⁵ Tan tumaa tsa iyó yo ñayivi nyito tsa cuenda Tatyí li Nyoo, tacan cuñí ndihi tucu tsi tsa tyaá yahvi yo tsa janahá ra tsi yo.

²⁶ Na ña cahnu jaha yo tsi yo. Tan ña jacañi tahan yo tsi nyivi. Tan na ña nyiyo iñi yo tsa tsii inga nyivi.

6

Taahán tsi jatyinyee tahan yo tsi yo

¹ Yañi, tatun nyehé ndo javahá iin ra yañi yo cuatyí, nyooho tsa ñihi nyaá Tatyí li Nyoo tsihin, jatyinyee ndo tsi ra na nduvaha ra inga tsaha. Maa tyin cuñí tsi cahán vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndihi nu ña vaha tsi ndo. ² Na jatyinyee tahan yo tsi yo náa tundoho taahán yo. Tyin tatun javahá

yo tacan, cuñí tsi catyi tyin tyaá yahvi yo tsi ra Cristo.

³ Tatun ndáa yo cuñí maa yo tyin cahnu nyivi cuví yo, tan nduve náa cuví yo, juvin ñi tsi maa yo jandavi ñaha yo. ⁴ Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusii iñi yo. Tan ña taahán tsi nyehe yo náa javahá inga nyivi. ⁵ Tyin intuhun intuhun maa yo tan taahán tsi cunyehe iñi yo cuiso yo tsa taahán tsi tsi yo.

⁶ Tan cuñí tsi tsa jatyinyee ndo tsi ra jacuahá tuhun Nyoo tsi ndo. Cuhva ndo náa tsiñi ñuhu tsi ra.

⁷ Tan ña jandavi ñaha ndo tsi juvin ñi maa ndo. Tyin Nyoo yofni cuví vacu nducu tsi ra. Tyin tandihi tsa tatsí nyivi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi. ⁸ Tacan tucu tatun iin nyivi tan javahá ñi tsa ña vaha tsa cuñí cuñu ñuhu ñi, juvin ñi maa tsa javahá ñi cua jativi tsi ñi. Maa tyin tatun javahá ñi cuhva cuñí Tatyí li Nyoo, Tatyí li Nyoo cua cuhva ñayivi nyito tsa ña cua naa maa coo ñi. ⁹ Yacan cuenda janyee ndo iñi ndo javaha ndo tsa vaha. Tyin tatun ña jandihí yo tsa javahá yo tacan, cua naquihin yo tsa vaha na tahan tsi quivi. ¹⁰ Yacan cuenda tandihi ñi tsaha tsa cuvi javaha yo tsa vaha, na javaha yo itsi tsihin tandihi ñi nyivi. Tan tsa jihna ñi taahán tsi javaha yo tsa

vaha tsihin nyivi yihí cuenda Nyoo.

Sii xaan cuñí ra Pablo tyin nyehé ra tundoho tsa cuenda ra Cristo

¹¹ Nyehe ndo tsa nahnu le- tra tyaá yu tsihin ndaha yu nu tutu ihya vityin. ¹² Ra tsa jañiñí tsi ndo tsa cun- yaa tuñi Nyoo tsi ndo, tacan javahá ra naha tyin cuñí ra naha na catyi nyivi tyin vaha xaan ra naha. Tan ña cuñí ra naha nyehe ra naha tundoho tsa cuenda ra Cristo, ra tsa tsihi nu cruu tsa cuenda yo. ¹³ Tyin ndi maa ra tsa nyisó tuñi Nyoo tan ña tyaá yahvi ra naha tandihi tsa caahán ley. Cuñí ra naha tsa cunyaa tuñi Nyoo tsi nyooho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha. ¹⁴ Maa tyin yuhu ña cuñí yu cu iyo iñi yu tsi yu tsa cuenda náa ndihi tuhun. Maa tyin cu iyo iñi yu tyin tsihi Jutu Mañi yo Jesu- cristo nu cruu tsa cuenda yu. Tan maa ra ndacá ñaha tsi yu, tan ña cuñí ca yu tsa iyó ñuu ñayivi ihya tyin ña ndaca ñaha ca yacan tsi yu. ¹⁵ Tyin tatun nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduví yo iin nyivi tsa tsa cuenda ra. ¹⁶ Tandihi nyooho tsa iyó tacan, naquihin ndo tsa taxin coo añima ndo. Tan na cundaahvi iñi Nyoo nyehe ra tsi tandihi ndo, tyin nditsa tsa cuví ndo nyivi cuenda ra.

¹⁷ Vityin tan nu cuahán tsi ityi nuu, ndi intuhun ndo tan

ña cua cuhva ca ndo tsihi tsi yu. Tyin tandihi paa tsa nyecú cuñu ñuhu yu, cuñí tsi catyi tsi tyin nditsa tsa cuví yu iin ra tsicá tyiñu Jutu Mañi yo Jesús.

¹⁸ Yañi, na nasoco Jutu Mañi yo Jesucristo tsi tandihi ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

Nu quitsaha javahá ra Pablo carta

¹ Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsí yu carta ihya tsi ndo. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña ndo.

Tsa iin ñi cuví yo tsihin ra Cristo, Nyoo nasocó xaan ra tsi yo

³ Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihi nuu tsa vaha tsa iyó gloria tsa cuenda tsa iin ñi cuví yo tsihin ra Cristo. ⁴ Tsa ndi cumañi ca javaha ra ñuhu ñayivi tan nacatsi ra tsi yo tyin ndu iin yo tsihin ra Cristo. Tyin tacan tan cuiti coo yo nuu ra tan ña coo ca cuatyí yo. ⁵ Tsa cuenda tsa cuñí ra tsi yo, tyaa ra cuhva tahañ tsanaha tyin nanduvi yo sehe ra tsa cuenda ra Jesucristo. Tacan javaha ra tyin tacan cacu iñi maa ra. ⁶ Yacan cuenda taahán tsi jacahnu xaan yo tsi ra, tyin tsahá ra

tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra. ⁷ Nyoo cuñí xaan ra tsi yo. Tan yacan cuenda tyahvi ra tsihin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo. ⁸ Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsiñi tuñi ra coo tsi yo. ⁹ Tan tsahá ra tsa nacotó yo tuhun tsa tyihí ra cuhva tahañ tsanaha tyin javaha ra tsihin ra Cristo. Tan tandihi tuhun can tsicumí xeehe ra tan ña jacotó ra can tsi nyivi tahañ tsanaha. ¹⁰ Maa tyin tsa cua tahañ tsi quivi cundaa tuhun tsa tyihí ra cuhva, cua jandu iin ra tandihi tsa iyó nu ñuhu ñayivi ihya tan andivi, tan cua nacuhva cuenda ra tandihi can tsi ra Cristo tyin quihí ndaha ra.

¹¹ Tan tsa cuenda tsa iin ñi cuví yo tsihin ra Cristo, ñihí ndihi yo tsa ñihí ra, tyin maa Nyoo cuñí tacan. Yacan cuenda nacatsi ra tsi yo, tyin tacan tyihí ra cuhva tyin javaha ra tyin maa ra javahá tandihi cuhva nyehé ra tyin vaha. ¹² Javaha ra tyehen tyin nyuhu tsa natsinu jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra. ¹³ Tan tacan tucu nyooho natsinu iñi ndo tsi ra Cristo, tan ndu iin ndo tsihin ra quivi tsa tsiñi ndo tuhun Nyoo tsa cuví tsa nditsa, tan nácaa jacacú ra tsi yo. Tan tsaha ra Tatyí Ii ra coo aña ndo, tumaa catyí ra tyin cua javaha ra tan yacan cuñí tsi catyí tyin

cuví ndo nyívi yihí cuenda ra. ¹⁴ Nyoo jihna ca Tatyí lí ra tsahá ra tsi yo tyin tacan tan cuita íñi yo tandihí ca tsa cua cuhva ra tsi yo quívi jandu iin ra tandihí nyívi tsa cua cacu. Tyin tacan tan jacahnu yo tsi ra, tyin cahnu xaan cuví ra.

Nu tsicán ra Pablo tsi Nyoo na cuhva ra tsa tsiñi tuñi tsi nyívi tsa tsinú íñi

¹⁵⁻¹⁶ Yacan cuenda, tsa ñihí tuhun yu tyin tsinú vaha íñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñi tahan xaan ndo tsi ndo tsa yihí ndo tuhun Nyoo.

¹⁷ Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi íñi ndo tsa janahá ra tsi yo tsihin Tatyí lí ra, tacan tan nacoto vaha ca ndo tsi ra. ¹⁸ Tan tsicán yu tsi ra, na cuhva ra tsa cutuñi vaha íñi ndo, tyin tacan tan coto ndo nacuenda caná ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi nyívi cuenda ra, sií xaan caá can tan cuca xaan can. ¹⁹ Tan cahnu xaan cuví tunyee íñi tsa iyó tsi ra, tan ña cuví cutuñi íñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú íñi tsi ra. Tan juvin ñi maa tsihin tunyee íñi cahnu can ²⁰ janandoto Nyoo tsi ra Cristo. Tan tyaá ra tsi ra xiin cuaha ra nda gloria. ²¹ Tan yacan cuví nu jacahnu

xaan ca Nyoo tsi ra Cristo tan ñavin ca tandihí ca ra ndacá ñaha nu ñuhu ñayívi ihya tan nda andívi. Tyin yoñi yóo ra cahnu ca cuví ñuu ñayívi ihya tan ndi ñayívi tsa cua coo, tyin intuhun ñi maa ra Cristo cuví ra cahnu ca cuví. ²² Tan tandihí cuii maa tsa iyó tsahá Nyoo tyin cundaca ñaha ra Cristo. Tan tsahá Nyoo tsa cuví ra jiñi tsihin nyívi tsa yihí cuenda ra. ²³ Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juvin maa ra janduní ra tandihí tsa iyó.

2

Jacacú Nyoo tsi yo tsa cuenda tsa cuñi ra tsi yo

¹ Nyoo tsahá ra ñayívi nyito coo ndo quívi ndu iin ndo tsihin ra Cristo. Maa tyin tsa ndi cumañi ca tsinu íñi ndo tsi ra Cristo ña nyito añima ndo tyin ndi iyó cuaha cuatyí ndo. ² Tan quívi can ndi javahá ndo cuhva javahá nyívi ña tsitó tsi Nyoo. Ndi tyaá yahvi ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyívi tsa ña tyaá yahvi tsi Nyoo. ³ Tan juvin ñi tacan tsicoo tucu yo quívi can, tyin javahá yo tsa ña vaha tsa cuñi cuñu ñuhu yo tan cuhva tsicá íñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihí ca nyívi tsa javahá tsa ña vaha. ⁴ Maa tyin Nyoo cundaahvi xaan íñi ra nyehe ra tsi yo

tša cuenda tša cuñi xaan ra tsi yo. ⁵ Tan vasu tša tsihi añima yo jahā cuatyí yo, Nyoo janandoto ra añima yo tan tsahā ra ñayivi nyito coo yo nu jandu iin ra tsi yo tsihin ra Cristo. Tan cacu yo jahā tša cuñi xaan Nyoo tsi yo. ⁶ Tan tša janandoto ra tsi yo iin caa ñi tsihin ra Cristo Jesús tyaa ra tsi yo tsihin ra nda gloria. ⁷ Tan javahā Nyoo tyehen tyin tacan tan nu cuahán ca tsi ityi nuu cua coto tandihi ca tša cua coo tyin vaha xaan iñi ra tsihin yo tan cahnu xaan tumañi iñi tsahā ra tsi yo tša cuenda ra Cristo Jesús. ⁸ Tyin tša cuenda tša vaha tša tsahā Nyoo tsi yo tan cacu yo. Tan ñihi yo tumañi iñi ihya jahā tša tsinú iñi yo tsi ra Cristo. Tan ñavin tsihin tša javahā yo tan ñihi yo can, tyin maa Nyoo tsahā can tsi yo. ⁹ Ñavin tsihin tša javahā yo tša vaha tan cuví cacu yo. Yacan cuenda ndi intuhun yo tan ña taahán tsi cu iyo iñi yo tyin cacu yo tsihin tša javahā yo tša vaha. ¹⁰ Nyoo janduvahā ra añima yo tsihin tša ndu iin yo tsihin ra Cristo Jesús. Tacan javahā ra tyin tacan tan javaha yo tša vaha, tyin nda tsanaha tan tyaa ra cuhva tyin coo yo tacan.

Cuví yo nyivi Israel, a cuví yo nyivi inga ñuu, maa tyin tša cuenda ra Cristo iin ñi nyivi cuví tandihi yo

¹¹ Catyí ra Israel naha ra tyin ña vaha nyooho tša ñavin nyivi Israel cuví, tyin ña tsinyaa tuñi Nyoo cuñu

ñuhu ndo tumaa maa ra naha. Cuñi maa ra naha tyin vaha ra naha nuu Nyoo tan nyooho ña vaha ndo. ¹² Tan nducuhun tucu iñi ndo tyin nu quitsi tsi tahañ tsanaha, nduve ra Cristo iyó añima ndo. Tan ndi ña iin ñi cuví ndo tsihin nyivi Israel. Tan ña tsitó ndo tuhun tša ndoo Nyoo tsihin ra Abraham tan tsihin nyivi tata ra. Tyin iyó soho ñi maa ndo quivi can, tan nduve Nyoo nyaá tsihin ndo. Yacan cuenda nduve náa cua ñihi ndo. ¹³ Tyin ndi luxu tuhun Nyoo tan ña tsitó ndo tahañ tsanaha, maa tyin vityin ndu iin ndo tsihin ra Cristo Jesús tyin quitsi ra tsati ra ñiñi ra tša cuenda ndo. ¹⁴ Tyin juvin ra Cristo tsahā tša taxin coo yo tan jandu iin ra tsi nyooho tša ñavin nyivi Israel cuví tsihin nyuhu tša cuví nyivi Israel. Vityin iin ña nyivi cuví yo, tyin jandihí ra tša xaan cuñi yo nyehé tahan yo tsi yo. ¹⁵ Tan tša quitsi ra Cristo tsihi ra nu cruu, tsindihí tuhun tsahnu tša iyó ndi tša tyasí nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyivi cuví yo nuu ra, tan iyó yo tsihin tša taxin. ¹⁶ Tan tsihin tša tsihi ra nu cruu tsindihí tša ña caahán tsihin tahan yo, tan nacoo vaha yo tsihin Nyoo jahā ra, iin ña nyivi cuví yo vityin.

¹⁷ Ra Cristo quitsi ra cahan ra tyin cuví coo vaha yo tsihin Nyoo tan tsihin tahan yo: Cahān ra tsihin ndi tša cuví ndi nyivi Israel tša tša

tsitó maa tuhun Nyoo tan tsihin nyooho tsa ña tsitó ndi luxu maa tuhun Nyoo tahañ tsanaha. ¹⁸ Tan tsa cuenda tsa quítsi ra Cristo tsihi ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí li ra iyó añima yo: a cuví yo nyívi Israel, o ñavin nyívi Israel cuví yo. ¹⁹ Yacan cuenda nyooho ñavin ca nyívi inga ñuu cuví ndo, tyin iin ña nyívi cuví ndo tsihin nyívi yihí cuenda Nyoo. Tan cuví ndo nyívi maa ra. ²⁰ Tan cuví ndo tumaa iin vehe. Tan nyecú ndo nu sama ra tava tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús. ²¹ Tan tsata yuu tsa cuví ra Cristo, si xaan cua quita vehe tsa ndi cuahán tsinú, tyin tandihi maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo. ²² Tan tacan tucu nyooho ndu iin ndo tsihin tandihi nyívi yihí cuenda ra Cristo jahá Tatyí li ra, tyin tacan tan cua cuví ndo vehe nu coo Nyoo.

3

Nyoo tava tyiñu tsi ra Pablo tyin cahan ra tuhun ra Cristo tsihin nyívi tsa ñavin nyívi Israel cuví

¹ Yacan cuenda yuhu ra Pablo nyíi yu vehe caa ihya tyin jacotó yu tuhun ra Cristo Jesús tsi nyooho tsa ñavin nyívi Israel cuví. ² Taahán tsi coto ndo tyin cahnu xaan

tunyee iñi tsahá ra tsi yu tsa cuenda tsa vaha tsi ndo, tyin jacotó yu tuhun ra tsi ndo. ³ Tan Nyoo janaha ra tuhun xeehe tsa tsicumí ra tsi yu, tan tyaá yu juhva tuhun can nu carta ihya tyin coto ndo. ⁴ Tan tsa cua cahvi ndo tuhun tsa tyaá yu ihya cua coto ndo nácaa tsaha Nyoo tyin cutuñi iñi yu tuhun ra Cristo tsa tsicumí xeehe ra. ⁵ Tyin nu quítsi tsi tahañ tsanaha, ña janaha Nyoo tuhun xeehe can tsi nyívi, tumaa tsa janahá Tatyí li ra tuhun can tsi ra tava tyiñu ra Jesucristo tan ra cuví ndusu yuhu Nyoo. ⁶ Tan tuhun xeehe can, cuñi tsi catyí tyehen: Nyívi tsa ñavin nyívi Israel cuví cua ñihi ndihi ñi tsa cua ñihi nyívi Israel tyin iin ña cuñu ñuhu cuví yo vityin tsa cuenda tsa jacacu ra Cristo tsi yo. Tan cua ñihi yo tsa catyí Nyoo tyin cuhva ra tsi yo tyin natsinu iñi yo tsi maa ra Cristo Jesús.

⁷ Nyoo tsaha ra tsa vaha tsi yu tan jatyinyeé ra tsi yu tyin tacan tan jacoto yu tuhun vaha ihya tsi nyívi. ⁸ Yuhu luhlu xaan ra cuví yu tan ñavin ca tandihi nyívi tsa yihí cuenda Nyoo. Maa tyin Nyoo tsaha ra tumañi iñi cahnu ihya tsi yu tyin cahan yu tuhun ra Cristo tsihin nyívi tsa ñavin ñi Israel cuví. Tyin na coto ñi tsa cuca tsa cua cuhva ra Cristo tsi ñi. ⁹ Tava tyiñu Nyoo tsi yu na jacoto yu tsi tandihi nyívi nácaa tyaá ra cuhva tsa cua javaha ra tsa ndi cumañi ca javaha ra

tandihí tsa iyó, tyin tsanaha ña jacoto ra tuhun tsa tsicumí xeehe ra tsi nyívi. ¹⁰ Tacan cuví tan vityin tandihí ra ndacá ñaha nda andívi cua nyehe tsa vaha tsa javahá Nyoo tsihin yo tsa cuví yo nyívi yihí cuenda ra. Tan cua coto ra naha tyin iyó xaan tsa tsiñi tuñi tsi Nyoo. ¹¹ Tandihí tuhun ihya nacatsí tahan tsi tsihin tsa tyaá Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo. ¹² Tan tsa cuenda tsa tsinú ñi yo tsi ra Cristo, tsaha Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra. ¹³ Tan tsa cuenda tsa tsaha ra ndatu can tsi yo caahán ndaahvi yu tsihin ndo na ña ndu uvi ñi ndo tsa nyehé yu tundoho tsa cuenda ndo. Tyin tsa tyehen nyehé yu tundoho tsa cuenda ndo, tsa vaha tsi maa ndo cuví can.

Tsicán tahvi ra Pablo tyin na nacoto vaha ca nyívi tsi ra Cristo

¹⁴ Tan tsa cuenda tsa ndu-cuhun ñi yu tumañi ñi tsa javahá Nyoo, Jutu ra Jesucristo Jutu Mañi yo tsihin yo, tsicuiñí tsiti yu nuu ra. ¹⁵ Tyin juvin ra cuví Jutu tandihí nyívi: ñi tsa cuahán andívi, tan ñi tsa yucú nu ñuhu ñayívi ihya. ¹⁶ Tan tsicán yu tsi ra na jandunyeer xaan ra ñi ndo tsihin Tatyí Ii ra tsa iyó aña ndo. ¹⁷ Tan na coo ra Cristo aña ndo tsihin tsa tsinú ñi ndo tsi ra. Tacan tan cua cuñi xaan ndo

tsi tandihí nyívi, tyin nyanaá vaha ndo tsi Nyoo. ¹⁸ Tacan tan cua cutuñi vaha ñi ndo tsihin tandihí ñi yihí cuenda ra nácaa tsa cahnu xaan tsa cuñi ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyívi nácaa tsa cuñi ra tsi ndo. ¹⁹ Tsicán yu tsi Nyoo na coto ndo nácaa tsa cahnu xaan tsa cuñi ra tsi ndo. Nyoo nyaá maa ra tsihin ndo.

²⁰ Tan vityin na jacahnu yo tsi Nyoo, ra tsa iyó xaan tunyee ñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá ñi yo. Tyin juvin ñi tsihin tunyee ñi maa ra tsa tsahá ra tsi yo, javahá ra tandihí. ²¹ Yoo tsa cuví yo nyívi tsinú ñi tsi Nyoo, na jacahnu yo tsi ra tacan ñi maa, tsa cuenda tsa javahá ra Cristo Jesús. Tan na cuví tsi tacan.

4

Iin ñi cuví tandihí yo tsa yihí yo cuenda ra Cristo jahá Tatyí Ii Nyoo

¹ Yacan cuenda yuhu, tsa nyívi yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyívi tsa nacana Nyoo. Tyin nacana ra tsi ndo na cuví ndo nyívi ra. ² Yacan cuenda jandundaahvi ndo tsi ndo nuu nyívi, tan vita cuhun ñi ndo. Tan ña cutyixin ndo tsihin ñi, tan ña cundihi ñi ndo nyehé ndo tsi ñi tyin tacan tan coto ñi tyin cuñi

ndo tsi ñi. ³ Tyin tsa taxin tsa tsahá Nyoo coo añima yo jandu iín tsi tsi yo tan yacan cuenda nducu vaha ndo cuhva tan iin ñi cuvi ndo tsihin tsa jatyinyee Tatyí Ii Nyoo tsi ndo. ⁴ Tandihí yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihí yo intuhun ñi Tatyí Ii Nyoo iyó tsihin yo, tan catyí Nyoo tsihin tandihí yo tyin nditsa tsa cua ñihi yo ñayivi nyito coo yo. ⁵ Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutyá yo. ⁶ Iyó intuhun ñi Nyoo tan maa ra cuví ra Jutu tandihí yo. Tan ndacá ñaha ra tsi tandihí yo, tan iyó ra añima tandihí yo, tan tsatyíñú ra tsi tandihí yo, tan jahá tyiñu yo tyiñu ra.

⁷ Tan tsahá ra Cristo ndatu tsi tsa intuhun intuhun yo cuhva cuñí maa ra. ⁸ Yacan cuenda catyí tsi nu tutu Nyoo tuhun ra Cristo tyehen:

Cunyeé ra jahá canaa ra tsi nu xaan iñi tsi ra, tan quihjñ nyaa ra tsi nyivi tsa yihí ndaha nu tan nandaá ra andivi tsihin ñi.

Tan tsahá ra ndatu tsi yo tsa jaha tyiñu yo tyiñu ra, catyí tsi.

⁹ ¿Tan náa cuñí tsi catyí tsa “nandaá ra”? Cuñí tsi catyí tyin nuu jihna ra nu ñuhu ñayivi. ¹⁰ Ra tsa nuu can, juven ñi ra cuví ra tsa nandaá nda gloria. Tyin tacan tañ janduní ra tandihí maa tan cunyaa ra tsihin yo tandihí

ñi ityi. ¹¹ Tan juven ñi maa ra Cristo tsahá ndatu tsi yo. Tsi juhva yo tava tyiñu ra tsi yo tsa caca yo tyiñu ra. Tan tsi inga yo tsahá ra tsa cuví yo ndusu yuhu ra. Tan tsi inga yo tsahá ra tyin jacoto yo tsi nyivi nácaa jacacú ra tsi yo. Tan tsi inga yo tsahá ra tsa jaha cuenda yo tsi ñi yihí cuenda ra, tan tsi inga yo tsahá ra tsa cuví jacuaha yo tuhun ra tsi ñi. ¹² Tacan tsahá Nyoo ndatu can tsi yo tyin jatyinyee tahan yo tsi yo tan tsi inga ca nyivi tyin tacan tan cuahnu ca yo tsihin ra Cristo. ¹³ Nda cuanda ndu iin tandihí yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsa yo cuvi yo tumaa cuví maa ra Cristo. ¹⁴ Tacan tan ña cua cuvi ca yo tumaa tsa nyihi. Tyin tsa nyihi yatyi xaan tsinú iñi tsi náa luxu tsa ñihí tuhun tsi. Tan na ña cuvi yoo tacan tyin coto jandavi ñaha nyivi tsi yo. ¹⁵ Maa tyin tyehen cua javaha yo: cua cuñi yo tsi nyivi tan cua cahan yo tsa nditsa tsihin ñi. Tan ndunyeé ca añima yo tsihin tandihí tsa vaha tsa iyó tsi Nyoo. Tan cuahnu yo tan cuvi yo tumaa maa ra Cristo, ra cuví ityi nuu tsihin yo. ¹⁶ Tan tsa cuenda ra Cristo tandihí yo tsa cuví yo cuñu ñuhu ra, iin ñi cuvi yo. Tumaa yihí tahan iin cuñu ñuhu, tan tsa iin tsa iin nu yihí tahan tsi vaha jahá tyiñu tsi. Tan tacan jatyinyeé tsi tsi naní cuñu ñuhu can, na coo vaha tsi tan

cuahnu tsi. Tan tacan tucu yoo, tsahnú yo tsihin tsa cuñi tahan yo tsi yo tan jatyinyeé tahan yo tsi yo.

Tsahá ra Cristo ñayivi nyito coo yo

17 Tuhun ihya cuví tsa tsahá cuenda yu tsi ndo, catyí Jutu Mañi yo. Ña coo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatyinyeé tsi ñi tsicá iñi ñi. 18 Tan ña cutuñi iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava aña ñi. 19 Ña cahán ca nuu ñi javahá ñi tsa ña vaha. Tan nacuhva cuenda ñi tsi ñi tsi tsa caquiñi. Maa ñi tsa ña vaha cuñi ñi javaha ñi. 20-21 Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhva ndo tsa nditsa cuví tuhun maa ra Cristo. 22 Yacan cuenda ña coo ca ndo cuhva tsicoo ndo quivi can, tan ña javaha ca ndo tsa caquiñi tsa cuñi cuñu ñuhu ndo, tyin tsanaha, jandaví ñaha xaan can tsi ndo. 23 Nacuhva cuenda ndo tsi ndo tsi Nyoo na nasama ra cuhva tsicá iñi ndo. 24 Tan coo ndo ñayivi nyito tyin vityin nyivi tsa cuví ndo jahá Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cuiti iyó ndo.

25 Yacan cuenda ña cahan ca ndo cuendu. Cahán ndo maa ñi tsa nditsa tsihin nyivi

tyin iin ña cuñu ñuhu cuví tsa tandihí yo.

26 Tatun cuxaan ndo, jahá ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihí tsihi tsi ndo nduvi. 27 Tan ña cuhva ndo ndatu tsi nu ña vaha tsa nducu cuhva nu tsi ndo.

28 Ra tsa tuhva suhu quivi can, na ña suhu ca ra vityin. Na jaha tyiñu ra tsihin ndaha ra. Tacan tan coo tsa tsii ra, tan cuvi jatyinyee ra tsi nyivi tsa iyó tsa tsiñi ñuhu tsi ñi.

29 Ña cahan ndo tsa ndavaha ñi. Cahán ndo, maa ñi tsa vaha tsa cua jatyinyee tsi nyivi tsa tsiñi tsa caahán ndo. 30 Tan ña cuhva ndo tucuihaya iñi tsi Tatyí Ii Nyoo tyin Tatyí Ii ra cuví tuñi tsa tyaa ra aña yo nda cuanda ndihí jacacu ra tsi yo quivi cua quitsi ra.

31 Ña cuhun iñi ndo tsihi. Tan ña cuxaan ndo. Tan ña cuvi ndo nyivi tyixin. Tan ña cahan nyaa ndo tsi nyivi, tan ndi ña cahan ndo tsa ndavaha ñi. 32 Maa tyin cuvi ndo nyivi vaha, tan cundaahvi iñi ndo tsi nyivi. Tan jahá ndo tucahnu iñi tsi ñi, tumaa jahá Nyoo tucahnu iñi tsi maa ndo tsa cuenda ra Cristo.

5

Nacaa taahán tsi coo nyivi yihí cuenda Nyoo

1 Nducu ndo cuhva coo ndo tumaa iyó maa Nyoo, tyin sehe ra cuví tsi yo, tan cuñi xaan ra tsi yo. 2 Cuñi yo

tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuvi jutu mbee ticaty luhlu nuu Nyoo, tacan jamañi ra Cristo tsi ra tsa cuenda yo. Tan sii xaan cuñi Nyoo tsihin ra tsa cuenda tsa javaha ra tacan.

³ Vityin tsa cuvi yo nyivi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cuñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya. ⁴ Ña cahan ndo tuhun tsa tsahá ticanuu tsi yo. Tan ndi ña cahan ndo tsa nduve yahvi nyaá. Tyin ña taahán tsi cahan yo tacan. Vaha ca cuhva ndo tyahvi nyoo tsi Nyoo. ⁵ Tyin tsa tsitó ndo tyin tandihi nyivi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasihi ra cuvi ña, a ñaha iyó tsihin rayii tan ñavin yii ña cuvi ra, tan nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitoho cuvi can, tyin maa ñi yacan tsicá iñi ñi tan ña jacahnú ñi tsi maa Nyoo. ⁶ Ña cuhva ndo tsa jandavi ñaha nyivi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihi tsa ña vaha can cua tatsi tuñi Nyoo tsi nyivi tsa ña tyaá yahvi tsi ra. ⁷ Yacan cuenda ña cutahan ndo tsihin ñi.

⁸ Nyooho tsicoo ndo nu

naa quivi can. Tan vityin ña taahán ca tsi coo ndo nu naa tyin Jutu Mañi yo tsa tava ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo. ⁹ Tyin Nyoo jandunditsin ra añima yo tan janduvaha ra añima yo, yacan cuenda javaha ndo tsa vaha tan cahan ndo maa ñi maa tsa nditsa. ¹⁰ Jañiñi ndo cutuhva ndo cuhva taahán iñi Jutu Mañi yo. ¹¹ Ña javaha ndo cuhva javahá nyivi iyó nu naa. Tyin nduve náa tsa vaha ñihí ñi tsihin can. Vaha ca jacoto ndo tsi ñi tyin ña vaha tsa javahá ñi. ¹² Tyin cahan nuu yo cahan yo tsa javahá xeehe ñi. ¹³ Maa tyin quivi quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandihi tsa yihí xeehe. ¹⁴ Yacan cuenda iyó nu catyí tsi:

Ndoto yoocho tsa quixí un,
nduvita mahñu nu
yucú ndiyi.

Tan ra Cristo cua jandunditsin ra ñuhu nu cuahán un, catyí tsi.

¹⁵ Yacan cuenda jaha ndo cuenda cuhva iyó ndo. Tan ña coo ndo tumaa iyó ra soho. Coo ndo tumaa iyó ra tsitó. ¹⁶ Tan nducu ndo cuhva cahan ndo tuhun Nyoo tsihin nyivi tandihi ñi cuhva tsa nuña ndo, cahan ndo tyin vityin maa ñi maa tsa caquiñi javahá ñi. ¹⁷ Yacan cuenda ña soho coo ndo. Nducu ndo cuhva cutuñi iñi ndo cuhva cuñi maa Jutu Mañi

yo. ¹⁸ Ña cōho ndo nyixi tan cuvi ndo ra tsiñi tyin cuvi jativi yacan tsi ndo. Maa tyin cūhva ndo tsi ndo cundaca ñaha Tatyí li Nyoo. ¹⁹ Cahan ndo tsihin tahan ndo maa ñi tsa vaha, tan jācāhnu ndo tsi Nyoo. Cāta ndo salmo cuenda ra; cāta ndo yaa Nyoo; cāta ndo tsa tsahá Tatyí li tsi ndo; jācāhnu ndo tsi Jutu Mañi yo tsihin tandihi añima ndo. ²⁰ Tacan ñi načuhva ndo tyahvi nyoo tsi Nyoo Jutu yo tsa cuenda tandihi maa, a sii cuñi ndo, o nyehé ndo tundoho. Naçuhva ndo tyahvi nyoo tsi ra tsihin ndatu tsa tsahá Jutu Mañi yo Jesucristo tsi yo.

Nacaa taahán tsi cooyo tsihin nyivi yo

²¹ Tyaa yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaá yahvi ndo tsi Nyoo

²² Nyooho tsa iyó yii, tyaa yahvi ndo tsa caahán yii ndo tumaa tsa tyaá yahvi ndo tsa caahán Jutu Mañi yo. ²³ Tyin rayii cuvi ityi nuu tsihin ñasihi ra, tumaa cuvi ra Cristo ityi nuu tsihin nyivi yihí cuenda ra. Juvín ñi maa ra jacacú tsi yo tsa cuvi yo cuñu ñuhu ra. ²⁴ Yacan cuenda tumaa tsa cuvi ra Cristo ityi nuu tsihin nyivi yihí cuenda ra, tacan taahán tsi tyaá yahvi ñaha tsi yii ña.

²⁵ Tan nyooho rayii, cuñi tsi tsa cuñi ndo tsi ñasihi ndo tumaa cuñi ra Cristo tsi yo tsa yihí yo cuenda ra, tan

tsahá ra ñayivi ra tsa cuenda yo. ²⁶ Tacan javahá ra tan jandundií ra añima yo tsihin tuhun caahán ra tsa cuvi tumaa ndutya, tan nacatya ra tsi yo quivi tsa natsinu ñi yo tsi ra. ²⁷ Ndoq añima yo tumaa ndoó iin jahma, ña nyayu ca tsi, ña tiyi ca tsi. Tyin ra Cristo jandundií ra tsi yo tsa cuvi yo nyivi yihí cuenda ra. Tyin tacan tan cuvi nacuhva cuenda ra tsi yo tsi Nyoo, tyin vaha yo, tan nduve ca cuatyí yo. ²⁸ Tacan taahán tsi cuñi rayii tsi ñasihi ra, tumaa tsa cuñi ra cuñu ñuhu maa ra. Tyin tatun cuñi ra tsi ñasihi ra, cuñi ra tsi maa ra. ²⁹ Tyin ndi intuhun yo tan ña cuvi tsa ña cuñi yo cuñu ñuhu yo, tyin jacatsí yo tan jacunditsí yo cuñu ñuhu yo. Tan ra Cristo juvín ñi tacan javahá ra tsihin nyivi yihí cuenda ra. ³⁰ Tyin cuñu ñuhu ra cuvi yo. Tan intuhun intuhun yo cuvi yo juhva cuñu ñuhu ra tan yiqui ra. ³¹ Catyí tuhun Nyoo: "Rayii taahán tsi nacoo ra tsi jutu ra tan tsi sihi ra, tan ndu iin ra tsihin ñasihi ra. Tan intuhun ña cuñu ñuhu cua cuvi tsa nduvi ñi." ³² Xeehe xaan tan cahnu xaan tuhun ihya, tan catyí yu tyin cuñi tsi catyí tyin ra Cristo ndu iin ra tsihin nyivi yihí cuenda ra tumaa ndu iin iin rayii tsihin ñasihi ra. ³³ Tan inga tucu tuhun, cuñi tsi catyí tyin intuhun intuhun ndo taahán tsi tsa cuñi ndo ñasihi ndo, tumaa cuñi ndo tsi maa ndo. Tan nyooho ñiñaha, tyaa yahvi ndo tsi yii ndo.

6

1 Nyooho tsa nyihi, tyaa soho ndo tsa caahán jutu ndo tan sihi ndo. Tyin tacan taahán tsi javaha ndo. ²⁻³Tyin nu tutu Nyoo catyí tsi tyehen: “Jaha tsa ñayivi tsi jutu un tan sihi un”, tan tuhun ihya cuví tsa jihna ñi catyí Nyoo tyin javaha yo tan cua ñihi yo tsa cua cuhva ra tsi yo. Tyin tyaa ra cuhva tyin tun javaha yo tacan, sii xaan cua coo yo tan cuaha xaan quivi cua coo yo nu ñuhu ñayivi ihya.

4 Tan nyooho tsa iyó sehe, ña javaha ndo tsa ña vaha tsi sehe ndo tan cuxaan iñi tsi tsi ndo. Maa tyin jacuaha ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

5 Tan nyooho tsa cuví musu, tyaa yahvi ndo tsi ra yihí ndaha tsi ndo nu ñuhu ñayivi ihya. Jaha ndo tsa ñayivi tsi ra naha tsihin tsa nii iñi añima ndo. Tan nducu ndo cuhva tyaa yahvi ndo tsi ra naha tumaa tyaa yahvi ndo tsi ra Cristo.

6 Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyi tsitoho ndo tyin vaha xaan ndo. Jaha tyiñu vaha nyooho tumaa tsatyin tyiñu ra Cristo javahá ndo. Tacan tan cua javaha ndo cuhva cuñí Nyoo tsihin tsa nii iñi añima ndo. ⁷Jaha tyiñu ndo tsihin tsa sii cuñí ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi. ⁸Tyin tsitó ndo tyin Jutu Mañi yo cua tyahvi

ra tsi intuhun intuhun ndo tun javahá ndo tsa vaha, vasu ndi maa musu cuví ndo o ñavin musu cuví ndo.

⁹Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña sii caá iin nyivi tan inga ñi nuu ra.

Tunyee iñi tsa tsahá Nyoo tsi yo tsa yihí yo cuenda ra

¹⁰Tan vityin coo ndo tsihin tunyee iñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee iñi iyó tsi ra. ¹¹Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andarú tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu. ¹²Yacan jaha vaha ndo cuenda tsi ndo tsihin tunyee iñi Nyoo tyin cañí tahan yo, maa tyin ñavin tsihin ra ñuu ñayivi, tyin cañí tahan yo tsihin nu ña vaha tsa ña cuví nyehe yo. Tan nu ican yihí ndaha tsi nyivi caquiñi. ¹³Yacan cuenda jaha cuenda vaha ndo tsi ndo tsihin tandihi tsa jatyinyee Nyoo tsi yo. Tyin tacan tan cunyee iñi ndo quivi nducu cuhva nu ña vaha tsi ndo. Tan ña cua nduva ndo jaha nu. ¹⁴Ñihi cunyaa ndo tsihin tuhun Nyoo tumaa nyaá listu vaha iin andarú tun tsa yihí cinturón tsitsi ra. Tan çaca vaha ndo ityi tsa nditsa

cuví ityi Nyoo tyin yacan cuví tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra. ¹⁵ Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cahun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyívi. ¹⁶ Tan çasi vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo. ¹⁷ Ra andaru iyó iin caa ndasí jiñi ra tan jacacú can tsi ra, tacan cuví tsa jacacu Nyoo tsi yo. Çuatyíñu vaha ndo tuhun Nyoo tyin yacan cuví tumaa mityi tsahá Tatyí Ii Nyoo tsi ndo. ¹⁸ Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí Ii ra tsi ndo. Yacan cuenda ña ndu uvi iñi ndo tan ço nyito vaha ndo, ndaçan tahvi ndihí ndo tsi Nyoo tsa cuenda tandihí nyívi yihí cuenda ra. ¹⁹ Tan ndaçan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyívi. Tyin tsanaha yihí xeehe tuhun ihya tan vityin cua nacoto ñi itsí. ²⁰ Tan tsa cuenda tsa jacotó yu tuhun ra Cristo, nyíi yu vehe caa ihya vityin. Ndaçan tahvi ndo tsa

cuenda yu, na ña nayuhví yu, tan cahan yu cuhva taahán maa tsi cahan yu.

Nu jacuhún ra Pablo tsi ra Tíquico nu yucú nyívi yihí cuenda ra Cristo

²¹ Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Nñi xaan iñi ra jahá tyiñu ra cuenda Jutu Mañi yo, tan cuñi xaan yo tsi ra. ²² Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin iñi ndo.

²³ Na cuhva Nyoo Jutu yo tan Jutu Mañi yo Jesucristo tsa taxin coo añima tandihí ra yañi yo naha ra tan na tsinu ca iñi ra naha tsi ra tan na cuñi ra naha tsi nyívi. ²⁴ Tan na nasoco xaan Nyoo tsi tandihí nyooho tsa cuñi tsi Jutu Mañi yo Jesucristo. Ña jandihí ndo tsa cuñi ndo tsi ra.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Filipos,

Nyíi ra Pablo vehe caa, tan javaha ra iin carta tan jacuhun ra tsi nyivi yihí cuenda Nyoo ñuu Filipos

¹ Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandihí ndo tsa yucú ndo ñuu Filipos tan cuví ndo nyivi cuenda Nyoo tan iin ñi cuvi ndo tsihin ra Cristo. Tan yacan jaquitsí ndi carta ihya tsi tandihí ndo tsihin ra cuví ityi nuu tsihin nyivi vehe ñuhu naha ra, tan tsihin ra jahá tyiñu vehe ñuhu naha ra. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima.

Nu tsicán tahvi ra Pablo tsa cuenda ñi yihí cuenda Nyoo ñuu Filipos

³ Tandihí ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo. ⁴ Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa sii cuñí añima yu. ⁵ Tyin nda quivi jihna tsa tsiñi ndo tuhun ra Cristo tan nda vityin tan ña jandihí ndo tsa jatinyeé ndo tsi yu. Tyin iin caa ñi jacotó yo tuhun ra Jesucristo tsi

nyivi. ⁶ Tsitó vaha yu tyin tumaa tsa quitsaha javahá Nyoo tsa vaha tsitsi añima ndo, tacan cua javaha ca ra nda cuanda quivi quitsi ra Jesucristo inga tsaha. ⁷ Taahán tsi tsa caca iñi yu tacan tsa cuenda ndo, tyin cuñí xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyíi yu vehe caa ihya, tan vasu ndi maa cuhun yu nuu ra cumí tyiñu naha ra, maa tyin jacotó yu tuhun Nyoo tsi ra yucú vehe caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo. ⁸ Nyoo tsitó ra tyin cuñí xaan yu tsi tandihí nyooho tumaa tsa cuñí maa ra Jesucristo tsi ndo. ⁹ Tan tsicán tahvi xaan yu tsi Nyoo na cuñi ca ndo tsi ra tan na cundahvi ca iñi ndo tsi nyivi. Tan nacoo ca tsa nyityi Nyoo tsi ndo, tan cutuñi ca iñi ndo, ¹⁰ tyin tacan tan cuvi ñihi ndo tsa vaha tsi Nyoo. Tan ña cua coo ca cuatyí ndo tan cuvi coo vaha ndo tsihin tuhun Nyoo nda cuanda quivi quitsi ra Cristo. ¹¹ Maa ra cua jatinyeé tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahnu xaan ra cuví ra.

Maa ñi maa tyiñu Nyoo javahá ra Pablo tyin iyó ra Cristo añima ra

¹² Yañi, cuñí yu tsa coto ndo tyin tandihí tundoho taahán yu, jatinyeé xaan tsi tyin nducuaaha ca nyivi tsinú iñi

tuhun Nyoo. ¹³ Tan tandihi andarú tsa iyó vehe ra cuví rey tan tandihi nyívi iyó ihya tsitó ñi tyin nyíi yu vehe caa tsa cuenda tsa nyicún yu tsi ra Cristo. ¹⁴ Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatyinyeé Nyoo tsi yu nu nyíi yu vehe caa. Yacan cuenda jañihí ca ra naha caahán ra naha tuhun Nyoo tsihin nyívi.

¹⁵ Tan nditsa tyin yihí ra naha, caahán ra naha tuhun ra Cristo tsa cuenda tyin cuñí ra cunyicun nyívi tsi maa ra naha. Tan yihí tucu ra naha caahán ra naha tuhun ra Cristo tsihin nyívi maa tyin tsihin tsa ñi iñi ra naha. ¹⁶⁻¹⁷ Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsi tsi yu ihya. Tyin cahan yu tuhun ra tan jacotó yu tsi nyívi tyin nditsa tsa jacacú ra tsi yo. Tan tsa cuenda tsa cuñí ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa ñi iñi ra naha tan caahán ra naha tuhun ra Cristo, tyin cuñí ra naha na cunyicun cuaha nyívi tsi ra naha tan cuñí ra naha vacu nducu ra naha tsi yu nu nyíi yu vehe caa ihya. ¹⁸ Tan ña ndihi iñi yuhu tatun juhva ra naha caahán ra naha tuhun ra Cristo tsihin tsa ña ñi iñi ra naha. Maa tyin yuhu si xaan cuñí yu tyin tuhun ra Cristo caahán tandihi ra naha, cuví ñi tsa ñi iñi ra naha caahán ra naha o ñavin.

Tan ndusi ca cuñí yu ¹⁹ tyin

tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatyinyeé xaan Tatyí Ii ra Cristo tsi yu. ²⁰ Tsitó vaha yu tyin Nyoo cua jatyinyee ra tsi yu tan ña cua nducahan nuu yu, tan ña cua nayuhvi yu cahan yu tuhun ra Cristo tsihin tsa ñi iñi yu. Tan ña ndihi iñi yu, an coo ca yu ñayívi, o cúu yu, maa tyin cuñí yu cahan yu tuhun ra, tahan ñi cuhva tsa tuhvá yu caahán, na nyehe nyívi cuhva iyó yu tan coto ñi tyin ra Cristo cahanu xaan ra cuví ra. ²¹ Tyin tsa cuenda yuhu ñayívi tsa iyó yu vityin, ñayívi ra Cristo cuví. Maa tyin tatun cúu yu, cua ñihi yu tsa si caa tsa iyó gloria. ²² Tan tatun coo ca yu, vaha xaan. Tyin tacan tan cuví jañihi ca yu jahá tyiñu yu tyiñu Jutu Mañi yo. Tan cua cuví tsi tsa vaha tsa cuenda ra. Yacan cuenda ña tsitó yu nda ityi cahun yu, a cúu yu, a cahun yu cucahan ca yu tuhun Nyoo tsihin nyívi, ña tsitó yu. ²³ Yi xaan cuñí yu tan quihin yu ndáa ityi cahun yu tyin tsa cuñí yu cahun yu cunyaa yu tsihin ra Cristo. Tyin vaha ca yacan. ²⁴ Maa tyin tsa cuenda nyooho, vaha ca tsa ña cúu naha yu tyin tacan tan cuví cunyaa yu tsihin ndo tan coto ca ndo tuhun Nyoo. ²⁵ Yacan cuenda tsitó yu tyin cua ndoo yu juhva ca quívi ihya. Tyin cuñí tsi tsa jatyinyeé ca yu tsi ndo tan cuví cahun ndo ityi nuu ca tan cusí ca iñi ndo tsihin tsa tsinú iñi ndo tsi Nyoo.

²⁶ Tacan tan cua nyehe ndo tsi yu inga tsaha, tan sii xaan ca cua cuñi ndo tsa cuenda yu tyin iin caa ñi iyó yo tsihin ra Cristo.

²⁷ Cuñi tsi tsa coo yo cuhva taahán tsi coo nyivi yihí cuenda ra Cristo. Vasu nyaá yu tsihin ndo, a cañi nyii yu, maa tyin cuñi yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu iñi nyivi tuhun ra Cristo. ²⁸ Maa tyin nyivi xaan iñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacu nyooho jahá Nyoo. ²⁹ Tyin tsahá ra ndatu tsa tsinú iñi tandihi yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo. ³⁰ Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo nácaa nyehe yu tundoho, tan vityin tsitó tucu ndo tyin ña jandihí yu tsa caahán yu tuhun Nyoo.

2

Cuca xaan ra Cristo, maa tyin quitsi cúu ra tumaa iin ra ndaahvi

¹ Nditsa tyin ra Cristo jandu iin xaan ra iñi yo tsa iin ñi cuví yo tsihin ra. Tan vaha cuñi yo tsa cuenda tsa cuñi ra tsi yo. Tan nditsa tucu tyin iyó Tatyí Ii Nyoo tsihin yo. Tan nditsa tucu

tsa ndaahvi cuñi yo nyehé yo tsi nyivi tahan yo. Tatun nditsa tandihi yacan, ² cuhva ndo tsa cusii ca iñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñi ra Cristo tsi yo. Tan iin ñi cuhva caca iñi ndo. Tan iin ñi tsa vaha javaha ndo. ³ Ña javaha ndo maa ñi tsa jatyinyee tsi maa ndo, javaha ndo tsa vaha tsi inga nyivi. Tan náa javaha ndo, ña cahnu jahá ndo tsi ndo. Ndaahvi jahá yo tsi yo. Tan intuhun intuhun yo na jahá yo tyin vaha ca inga nyivi tan ñavin ca maa yo. ⁴ Tan intuhun intuhun yo caca iñi yo tsa cuenda tsa vaha tsi inga nyivi, tan ñavin tsa cua jatyinyee tsi maa ñi maa yo.

⁵ Caca iñi yo tumaa tsicá iñi maa ra Cristo Jesús. ⁶ Tyin nu quitsi tsi tsanaha tsa ndi cumañi ca quitsi ra nu ñuhu ñayivi, cuví ra tahan ñi maa cuví Nyoo. Maa tyin ña tsicá iñi ra tsa nacoo ra yacan. ⁷ Tan tyaá tsiyo ra tandihi tunyee iñi ra tan tandihi tsa cuca ra. Tan quitsi ra nanduví ra iin nyivi ndaahvi nu ñuhu ñayivi ihya quivi tsa cacu ra. ⁸ Tan tsa nanduví ra iin rayii, tan ndaahvi jahá ra tsi ra tan tyaá yahvi vaha ra tsi Nyoo nda cuanda tsahá ra tsa cahñi nyivi tsi ra nu cruu. Tumaa iin ra caquiñi, tacan jahá ñi tsi ra, tan tahañ ra ticanuu tyin tsahñi ñi tsi ra nu cruu. ⁹ Yacan cuenda Nyoo jacahnú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuví tan ñavin ca

tandihí sivi. ¹⁰ Tyin tatun tsiñi yo sivi ra Jesucristo, tandihí yo tan cua cuiñi tsiti yo. Tan tandihí tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihí yacan cua jacahnu tsi ra. ¹¹ Tyin tandihí tsa iyó, cua nacoto tan cua cahan tyin ra Jesucristo cuví ra ndacá ñaha tsi tandihí maa tsa iyó. Tacan tan cua nyehe tsi tyin cahnu xaan ca cuví maa Nyoo Jutu yo.

Nyivi yihí cuenda Nyoo cuví ñi tumaa iin ñuhu tsa jandunditsín nu ñuhu ñayivi ihya

¹² Yacan cuenda, yañi tsa cuñi xaan yu, tumaa tsa tyaa yahvi ndo tsi yu quivi tsa tsinyij yu tsihin ndo, tacan ñi taahán tsi tyaa yahvi ndo tsi yu vasu ndi maa tsa cañi nyii yu vityin. Ndücu ndo cuhva na nyehe nyivi tyin nditsa tsa jacacú Nyoo tsi yo. Tan jaha vaha ndo cuenda cuhva coo ndo tsihin ra. ¹³ Tyin maa Nyoo tyihí tsa vaha añima ndo. Tan jatyinyeé ra tsi ndo tyin tacan tan cuví tyaa yahvi ca ndo tsa caahán ra tan javahá ndo cuhva cuñi ra.

¹⁴ Tatun cua javaha ndo náa tsa cua javaha ndo, ndücu jihna ndo cuhva tsa ña cahan yuhu tahan ndo. Tan ña cañi tahan ndo. ¹⁵ Tacan tan ña cua coo cuatyí ndo. Taahán tsi cuví ndo nyivi cuiti iyó, taahán tsi cuví ndo nyivi nduve cuatyí, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñi tsi tsa

cuví ndo tumaa iin ñuhu tsa jandunditsín nu naa nu ñuhu ñayivi ihya. ¹⁶ Cahan yo tuhun Nyoo tsihin nyivi tyin yacan tsahá ñayivi nyito tsa iyó yo. Javaha ndo tacan, tan quivi cua quitsi ra Cristo, yuhu ñi vaha cua cuñi yu tsa cuenda ndo, tyin ña jacoto cuatu yu tuhun Nyoo tsi ndo. ¹⁷ Tan vasu cahñi nyivi tsi yu tsa catyi tuhun Nyoo, maa tyin cua cuví tsi iin tsa cua jamañi yu tsi Nyoo tan tsihin tsa tsinú iñi ndo tsi ra. Tan iin caa ñi cusii iñi yo tsihin ra. ¹⁸ Tan yacan cuenda taahán tsi tsa cusii iñi ndo tsihin yu.

Nu jacuhun ra Pablo tsi ra Timoteo tan ra Epafrodito ñuu Filipos

¹⁹ Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehe ra nu yucú ndo. Tan quivi tsaa ra inga tsaha nu nyii yu sii xaan cua cuñi yu. Tyin cua nacatyí tuhun ra tsihin yu nácaa yucú ndo. ²⁰ Tyin in-tuhun ñi ra tsicá iñi tumaa tsa tsicá iñi yu tsa cuenda ndo. Tan yoñi inga ra tsa tsicá iñi tacan. ²¹ Tyin tandihí ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús. ²² Maa tyin tsitó ndo tyin ra Timoteo, vaha cuahán ra tsihin Nyoo, tan tsa cuenda yuhu, cuví ra tumaa sehe yu. Tan jatyinyeé xaan ra tsi yu tsa caahán ndi tuhun ra Cristo tsihin nyivi. ²³ Tan nyaá tsa cua jaquitsi yu tsi ra nu yucú ndo. Maa tyin nda

coto jihna yu nácaa cua cahan ra cumí tyiñu, tatun ña naha ca cunyi yu ihya. ²⁴ Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

²⁵ Tan ra Epafrodito, yañi yo tsa jaquitsi ndo tsa jatyinyee tsi yu tsihin tyiñu tsa javahá yu, iin caa ñi cuví ndi andaru ra Cristo tsihin ra. Tan vityin cua jaquitsi nuhu yu tsi ra inga tsaha nu yucú ndo. ²⁶ Cuñí xaan ra quitsi nuhu ra nu yucú ndo, tyin tsicá xaan iñi ra tsa tsito ndo tyin nacuhvi ra. ²⁷ Nditsa ñihi xaan nacuhvi ra tan tsa cua cúu maa ra cuví. Maa tyin Nyoo cundahvi iñi tsi ra, tan tsii tucu yuhu tyin na ña nducuihya xaan ca iñi yu. ²⁸ Yacan cuenda, yuhu cuñí xaan yu tsa quitsi nuhu ra nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra. ²⁹ Yacan cuenda, naquihin ndo tsi ra tsihin tsa sii cuñí ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayivi tsi ra yañi yo naha ra tsa iyó tumaa cuhva iyó ra. ³⁰ Tyin tsa yatyin maa cúu ra tsa cuenda tsa javahá ra tyiñu ra Cristo. Tyin vasu ndi maa cuuhvi xaan ra, maa tyin ña cuñí ra jandihí ra tsa jatyinyeé ra tsi yu. Tyin maa ndo ña cuví quitsi ndo tan jatyinyee ndo tsi yu tyin cañi

xaan yucú ndo.

3

Nu janahá ra Pablo nácaa nduvaha yo nuu Nyoo

¹ Tan vityin yañi, cusii iñi ndo tsihin Jutu Mañi yo. Tsa cuenda yuhu nduve tisihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi. ² Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñí tsi cunyaa tuñi Nyoo tsi yo, tacan tan cacu yo. ³ Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi añima yo quivi nacuhva cuenda yo tsi yo tsi ra. Tan jacahnú yo tsi ra tsihin Tatyí Ii ra tsa iyó añima yo. Tan cusii iñi yo tyin cuenda maa ra Cristo Jesús yihí yo. Tan ña nyitá iñi yo tyin cacu yo tsihin náa cunyaa cuñu ñuhu yo. ⁴ Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yahá cacu tan ñavin ca tandihí ra tsa javahá yacan vityin. ⁵ Tyin una quivi yu tan tsinyaá tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihí yu. Juvín ñi tata nyivi caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quivi can, tyin ra fariseo cuví yu. ⁶ Tan tsa cuenda tsa cuñi yu tyaa yahvi

yu ley, tan tsinyaa ndaha xaan yu tsi ñi yihí cuenda ra Cristo. Tan tyaa yahvi yu tandihí maa ley tsahnu, tyin nducú xaan yu cuhva tyaa yahvi yu tsa caahán ley can.

⁷ Maa tyin tandihí tsa cuñi maa yu tyin cahnu xaan cuví quivi can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá ñi yu. ⁸ Tan inga tucu tuhun, tandihí tsa javahá yu, tsitó maa yu tyin nduve ca yahvi nyaá yacan tyin tsa nacoto yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda ra Cristo tandihí tsa javahá yu quivi quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihí can. Tyin cuñi yu coto vaha ca yu tsi ra Cristo. ⁹ Tan cuñi yu ndu iin ca yu tsihin ra. Tsinú ñi yu tyin jacacú ra tsi yu, yacan cuenda nduvahá iyó yu nuu Nyoo. Ñavin tsa cuenda tsa tyaa yahvi yu ley Nyoo tan vaha iyó yu, maa tyin tsa cuenda tyin tsinú ñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú ñi yo, ra Cristo naquihín cuenda ra tsi yo. ¹⁰ Tsa coto vaha ca yu tsi ra Cristo, yacan cuví tsa cuñi yu. Tyin Nyoo janandoto ra tsi ra Cristo tsihin tunyee ñi ra. Tan cuñi yu tyin coo ca tunyee ñi can tsi yu. Tan cuñi yu cunyeé ñi yu tundoho tsa taahán tsi nyehé yu tsa cuenda ra. Tan

cuñi yu nacuhva cuenda yu tsi yu tumaa maa ra Cristo nacuhva cuenda ra tsi ra tan tsihi ra. ¹¹ Tyin nducú xaan yu cuhva nandoto yu tsa yaha cúu yu.

Nacaa cunyicun ñihi ca yo tsi Nyoo

¹² Ña catyí yu tyin nduve ca tsa cumañi tsi yu, tan vaha xaan yu. Maa tyin cuahán yu ityi nuu ca. Tyin cuñi yu naquihin yu tsa cahan ra Cristo tyin cuhva ra tsi yu. Tyin jihna ca maa ra cahan tsihin yu. ¹³ Yañi, ña catyí yu tsihin ndo tyin tsa ñihi yu tandihí tsa vaha can. Maa tyin iyó intuhun ñi tsa javahá yu; nacoó yu ityi tsata tandihí tsa javahá yu, tan jañiñi yu cuhun yu ityi nuu ca. ¹⁴ Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catyí ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

¹⁵ Tacan taahán tsi caca ñi tandihí nyivi tsa ñihi nyaá tsihin Nyoo. Maa tyin tatun ñavin tacan tsicá ñi ndaa nyoo, Nyoo cua cuhva ra tsa cutuñi ñi ndo. ¹⁶ Maa tyin iyó iin tsa cuñi tsi tsa tyaa yahvi vaha yo, tuhun tsa tsa yahá jacoto Nyoo tsi yo.

¹⁷ Yañi, javaha ndo cuhva iyó yu tan cuhva caahán yu. Tan nyehé vaha ndo cuhva iyó nyivi iyó cuhva janahá ndi tsi tandihí nyivi. ¹⁸ Tyin cuaha xaan tsaha caahán yu tsihin ndo, tan vityin cua

cahan yu inga tsaha tsihin tsa cuihaya cuñí yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnu cuví tsa tsihi ra Cristo nu cruu jahá ra naha. ¹⁹ Maa tyin quivi quitsi ra Cristo inga tsaha, ra ícan naha ra cua cuhun anyaya. Tyin javahá ra naha cuhva cuñí cuñu ñuhu ra naha. Tan cahnu jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayivi ihya. ²⁰ Maa tyin yoo nda gloria cuví nu iyó ñuu yo. Tan ndatú yo quivi quitsi nyico Jutu Mañi yo Jesucristo, ra jacacú tsi yo. ²¹ Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihi tsa iyó.

4

Tacan ñi maa na cusii iñi yo tsihin Jutu Mañi yo

¹ Yañi, cuñí yu tsi ndo. Tan cuñí xaan yu nyehe yu tsi ndo. Sii xaan cuñí yu tsihin ndo. Tan tsitó yu tyin ña cahñ cuatu yu tuhun Nyoo tsihin ndo. Tyin ní xaan iñi ndo nyicún ndo tsi ra. Tan jañihi ca ndo cunyicun ndo tsi ra.

² Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan

coo vaha ñi cuhva cuñí Jutu Mañi yo. ³ Tan yooho, yañi, tsa iin caa ñi jahá tyiñu tsihin yu, cuñí yu tyin jatyinyee un tsi ñi cuhva yo ihya. Tyin juvin ñi jatyinyee xaan tsi yu nu cañan yu tuhun Nyoo, maa tyin ñavin intuhun ñi yu jatyinyee ñi, tyin jatyinyee ndihi ñi tsi ra Clemente tan tsi tandihi ca ra tsa cutahán tsihin ndi. Tan sivi tandihi ñi tsa nyaá nuu tutu Nyoo nda gloria.

⁴ Cusii iñi ndo tsihin Jutu Mañi yo tandihi ñi quivi. Tan caahán yu tsihin ndo inga tsaha, cusii iñi ndo tsihin ra. ⁵ Coo vaha ndo tyin tacan tan nyehe tandihi nyivi tyin nditsa tyin nyivi vaha cuví ndo. Tan nducuhun iñi ndo tyin tsa yatyin cua quitsi Jutu Mañi yo.

⁶ Tan ña caca iñi ndo náa taahán ndo. Iin nyita ñi ndacan tahvi ndo tsi Nyoo náa ndihi tundoho tsa iyó ndo. Tan ndacan ndo tsi ra nacuhva ra tandihi tsa tsiñi ñuhu tsi ndo. Tacan tan ña naco ndo tsa tsahá ndo tyahvi nyoo tsi ra. ⁷ Tan Nyoo cua cuhva ra tsa taxin coo aña ndo. Tan cahnu xaan tsa vaha cuví yacan. Tan yoñi cuví cutuñi iñi nácaa tsa cahnu tsi. Tan tsa taxin iyó tsi Nyoo cua jaha cuenda aña ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

Na caca iñi yo maa ñi maa tsa vaha

⁸ Nu cua ndihi tuhun, yañi, caca iñi ndo maa ñi tsa nditsa, maa ñi tsa ndaa, tsa cuiti iyó,

tan tsa ndoo iyó. Ña caca ñi ndo tsa caquiñi. Caca ñi ndo tsa sii caa, maa ñi tsa vaha, tan maa ñi cuhva cuvi jacahnu ndo tsi Nyoo.

⁹ Javaha ndo tsa jacuaha yu tsi ndo. Tuhun tsa cahan yu tsiñi ndo, tan tsa javaha yu nyehe ndo, yacan taahan tsi javaha ndo. Tan Nyoo ra tsaha tsa taxin coo añaima yo, cua cunyaa ra tsihin ndo.

Nu jatyinyee nyivi ñuu Filipos tsi ra Pablo tsihin tsa iyó tsi ñi

¹⁰ Sii xaan cuñi yu. Tan jacahnú yu tsi Jutu Mañi yo tsa cuenda tsa jatyinyee xaan ndo tsi yu inga tsaha. Tan tsitó yu tyin ndihi ñi tsaha tan cuñi ndo jatyinyee ndo tsi yu. Maa tyin tsicoo juhva quivi ña tsaha tsi cuhva tsa jatyinyee ndo tsi yu. ¹¹ Ñavin tyin iyó tsa tsiñi ñuhu tsi yu tan caahan yu tsihin ndo, tyin yuhu tsa cutuhva maa yu tsa cusii ñi yu tsihin náa tsa iyó tsi yu. ¹² Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa caan maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha. ¹³ Tandihí tan cuví jaha yu tsihin tunyee ñi tsa tsahá ra Cristo tsi yu. ¹⁴ Tan nyooho yañi, vaha xaan tsa javaha ndo tyin jatyinyee ndo tsi yu quivi tsa tsicoo yu tundo ho.

¹⁵ Tsa tsitó nyooho nyivi Filipos nácaa cuvi quivi quitsaha caahan yu tuhun

Nyoo tsihin ndo. Tacan tan quee yu Macedonia nu iyó ndo tan cuahan yu cua jacoto yu tuhun Nyoo inga ñuu. Tan nyooho cuvi nyivi tsa jatyinyee tsi yu tsihin xuhun, tyin vaha xaan cuñi ndo tsa cahan yu tuhun Nyoo tsihin ndo. ¹⁶ Tan tsitsi tsa nyii yu ñuu Tesalónica, ñavin intuhun ñi tsaha jatyinyee ndo tsi yu. ¹⁷ Ñavin tsa tsicá ñi yu tsa jatyinyee ndo tsi yu, tyin tsa cuñi yu tsa jatyinyee ndo tsihin tyiñu Nyoo, tacan tan cuaha ca cua nasoco Nyoo tsi ndo. ¹⁸ Tan vityin, nduve tsa cumañi tsi yu. Nda cua ndoo ca tsa jaquitsi ndo tsi yu tsihin ra Epafrodito. Tan tsa tsaha ndo can cuvi tsi tumaa xico tami, xico vaha tsa tsaá nuu Nyoo. Yacan cuvi tsa taahan ñi ra. ¹⁹ Tan Nyoo cua cuhva ra tandihí tsa tsiñi ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo. ²⁰ Na jacahnu yo tsi Nyoo Jutu yo tacan ñi maa. Tan na cuvi tsi tacan ñi.

Nu jacuhún ra Pablo nacumi tsi nyivi ñuu Filipos

²¹ Tsahá yu nacumi tsi tandihí ndo tsa yihí ndo cuenda ra Cristo ñuu Filipino. Tan jaquitsí tucu ra yañi yo tsa yucú tsihin yu ihya nacumi tsi ndo. ²² Tan nyivi cuenda Nyoo tsa yucú vehe ra ndacá ñaha ñuu Roma ihya, tan tandihí ca nyivi yihí cuenda Nyoo ñuu ihya jaquitsí ñi nacumi tsi ndo.

²³ Na nasoco maa Jutu Mañi
yo Jesucristo tsi tandihi ndo.
Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Colosas

Nu quitsaha javahá ra Pablo carta

¹⁻² Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ñuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu tsicán tahvi ra Pablo tsa cuenda nyivi yihí cuenda ra Cristo

³ Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo. ⁴ Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo. ⁵ Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo. ⁶ Tan juvin ñi maa tuhun ra Cristo tsa cahān ra Epafras tsihin

ndo, yacan nacutyá tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhva cuenda maa ndo tsi ndo. Tyin quivi tsa tsiñi ndo tuhun ra Cristo tsitó ndo tyin nditsa tsa cuñí Nyoo tsi ndo. ⁷ Yacan janaha ra Epafras tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo. ⁸ Tan juvin ra catyí tuhun tsihin ndi tyin cuñí xaan ndo tsi nyivi tahan ndo, tyin maa Tatyí Ii Nyoo tsahá tsa vaha can coo añima ndo.

⁹ Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí Ii ra tan coto vaha ndo náa ndihí tsa cuñí ra tyin javahá ndo. ¹⁰ Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra. ¹¹ Tan tsicán tucu ndi tsi ra na jatyinyee ca ra tsi ndo tsihin tunyee iñi cahnu tsa iyó tsi ra tan ña cundihi iñi ndo tsa yaha ndo tandihí tundoho, tan na cusii iñi ndo. ¹² Tan na cuhva ndo tyahvi nyoo tsi Nyoo Jutu yo, tyin maa ra tsa janduvaha ra tsi yo tyin tacan tan cuví ñihí yo tsa cua ñihí nyivi tsicá nu nditsin, tan

cuñí tsi catyi nyivi tsa cuiti iyó nuu ra. ¹³ Tyin Nyoo tava ra tsi yo nu naa tan nacuhva cuenda ra tsi yo tsi Sehe ra tsa cuñí xaan ra tyin cundaca ñaha ra tsi yo. ¹⁴ Tan jata ra tsi yo tsihin niñi Sehe ra tan jaha ra tucahnu iñi tsi yo.

Tsa cuenda tsa tsihi ra Cristo nu cruu tsacatyí cuatyí yo tan nduvaha iyó yo tsihin Nyoo

¹⁵ Nyoo ña nyehé yo tsi ra. Maa tyin nanduvi ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinu ñuhu ñayivi tan tsa iyó maa ra Cristo. ¹⁶ Tan maa ra javaha tandihi tsa iyó andivi tan nu ñuhu ñayivi jaha Nyoo. Javaha ra tsa cuví nyehe yo tan tsa ña cuví nyehe yo. Javaha ra tandihi tatyí vaha tan tatyí ña vaha tsa ndacá ñaha andivi tan nu ñuhu ñayivi ihya. Tan tandihi yacan javaha ra tyin cuatyíñu ra cuhva cuñí ra. ¹⁷ Tan tsa iyó maa ra tsa ndi cumañi ca coo tandihi maa tsa iyó. Tan tandihi tsi jahá tyiñu vaha tsi jahá ra. ¹⁸ Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandoto tsa jihna ca, tyin tacan tan quihí ndaha ra tandihi tsa iyó. ¹⁹ Tyin Nyoo cuñi ra tsa cuví ra Cristo tumaa cuví maa ra. ²⁰ Tan tsaha ra tsi ra Cristo tsa cúu ra nu cruu tyin tacan tan cuví coo vaha tandihi tsa iyó tsihin ra,

tahan ñi tsa iyó nu ñuhu ñayivi tan andivi.

²¹⁻²² Tahan tsanaha javaha ndo tsa ña vaha tan xaan cuñi ndo nyehe ndo tsi Nyoo. Maa tyin Nyoo jaquitsi ra tsi ra Cristo, Sehe ra tan tsaha cuenda ra cuñu ñuhu ra tan tsihi ra nu cruu. Tan janacoo vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiti vaha cua coo ndo nuu ra. ²³ Yacan cuenda jañihi ca ndo tsinú iñi ndo. Tan cuita iñi ndo tyin cua tsaa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha taní cahnu ñuhu ñayivi. Tan yuhu ra Pablo jatyinyeé yu caahán yu tuhun ihya tsihin nyivi.

Nu catyí ra Pablo tyin nyaá siqui ra tsa janahá ra tuhun ra Cristo tsi tandihi nyivi tsicá vehe ñuhu

²⁴ Vityin sii cuñi yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra cuaha xaan tundoho nyehe ra tsa cuenda yo tsa cuví yo cuñu ñuhu ra. Tacan tan cua jaquita ndihí yu tundoho tsa nyehe ra. ²⁵ Yuhu cuví iin ra caahán tuhun ra Cristo tyin tacan jatyinyeé yu tsi tandihi nyivi yihí cuenda ra. Tyin maa ra Nyoo catyí tsa cahan yu tandihi tuhun ra tsa cuenda tsa vaha tsi

ndo. ²⁶ Jacuahá yu tuhun tsa tsicumí xeehe Nyoo tahañ tsanaha, tsa ndi cumañi ca javaha ra ñuhu ñayivi. Tan vityin tsahá ra tsa nacoto nyivi yihí cuenda ra itsi. ²⁷ Tan nyooho tsa ñavin nyivi Israel cuví cuñí ndihi ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añima nyooho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

²⁸ Tuhun maa ra Cristo caahán ndi. Tan tsahá cuenda ndi tuhun ihya tsi tandihi nyivi. Tan jacuahá ndi tsi tandihi ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo. ²⁹ Tan tsa cuenda tsa cuñí yu tsa cuahnu vaha ñi ñihi xaan jahá tyiñu yu tsihin tunyee iñi ra Cristo tsa tsahá ra tsi yu.

2

¹ Tan cuñí yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihi ndo tan tsa cuenda nyivi ñuu Laodicea, tan tsa cuenda tandihi nyivi tsa ñaha ca nyehe tsi yu. ² Tsicán yu tsi ra na jandu iin ra iñi añima ndo, tan jandu iin ra tsi ndo tsihin tsa cuñí tahan ndo tsi ndo. Tan na cuhva ra tsa cutuñi vaha iñi ndo nacuenta jaquitsi ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuví tsa tsicumí xeehe Nyoo tahañ tsanaha, tan vityin jacotó ra itsi tsi yo. ³ Tyin

tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo. ⁴ Caahán yu tyehen tsihin ndo tyin tacan tan ña jandavi ñaha nyivi tsi ndo tsihin tuhun tsa si natuhún ñi. ⁵ Vasu nduve yu nyii tsihin ndo, maa tyin ñuhú xaan iñi yu tsi ndo. Tan si xaan cuñí yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

⁶ Yacan cuenda tumaa natsinu iñi ndo tsi ra Cristo quivi nañihi ndo tsi ra, tacan cuñí tsi coo ndo tsihin ra. ⁷ Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhva ndo. Tan iin nyita ñi nacuhvá ndo tyahvi nyoo tsi Nyoo.

Ñayivi nyito tsa tsahá ra Cristo tsi yo

⁸ Jaha ndo cuenda tsi ndo coto jandavi ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsiñú iñi ñi cuhva tsicá iñi nyivi.

⁹ Yacan ña tsinu iñi ndo tsa caahán ñi tyin ra Cristo juvin ra cuví Nyoo tan cuví tucu ra nyivi. ¹⁰ Tan tsitu ndo tsihin Nyoo tyin iin ñi cuví ndo tsihin ra Cristo. Tan maa ra ndacá ñaha tandihi tsa ndacá ñaha nu ñuhu ñayivi tan tandihi tatyí tsa ña nyehé yo. ¹¹ Tan tsa iin ñi cuví ndo tsihin ra Cristo, nda quivi natsinu iñi ndo tsi ra, tan nanduví ndo nyivi ra. Maa

tyin ña nanduvj̄ ndo nyiv̄i ra tsa cuenda tsa tsinyaā tuñi ra cuñu ñuhu ndo, tyin jacacu ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuv̄i tuñi tsa tyaa ra Cristo tsi ndo: ¹² Quiv̄i tsi-coondutyā ndo tsitsi ndutya, tumaa tsa tsih̄i ndo tsihin ra Cristo tan quihv̄i ndo tsitsi ñuhu cuv̄i can. Tacan tan nandotō tucu ndo tsihin ra tyin tsinú iñi ndo tyin Nyoo janandotō tsi ra tsihin tunyee iñi ra. ¹³ Tahan tsanaha cuv̄i ndo tumaa nyiv̄i tsih̄i jahā cuatyí ndo, tyin nduve Nyoo nyaá añima ndo tan ña tsinyaā tuñi Nyoo cuñu ñuhu ndo. Maa tyin vityin Nyoo jahā ra tucahnu iñi tandih̄i cuatyí ndo. Tan tsahā ra tsa coo ndo ñayiv̄i nyito tsihin ra Cristo. ¹⁴ Tyin ley tsahnu jaquituv̄i tsi cuatyí yo. Tan catyí tsi tyin taahán tsi cuhun yo anyaya tyin ña tyaá yahvi yo itsi. Maa tyin ra Cristo tsih̄i ra nu cruu jahā Nyoo tan tsindih̄i tsa cuhun yo anyaya. ¹⁵ Tan tsa tsih̄i ra nu cruu jahā canaa ra tsi nu ña vaha tan tandih̄i ca tatyí ña vaha tsa ndacá ñaha. Tacan tan tsindacā ra tsi nu nuu tandih̄i nyiv̄i tan nuu ángel tyin na nyehe ñi tyin cahnu ca cuv̄i maa ra, yacan cuenda jahā canaa ra.

Na nanducú yo tsa vaha tsa tsahá Nyoo

¹⁶ Yacan cuenda ña taahán tsi tyaa nyiv̄i cuatyí tsi ndo tsa cuenda tsa tsatsí ndo a tsa cuenda tsa tsih̄i ndo, o tsa cuenda tsa ña naquihín vaha

ndo iin quiv̄i vico tsa jacahnú nyiv̄i Israel; cuv̄i ñi quiv̄i tsa nduyutyá yoo, o quiv̄i quitatú ñi. ¹⁷ Tandih̄i tsehe ña jacacú can tsi yo tyin cuv̄i can tumaa tixahñu tsa cua quitsi ra Cristo. Tan vityin tsa yahā quitsi ra, tan juvin ra jacacú tsi yo. ¹⁸ Ña cuhva ndo tsa casi nyiv̄i nu naquihin ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can. ¹⁹ Ñi ican ñavin ra Cristo nyicún ñi. Maa tyin yoo tsa nyicún tsi ra cuv̄i yo cuñu ñuhu ra, tan maa ra cuv̄i jiñi tsihin yo. Tan jandu iin ra tsi tandih̄i yo. Tan jacuahnú ra tsi yo tsihin tunyee iñi ra tumaa cuhva cuñi maa Nyoo.

²⁰ Tumaa tsa tsih̄i cuñu ñuhu cuatyí ndo tsihin ra Cristo cuv̄i can. Tan ña ndacá ñaha ca tuhun ñuhu ñayiv̄i ihya tsi ndo. ¿Nacuenda tyin iyó ca ndo tumaa iyó nyiv̄i tsa ña nacotó tsi Nyoo? Tan tyaá yahvi ndo tsa caahán ñi tsa javahá tuhun tsahnu. ²¹ Tyin catyí ñi tsihin ndo tyehen: “Ña tñin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo. ²² Maa tyin ña taahán tsi casi ñi nu javahá ndo yacan tyin tsa jacuahá ñi, maa ñi tsa tsicá iñi nyiv̄i cuv̄i can. Tyin tsa tsatsí yo tsa iin yaha ñi cuv̄i can, tan ña cuv̄i jativ̄i can tsi ndo nuu Nyoo. ²³ Ñi tsa javahá tandih̄i can tsicá iñi

ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá ñi ñi.

3

¹ Tsaḥa Nyoo ñayivi nyito coo yo tyin nandoto ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo. ² Caca ñi ndo yacan, tan ña caca xaan ñi ndo tuhun tsa iyó nu ñuhu ñayivi ihya. ³ Tyin vityin ña javahá ca ndo tsa javaha ndo tahan tsanaha, tyin tsa tsihi ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo. ⁴ Tan quivi cua quitsi nyico ra Cristo, ra tsa tsaha ñayivi nyito tsa iyó yo, tacan tan cua nyehe nyivi tyin maa ra cahnu ca cuví ra. Tan cua nyehe tucu ñi tsi nyooho iin caa ñi tsihin ra.

Nacaa tsicoo yo nu quitsi tsi ityi tsata tan nácaa cuñi tsi coo yo tsihin Nyoo vityin

⁵ Yacan cuenda jandihí ndo tandihí tsa ña vaha tan tsa caquiñi tsa cuñi cuñu ñuhu ndo. Tan ña cusu ndo tsihin iin ñaha tun ñaha ca tindaha ndo, tahan ñi rayi tan ñaha. Tan ña cuñi ndo coo cuaha ndaha tyiñu ndo tyin tun tsicá ñi ndo yacan, tsi-toho jacahnú ndo tan tyaá tsiyo ndo tsi Nyoo cuví can. Tyin tacan javahá nyivi tsa ña

iyihí tuhun Nyoo, maa tyin nyooho ña taahán tsi javaha ndo tacan. ⁶ Tsa cuenda tandihí tsa caquiñi ihya cuxaán xaan Nyoo tsi nyivi tsa ña tyaá yahvi tsa caahán ra. Tan cua tatsi tuñi ra tsi ñi. ⁷ Tan juvin ñi tacan javaha tucu maa yo quivi tsa ña nacotó yo tsi Nyoo. ⁸ Maa tyin vityin ña javaha ca ndo tandihí tsa ña vaha can: ña cuxaan ca ndo. Ña xaan cuñi ndo nyehe ndo tsi nyivi tahan ndo, tan ña jacuñi nyaa ndo tsi ñi, tan ña cahan ndo cuendu siqui ñi. Tan ña cahan ca ndo tsa ndavaha ñi. ⁹ Ña cahan tahan ca ndo cuendu siqui iin ndo tan inga ndo. Tyin tsa nacoo ndo tandihí tsa ña vaha tsa javaha ndo tahan tsanaha. ¹⁰ Tyin vityin tsa nanduvi yo nyivi tsa tan iyó yo ñayivi nyito. Tan ndutsaá ca yo tumaa caá Nyoo, ra javaha tsi yo, nda cuanda coto vaha ca yo tsi ra. ¹¹ Ña ñiñi tsa cuví yo nyivi Israel, o nyivi Grecia, o nyivi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyivi catsi ñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandihí yo tsihin ra Cristo, tyin maa ra cuví tandihí tan iyó ra tsihin tandihí yo.

¹² Nyoo cuñi ra tsi yo tan nacatsi vaha ra tsi yo tyin cuví yo nyivi ra. Yacan cuenda coo ndo ñayivi nyito tumaa taahán tsi coo nyivi

yihí cuenda ra; cundaahvi iñi ndo nyehé ndo tsi nyivi tahan ndo; cuvi ndo nyivi vaha tan ndaahvi jaha ndo tsi ndo nuu Nyoo; ndumasu ndo; cunyeé iñi ndo nyehe ndo tandihi tsihi tan tundoho tsihin tsa sii cuñí ndo. ¹³ Ña cundihí iñi ndo tsihin nyivi tahan ndo. Jaha ndo tucahnu iñi tsi ñi tatun náa javaha ñi tsi ndo. Tumaa ra Cristo jaha ra tucahnu iñi tsi maa ndo, tacan cuñí tsi javahá tucu maa ndo tsihin nyivi. ¹⁴ Tyin tsa cuñí tahan yo tsi yo, yacan cuví tsa ñiñi ca cuñí tsi. Tyin yacan cuví tsa jandu iin tsi yo. ¹⁵ Tan cuhva ndo tsa cundaca ñaha tsa taxin Nyoo aña ndo, tan na jaquihin ityi tsi tsi ndo. Tyin tsa cuenda yacan, cana Nyoo tsi ndo tan jandu iin ra tsi ndo tsihin ra Cristo. Tan cuhva ndo tyahvi nyoo tsi Nyoo.

¹⁶ Tan na cutu aña ndo tsihin tuhun ra Cristo, tan jacuaha tahan ndo tuhun ra tsi ndo. Tan jandu iin tahan ndo iñi ndo tsihin tandihi tsa tsiñi tuñi tsa tshaha Nyoo tsi ndo. Cata ndo yaa tan salmo. Tan cata ndo yaa tsa tshaha Tatyí Ii Nyoo tsi ndo tsihin tsa ñi iñi aña ndo. Tan tacan ñi nacuhva ndo tyahvi nyoo tsi Nyoo. ¹⁷ Tatun náa tyiñu cua javaha ndo, o náa cua cahan ndo, javaha ndo can tsihin sivi Jutu Mañi yo Jesús. Tan juvin ñi cuhva can nacuhva ndo tyahvi nyoo tsi Nyoo tsa cuenda maa ra Cristo.

vaha yo tsihin nyivi

¹⁸ Nyooho tsa iyó yii cuhva ndo tsa cundaca ñaha yii ndo tsi ndo. Tacan taahan tsi coo ndo, tyin yihí ndo cuenda Jutu Mañi yo. ¹⁹ Tan nyooho rayii, cuñi ndo tsi ñasiihi ndo. Tan ña cundihí iñi ndo nyehé ndo tsi ñi. ²⁰ Nyooho tsa nyihi tyaa yahvi ndo tsi jutu ndo tan tsi sihi ndo, tyin sii xaan cuñí Jutu Mañi yo tun javahá ndo tacan. ²¹ Nyooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihya xaan iñi tsi. ²² Tan nyooho tsa cuví musu, tyaa yahvi ndo tsi ra yihí ndaha tsi ndo. Ñavin tsa nyehé ñi ra tsi ndo tan tyaa yahvi ndo tsi ra naha, tan catyi ra naha tyin vaha xaan ndo. Tyaa yahvi nyooho tsi ra naha tsihin tsa ñi iñi aña ndo vasu ña nyehé ra naha, tyin Nyoo nyehé ra. ²³ Tandihí ñi tyiñu javahá ndo, javaha ndo can tsihin tsa sii cuñí ndo tumaa tsa jahá tyiñu ndo cuenda Jutu Mañi yo tan ñavin cuenda nyivi. ²⁴ Tyin tsitó ndo tyin maa Jutu Mañi yo ra Cristo cua cuhva ra tsa taahan tsi tsi ndo tyin maa ra cuví ra yihí ndaha tsi ndo tsa nditsa. ²⁵ Tan tatun javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña siin caá iin yo tan inga yo nuu Nyoo, tyin tandihí yo tan inducu ñi caá yo.

Nu tshaha cuenda ra Pablo náca nducú yo cuhva coo

4

¹ Nyooho tsa iyó musu, cuñí

tsi cuví ndo nyívi vaha tsihin musu ndo. Ndúchun íñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

² Ndácan tahvi ndo tsihin tsa ní íñi ndo. Coo nyito ndo tan nacuhva ndo tyahvi nyoo tsi Nyoo tsa cuenda tandihi maa. ³ Ndácan tahvi ndo tsa cuenda ndi, tyin na nuña Jutu Mañi yo añima nyívi tan tyaa soho ñi tuhun xeehe ra Cristo tsa caahán ndi tsihin ñi. Tsacatyí tuhun ihya nyíi yu vehe caa. ⁴ Ndácan tahvi ndo tsa cuenda yu na cuvi jacuaha yu tsi nyívi cuhva cuvi cutuñi vaha íñi ñi tuhun ra Cristo, tumaa taahán maa tsi javahá yu.

⁵ Cuiti coo ndo tsihin nyívi tsa ña yihí tuhun Nyoo, tyin tacan tan cuvi cahan ndo tuhun Nyoo tsihin ñi. ⁶ Tan maa ñi tuhun vaha cahan ndo tsihin ñi. Tan taahán tsi coto ndo nácaa cua nacahan ndo tatun nducu tuhun ñi náa nducu tuhun ñi tsi ndo.

Nu tsahá ra Pablo nacumi tsi nyívi yihí cuenda Nyoo ñuu Colosas

⁷ Ra Tíquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu. ⁸ Yacan cuenda jaquitsí yu tsi ra nu yucú ndo na jandu iin ra íñi ndo tan catyí tuhun ra tsihin ndo nácaa yucú ndi. ⁹ Tan vatsí ndihi ra Onésimo, ra ñuu ndo, tsihin ra. Vaha xaan tsinú íñi ra tsi ra Cristo, tan cuñí xaan yo tsi ra. Cua

catyí tuhun maa ra naha tsihin ndo tandihi tsa cuví nu nyíi yu ihya.

¹⁰ Ra Aristarco, ra nyíi tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacoto yu tsi ndo tyin tun tsa ra Marcos nu yucú ndo, vaha cahan ndo tsihin ra. ¹¹ Vatsí tucu nacumi tsi ndo jahá ra Jesús, ra tsa nañí tucu Justo. Tan tsitsí tsa tandihi ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iin xaan ra naha íñi yu. ¹² Vatsí tucu nacumi tsi ndo jahá ra Epafras, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihi cuhva cuñí ra. ¹³ Yuhu cuví tsandaa tyin ra Epafras tsicán tahvi xaan ra tsa cuenda ndo, tan tsa cuenda nyívi tsa yucú ñuu Laodicea tan ñuu Hierápolis. ¹⁴ Vatsí tucu nacumi tsi ndo jahá ra Lucas, ra tsa cuví doctor tsa cuñí xaan yo, tan ra Demas tucu.

¹⁵ Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndihi ndo nacumi tsi ña Ninfas tan tsi tandihi nyívi yihí cuenda Nyoo tsa ndu iin yu-vehe ña. ¹⁶ Tatun ndihi cahvi ndo carta ihya, tan jacuhun ndo itsi tsi nyívi yihí cuenda

Nyoo nda ñuu Laodicea na cahvi ndihi ñi itsi. Tan na cuhva ñi carta tsa jacuhun yu tsi ñi, cahvi ndo. ¹⁷ Cahan ndo tsihin ra Arquipo tan catyi ndo: “Javaha vaha tyiñu tsa tsaha Jutu Mañi yo tsi un tyin javaha un.”

¹⁸ Yuhu ra Pablo tyaá yu nacumi ihya tsi ndo. Na ña naa iñi ndo tyin nyii yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaa ra Pablo tan ra cutahán tsihin ra iin carta cuenda nyivi yihí tuhun Nyoo

¹ Yuhu ra Pablo ra Silvano tan ra Timoteo, jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo añima ndo.

Vaha xaan tsinú iñi nyivi Tesalónica tsi Nyoo

² Tandihí ñi quiví tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo. ³ Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñí ndo tsi ra. Tan tsihin tsa ñi iñi ndo ndatú ndo tsa ñihí ndo tsa cua cuhva Jutu Mañi yo Jesucristo tsi ndo. ⁴ Tyin tsitó ndi tyin Nyoo cuñí xaan ra tsi ndo, nyooho yañi, tan maa ra nacatsí vaha tsi ndo. ⁵ Tyin quiví cahan ndi tuhun Nyoo, nácaa jacacú ra tsi yo, tsihin ndo, cahan ndi tuhun tsihin

tunyee iñi Tatyí Ii Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehe ndo nácaa tsicoo ndi quiví tsiyucu ndi tsihin ndo. Tsicoo ndi tacan tsa cuenda tsa vaha tsi maa ndo.

⁶ Tan quitsaha iyó ndo cuhva iyó ndi, tan cuhva iyó Jutu Mañi yo. Tyin naquihin cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin sii xaan cuñí ndo tyin maa Tatyí Ii tsahá can tsi ndo. ⁷ Tan tsa tacan iyó ndo, jatyinyeé xaan ndo tsi tandihí nyivi yihí cuenda Nyoo taní cahnu Macedonia tan taní cahnu Acaya ihya, tyin nyehé ñi cuhva iyó ndo tsihin Nyoo. ⁸ Ñavin Macedonia tan Acaya ñi, maa tyin tandihí ñi ityi nu tsiní nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñí tsi cahan ndi tuhun Nyoo tsihin ñi. ⁹ Tyin juvin ñi maa ñi nacatyí tuhun tsihin ndi nácaa tsa vaha xaan naquihin cuenda ndo tsi ndi. Nacatyí tuhun ndihí tucu ñi tsihin ndi nácaa jandihí ndo tsa jacahnú ndo tsitoho tan quitsaha jahá tyiñu ndo tyiñu Nyoo nyito. ¹⁰ Tan nacatyí tuhun tucu ñi nácaa ndatú ndo quiví quitsi ra Jesús Sehe Nyoo inga tsaha tsa cua quee ra andivi. Ra ican cuví ra tsa janandoto Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quiví cua tatsi

tuñi ra tsi nyivi.

2

*Tyiñu jahá ra Pablo ñuu
Tesalónica*

¹ Nyooho yañi, tsitó ndo tyin ñavin tsa cuatu quitsi ndi cahan ndi tuhun Nyoo ñuu ndo. ² Tyin tsitó ndo nácaa nyehe ndi tundoho jahá nyivi ñuu Filipo tsa ndi cumañi ca tsaá ndi ñuu ndo. Tan vasu nyehe xaan ndi tundoho ñuu can, maa tyin quivi tsaá ndi ñuu ndo cahan ndi tuhun Nyoo tsihin ndo tsihin tsa ña yuhvi ndi. Tan vasu xaan xaan cuñi nyivi ñuu ndo, maa tyin jatyinyee xaan Nyoo tsi ndi tan ñi iñi ndi jacoto ndi tsi ndo cuhva jacacú ra tsi yo. ³ Tyin tuhun tsa tsahá cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsicá iñi ndi. Tan ndi ñavin tsa cuñi ndi jandavi ñaha ndi tsi ndo. ⁴ Nduve tsa ña vaha cahan ndi, tyin Nyoo nyehé ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tava tyiñu maa ra tsi ndi. Tyin ña cuñi ndi tsa vaha cahan nyivi tuhun ndi, maa tyin cuñi ndi tsa vaha cahan Nyoo tuhun ndi, tyin maa ra nyehé ra cuhva iyó yo. ⁵ Tan tsitó ndo tyin ndi iin tsaha tan ña cahan ndi tsihin tuhun tsa tyaqui xaan tsa cuñi ndi jandavi ñaha ndi tsi ndo. Tan ndi ñavin tsa cuñi ndi jaha canaa ndi xuhun tan cahan ndi tuhun Nyoo tsihin

ndo. Maa Nyoo cuví tsandaa tyin nditsa tsa caahán ndi ihya. ⁶ Tan ndi iin tsaha ña nducu ndi cuhva jacahnu nyivi tsi ndi, ndi nyooho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñi ndi tsa javaha ndo tacan tsihin ndi. ⁷ Tan vita cahan ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñi ndi jatyinyee ndi tsi ndo. ⁸ Cuñi xaan ndi tsi ndo, tan yacan cuenda ñavin tuhun Nyoo ñi cuñi ndi cuhva ndi tsi ndo, tyin cuñi ndi cuhva tucu ndi nda cuanda ñayivi iyó ndi tsa cuenda tsa cuñi ndi tsi ndo. ⁹ Nyooho yañi, nducuhún iñi ndo nácaa jahá tyiñu ndi tan tsatsi ndi quivi tsiyucu ndi tsihin ndo. Jahá tyiñu ndi tsinu cahñi tan tsacuaa tyin ña cuñi ndi jatyañu ndi tsi ndo tsitsi tsa caahán ndi tuhun Nyoo tsihin ndo.

¹⁰ Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javaha ndi quivi tsiyucu ndi tsihin ndo tsa cuví ndo nyivi tsinú iñi tsi ra Cristo. Maa tyin maa ñi maa cuhva cuñi Nyoo javaha ndi, tan yacan cuenda ña cuví cahan ndo tsi ndi. ¹¹ Tan tsitó tucu ndo nácaa jandu iin ndi iñi intuhun intuhun ndo tsihin tuhun tsa tsahá cuenda ndi tsi ndo. Tsahá ndi tunyee iñi tsi ndo tumaa iin rayi tsa iyó sehe tsahá ra tunyee iñi tsi sehe ra. ¹² Tan catyi ndi tsihin ndo, catsi ço ndo

tumaa taahán tsi coo nyivi yihí cuenda Nyoo. Tyin maa Nyoo caná tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

¹³ Yacan cuenda iin nyita ñi tsahá ndi tyahvi nyoo tsi Nyoo, tyin quivi tsiñi ndo tuhun ra tsa cahan ndi tsihin ndo, naquihin cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayivi cuví tsi. Tan nditsa tsa tuhun Nyoo cuví tsi, tyin quitsaha tsinú iñi ndo tsi Nyoo tan nasama cuhva iyó ndo. ¹⁴ Yaha can tan nyehe tucu maa ndo tundoho jahá nyivi ñuu ndo. Tumaa tsa nyehe nyivi yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahá nyivi Israel. ¹⁵ Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahan tsanaha. Ñi Israel can tsinyaa ndaha ñi tsi ndi. Ñavin cuhva cuñí Nyoo iyó ñi. Tan xaan iñi ñi tsi tandihi maa nyivi. ¹⁶ Tatun cuñí ndi cahan ndi tuhun Nyoo tsihin nyivi tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaha ca cuatyí ñi. Tan vityin nu ndihi tuhun tatsí tuñi xaan Nyoo tsi ñi.

Nu cahan ra Pablo tyin cuñí ra cunyehe ra nu yucú nyivi Tesalónica inga tsaha

¹⁷ Nyooho yañi, tsa yaha tsa quita ndi ñuu ndo juhva quivi, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa ñi iñi ndi cuñi ndi cunyehe ndi nu yucú ndo inga tsaha. ¹⁸ Tan nducu ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu cuhva quitsi ndi, maa tyin tandihi ñi tsaha tsa cuñi ndi quitsi ndi, ña tsaha nu ña vaha. ¹⁹ Maa tyin ¿náa ndatú ndi? Tan ¿yoo cuenda cusii iñi ndi, tan vaha cuñí ndi? ¿A ñavin tsa cuenda maa ndo cua cusii xaan iñi ndi nuu Jutu Mañi yo Jesucristo quivi quitsi ra inga tsaha? ²⁰ Tyin tsa cuenda tsa vaha cuahán ndo tsihin Nyoo tan nyehe yo tyin ña cuatu jahá tyiñu ndi. Tan sii xaan cuñí ndi tsa cuenda yacan.

3

¹ Tan ña cunyeé ca iñi ndi tsa cuñí ndi coto ndi nácaa cuahán tsinú iñi ndo tsi Nyoo. Tan tyaa ndi cuhva tsa ndoo intuhun ñi maa yu ñuu Ate-nas. ² Tan jaquitsi yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsi ndi tsi ra nu yucú ndo na jandu iin ca ra iñi ndo tan cuhva ca ra tunyee iñi tsi ndo na tsinú ca iñi ndo tsi Nyoo. ³ Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooho

tsitó ndo tyin nyaá tsa nyehe yo tundoho. ⁴ Tyin nda ndi yucú ca maa ndi tsihin ndo, tan cahān ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuví. ⁵ Ńa cunyeē ca iñi yu tsa cuñí yu coto yu nácaa yucú ndo. Yacan cuenda jaquitsi yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhví yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuví, tsa cuatu ñi jahā tyiñu ndi nu yucú ndo.

⁶ Maa tyin vityin tsa tsaá nuhu ra Timoteo tsa quitsi ra nu yucú ndo. Tan nacatyí tuhun ra tsihin ndi tyin nñi xaan iñi ndo tsinú iñi ndo tsi Nyoo. Tan cuñí tahan xaan ndo tsi ndo. Tan catyí ra tyin ñuhú xaan iñi ndo tsi ndi tan cuñí xaan ndo nyehe ndo tsi ndi; tumaa tsa cuñí tucu maa ndi nyehe ndi tsi ndo. ⁷ Yacan cuenda, nyooho yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñí ndi tsa tsitó ndi tyin nyooho vaha tsinú iñi ndo tsi Nyoo tan ña nacoó ndo tsi ra. ⁸ Tyin tumaa tsa ndutsaa ñayivi iyó ndi cuñí ndi tsa tsitó ndi tyin nyooho vaha tsinú iñi ndo tsi Nyoo. ⁹ Ndi ña ñihí ca ndi kuhva kuhva ndi tyahvi nyoo tsi Nyoo tsa cuenda ndo. Tyin siñi xaan cuñí ndi nuu Nyoo tsa cuenda tyin vaha cuahán ndo tsihin ra. ¹⁰ Tsicán tahvi xaan ndi tsi Nyoo tsinu cahñi tan tsacuaa, tyin cuñí xaan

ndi quitsi nyehe ndi tsi ndo. Tacan tan cuví jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin kuhva tsinú iñi ndo tsi ra.

¹¹ Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuví quitsi ndi nu yucú ndo. ¹² Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihí ca nyivi tumaa tsa cuñí maa ndi tsi ndo. ¹³ Tyin tacan tan cuíti coo ndo tsihin ra tyin tsa yahā janduvahā ra añima ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tsihin tandihí nyivi yihí cuenda ra.

4

Nacaa taahán iñi Nyoo coo yo

¹ Vityin nyooho yañi, tsihin sivi ra Jesús caahán ndaahví xaan ndi tsihin ndo tan tsicán ndi tsi ndo tsa ña jandihí ndo tsa iyó ndo tumaa tsa janahā ndi tsi ndo. Jañihí ca ndo nducu ndo kuhva coo vaha ndo nuu Nyoo tumaa taahán iñi maa ra.

² Tyin nyooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi. ³ Tyin tsa taahán iñi ra javaha yo yacan cuví tsa cuíta iñi yo tsi intuhun ñi maa ra, tan nducu yo kuhva nduvaha

añima yo nuu ra. Tan nyooho, rayii, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayii tun ñavin yii ñi cuvi ra. ⁴ Tan nyooho yañi, intuhun intuhun ndo cuñi tsi coto ndo nácaa coo vaha ndo tsihin ñasihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha. ⁵ Ña caca caquiñi iñi ndo nyehe ndo tsi ñasihi ndo, ña javaha ndo tumaa javahá nyivi ña yihí tuhun Nyoo. ⁶ Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasihi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahān ndi tsihin ndo. ⁷ Tyin Nyoo canā ra tsi yo tsa coo yo cuhva cuñi maa ra, tan ña javaha yo tsa caquiñi. ⁸ Yacan cuenda nyivi ña cuñi tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí Ii ra tsi yo. ⁹ Maa tyin tuhun tsa cuñi tahan yo tsi yo ña tsiñí ñuhu tsa tyaa yo itsi nu carta ihya. Tyin tsa janahā maa Nyoo tsi yo nácaa taahán tsi cuñi tahan yo tsi yo. ¹⁰ Tan nyooho tsa tsitó maa ndo tuhun can tyin cuñi ndo tsi tandihi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi.

¹¹ Nducu ndo cuhva coo taxin ndo. Tan ña tyihi ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahān ndi tsihin ndo quivi can. ¹² Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

Nacaa cua cuvi quivi quitsi Jutu Mañi yo Jesús inga tsaha

¹³ Nyooho yañi, cuñi ndi tsa coto ndo nácaa taahán nyivi tsa tsa tsihi, tyin tacan tan ña nducuihaya iñi ndo tumaa cuihaya cuñi nyivi ña cua nandoto tsa ña cua coo tsihin Nyoo. ¹⁴ Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

¹⁵ Yacan cuenda catyí ndi tsihin ndo tumaa jacuahā Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cahun tan nacao yo tsi nyivi tsa tsihi. ¹⁶ Tyin juvin ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tsihin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto. ¹⁷ Yahā can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo

cuii yo tsihin ra. ¹⁸ Yacan cuenda jandu iin tahan ndo iñi ndo tsihin tuhun ihya.

5

¹ Nyooho yañi, ña ñiñi cuñi tsi jacoto yu tsi ndo ama cua cuvi tandihí tsa tsa yaha cahān yu tuhun tsihin ndo.

² Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihví ñasuhu yuvehe yo tsa tsacuaa tacan cua cuvi.

³ Tyin quivi tsa catyí nyivi tyin taxin ñi caa, tan nduve maa tsa yuuhví ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhví tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuvi ca cunu xeehe ñi. ⁴ Maa tyin nyooho yañi, quivi quitsi Jutu Mañi yo ña cua tahan ndo tumaa taahān nyivi, tun sana iñi ñi tan quihví ñasuhu yuvehe ñi tyin nyooho ñavin ca nu naa iyó ndo. ⁵ Tyin tandihí yo tsitó yo nácaa taahān tsi coo yo tyin jandunditsin Nyoo añima yo, tan ña iyó ca yo nu naa tumaa iyó nyivi ña nacotó tsi Nyoo. ⁶ Yacan cuenda catsi çoo ndo çonyito ndo tan ña cusu ndo tumaa iyó nyivi ña nacotó tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha. ⁷ Tyin nyivi quixí, quixí ñi tsacuaa, tan nyivi tuhva tsihí nyixi, tsiñí ñi tsacuaa. ⁸ Maa tyin

yoo tsa cuví yo nyivi iyó tsinu cahñi, na catsi çoo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahān tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñí yo tsi tandihí nyivi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahān tsi cuita iñi yo tyin cua cacu yo. ⁹ Tyin Nyoo ña nacatsi ra tsi yo tsa tatsi tuñi ra tsi yo, nacatsi ra tsi yo tyin jacacu Jutu Mañi yo Jesucristo tsi yo jaha ra. ¹⁰ Tyin ra Jesucristo tsihi ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihi yo, a nyito yo, maa tyin tandihí yo cua coo yo iin caa ñi tsihin ra. ¹¹ Yacan cuenda jandu iin ndo iñi nyivi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

Nu tsaha cuenda ra Pablo tsi nyivi yihí cuenda Nyoo

¹² Nyooho yañi, caahān ndaahvi xaan ndi tsihin ndo, jaha ndo tsa ñayivi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha. ¹³ Cuñí tsi tsa jaha xaan ndo tsa ñayivi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

¹⁴ Tavá tucu ndi tyiñu tsi ndo yañi, jachān ndo tsi

nyivi ña cuñi jaha tyiñu. Tan jandu iin ndo iñi nyivi tsa ndu uvi xaan iñi. Tan jatyinyee ndo tsi nyivi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihi iñi ndo tsihin nyivi.

¹⁵ Jaha ndo cuenda coto javaha ndo tsa ndavaha ñi tsihin nyivi javahá tsa ña vaha tsihin ndo. Nducu ndo cuhva javaha ndo tsa vaha tsihin nyivi yihí tuhun Nyoo tsihin ndo tan tsihin tandihi ca nyivi.

¹⁶ Cushi iñi ndo tandihi ñi quivi. ¹⁷ Tan ña jandihí ndo tsa tsicán tahvi ndo tsi Nyoo. ¹⁸ Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñi maa Nyoo javaha yo tsa cuví yo nyivi tsinú iñi tsi ra Cristo Jesús.

¹⁹ Ña ndahva ndo ñuhu Tatyí Ii Nyoo tsa iyó añima ndo. ²⁰ Ña vacu nducu ndo tsa caahán ra cuví ndusu yuhu Nyoo. ²¹ Nyehé jihna ndo tun tandihi tsa caahán ra tan vaha tsi tumaa tsa taahán tsi nyehé ndo tandihi inga ca tuhun. Tan naquihin ndo tsa vaha. ²² Ña tyihi ndo tsi ndo nu iyó tsa ña vaha.

²³ Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quivi quitsi Jutu Mañi yo Jesucristo inga tsaha. ²⁴ Ra tsa cana tsi

yo, cuví cuita iñi yo tsi ra, tyin maa ra cua javaha tandihi maa tsa caahán yu ihya.

Nu ndihi cahan ra Pablo tan tsaha ra nacumi tsi nyivi

²⁵ Yañi, ndacan tahvi ndo tsa cuenda ndi.

²⁶ Tan cuhva ndo nacumi tsi tandihi nyivi yihí cuenda Nyoo.

²⁷ Tavá tyiñu yu tsi ndo tsihin sivi Jutu Mañi yo na cahvi ndo carta ihya nuu tandihi nyivi tsa yihí cuenda Nyoo.

²⁸ Tan maa Jutu Mañi yo Jesucristo nasoco tsi ndo.

Tan na cuvi tsi tacan ñi.

Carta Tsinú Uvi Tsa Jacuhun Ra Pablo Tsi Nyívi Yihí Cuenda Nyoo Ñuu Tesalónica

Nu tyaa ra Pablo, tan ra cutahán tsihin ra, tsa tsinu uvi carta tsa cuenda nyívi yihí tuhun Nyoo ñuu Tesalónica

¹ Yuhu ra Pablo, ra Silvano tan ra Timoteo jaquitsí ndi carta ihya tsi ndo tsa cuví ndo nyívi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo ańima ndo.

Nu cahān ra Pablo nácaa cua tatsi tuñi Nyoo tsi nyívi iyó cuatyí quívi quítsi ra Cristo

³ Nyooho yańi, cuńi tsi tsa nacuhva ndi tyahvi nyoo tsi Nyoo tsa cuenda ndo tandihi ñi quívi, tyin tacan taahán maa tsi javahá ndi tyin ñihi xaan cuahán tsinú ińi ndo tsi Nyoo tsa iin iin quívi, tan cuńi xaan ndo tsi nyívi yihí tuhun Nyoo tsihin ndo.

⁴ Yacan cuenda sĥi xaan cuńi ndi caahán ndi tuhun ndo tsihin nyívi yihí cuenda Nyoo inga ca vehe ñuhu. Tyin nyooho cunyeē xaan ińi ndo nyicún ndo tsi Nyoo tan vaha xaan tsinú ińi ndo tsi ra vasu ndi maa nyehé xaan ndo tundoho jahá nyívi. ⁵ Tandihí

yacan janahá tyin Nyoo cuiti xaan jacutuńi ra tyin cua catyi ra tyin taahán maa tsi cuhun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

⁶ Tan tsa cuenda maa Nyoo, taahán tsi janyehe ra tundoho tsi nyívi tsa janyehe xaan tundoho tsi ndo. ⁷ Tan nyooho tsa nyehé xaan tundoho jahá nyívi, cua cuhva ra quitatu ndo iin caa ñi tsihin ndi quívi cua quítsi nyico Jutu Mañi yo Jesucristo tsa quee ra andívi tsihin ñuhū tan tsihin ángel tsa iyó tunyee ińi maa ra. ⁸ Tyin tatsi tuñi ra tsi nyívi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo. ⁹ Ñi ican cua janyehe Nyoo tundoho tan ña cua cundihi maa tsa nyehe ñi tundoho, ña cua nyehe ñi tsi Jutu Mañi yo Jesucristo tan ña cua nyehe ñi tsa cahnu cuví ra tsihin tunyee ińi tsa iyó tsi ra ¹⁰ quívi cua quítsi ra. Tyin quívi can nyívi yihí cuenda ra, ñi tsinú ińi tsi ra, cua jacahnu ñi tsi ra. Tan iyo xaan cua cuńi ñi nyehe ñi tsi ra. Tan tyańu nyívi can, cua cuyucu tucu nyooho tyin tsinū ińi ndo tuhun tsa cahān ndi tsihin ndo.

¹¹ Yacan cuenda tsicán tahvi ndi tsi Nyoo tsa cuenda ndo tandihi ñi quívi, na jatyinyee ra tsi ndo. Tacan tan catyi ra tyin taahán tsi tsi ndo tsa cuví ndo nyívi canā maa ra. Tan tsicán tahvi tucu ndi tsi ra na jatyinyee ra tsi ndo tan cuví javaha

ndo tsa vaha tsa cuñí ndo javaha ndo. Tan na quita vaha tandihi tyiñu ra tsa javahá ndo tsihin tunyee iñi tsahá ra tsi ndo tyin tsinú iñi ndo tsi ra. ¹² Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi iñi tsa tsahá ra tsi yo jahá Nyoo.

2

Ra tsa nduve ley Nyoo iyó añima

¹ Nyooho yañi, vityin cuñí yu cahan yu tsihin ndo tsa cuenda quivi quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan ndi tsihin ndo, ² ña numi xaan sama ndo cuhva tsicá iñi ndo. Tan ña nayuhvi ndo tatun quita tuhun jaha tatyí ña vaha tyin tsa tahanan tsi quivi quitsi Jutu Mañi yo; vasu ndi maa nyivi caahán can, a jaquitsí ñi carta tsi ndo tan catyí ñi tyin yuhu jaquitsí carta can tsi ndo. Ña tsinu iñi ndo tandihi yacan. ³ Ndi iin tsaha tan ña cuhva ndo jandavi ñaha nyivi tsi ndo. Tyin tsa ndi cumañi ca tahan tsi quivi quitsi Jutu Mañi yo, cuaha xaan nyivi, xaan cua cuñi ñi nyehe ñi tuhun Nyoo, tan cua quituvi rayi tsa nduve ley Nyoo iyó añima, ra tsa nyaá maa cuhun anyaya. ⁴ Ra ican cuví ra xaan iñi tsi Nyoo. Cua cañi tahan ra tsihin tandihi tsa nyisó sivi Nyoo; tan cua cañi tahan ra tsihin tandihi

tsa jacahnú tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jaha ra tyin Nyoo cuví ra.

⁵ ¿A ña nducuhún iñi ndo tyin nda ndi nyii ca yu tsihin ndo tan cahan yu tuhun ihya tsihin ndo? ⁶ Maa tyin nyooho tsitó ndo náa tsa tyasí tan ñaha ca quituvi ra. Nda tahan maa tsi quituvi ra tan cua quituvi ra. ⁷ Vityin tsa iyó tatyí tsa ña tsahá tyaá yahvi nyivi tsi Nyoo, maa tyin ndi nyii xeehe nu, tyin iyó iin ra tsa ña tsahá quituvi nu. Maa tyin quivi cua quita ra tan cundihi tsa tyasí ra, tacan tan cua quituvi nu. ⁸ Tacan tan cua quituvi ra tsa nduve ley Nyoo iyó añima, maa tyin Jutu Mañi yo Jesús cua cahñi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahnu cuví ra quivi quitsi ra inga tsaha. ⁹ Ra ña vaha can, nu ña vaha cua jaquitsi tsi ra. Tan cua cuhva nu tandihi tsa nyityi nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyivi. ¹⁰ Cua cuatyíñu ra tandihi nuu tsa ña vaha tan tsihin yacan cua jandavi ñaha ra tsi nyivi tsa ña cua cacu. Tyin ñi can ña cuñi ñi naquihin cuenda ñi tuhun Nyoo tsa nditsa tan cacu ñi. ¹¹ Tan yacan cuenda cua cuhva Nyoo ndatu tsa jandavi ñaha tatyí ña vaha can tsi ñi. Tan cua tsinu iñi ñi tsa ña nditsa. ¹² Tacan tan cua tatsi tuñi ra tsi tandihi ñi tyin ña cuñi ñi tsinu iñi ñi tuhun

nditsa. Tyin taahán ca iñi ñi javahá ñi tsa ña vaha.

Nu cahan ra Pablo tuhun nyivi tsa nacatsi Nyoo tyin cacu ñi

¹³ Maa tyin tandihi quivi cuñi tsi cuhva ndi tyahvi nyoo tsi Nyoo tsa cuenda nyooho yañi. Tyin cuñi xaan Jutu Mañi yo tsi ndo. Tan nacatsi ra tsi ndo nda jihna, [nda ndi cumañi ca tsinu ñuhu ñayivi], tyin tsihin tsa janduvahá Tatyí Ii ra añima ndo tan tsihin tsa tsinú iñi ndo tuhun nditsa cuvi cacu ndo. ¹⁴ Yacan cuenda cana Nyoo tsi ndo quivi tsa cahan ndi tuhun ra tsihin ndo tyin tacan tan ñihi ndo tsa cahnu cuvi Jutu Mañi yo Jesucristo coo tsi ndo.

¹⁵ Yacan cuenda nyooho yañi, jandu iin ndo iñi ndo. Tan ña naa iñi ndo tandihi tsa tsaha cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ña ña iñi ndo tandihi tuhun tsa tyaá ndi nu carta tsa jaquitsi ndi tsi ndo. ¹⁶ Jutu Mañi yo Jesucristo tan Nyoo Jutu yo, juvin ra cuñi tsi yo; tan tsahá ra tunyee iñi tsi yo tandihi tyembu, tan tsahá ra naha tsa cuita iñi yo coo yo tsihin ra. Tandihi yacan tsahá ra tsi yo quivi tsaha ra tsa vaha tsa iyó tsi ra tsi yo. ¹⁷ Na cuhva ra tsa si cuñi añima ndo. Tan jandu iin ra iñi ndo, tacan tan cua cahan ndo tan javaha ndo tandihi tsa vaha.

3

Nu tsicán ra Pablo na ndacan tahvi nyivi tsi Nyoo tsa

cuenda ra naha

¹ Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsa tuhun Jutu Mañi yo tandihi ñi ityi. Tan na tyaahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi. ² Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihi ñi tan tsinú iñi ñi tsi Jutu Mañi yo. ³ Maa tyin Jutu Mañi yo javahá ra tsa catyí ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tii nu ña vaha tsi ndo. ⁴ Tan nditá xaan iñi ndi tsi Jutu Mañi yo tyin tsitó ndi tyin jatyinyee ra tsi ndo tan javahá ndo tsa catyi ndi tyin javaha ndo. Tan tsitó tucu ndi tyin ña cua jandihí ndo tsa javaha ndo tacan. ⁵ Tan na jatyinyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa Nyoo tsi yo tsihin ñi, tan cunyee ca iñi ndo nyehé ndo tundo, tumaa tsa cunyee iñi maa ra Cristo nyehé ra tundo.

Taahán tsi tsa jaha tyiñu yo

⁶ Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa jacuahá ndi tsi ndo. ⁷ Tyin tsitó maa ndo nácaa taahán tsi coo ndo tumaa tsi-coo maa ndi tsa tsiyucu ndi tsihin ndo. Tyin nyuhu ña

tsicá nuu utsan ndi tyin jaha tyiñu ndi. ⁸ Tan tandihí tsa tsatsí ndi, maa ñi maa tyahví ndi tsi ndo. Tyin jaha tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo. ⁹ Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jaha tyiñu ndi tyin cuñi ndi janaha ndi nácaa taahán tsi coo ndo. ¹⁰ Tyin quivi tsiyucu ndi tsihin ndo, cahán ndi tsihin ndo tyin nyivi ña cuñi jaha tyiñu, na ña catsi ñi. ¹¹ Caahán ndi yacan tyin ñihí tuhun ndi tyin yihí ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo. ¹² Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jaha tyiñu ndo, tan coo tsa catsi ndo.

¹³ Nyooho yañi, ña cundihi iñi ndo javaha ndo tsa vaha. ¹⁴ Tatun iyó iin ra ña cuñi tyaa yahvi tuhun caahán ndi nu carta ihya, jaha ndo cuenda ndáa ra cuví ra, tan ña cunyanaa ndo tsi ra na nducahan nuu ra. ¹⁵ Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

Nu ndihi cahán ra Pablo

¹⁶ Jutu Mañi yo ra iyó tsa vaha tsi, juvin ñi maa ra cuhva tsa vaha coo añima ndo tandihí ñi quivi tan tandihí ñi tsaha vasu ndi maa nyehé ndo tundoho. Tan Nyoo ndoo tsihin tandihí ndo. ¹⁷ Yuhu ra Pablo tyaá yu nacumi tsi ndo nu tutu ihya tsihin ndaha

yu, tan tsihin letra yu. Tye-hen tyihí yu firma yu tandihí carta yu. Tan tye-hen tyaá yu. ¹⁸ Tan na nasoco Jutu Mañi yo Jesucristo tsi tandihí ndo.

Tan na cuvi tsi tacan ñi.

Carta Tsa Jihna Ñi Tsa Jacuhun Ra Pablo Tsi Ra Timoteo

Nu tyaq ra Pablo iin carta tsa cuenda ra Timoteo

¹ Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo. ² Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinu iñi un tuhun ra Cristo tsa jacoto yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

Nu tsahq cuenda ra Pablo tyin jaha cuenda yo tsi yo tan ña cunyicun yo tsa ña nditsa

³ Quivi quita yu ñuu Éfeso tan vatsi yu Macedonia nu nyii yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyi yu tsihin un tyin catyi un tsihin ñi na ña jacuahá ñi tsa ña nditsa. Tan vityin juvin ñi tacan caahán nyico yu tsihin un. ⁴ Cahan tsihin ñi na ña tyaá iñi ñi cuendu, na ña tyaá iñi ñi tuhun nyivi tsicoo tahan tsanaha. Tyin tun, maa ñi yacan tyaá iñi ñi maa cua cahan yuhu tahan ñi ñi. Tan ña cua

jatyinyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuvi quita vaha tsi.

⁵ Tatun javahá yo tsa tava tyiñu Nyoo tsi yo tyin javaha yo, cua cuñi tahan yo tsi yo, tsihin tsa ñi iñi añima yo tsa janduvahq Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinú iñi yo tsi Nyoo. ⁶ Maa tyin yihí nyivi nacoq ihñi ñi yacan, tan tsinaq ñi jahá tsa caahán yuhu tahan ñi. ⁷ Cuñi ñi cuvi ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan ñi xaan iñi ñi jacuahá ñi tuhun can.

⁸ Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi. ⁹ Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaá soho tsa caahán Nyoo, nyivi iyó cuatyí, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandihi nyivi tsahñi nyivi. ¹⁰ Iyó ley can tsa cuenda nyivi iyó tsihin rayi a ñaha tan ñavin yi ña a ñasihhi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya, tan iyó tsi tsa cuenda nyivi tsa catyi: “Naha Nyoo”, tan ña nditsa tsa caahán ñi. Tan juvin ñi

iyó tucu ley can tsa cuenda nyívi caahán ndavaha ñi síqui tuhun Nyoo tsa cutuhva yo. ¹¹ Tuhun Nyoo ihya, iin ñi cuví tsi tsihin tuhun cahnu xaan tsa jacacú ra Jesús tsi yo. Nyoo tava tyiñu ra tsi yu tsa jacuaha yu tuhun ihya tsi nyívi. Tan intuhun ñi maa ra taahán tsi jacahnú yo.

Tsahá ra Pablo tyahvi nyoo tsi Nyoo tyin nyehé ndaahvi ra tsi ra

¹² Tsahá xaan yu tyahvi nyoo tsi Jutu Mañi yo Jesucristo tyin tsaha ra tunyee iñi tsi yu, tan nyehe ra tsi yu tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra. ¹³ Tacan javaha ra tsihin yu, vasu ndi maa nu quítsi tsi quívi, yuhu cahan nyaa xaan yu tsi ra. Tan tsinyaá ndaha yu tsi nyívi yihí cuenda ra, tan tsacu nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quívi can ñaha ca tsinu iñi yu tsi ra, tan ña tsitó yu náa javahá yu. ¹⁴ Tacan tsaha Jutu Mañi yo Jesucristo tsa vaha ra tsi yu. Tan tsinú xaan iñi yu tsi ra jahá ra. Tan cuñi xaan yo tsi nyívi tyin iin ñi cuví yo tsihin ra Cristo Jesús.

¹⁵ Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyehen: Ra Cristo Jesús quítsi ra nu ñuhu ñayívi ihya tyin jacacú ra tsi nyívi iyó cuatyí. Tan yuhu cuví iin ra caquiñi ca tan ñavin

ca tandihí nyívi. ¹⁶ Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyívi tyin cuñi xaan ra tsi ñi tan cunyeé iñi ra ndatú ra nda cuenda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayívi nyito tsa ña cua naa maa. ¹⁷ Yacan cuenda na jacahnú yo tsi ra yihí ndaha tsi yo tandihí ñi quívi, ra nduve tuhun tsiihí iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandihí. Na cuví tsi tacan.

¹⁸ Yooho Timoteo sehe yu, tava tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsaha cuenda ra yañi yo naha ra tsi un quívi cahan ra naha tuhun un jahá Nyoo. ¹⁹ Ña jandihí un tsa tsinú iñi un tsi Nyoo tan ña jandihí un tsa javahá un tumaa catyí maa Nyoo tyin javaha un, nacoto vaha tsitsi añima un tyin vaha cuahán un tsihin Nyoo. Tyin juhva ra naha naco ra naha tandihí yacan, yacan cuenda ña tsinú ca iñi ra naha tumaa taahán maa tsi. ²⁰ Tacan javaha ra Hime-neo tan ra Alejandro. Yacan cuenda tsaha cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi síqui tuhun Nyoo.

2

Nu jacuahā ra Pablo nácaa taahán tsi ndacan tahvi yo tsi Nyoo

1 Tshá cuenda yu tsi tandihi nyivi yihí cuenda Nyoo tyin ñiñi xaan cuñi tsi ndacan tahvi yo tsi Nyoo tsa cuenda tandihi nyivi. Tan nacuhva yo tyahvi nyoo tsi Nyoo tsa cuenda ñi. 2 Na ndacan tahvi yo cuenda ra ndacá ñaha naha ra tan cuenda tandihi ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayivi vaha nuu Nyoo tan nuu nyivi. Tacan tan cua jaha ñi tsa ñayivi tsi yo. 3 Tyin tacan taahán iñi Nyoo, ra tsa jacacú tsi yo. 4 Tyin cuñi ra tsa cacu tandihi nyivi. Tan cuñi ra tsa coto ñi tuhun nditsa. 5 Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ican cuví ra Cristo Jesús. Tan cuví ra iin nyivi tumaa maa yo. 6 Juvín ra Jesucristo tsihi tsa cuenda tandihi nyivi. Tyahvi ra tsa cuenda cuatyí tandihi yo tyin tacan tan cuví cacu yo. Tan cundaā can quivi tyaa maa Nyoo cuhva. 7 Tsa cuenda yacan, tavā tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuahā yu tsi nyivi tsa ñavin nyivi Israel cuví nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu

tyin ña tuhvá yu jandavi ñaha tyin cuenda ra Cristo yihí yu.

8 Yacan cuenda cuñi yu tsa ndacan tahvi rayi naha ra tsi Nyoo tandihi ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha caca iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo. 9 Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyivi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan. 10 Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyivi nacuhva cuenda tsi ñi tsi Nyoo. 11 Tan cunyecú taxin ñi tyaa soho ñi tuhun Nyoo. Tan jaha ñi tsa ñayivi tsi ra tshá cuenda tuhun Nyoo tsi ñi. 12 Tyin ña tshá yu jacuahā ñiñaha nuu nyivi cuaha. Ndi ña tshá yu tsa cundaca ñaha ñi tsi rayi. Taxin ñi na cunyecú ñi. 13 Tyin jihna ca ra Adán javahā Nyoo, yahā can tan javahā ra tsi ña Eva. 14 Tan ñavin tsi maa ra Adán jandavi ñaha nu ña vaha, tyin tsi ña Eva ñasihi ra jandavi ñaha nu tan tsicoo cuatyí ña. 15 Maa tyin ñiñaha nduve tsa

cua tahan ñi tsa cua cacu sehe ñi, tatun jacuahnú vaha ñi tsi sehe ñi, tan tsinú vaha iñi ñi tsi Nyoo tan cuñi ñi tsi ra tan tsi nyivi, tan catsi coo ñi nuu Nyoo tan nuu nyivi.

3

Nacaa taahán tsi coo ra cuví ityi nuu tsihin nyivi vehe ñuhu

¹ Tuhun ihya tuhun nditsa cuví tsi: Tatun iin ndo cuñi ndo cuví ndo ityi nuu tsihin nyivi vehe ñuhu, vaha xaan tyiñu cuñi ndo javaha ndo.

² Maa tyin ñiñi cuñi tsi tyin ra cuví ityi nuu tsihin nyivi vehe ñuhu cuñi tsi cuví ra iin ra catsi iyó tyin tacan tan ña cuví tyaa nyivi cuatyí tsata ra. Tan cuñi tsi tsa coo intuhun ñi ñasihi ra. Tan cuñi tsi tsa cuví ra iin ra tsitó vaha cuhva coo, iin ra vaha nuu nyivi. Tan cuñi tsi vaha cahan ra tsihin nyivi tsaá yuvehe ra, tan cuví ra iin ra tsitó vaha jacuaha tsi nyivi. ³ Iin ra cuví ityi nuu tsihin nyivi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi.

Cuñi tsi tsa cuví ra iin ra vaha iñi, iin ra ña tuhvá cañi tahan. Tan cuví ra iin ra ña nyiyo iñi xuhun. ⁴ Cuñi tsi tsa cuví ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaa yahvi vaha sehe ra tsi ra, tan jahá ñi tsa ñayivi tsi ra. ⁵ Tyin tatun ña tsitó ra cundaca ñaha ra nyivi vehe ra, ¿nácaa cua quihí ndaha ra nyivi tsicá vehe ñuhu Nyoo?

⁶ Tan iin ra ndi tsa xaan tsihin tuhun Nyoo ña taahán tsi cuví ra ityi nuu tsihin nyivi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnu xaan jahá nu tsi nu. ⁷ Tan cuñi tucu tsi tsa cuví ra iin nyivi vaha nuu nyivi tsa ña yihí tuhun Nyoo, tyin tacan tan ña ñihi ñi náa cuatyí tyaa ñi tsata ra tan ña cuví jaha canaa nu ña vaha tsi ra.

Nacaa taahán tsi coo ra jahá tyiñu vehe ñuhu

⁸ Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuví ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi. ⁹ Cuñi tsi tsa cutuñi vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo. ¹⁰ Tan cuñi tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu. ¹¹ Tan tacan tucu ñiñaha, cuñi tsi cuví ñi nyivi vaha nuu nyivi. Ña cahan ñi cuendu. Catsi coo ñi. Tan tyaa nuu vaha ñi tandihí tyiñu. ¹² Ra jahá tyiñu vehe ñuhu na coo intuhun ñi ñasihi ra. Tan cuñi tsi tsa coto vaha ra cundaca ñaha ra tsi sehe ra tan nyivi vehe ra. ¹³ Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa ñi iñi ra caahán ra tuhun Nyoo?

tyin tsinú vaha iñi ra tsi ra Cristo Jesús.

Nu caahán ra Pablo siqui tuhun xeehe cuhva tsinú iñi yo

¹⁴⁻¹⁵ Vasiqui numi ñi cua quitsi nyehe yu nu nyii un. Maa tyin tun ña cuvi quitsi yu tsa numi ñi, yoñi jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuví yo nyivi cuenda Nyoo. Tyin maa yo cuví vehe ñuhu Nyoo nyito. Tan cuñí tsi tsa jañihi ca yo janaha yo tuhun Nyoo tsi nyivi. Tan naquihin vaha yo tyin tuhun nditsa cuví tsi. ¹⁶ Tsa nditsa tyin yaha xaan cahnu cuví tuhun xeehe tsa jaquituvi Nyoo, tyin coo yo tumaa iyó maa ra:

Nyoo nanduví ra rayii tan tsicoq ra, tsicoq cuñu ñuhu ra tumaa tsa iyó cuñu ñuhu maa yo.

Tan catyí Tatyí Ii Nyoo tyin ra nduve cuatyí cuví ra.

Tan nyehe ra cuví ángel naha ra tsi ra.

Tanii cahnu nu ñuhu ñayivi caahán nyivi tuhun ra.

Tan tsinú iñi nyivi tsi ra tanii cahnu nu ñuhu ñayivi.

Tan cuanuhú ra nda gloria.

4

Nu catyí ra Pablo tyin nu cuahán ca tsi quivi yihí nyivi ña cua tsinu ca iñi ñi tsi ra Cristo.

¹ Maa tyin caahán catsi Tatyí Ii tan catyí ra tyin nu cua ndihi tyembu yihí nyivi ña cua tsinu ca iñi ñi tsi ra Cristo, tyin cua tyaá soho ñi tuhun caahán tatyí ña vaha

tsa jandaví ñaha. Tan cua cunyicun ñi ndusu yuhu nu ña vaha. ² Cua tyaá soho ñi tuhun caahán nyivi jandaví ñaha. Tan ñi can ña tuví iñi ñi náa javahá ñi tyin tsa ndundava xaan añima ñi. Tumaa tsa cayu añima ñi jahá iin caa ihñi tan ndundava tsi. ³ Cua casi ñi nu tindaha nyivi. Tan cua catyí ñi tyin ña vaha catsi yo juhva nuu nyayu. Vasu tsitó yo tyin tandihi nuu tsa tsatsí yo, Nyoo javahá itsi. Tan tandihi yoo tsa tsinú iñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra. ⁴ Tyin tandihi tsa javahá Nyoo tan vaha tsi. Tan ña taahán tsi catyí yo tyin ña vaha tsi. Tan cuví catsi yo tandihi tsi tun tsahá yo tyahvi nyoo tsi Nyoo tsa cuenda tsi. ⁵ Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

Nacaa iyó ra vaha jahá tyiñu tyiñu ra Jesucristo

⁶ Tatun jacuahá un tandihi tsa caahán yu ihya tsi tandihi nyivi yihí tuhun Nyoo tsihin yo, cua cuví un iin musu vaha ra Cristo Jesús. Tan tuhun tsa tsinú iñi yo, tsihin tandihi tuhun ra Cristo tsa nyicún yo, cua jatyinyee tsi tsi un tan cuahnu ca un tsihin tuhun Nyoo. ⁷ Maa tyin ña tyaá yahvi un tsa cuví xembulu, tuhun sana, tan tuhun tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñí maa Nyoo. ⁸ Tsa jañiñi yo coo tunyee iñi cuñu ñuhu yo,

juhva ñi jatyinyeé tsi tsi yo. Maa tyin tsa jañiñi yo javahá yo tandihi cuhva cuñi Nyoo, jatyinyeé tsi tsi yo iin cahnu ñi, tyin jatyinyeé tsi tsi yo nu ñuhu ñayivi ihya. Tan jatyinyeé tucu tsi tsi yo tsa coo vaha yo nu cua tsaa yo nda gloria. ⁹ Tan nditsa, tyin tsa nditsa cuví tsi tan tandihi yo taahán tsi tsa tsinú iñi yo itsi. ¹⁰ Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihi nyivi, tan jihna ca yoo tsa tsinú iñi yo tsi ra jacacú ra.

¹¹ Tuhun ihya jacuaha un tsi nyivi yihí cuenda Nyoo, tan jañiñi un tsi ñi na cutuhva ñi itsi. ¹² Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tyuvaa xaan un. Jacuaha tsi ñi tsihin cuhva iyó un, tan tsihin cuhva caahán un. Jacuaha tsi ñi tsihin tsa cuñi un tsi Nyoo tan tsi nyivi, tsihin cuhva tsicá iñi un, tsihin cuhva tsinú iñi un, tan tsihin cuhva javahá un maa ñi maa tsa vaha. ¹³ Tan tsitsi tsa ndi cumañi ca tsaa yu nu nyií un, cahvi tuhun Nyoo tsihin ñi yihí tuhun Nyoo. Cuhva cuenda ñihi tsi ñi, tan jacuaha tsi ñi nácaa cunyicun vaha ñi tsi Nyoo. ¹⁴ Jaha cuenda vaha tunyee iñi tsa tsaha Nyoo tsi un quivi tyiso ndaha ra nyisó tyiñu vehe ñuhu naha ra jiñi un tan cahán ra naha tsa tsaha

cuenda Nyoo tsi ra naha. ¹⁵ Tyaa vaha iñi tuhun can tan javaha cuhva catyí tsi. Tacan tan cua nyehe tandihi nyivi nácaa cuahán un ityi nuu ca tsihin Nyoo. ¹⁶ Jaha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacao ihñi un tsa vaha. Tatun javahá un tacan, cua cacu un, tan cua cacu tucu nyivi tyaá soho tuhun jacuahá un.

5

Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo

¹ Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha. ² Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi ñi tumaa tsa cuhva un cuví tsi ñi. Javaha tandihi tsa caahán yu ihya tsihin tsa vaha tsicá iñi un.

³ Jatyinyee tsi ñiñaha ndaahvi tsa tsihi yii tatun nduve nyivi ñi cuví jatyinyee tsi ñi. ⁴ Maa tyin tatun iyó iin ñaha tsihi yii tan iyó sehe ña, a sehe yañi ña, cuñi tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jahá cuenda sihi ñi tsi ñi tsa ndi nyihi ñi. Tan tacan taahán tsi tsa jaha cuenda tucu ñi tsi ña vityin. Tun

tacan javaha ñi, vaha xaan, tyin tacan taahán iñi maa Nyoo. ⁵ Tan ñaha tsa tsihi yii tan ndoo ndaahvi intuhun ña maa ña, iin ña Nyoo tyaá iñi ña tan tsicán tahvi ña tsi ra tsinu cahñi tan tsacuaa. ⁶ Maa tyin ñaha tsihi yii tsa cusii iñi tsihin tsa iyó nu ñuhu ñayivi ihya, vasu nyito ña maa tyin tsihi ña cuenda Nyoo. ⁷ Jacoto tucu tuhun ihya tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi. ⁸ Maa tyin tatun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

⁹ Nu tutu tsa nyaá sivi ñi tsihi yii, na cunyaa sivi ñi tsahnu tsa iyó ndaahvi, tatun tsa yahá uñi xico cuiya ñi, tan intuhun ñi yii ñi tsicoo. ¹⁰ Tan tatun tsitó vaha nyivi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsahá ñi tsa catsi nyivi tsaá yuvehe ñi, tan jahá tyiñu ñi tyiñu nyivi yihí cuenda Nyoo tsihin tsa ñii iñi añima ñi, tan jatyinyee ñi tsi nyivi nyehé tundoho. Tun tacan javahá ñi tandihi tsa vaha, cuví cunyaa sivi ñi.

¹¹ Maa tyin ña tyaá ndo sivi ñiñaha tsa ñaha ca quita uñi xico cuiya, coto coo quivi tan cuñi ñi coo nyico yii ñi tan cuñi ñi tindaha ñi inga tsaha tan jandihi ñi tsa jahá tyiñu ñi tyiñu ra Cristo. ¹² Tan coo cu-

atyí ñi tyin ña javahá ñi cuhva cahan ñi tsa cua javaha ñi. ¹³ Tan inga tucu tyiñu tatun tsicá nuu jutsan ñi maa ñi tan iin tan iin vehe nyivi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi. ¹⁴ Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nyaa nyivi xaan iñi tsi yo tsi yo. ¹⁵ Caahán yu tandihi tuhun ihya tsihin un tyin yihí ñi tsa nacoo ñi tsi Nyoo tan nyicún ñi tsi nu ña vaha. ¹⁶ Tatun ñi yihí cuenda Nyoo tan iyó iin nyivi ñi tsa tsihi yii, cuñi tsi tsa jatyinyee maa ñi tsi ñi can, tan ña tyiso ñi itsi siqui vehe ñuhu. Tyin tacan tan cuví jatyinyee vehe ñuhu tsi inga ñi tsihi yii tsa nduve ca maa nyivi iyó.

¹⁷ Ra tsahnu ra nyisó tyiñu vehe ñuhu, cuñi tsi tsa jaha xaan nyivi vehe ñuhu tsa ñayivi tsi ra, tan tsa jihna ñi na jaha ñi tsa ñayivi tsi ra caahán tuhun Nyoo tan jacuahá ra naha tsi ñi. ¹⁸ Tyin tuhun Nyoo catyí tsi tyehen: “Ña tyihi un yoho yuhu indiqui nu jahá tyiñu ti, tacan tan cuví catsi ti luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

¹⁹ Tatun tyaá nyivi cuatyí tsi iin ra tsahnu tan ña quita uvi a uñi taahan tsandaa, ña tyaá yahvi un tsa caahán ñi.

²⁰ Maa tyin nyivi tsa jañihí ca javahá tsa ña vaha, cuñí tsi tsa cahan ndo tsihin ñi nuu tandihi nyivi yucú vehe ñuhu. Tacan tan nayuhvi tandihi ca ñi tan ña javaha ñi tsa ña vaha. ²¹ Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsi ra. Tan caahán yu tsihin un tyaa yahvi tsa caahán yu ihya, inducu ñi cuñi un nyehe un tsi tandihi nyivi. ²² Ña numi xaan cuhva un tyiñu tsi iin ra cuvi ra ityi nuu tsihin nyivi vehe ñuhu. Coto cuhun cuatyí javaha ra siqui un. Jaha cuenda vaha tsi un tsihin tandihi tsa javahá un tan ña cuhva un ndatu tsi nu ña vaha tsa nducu cuhva nu tsi un.

²³ Tan tsa cuenda tsa uhvi tsitsi un, ña coho ca un maa ñi maa ndutya, coho luxu vinu na nduvaha tsitsi un.

²⁴ Yihí nyivi quituví cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi. ²⁵ Tan tacan tucu tatun javahá yo tsa vaha, ña cuxeehe tsi. Vasu ña quituví tsi tsa numi ñi, maa tyin ña cuví ndoo xeehe tsi.

6

¹ Nyivi yihí cuenda Nyoo tsa cuví musu, cuñí tsi tyaa yahvi vaha ñi tsi tsitoho ñi. Tyin tacan tan ña ñihi nyivi cuhva cahan ñi ndavaha ñi siqui Nyoo, tan siqui tuhun ra tsa jacuahá yo. ² Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayivi tsi ra ican

tyin yañi ra cuenda Nyoo cuví tsi ra. Cuñí tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñí ra tsi ra ican. Jacuahá yacan tsi nyivi yihí cuenda Nyoo tan cuhva cuenda tsi ñi na javaha ñi cuhva catyí tsi.

Cuhva iyó yo tsihin Nyoo tan na cusii iñi yo tsihin tsa tsaha ra tsi yo

³ Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo, ⁴ cuví ra iin ra nduyaá ñi maa, iin ra ña tsitó. Tan tsa caahán yuhu ra siqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihi tan nyiyo iñi nyivi tsa iyó tsi inga ñi, tan tsa caahán nyaa tahan ñi tsi ñi, tacan tan ndasi cuñí nyivi nyehe tahan ñi tsi ñi. ⁵ Tan maa ñi cañi tahan nyivi jahá can tyin quiñi tsicá iñi ñi, tyin ña tsitó ñi tsa vaha. Cuñí maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can. ⁶ Nditsa tyin tsa javahá yo cuhva catyí Nyoo tan sii cuñí yo tsihin tsa tsaha ra tsi yo, cuví tsi tumaa iin tsa cuca iyó tsi yo. ⁷ Tyin nduve náa tsaá tsihin yo quiivi cacu yo nu ñuhu ñayivi ihya. Tan nduve náa cuhun tsihin yo quiivi cúu yo. ⁸ Maa tyin tatun iyó tsa catsi yo tan iyó jahma cunditsí yo, na cusii iñi yo,

tan na ndoo yo vaha tsihin yacan. ⁹ Maa tyin nyivi cuñi nducuca, nducú cuhva nu ña vaha tsi ñi. Tan nacava ñi tsitsi xayí nu. Jandusohó nu tsi ñi tsihin tsa cuñi ñi coo cuaha tsa coo tsi ñi. Tan jativí can tsi ñi. Tan nu ndihi tuhun cua tiví ndihi ñi tan cua cuhun ñi anyaya. ¹⁰ Tyin tsa cuñi xaan yo xuhun, yacan cuví yoho tandihi ca nuu tsa ña vaha. Tan yihí nyivi tsa cuenda tsa cuñi xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

Nacaa cañi tahan yo tsihin nu ña vaha tsihin tsa tsinú iñi yo tsi Nyoo

¹¹ Maa tyin yoocho cuví un iin rayií cuenda Nyoo. Quita tsiyo nuu tandihi tsa caquiñi. Coo cuiti vaha nuu Nyoo. Cũanyicun tsi Nyoo tsihin tsa nã iñi un. Cuñi tsi nyivi. Cũnyee iñi tsihin tsa vita iñi un nyehe un tandihi tsa cua tahan un. Tan ña cahnu jaha un tsi un. ¹² Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayivi nyito tsa ña cua naa maa tsa tsaha Nyoo tsi yo. Tyin tsa cuenda can, cana Nyoo tsi un, tan tacan catyi un quivi cahan catsi un nuu tandihi ra cuví tsandaa naha ra, catyi un tyin tsinú iñi un tsi Nyoo. ¹³ Tan vityin nuu Nyoo, ra tsa tsahá ñayivi coo tandihi tsa iyó, tan nuu ra Cristo Jesús ra tsa tsaha cuenda vaha tuhun nditsa nuu ra Poncio

Pilato, caahán yu tsihin un, ¹⁴ javaha tandihi tsa catyi yu tsihin un tyin javaha un tyin tacan tan ña cuví cahan nyaa nyivi tsi un nda tahan tsi quivi quitsi Jutu Mañi yo Jesucristo. ¹⁵ Nda tsaa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan intuhun ñi maa ra cuví Nyoo, ra iyó xaan tunyee iñi. Rey cahnu cuví ra nuu tandihi ca ra cuví rey. Tan ra ndacá ñaha cahnu cuví ra nuu tandihi ca ra ndacá ñaha. ¹⁶ Intuhun ñi maa ra cuví ra tsa nduve tuhun tsiihí iyó tsi. Tan iyó ra nu nditsin nu ña cuví cutuhva nyivi. Tan ndi intuhun nyivi ñaha ca nyehe tsi ra. Tan ndi ña cuví nyehe ñi tsi ra. Na jacahnu yo tsi maa ra. Tan na cundaca ñaha ra tsi yo tandihi tyembu. Tan na ña cundihí maa tsa ndacá ñaha ra tsi yo. Na cuví tsi tacan. ¹⁷ Tan cahan tsihin nyivi tsa iyó tsa cuca ñuu ñayivi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihi can. Na cuita iñi ñi tsi Nyoo nyito, tyin maa ra cuví ra tsahá tandihi tsi yo. Tan cuví cusii iñi yo tsihin tsi. ¹⁸ Cañan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa nã iñi ñi tan ñavin tsihin tsa cuiihya cuñi ñi. ¹⁹ Tacan tan coo tsa cuca tsa ña cuanaa maa tsi ñi, tan jatyinyee tsi tsi ñi nu cuahán quivi ityi nuu. Tan coo ñi ñayivi nyito tsa ña cua naa maa.

*Nu ndihí tsahá cuenda ra
Pablo tsi ra Timoteo*

²⁰ Yooho Timoteo, jaha cuenda vaha tyiñu tsa tsaha Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Ña tyaa yahvi un tuhun tsa catyí nyivi tyin tsitó xaan ñi tan ña nditsa. ²¹ Tyin tsa cuenda yacan, yihí nyivi tsa nacoo ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsaha ra tsi un.

Tan na cuvi tsi tacan ñi.

Carta Tsinu Uvi Tsa Jacuhun Ra Pablo Tsi Ra Timoteo

Nu tyaq ra Pablo inga carta tsa cuenda ra Timoteo.

¹ Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo. Tyin cuñí ra tsa jacoto yu tsi nyivi tyin tsahá ra ñayivi nyito coo tandihí ñi tsa iin ñi cuví tsihin ra Cristo Jesús. ² Jaquitsí yu carta ihya tsi yooho Timoteo. Tan cuñí xaan yu tsi un tyin tumaa cuví sehe yu cuví tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

Nu caahán ra Pablo tsihin ra Timoteo na catyi tuhun ra tsihin nyivi tyin cuenda ra Cristo yihí ra

³ Tandihí ñi quivi nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsii tsaahnu yu tyiñu Nyoo tsanaha. Tan vaha cuñí añima yu tyin vaha iyó yu nuu ra. ⁴ Nducuhún xaan iñi yu nácaa tsacu un quivi quita yu nu nyí un. Tan vityin cuñí xaan yu nyehe yu tsi un inga tsaha tan cusí iñi yu. ⁵ Tan nducuhún xaan iñi yu tyin

tsinú ñi vaha iñi un tsi Nyoo. Tumaa tsa tsinu iñi ña Loida tsitan un tan ña Eunice sihi un. Ni ican vaha xaan tsinu iñi ñi tsi Nyoo, tan tsitó yu tyin tacan tsinú iñi maa un tsi Nyoo vityin.

⁶ Yacan cuenda tsahá cuenda yu tsi un jandu iin ca iñi un tan cuatyíñu ndatu tsa tsahá Nyoo tsi un tsa cahan un tuhun ra. Yacan cuví ndatu tsa tsahá ra tsi un quivi tyiso ndaha yu jiñi un. ⁷ Nyoo ña tsahá ra tatyí ña vaha tsa jayuhvi tsi yo. Tsahá ra Tatyí Ii ra tsi yo tyin coo tunyee iñi cahnu tsi yo, tan cuñí tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yo tsi yo. ⁸ Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyí yu vehe caa tsa cuenda ra. Cuatyíñu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsí siqui yo tsa cuenda tuhun Nyoo. ⁹ Tyin juvin ra jacacu tsi yo. Tan cana ra tsi yo tyin coo yo ñayivi ii. Ñavin tsa cuenda tsa vaha tsa javahá yo tan cana ra tsi yo. Cana ra tsi yo tyin tacan tyaq maa ra cuhva javaha ra nda ndi cumañi ca tsinu ñuhu ñayivi. Tyin nda quivi can tyaq ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús. ¹⁰ Tan vityin tsitó yo tsa vaha can tyin tsa quitsi ra Jesucristo jacacu ra tsi yo. Tan quihin nyaa ra tandihí tunyee iñi tuhun tsiihí. Cahán ra tuhun

vaha, tan tava nditsin ra tuhun tsa coo yo ñayivi nyito tsa ña cua naa maa.

¹¹ Nyoo tava tyiñu ra tsi yu tsa cahan yu tuhun can tsihin nyivi. Tava tyiñu ra tsi yu tsa caca yu tyiñu ra, tan jacuaha yu tuhun can tsi nyivi tsa ñavin nyivi Israel cuví. ¹² Yacan cuenda nyehé yu tandihi tundoho. Maa tyin ña nducahán nuu yu tsa tacan nyehé yu tundoho, tyin tsitó yu yóo tsinú iñi yu. Tyin nacuhva cuenda yu tsi yu tsi ra, tan tsitó vaha yu tyin cuví jaha cuenda ra tsi yu nda cuanda quivi quitsi ra inga tsaha.

¹³ Cuanyicun tuhun vaha tsa tsaha cuenda yu tsi un. Tan coo tsihin tsa tsinú vaha iñi un tsi Nyoo. Cuñi tsi ra, tan tsi nyivi. Tyin tacan taahán tsi coo yoo tsa iyó iin caa ñi tsihin ra Cristo Jesús. ¹⁴ Tan na jatyinyee maa Tatyí li tsa iyó aña yu tsi un tan jaha cuenda vaha un tsa vaha tsa tsaha Nyoo tsi un.

¹⁵ Tsa tsitó un tyin naco ihñi ra Figelo tan ra Hermogenes tsi yu tan tandihi ca maa ra iyó ityi Asia.

¹⁶ Maa tyin ra Onesíforo na cundaahvi iñi Jutu Mañi yo tsi ra tan tsi nyivi ra tyin cuaha xaan tsaha quitsi ra jatyinyee ra tsi yu. Tan ña cahán nuu ra tsa tyehen nyí yu vehe caa. ¹⁷ Tan quivi tsinyi ra ñuu Roma ihya, ña jandihí maa ra tsa nanducú ra tsi yu nda cuanda tsa nañihí ra tsi yu. ¹⁸ Maa Jutu Mañi yo na cundaahvi iñi

ra nyehe ra tsi ra quivi cua jacutuñi ra tsi yo. Tsitó maa un nácaa jatyinyee xaan ra Onesíforo tsi yo quivi tsiyucu yo ñuu Éfeso.

2

In andaru vaha ra Jesucristo

¹ Tan yooho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuví yo tsihin ra. ² Tuhun tsa tsíñi un cahan yu nuu nyivi cuaha, jacuaha yacan tsi nyivi tsa ñi iñi tsinú iñi tsi Nyoo, ñi tsa cuví jacuaha tsi inga nyivi.

³ Tan cunyee iñi nyehe tundoho tumaa iin andaru vaha ra Jesucristo. ⁴ Ndi intuhun ra cuví andaru tan ña cuví jatyañu xaan ra tsi ra tsihin inga ca tyiñu. Tyin cuñi tsi tsa javaha ra maa ñi maa tsa caahán ra cuví ityi nuu tsihin ra. ⁵ Tan tacan tucu ra jasiquí tsihin balón, ña cuví jaha canaa ra tatun ña cunyee iñi ra jasiquí ra tumaa taahán maa tsi. ⁶ Iin ra jahá tyiñu tsitsi cuhu, taahán tsi tsa jaha tyiñu jihna ra, tacan tan cuvi catsi jihna ca maa ra tsa quitá nu jahá tyiñu ra. ⁷ Tyihi tuñi vaha iñi tsa caahán yu tsihin un ihya, tan maa Jutu Mañi yo cua cuhva tsa cutuñi iñi un tandihi tsi.

⁸ Nducuhun iñi tsi ra Jesucristo, ra tsa nandoto tsa yaha nyehe ra tundoho tan tsihi ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsaha cuenda ra

tsi yu tyin cahan yu tsihin nyivi. ⁹ Tan tsa cuenda tuhun can cunyeé iñi yu nyehé yu tandihi tundoho nda cuanda nuuhñi yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñi tsi. ¹⁰ Yacan cuenda cunyeé iñi yu nyehé yu tandihi tundoho tsa cuenda tsa vaha tsi tandihi ca nyivi tsa nacatsi maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihi yo nu sii caá tsa ña cua ndihi maa coo yo. ¹¹ Tuhun ihya tuhun nditsa cuví tsi tan cua cundaa tsi:

Tatun tsihi yo cuenda cuñu ñuhu yo, coo nyito tucu yo tsihin ra.

¹² Tatun nyehé yo tundoho tsa cuenda ra, cua cundaca ñaha ndihi yo tsihin ra.

Tatun catyí yo tyin ñavin cuenda ra yihí yo, cua catyi tucu maa ra tyin ñavin nyivi yihí cuenda ra cuví yo.

¹³ Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

Tatun jahá tyiñu vaha yo, cua quita vaha yo

¹⁴ Janducuhun iñi tuhun ihya tsi ra jacuahá tuhun Nyoo, tan catyi tsihin ra naha nuu Jutu Mañi yo, na

jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan jativí ra naha tsi nyivi tyaá soho tsa caahán ra naha. ¹⁵ Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyíñu vaha un tuhun nditsa cuhva taahán maa tsi, ña cua nducahan nuu un. ¹⁶⁻¹⁷ Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyivi. Tyin cuví can tumaa cuehe xaan tsi ñi. Tan yaha ca cuhva cua tiví ñi jahá can. Yacan cuví tsa tahan ra Himeneo tan ra Fileto. ¹⁸ Tyin quita tsiyo ra naha ityi vaha tan catyí ra naha tyin tsa yahá nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyivi tsa tsinu iñi tsi Nyoo. ¹⁹ Vasu yihí juhva ñi tacan quita tsiyo ñi, maa tyin Nyoo tsaquin ra tsa nditsa, tan yacan cuví tsa ña cua nasama maa. Tan nyaá iin seña tsa catyí: “Jutu Mañi yo nacotó ra tsi nyivi yihí cuenda ra tsa nditsa.” Tan catyí tucu tsi: “Tandihí ñi nyisó sivi ra Cristo na quita ñi nu iyó tsa ña vaha.”

²⁰ Tsitsi iin vehe cahnu, ñavin maa ñi maa ndaha tyiñu tsinu tsihin xuhun cuaan tan xuhun cuitsin iyó tsatyíñu nyivi. Tyin tsatyíñu tucu ñi tsa tsinu tsihin vitu tan

tsihin ñuhu quisi. Yihí can tsatyíñú ñi can cuenda tyíñu nahnu, tan yihí can ndáa tahan ñi maa tsi tsatyíñú ñi can. ²¹ Tacan tucu maa yo tatun jahá vaha yo cuenda tsi yo, cuví yo iin nyívi tsa tsatyíñú Nyoo. Tan cuví yo tumaa iin vasu xuhun cuaan tsa ndoo vaha, tacan tan cuví cuatyíñu ra tsi yo tsa cuenda tandíhi tyíñu vaha.

²² Ña caca iñi un tumaa tsicá iñi ra cuatyí iyó nu ñuhu ñayívi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yooho coo iin ñayívi cuíti. Tsínu vaha iñi tsi Nyoo. Cuñi tsi Nyoo tan tsi nyívi. Coo vaha tsihin tandíhi nyívi yihí cuenda Nyoo, tandíhi ñi tsa tsicán tahvi tsi Jutu Mañi yo, ñi iyó añima vaha. ²³ Tan ña tyaa soho un tsa nduve yahvi nyaá tsa caahán yuhu tahan nyívi. Tyin tsitó un tyin tsihin yacan nducuaha ca tsihi. ²⁴ Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyívi cuví ra tsihin tandíhi nyívi. Tan cuñi tsi tsa ñihi vaha ra cuhva jacuaha ra tuhun Nyoo tsi nyívi. Tan cuñi tucu tsi tsa cunyeé iñi ra tsihi tsahá nyívi. ²⁵ Tan tsihin tsa vita iñi ra cuñi tsi janaha vaha ra cuhva coo nyívi ndava iñi. Tan cuatu ra tatun ndu uvi iñi ñi tan coto ñi tsa nditsa. ²⁶ Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñi nu tsihin ñi.

3

Nacaa cua coo nyívi nu cua ndíhi quívi

¹ Tan cuñi tucu tsi coto un tyin nu cua ndíhi tyembu cua coo quívi tsa yíi xaan cua coo yo. ² Tyin cua coo nyívi nyiyo iñi, maa ñi tsa tsii maa ñi cua cuñi ñi coo. Tan cua cuñi xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndi tsi nyívi ñi. Ña cua tyaa yahvi ñi tsi Nyoo. ³ Ña cua cuñi ñi tsi nyívi ñi. Ña cua cuhva maa ñi coo taxin nyívi. Cua cahan ñi cuendu. Ña cua cuví cundaca ñaha ñi cuñu ñuhu ñi. Xaan xaan ñi cua cuví. Tan ña cua cuñi ñi nyehe ñi tsa vaha. ⁴ Cua xico ñi tsi nyívi ñi. Tan cua cana iñi ñi javaha ñi náa ndíhi tsa cuñi maa ñi. Tan cahnu cua jaha ñi tsi ñi. Tan maa ñi maa tsa cuñi maa ñi cua nanducu ñi, tan ña cua nanducu ñi tsi Nyoo. ⁵ Cua cunyicun ñi tsi Nyoo tumaa tsa tsinú iñi ñi cua jaha ñi tsi ñi, maa tyin ña nditsa. Tyin tyasí ñi nu janahá Nyoo tunyee iñi ra tyin ña tsinú iñi ñi tsi ra.

Ña cutahan un tsihin nyívi javahá tacan. ⁶ Tyin tyañu ñi ican iyó ra tsa quíhví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñi ñi. ⁷ Cuahán ñi cua tyaa soho ñi tuhun tsa, maa

tyin ña cuví maa cutuñi ñi ñi tsa cuví tsa nditsa. ⁸Tan nyiví cua coo, cua cuvi ñi tumaa ra Janes tan ra Jambres, ra tasi tsa tsicoo tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyiví cua coo nu cuahán ca tsi ityi nuu. Cua cahan ñi ndavaha ñi siqui tuhun Nyoo. Quiñi xaan cua caca ñi ñi. Tan ña cua quita vaha ñi tsihin cuhva tsinu ñi ñi. ⁹Maa tyin tsa cua janaha ñi, ña cua cuvi nducuaha can tyin ña xeehe caa tyin iin tsa nduve yahvi nyaá cua cuvi can, tumaa tsa javahá tucu ra Janes tan ra Jambres.

Nu ndihí tava tyiñu ra Pablo tsi ra Timoteo

¹⁰Maa tyin yooho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenda iyó yu tacan, tan nácaa tsinú ñi yu tsi Nyoo. Tan tsitó tucu un nácaa cunyeé ñi yu tsa cuxaán nyiví tsi yu, tan nácaa cuñi yu tsi ñi.

¹¹Tan tsitó un nácaa cunyeé ñi yu nyehé yu tundoho tsa tsinyaa ndaha nyiví tsi yu. Tsitó un tsa tahañ yu, tandihí tundoho tsa nyehe yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacu ra tsi yu tsitsi tandihí tundoho can.

¹²Tsa nditsa tyin tandihí yoo tsa cuñi coo cuhva cuñi ra Cristo Jesús cua janyehe nyiví tundoho tsi yo. ¹³Maa tyin nyiví caquiñi tan nyiví

jandaví ñaha, quiñi xaan ca cua coo ñi. Tyin cua jandavi ñaha ñi tsi nyiví tan cua jandavi ñaha tucu maa nyiví tsi ñi.

¹⁴Maa tyin yooho jañiñi tsi un tan coo un tsihin tsa cutuhva un. Tyin tsitó un yóo jacuahá tsi un tan tsitó un tyin tsa nditsa cuví tsa cutuhva un. ¹⁵Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi ñi un tan cacu un tsa cuenda tsa tsinú ñi un tsi ra Cristo Jesús.

¹⁶Tandihí tuhun tsa nyaá nuu tutu Nyoo, maa Nyoo tsahá tsi. Tan jatyinyeé xaan tsi tsi yo tsa nacoto yo nácaa taahán tsi tsinú ñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo. ¹⁷Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuvi yo iin ra cuiti yihí cuenda Nyoo tan javaha yo tandihí tsa vaha.

4

¹Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyí nyiví nyito tan nyiví tsihi quiví cua quitsi ra cundaca ñaha ra tsihin tunyee ñi tsa iyó tsi ra.

²Çahan tuhun Nyoo tsihin nyiví. Tan ña jandihí un tsa jañiñi un javaha un tacan. Çahan tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, çahan tsihin ñi tatun ña vaha javahá ñi, tyin

tacan tan cunyicun vaha ñi tsi ra Cristo. Tan cunyeey iñi cuatu nda nasama ñi cuhva iyó ñi. Tan jacuaha tsi ñi nácaa taahán tsi coo ñi. ³ Tyin coo quiví ña cua cunyeey ca iñi nyiví tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi. ⁴ Tan cua tyaa tsiyo ñi tsa nditsa. Tan cua tyaa soho ñi tsa ña nditsa. ⁵ Maa tyin yooho jaha cuenda tsi un tsihin tsa vaha tsicá iñi un. Cunyeey iñi nyehe tundoho. Cahan tuhun Nyoo tsihin nyiví. Vaha javaha un tyiñu tsa tsahá Nyoo tsi un.

⁶ Yuhu tsa yatyin cua nacuhva cuenda yu ñayiví iyó yu tsa cuenda tuhun Nyoo, tyin tsa cuyatyin cúu yu. ⁷ Tsa yahá cañi tahan yu tumaa taahán maa tsi, tan tsa ndihí javahá yu tyiñu tsa tsahá Nyoo tsi yu tumaa iin ra tsinú suuhva, tun tsa tsaá ra nu taahán tsi cucuiñi ra. Tan tacan ñi maa tsinú iñi yu tsi Nyoo. ⁸ Tan vityin nu cuahán ca quiví, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsicoo yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyiví tsa ndatú tsi ra quiví cua quitsi ra. Tyin intuhun ñi maa ra cuví ra tatsí tuñi vaha.

Inga tyiñu tavá ra Pablo tsi ra Timoteo

⁹ Janumi tan quitsi ñi un, quitsi nyehe un nu nyiví yu. ¹⁰ Tyin ra Demas nacoo ihñi

ra tsi yu tyin cuñi ca ra tsa iyó ñuu ñayiví ihya. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia. ¹¹ Intuhun ña ra Lucas nyiví tsihin yu. Nanducu tsi ra Marcos tan quihín tsi ra quitsi tsihin un quiví quitsi un. Tyin cuví jatyinyee ra tsi yu tsihin tyiñu Nyoo. ¹² Jacuhun yu tsi ra Tíquico ñuu éfeso. ¹³ Quiví quitsi un yaha un naquihin un jahma vixin yu tsa nacoo yu ñuu Troas vehe ra Carpo. Tan naquihin un tandihí libru yu, cundaha un quitsi tsihin un. Tsa ñiñi ca cuñi tsi cundaha un, yacan cuví tandihí tutu yu.

¹⁴ Ra Alejandro, ra cañi caa, cuaha xaan tsa ña vaha javahá ra tsi yu. Maa Jutu Mañi yo cua natyahvi tsi ra tsa cuenda tandihí tsa javahá ra. ¹⁵ Jaha cuenda vaha tsi un coto náa javaha ra tsi un. Tyin xaan xaan cuñi ra cuenda tuhun Nyoo tsa caahán yo.

¹⁶ Tsa jihna ñi jacacu yu tsi yu nuu ra cumí tyiñu naha ra, yoñi maa jatyinyee tsi yu. Tandihí ra naha nacoo ihñi ra naha tsi yu. Na jaha Nyoo tucahnu iñi tsi ra naha tsa cuenda yacan. ¹⁷ Vasu ndi maa tandihí ra naha nacoo ihñi tsi yu, maa tyin Jutu Mañi yo jatyinyee xaan ra tsi yu. Tan tsahá ra tunyee iñi tsi yu tan cuví cahan catsi yu tuhun ra nuu nyiví. Tan tsiñi tandihí nyiví tsa ñavin ñi Israel cuví tsa cahan yu. Tan jacacu Nyoo tsi yu tan

ña tsatsj ndicaha can tsi yu.
 18 Tan maa Nyoo cua jacacu tsi yu ndaha tandihí tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihí ñi tyembu. Tan na cuvi tsi tacan.

Nu ndihí cahān ra Pablo tan tsahā ra nacumi tsi nyivi

19 Cuhva nacumi tsi ña Prisca tan tsi ra Aquila tan tsi nyivi ra Onesíforo.
 20 Tan jacotó ndihí yu tsi un tyin ndoo ra Erasto ñuu Corinto. Tan ndoo ra Trófimo ñuu Mileto tyin cuuhví ra.
 21 Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihí ca nyivi yihí cuenda Nyoo tsihin yo.

22 Na quihí ndaha Jutu Mañi yo Jesucristo tsi un. Tan Nyoo nasoco tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Tito

Nu tyaq ra Pablo carta tsa cuenda ra Tito

¹ Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsi Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo cuhva cuñi Nyoo. ² Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin cuhva ra ñayivi nyito coo yo. Tan ña jandavi ñaha ra. ³ Tan vityin tsa tahan tsi quivi tsa tyaq Nyoo cuhva tyin coto yo tuhun ra. Maa ra cuvi ra jacacú tsi yo, tan tava ra tyiñu tsi yu tsa cahán yu tuhun ra tsihin nyivi. ⁴ Jaquitsi yu carta ihya tsi un, Tito, tyin nditsa tyin cuvi un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehé ra tsi un.

Tyiñu tsaha ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

⁵ Nacoq yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuvi ityi nuu tsihin nyivi vehe ñuhu intuhun intuhun ñuu, tumaa tsa catyi maa yu tsihin un. ⁶ Tyin ra tsahnu cuvi ityi nuu tsihin nyivi vehe ñuhu, cuñi tsi cuvi ra iin ra iyó intuhun ñi ñasihi, tan tsinú iñi tandihi sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaq cuatyí siqui sehe ra. Tun tacan iyó ra, cuvi cuvi ra ityi nuu tsihin nyivi vehe ñuhu. ⁷ Tyin ra cuvi ityi nuu tsihin ñi yihí cuenda Nyoo, maa Nyoo tsaha tyiñu can tsi ra. Yacan cuenda ñiñi cuñi tsi tsa cuvi ra iin ra cuiti iyó nuu Nyoo. Iin ra cahnu jahá tsi ña cuvi cuvi ra ityi nuu tsihin nyivi vehe ñuhu, ndi iin ra ndihi iñi, ndi iin ra tuhvá tsihi, ndi iin ra nducú tsihi, ndi iin ra jaha canaa xuhun tsihin iin cuhva ña vaha. ⁸ Maa tyin cuñi tsi cuvi ra iin ra sihi cuñi tatun tsa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuvi ra iin ra javahá tsa vaha, iin ra tsicá iñi tsa vaha, iin ra tsa nacuhva cuenda vaha tsi ra tsi Nyoo, iin ra tsitó cundaca ñaha tsi maa ra. ⁹ Cuñi tsi cunycun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra cuhva jacuaha ra tsi nyivi caahán tyin ña nditsa tuhun caahán yo. ¹⁰ Tyin cuaha xaan ra ndava iñi iyó,

cuaha ra caahán tsa nduve yahvi nyaá, cuaha ra jandaví ñaha. Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra. ¹¹ Cuñí tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñí ra naha xuhun.

¹² Tan juven ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyehen: “Nyivi Creta, vatya xaan ñi. Cuví ñi tumaa cuví quití. Cuaha xaan tsatsí ñi tan jutsan xaan ñi”, catyi ra. ¹³ Tan nditsa tsa cahan ra. Yacan cuenda cuñí tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo. ¹⁴ Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñí coto tsa nditsa.

¹⁵ Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñí ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñí ñi, tyin nda cuenda cuhva tsicá iñi ñi tan tsa tsiñi tuñi iñi ñi tan ña vaha. ¹⁶ Catyi ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

2

Tuhun vaha tsa tsaḡ

Nyoo tyin jacuahá yo

¹ Maa tyin yooho, jacuahá tsa vaha tsa nacatsí tahan tsihin tsa jacuahá Nyoo tsi yo. ² Jacuahá tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñí tsi tsa cuñi ra naha tsi Nyoo tan tsi nyivi. Tan cunyeet iñi ra naha tandihi náa tundoho nyehé ra naha. ³ Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi. ⁴ Tyin tacan, jacuahá vaha ñi tsi ñiñaha cuatyí tsa ndi tindahá, na cuñi ñi tsi yí ñi tan tsi sehe ñi. ⁵ Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuvi ñi nyivi vaha. Na cuhva ñi tsa cundaca ñaha yí ñi tsi ñi, tyin tacan tan ña cuvi cahan nyivi ndavaha ñi siqui tuhun Nyoo tsa cuenda cuhva iyó ñi.

⁶ Tacan tucu ra cuatyí naha ra. Cuhva cuenda tsi ra naha na catsi coo ra naha. ⁷ Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuahá tsi ra naha tsihin tsa vii tan tsihin tsa vaha. ⁸ Maa ñi tuhun vaha cahan un tyin tacan tan yoñi cuvi tyaa cuatyí siqui un. Tan ra xaan iñi tsi ndo naha ra ña cua ñihi ra naha cuhva cahan ra naha ndavaha ñi siqui ndo tan cua nducahan nuu ra naha.

⁹ Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsitoho ra naha. Na javaha ra naha tandihí tsa caahán tsitoho ra naha. Tan na ña nacahan ra naha nu caahán tsitoho ra naha. ¹⁰ Tan na ña suhu ra naha tsa tsii tsitoho ra naha. Na jaha vaha ra naha cuenda tandihí ndaha tyiñu tsitoho ra naha, tyin tacan tan nyehe nyívi tyin vaha xaan tuhun Nyoo, ra jacacú tsi yo.

¹¹ Tyin Nyoo janahá ra tsa vaha tsa iyó tsi ra tsi nyívi tan cuñí ra jacacu ra tsi tandihí ñi. ¹² Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyívi tsa ña tsitó tsi ra, tan nacoo tucu yo tsa cuñí ñi can. Tan cuiti coo yo nu ñuhu ñayívi ihya, na cundaca ñaha vaha yo tsi yo tumaa cuñí maa Nyoo. ¹³ Tan janahá tucu ra tsi yo nácaa cuatu yo tsa vaha tsa cua ñihi yo quívi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quívi quitsi ra cuví Nyoo yo, ra cahnu cuví, ra jacacú tsi yo. ¹⁴ Tsaha ra ñayívi ra tsa cuenda yo tyin tacan tan jacacu ra tsi yo ndaha tandihí tsa caquiñi. Tan nacatyá ra tsi yo na cuví yo nyívi vaha, tan cuví yo tsii maa ra, tan javaha yo maa ñi maa tsa vaha. ¹⁵ Yacan cuñí tsi jacuaha un tsi nyívi. Jandu iin iñi ñi. Tan cahan tsihin ñi tsihin sívi Nyoo. Tan ña javaha un tsa ña vaha tyin tacan tan ña ñihi nyívi nácaa cahan nyaa ñi tsi un.

3

Cuhva taahán tsi javaha nyívi yihí cuenda Nyoo

¹ Janducuhun iñi tsi nyívi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi. ² Tan ña cahan ñi ndavaha ñi siqui nyívi. Ña cañi tahan ñi tsihin nyívi. Na cuví ñi nyívi vaha. Na masu jaha ñi añima ñi tsihin tandihí nyívi.

³ Tyin nda cuanda maa yo tan ña vaha javaha yo nu quitsi tsi. Soho xaan tsicoo yo. Ndava xaan iñi yo. Ña tsica yo ityi vaha tyin jandavi ñaha xaan nu ña vaha tsi yo. Tan tsindaca ñaha tandihí tsa ña vaha tsa cuñí cuñu ñuhu yo tsi yo. Tan javaha yo tandihí cuhva cuñí maa yo. Tan cuñi yo coo tandihí tsa iyó tsi inga nyívi tsi yo. Ndasí tsica iñi yo nyehe yo tsi nyívi yo. Tan tacan tucu maa nyívi ndasí cuñi ñi nyehe ñi tsi yo. ⁴ Maa tyin Nyoo vaha xaan iñi ra tan jacacú ra tsi yo. Tsihin yacan janaha ra tsi yo tyin cuñi ra tsi tandihí nyívi. ⁵ Ñavin tsa cuenda tsa vaha javahá yo tan jacacú ra tsi yo, tyin jacacú ra tsi yo tsa cuenda tsa cundaahvi iñi ra nyehe ra tsi yo. Tan tsihin ñiñi ra Jesús nacatyá ra cuatyí yo, tan nacacú tsaa yo jaha Tatyí Ii ra, tan tsahá ra ñayívi nyito coo yo. ⁶ Tan tsa cuenda ra Jesucristo, ra jacacú tsi yo, tsahá xaan Nyoo tsa coo

Tatyí li ra añima yo. ⁷ Tsihin tsa vaha maa ra tan janduvahā ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo. ⁸ Tandihí tuhun ihya tuhun nditsa cuví tsi. Tan cuñí yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandihí nyivi tatun tyaá yahvi ñi itsi. ⁹ Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ican cuñí ñi coto ñi nácaa vatsí tata nyivi. Ña tyihí un tsi un tsihin nyivi cañí tahan tsa cuenda ley tsa tyaá ra Moisés tsanaha. Tyin nduve náa jatyinyeé yacan. Tan nduve tsa tsiñi tuñi tsahá can.

¹⁰ Tatun iyó nyivi cuñí natahvi sava tsi nyivi tsicá vehe ñuhu, çana tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, çasi nu caca ñi vehe ñuhu. ¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

Tyiñu tava ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyíí un. Tan quivi tsaa ra, nducu

cuhva tan cūhun un nda ñuu Nicópolis tyin ndacan cua ñihi tahan yo. Tyin tyaá yu cuhva tsa ndoo yu ndacan yoo vitsin. ¹³ Nducu cuhva jatyinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan cūhva tsa tsiñí ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha. ¹⁴ Na cutuhva nyivi yihí cuenda Nyoo javaha ñi tsa vaha tan jatyinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndihí cahan ra Pablo

¹⁵ Tandihí ra yucú tsihin yu, tsahá ra naha nacumi tsi un. Tan cuhva nacumi tsi tandihí nyivi cuñí tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Ra Filemón

Nu quitsahq tyaá ra Pablo carta cuenda ra Filemón

¹ Yuhu ra Pablo, nyii yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyi tucu ra Timoteo tyin jaquitsí ndihi ra nacumi tsi un. Cuñi xaan ndi tsi un tsa cuenda tsa iin ñi tyiñu ra Cristo jahá tyiñu yo.

Nu quitsahq tyaá ra Pablo carta cuenda ra Filemón

² Tan tyaá yu carta ihya tsa cuenda ña Apia tan ra Arquipo tyin jatyinyeé xaan ñi tsi yo tsihin tyiñu jahá yo, tan tyaá tucu yu itsi tsa cuenda tandihi nyivi ndu iin yuvehe un. ³ Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo aña ndo.

Ra Filemón tsinú xaan iñi ra tsi ra Jesús tan cuñi xaan ra tsi nyivi

⁴ Tandihi ñi tsaha tsa tsicán tahvi yu tsi Nyoo tan nducuhún iñi yu tsi un, ⁵ tyin ñihí tuhun yu tyin tsinú xaan iñi un tsi ra Jesús tan cuñi xaan un tsi tandihi nyivi yihí cuenda ra. ⁶ Tan tsicán yu tsi Nyoo tsa cuenda tandihi nyivi tsa natsinú iñi tsi ra Jesús jahá un tsihin tsa tsinú iñi un, tyin na cutuñi iñi ñi tandihi tsa

vaha tsa iyó tsi yo tsa cuenda ra Jesucristo. ⁷ Tan sii xaan cuñi yu tan iin xaan cuñi yu tsa cuenda tsa cuñi xaan un tsi nyivi tsa yihí cuenda ra Cristo tan jandu iin xaan un iñi ñi.

Nu tsicán ra Pablo tumañi iñi tsi ra Filemón tsa cuenda ra Onésimo

⁸ Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu. ⁹ Maa tyin yuhu cuñi xaan yu tsi un, yacan cuenda ña cua tava tyiñu yu tsi un tyin cuñi yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyii yu vehe caa ihya tsa cuenda ra Cristo. ¹⁰ Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahan yu tuhun ra Cristo tsihin ra nu nyii yu vehe caa ihya.

¹¹ Tahan tsanaha cuví ra musu un tan ña jahá tyiñu vaha ra. Maa tyin vityin vaha xaan cua jatyinyee ra tsi yo, tahan ñi tsi yooho tan yuhu. ¹² Yacan jaquitsí nyico yu tsi ra yuvehe un tan cuñi yu tsa naquihin cuenda un tsi ra tumaa tsa maa yu cuví ra. ¹³ Tsicá tucu iñi yu tsa ndoo ra nu nyii yu vehe caa ihya tan jatyinyee ra tsi yu cahan yu tuhun Nyoo tsitsi tsa nduve un. ¹⁴ Maa tyin ña cuñi yu jandoo yu tsi ra tyin ña tsitó yu nácaa cua cahan un. Tan ña cuñi yu jañiñi yu tsi un

tun ña cuhva un tsa cunyi ra. Vaha ca jaquitsi nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu. ¹⁵ Vasiqui maa Nyoo cuñi tsa cunu ra nuu un juhva quivi tan vityin cua tsa nyico ra yuvehe un tan coo cui ra tsihin un. ¹⁶ Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñi xaan yu tsi ra, yacan yooho taahán tsi tsa cuñi ca un tsi ra tan ñavin ca yuhu, tyin vityin ñavin musu ñi un cua cuvi tsi ra tyin cuvi tucu ra yañi un tsa cuenda ra Cristo.

¹⁷ Tun nditsa un tsa cuñi un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un. ¹⁸ Tatun javaha ra iin tsa ña vaha tsi un o nyaá cuenda ra tsi un, tyahvi maa yu can. ¹⁹ Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayivi iyó un tsi yu. ²⁰ Yañi, javaha tumañi iñi ihya tsi yu, tumaa ra yihí cuenda ra Cristo; na cusii iñi yu tan na ndu iin iñi añima yu tsihin tsa cua javaha un.

²¹ Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu, tan cuaha ca tsa cua javaha un. ²² Tan cuñi tucu yu tyin janduvaha un nu cusu yu yu-

vehe un tyin nyitá iñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

Nu ndihí tyaá ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra

²³ Ra Epafras tsa nyii ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un. ²⁴ Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu. ²⁵ Na nasoco xaan Jutu Mañi yo Jesucristo tsi ndo.

Tan na cuvi tsi tacan ñi.

Carta Tsa Tsinyaa Tsa Cuenda Nyivi Israel, Ñi Caahán Yuhu Hebreo

Caahán Nyoo tsihin yo tsihin yuhu Sehe ra

¹ Tahañ tsanaha cuaha xaan tsaña, tan cuaha xaan cuhva cahañ Nyoo tsihin tsii tsaahnu yo. Tsa jihna ñi tsatyiñu ra tsi ra cuvi ndusu yuhu ra. Juvín ra can naha ra tsañ cuenda tsi nyivi tuhun caahán Nyoo. ² Tan vityin, nu cua ndihi tyembu ihya tsatyiñú ra tsi Sehe ra tsa caahán ra tsihin yo. Iin ñi cuvi ra tsihin Sehe ra tan javaha ra tandihi tsa iyó. Tan nacuhva cuenda ra tandihi can tsi Sehe ra. ³ Tan maa Sehe ra janahá ra tsa sii caá ra, tyin juvín ra Sehe ra cuvi tixahñu ra tyin juvín ñi cuhva caá maa ra caá ra Sehe ra. Tan tsihin tunyee iñi tuhun caahán ra, yihí ndaha ra tandihi tsa iyó. Tsa yaha tsa nacatya ra cuatyí yo, tan tsinyaa ra xiin cuaha Nyoo nda gloria.

Cahnu ca cuvi Sehe Nyoo tan ñavin ca ángel

⁴ Sehe Nyoo cahnu xaan ca cuvi ra tan ñavin ca ángel. Tan cahnu ca tyiñu ñihi ra jahá tyiñu ra tan ñavin ca ángel. ⁵ Tyin Nyoo ña catyi ra ndi iin tsaha tsihin ndi intuhun ángel tyehen: Yooho cuvi Sehe yu.

Tan tsañá yu ñayivi coo un vityín.

Tan ndi ña cahañ ra tuhun ndi intuhun ángel tyehen:

Yuhu cua cuvi Jutu ra.

Tan maa ra cua cuvi Sehe yu.

⁶ Maa tyin quivi jaquitsi Nyoo tsi Sehe mañi ra nu ñuhu ñayivi, catyi ra:

Tyin tandihi ángel ra taahán tsi jacahnu ra naha tsi Sehe ra.

⁷ Tan cahañ tucu ra tuhun ángel tan catyi ra:

Ángel yu cuvi ra naha tumaa iin tatyí jahá yu,

jahá tyiñu ra naha tyiñu yu, tan cuvi tucu ra naha tumaa ñuhu, catyi Nyoo.

⁸ Maa tyin tuhun Sehe ra catyi ra tyehen:

Nyoo cuvi un, tan ña cua cundihí maa tsa ndacá ñaha un. Tan tsa ndacá ñaha un ndaa tsi tan nditsa tsi.

⁹ Tyin cuñi un tsa vaha tan ndasi cuñi un nyehé un tsa ña vaha.

Yacan cuenda yuhu, tsa cuvi yu Nyoo un, tsañá yu cuaha ca tsa sii cuñi un, tan ñavin ca tsi ra cutahán tsihin un naha ra.

¹⁰ Tan catyi tucu Nyoo tsihin Sehe ra tyehen:

Yooho cuvi Jutu Mañi tandihi nyivi. Quivi jihna ñi juvín un javaha ñuhu ñayivi,

tan tsihin ndaha un javaha un andivi.

¹¹ Ñuhu ñayivi tan andivi tan tandihi maa tsa iyó cua cundihí tsi, maa tyin yooho, ña cua cundihí

un, tyin tacan ñi iyó maa un.
Tandihí maa can cua ndut-sahnu can tumaa ndutsahnú jahma.

12 Tan cua quihí tahnu can tumaa tyihí tahnu yo iin jahma.

Tan cua nasama can tumaa nasamá nyiví jahma ñi.

Maa tyin yooho iin ñi maa ra cuví un tan ña cua nasama un.

Tan ña cua cundihí maa ñayiví un tyin tacan ñi iyó maa un, catyí Nyoo tsihin Sehe ra.

13 Nyoo ndi iin tsaha ña cahān ra tsihin ndi intuhun ángel tumaa cahān ra tsihin Sehe ra tyehen:

Cunya xiin cuaha yo ihya tsitsi tsa nacuhva cuenda yu tsi nu xaan iñi tsi un nahnu tsi un.

14 Tandihí ángel, tatyí cuví ra naha. Tava tyiñu Nyoo tsi ra naha tsa caca ra naha tyiñu ra tan jatyinyee ra naha tsi nyiví tsa cua cacu.

2

Cahnu xaan cuví tsa jacacú Nyoo tsi yo

1 Yacan cuenda cuñí tsi tyaa yahvi xaan ca yo tuhun nditsa tsa tsiñi yo, coto nacoo ihñi yo itsi. 2 Tahān tsanaha tsahā cuenda ángel ley Nyoo tsi ra Moisés. Tan janahā Nyoo tyin nditsa tan taahán tsi tyaa yahvi nyiví itsi. Tan nyiví tsa tsicoo cuatyí tan ña tyaa yahvi ley can, tatsi tuñi ra tsi ñi tumaa catyí maa ley can. 3 Tun tacan tahān ñi can quiví can ¿nácaa cua javaha yoo vityin, tan

cuvi cacu yo tatun ña tyaa yahvi yo tsa jacacú Nyoo tsi yo?, tan cahnu xaan ca cuví tuhun ihya. Juvín ñi maa Jutu Mañi yo Jesucristo cuví ra tsa cahān jihna tyin cuví cacu yo. Yahā can tan cahān nyiví tsa tsiñi tsa cahān ra. Nyehe ñi tyin nditsa tan nacatyí tuhun ñi itsi tsihin yo. 4 Tan siin tyin Nyoo janahā catsi ra tsi yo tyin nditsa tsa jacacú ra tsi yo. Janahá ra can tsi yo tsihin tsa javahā ra cuaha tsa iyo. Tan tsahā tucu ra Tatyí li ra tsi yo tyin jatyinyee tsi tsi yo tsa javaha yo tyiñu tsa cuñí ra javaha yo. Tan tsihin tandihí yacan janahá ra tsi yo tyin nditsa tsa jacacú ra tsi yo.

Ra Jesucristo quitsi ra cuví ra rayi nu ñuhu ñayiví ihya

5 Nyoo ña tsahā ra tsa cundaca ñaha ángel ñuhu ñayiví tsa tsa cua coo tsa caahán yo tuhun vityin. 6 Tyin iyó iin nu tyaa iin ra nu tutu Nyoo tyehen:

Nyoo Jutu yu ¿yóo ra cuví rayi nu ñuhu ñayiví ihya tyin ñuhú iñi un tsi ra?

¿Tan yóo ra cuví ra tyin cutuñu iñi un tsa cuenda ra?

7 Tyin ndaahvi ca jahā un tsi ra juhva tyembu, tan ñavin ca ra ángel naha ra.

Maa tyin jacahnū un tsi ra. Tan jahā un tsa ñayiví tsi ra.

Tan tsahā un tsa quihí ndaha ra tandihí tsa javahā un.

⁸ Tandihí can tyaa cuenda un ndaha ra.

Tan nduve maa náa ña tsaha cuenda Nyoo quihí ndaha ra. Tan ñaha ca nyehé yo tyaa yahvi tandihí yacan tsi ra.

⁹ Maa tyin nyehé yo tsi ra Jesús tyin nduluhlu ra jaha Nyoo juhva tyembu tan ñavin ca ra ángel naha ra. Tan janduluhlu Nyoo tsi ra tsa cuenda tsa cuñí xaan ra tsi yo. Tan tsaha ra tsi ra Jesús quitsi ra quitsi cúu ra tsa cuenda tandihí yo. Tan vityin jahá xaan Nyoo tsa cahnu tsi ra tan jacahnú xaan ra tsi ra tsa cuenda tundoho tsa nyehe ra quivi can.

¹⁰ Tandihí maa tsa iyó, tsa cuenda maa Nyoo cuví tsi. Maa ra javaha itsi. Tan cuñí ra kuhva ra tandihí tsa sñi caá tsa iyó andivi tsi tandihí sehe ra. Yacan cuenda janyehe ra tundoho tsi ra Jesucristo, ra tsa jacacú tsi yo, tan tsihin yacan janduvaha ra tsi ra.

¹¹ Ra Cristo tsa jacacú tsi yo, Sehe Nyoo tsi ra. Tan juvin ñi sehe Nyoo nanduví yoo tsa tsinú iñi tsi ra. Yacan cuenda ña cahán nuu ra Cristo tsa caahán ra tyin yañi ra tan kuhva ra cuví tsi yo, tyin iin ñi Jutu yo tsihin ra.

¹² Tyin catyí ra Cristo nu tutu Nyoo tyehen:

Cua cahan yu tuhun un tsihin yañi yu.

Tan cua jacahnu yu tsi un tsihin yaa nu ndu iín yo.

¹³ Catyí tucu ra tyehen:

Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsaha ra tsi yu, catyí ra.

¹⁴ Yoo tsa cuví yo nyivi ñuhu ñayivi, iyó cuñu ñuhu yo tan niñi yo. Tacan cuví ra Cristo, tyin tun tsa ña tsicoo cuñu ñuhu ra tan niñi ra, ña cua cuví cúu ra tan janaa ra tsi nu ña vaha, nu tsa tsahñí tsi nyivi.

¹⁵ Tacan javaha ra tan jacacú ra tsi nyivi tsa tsicoo yuuhví jaha tuhun tsihi. Cuví ñi tumaa musu nu ña vaha tyin tandihí ñi quivi tsicoo yuuhví ñi.

¹⁶ Tan tsa nditsa vaha tyin ña quitsi ra quitsi jatyinyee ra tsi ángel. Tyin quitsi ra quitsi jatyinyee ra tsi nyivi tata ra Abraham.

¹⁷ Yacan cuenda ñiñi cuñi tsi tsa cuví ra tumaa yoo tsa cuví yo yañi ra tan kuhva ra tyin tacan tan cuví ra iin ra cundaahvi iñi tsi yo, tan cuví ra jutu tsaahnu cuví ityi nuu tsa cuenda yo nuu Nyoo tyin jandaá ra tandihí maa tan quihin nyaa ra cuatyí yo tsihin tundoho tsa nyehe ra.

¹⁸ Tan tsa cuenda tsa nyehe ra tundoho quivi nducú kuhva nu ña vaha tsi ra, tsitó ra nácaa cuñí yo tun nyehé yo tundoho. Yacan vityin nyaá ra tsa jatyinyee ra tsi yo tun nyehé yo tundoho tsa nducú kuhva nu ña vaha tsi yo.

3

Cahnu ca cuví ra Jesús tan ñavin ca ra Moisés

¹ Nyooho, yañi, tsa jandu íi Nyoo, tan tsa nacatsi ra tyin coo ndo tsihin ra nda gloria, nyehe vaha ndo kuhva iyó ra

Cristo Jesús, juven ra jaquitsi Nyoo tyin caca ra tyiñu ra tan cuví ra jutu tsaahnu cuví ityi nuu tsa cuenda yoo tsa tsinú iñi tuhun ra. ² Ra Cristo javahā ra tandihi tsa cahan Nyoo tyin javaha ra, tumaa javahā tucu ra Moisés tyiñu tsa tsahā Nyoo tsi ra tsa jaha cuenda ra vehe Nyoo tsa cuví nyivi Israel. ³ Ra Jesucristo cahnu ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnu ca ra cuví ra tan ñavin ca maa vehe tsa javahá ra. ⁴ Tyin maa ñi iyó ra javahá intuhun intuhun vehe, maa tyin Nyoo cuví ra tsa javahā tandihi maa tsa iyó. ⁵ Ra Moisés tyaā yahvi ra tsi Nyoo tan javahā ra tyiñu tsa tsahā Nyoo tsi ra tyin jahā cuenda vaha ra vehe Nyoo tsa cuví nyivi Israel, tan juven ñi jacotō tucu ra tsi nyivi tsa cua javaha Nyoo nu cuahán ca tsi. ⁶ Maa tyin ra Cristo, Sehe Nyoo, tyaā yahvi tucu maa ra tsi Nyoo tan juven ra cuví ra ndacá ñaha vehe Nyoo vityin. Vehe can cuví yoo tun iin ñi cuñí yo nyicún yo tsi Nyoo tan nyitá vaha iñi yo tsi ra nda cuanda nu ndihi, tan tacan ñi sñi cuñí yo ndatú yo tsa cua ñihi yo.

Nyivi tsinú iñi tsi Nyoo, quitatú ñi tsihin ra

⁷ Yacan cuenda cuñí tsi jaha cuenda vaha yo tsi yo tumaa catyí Tatyí Ii Nyoo tyehen:

Tatun tsiñí ndo tsa caahán Nyoo tsihin ndo vityin,

⁸ ña jandava ndo añima ndo, tumaa javahā nyivi tsa ña tyaā yahvi tsi Nyoo quivi nducū cuhva ñi tsi ra nu tsicā ñi nuu tsiqui.

⁹ Tyehen catyí Nyoo:

Tsii tsaahnu ndo nducū cuhva ñi tsi yu, vasu ndi maa nyehe ñi tsa javahā yu tsitsi tsa uvi xico cuiya.

¹⁰ Yacan cuenda cuxaān yu tsihin nyivi can, tan catyí yu tyehen: “Ña iin maa cuñí nyivi ihya tan ña cuñí ñi cunycun ñi ityi janahá yu tsi ñi.”

¹¹ Yacan cuenda cuxaān yu tsihin ñi, tan cahan catsi yu tsihin ñi, tyin ña cua quitatu ñi tsihin yu, catyí Nyoo.

¹² Yacan cuenda yañi, jaha ndo cuenda tsi ndo tan ña caca uvi iñi ndo tsitsi añima ndo coto jandihi ndo tsa tsinú iñi ndo tsi Nyoo nyito tan coto nacoo ndo tsi ra. ¹³ Maa tyin jandu iin tahan ndo iñi ndo tandihi ñi quivi, tsitsi tsa tsahá tsi cuhva tsi ndo vityin. Tyin tacan tan ña cua ndundava añima ndo, tan ndi intuhun ndo tan ña cua jandavi ñaha tsa caquiñi tsi ndo. ¹⁴ Tyin tun ña jandihi yo tsa nyitá iñi yo tsi Nyoo nda cuanda naa ñuhu ñayivi tumaa javahá yo nda quivi quitsahā yo, cua ñihi yo tsa vaha iin caa ñi tsihin ra Cristo tyin cunyeé iñi yo ndatú yo tsi ra.

¹⁵ Yacan tacan cuñí tsi jaha yo cuenda tsi yo tumaa catyí tutu Nyoo:

Tatun tsiñi ndo tsa caahán
Nyoo tsihin ndo vityin

Ña jandava ndo añima ndo,
tumaa javaha nyivi tsa
ña tyaa yahvi tsi Nyoo
—catyí tutu Nyoo.

¹⁶ ¿Yoo nyivi cuví ñi tsiñi tsa
cahan Nyoo tan ña tyaa soho
ñi? Nyivi ihya cuví nyivi Is-
rael tsa tava ra Moisés Egipto
tahan tsanaha. Juvín ñi can
ña tyaa soho. ¹⁷ Tan ¿yoo
nyivi cuxaan Nyoo tsitsi tsa
uvi xico cuiya? Juvín ñi maa
ñi tyin tsicoo cuatyí ñi. Tan
tsihí ñi nu tsiqui, juvín ñi maa
nu tsica ñi. ¹⁸ ¿Tan yoo tsihin
cahan catsi Nyoo tyehen?:

—Ña cua quitatu ndo tsihin
yu.

Juvín ñi tsihin ñi tsa ña tyaa
soho can. ¹⁹ Ihya nyehé yo
tyin ña cuví ñihí ñi quitatu ñi
tsihin Nyoo tyin ña tsinu iñi ñi
tsi ra.

4

¹ Yacan cuenda, tsitsi tsa
ndi iyó ndatu tsa quitatu yo
tsihin Nyoo, jaha ndo cuenda
tsi ndo tyin tacan tan ndi in-
tuhun ndo tan ña cua ndoo
ihñi ndo. ² Vityin yoo tsiñi
tucu yo tuhun Nyoo tsa ja-
cacú ra tsi yo, tumaa tsa tsiñi
tucu maa nyivi Israel can.
Tsiñi ñi itsi, maa tyin nduve
nacatyí tsa tsiñi ñi itsi tyin ña
tsinu iñi ñi itsi. ³ Yoo tsa tsinú
iñi tsi Nyoo, quitatú yo tsihin
ra. [Maa tyin ña quitatu nyivi
tsa ña tsinú iñi tsi ra] tyin
catyí ra:

Yuhu cuxaan yu tsihin ñi tan
cahan catsi yu tsihin ñi

tyin ña cua quitatu ñi
tsihin yu, catyí ra.

Vasu ndi maa [tacan cahan
Nyoo tsihin ñi ican], maa tyin
[tsa iyó tuhun tsa cuví qui-
tatu yo tsihin Nyoo nda quivi]
ndihí jaha tyiñu ra javaha ra
ñuhu ñayivi. ⁴ Tyin yihí nu
tutu Nyoo caahán tsi tyehen
tuhun tsa tsinu utsa quivi nu
ndihí vitya:

Tsa ndihí jaha tyiñu Nyoo,
quitatu ra tsa tsinu
utsa quivi.

⁵ Tan catyí tucu tsi tyehen:

Ña cua quitatu ñi tsihin yu,
catyí Nyoo.

⁶ Nyivi tsa tsiñi jihna tuhun
tsa jacacú Nyoo tsi yo ña
cuví quitatu ñi tsihin ra, tsa
cuenda tsa ña tyaa yahvi ñi
tsa cahan ra tsihin ñi. Maa
tyin vityin ndi iyó ndatu
tsa quitatu inga nyivi tsihin
ra. ⁷ Tsa yaha tsa ña tyaa
yahvi nyivi Israel tsa cahan
Nyoo, tan tyaa ra inga quivi
cuví quitatu yo tsihin ra, tan
quivi can cuví tyembu vityin.
Tacan caahán Nyoo nu tutu
ra nu tyaa ra David tyehen:

Vityin tatun nyoocho tan tsiñi
ndo tsa caahán yu,

Ña jandava xaan ndo añima
ndo, catyí Nyoo.

⁸ Tun tsatyin tsaha ra Josué
nu quitatu nyivi Israel, ña cua
cahan Nyoo tsa cuenda inga
quivi. ⁹ Yacan cuenda cuví
quitatu nyivi yihí cuenda ra
tsihin ra. ¹⁰ Tyin nyivi qui-
tatú tsihin Nyoo, ña tsicá iñi
ñi tsa cuenda tyiñu jahá ñi
tyin quitatú añima ñi tumaa
quitatu Nyoo quivi ndihí jaha

tyiñu ra. ¹¹ Cuñí tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javahā nyivi tsicoo tsanaha tsa ña cuñi tsinu iñi tsi ra.

¹² Tyin tuhun Nyoo, nyito tsi, tan iyó tunyee iñi itsi. Tan xaan ca tsi tan ñavin ca mi-tyi tsa xaan nduvi tsiyo yuhu. Tan jasín tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo. ¹³ Nduve maa tsa javahā Nyoo tan cuví cunu xeehe can nuu ra, tyin tandihi maa tan nyehé ra. Tan juvin tsi ra cua cuhva cuenda yo tsa javahá yo.

Ra Jesús cuví jutu tsaahnu cuví ityi nuu tsa caahán ndaahvi tsihin Nyoo tsa cuenda yo

¹⁴ Ra Jesús Sehe Nyoo, juvin ra cuví jutu tsaahnu cuví ityi nuu tsa cuenda yo, tyin quihvi ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandihí yo tsa tsinú iñi yo tsi ra. ¹⁵ Tyin ra tsa cuví jutu tsa cuenda yo cuví naquihin ndaahvi ra tsi yo tatun cuihya cuñi yo, tyin tsitó ra nácaa cuñi yo tun nyehe yo tundoho tyin maa ra nyehe tucu maa ra tandihi nuu tundoho quivi nducu cuhva nu ña vaha tsi ra, maa tyin ña tsicoo cuatyí ra. ¹⁶ Yacan cuenda cuñi tsi nanducu yo

tsi Nyoo tan ndacan yo tsi ra tsihin tsa ña yuuhví yo na cundaahvi iñi ra nyehe ra tsi yo tan cuhva ra tunyee iñi tsa iyó tsi ra tsi yo, tan jatyinyee ra tsi yo quivi nyehé yo tundoho.

5

¹ Tandihí ñi jutu tsaahnu tsa cuví ityi nuu tsa nacatsi Nyoo tsitsi tsa tandihí nyivi Israel, nacatsi ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quití tsa cuenda cuatyí ñi. ² Tan vatsí tsaha juvin ñi ndaahvi cuñi ra cuví jutu quivi nducú cuhva nu ña vaha tsi ra, yacan cuenda cuví cundaahvi iñi ra nyehé ra tsi nyivi ña cutuñi vaha iñi tuhun Nyoo tan nyivi ña nyicún vaha tsi Nyoo. ³ Tan yacan cuenda tsahñi ra quití tan jamañi ra can nuu Nyoo tsa cuenda cuatyí maa ra tan tsa cuenda cuatyí nyivi.

⁴ Ndi intuhun maa nyivi tan ña cuví cuví ñi jutu tun ñavin maa Nyoo nacatsí tsi ñi. Tyin maa Nyoo cuví ra nacatsí tsi ra cua cuví jutu, tan tsahá ra ndatu tsi ra tsa cuví ra jutu, tumaa javahā ra tsihin ra Aarón tahañ tsanaha. ⁵ Tan tacan tucu ra Cristo, ñavin maa ra tyaa tyiñu can tsi ra, tyin maa Nyoo tsahā tsa cuví ra jutu tsaahnu tsa cuví ityi nuu, tumaa catyí ra: Yoocho cuví Sehe yu. Yuhu tsahá yu ñayivi coo un vityin, catyí Nyoo tsihin ra Cristo.

6 Tumaa catyí tucu ra tsihin ra nu inga nu caahán tsi tye-hen:

Ña cua cundihi maa tsa cuví yooho jutu, tumaa cuví ra Melquisedec.

7 Quiví tsicoo ra Cristo nu ñuhu ñayiví ihya, tsican tahvi ra tsi Nyoo, tsacu xaan ra cahan ra tsihin Nyoo tyin juvin ra cua jacacu tsi ra ndaha tuhun tsihi tsihin tun-yeé iñi tsa iyó tsi ra. Tsiñi Nyoo tuhun caahán ra tsa cuenda tyin javaha ra tandihi tsa catyí Nyoo tyin javaha ra. 8 Yacan cuenda vasu ndi maa Sehe Nyoo tsi ra Cristo, cutuhva ra tyaá yahvi ra tsi Nyoo tsihin tsa nyehe ra tundoho. 9 Tsa yaha tsa javaha ra tandihi cuhva cuñi Nyoo tyin javaha ra, tacan tan tsaha Nyoo tsi ra tsa jacacú ra tsi tandihi nyivi tsa tyaá yahvi tsa caahán ra tyin tacan tan coo cuii ñi tsihin Nyoo. 10 Tyin maa Nyoo tava tyiñu tsi ra tsa cuví ra jutu tsaahnu cuví ityi nuu, tumaa cuví ra Melquisedec.

Na ña jandihí yo tsa tsinú iñi yo tsi Nyoo

11 Cuví cahan cuaha yo siqui tuhun ihya, maa tyin yíi xaan nacatyí tuhun yu nácaa cuahán tsi, tyin nyooho ña cuñi ndo cutuñi iñi ndo. 12 Tsa naha xaan yihí ndo cuenda ra Cristo, yacan tsa taahán tsi jacuaha ndo tsi inga nyivi. Maa tyin nyooho cuví ndo tumaa cuví lee tsa tyaxín tsa ñaha ca cuví catsi tyin cuñi tsi tsa tyaa soho nyico ndo tuhun tsa tsiñi ndo

tsa jihna ñi. 13 Tyin nyivi cuñi tyaa soho tuhun tsa ña yíi cuví ñi tumaa lee tsa tyaxín tyin ñaha ca cutuñi vaha iñi ñi nácaa coo vaha ñi tsihin Nyoo. 14 Maa tyin nyivi tsa cutuñi vaha iñi tan tsahnú ñi tsihin tuhun Nyoo, juvin ñi cuví tumaa iin nyivi tsa tsatsí nyayu tyin nacotó ñi ndaa tsa vaha tan ndaa tsa ña vaha.

6

1 Yacan cuenda ña ndoo yo vaha maa ñi maa tsihin tuhun ra Cristo tsa cutuhva yo tsa jihna ñi; na cuhun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yaha cutuhva yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra. 2 Tan na ña ndoo yo vaha tsihin tuhun tsa cutuhva yo cuenda tsa tsicoon-dutyá yo, tan tsa tyisó ndaha yo siqui nyivi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihi nyivi tsa yaha cúu ñi, tan tsa cuenda tucu tsa cua cutuñi tandihi nyivi nuu Nyoo tan yihí ñi cua cuhun cuii ñi anyaya. Na ña ndoo yo vaha tsihin yacan ñi. 3 Nacuhun ca yo ityi nuu tatun Nyoo tsaha ra ndatu.

4 Tyin nyivi tsa tsa yaha naquihin cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí Ii Nyoo añima ñi. 5 Tan tsitó ñi tyin vaha tuhun Nyoo. Tan tsa nyehe ñi juhva nácaa cua

cuví tsa cua coo yo nu ñuhu ñayivi tsa, tyin ñihj ñi tunyee iñi tsa iyó tsi Nyoo. ⁶ Tatun tsa naquihin cuenda ñi tandihi yacan, yaha can tan jandihj ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa tyaá ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyivi. ⁷ Añima nyivi cuví tsi tumaa ñuhu nu jahá tyiñu nyivi, tyin tandihj ñi tsaha tsa cuún savi, nacohó ñuhu can ndutya savi can. Tatun vaha ñuhu can, vaha tsicoó tsa tatsí nyivi, tan nasocó Nyoo ñuhu can. ⁸ Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itsi. Tacan cua tahan nyivi tsa jandihj tsa tsinú iñi tsi Nyoo.

⁹ Yañi, vasu ndi maa caahán ndi tacan, maa tyin tsitó vaha ndi tyin nyoocho nasocó Nyoo tsi ndo tyin jacacú ra Cristo tsi ndo. ¹⁰ Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñi xaan ndo tsi nyivi yihí cuenda ra, tan nyehé tucu ra tyin tsa yaha xaan jatyinyee ndo tsi ñi, tan ndi jatyinyee ca ndo tsi ñi vityin. ¹¹ Cuñi ndi tsa jañihi ca ndo ndu iin iñi ndo nda cuanda quitsi Jutu Mañi yo, tyin tacan tan ñihj ndo tandihj tsa ndatú ndo. ¹² Ña cuñi ndi tsa jutsan xaan jaha ndo tsi ndo, maa tyin cuñi ndi tsa coo ndo tumaa iyó nyivi tsa tsinú vaha iñi tsi Nyoo tan javaha ndo

tumaa javahá ñi. Tyin ñi ican cunyeé xaan iñi ñi ndatú ñi, tan ñihj ñi tsa catyj Nyoo tyin cuhva ra tsi yo.

¹³ Tyin quivi tyihj Nyoo cuhva tyin cuhva ra tsa cua cuhva ra tsi ra Abraham, tsatyinñu ra juven ñi sivi maa ra, tyin ña cuví cuatyinñu ra náa inga ca sivi tyin nduve nyivi cahnu ca cuví tan ñavin ca maa ra. ¹⁴ Tan catyj ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuví jaha yu”, catyj ra tsihin ra. ¹⁵ Ra Abraham ñihj ra tsa catyj Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé iñi ra ndatú ra can. ¹⁶ Iin nyivi tun tyihj ñi cuhva tsa cuhva ñi tsa cua cuhva ñi tsi yo, tsatyinñu ñi sivi iin nyivi cahnu ca cuví tan ñavin ca maa ñi. Tsihin yacan ndoó ñi tuhun tsihin yo. ¹⁷ Nyoo tsatyinñu ra juven ñi sivi maa ra quivi catyj ra tyin cuhva ra tsa cuhva ra tsi nyivi ra. Javahá ra tacan tyin cuñi ra tsa coto ñi tyin cua jandaa ra tsa cahán ra tsihin ñi tan ña cua nasamá tuhun cahán ra. ¹⁸ Tan iyó uvi taahan tsa ña cuví nasama. Iin tsi cuví tsa cuhva Nyoo tsa catyj ra tyin cuhva ra tsi yo, tan inga tsi cuví tsa tsatyinñu ra juven ñi sivi maa ra. Nyoo ña vatya ra. Yacan cuenda tandihj yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihj yo tsa catyj ra tyin cuhva ra tsi yo. ¹⁹ Tumaa iin yutun

ndoo tsa tsicá nuu ndutya ñuhu nuuhñi tsi tsihin iin caa vee coto cuhun tsi tsihin tatyí, tacan nyitá ñi yo tsa jacacú ra Cristo tsi yo. Tan tsa nyitá ñi yo tsi ra, cuví tsi tumaa tsa nuuhñi yo tsihin Nyoo ra nyaá Nu Ii Xaan inga tsiyo nu natahví sava jahá jahma. ²⁰ Ican quihví ra Jesús tyin tacan tan nuñá ra ityi cuhun yo nu nyaá Nyoo. Tan ña cua cundihi maa tsa cuví ra Jesús jutu tsaahnu cuví ityi nuu, tumaa cuví ra Melquisedec.

7

Ra Jesús cuví ra jutu tumaa cuví ra Melquisedec

¹ Ra Melquisedec tsa caahán yu tuhun ihya, juvin ra cuví rey ñuu Salem, tan cuví tucu ra jutu cuenda Nyoo, ra cahnu ca cuví tan ñavin ca tandihi tsa iyó. Quivi tsa vatsí nuhu ra Abraham naha ra tsa yahá tsahan ra naha tsicañi tahan ra naha tsihin ra cuví rey naha ra, tan jahá canaa ra naha, ra Melquisedec jatahan ra tsi ra naha tan nasocó ra tsi ra Abraham. ² Tan cuaha tsa ñihí ra Abraham nu tsahan ra tsicañi tahan ra. Tsitsi tsa utsi utsi nuu tsa ñihí ra, tsahá ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuví tucu ra rey ñuu Salem, tan Salem cuñi tsi catyi “tsa taxin”. Yacan cuenda cuví ra: “Rey tsahá tsa taxin.” ³ Ra Melquisedec nduve jutu ra tan sihi ra. Ña caahán tsi tun iyó nyivi ra, tan ndi ña caahán

tsi ama cacú ra, tan ama tsihi ra. Yacan cuenda cuví jandú inducu yo tsi ra tsihin Sehe Nyoo, tyin ña tsindihí maa tsa cuví ra jutu.

⁴ Nyehé yo ihya vityin tyin cahnu xaan cuví ra Melquisedec, tyin tsahá ra Abraham juhva tsa ñihí ra nu tsicañi tahan ra tsi ra. ⁵ Tun tsatyin tata ra Abraham cuví ra Melquisedec, tan cuví ra jutu, ña iyo cua cuñi yo tsa tsahá ra Abraham juhva tsa ñihí ra tsi ra, tyin tsa yahá cuaha cuiya tan tsahá Nyoo ley tsi nyivi tata ra Abraham. Tan catyi ley can tyin taahán tsi cuhva juhva tsa ñihí ñi tsi ra jutu tsa cuví tata ra Leví naha ra, vasu ndi maa iin ñi nyivi cuví ñi tsihin ra naha tyin juvin ñi tata ra Abraham cuví ra naha. ⁶ Ra Melquisedec, vasu ndi maa ñavin tata ra Leví, tan tata ra Abraham cuví ra, maa tyin naquihin cuenda ra juhva tsa ñihí ra Abraham. Tan nasocó ra Melquisedec tsi ra Abraham, ra tsa catyi Nyoo tsihin tyin cua cuhva ra tsa cuhva ra. ⁷ Tan tsitó catsi yo tyin cahnu ca cuví ra tsa nasocó, tan ñavin ca ra tsa nasocó ra. ⁸ Nyehé yo tyin cahnu ca cuví ra Melquisedec tan ñavin ca tandihi ra tsa quihín cuenda intuhun intuhun tsitsi tsa utsi utsi tsa ñihí nyivi, tyin rayii ñuhu ñayivi ihya ñi cuví ra naha, tan tuhvá ra naha tsiihi. Maa tyin caahán tsi nu tutu Nyoo tan catyi tsi tyin ra Melquisedec nyito

ra. ⁹ Ra Leví tsihin sehe ra, tata ra Abraham cuví ra naha. Juvín ra naha cuví jutu tsa naquihín tsa intuhun intuhun tsitsi tsa utsi utsi tsa ñihí nyívi. Cuví catyí yo tyín tandihí ra can naha ra tyahví ndihí ra naha tsi ra Melquisedec quívi tyahví ra Abraham tsi ra. ¹⁰ Cuví catyí yo tyín tyahví ndihí tata ra Leví tsi ra Melquisedec quívi ñihí tahan ra tsihin ra Abraham tyín tata ra Abraham tsi ra naha vasu ndi maa ñaha ca coo ra naha quívi can.

¹¹ Ra jutu tata ra Leví tsa cuví tucu tata ra Aarón, juvín ra naha jacuahá ley tsahnu Nyoo tsi yo. Vaha vityín; tun tsatyín cuví janduvahá ra jutu can naha ra tsi nyívi nyicún ley can, ña ñiñi cuñí tsi quítsi inga jutu, ñavin jutu tumaa ra Aarón maa tyín jutu tumaa ra Melquisedec. ¹² Tyín tun nasamá Nyoo tsi ra cuví jutu, nasamá tucu ra ley ra. ¹³ Jutu Mañi yo tsa caahán tutu Nyoo tuhun, tata inga ra sehe ra Israel cuví ra. Tan ndi intuhun tata ra can tan ña cuví ra naha jutu. ¹⁴ Tsitó vaha yo tyín Jutu Mañi yo tata ra Judá tsi ra, tan ra Moisés ña cahán ra tuhun tata ra Judá quívi cahán ra tuhun ra cuví jutu naha ra.

¹⁵ Nditsa tsa nasamá Nyoo tsi ra jutu tyín jaquítsi ra iín jutu tumaa ra Melquisedec. ¹⁶ Ra jutu ihya ña quítsi ra tumaa catyí ley tsahnu, tyín ley can catyí tsi tyín maa ñi tata ra Leví taahán tsi cuví jutu, tan ra can ñavin tata ra Leví

cuví ra. Maa tyín iyó tunyee iñi tsi ra tsa coo cuii ra, yacan cuenda juvín ra jaquítsi Nyoo. ¹⁷ Tyín tyehen caahán Nyoo tuhun ra:

Yooho ña cua ndihí maa tsa cuví un jutu,
tyín cuví un jutu tumaa ra Melquisedec.

¹⁸ Yacan cuenda nacoo Nyoo ley tsahnu can tyín ña cuví jatyinyeé tsi tsi nyívi, tan ña cuví cacu nyívi jahá tsi. ¹⁹ Ley can ña cuví janduvahá tsi tsi nyívi nu Nyoo. Yacan cuenda tsahá ra inga tsa vaha ca tsi yo. Tan tsa vaha ihya jatyinyeé tsi tsi yo tsa cuví natuhún yo tsihin Nyoo. Yacan cuenda nyitá iñi yo tuhun can, tan tuhun can cuví ra Cristo.

²⁰ Nyoo cahán catsi ra tyín tacan cua cuví, tan tacan cuví. ²¹ Tandihí ca maa ra jutu tsa iyó vityín naha ra nduve náa cahán Nyoo tuhun ra naha. Maa tyín quívi tsahá Nyoo tsi ra Cristo tsa cuví ra jutu, cahán catsi ra tsihin ra tumaa caahán nu tutu ra tyehen:

Cahán catsi Jutu Mañi yo,
tan ña nasama ra tsa cahán ra nu catyí ra tyehen:

“Yooho ña cua ndihí maa tsa cuví un jutu,

tyín cuví un jutu tumaa ra Melquisedec”, catyí Nyoo.

²² Tsa cuenda tsa javahá ra Cristo, tan tsitó yo tyín vaha ca tyiñu ndoo Nyoo tsihin yo tan ñavin ca tsa jihna ñi can. ²³ Jutu tsa cuví tata

ra Leví cuaha xaan ra naha tsa cuenda tyin tun tsiihí iin ra, nacosó inga ra. ²⁴ Maa tyin ra Jesús nduve tuhun tsi-ihí iyó tsi ra, yacan cuenda ña tsindihí tsa cuví ra jutu. ²⁵ Tan tsa cuenda yacan cuví jacacu ra tsi nyivi tsa nanducú tsi Nyoo. Tan tsahá ra tsa coo cuii ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

²⁶ Ra Jesús cuví jutu tsaahnu cuví ityi nuu tsa tsiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quitá tsiyo ra nu iyó nyivi iyó cuatyí tan nandaá ra ityi siqui andivi. ²⁷ Ra Jesús ñavin tumaa inga ra jutu tsaahnu can naha ra cuví ra, tyin ra ican naha ra cuñí tsi cahñi ra naha quití tan jamañi ra naha nuu Nyoo tandihí ñi quivi. Jihna ca jamañi ra naha quití tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyivi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo. ²⁸ Ley Nyoo tsa naquihin cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quitsi ley can, cahān catsi Nyoo tan ndoo ra iin tuhun tsa tsihin yo. Tan tsahā ra tsi Sehe ra tsa cuví ra jutu tsaahnu cuví ityi nuu ca. juvin ra cuví ra vaha tan ña cua cundihí maa tsa vaha

ra.

8

Quivi tsihi ra Jesús tsa cuenda yo tan ndoo Nyoo tuhun tsa tsihin yo

¹ Yacan tuhun ihya cuví tsa ñiñi ca caahán yu: Ra jutu tsaahnu tsa iyó tsi yo ndi in-tuhun cuatyí ra nduve iyó, tan juvin ra tsinyaa nu tyayu tsa nyaá xiin cuaha Nyoo nda gloria. ² Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahā tan ñavin vehe ñuhu tsa javahā nyivi. Tyin vehe ñuhu tsa javahā nyivi cuví tsi tixahñu tsa vaha tsa iyó nda gloria. ³ Tandihí ra jutu naha ra, cuñí tsi cahñi ra naha quití tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyivi. Yacan cuenda cuñi tsi jamañi ra Jesucristo tsa jamañi ra nuu Nyoo. ⁴ Tun tsatyin nyii ra nu ñuhu ñayivi ihya, ndi ña cuví cuví ra jutu. Tyin nu ñuhu ñayivi ihya, iyó ra jutu tsa jamañi nuu Nyoo tsa catyi ley tsa tyaa ra Moisés tyin jamañi ra naha. ⁵ Ra jutu tsa iyó nu ñuhu ñayivi ihya naha ra, jahá tyiñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yo tyin tixahñu ñi cuví tsi, tyin tahañ tsanaha quivi tsa cua javaha ra Moisés vehe ñuhu jahma, catyi Nyoo tsihin ra tyehen: “Jaha cuenda vaha, tan javaha tandihí tumaa janahā yu tsi un quivi tsahan un yucu Sinaí”, catyi

Nyoo tsihin ra. ⁶ Maa tyin ra Cristo ra cuví jutu tsaahnu cuví ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoo Nyoo tuhun vaha xaan ca tsihin yo, tan vaha ca tsa tsahá ra tsi yo.

⁷ Tun tsatyin cuví cacu yo jahá tuhun tsa ndoo jihna Nyoo tsihin yo, ña cuñí tsi tsa ndoo ra inga tuhun tsa tsihin yo. ⁸ Maa tyin Nyoo nyehe ra tyin ña vaha javahá nyivi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsaa quivi
cua ndoo yu tuhun tsa tsihin
nyivi Israel tan nyivi
Judá.

⁹ Maa tyin ñavin tumaa tuhun tsa ndoo yu tsihin tsii tsaahnu ñi,
quivi tin yu ndaha ñi tan tava
yu tsi ñi ñuhu Egipto.

Ña javaha ñi tuhun ndoo yu tsihin ñi,
yacan naco ihñi yu tsi ñi,
catyí Nyoo Jutu yo.

¹⁰ Tuhun tsa tsa cua ndoo yu tsihin nyivi Israel nu cuahán ca tsi ityi nuu, cuví tsehe, catyí Nyoo Jutu yo:

Cua tyihi yu ley yu tsitsi tsa tsiñi tuñi jiñi ñi,
tan cua tyaa tucu yu itsi añima
ñi.

Tacan tan cua cuvi yu Nyoo ñi,

tan maa ñi cua cuvi nyivi yu.

¹¹ Tacan tan ña ñiñi ca tsa jacuahá ñi tsi inga ñi,

na nacoto ñi tsi yuhu tsa cuví yu Nyoo ñi.

Tyin tandihi ñi tan cua nacoto ñi tsi yu,

ñi nyihi tan nda cuanda ñi tsahnu.

¹² Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyí Nyoo Jutu yo.

¹³ Quivi tsa cahan Nyoo tyin cua ndoo ra tuhun tsa tsihin yo, tsa jandutsahnu ra tuhun tsa jihna ñi can. Tan tuhun tsa ndutsahnú tsa cua cundihí tsi.

9

Nu janahá tsi nácaa iyó vehe ñuhu tsa iyó nu ñuhu ñayivi tan vehe ñuhu nu cuví nda gloria

¹ Quivi ndoo Nyoo tuhun tsa jihna ñi tsihin nyivi, tsaha ra cuhva nácaa jacahnu ñi tsi ra, tsitsi vehe ñuhu tsa tsicoo nu ñuhu ñayivi ihya tahañ tsanaha. ² Tyehen tsicoo vehe ñuhu can: Tsitsi vehe tsa jihna ñi nyaa candileru, tan nyaa mesa nu yucu paan ii. Tan yacan tsinañi Vehe Ii. ³ Tan vehe tsa tsinu uvi tsinañi Vehe Ii Xaan. ⁴ Tsitsi vehe can tsinyaa altar xuhun cuaan nu tsahmí ra jutu cutu. Tan tsinyi tucu tsatun cuenda tsa ndoo Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyi yatsin xuhun cuaan nu yihí maná. Tan tsinyi yutun tsa tsindahá ra Aarón tsa quita ita nuu. Tan tsiyucu tucu yuu nu nyaá tsa

utsi ley Nyoo. ⁵ Tan siqui tsatun can tsinyaa tsa caá tumaa caá ángel, tan cuñí tsi catyí tyin nyaá Nyoo ican. Nditsin ángel can tyasi nu tuhvá Nyoo jahá tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

⁶ Tacan tsicoo vehe ñuhu can. Tandihí ñi quivi quihví ra jutu naha ra tsitsi Vehe Ii, tan jacahnú ra naha tsi Nyoo. ⁷ Maa tyin Vehe nu Ii Xaan, intuhun ñi maa ra jutu tsaahnu cuví ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñí tsi cundaha ra ñiñi quití tyin jamañi ra itsi tsi Nyoo tsa cuenda cuatyí maa ra tan cuenda cuatyí nyivi, ñi tsa javahá soho ñi maa cuatyí. ⁸ Tan tsa tacan tsicoo yacan Tatyí Ii Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe Ii cuñí tsi catyí tyin ñaha ca nuña ityi quihví ndáa nyivi tahan ñi maa tsi tsitsi Vehe nu Ii Xaan. ⁹ Tandihí yacan cuví can tumaa tixahñu tuhun tsa tsa ndoo Nyoo tsihin yo vityin. Tahan tsanaha jamañi nyivi tsa jamañi ñi nu Nyoo maa tyin ña jatyinyee can tsi nyivi tsa jacahnú tsi Nyoo tsihin can, tsa caca vaha iñi ñi. ¹⁰ Tyin tandihí tsa javahá nyivi can caahán tsi maa ñi tsa cuenda tsa tsahá Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsaahá ra tsa javahá ñi tacan

tsa numi ñi, nda tahan maa tsi quivi cuhva ra tsa vaha ca.

¹¹ Vityin tsa yahá quitsi ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyivi. Yacan cuñí tsi catyí tyin ñavin vehe ñuhu iyó nu ñuhu ñayivi ihya cuví nu quihví ra. ¹² Ra Cristo quihví ra tsitsi Vehe Ii Xaan. Maa tyin ña quihví ra tsihin tsa jamañi ra niñi mbee lee, o niñi indiqui lee. Quihví ra tsihin niñi maa ra, tan iin tsaha ñi quihví ra tan ña cuñí ca tsi tsa cuenda quihví ñi ra tyin jamañi ra niñi maa ra. Tsihin yacan jacacú cuii ra tsi yo. ¹³ Ra jutu naha ra tuhvá ra naha quití niñi toro, niñi mbee, tan nyaa nu cayú indiqui lee tsi nyivi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá añima ñi. ¹⁴ Tun tacan jatyinyee niñi quití can tsi nyivi, cuñí tsi catyí tyin niñi ra Cristo cahnu ca tunyee iñi iyó itsi! Tyin nduve cuatyí ra tsicoo tan jamañi ra juvin ñi tsi maa ra nuu Nyoo jahá Tatyí Ii tsa ña cua cúu maa. Tan niñi ra quihín nyaa tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsiihí tsi yo, tan cuví jaha tyiñu yo tyiñu Nyoo nyito.

¹⁵ Yacan cuenda ra Jesucristo cuví ra caahán ndaahvi

tsaha yo tsa cuenda tuhun tsa tsa ndoo Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javaha yo quivi yihí ndaha tuhun jihna ñi can tsi yo. Tyin tacan tan yoo, tsa cana Nyoo cuvi naquihin cuenda yo ñayivi tsa ña cua naa maa coo yo, tsa catyí ra tyin cuhva ra tsi yo. ¹⁶ Tun iin nyivi tsihi tan nacoq ñi iin tutu nu tsahá cuenda ñi yoo nyivi cua naquihin tsa iyó tsi ñi, nyivi tsa cua naquihin ndaha tyiñu can cuví naquihin ñi can, maa tyin cuñí tsi janaha ñi iin tutu cuví tsandaa tyin nditsa tsa tsa tsihi ra tsa javaha tutu can. ¹⁷ Maa tyin tun ndi nyito ra jatsii ndaha tyiñu can, ña cuvi naha naquihin ñi ndaha tyiñu ra. ¹⁸ Yacan cuenda quivi ndoo Nyoo tuhun tsahnu can tsihin nyivi Israel, tsahñi ra jutu naha ra quití tan tsatí ñiñi ti naha ti. ¹⁹ Tsa ndihi tsaha cuenda ra Moisés ley Nyoo tsi tandihi nyivi, tan quihin ra jahma cuaaha tsa tsinu tsihin ixi mbee ticatyí tan iin soco yutun luhlu tsa nañí hisopo, jatyií ra can tsitsi nu yihí ñiñi indiquí lee tan ñiñi mbee luhlu tsa saca nuu tsihin ndutya. Tacan tan quití ra ñiñi can nu libru nu nyaá ley Nyoo tan quití ndihi tucu ra can tsi nyivi. ²⁰ Tacan tan catyí ra tsihin ñi tyehen: “Ñiñi ihya cuví tsandaa tsa cuenda tsa ndoo Nyoo tuhun tsihin yo”, catyí ra. ²¹ Tan juvin ñi quití tucu ra Moisés ñiñi can vehe ñuhu jahma can

tan tandihi ndaha tyiñu tsa tsatyíñu ra jutu naha ra tsa jacahnú ra naha tsi Nyoo. ²² Tacan javaha ra naha tyin catyí ley Nyoo tyin tsa yatyin tandihi tsa iyó tan cuñí tsi nduvaha can nuu Nyoo tsihin ñiñi. Juvin ñi catyí tucu tsi tyin tun ña cati ñiñi ña cua jaha Nyoo tucahnu iñi tsi nyivi.

Niñi ra Cristo nacatyá cuatyí yo

²³ Javaha ra jutu naha ra tacan tyin cuñí tsi tsa nduvaha tandihi ndaha tyiñu tsa cuví tixahñu tsa iyó nda gloria tsihin ñiñi quití. Maa tyin tandihi tsa iyó nda gloria, cuñí tsi nduvaha can tsihin ñiñi vaha ca, ñavin tsihin ñiñi quití ñi. ²⁴ Ra Cristo ña quihví ra tsitsi vehe ñuhu tsa javaha nyivi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tsihin Nyoo tsa cuenda yo. ²⁵ Ra jutu tsahnu cuví ityi nuu cuenda nyivi Israel quihví ra naha tsitsi Vehe Ii Xaan iin tsaha ñi tsa iin iin cuiya tyin jamañi ra naha ñiñi tsa ñavin ñiñi maa ra naha cuví. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo. ²⁶ Tun tsatyin tacan, cuñí tsi tsa cuenda quitsi ñi ra nyehe ra tundocho tan cúu ra nda tsa tsinu ñuhu ñayivi tan nda cuenda vityin. Maa tyin vityin tsa tsa cuyatyin cundihí ñuhu ñayivi ihya, iin tsaha

ñi quitsi ra Cristo, tan jamañi ra tsi ra tyin tacan tan cuví quihin nyaa ra cuatyí yo. ²⁷ Tumaa cua tahan yo: iin tsaha ñi cua cúu yo. Yaha can tan cua cutuñi yo. ²⁸ Tacan iin tsaha ñi tsihi ra Cristo, tan quihin nyaa ra cuatyí cuaha xaan nyivi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cuatyí, tyin cua quitsi ra quitsi jacacu ra tsi nyivi ndatú tsi ra.

10

¹ Ley Nyoo tsa tyaá ra Moisés cuví tsi tumaa iin tixahñu tsa vaha ca tsa cua quitsi. Tsa catyí ley can, ña cuví janduvaha tsi tsi nyivi nanducú tsi Nyoo tyin maa ñi maa niñi quiti jamañi ra jutu tsahnu cuví ityi nuu naha ra tan iin tan iin cuiya. Tan ña cuví cacu yo tsihin yacan. ² Tun tsatyin cuví janduvaha ley can tsi nyivi, cua cundihi tsa jamañi ra jutu naha ra niñi quiti tandihi ñi cuiya. Tyin tun tsa nduvahá nyivi tsa tsahá quiti can iin tsaha tsa cuenda tandihi maa, ña cua caca ca iñi ñi tun iyó cuatyí ñi tan ña cuñi ca tsi tsa jamañi ra jutu niñi quiti tsa cuenda ñi inga tsaha. ³ Maa tyin tsa jamañi ra jutu naha ra niñi quiti tan iin tan iin cuiya, janducuhún iñi tsi tsi nyivi tyin iyó cuatyí ñi. ⁴ Tyin niñi indiqui tan niñi mbee lee, ña cuví nacatya can cuatyí nyivi.

⁵ Yacan cuenda catyí tutu Nyoo tyin ra Cristo cañan ra

tyehen tsihin Nyoo:

Ña cuñi un tsa jamañi nyivi quiti nuu un,

yacan cuenda tsahá un tsa coo cuñu ñuhu yu.

⁶ Tyin ña taahán iñi un tsa cahmi ñi quiti tan jamañi ñi nuu cun tan quihin nyaa un cuatyí ñi.

⁷ Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñi maa un tumaa nyaá tuhun yu nu libru ley maa un”, catyí ra Jesucristo.

⁸ Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyivi quiti nuu ra. Ndi tsa cahmi ñi quiti tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñi tsi jamañi nyivi quiti nuu ra, catyí ra. ⁹ Yahá can tan catyí tucu ra: “Nyoo Jutu yu, va yu ihya, vatsí yu vatsí javaha yu cuhva cuñi maa un.” Tuhun ihya cuñi tsi catyí tyin quitsi ra jatsiyó cuii ra tsa jamañi nyivi tan jamañi ra tsa vaha ca. ¹⁰ Tsa cuenda tsa javahá ra Jesucristo cuhva cuñi jutu ra tan janduvahá jutu ra tsi yo. Tsa javahá ra cuvi tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyivi.

¹¹ Tandihí ñi quivi tan jamañi ra jutu cuenda nyivi Israel naha ra quiti nuu Nyoo, tan cuaha xaan tsaha jamañi ra naha iin ñi maa nuu quiti maa tyin ña cuvi quihin nyaa

can cuatyí nyívi. ¹² Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaa ra nu tyayu nyaá xiin cuaha Nyoo. ¹³ Tan ndatú ra nda cuanda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu. ¹⁴ Tyin tsihin tsa jamañi ra tsi ra iin tsaha ñi tan janduvaha ra tsi nyívi yihí cuenda ra yoso cuahán quívi. ¹⁵ Tatyí li Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

¹⁶ Tuhun tsa tsa cua ndoo yu tsihin nyívi quívi can, tyehen cua cuvi tsi, catyí Jutu Mañi yo:

Cua tyihi yu ley yu tsitsi añima ñi,

tan cua tyaa yu itsi tsitsi tsa tsiñi tuñi iñi ñi, catyí ra.

¹⁷ Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

¹⁸ Yacan cuñí tsi catyí tyin tsa yaha jaha Nyoo tucahnu iñi tsi yo. Yacan cuenda ña cuñí ca tsi cahñi yo quití, tan jamañi yo nuu Nyoo tsa cuenda cuatyí yo.

Cuñí tsi nanducu yo tsi Nyoo

¹⁹ Yacan cuenda yañi, vi-tyin cuví quihvi yo tsitsi Vehe li Xaan nu nyaá Nyoo, tsa cuenda niñi ra Jesucristo tsa tsati. Tsihin niñi can nacatya ra cuatyí yo. ²⁰ Tan nuña ra ityi tsa, tan iin ityi cahun yo nu coo nyito yo. Tyin

cuhva tsa tsihi ra tan ndata jahma tsa tyasí tsa ña cuví quihvi yo nu nyaá Nyoo. Tsa ndata jahma can, cuví tsa tsihi ra Cristo, tyin tacan tan cuví cahun yo nu nyaá Nyoo.

²¹ Ra Jesús cuví jutu tsaahnu cuví ityi nuu tsa ndacá ñaha tsi nyívi yihí cuenda Nyoo.

²² Yacan cuenda cuñí tsi nanducu yo tsi Nyoo tsihin tsa nditsa tan tsihin tsa ñi iñi añima yo tsinú iñi yo tsi ra. Tyin maa ra janduvaha añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatya ra cuñu ñuhu yo tsihin ndutya cuii, tan nduvaha yo nuu Nyoo.

²³ Na ndu iin ca iñi yo tsinú iñi yo tsi Nyoo tan na ña ndu uvi iñi yo, tyin Nyoo cua kuhva ra tsa catyí ra tyin kuhva ra tsi yo. ²⁴ Tan cuñí tsi nanducu yo kuhva jatinyee tahan yo tsi yo, na cuñi tahan ca yo tsi yo tan javaha yo tsa vaha.

²⁵ Ña taahán tsi jandihí ndo tsa tsicá ndo tuhun Nyoo tumaa javahá inga nyívi tsa ña tsicá vaha. Tyin cuñí tsi jandu iin tahan yo iñi yo. Vityin tsa tsa nyehé yo tyin tsa cuyatyin quitsi nyico Jutu Mañi yo tan cua jacutuñi ra tandihí nyívi, cuñí tsi tsa jatinyee tahan ca yo tsi yo.

²⁶ Tyin tun tsa tsitó yo tsa nditsa tan javaha ca maa yo tsa ña vaha, nduve ca nácaa javaha yo tan cuví jaha Nyoo tucahnu iñi tsi yo. ²⁷ Cua tatsi tuñi Nyoo tsi yo. Tan cua tyihi ra tsi yo nu yucú

nyivi xaan iñi tsi ra. Tan ican
 cua cayu yo iin caa ñi tsihin
 ñi. ²⁸ Tatum iin nyivi tsa ny-
 itá iñi ley Nyoo tsa tyaa ra
 Moisés tan ña tyaá yahvi ñi
 tsa catyí ley can, tan tatum iyó
 uvi o uñi ra cuví tsandaa tsa
 cuenda tsa javaha ñi, cua cúu
 ñi tsa cuenda cuatyí ñi, tan
 yofñi maa cua cundaahví iñi
 tsi ñi. ²⁹ Tan yaha ca cua tatsi
 tuñi Nyoo tsi nyivi caahán
 ndavaha ñi siqui Tatyí li ra tsa
 tsahá tsa vaha ra tsi yo, tan
 jandihí ñi tsa tsinú iñi ñi tsi
 Sehe ra tan jahá ñi tyin nduve
 yahvi nyaá niñi Sehe ra tsa
 janduvaha ñi añima ñi. Tan tsi-
 hin niñi can ndoo Nyoo tuhun
 tsihin yo. ³⁰ Tsitó yo tyin catyí
 Jutu Mañi yo tyeheh: “Maa yu
 taahán tsi tatsi tuñi tsi nyivi;
 tan juvin yu cua cahan náa
 taahán tsi tahan ñi.” Juvin
 ñi catyí tucu ra tyin maa ra
 taahán tsi jacutuñi tsi nyivi ra.
³¹ ¡Cahnu xaan tundoho cua
 nyehe nyivi yosó ica tsi Nyoo
 nyito tsa cuenda cuatyí ñi!

³² Maa tyin nyooho
 nducuhun iñi ndo nácaa cun-
 yee xaan iñi ndo nyehe ndo
 tundoho tsa yaha naquihín
 cuenda ndo tsa nditsin Nyoo
 tsitsi añima ndo. ³³ Yihí
 nyooho cahan nyivi tsi ndo,
 tan janyehé ñi tundoho tsi
 ndo nu tuvi nyivi. Tan yihí
 ndo cundaahví iñi ndo nyehe
 ndo tsi nyivi vaha iñi tsi
 ndo tsa tahan juvin ñi tacan.
³⁴ Tan cundaahví iñi ndo
 nyehe ndo tsi nyivi tsiyucu
 vehe caa. Cunyee iñi ndo
 nyehe ndo tundoho tsihin

tsa sñi cuñí ndo quivi quihín
 nyaa nyivi ndaha tyiñu ndo,
 tyin tsitó ndo tyin gloria iyó
 tsa vaha ca tsa cuenda ndo,
 tan yacan ña cua cundihi
 maa can. ³⁵ Yacan cuenda ña
 jandihí ndo tsa nyitá iñi ndo
 tsi ra Cristo, tyin nu cuahán
 ca tsi tan cua ñihi ndo tsa
 vaha ca tyin tsinú iñi ndo tsi
 ra. ³⁶ Cuñí tsi coo tsa taxin
 añima ndo tsitsi tsa cunyee
 iñi ndo tyin tacan tan cuví
 javaha ndo cuhva cuñí Nyoo,
 tan naquihin ndo tsa catyí ra
 tyin cuhva ra tsi yo. ³⁷ Tyin
 nu tutu Nyoo catyí tsi tyeheh:

Ña naha ca
 tan quitsi ra tsa nyaá quitsi,
 tan ña cua cucuee ca
 ra.

³⁸ Tan catyí Jutu Mañi yo tye-
 hen: “Nyivi naquihín
 cuenda yu tumaa
 tsatyin vaha ñi, tsihin
 tsa tsinú iñi ñi tsi yu
 tan cua coo nyito ñi.

Maa tyin tatum jandihí ñi tsa
 tsinú iñi ñi, ña sñi cua
 cuñi yu tsihin ñi”, catyí
 Nyoo.

³⁹ Maa tyin yoo ña javahá yo
 tumaa javahá nyivi jandihí
 tsa tsinú iñi tsi Nyoo, tyin yoo
 tacan ñi maa tsinú iñi yo tsi ra
 tan tsa cuenda tsa tsinú iñi yo
 cua cacu añima yo.

11

*Cuhva cuñí tsi tsa tsinu iñi
 yo tsi Nyoo*

¹ Tsa tsinú iñi yo tsi Nyoo
 cuví tsa tsitó vaha yo tyin cua
 ñihi yo tsa ndatú yo; tan tsitó
 vaha yo tyin cua ñihi yo iin
 tsa nditsa tsa ñaha ca nyehe

yo, tyin tsinú iñi yo tsi Nyoo.
 2 Juhva nyivi yo tsa tsicoo tahañ tsanaha quita vaha ñi nuu Nyoo tyin tsinú iñi ñi tsi ra.

3 Tsa cuenda tsa tsinú iñi yo tsi Nyoo, tan tsitó yo tyin javaha ra ñuhu ñayivi tsihin tuhun caahan ra. Tan tsitó yo tyin tahañ tsanaha tsinu tandihi tsa nyehé yo vityin tsihin tsa ña nyehé yo.

4 Tsa cuenda tsa tsinu iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihin cuenda Nyoo tsi ra tumaa tsatyin vaha ra, tan naquihin cuenda tucu ra tsa jamañi ra. Vasu ndi maa ña nyito ca ra Abel, maa tyin tsiñi yo nácaa tsinu iñi ra.

5 Tsa cuenda tsa tsinu xaan iñi ra Enoc tsi Nyoo, tan naquihin Nyoo tsi ra tyin tacan tan ña nyehe ra tuhun tsihi. Tan ña nañihi ca nyivi tsi ra, tyin cuanuhu ra tsihin Nyoo. Catyi tsi nu tutu Nyoo tyin tsa ndi cumañi ca naquihin Nyoo tsi ra, maa ñi maa cuhva taahan iñi Nyoo javaha ra. 6 Maa tyin ña cuvi javaha yo tsa taahan iñi Nyoo tatun ña tsinú iñi yo tsi ra. Tyin tatun cuñi yo nanducu yo tsi ra, cuñi tsi tsinu jihna iñi yo tyin iyó ra, tan tsahá ra tsa vaha tsi nyivi nanducú tsi ra.

7 Tahañ tsanaha jacoto Nyoo tsi ra Noé náa cua cuvi ityi nuu. Vasu ndi maa ñaha ca coo can nyehé ra Noé, tsinu iñi ra tan javaha ra yutun ndoo tan ican cacu ra

tsihin nyivi vehe ra. Nyivi tsa ña tyaa yahvi tsa cahan Nyoo, tatsi tuñi ra tsi ñi. Maa tyin jacacu ra tsi ra Noé tan nduvaha ra nuu ra tsa cuenda tsa tsinu iñi ra tsi ra.

8 Ra Abraham tsinu iñi ra tan tyaa yahvi ra tsi Nyoo quivi cana Nyoo tsi ra. Quita ra nu ñuhu ra tan cuahan ra nu ñuhu tsa cua cuhva cuii Nyoo tsi ra. Vasu ndi maa ña tsitó ra nu maa cuahan ra, maa tyin quita ra nu ñuhu ra tan cuahan ra. 9 Tsa cuenda tsa tsinu iñi ra Abraham tsi Nyoo, tsicoo ra nu ñuhu tsa ñaha ca nacuhva cuenda Nyoo tsi ra. Tsicoo ra tsitsi vehe jahma ñi. Juvín ñi tacan tsicoo tucu ra Isaac, sehe ra, tan ra Jacob, sehe ra Isaac. Tyin juvin ñi catyi tucu Nyoo tsihin nduvi taahan ra can naha ra tyin cua cuhva ra ñuhu can tsi ra naha. 10 Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatu ra maa Nyoo tsaquin cuhva tsaha tsi tan samañ itsi.

11 Tan juvin ñi tsa cuenda tsa tsinu iñi ña Sara tsa cahan Nyoo tsihin ña, tsicoo iin sehe ña. Vasu ndi maa tsa tsahnu xaan ña, cuvi tsicoo sehe ña tyin maa Nyoo tsaha tunyee iñi ra tsi ña. Tacan cuvi tyin tsinu iñi ña tyin cua cunda tsa cahan Nyoo tsihin ña. 12 Yacan cuenda vasu ndi maa tsa cuñi cúu cuii ña ra Abraham, maa tyin tsicoo sehe ñasahi ra. Yaha can tan tsicoo cuaha nyivi tata ra. Tan yoñi maa cuvi nacahvi tsi ñi tyin cuaha xaan ñi, tumaa

cuaha tiñuu iyó andiví tan tumaa cuaha nyiti iyó yuhu ndutya ñuhu.

13 Tandihí nyivi can tan nyivi tata ñi tsihi ñi tsa ndi cumañi ca naquihin cuenda ñi tsa catyi Nyoo tsihin ñi tyin cuhva ra tsi ñi. Vasu ndi maa ña ñihí ñi can, tsinu iñi ñi tyin cua cuhva Nyoo can. Yacan cuenda siñi cuñí ñi tyin tsitó ñi tyin coo quivi cua nyehe ñi can. Tan siñi tucu cuñí ñi caahán ñi tyin yahá ñi maa ñi nu ñuhu ñayivi ihya. 14 Tan tsa caahán ñi tacan, cuñí tsi catyi tyin ndi tsicá ñi nanducú ñi iin nu vaha ca coo ñi. 15 Tun tsatyin ñuhú iñi ñi ñuu ñi nu quitá ñi, cuví cunuhu nyico ñi iin yaha ñi. 16 Maa tyin ña tsinuhu ñi ñuu ñi tyin cuñí ñi coo ñi ñuu vaha ca, tuhun ihya cuñí tsi catyi tyin cuñí ñi coo ñi nda andiví. Tan tsa tacan nducú ñi coo ñi nda gloria, ña cahán nuu Nyoo tsa cuví ra Nyoo ñi tyin tsa janduvahá ra iin ñuu nu coo ñi.

17 Tsa cuenda tsa tsinu iñi ra Abraham tsi Nyoo, tyaa yahvi ra tsa cahán Nyoo tsihin ra tan jamañi ra tsi ra Isaac, sehe mañi ra, quivi nducú cuhva Nyoo tsi ra tun nditsa tsa tsinú iñi ra tsi ra. Javahá ra tacan vasu ndi maa catyi Nyoo tyehen tsihin ra: 18 “Tsa cuenda ra Isaac tan cua coo nyivi tata un.” 19 Vasu ndi maa cahán ra tacan tsihin ra Abraham, ra Abraham ña nayuhvi ra tsa cuhva cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quivi

can tsa nyaá ra Abraham tsa cahñi ra tsi ra Isaac, sehe ra. Maa tyin Nyoo nacuhva cuenda nyico ra tsi ra Isaac tsi ra. Tan cuví can tumaa tsa janandoto Nyoo tsi ra.

20 Juvín ñi tsa cuenda tsa tsinu tucu iñi ra Isaac tsi Nyoo, tan catyi ra tyin ra Jacob tan ra Esaú, sehe ra, cua ñihí ra naha tsa vaha nu cuahán ca tsi. 21 Tsa cuenda tsa tsinu iñi ra Jacob tsi Nyoo, tan catyi ra tyin nduvi taahan sehe ra José cua ñihí ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnu ra tsi Nyoo tyin tsa tsahnu xaan ra. 22 Juvín ñi tsa cuenda tsa tsinu iñi ra José tsi Nyoo, catyi ra tsa tsa cuñí cúu ra tyin cua quita nyivi ra, ñi Israel, ñuhu Egipto. Tan tsahá cuenda tucu ra tsi nyivi tyin quivi quita ñi na quihin ñi yiqui ra cahun tsihin ñi.

23 Tsa cuenda tsa tsinu iñi jutu ra Moisés tan sihi ra tsi Nyoo, tyihí xeehe ñi tsi ra uñi yoo tyin nyehe ñi tyin siñi xaan caá ra. Ña nayuhvi ñi tsa cahán ra rey tyin cuñí tsi cúu tandihí sehe yñi nyivi [tsa cuenda tyin tsitó ñi tyin cua jacacu Nyoo tsi ra]. 24 Tsinu tucu iñi ra Moisés tsi Nyoo. Yacan cuenda quivi tsahnu ra, ña cuñi ca ra cuvi ra sehe ñaha cuví sehe ra rey ñuhu Egipto. 25 Tan nacoó ra ñuhu Egipto can tyin ña cuñí ra cusñi iñi ra tsihin tsa javaha ra tsa caquiñi. Tan nacatsi ra tsa cua nyehe ra tundoho tsihin nyivi Nyoo tan ñavin

ca tsa cusii iñi ra tsihin tsa tsindihí ñi maa. ²⁶Tsa cuenda ra Moisés, vaha ca tsa cuca ra Cristo tan ñavin ca tandihí tsa cuca tsa iyó Egipto. Yacan cuenda sii cuñi ra nyehe ra ticanuu tsa cuenda ra Cristo tyin tsitó ra tyin cua ñihi ra tsa cua kuhva Nyoo tsi ra. ²⁷Juvin ñi tsa cuenda tsa tsinu iñi ra Moisés tsi Nyoo, ña nayuhvi ra quita ra ñuhu Egipto, vasu ndi maa cuxaan ra rey tsi ra. Tan cunyeē xaan iñi ra tyin tumaa tsatyin nyehe ra tsi Nyoo tsa ña nyehé yo.

²⁸Juvin ñi tsa cuenda tsa tsinu iñi ra tava tyiñu ra na jacahnu tandihí nyivi Israel vico tan cahñi ñi iin mbee ticatyí luhlu. Tan tava tyiñu tucu ra na cahyi ñi niñi mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu nyivi Egipto, ña cahñi ra ndi intuhun sehe nuu maa ñi. ²⁹Tsa cuenda tsa tsinu iñi ñi Israel tsi Nyoo tan yaha sava ñi nu Ndutya Ñuhu Cuaaha tumaa nu ñuhu ityi. Ra Egipto naha ra cuñi ndihi tucu ra naha yaha ra naha, maa tyin ña cuvī yaha ra naha tyin nacasi Nyoo ndutya ñuhu can siqui ra naha tan tsihi ra naha jaha ndutya can.

³⁰Juvin ñi tsa cuenda tsa tsinu iñi ñi tsico nduvi ñi utsa tsaha tsata ñuu Jericó, tan tandihí cuii maa nu sama tsaha ñuu can tani. ³¹Juvin ñi tsa cuenda tsa tsinu iñi ña Rahab, ñaha sii iñi tsica nuu tsa tsicoo Jericó, tan ña tsihi ña quivi tsihi tandihí

nyivi ñuu ña. Ña tsihi ña tyin jatyinyee ña tsi ra Israel ra tsa tsahan naha ra tsinyehe ñuu ña. Tandihí ca ñi tsihi ñi tsa cuenda tsa ña tyaa yahvi ñi tsi Nyoo.

³²¿Náa ca cua cahan yu vityin? Tyin ña cuyatyí yu cahan yu tuhun tandihí ra naha, tumaa ra Gedeón, ra Barac, ra Sansón, ra Jefe, ra David, tan ra Samuel, tan ra cuvī ndusu yuhu Nyoo naha ra tahan tsanaha. ³³Tsa cuenda tsa tsinu iñi ra naha tsi Nyoo, tan yihí ra naha jaha canaa ra naha tsi inga ñuu nahnu. Tan yihí ra naha vaha xaan tsindaca ñaha ra naha nyivi cuenda Nyoo. Yihí ra naha ñihi ra naha tsa catyi Nyoo tyin kuhva ra tsi ra naha. Yihí ra naha jatyinyee Nyoo tsi ra naha quivi nducu cahñi ndicaha tsi ra naha. ³⁴Yihí ra naha ña cayu ra naha jaha ñuhu tsitsi ono nu tyihí nyivi tsi ra naha. Yihí ra naha cacu ra naha tan ña tsahñi nyivi tsi ra naha tsihin mityi. Yihí ra naha tsaha Nyoo tunyee iñi tsi ra naha quivi nduve tunyee iñi tsicoo tsi ra naha, tan cuvī cañi tahan ra naha tsihin nyivi xaan iñi tsi ra naha tan jaha canaa ra naha tsi ñi. ³⁵Tsicoo juhva ñiñaha, tsa nandoto nyivi.

Juhva nyivi tsinuhñi ñi tan ndoho ñi jaha nyivi, maa tyin vasu ndi maa tacan tahan ñi, cunyeē xaan iñi ñi tan ña cuñi ñi ndoo nuña ñi. Nyivi can catyi ñi tyin tun nacoo ñi tsi

Nyoo ña cua nyehe ca ñi tundoho, maa tyin ñi ican ña cañi ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayivi vaha ca. ³⁶ Inga ñi nyehe ñi tundoho jahá nyivi tyin caahán nyaa nyivi can tsi ñi tan cañi ñi tsi ñi. Inga tucu ñi tsinuhñi ñi tsihin cadena tan tsiyucu ñi vehe caa. ³⁷ Yihí ñi tsahñi nyivi tsi ñi tsihin yuu. Yihí ñi tsahnya sava nyivi tsi ñi tsihin cierra. Yihí ñi nducu cuhva nyivi tsi ñi. Yihí ñi tsahñi nyivi tsi ñi tsihin mityi. Yihí ñi tsinditsi ñi ñi mbee ticatyi tan ñi mbee; nduve jahma vaha ñi tsicoo tan ndi nduve vehe ñi. Ndaahvi xaan tsicoo ñi, tan tsicoo xaan ñi tucuiihya iñi, tan nyehe ñi tundoho jahá nyivi tsa ña tsitó tsi Nyoo. ³⁸ Tan nyivi ndaahvi can vaha ca ñi nuu Nyoo tan ñavin ca inga ca nyivi. Tsiçá nuu ndaahvi ñi nu tsiqui tan nu iyó yucu. Tsicoo ñi tsitsi cava tan tsitsi ñuhu. ³⁹ Tandihí maa nyivi ndaahvi can vasu ndi maa vaha cahán Nyoo tuhun ñi tsa cuenda tsa tsinu iñi ñi tsi ra, maa tyin ña ñihí ñi tsa catyi ra tyin cuhva ra. ⁴⁰ Tyin cañi ra tsa ñihí ndihí ñi tsa vaha ca tsa tyaa ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

12

Na cuita iñi yo tsi intuhun ñi maa ra Jesús

¹ Tandihí nyivi can quita vaha ñi nuu Nyoo tyin tsinu iñi ñi tsi ra. Tan vityin jandu iñi ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cañi tsi nacoo yo tandihí tsa jatyañú tsi yo, tan tandihí cuatyí tsa tuhvá jandavi ñaha tsi yo. Tan na cunyeé iñi yo cuhun yo ityi nuu ca tsihin Nyoo tsihin tsa taxin iyó añima yo. ² Na nyehe yo tsi intuhun ñi maa ra Jesús tyin juvin ra jatyinyeé tsi yo tsa tsinú iñi yo tsi ra, tan tsahá tucu ra tandihí cuhva taahán tsi tsinu iñi yo. Ra Jesús cunyeé xaan iñi ra nyehe ra tundoho tan ña tyaa yahvi ra ticanuu tsa cua tahan ra tsa cúu ra nu cruu tumaa tsihi iin nyivi iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumañi ca cúu ra, tan tsa tsitó maa ra tyin si xaan cua cañi ra tsa yaha cúu ra.

³ Jahá ndo cuenda cuhva tsicoo ra Jesús, tyin ra Jesús nyehe xaan ra tundoho jahá nyivi iyó cuatyí, maa tyin cunyeé iñi ra. Tacan tucu nyooho, ña cundihi iñi ndo tan ña ndu uvi iñi ndo tsa nyicún ndo tsi ra. ⁴ Tyin nyooho ñaha ca nyehe ndo tundoho tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi. ⁵ ¿A tsa naa iñi ndo nácaa jaquihín ityi Nyoo tsi yo tsa cuví yo sehe ra? Catyí ra nu tutu ra tyehen:

Sehe luhlu yu, ña cuxaan un
tatum tsahá cuenda yu
tsi un nácaa taahán tsi
javaha un.

Tan ña nducuihya iñi un
tatum cuxaán yu tsi un.

⁶ Tyin yuhu jaquihín ityi yu
tsi nyivi cuñi yu, tan
tatsi tuñi yu tsi nyivi
cuví sehe yu, catyí
Nyoo.

⁷ Janyee ndo iñi ndo tan
nducu ndo cuhva cutuhva
ndo tun jaquihin ityi Nyoo
tsi ndo. Tyin Nyoo, jaquihín
ityi ra tsi sehe vaha ra tumaa
javaha tandihi nyivi iyó sehe,
jaquihín ityi ñi tsi sehe ñi.

⁸ Tyin tatum ña jaquihín ityi
Nyoo tsi yo, ñavin sehe vaha
ra cuví yo. Maa tyin tatum
jaquihín ityi ra tsi yo, juvin
sehe vaha ra cuví yo. ⁹ Tan
inga tucu tuhun, tsa ndi nyihi
yo, jutu yo nu ñuhu ñayivi
ihya jaquihín ityi ra naha tsi
yo, tan jahā yo tsa ñayivi tsi
ra naha. Tan vihi ca cuñi
tsi tyaa yahvi yo tsi Jutu yo
Nyoo, tyin tacan tan cuvi coo
cuii yo. ¹⁰ Jutu yo tsa iyó
nu ñuhu ñayivi ihya, jaquihín
ityi ra naha tsi yo tsa cuenda
juhva ñi quivi, tan javahá ra
naha can cuhva cuñi maa ra
naha tyin vaha tsa cuenda
yo. Maa tyin Nyoo jaquihín
ityi vaha ca ra tsi yo, tan
tsahá ra tsa ndu ii yo tumaa
ii maa ra. ¹¹ Nditsa tyin
tsa ndi cuxaán Nyoo tsi yo
nyehé yo tundoho. Maa tyin
tun cutuhva yo javaha yo
tsa vaha tsihin tsa nyehe yo
tundoho can, cua quita vaha
yo.

*Ica xaan tun ña tyaa yahvi
yo tsa caahán Nyoo tsihin yo*

¹² Yacan cuenda ña ndu uvi
iñi ndo tsa javaha ndo tsa
cuñi Nyoo javaha ndo, tan ña
nducuihya iñi ndo. ¹³ Nducu
ndo cuhva coo vaha ndo tsi-
hin Nyoo, tan cuhva caca
vaha ndo tsihin ra. Tyin
tacan tan cuhva ra tunyee iñi
tsi ndo tan nduvaha ndo nuu
ra tan ña cuihya ca cua cuñi
ndo.

¹⁴ Jañiñi ndo tsi ndo tan
coo vaha ndo tsihin tandihi
nyivi. Nacoo ndo tandihi tsa
ña vaha. Tyin nyivi tsa ña na-
coo tsa ña vaha ña cuvi nyehe
ñi tsi Nyoo Jutu yo. ¹⁵ Jaha
cuenda vaha ndo tsi ndo tyin
tacan tan ña ndoo ihñi ndi
intuhun ndo tyin tandihi ndo
tan cua ñihi ndo tunyee iñi tsa
tsahá Nyoo, tan ña cua ndoo
tsa xaan tsitsi añima ndo tan
ña cua tiví ndo nuu Nyoo,
tyin jahá cuenda vaha ndo
tsi ndo. ¹⁶ Nyooho rayi ndi
intuhun ndo tan ña caca nuu
ndo tsihin ñaha. Tacan tucu
nyooho ñaha, ña caca nuu ndo
tsihin rayi. Tan ña caca iñi
ndo tyin nduve yahvi nyaá
tuhun Nyoo, tumaa tsicā iñi
ra Esaú, tyin ra Esaú xico ra
tsa cuví ra ra tsitsa tsacatyí
tsa catsi ra. ¹⁷ Tsitó ndo tyin
tsa yaha yacan tan cuñi ra
Esaú tsa nasoco jutu ra tsi
ra, maa tyin ña cuví. Tsacu
xaan ra, maa tyin ña ñihí ca ra
cuhva nasama ra tsa tsa yaha
javaha ra.

¹⁸ Nyooho ña taahán tsi
javaha ndo tacan tyin tsaá
ndo nuu Nyoo, maa tyin
ñavin tumaa tsaá nyivi Israel

nuu Nyoo quivi tsahan ñi yucu Sinaí tsa cuví nyehe yo. Nyehe ñi cayu ñuhu, tan ñihi xaan yihí tatyí xaan, tan naa xaan cuví. ¹⁹ Tan tsiñi ñi ndusu trompeta tan cahan Nyoo tsihin ñi. Tan cahan ndaahvi ñi tsihin ra na ña cahan ca ra tsihin ñi, tyin yuuhví xaan ñi ²⁰ tsa cuenda tyin ña cunyeë iñi ñi tsa tsaha cuenda ra tsi ñi Tyin catyí ra tyehen: “Nyivi natuhva tan cuañi tsaha yucu ihya cahñi ndo tsi ñi tsihin yuu o tsihin lanza, tahan ñi nyivi tan quití”, catyí Nyoo tsihin ñi. ²¹ Nayuhví xaan ñi tsa nyehe ñi yacan, nda cuanda ra Moisés tan catyí ra: “Ñihi xaan nihí yu jahá tsa yuuhví yu”, catyí ra.

²² Maa tyin nyooho ña nyehe ndo tsa yuuhví can tyin tsaá ndo yucu nañi Sión tsa cuví ñuu Nyoo nyito. Tuhun ihya cuñi tsi catyí ñuu Jerusalén tsa canyíí nda gloria, nu iyó cuenda mil ángel. ²³ Ndu iin ndo ican tsihin tandihí sehe Nyoo tsa iyó sivi nu libru nda gloria tan jacahnu ndo tsi ra. Natuhvá ndo nuu Nyoo, ra cuví juee [tsa jandaa cuatyí] tandihí nyivi, tan natuhvá ndo nuu tandihí añima nyivi vaha tsa janduvahá Nyoo. ²⁴ Natuhvá tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndoo Nyoo tuhun tsaá tsihin yo. Tan niñi ra Jesús tsa tsatí tsahá tsa vaha ca tsi yo tan ñavin ca niñi ra

Abel. [Tyin niñi ra Abel tsican tsi cuatyí tsaha ra yañi ra. Maa tyin niñi ra Jesús, jahá tucahnu iñi cuatyí yo.]

²⁵ Yacan cuenda cuñi tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahan juhva nyivi Israel tsa ña tyaa yahvi tsa cahan Nyoo quivi cahan ra yucu Sinaí nu ñuhu ñayivi ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuví maa cacu yo. ²⁶ Tahan tsanaha jacanda Nyoo ñuhu ñayivi tsihin ndusu ra. Tan catyí ra tyehen vityin: “Cua jacanda yu iin tsaha ca ñuhu ñayivi, maa tyin ñavin ñuhu ñayivi ñi, tyin cua jacanda ndihí yu nda cuenda andivi.” ²⁷ Tsa caahán ra tyin cua jacanda ra inga tsaha, cuví cutuñi iñi yo tyin cua catiyo tandihí tsa javahá ra tsa cuví nacanda. Tan cua ndoo tsa ña cuví nacanda. ²⁸ Nu ndacá ñaha Nyoo nu tsahá ra cunyecú yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa niñi iñi añima yo, tan tyaa yahvi yo tsi ra, tyin yacan cuví tsa taahán iñi ra. ²⁹ Tyin Nyoo yo cuví ra tumaa ñuhu tsa tsahmí, tan cua janaa ra tandihí maa tsa ña vaha.

13

Na coo yo cuhva taahán iñi Nyoo

1 Ña jandihí ndo tsa cuñí ndo tsi tandihí nyiví yihí cuenda Nyoo tyin cuví ñi tumaa nyiví ndo. 2 Ña ñaa iñi ndo tyaa nuu vaha ndo tsi nyiví tsaá vehe ndo, tyin tun javaha yo tacan nda cuanda cua cuhva yo nu coo ángel Nyoo, vasu ndi maa ña tsitó yo tun ángel cuví ra naha tumaa javaha juhva nyiví.

3 Ña ñaa iñi ndo tsi nyiví yucú vehe caa tumaa tsatyin yucú ndihí ndo tsihin ñi. Nducuhun iñi ndo tsi nyiví nyehé tundoho jahá nyiví. Cundaahvi iñi ndo tsi ñi tan jatyinyee ndo tsi ñi. Tyin tsitó ndo nácaa cuñí yo tun nyehe yo tundoho.

4 Nyooho nyiví tsa tsa tindaha, jaha tahan ndo tsa ñayiví tsi iin ndo tan tsi inga ndo. Tan coo vaha ndo tyin Nyoo cua tatsi tuñi ra tsi rayii tsicá nuu tsihin naha tan rayii iyó ñasihi tun coo ra tsihin inga ñaha. Tan juvin ñi cua tatsi tuñi tucu ra tsi ñaha tsicá nuu tsihin rayii tan ñaha tsa iyó yii tun coo ña tsihin inga rayii.

5 Ña caça iñi ndo nácaa javaha ndo tan cuví coo cuaha ca xuhun tsi ndo. Ndo ndo vaha tsihin tsa iyó tsi ndo, tyin catyí Nyoo tyehen: “Tandihí ñi tsaha nyaá yu tsihin un, tan ña cua nacoo ihñi maa yu tsi un”, catyí ra. 6 Tsa cuenda yacan cuví caahán yo tyehen tsihin tsa ñi iñi aña yoo:

Jutu Mañi yu juvin un jatyinyeé tsi yu,

Yacan cuenda ña yuuhví yu tun javahá nyiví náa javahá ñi tsi yu.

7 Nducuhun iñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehe ndo tyin vaha iyó ra naha nuu Nyoo, tan cüanyicun ndo cuhva vaha tsinú iñi ra naha tsi Nyoo.

8 Ra Jesucristo ña nasamá ra. Juvin ra iyó nda tsanaha, tan juvin ra iyó vityin. Tan juvin ra cua coo yoso cuahán quivi. 9 Ña cuhva ndo jandavi ñaha nyiví tsi ndo tsihin tsa siin siin tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo aña yoo, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsí yo. Tan ña jatyinyeé can ndi tsi maa ñi.

10 Tsati ñiñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatyinyee ra Cristo tsi ra naha. 11 Ra jutu tsahnu cuví ityi nuu cuenda nyiví Israel tsindacá ra naha ñiñi quití tsitsi Vehe Ii Xaan tsa cuenda cuatyí nyiví, maa tyin cuñu ti tuhvá can cayú ityi tsata ñuu. 12 Tacan tucu ra Jesús, tavá tyiñu Nyoo tsi ra tsa nyehe ra tundoho tan cúu ra ityi tsata ñuu Jerusalén, tyin tacan tan janduvaha ra tsi yo tsihin ñiñi ra. 13 Na cunyicun yo tsi ra Cristo tan ña nducahan nuu yo vasu ndi maa vacu nducu nyiví tsi yo. 14 Tyin tsa cuenda yoo nduve ñuu tsa ña cua cundihí maa

nu ñuhu ñayivi ihya. Yacan cuenda nanducú yo iin ñuu tsa cua quitsi, tsa yaha naa ñuhu ñayivi ihya. ¹⁵ Yacan cuenda vityin tsa iyó ra Cristo añima yo, taahán tsi jañiñi yo tsi yo tan jacahnu yo tsi Nyoo tsihin tsa cata yo yaa ra, tan tsihin tsa caahán yo. ¹⁶ Ña naa iñi ndo javaha ndo tsa vaha. Tan jatyinyee tahan ndo tsi ndo tsihin tsa iyó tsi ndo, tyin yacan cuví tsa taahán iñi Nyoo.

¹⁷ Tyaa yahvi ndo tsi ra jaquihín ityi tsi ndo naha ra; cuhva ndo tsi ndo cundaca ñaha ra naha tyin juvin ra naha jahá cuenda añima ndo. Tan coo quivi cua cuhva cuenda ra naha tyiñu jahá ra naha tsi Nyoo. Nducu ndo cuhva javaha ndo tsa vaha, tyin tacan tan sii cua cuñi ra naha cuhva cuenda ra naha tsi ndo tsi Nyoo. Maa tyin tun ña javahá ndo tsa vaha, cua cuhva cuenda ra naha tsi ndo tsi Nyoo tsihin tucuiihya iñi, tan ña cua quita vaha ndo nuu ra.

¹⁸ Ndacan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñi ndi javaha ndi. ¹⁹ Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyi yu tsihin ndo.

tsa taxin coo añima yo, juvin ra jahá cuenda tsi yo tsa cuví yo tumaa mbee jana ra. Tsihin niñi ra Cristo tsa tsati, ndoo Nyoo tuhun tsa tsa ña cua cundihí maa tsihin yo. ²¹ Tandihí tsa cuñi Nyoo javahá ra tsihin tandihí yo, maa ra Jesucristo javahá can jahá ra. Tan na javaha ra tsihin yo tsa cuñi ra javaha ra. ¡Najacahnu yo tsi ra Cristo yoso cuahán quivi! ¡Na cuvi tsi tacan ñi!

²² Yañi, caahán ndaahvi yu tsihin ndo; janyee ndo iñi ndo tan javaha ndo tsa tsahá cuenda yu tsi ndo tsihin tsa taxin iyó añima ndo, tyin ña cuaha xaan tuhun tyaa yu tsa cuenda ndo. ²³ Cuñi yu tsa coto ndo tyin ra Timoteo, yañi yo, tsa quitá ra vehe caa. Tatun yatyi tsaa ra, cua quitsi ra tsihin yu na quitsi yu quitsi nyehe yu nu yucú ndo.

²⁴ Cuhva ndo nacumi tsi tandihí ra jaquihín ityi tsi ndo, tan tsi tandihí nyivi yihí cuenda ra Cristo. Nyivi Italia nu nyii yu, tsahá ñi nacumi tsi ndo.

²⁵ Tan na nasoco Nyoo tsi tandihí ndo. Na cuvi tsi tacan ñi.

Nu ndihí cahan ra tan tsahá ra nacumi tsi ñi

²⁰ Jutu Mañi yo Jesucristo tsa janandoto Nyoo, ra tsahá

Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

*Nu tsahá ra Santiago
nacumi tsi nyivi*

¹ Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsí yu nacumi tsi tandihi nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

*Tsa tsiñi tuñi tsa tsahá
Nyoo tsiyo*

² Yañi, cusii iñi ndo tun cuaha tundoho nyehé ndo.

³ Tyin tsitó ndo tyin tsihin tsa nyehé ndo tundoho tan cua cuahnu ca ndo tsihin tsa tsinú iñi ndo. Tan cua cun- yee iñi ndo nyehe ndo náa ndihi ca tundoho vatsí siqui ndo. ⁴ Jaña ndo na quitsi maa tundoho can siqui ndo, tyin tun tsa cunyeey iñi ndo yaha ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeey ndo yaha ndo tandihi maa tundoho tsa cua quitsi siqui ndo.

⁵ Ndáa nyooho cumañi tsa tsiñi tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihi nyivi tan ña tuhvá ra tyicuhvá itsi, tan ndi ña cuxaán ra tsi ñi

tun tsicán ñi náa tsicán ñi tsi ra. ⁶ Maa tyin cuñi tsi ndacan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihi yo tsa tsicán yo, cuví yo tumaa ndutya ñuhu tsa tandahá tatyí ityi ihya tan ityi can. ⁷ Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra. ⁸ Tyin uvi xaan tsicá iñi ra. Ña tyaá iñi ra tsa tsicán ra, tyin ña iin cuñi ra. Vityin cuñi ra tsa cuñi ra, tan inga tsa cuñi tucu ra tyaan. ⁹ Tatun iyó iin ra yañi yo, ndaahvi ra, na cusii iñi ra tyin cahnu cuví ra jaha Nyoo. ¹⁰ Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusii iñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucoyó can. ¹¹ Tyin ihñi xaan cuví tsitsi cuhu jahá ñicanyii. Tacan tan na ityi ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsiihí tsi ra tan cua cundihi tsa cuca ra.

*Nacaa cunyeé iñi yo nyehé
yo tundoho*

¹² Sii xaan cuví tsi ra tsa cua cunyeey iñi nyehe tundoho tyin tsa yaha nyehe ra tundoho cua ñihi ra ñayivi nyito tsa catyi Nyoo tyin cuhva ra tsi ñi tsa cuñi tsi ra. ¹³ Tatun ndáa nyooho tsicá iñi ndo tsa javaha ndo tsa ña vaha, ña cuñi ndo tyin Nyoo tsahá tsa caca iñi ndo

tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha. ¹⁴ Maa tyin nyooho tsa javahá tsa ña vaha, javahá ndo can tyin cuñí ndo javaha ndo can. Tan yacan cuenda tsicoó cuatyí ndo. ¹⁵ Tatun cua cuhva yo tsa caca iñi yo tuhun ña vaha, coo quiví cua javaha yo cuhva tsicá iñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

¹⁶ Yañi, cuñí xaan yu tsi ndo. Ña jandavi ñaha ndo tsi ndo. ¹⁷ Tandihí tsa vaha tan tsa vii tsa ñihí yo, queé tsi ityi siquí tyin maa Nyoo Jutu yo tsahá itsi. Tan maa ra javahá ñuhú tsa iyó andiví: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama. ¹⁸ Tan tsahá ra ñayiví tsa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahá ra, tyin tacan cuñí maa ra.

Ityi nditsa tsa taahán tsi cuhun yo

¹⁹ Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo. ²⁰ Tyin nyiví tsa cuxaán, ña javahá ñi tsa taahán iñi Nyoo. ²¹ Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayiví

ihya. Ndaahvi jaha ndo tsi ndo tan tñin cuenda vaha ndo tuhun Nyoo tsa tatsi ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo. ²² Javaha ndo cuhva caahán tuhun Nyoo, tan ña tyaa soho ñi maa ndo itsi, tyin tatun tyaa soho ñi maa ndo itsi juvin ñi tsi maa ndo jandaví ñaha ndo. ²³ Tyin nyiví tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyiví nyehé nuu ñi nu inu. ²⁴ Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi. ²⁵ Maa tyin nyiví tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sii cua cuví tsi ñi ican tan cua quita vaha tandihí tsa javahá ñi. ²⁶ Tan nyiví tsa catyí tyin tuhun Nyoo yihí ñi, maa tyin yatyi xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juvin ñi tsi maa ñi jandaví ñaha ñi. ²⁷ Tyin tsa cuenda Nyoo, nyiví tsa nditsa tsinú iñi tsi ra juvin ñi cuví ñi tsa javahá tyeheh: Jatyinyeé ñi tsi nyiví ndaahvi tsa tsihi yii, tan jahá cuenda ñi tsi tsa nyihi tsa nduve ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña vaha.

2

Na inducu ñi cuñi yo tsi nyiví tyin ña sñn caá intuhun ñi tan inga ñi

¹ Yañi, nyooho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyívi tan ñavin ca inga ñi. ²⁻³ Tatun cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsí ra jahma xiñu, ¿nácaa cua cahan ndo tsihin ra? ¿A ña cua catyi ndo, “Cunyaa nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsí ra jahma tyaahnyá, tan catyi ndo tsihin ra, “cunyaa nyityi juvin o cunyaa nu ñuhu ihya”. ⁴ Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

⁵ Yañi tsa cuñi xaan yu, tyaa soho ndo tuhun ihya: Nyoo nacatsi ra tsi nyívi ndaahvi nu ñuhu ñayivi ihya, tyin nducua ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyi ra tyin cuhva ra tsi nyívi tsa cuñi tsi ra. ⁶ Maa tyin nyooho tsahá ndo ticanuu tsi nyívi ndaahvi. ¿A ña tsitó ndo tyin juvin nyívi cuca tsahñi ndaahvi tsi ndo, tan tsindacá ñi tsi ndo nuu ra cumi tyiñu? ⁷ Tan ¿a ña tsitó ndo tyin nyívi can caahán ñi ndavaha ñi sivi ii ra Cristo, ra yihí ndaha tsi ndo?

⁸ Ley Nyoo tsa ñiñi ca catyi tsi: “Cuñi ndo tsi nyívi tumaa tsa cuñi ndo tsi maa ndo.” Tatun javahá ndo tsa catyi ley can, vaha javahá ndo. ⁹ Maa tyin tun intuhun

ñi nyívi cuñi ndo, tan ña cuñi ndo tsi inga ñi, tsicoó cuatyí ndo tyin catyi ley Nyoo tyin iyó cuatyí nyívi javahá tacan. ¹⁰ Tyin tatun iin nyívi tsa tyaá yahvi tandihi ley, tan ña tyaá yahvi ñi intuhun tsi, cuví tsi tumaa tsa ña tyaá yahvi ñi tandihi ley. ¹¹ Tyin Nyoo catyi ra tyin ña coo inga ñaha tsi rayi, tun iyó ñasihi ra. Tacan tucu ñiñaha, tsa iyó yii, ña cuví coo inga rayi tsi ñi. Tan juvin ñi catyi tucu ra tyin ña cahñi yo nyívi. Yacan cuenda tatun iin ra nduve inga ñaha tsi ra, maa tyin tsahñi ra iin nyívi, juvin ñi ña tyaá yahvi ra tsa catyi ley. ¹² Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo. ¹³ Tyin nyívi tsa ña cundaahvi iñi tsi tahan ñi, Nyoo cua tatsi tuñi ra tsi ñi, tan ña cua cundaahvi iñi ra tsi ñi. Maa tyin ñi tsa cundaahvi iñi tsi inga ñi, cua quita vaha ñi quivi cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?

¹⁴ Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo? ¹⁵ Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahan ra yuvehe un, ¹⁶ Maa tyin yooho ña tsaha un jahma ra tan ndi tsa catsi ra tan catyi un tsihin ra: “Cuaahan tan

Nyoo cahun tsihin un. Na coo ca jahma un tan tsa catsi un”, catyí un. Nduve nacatyí cahan un tacan tyin ña tsaḥa un tsa tsiñí ñuhu tsi ra. ¹⁷ Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatyinyee yo tsi nyívi, nduve yahvi nyaá catyí yo tyin tsinú iñi yo.

¹⁸ Yihí ndo cua catyí ndo: “Yooho tsinú iñi un tsi Nyoo tan yuhu javahá yu tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyí yu tyin juvin ñi cahnu cuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yu tun ña javaha un tsa vaha. Maa tyin yuhu cuví janahá yu tsa tsinú iñi yu tsi Nyoo tsi un tsihin tsa javahá yu tsa vaha. ¹⁹ Nditza tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda nihí nahnu tsihin tsa yuuhví nahnu tyin ña cua cacu nahnu. ²⁰ Ña soho xaan caca iñi un. Cutuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo.

²¹ Ra Abraham, tsii tsaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyí maa Nyoo tsihin ra. ²² Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyí ra tsihin ra

tyin javaha ra. Tan tsa javahá ra yacan, quituví vaha tsa tsinú iñi ra tsi Nyoo. ²³ Tacan tan cundaa tsa catyí nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyí tsi: “Ra Abraham, cuví ra ra vaha iñi tsi Nyoo.”

²⁴ Tan ihya cuví nu cutuñí iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra. ²⁵ Tan tacan tucu ña Rahab tsa tsica nuu tsihin rayi. Yaha tsa javahá ña cuatyí, javahá ña tsa vaha quívi tsaḥa ña nu tsiyucu xeehe ra tsa jacuhun ra Josué. Tan jatyinyee ña tsi ra naha tsa cahun ra naha inga ityi. Tan tsa cuenda yacan, catyí Nyoo tyin vaha ña. ²⁶ Tan tacan tucu cuví cuñu ñuhu nyívi. Tatun nduve ca tsa nyitó ñi iyó tsitsi cuñu ñuhu can, nduve ca yahvi nyaá can. Tan tacan cuví tucu yoó, tatun ña javahá yo tsa vaha, nduve yahvi nyaá tsa tsinú iñi yo.

3

Nacaa jaha cuenda yo cuhva caahán yo

¹ Nyooho yañi, ña yatyi xaan cuñi ndo cuví ndo ra cahan tuhun Nyoo. Tyin tsitó ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyívi tsa ña caahán tuhun Nyoo. ² Tyin tandihi

maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juvin ra cuví ra vaha tyin cuví ndaca ñaha ra nanií cahnu cuñu ñuhu ra. ³ Tumaa ra tsa tyihí yoho yuhu cuayu cuví ndaca ñaha ra tsi tí, vasu ndi maa cahnu tí. ⁴ Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacuhun ra jacacá itsi ndáa ityi cuñí maa ra, vasu ñihi xaan yihí tatyí. ⁵ Tan tacan tucu yaa yo, luhlu xaan tsi. Maa tyin cuaha tsa caquiñi cuvi cahan yo tsihin tsi. Tumaa nu natiin iin ñuhu luhlu iin cuhu cahnu tan cayu tandihi maa yutun. ⁶ Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnu tsa jativí tsi nanií cahnu cuñu ñuhu yo tan tandihi cuhva iyó yo ñayivi ihya, tyin juvin ñi maa nu ña vaha natyuhú itsi. ⁷ Nyivi cuví jandumasu ñi tandihi maa nuu quití tsa iyó: saa, coo, tan quití tsa iyó tsitsi ndutya ñuhu. ⁸ Maa tyin yoñi cuví jandumasu yaa yo tyin cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí tí venenu tí tsi nyivi, tan tsiihí ñi. Tacan cuví yaa yo. ⁹ Tyin juvin ñi tsihin yaa yo jacahnú yo tsi Nyoo Jutu yo. Tan juvin ñi tsihin can caahán tucu yo ndavaha ñi siqui nyivi tsa javaha Nyoo tumaa caá maa ra. ¹⁰ Juvin ñi tsihin yuhu

yo jacahnú yo tsi Nyoo. Tan juvin ñi tsihin can caahán yo tsa caquiñi. Maa tyin yañi, ña taahán tsi tsa javahá ndo tacan. ¹¹ Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví. ¹² Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsiñi tuñi tsa vaha ca

¹³ Tatun yihí ndo tsitó ndo tan iyó tsa tsiñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsiñi tuñi Nyoo tsa iyó tsi ndo. ¹⁴ Maa tyin tatun nyiyo iñi ndo tsitsi añima ndo tan cuñí xaan ndo nduvaha ndo nu nyivi, ña cahnu jaha ndo tsi ndo tan catyi ndo tyin iyó tsa tsiñi tuñi tsi ndo. Tyin tun cahnu jahá ndo tsi ndo, tyihí xeehe ndo tsa nditsa, cuví can. ¹⁵ Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyivi ña tsitó tsi Nyoo tan cuhva tsica iñi nu ña vaha cuví can. ¹⁶ Tyin tatun nyiyó iñi ndo tan cuñí ndo nduvaha ndo nuu nyivi, ticaña xaan tsicá iñi ndo. Tan iyó tucu tandihi inga nuu tsa ña vaha nu yucú ndo. ¹⁷ Maa tyin tatun iyó tsa tsiñi tuñi Nyoo tsi ndo, cuiti iyó ndo, catsi iyó ndo. Tan nducú ndo cuhva coo vaha ndo tsihin nyivi tsihin tsa vita iñi ndo, tan vaha nyivi cuví ndo. Tan catsi vaha

tsicá iñi ndo, tan cundaahvi iñi ndo tsi nyivi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa ñi iñi ndo. ¹⁸Tatun iyó vaha yo tsihin nyivi, tan iyó taxin yo tsihin ñi, cua coo yo ñayivi cuiti.

4

Ña taahán tsi javaha yo cuhva cuñi cuñu ñuhu yo

¹ ¿Nacuenda iyó tsihi nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha. ²Iyó tsaha nda cuanda tsahñi ndo nyivi tyin cuñi ndo tsa cuñi ndo tan ña ñihí ndo can. Tatun nyehé ndo náa cuví can nyehé ndo, nyiyó iñi ndo can tan tsa ña ñihi ndo can quitsaha cañi tahan ndo. Ña ñihí ndo tsa cuñi ndo tyin ña tsicán ndo can tsi Nyoo. ³Tatun tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyin tsitó ra tyin cua jativi ndo can tsihin tsa taahán iñi ndo. ⁴¿Nacuenda javahá ndo cuhva cuñi nyivi, nyooho tsa ña tsinú vaha iñi tsi Nyoo? ¿A ña tsitó ndo tyin tun javahá yo cuhva cuñi nyivi, ñi xaan iñi tsi Nyoo cuví yo? ⁵Tan yacan iyó cuenda catyí nu tutu Nyoo tyin Tatyí li tsa tsahá ra coo añima yo, cuñi xaan tsi tsi yo tan cuiñu xaan tsi tsi yo tyin cuñi tsi tsa jacahnu yo tsi intuhun ñi maa ra. ⁶Tan jatyinyeé xaan Nyoo tsi yo tsa nacuhvá yo tsi yo tsi ra. Tyin catyí ra tyin jatyinyeé ca ra tsi nyivi

ndaahvi tsa tsitó tyin tsiñi ñuhu ra tsi ñi. Tan ña cuñi ra nyehe ra tsi ra tsa cahnu jahá tsi. ⁷Yacan nacuhva vaha ndo tsi ndo tsi Nyoo. Ña tyaa yahvi ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehe nu tsi ndo. ⁸Nducú ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyooho, nyivi iyó cuatyí, jandundii ndo tsi ndo. Tan nyooho tsa tsicá iñi tyin cuví javaha ndo tsa iyó nu ñuhu ñayivi ihya tan juvin ñi cuhva can tan jacahnu tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyin tacan tan ndundii ndo nuu ra. ⁹Cuiihya cuñi ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa sii cuñi ndo, vacu ndo tsihin tsa cuiihya cuñi ndo. Tan tsa sii cuñi ndo na nanduvi tsi tucuiihya iñi. ¹⁰Ndaahvi jaha ndo tsi ndo nuu Jutu Mañi yo, tyin tacan tan janducahnu ra tsi ndo.

Ña cahan nyaa ndo tsi nyivi

¹¹Yañi, ña cahan ndo ndavaha ñi siqui iin yañi yo. Tyin nyivi caahán ndavaha ñi siqui nyivi, o caahán nyaa ñi nyivi, siqui ley Nyoo caahán ñi ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jahá yo tsi yo tsa nuu tsa tyaa yahvi yo tsa caahán ley can. ¹²Tyin intuhun ñi ra tsahá ley can. Tan juvin ñi ra

cuví Juez. Tan juvin ra cuví ra jacacú tsi yo, o jacunaá tsi yo. Tan ¿yooho yóo ra cuví un tyin cahan nyaa un tsi inga nyivi, tan tatsi tuñi un tsi ñi tan jaha un tsi un tumaa juez?

Ña tsitó yo náa cua cuvi tsi yo tyaan, yacan cuenda ña taahán tsi cahnu jaha yo tsi yo

¹³ Yihí ndo catyí ndo: “Vi-tyin o tyaan cahun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaa soho ndo tsa cua cahan yu ihya: ¹⁴ Ñayivi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsitó ndo tsa cua cuvi tyaan tan catyí ndo tyin cahun ndo. ¹⁵ Vaha ca cahan ndo tyehen: “Coo yo juhva ca quivi tan javaha yo tsehe o yacan, tun Jutu Mañi yo tan cuñi ra.” ¹⁶ Maa tyin nyooho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyivi javahá tacan. ¹⁷ Tyin yoo tsa tsitó javaha tsa vaha tan ña javahá yo can, tsicoó cuatyí yo.

5

Nu tsahá cuenda ra Santiago náa cua tahan nyivi cuca

¹ ¡Tyaa soho ndo tuhun caahán yu ihya, nyooho nyivi cuca! Vācu ndo tsihin tsa cuiihya cuñi ndo, cana tsa ndo tsa cuenda tundoño tsa cua nyehe ndo. ² Tyin tsa cuca tsa jacayá ndo, tsa ndihi can tyaahyú. Tan jahma vaha

ndo, tsa ndihi maa can tsatsi tiquixin. ³ Xuhun cuaan tan xuhun cuitsin ndo tsa ndihi can cuxí. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuvi tumaa ñuhū tsa cua cahmi tsi ndo. ¿Nacuenda jacayá ndo tsa cuca nu cua ndihi quivi ihya? ⁴ Tan ña tyahvi ndo yahvi tsa taahán tsi tsi nyivi ndaahvi tsa jahā tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihi ángel tsa cuví andarū cuenda ra. Tan maa Jutu Mañi yo tsiñi ra tuhun caahán ñi ndaahvi can. ⁵ Iyó vaha xaan ndo nu ñuhu ñayivi ihya tyin cuca ndo. Tan javahá ndo cuhva cuñi maa ndo. Tumaa tuhvá nyivi janduxaahán quini tyin cuu ti, tacan javahá ndo tsihin ndo. Tan vityin tsa tsaā quivi tsa cua cuu ndo. ⁶ Tyin tyaa ndo cuatyí tsaha nyivi vaha tan tsahñi ndo tsi ñi. Tan ndi ña cahan ñi cuatyí siqui ndo.

Na cunyeē iñi yo cuatu yo tsi ra Cristo

⁷ Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi huhu ndatú ra nda cuun savi tsa jihna tan nda ndihi cuun nyico tsi, tan naquihin ra tsa tatsi ra. ⁸ Tan tacan taahán tsi cunyeē iñi yo cuatu yo tsi Jutu Mañi yo. Jāndu iin ndo iñi ndo tyin tsa yatyin cuii quitsi ra.

⁹ Yañi, ña tyaa ndo cuatyí tsi yañi ndo, coto tatsi tuñi Nyoo,

ra cuví Juez, tsi ndo, tyin tsa nyaá ra tsa cuñí quitsi ra. ¹⁰ Yañi, quihin cuenda ndo cuhva tsicoo ra cuví ndusu yuhu Nyoo tahan tsanaha. Tyin ra ícan naha ra cunyeé xaan iñi ra naha nyehe ra naha tundoho quivi tsaha cuenda ra naha tuhun Jutu Mañi yo. ¹¹ Tsitó yo tyin sii xaan cuñí ra tsa cunyeé iñi nyehé tandihi nuu tundoho, tumaa tsa cunyeé xaan iñi ra Job nyehe ra tundoho. Tan nu ndihi ña, cuaha xaan tsa vaha tsaha Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahví iñi ra nyehé ra tsi yo. ¹² Maa tyin yañi, ña çahan ndo: “Naha Nyoo maa”. Tan ña çahan ndo: “Tsitó vaha maa ra nyaá gloria”, tan ndi ña çahan ndo: “Tsitó vaha maa ra javaha ñuhu ñayivi”, tan ndi ña çahan ndo inga ca tuhun tahan can. Tatun nditsa tuhun caahán ndo, “nditsa” çatyí ndo. Maa tyin tatun tsitó ndo tyin ña nditsa, çatyí ndo tyin “ña nditsa”, coto tatsi tuñi Nyoo tsi ndo.

¹³ Tun ndáa nyooho nyehé tundoho, ndacan tahvi ndo tsi Nyoo. Tan nyooho tsa sii cuñí, çata ndo yaa Nyoo. ¹⁴ Tan nyooho tsa cuuhví, çana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sivi ra Cristo. ¹⁵ Tan tatun tsinú iñi ra naha tsi Nyoo cuhva tsa tsicán tahvi ra naha, nyivi cuuhví can cua nduvaha ñi. Tan Jutu Mañi yo cua janduvita

ra tsi ñi. Tan tatun tsicoo ñi cuatyí, Nyoo cua jaha ra tucahnu iñi tsi ñi. ¹⁶ Yacan cuenda nahma ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyivi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo. ¹⁷ Tumaa ra Elías ra cuví ndusu yuhu Nyoo tahan tsanaha. Cuví ra iin rayi tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava. ¹⁸ Yaha can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsiti tsa tatsi nyivi.

¹⁹ Yañi, tatun iin nyivi tahan ndo nacoo ñi tuhun nditsa Jutu Mañi yo, tan cuanuhu ñi ñayivi inga tsaha, tan jatyi nyeeé ndo tsi ñi tsa nanducu nyico ñi ityi Nyoo, ²⁰ coto ndo tyin tsa javaha ndo tacan tsihin ñi, jacacu ndo aña ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

Carta Tsa Jihna Ñi Tsa Jacuhun Ra Pedro Tsi Nyivi Yihí Cuenda Nyoo

Nu quitsaha tyaá ra Pedro carta tsa cuenda nyivi yihí cuenda Nyoo

¹ Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galicia, tan Capadocia, tan Asia tan Bitinia tsa ñavin ñuu ndo cuví. ² Tyin nda tsanaha tan nacatsi vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsi ra tsi ndo, jatyinyee Tatyí lí ra tsi ndo tan nacuhva ndo tsi ndo tsi ra, tan tyaá yahvi ndo tsi ra Jesucristo vityin, tan ndundí ndo tsihin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

Cuita iñi ndo tyin cua ñihi yo ñayivi tsaa coo yo

³ Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsaa yo inga tsaha tyin janandoto ra tsi ra Jesucristo. Yacan cuenda cuita iñi yo tyin cua ñihi yo ñayivi tsaa tsa ña cua naa maa. ⁴ Tan tsa cuenda tsa nacacu tsaa yo, Nyoo cua cuhva ra tandihi tsa cumí vaha ra nda gloria

tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita. ⁵ Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndihi cacu yo. Tan cua janaha ra tsi yo náa cuñi tsi catyi tsa cacú yo nu cua ndihi tyembu tyin tsa ndatú vaha can tsi yo.

⁶ Yacan cuenda sii cuñi ndo, vasu ndi maa nyehé ndo tandihi nuu tundoho juhva quivi vityin. ⁷ Tyin tandihi maa tundoho can tan taahán tsi nyehé yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

⁸ Nyooho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan sii xaan sii xaan cuñi ndo nda cuanda ña cuví ñihi ndo cuhva catyi ndo naja cuhva tsa sii cuñi ndo, ⁹ tyin nu ndihi cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

¹⁰ Ra ndusu yuhu Nyoo tsa tsicoꝝ taḥan tsanaha nducu tuhun ra naha nácaa cua cacu yo. Tan nducu ra naha cuhva coto ra naha náa cuví tsi. Tyaá ra naha nu tutu cuenda tsa vaha tsa cua cuhva Nyoo tsi yo. ¹¹ Tan Tatyí Ii ra Cristo tsa iyó tsihin ra naha jacoto tsi tsi ra naha náa ndihi tundoho cua nyehe ra Cristo, tan nácaa cua jacahnu Nyoo tsi ra. Tan nducu xaan ra naha cuhva coto ra naha yóo ra cua cuví ra Cristo tsa cua tahan tacan, tan ama cua cuví tuhun tsa catyí Tatyí Ii tsihin ra naha. ¹² Maa tyin jacoto Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihi tsa caḥan ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñi ndo. Tan ra tsa caḥan tuhun ihya naha ra, maa Tatyí Ii Nyoo jacahan tsi ra naha. Tan ra ángel naha ra cuñi xaan ra naha coto ra naha tuhun ihya.

Nyoo caná ra tsi yo tyin coo yo ñayivi cuiti

¹³ Yacan cuenda jaha vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra. ¹⁴ Coo ndo tumaa iyó tsa nyihi tsa tyaá yahvi tsi jutu. Ña coo ndo tumaa tsicoꝝ ndo quivi tsa ndi cumañi ca nacoto ndo tsi Nyoo tyin tsanaha tsindacá ñaha tsa ña

vaha tsa cuñi cuñu ñuhu ndo tsi ndo. ¹⁵ Maa tyin vityin coo ndo ñayivi cuiti tyin maa Nyoo, ra tsa cana tsi ndo, cuiti iyó ra. ¹⁶ Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

¹⁷ Tatun tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jaha cuenda ndo tsi ndo tan jaha ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuví yo nyivi cuca, an nyivi ndaahvi. ¹⁸ Nyoo nasama ra cuhva tsa ña vaha tsicoꝝ ndo, cuhva tsa janaha tsi tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahvi ra tan cacu yo, ¹⁹ tyin tyahvi ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhvá nyivi Israel jamañi nuu Nyoo], tan tsihi ra vasu ndi maa nduve cuatyí ra. ²⁰ Tsa ndi cumañi ca tsinu ñuhu ñayivi tsinyaá cuhva tyin tyehen cua tahan ra Cristo. Maa tyin ña cuví tsi tsa numi ñi. Nda cuanda vityin nu cua ndihi quivi, cuví tandihi can tsa cuenda tsa vaha tsi maa yo. ²¹ Tsa cuenda ra Cristo tan tsinú iñi ndo tsi Nyoo tyin juvin ra janandoto tsi ra Cristo tsa yaha tsihi ra tan jacahnu ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua

naquihin ra tsi ndo.

²² Tsihin tunyee iñi Tatyí lín Nyoo tyaá yahvi ndo tuhun nditsa. Tan tsa ndundií ndo jahá Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa ñi iñi ndo, tan tsihin tandihí tunyee iñi tsa iyó tsi ndo. ²³ Tyin tsa nacacú tsa ndo, maa tyin ñavin tumaa cacú nyívi nu ñuhu ñayívi ihya, tyin jutú ndo cacú ra naha jahá síhi ra naha tan tsihi ra naha. Tan nyooho vityin nacacú tsa ndo tsihin Nyoo tsa ña cua cundihí maa, tyin tacan ñi cua coo maa tsi. ²⁴ Tyin catyí tuhun Nyoo tyehen:

Tandihí nyívi tsa iyó nu ñuhu ñayívi ihya cuví ñi tumaa huhu.

Tan tsa cahnu tsa javahá ñi cuví tsi tumaa ita.

Tyin huhu can na ityí can, tan cucoyó ita can. [Tacan cuví nyívi, tyin iin yaha ñi tsihi ñi.]

²⁵ Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

2

¹ Yacan cuenda nacoo ndo tandihí nuu tsa caquiñi. Ña jandavi ñaha ndo tsi nyívi, ña jaha ndo tyin vaha ndo tan ña nditsa, ña nyíyo iñi ndo nyehe ndo tsa iyó tsi inga nyívi, ña cahan ca ndo cuendu. ² Javaha ndo tumaa

javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacuahnu tsi ndo tan nacoto vaha ca ndo tsi Nyoo nda cuenda ndihí cacu ndo, ³ tun nditsa tyin tsitó ndo tyin Jutu Mañi yo, vaha xaan ra cuví ra.

Ra Cristo cuví yuu nyito

⁴ Cunya na ndo tsi Jutu Mañi yo. Tyin juvin ra cuví yuu nyito tsa ña cuñi nyívi cuatyínu ñi. Maa tyin Nyoo nacatsí ra tsi Jutu Mañi yo tyin juvin ra cuví yuu sí caá tsa yahvi nyaá tsa cuenda ra. ⁵ Tatun nyaa naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cuhva ndo tsa jandu iin Nyoo tsi ndo tsihin ra Cristo tyin tun tsa nyaa naa vaha ndo tsi ra, cua cuví ndo tumaa ra jutú tsa javahá maa ñi tyínu Nyoo. Cua jacahnu ndo tsi ra tan sí xaan cua cuñi ra. ⁶ Tyin catyí tucu nu tutu ra tyehen: Yuhu nacatsí yu iin yuu tsa tsiñi ñuhu ca tan sí ca caá, tan tsaquin yu yuu can nu cua javaha yu vehe yu nda Sión.

Tan nyívi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

⁷ Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñi ñuhu xaan ra tsi yo. Tan tsa cuenda nyívi tsa ña tsinú iñi tsi ra, cuví ra tumaa iin yuu tsa caahán Nyoo

tuhun nu tutu ra tan catyí tsi tyehen:

Yuu tsa ña cuñi ra javahá vehe cuatyíñu ra, yacan cuví yuu tsa tsiñi ñuhu ca, catyí tsi.

⁸ Tan catyí tucu tsi:

Ra ican cuví yuu tsa cuaha xaan nyivi cua nañi tsaha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyivi can tyin tsiñi ñi tuhun Nyoo, tan ña tyaa yahvi ñi itsi tyin tacan nyaá tyin cua javaha ñi.

Nyivi yihí cuenda Nyoo

⁹ Maa tyin nyoocho cuví ndo nyivi nacatsi maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyivi ii ityi nuu ra tan cuví ndo nyivi maa ra, tacan tan cahan ndo tuhun vaha tsa javahá ra. Tyin juvin ra tava tsi yo nu naa tan tyihí ra tsi yo nu nditsin tan nu si caá. ¹⁰ Tsa ndi cumañi ca cuví ndo nyivi Nyoo, nduve yahvi nyaá ndo. Maa tyin vityin nyivi Nyoo cuví ndo. Quivi can yoñi cundaahvi iñi tsi ndo, maa tyin vityin Nyoo cundaahvi iñi ra tsi ndo.

Nu catyí ra Pedro tyin coo yo, tan javaha yo tyiñu nuu Nyoo

¹¹ Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayivi cuví ndo, tyin nda gloria cuví ñuu ndo. Yacan cuenda ña javaha ndo

cuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo. ¹² Jaha cuenda ndo tsi ndo nu iyó ndo tyañu nyivi tsa ña tsitó tsi Nyoo. Tyin vasu caahán ñi ndavaha ñi siqui ndo, tan catyí ñi tyin ña vaha ndo, maa tyin quivi quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

¹³ Tyaa yahvi ndo tsi ra cumí tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tyiñu, a cuví ra rey cahnu ca, ¹⁴ a iin ra jaquitsi ra rey tyin tatsi tuñi ra tsi ra iyó cuatyí naha ra tan naquihin ndaahvi ra tsi yoo tsa javahá tsa vaha. ¹⁵ Tyin Nyoo cuñi ra tsa javaha yo maa ñi maa tsa vaha tyin tacan tan ña ñihi ca nyivi soho tan nyivi ña tsitó náa cahan ñi siqui yo.

¹⁶ Coo ndo tumaa iyó nyivi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra. ¹⁷ Jaha ndo tsa ñayivi tsi tandihí ñi nyivi. Cuñi ndo tsi ñi yihí cuenda Nyoo. Jaha ndo tsa ñayivi tsi ra ndacá ñaha, tyin Nyoo nyehé ra tandihí tsa javahá yo.

Uvi taahan cuhva nyehé yo tundoho

¹⁸ Nyoocho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi

ra naha. ¹⁹ Tyin tatun cunyeé iñi yo nyehé yo tundoho tsa janyehé nyivi tsi yo tsa cuenda tsa javahá yo tsa vaha nu Nyoo, cua tsa can nuu ra. ²⁰ Maa tyin tatun tatsí tuñi nyivi tsi ndo tsa cuenda tsa javahá ndo tsa ña vaha tan cunyeé iñi ndo nyehe ndo tundoho, nduve náa catyi. Maa tyin tatun ña cundihi iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuví tsa vaha nuu Nyoo. ²¹ Tumaa tsa nyehe maa ra Cristo tundoho tsa cuenda yo, tacan taahán tsi cunyeé iñi yo nyehe yo tundoho tyin tsa cuenda yacan canā Nyoo tsi yo. ²² Ra Cristo ndi intuhun cuatyí ña javahá ra. Tan ndi iin tsaha tan ña jandaví ñaha ra tsi nyivi. ²³ Quivi jacuñi nyaa ñi tsi ra, ña jacuñi nyaa ra tsi ñi. Quivi tsa janyehe ñi tundoho tsi ra ña jayuhví ra tsi ñi. Tyin intuhun ñi maa Nyoo cuví ra tuhvá jacutuñi tsi nyivi tsihin tsa ndaa tan tsihin tsa nditsa. Yacan cuenda natyaā ra tsi ra ndaha Nyoo. ²⁴ Tyin cuhva tsa ticaá ra Cristo nu cruu can, tsicoso tandihi cuíi maa cuatyí yo tsata ra. Tacan cuví tyin tacan tan ña javaha ca yo cuatyí, tan coo yo ñayivi cuíti. Tyin tsihin tsa ñicuehe ra, tan nduvahá yo. ²⁵ Tyin quivi can tsicā nuu yo cuví yo tumaa mbee tsa ndoo ihñi, tsa nduve tsitoho. Maa tyin vityin nacuhvá cuenda yo tsi yo tsi ra Cristo, tan jahá cuenda ra añima yo. Cuví ra

ityi nuu tsihin yo.

3

Nacaa taahán tsi coo nyivi tindaha

¹ Tacan tucu nyooho, ñiñaha tsa iyó yí. Tyaa yahvi ndo tsi yí ndo tyin tatun ña tsinú iñi ra tsi ra Cristo, cua tsinu ndihi iñi ra tsi ra Cristo tsihin cuhva javahá ñi ndo tyin nyehe ra tyin vaha tsahá ndo tsa quihí ndaha ra tsi ndo. Tan ña cuñí tsi cuaha xaan cahan ndo tsihin ra, ² tyin nyehé ra tyin catsi iyó ndo tan jahá ndo tsa ñayivi tsi ra. ³ Ña caca xaan iñi ndo janduvaha ndo tsi ndo ityi tsata ñi, tyin ña ñiñi xaan cuñí tsi tsa iyo xaan janduvaha ndo jiñi ndo, tan cuatyíñu ndo tsa cuví xuhun cuaan tan cunditsi ndo jahma xiñu xaan. Ña nducu ndo tandihi yacan. ⁴ Maa tyin jandutyaquí ndo tsi ndo tsihin tsa quitá añima ndo tyin tun cuíti iyó yo tan vita iñi yo, tan taxin iyó yo, yacan cuví tsa sñ ca caá nuu Nyoo. Tan ña cua tiví maa can. ⁵ Tyin tsihin tsehe ndutyaquí ñiñaha tsa nacoto tsi Nyoo, ñi tsa tsicoo tahañ tsanaha. Nyita iñi ñi tsi Nyoo tan tyaa yahvi ñi tsi yí ñi. ⁶ Tumaa ña Sara, tyaa yahvi ña tsi ra Abraham yí ña. Tan catyí ña: “Tata”, tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuví ndo tumaa maa ña. ⁷ Tan tacan tucu nyooho, ra iyó ñasihí naha ra, cutuñi

iñi ndo cuhva coo ndo tsihin ñasihí ndo. Jaha ndo tsa ñayivi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuvi ñayivi iyó ndo. Javaha ndo tyehen tyin tacan tan tiin cuenda Nyoo tuhun caahán ndo tsihin ra.

Nu tsahá cuenda ra Pedro nácaa taahán tsi coo yo

⁸ Nu ndihí tuhun, iin ñi cuhva caça iñi tandihí ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñí ndo tsi yañi ndo tsa cacu tsihin ndo. Vita çahan ndo tsihin tahan ndo, tan ña cahnu jaha ndo tsi ndo; cuvi ndo nyivi vaha. ⁹ Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña çahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo. ¹⁰ Tyin tuhun Nyoo catyí tsi tyehen:

Nyivi tsa cuñí coo ñayivi tsihin tsa sii,

cuñí tsi jaha ñi cuenda yaa ñi, tan ña cahan ñi tsa ndavaha ñi,

tan ndi ña cahan ñi cuendu.

¹¹ Jandihí ndo tsa javahá ndo tsa ña vaha, tan javaha ndo tsa vaha.

Nducu ndo cuhva coo taxin ndo, tan çoo ndo tacan.

¹² Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi.

Maa tyin nyivi javahá tsa ña vaha, ña cuñí ra nyehé ra tsi ñi.

¹³ Ndi intuhun maa nyivi tan ña cuvi javaha ñi tsa ña vaha tsihin ndo tatun nyooho tan maa ñi tsa vaha nanducú ndo. ¹⁴ Cusi iñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo. ¹⁵ Jachanu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Caça iñi ndo tuhun Nyoo tyin tatun ndaca tuhun nyivi tsi ndo nacuenda tsinú iñi ndo tsi ra, cuvi cuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi. ¹⁶ Catsi çoo ndo tyin tun catsi iyó ndo ña cua nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra Cristo, juvin ñi maa ñi tan cua nducahan nuu ñi tsa cuenda tsa çahan ñi siqui ndo. ¹⁷ Vaha ca nyehé yo tundoho tsa cuenda tsa javahá yo tsa vaha tatun Nyoo cuñí, tan ñavin ca tsa nyehé yo tundoho cuenda tsa ña vaha. ¹⁸ Tyin ra Cristo nyehé ra tundoho tan tsihi ra iin tsaha ñi tsa cuenda cutyin tandihí yo. Ra vaha cuvi ra maa tyin nyehé ra tundoho tan tsihi ra tsa cuenda yo tsa cuvi yo nyivi caquiñi, tyin tacan tan cuvi tsa yo nu

nyaá Nyoo. Tsihī cuñu ñuhu ra, maa tyin nandoto nyico ra tsihin Tatyí li ra. ¹⁹ Tacan tan tsihin Tatyí li ra tsahan ra tsicahan ra tsihin añima nyivi tsa yucú anyaya. ²⁰ Tan ñi ican cuví ñi tsa ña tyaa yahvi tsi Nyoo quivi tsicoo ra Noé tahan tsanaha, tyin nii tsinú yutun ndoo tacan tsa ndatu Nyoo tsa ndu uvi iñi ñi cuaryi ñi. Maa tyin ña cuaha ñi cacu quivi cuun savi cahnu tsa tsahñi ndutyá ñuhu tsi ñi. Una taahan ñi ñi cacu tsitsi yutun ndoo tyin nandaá yutun ndoo can nu ndutyá ñuhu. ²¹ Tan tacan tucu maa yo tumaa tsa cacu ñi ican, tacan cacu yo quivi tsicoondutyá yo. Maa tyin ñavin nyahyu yo nacatyá ndutyá can tsa tsicoondutyá yo. Yacan cuñí tsi caryi tsa tsicán tahvi yo tsi Nyoo na nacatyá ra añima yo tan cacu yo jahá tsa nandoto ra Jesucristo. ²² Tan nandaá ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihi tatyí ña vaha tsa ndacá ñaha tsi nyivi.

4

Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.

¹ Yacan cuenda janyee ndo iñi ndo nyehe ndo tundoho tumaa nyehe ra Cristo tundoho tsihin cuñu ñuhu ra. Tyin nyivi tsa nyehé tundoho tsihin cuñu ñuhu ñi, ña javahá ca ñi tsa caquiñi tsa cuñí cuñu ñuhu ñi. ² Tyin tacan

tan tandihi quivi coo ñi cua javaha ñi cuhva cuñí Nyoo, tan ñavin cuhva cuñí cuñu ñuhu ñi. ³ Vityin tsindihí tsa javahá ndo tsa caquiñi tsa taahán iñi nyivi tsa ña tsitó tsi Nyoo. Tsicoo ndo cuhva cuñí ndo, cuaha tsa caquiñi javahá ndo, tan javahá ndo tsa caquiñi tsa cuñí cuñu ñuhu ndo. Javahá ndo vico tan tsiñi ndo. Tan jacahnú ndo tsitoho tsa ña taahán tsi jacahnú ndo. ⁴ Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñí ñi. Tan caahán ñi ndavaha ñi siqui ndo. ⁵ Maa tyin tandihi tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi. ⁶ Yacan cuenda jacoto ra Cristo tuhun vaha tsi ndiyi. Tyin tacan tan cuví coo añima ñi tumaa iyó Nyoo, vasu ndi maa tsihi ñi nu ñuhu ñayivi ihya tumaa tsihi tandihi ca nyivi.

⁷ Tsa yatyin cuii cundihí tandihi maa tsa iyó nu ñuhu ñayivi ihya. Yacan cuenda catsi coo ndo tan ña jandihí ndo tsa ndacan tahvi ndo tsi Nyoo. ⁸ Tsa jihna ñi taahán tsi tsa cuñi tahan ndo tsi ndo, tyin tatun cuñí tahan yo tsi yo, cuaha tsaha cua jaha yo tucahnu iñi tsi ñi. ⁹ Tatun tsaá iin nyivi vehe ndo, vaha tyānuu ndo tsi ñi tan ña caca iñi ndo tyin jatyañu ñi tsi ndo. ¹⁰ Tan cuñí tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin

siīn siīn tsa tsahá Nyoo tsi tsa intuhun intuhun yo. Tan taahán tsi cuatyíñu yo can tsihin tahan yo. ¹¹ Tatun tsahá Nyoo tuhun cahan un tsihin nyívi, cahan, maa tyin maa ñi tuhun tsa tsahá ra tsi un. Tatun tsahá ra tyin javaha un tyíñu nuu nyívi, javaha tsihin tunyee iñi tsa tsahá maa ra. Tandihí tsa catyí Nyoo tyin javaha ndo, javaha ndo can, tyin tacan tan jacahnu nyívi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jacahnu yo. Tan na cundaca ñaha ra tsihin tunyee iñi ra tacan ñi maa. Tan na cuvi tsi tacan.

Siī cuñí ndo tun nyehé ndo tundoho tsa cuenda ra Cristo

¹² Yañi tsa cuñí xaan yu, ña iyo xaan cuñi ndo tatun vatsí tundoho ñihi síqui ndo. Ña cuñi ndo tyin ña taahán tsi nyehe ndo tundoho. ¹³ Cú siī iñi ndo tyin cuvi nyehe ndo tundoho tumaa nyehe ra Cristo tundoho. Tyin tacan tan quívi quitsi nyico ra Cristo inga tsaha, siī cua cuñi ndo nyehe ndo tsa cahnu cuví ra. ¹⁴ Tatun caahán nyívi ndavaha ñi síqui ndo tyin nyicún ndo tsi ra Cristo, siī cuñi ndo, tyin nyaá Tatyí Ii Nyoo tsihin ndo. Maa ñi caahán ñi ndavaha ñi síqui ra Cristo, maa tyin nyooho jacahnú ndo tsi ra. ¹⁵ Tatun nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhú ndo, o javahá ndo tsa ña vaha, o tsa tyihí ndo tsi ndo nu ña taahán

tsi. ¹⁶ Maa tyin tun nyehé ndo tundoho tsa cuenda tsa yihí ndo cuenda ra Cristo, ña ndučahan nuu ndo. Jacahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

¹⁷ Tyin tsa tsaa quívi tsa quitsahá jacutuñi Nyoo tsi tandihí nyívi. Tan jihna ca yoo tsa yihí cuenda ra cua cutuñi. Tatun tyehen tatsi tuñi Nyoo luxu ñi tsi yoo, ¿nácaa cua tatsi tuñi ra tsi nyívi tsa ña tyaá yahvi tuhun caahán ra? ¹⁸ Tatun yí cacú añaima nyívi vaha, ¿nácaa cua cacu añaima ñi quiñi iyó, ñi ña vaha? ¹⁹ Yacan cuenda tatun nyehé ndo tundoho cuhva cuñi Nyoo, cuñi tsi tsa jañihí ca ndo javaha ndo tsa vaha. Tan tyaa cuenda ndo añaima ndo ndaha ra tyin maa ra javahá tsi yo, tan cua javaha ra tumaa caahán ra.

5

Nu tsahá cuenda ra Pedro tsi yo nácaa coo yo

¹ Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehe yu tandihí tundoho tsa tahan ra Cristo. Tan cua cutahan yu tsihin tandihí ca ra naha quívi quitsi ra Cristo inga tsaha tsihin tsa cahnu cuví ra. ² Jaha cuenda ndo tsi nyívi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa ñi iñi añaima ndo tan

ñavin tsihin tsa ñiñi, maa tyin cuhva cuñí Nyoo. Ña javaha ndo can tsa cuenda tsa cuñí ndo xuhun. Tandihí tyiñu javahá ndo, javaha ndo can tsihin tsa cacu iñi ndo. ³ Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihí ndo tsi ñi. ⁴ Tacan tan quivi cua quitsi ra cuví ityi nuu tsihin nyooho tsa jahá cuenda mbee jana Nyoo, cua cuhva ra tsa sii caá tsa ña cua tiví maa tsi ndo.

⁵ Tacan tucu nyooho, ra cuatyí tan ñi cuatyí, tyaa yahvi ndo tsi ra tsahnu naha ra. Tan tandihí ndo ndaahvi jaha ndo tsi ndo tan tyaa yahvi tahan ndo tsi ndo. Tyin catyí nu tutu Nyoo tyehen:

Nyoo ña cuñí ra nyehe ra tsi nyivi tsa yaa xaan,

Maa tyin jatyinyeé ra tsi ñi tsa ña yaa.

⁶ Yacan cuenda ndaahvi jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee iñi tsa iyó tsi ra, tyin tacan tan cuví jacahnu ra tsi ndo quivi cua tahan tsi. ⁷ Tyaa cuenda ndo tandihí tsa tsicá xaan iñi ndo ndaha Nyoo tyin maa ra jahá cuenda tsi ndo.

⁸ Catsi cūhun iñi ndo tan jaha vaha ndo cuenda ndáa tsa vaha tan ndáa tsa ña vaha, tyin nu ña vaha, nu xaan iñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú ti tsa catsi ti. ⁹ Ñihi cūnyecu ndo tsihin tsa tsinú iñi ndo tsi Nyoo tyin tacan tan cuví jaha ndo tsi nu ña

vaha. Tyin juvin ñi tundoho tsa nyehé nyooho tan nyehé tucu tandihí ca nyivi yihí cuenda ra Cristo tanií cahnu nu ñuhu ñayivi. ¹⁰ Maa tyin Nyoo jatyinyeé ra tsi yo, tan tsa yaha nyehe ndo tundoho juhva quivi, Nyoo cua jacutsa ca ra tsi ndo, ñihi cūnyecu ndo tsihin tsa tsinú iñi ndo, tan cua cuhva ca ra tunyee iñi tsa iyó tsi ra tsi ndo. Tan juvin Nyoo cuví ra tsahá tandihí tsa vaha tsi yo, tan maa ra cana tsi yo tyin ndu iin yo tsihin ra Cristo tyin coo yo nu sii caá tsihin ra tacan ñi maa. ¹¹ Na jacahnu yo tsi ra tan na cundaca ñaha maa ra tacan ñi maa. Tan na cuví tsi tacan.

Nu tsahá ra Pedro nacumi tsi nyivi nu ndihí ña

¹² Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin ñi xaan iñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñí xaan Nyoo tsi yo. Yacan cuenda ña nācoo ndo itsi.

¹³ Nyivi yihí cuenda Nyoo ñuu Babilonia tsa nacatsi Nyoo tumaa nacatsi ra tsi nyooho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihí ra nacumi tsi ndo.

¹⁴ Cuñi tahan ndo tsi ndo tan cūhva tahan ndo nacumi tsi ndo.

Na coo ca tsa taxin aña
tandih nyooho tsa iin ñi cuví
tsihin ra Jesucristo.

Tan na cuvi tsi tacan ñi.

Carta Tsinu Uvi Tsa Jacuhun Ra Pedro Tsi Nyivi Yihí Cuenda Nyoo

Nu tyaá ra Pedro inga carta tsa cuenda nyivi yihí cuenda Nyoo

¹ Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinu vaha iñi tsi Nyoo tumaa tsa tsinú iñi nyuhu. Inducu ñi tsinú iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo. ² Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

Nacaa taahán tsi coo nyivi yihí cuenda Nyoo

³ Nyoo, tsihin tunyee iñi tsa iyó tsi ra, tsahá ra tandihí tsa tsiñí ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahá ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyo tsa javahá ra. ⁴ Tan tsihin tandihí tsa vaha can, tsahá tucu ra tsa catyí ra tyin cuhva ra tsi yo. Maa

tyin cahnu xaan tan yahvi xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacoó yo tandihí tsa caquiñi tsa javahá yo, tan ña cua tiví yo tumaa tiví nyivi nyicún tsa ña vaha tsa iyó nu ñuhu ñayivi ihya. ⁵ Yacan cuenda cuñí tsi tsinú ca iñi yo tsi Nyoo tan ñavin yacan ñi tyin cuñí tucu tsi nducu yo cuhva coo cuiti yo. Tan cuñí tucu tsi nducu yo cuhva cutuñi vaha iñi yo cuhva cuñí Nyoo tsihin yo. ⁶ Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihi iñi yo. Yaha can tan nducu yo cuhva coo yo ñayivi iyó Nyoo. ⁷ Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñí maa Nyoo tsi tandihí yo.

⁸ Tatun tacan iyó ndo tan tacan nducú ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan. ⁹ Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñí iñi ñi tsa taahán tsi coto ñi. Tan tsa naa iñi ñi tyin ndatsí Nyoo cuatyí ñi tahan tsanaha. ¹⁰ Nyoo caná tsi ndo tan nacatsí ra tsi ndo. Yacan cuenda yañi, tun javahá ndo tandihí tsa caahán yu tuhun ihya, ña cua nduva ihñi

ndo. ¹¹ Tacan tan ña yñi cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuíi ndo tsihin ra.

¹² Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñi cuñi ndo javahá ndo tuhun nditsa tsa cutuhva ndo. ¹³ Tan cuñi yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu. ¹⁴ Tyin tsa jacoto Jutu Mañi yo Jesucristo tsi yu tyin ña naha ca tan cua nacoo yu ñuhu ñayivi ihya. ¹⁵ Tan cua jañiñi yu tsi yu tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

Nu nacatyí tuhun ra Pedro nácaa nyehe ra naha tsa cahnu cuví ra Cristo

¹⁶ Ñavin tsa nandacu iñi ñi maa ndi tan cahán ndi tsihin ndo quivi jacoto ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyehe ndi tsa cahnu cuví ra. Tan jacoto ndi tsi ndo tyin iyó xaan tunyee iñi tsi ra tan cua quitsi ra inga tsaha. ¹⁷ Tyin nyehe ndi nu jacahnu Nyoo Jutu yo tsi ra tan nyehe ndi nu janduxiñu ra cuhva caá ra. Tan si xaan cuví nu cahán Nyoo tan catyí ra: “Ra ihya cuví Sehe yu, tan cuñi xaan yu tsi ra. Tan si xaan cuñi yu tsihin ra”, catyí Nyoo tuhun ra Jesús quivi can. ¹⁸ Juvín yuhuh tsiñi ndusu Nyoo tsa

quitsi ityi andivi quivi tsiyucu ndi yucu ii tsihin Jutu Mañi yo.

¹⁹ Tuhun ihya janahá tyin nditsa tsa tyaa ra cuví ndusu yuhu Nyoo nu tutu tahañ tsanaha. Tatun tyaa yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tuvi tyin jandunditsín ra tsitsi aña yu. ²⁰ Maa tyin cuñi tsi coto ndo tyin ña cuví nacatyí tuhun tsa intuhun ñi maa yo tsa cuñi tsi catyí tsa tyaa ra ndusu yuhu Nyoo. ²¹ Tyin ra cuví ndusu yuhu Nyoo tahañ tsanaha ña cahán ra naha cuhva cuñi maa ra naha. Maa tyin cahán ra naha cuhva cuñi Nyoo tyin maa Tatyí Ii Nyoo jaquihín ityi tsi ra naha.

2

Ra jacuahá tsa ña nditsa (Judas 4-13)

¹ Maa tyin tsicoo tucu ra cahán cuendu naha ra nu tsicoo nyivi Israel tahañ tsanaha. Catyí ra naha tyin cuví ra naha ndusu yuhu Nyoo tan ña nditsa. Tan tacan cua coo tucu ra vatya naha ra nu yucú ndo. Xeehe xaan cua jacuaha ra naha tsa ña nditsa tsa cuví jativi tsi ndo. Tan cua catyí ra naha tyin ña nditsa tuhun Jutu Mañi yo tan juvin ra jata tsi ra naha. Yacan cuenda numi ñi cua cunaa ra can naha ra. ² Tan cuaha xaan nyivi cua cunyicun tsi

ra naha tsihin tsa caquiñi tsa javaha ra naha. Tan cuaha xaan ñi cua cahan ndavaha ñi siqui tuhun tsa nditsa vaha ra Cristo. ³ Tan tsa cuenda tsa cuñi ra naha xuhun, cua nducu ra naha cuhva jandavi ñaha ra naha tsi ndo tsihin tsa jacuaha ra naha maa ñi tsa ña nditsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

⁴ Tyin ndi ña jahā Nyoo tuc-ahnu iñi tsi ángel tsa tsicoo cu-atyí tahañ tsanaha. Jacuhun ra tsi nahnu anyaya. Tsahñi ra tsi nahnu tsihin cadena, tan nacoo ra tsi nahnu nu naa nda cuanda tahañ tsi jacutuñi ra tsi nahnu. ⁵ Tan ndi ña jahā ra tucahnu iñi tsi nyivi ña vaha tsa tsicoo tsanaha. Jacuhun ra savi xaan tsahñi tsi ñi. Maa tyin jacacu ra tsi intuhun ñi ra Noé tsihin utsa taahan nyivi ra. Ra ican cahān ra tsihin nyivi na nducu ñi cuhva coo vaha ñi tsihin Nyoo. ⁶ Tacan javahā tucu ra tsihin ñuu Sodoma tan ñuu Gomorra, janaa ra itsi. Tsahm̄j ra ñuu can tan nanduv̄j tsi nyaa, tyin coto nyivi caquiñi tsa iyó vityin tan nyivi tsa cua coo náa cua tahañ ñi. ⁷ Maa tyin jacacu ra tsi ra Lot tyin vaha iyó ra nuu ra. Cuihya cuñi ra Lot nyehé ra cuhva iyó nyivi caquiñi can. ⁸ Tandih̄i quivi tsa tsicoo ra Lot ñuu can, cuihya cuñi añima ra tsa cuenda tsa tsiñi ra tan nyehé ra tsa caquiñi javahá ñi can. Tyin maa ra, ra vaha cuví ra, tan ñi ican maa ñi tsa ña vaha

javahá ñi. ⁹ Tacan jacacu Nyoo tsi yo tatun vaha iyó yo nuu ra. Maa tyin naquihín vaha ra tsi nyivi caquiñi nda cuanda tahañ tsi quivi cutuñi ñi.

¹⁰ Yaha ca cua tatsi tuñi Nyoo tsi nyivi tsa javahá tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha cuhva cuñi maa ra naha. Tan ña yu-uhví ra naha caahān ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha. ¹¹ Tan ángel, vasu ndi maa iyó ca tunyee iñi tsi ra naha tan ñavin ca nyivi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

¹² Maa tyin ra vatya can naha ra cuví ra naha tumaa quiti tsa ña cutuñi iñi tan javahá ti naha ti tsa cuñi maa ti naha ti. Tyin quiti, ¿náa cuenda iyó ti? Iyó ti tyin tñn yo tsi ti, tan cahñi yo tsi ti. Tacan ra can naha ra: Caahān ra naha ndavaha ñi siqui tsa ña cutuñi iñi ra naha, tan cua cúu ra naha tumaa tsihi quiti can naha ti. ¹³ Cua nyehe ra naha tundoho tsa cuenda tsa janyehé ra naha tundoho tsi inga nyivi. Sii xaan cuñi ra naha tsihin tsa caquiñi javahá ra naha nu tuví. Tsahá ra naha ticanuu nu yucú ndo nu iyó vico tatun cutahān ra naha tsihin ndo. Nyaá xaan ra naha tusii iñi. Maa tyin juvin ñi tsi maa ra naha jandavi ñaha ra naha.

¹⁴ Tandih̄i ñaha tsa nyehé

ra naha, cuñí ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandaví ñaha ra naha tsi nyivi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha. ¹⁵ Nacoo ra can naha ra ityi vaha tan naquihin ra naha ityi tsa cuahán nu cua cunaa ra naha tyin javahá ra naha tumaa javahá ra Balaam, sehe ra Beor. Tyin ra Balaam cuñí ra jaha canaa ra xuhun tsihin tsa ña vaha tsa javaha ra. ¹⁶ Tacan tan nacahan burru jana ra tsihin ra, tumaa caahán nyivi, tan tsa nacahan ti ña tsahá ti cuhun ra javaha ra tsa ña vaha tsicá ñi ra.

¹⁷ Tan tacan tucu maa ra can naha ra. Cuví ra naha tumaa iin soco ityi nu nduve ndutya yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cuhun ra naha nu naa xaan tan ican cuví nu cua ndoo cuí ra naha. ¹⁸ Yaa xaan caahán ra naha. Maa tyin tandihí tsa caahán ra naha nduve yahvi nyaá can. Tan tsihin tandihí tsa ña vaha tsa javahá ra tan tsihin tsa ña vaha tsa cuñí cuñu ñuhu ra naha jandaví ñaha ra naha tsi nyivi tsa tsa yaha quitá mahñu nyivi tsa javahá tsa caquiñi. ¹⁹ Catyí ra naha tsihin ñi tyin cua coo nuña ñi. Maa tyin juvin ñi maa ra naha tsahá tsa cundaca ñaha tsa caquiñi tsi ra naha. Tyin tatun tsahá yo tsa cundaca ñaha tsa cundaca ñaha tsi yo,

musu can cuví yo. ²⁰ Tyin nyivi tsa nacoto tsi Jutu Mañi yo Jesucristo, ra jacacú tsi yo, tsa yaha nacoo ñi tsa caquiñi tsa iyó nu ñuhu ñayivi ihya maa tyin tatun javaha nyico ñi tsa caquiñi, cahnu ca cuatyí ñi cua coo nu Nyoo. ²¹ Vaha ca tun tsatyin ña nacoto ñi ityi vaha, tan ñavin ca tsa nacoo ihñi ñi tsa tsahá Nyoo tsi ñi tsa tsa yaha nacoto ñi tsi ra. ²² Maa tyin cundaa tsa tuhvá nyivi caahán: “Ina tsatsí nyico ti tsa ndutsan ti. Tan quini tucu, tun tsa yaha tsityí ti, quihví nyico ti nu xahan nyahyu.” Tacan cuví ñi can tyin javahá nyico ñi tsa javahá ñi nda jihna.

3

Quivi cua quitsi nyico Jutu Mañi yo

¹ Yañi, cuñí xaan yu tsi ndo. Carta ihya cuví carta tsinu uvi tsa jaquitsí yu tsi ndo. Tan nu nduvi taahan carta ihya tsahá cuenda yu tsi ndo na caca vaha ñi ndo tan ña naa ñi ndo tsa cutuhvá ndo. ² Ndūcuhun ñi ndo tsa cahán ra cuví ndusu yuhu Nyoo tahañ tsanaha. Tan ndūcuhun tucu ñi ndo tsa jacuahá ndi tsi ndo. Tyin cuví ndi ra tava tyiñu Jutu Mañi yo Jesucristo, ra jacacú tsi yo.

³ Coño jihna ndo tyin nu cua ndihí quivi cua quitsi nyivi cua vacu nducu tuhun Jutu Mañi yo. Tan cua coo ñi cuhva ña vaha cuñí cuñu ñuhu ñi. ⁴ Tan cua catyí ñi: “¿Naa ra Jesucristo tsa catyí tyin cua quitsi ra inga tsaha?

¿Numaa nyíí ra? Tyin nda quívi tsa tsihí tsií tsaahnu yo tan nda cuanda tsa tsinu ñuhu ñayívi tan nda vityin caá ñi maa tahan ñi caá”, cua catyi ñi. ⁵ Tyin maa ñi ña cuñí ñi coto ñi tyin nda tyembu tsahnu cahān Nyoo tan javahā ra andívi tan ñuhu ñayívi. Quita ñuhu ñayívi tsitsi ndutya, tan tsihin ndutya tsinu tsi. ⁶ Tsa yaha javahā Nyoo ñuhu ñayívi juvin ñi maa tsihin ndutya naa ñuhu ñayívi quívi cuñ savi xaan. ⁷ Maa tyin andívi tan ñuhu ñayívi tsa iyó vityin ndatú tsi tsa cayu tsi tumaa catyi maa Nyoo. Cua cayu andívi tan ñuhu ñayívi tsihin ñuhu quívi cua cutuñi nyívi tan cua naa nyívi caquiñi.

⁸ Maa tyin nyooho yañi yu tsa cuñí xaan yu, ña naa iñi ndo tyin tsa cuenda Jutu Mañi yo tsa iin quívi cuví tsi tumaa mil cuiya, tan tsa mil cuiya cuví tsi tumaa tsa iin quívi tsa cuenda ra. ⁹ Vasiqui yihí ndo tsicá iñi ndo tyin maa Jutu Mañi yo ña cuñí naha quívi. ñaha ca quívi ra tyin ndatú jihna ra nda ndu uví iñi tandihí nyívi tan nasama ñi kuhva iyó ñi tyin ña cuñí ra tsa cunaa ndi intuhun yo.

¹⁰ Maa tyin quívi cua quívi Jutu Mañi yo, yoñi maa cua coto tyin cua quívi ra quívi tsa ña ndatú yo tsi ra. Cua quívi ra tumaa iin ñasuhu. Tan ñihi cunahma tan cua naa andívi. Tan cua janaa ñuhu tandihí tsa iyó ityi síqui. Tan ñuhu ñayívi cua cayu tsi

tsihin ñuhu tsihin tandihí tsa iyó nuu tsi.

¹¹ Tacan cua naa tandihí tsa iyó. Yacan cuenda cuñí tsi cuiti coo yo tumaa iyó maa Nyoo. ¹² Cuatu ndo quívi quívi Nyoo. Nducu ndo kuhva quívi ñi ra tyin quívi tsa cua quívi ra cua naa andívi jaha ñuhu. Tan tandihí tsa iyó cua naa tsi tsihin tsa ihñi ñuhu can. ¹³ Maa tyin yoo ndatú yo andívi tsa tan ñuhu ñayívi tsa tsa catyi Nyoo tyin kuhva ra tsi yo. Tan maa ñi maa tsa vaha tsi Nyoo cua coo ican.

¹⁴ Yacan cuenda yañi, tsitsi tsa ndatú yo tsi Jutu Mañi yo, nducu ndo kuhva coo vaha ndo tsihin Nyoo, tyin tacan tan quívi quívi ra, siñi cua cuñi yo tan cua coo taxin añima yo tyin nduve ca cuatyí yo iyó. ¹⁵ Coto ndo tyin Jutu Mañi yo ña cundihí iñi ra ndatú ra tsi yo tyin cuñí ra tsa cacu cuaha nyívi. Juvin ñi tyehen caahán tucu ra Pablo yañi yo nu carta tsa jaquitsi ra tsi ndo. Tyaā ra itsi tsihin tsa tsíñi tuñi tsa tsahā Nyoo tsi ra. ¹⁶ Tandihí ñi nu carta ra tan caahán ra tuhun ihya. Vasu yihí tsa yíi xaan cutuñi iñi yo. Tan nyívi tsa ña cutuñi iñi, ñi tsa ña ñihi nyaá tsihin Nyoo, siñi kuhva cutuñi iñi ñi itsi. Juvin ñi tacan javahá ñi tsihin tuhun Nyoo tsa tyaā inga ca ra naha. Tan tsa tacan javahá ñi, juvin ñi tsi maa ñi jacunaá ñi.

¹⁷ Yacan cuenda yañi, vityin tsa tsitó ndo tuhun ihya tsa ndi cumañi ca cuví tsi, jaha ndo cuenda tsi ndo

tan cuñí yu tsa coto ndihi
ndo cuhva jandaví ñaha ra
caquiñi can naha ra, tyin
tacan tan ña nacoo ndo cuhva
vaha tsa cuahán ndo. ¹⁸ Maa
tyin cuñí tucu tsi nacoto vaha
ca ndo tsi Jutu Mañi yo ra
Jesucristo, ra jacacú tsi yo.
Tan cuahnu ca ndo tsihin tsa
vaha ra tsa tsahá ra tsi yo. Na
jacahnu yo tsi ra vityin tan
tacan ñi maa.

Tan na cuvi tsi tacan ñi.

Carta Tsa Jihna Ñi Tsa Tyaa Ra Juan

Cua coo yo ñayivi nyito

¹ Ihya tyaá ndi tuhun ra tsa iyó nda ndi cumañi coo tandihí tsa iyó. Tsiñi ndi tsa cahan ra quivi tsicá ndi tsihin ra. Nyehe ndi tsi ra tsihin tinuu ndi tan cutuñi iñi ndi yoo ra cuví ra. Tan tijn ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsaha ra ñayivi nyito iyó yo. ²Tan quivi tsaá ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaá tsi nu iyó yo. ³Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuvi ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra. ⁴Tan tyaá ndi tuhun ihya tsa cuenda ndo tyin tacan tan coto ndo tandihí tsa tsahá Nyoo tsi ndo tan sñi xaan cua cuvi tsi ndo.

Nyoo, ñuhü cuví ra

⁵ Vityin nacatyí tuhun ndi tsihin ndo tsa cahan ra Cristo tsihin ndi. Catyí ra tsihin ndi tyin Nyoo ñuhü cuví ra. Tan nduve tsa naa tsi ra, [nduve tsa ña vaha tsicá iñi ra cuví can]. ⁶ Tun catyí yo tyin iin ñi cuví yo tsihin ra, tan ndi iyó ca maa yo nu naa, jandaví

ñaha yo tan ña javahá yo tsa nditsa. ⁷ Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihí cuatyí yo tsihin niñi ra.

⁸ Tatun catyí yo tyin nduve cuatyí yo, juvin ñi maa yo jandaví ñaha yo, tan nduve tsa nditsa iyó aña yo. ⁹ Maa tyin tatun naahmá yo cuatyí yo nuu Nyoo, cuví cuita iñi yo tsi ra tyin cua jaha ra tucahnu iñi tsi yo tsa cuenda cuatyí yo tan cua nacatya ra tandihí cuatyí yo tyin maa ra vaha ra tan javahá ra cuhva catyí ra tyin ña vatya ra. ¹⁰ [Nyoo catyí ra tyin iyó cuatyí yo], tan tatun catyí yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó aña yo.

2

Ra Cristo cuví ra caahán ndaahvi tsaha yo

¹ Sehe nyihi yu, caahán yu tandihí tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuví ca nduvaha ndo nuu Nyoo, tyin iyó iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cuiti iyó. ² Juvín ra jahá tucahnu iñi tsi yo tyin tsihi ra nu cruu tsa cuenda cuatyí yo. Tan ñavin tsa cuenda maa ñi maa yo tsihi

ra, tyin tsihi ra tsa cuenda tandihi cuii nyivi iyó nu ñuhu ñayivi.

³ Tatun tyaá yahvi yo tsa caahán Nyoo, nacotó yo tsi ra. ⁴ Maa tyin tatun iin ra tsa catyí tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra. ⁵ Nyivi javahá tsa caahán Nyoo, ñi ican cuví ñi cuñí tsi ra tsihin tsa ñi ñi añima ñi. Tan tsihin yacan tsitó yo tyin iin ñi cuví ñi tsihin ra. ⁶ Nyivi catyí tyin iin caa ñi iyó ñi tsihin Nyoo, taahán tsi coo ñi tumaa tsicoo maa ra Jesucristo quivi quitsi ra nu ñuhu ñayivi ihya.

Taahán tsi tsa cuñí tahan yo tsi yo

⁷ Yañi, ñavin tuhun tsa ja-cotó yu tsi ndo, tyin cuví tsi tuhun tsahnu tsa tsa tsitó maa ndo nda quitsi ca tsi. Tan juvin tsi cuví tsa tsa yahá tsiñi ndo. ⁸ Maa tyin ña tsindihí tsa tsa tsi tyin tyaá yahvi yo itsi tan tsa tyaá yahvi yo itsi, cuñí tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihi ca jandunditsín ñuhu tsa nditsa.

⁹ Nyooho tsa catyí tyin iyó ndo nu nditsin, tan ndasi cuñí ndo nyehe ndo tsi nyivi yihí tuhun Nyoo tsihin ndo, ndi iyó ndo nu naa. ¹⁰ Maa tyin nyivi tsa cuñí tsi nyivi yihí tuhun Nyoo tsihin ñi, iyó ñi nu nditsin. Tan nduve maa cuatyí cuvi janduva tsi ñi. ¹¹ Maa tyin nyivi ndasi cuñí nyehe tsi nyivi yihí tuhun

Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehé ñi tyin tumaa tsa cuaa ñi jahá tsa naa can.

¹² Jaquitsí yu tandihi tuhun ihya tsi nyooho tsa ndi nacuhva cuenda tsi ndo tsi Nyoo. Tyin tsa yahá jahá Nyoo tucahnu ñi cuatyí ndo tsa cuenda tsa tsihi ra Jesucristo cuenda yo. ¹³ Nyooho tsa tsa tsahnu tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayivi. Tan tyaá tucu yu itsi tsa cuenda nyooho ra tsa ndi cuahan cutuñi vaha ñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhva cuenda tsi ndo tsi Nyoo, tyin nacotó ndo tsi Nyoo Jutu yo. ¹⁴ Jaquitsí yu carta ihya tsi nyooho tsa tsa tsahnu tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayivi. Tan jaquitsí yu carta ihya tsi nyooho tsa ndi cuahan cutuñi vaha ñi tuhun ra Cristo, tyin iyó xaan tunyee ñi tsi ndo jahá tuhun Nyoo tsa iyó añima ndo. Tan jahá canaa ndo tsi nu ña vaha.

¹⁵ Ña cuñi ndo tsa caquiñi tsa iyó nu ñuhu ñayivi ihya. Tyin nyivi cuñi tandihi yacan, ña cuñi ñi tsi Nyoo Jutu yo. ¹⁶ Tyin tandihi tsa ña vaha tsa iyó nu ñuhu ñayivi ihya, tsa cuñi cuñu ñuhu yo, tsa nyehé yo tan cuñi yo coo tsi yo, tan

tsa cuñi yo nduyaa yo tsihin tsa iyó tsi yo, tandihi yacan tsahá ñuhu ñayivi ihya tsi yo, tan ñavin Nyoo Jutu yo tsahá can. ¹⁷ Ñuhu ñayivi ihya cua cundihí can, tan cua cundihí ndihí tucu tandihi tsa caquiñi tsa cuñi nyivi javaha ñi. Maa tyin nyivi tsa javahá cuhva cuñi Nyoo, cua coo cuii ñi tsihin ra.

Nu tsa ndasi cuñi nyehe tsi ra Cristo

¹⁸ Nyoooho, tsa cuví ndo tumaa sehe yu, coto ndo tyin tsa cua ndihí quivi. Tan nyoooho tsiñi ndo tyin vatsí nyivi tsa ña cuñi nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahañ tsi cundihí quivi. ¹⁹ Nyivi can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyivi yihí tuhun Nyoo tsihin yo cuví ñi.

²⁰ Maa tyin nyoooho tsa tsitó ndo tsa caahán Nyoo tyin tsahá ra Cristo Tatyí Ii Nyoo iyó aña ndo tan jacotó tsi tandihi tsi ndo. ²¹ Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuví quita tuhun vatya tsihin tuhun nditsa.

²² ¿Yóo cuví nyivi vatya? Nyivi vatya cuví ñi catyí tyin ra Jesús ñavin ra Cristo cuví ra. Tan juvin ñi ican cuví ñi

ndasi cuñi nyehé tsi ra Cristo. Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra. ²³ Tan tandihi nyivi tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyivi tsa caahán tsihin tsa ñi iñi aña ñi tsihin nyivi tyin ra Jesucristo cuví Sehe Nyoo, iyó Nyoo Jutu yo tsihin ñi.

²⁴ Yacan cuenda naquihin vaha ndo tsitsi aña ndo tandihi tsa tsiñi ndo nda quivi jihna ñi. Tyin tun naquihin vaha ndo itsi tsitsi aña ndo, cua coo ndo iin caa ñi tsihin Nyoo Jutu yo tan tsihin Sehe ra. ²⁵ Tan ñayivi nyito can cuví tsa catyí ra Jesucristo tyin cuhva ra tsi yo.

²⁶ Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandaví ñaha tsi ndo. ²⁷ Maa tyin ra Jesucristo tsahá ra Tatyí Ii Nyoo iyó aña ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí Ii Nyoo jacuahá tandihi maa tyiñu tsi ndo. Tan tsa nditsa cuví tsi, ñavin cuenda cuví tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí Ii Nyoo tsi ndo.

²⁸ Tan vityin nyoooho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quivi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahañ yo ticanuu nuu ra quivi tsa ra. ²⁹ Vityin tsa tsa tsitó ndo tyin

vaha ra Cristo, cuñi tsi coto ndihi ndo tyin tandihi nyivi javahá tsa vaha, sehe Nyoo tsi ñi.

3

Nyivi cuví sehe Nyoo

¹ Nyehe ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuví yo sehe ra. Tan tsa cuenda yacan, nyivi taahán iñi tsa iyó nu ñuhu ñayivi ihya ña cutuñi iñi ñi cuhva tsicá iñi yo tyin ña nacoto ñi tsi maa ra. ² Nyooho yañi, tsa cuví yo sehe ra vityin, maa tyin ñaha ca coto yo náa cua cuví yo. Maa tyin tsitó yo tyin quivi quitsi ra Jesucristo, cua cuví yo tumaa cuví maa ra, tyin cua nyehe vaha yo tsi ra tan cua nyehe tucu yo náca caá ra. ³ Tandihí yoo tsa ndatú tsa cua cuví tacan, nducú yo cuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuiti iyó ra.

⁴ Tandihí nyivi tsa tsicoó cuatyí, ñi ican cuví ñi tsa ña tyaá yahvi ley Nyoo. Tyin tun javahá yo tsa ña vaha, cuñi tsi catyi tyin ña tyaá yahvi yo ley Nyoo. ⁵ Nyooho tsa tsitó tyin ra Cristo quitsi ra nu ñuhu ñayivi ihya tyin quinyaa ra cuatyí yo, tan tsitó tucu ndo tyin maa ra nduve cuatyí ra. ⁶ Tandihí yoo tsa iyó iin caa ñi tshin ra, ña jañihí ca yo javahá ca yo tsa ña vaha. Maa tyin nyivi javahá tsa ña vaha, ñaha ca nyehe ñi tsi ra, tan ñaha ca coto ñi tsi ra. ⁷ Nyooho, tsa

cuví tumaa sehe yu, coto jandavi ñaha nyivi tsi ndo. Tyin nyivi javahá tsa vaha, cuví ñi nyivi vaha, tumaa vaha maa ra Cristo. ⁸ Tyin nyivi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quivi jihna ñi. Yacan cuenda quitsi ra Jesucristo, Sehe Nyoo, tyin janaa ra tandihí tsa javahá nu.

⁹ Tandihí yoo tsa tsa yaha nacacu tsa jahá Nyoo, ña taahán ca iñi yo javahá yo tsa ña vaha, tyin iyó yo ñayivi tsahá Nyoo tsi yo. Yacan cuenda ña javahá ca yo tsa ña vaha, tyin tsa yaha nacacu tsa yo tan vityin cuví yo sehe Nyoo. ¹⁰ Cuví nacotó yo ndaa nyivi cuví sehe Nyoo, tan ndaa nyivi cuví sehe nu ña vaha, tyin tandihí nyivi tsa ña javahá tsa vaha tan ña cuñi tsi nyivi yihí cuenda Nyoo, ñavin sehe Nyoo tsi ñi.

Na cuñi tahan yo tsi yo

¹¹ Tyin tsa tsiñi ndo nda quivi jihna ñi cuví: Tsa cuñi tahan yo tsi yo. ¹² Ña taahán tsi javaha yo tumaa javahá ra Caín, tyin ra Caín cuví ra iin ra cuenda nu ña vaha. Tan tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javahá ra tsa vaha, tan maa ra javahá ra tsa ña vaha.

¹³ Nyooho yañi, ña iyo cuñi ndo tun ndasi cuñi nyivi ña yihí tuhun Nyoo nyehé ñi tsi ndo. ¹⁴ Yoo tsa cuñi tsi nyivi yihí tuhun Nyoo tsitó yo tyin

iyó yo ñayivi nyito, tyin juvin tsi janahá tsi yo tyin ña cuví ca yo nyivi tsihi. Maa tyin nyivi ña cuñi tsi nyivi yihí tuhun Nyoo, cuví ñi tumaa nyivi tsihi. ¹⁵ Nyivi ndasi cuñi nyehé tsi nyivi, cuví ñi tumaa nyivi tsahñi nyivi. Tan tsitó ndo tyin ndi intuhun ñi tsahñi nyivi, tan ña cua cuhva Nyoo ñayivi nyito coo ñi. ¹⁶ Tsitó yo náa cuví tsa cuñi tahan yo tsi yo tyin tsa yaha janaha ra Jesucristo tsi yo náca taahán tsi cuñi tahan yo tsi yo. Tyin maa ra nda cuanda tsaha ra ñayivi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñi tsi cuhva yo nda cuanda ñayivi iyó yo tsa cuenda nyivi yihí tuhun Nyoo. ¹⁷ Tatun yihí yo tan iyó luxu tsa iyó tsi yo, tan nyehé yo tyin cumañi tsa cumañi tsi inga nyivi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra. ¹⁸ Nyooho tsa cuví ndo tumaa sehe yu, na ña cuñi yo tsi nyivi tsihin tuhun caahán ñi yo, na cuñi tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa ñi iñi yo.

Nacaa javaha yo tan coo vaha yo tsihin Nyoo

¹⁹ Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo. ²⁰ Tatun tuví iñi tsitsi añima yo tyin iyó cuatyí yo, na ña cuita iñi yo ya-

can. Na cuita iñi yo tsi Nyoo tyin juvin ra tsitó tandihi tsa iyó añima yo tan cahnu ca cuví ra tan ñavin ca añima yo. ²¹ Yañi, tatun tuví iñi yo tyin nduve cuatyí yo, na ña nayuhvi yo nyehé yo tsi Nyoo. ²² Tan tandihi tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán iñi ra. ²³ Tyin tyiñu tsa tsaha ra tsi yo yacan cuví tsa tsinu iñi yo tyin ra Jesucristo cuví Sehe ra, tan tsa cuñi tahan yo tsi yo, tumaa tava tyiñu ra tsi yo. ²⁴ Nyivi tyaá yahvi tyiñu tsaha ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyí Ii ra tsa tsaha ra tsi yo.

4

Tatyí Ii Nyoo tan tatyí nu ña vaha

¹ Nyooho yañi tsa cuñi xaan yu, ña tsinu iñi ndo tsa caahán nyivi catyí tyin tuhun Nyoo caahán ñi. Nyehé jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaha xaan nyivi jandaví ñaha iyó. Catyí ñi tyin Nyoo caahán tsa caahán ñi tan ña nditsa ñi. ² Cuví nacoto ndo tsi nyivi tun juvin Tatyí Ii Nyoo jacahán tsi ñi o ñavin. Ñi tsa iyó Tatyí Ii Nyoo tsihin, catyí ñi tyin quee ra Jesucristo nda gloria tan quitsi ra nu ñuhu ñayivi ihya, tan cuví ra iin rayi tumaa maa yo. ³ Maa tyin tandihi nyivi tsa catyí tyin

ñavin tacan cuv̄j, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsi nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

⁴ Nyoooho tsa cuví ndo tumaa sehe yu, nyivi cuenda Nyoo cuví ndo. Tan tsa yaha jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuví ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihya. ⁵ Ñi ican, cuenda nu ñuhu ñayivi ihya cuví ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi cuenda nu ñuhu ñayivi ihya tyaá soho ñi tsa caahán ñi ican. ⁶ Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuví nacoto yo ndáa nyivi iyó Tatyí Ii Nyoo tsihin, tan caahán ñi tsa nditsa tan ndáa nyivi yihí tatyí ña vaha tan jandaví ñaha ñi.

Nyoo cuñi xaan ra tsi tandihi nyivi

⁷ Nyoooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihi yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo. ⁸ Nyivi ña cuñi tsi inga nyivi, ña nacotó

ñi tsi Nyoo, tyin Nyoo cuñi xaan ra tsi yo tan tsi tandihi nyivi. ⁹ Nyoo janahá ra tsi yo tsa cuñi ra tsi yo tsihin tsa tsahá ra Sehe mañi ra quitsi nu ñuhu ñayivi ihya, tyin cuhva ra ñayivi nyito coo yo. ¹⁰ Nyehe ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquitsi ra Sehe ra tyin tacan tan cúu ra tsa cuenda yo tan quinyaa ra cuatyí yo.

¹¹ Nyoooho yañi, tatun tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo. ¹² Ndi intuhun maa nyivi, tan ñaha ca maa nyehe ñi tsi Nyoo, maa tyin tatun cuñi tahan yo tsi yo, iyó Nyoo añima yo. Tan ñi vaha iñi yo cuñi yo tsi ra tan tsi nyivi. ¹³ Tan tsitó yo tyin iyó vaha yo tsihin ra tan maa ra iyó ra añima yo, tyin tsahá ra Tatyí Ii ra iyó añima yo. ¹⁴ Nyuhu nyehe vaha ndi tan cuví ndi tsandaa tyin jaquitsi Nyoo Jutu yo tsi Sehe ra tyin jacacu ra tsi yo tsa cuví yo nyivi iyó nu ñuhu ñayivi ihya. ¹⁵ Tandihi nyivi tsa tsinú iñi tan caahán tyin ra Jesús cuví Sehe Nyoo, iyó Nyoo añima ñi. Tan iyó ñi iin caa ñi tsihin ra.

¹⁶ Yoo tsitó yo tan tsinú iñi yo tyin Nyoo cuñi ra tsi yo, tan cuñi ra tsi tandihi nyivi. Tan tandihi yoo tsa cuñi tahan yo tsi yo, iyó yo iin caa ñi tsihin Nyoo; tan Nyoo iyó ra tsitsi añima yo. ¹⁷ Tyin tatun cuñi yo tsi Nyoo tsihin

tsa n̄i iñi añima yo, ña cua nayuhvi yo nyehe yo tsi ra na tahan tsi quiv̄i cutuñi tandih̄i nyiv̄i nuu ra. Tyin tumaa iyó ra Jesucristo, tacan iyó yo nu ñuhu ñayiv̄i ihya. ¹⁸ Nyoo cuñí ra tsi yo, tan tatun cuñí yo tsi ra, nduve tsa nayuhvi yo. Tatun n̄i iñi yo cuñí yo tsi Nyoo ña nuña ca nu quihv̄i tuhun yuuhv̄i can añima yo, tyin Nyoo jatsiyó ra tandih̄i maa yacan. Tyin tatun yuuhv̄i yo, yih̄i can tyin tuv̄i iñi yo tyin iyó cuatyí yo. Tan yuuhv̄i yo tsa cua tatsi tuñi Nyoo tsi yo. Tyin tatun yuuhv̄i cuñí yo, yuuhv̄i yo tyin ñaha ca cuñi yo tsi Nyoo tumaa taahán maa tsi cuñi yo tsi ra.

¹⁹ Yoo cuñí yo tsi Nyoo tyin jihna ca maa ra cuñí tsi yo. ²⁰ Tatun iin nyiv̄i tan catyí ñi: “Yuhu cuñí yu tsi Nyoo”, tan ndasi cuñí ñi nyehé ñi tsi nyiv̄i tahan ñi, nyiv̄i vatya cuv̄i ñi. Tyin tatun ndasi cuñí yo nyehé yo tsi nyiv̄i tahan yo tsa tuhv̄a yo nyehé, ¿nácaa cua cuñi yo tsi Nyoo tsa ña cuv̄i nyehe yo? Ña cua cuv̄i. ²¹ Tav̄a tyiñu Nyoo tsi yo tyin tun cuñí yo tsi ra, tacan cuñí tsi tsa cuñí tahan yo tsi yo.

5

Tatun n̄i iñi yo tsinú iñi yo tsi Nyoo cuv̄i jaha canaa yo tsi tsa ña vaha

¹ Tandih̄i nyiv̄i tsa tsinú iñi tyin ra Jesús cuv̄i ra Cristo ra quee nda gloria jah̄a Nyoo, juvin ñi cuv̄i sehe Nyoo. Tyin tatun cuñí yo tsi iin ra iyó

sehe, cuñí ndih̄i yo tsi sehe ra. ² Tatun cuñí yo tsi Nyoo tan javahá yo tsa caahán ra, cua cuñi ndih̄i yo tsi nyiv̄i cuv̄i sehe ra. ³ Tyin tsa cuñí yo tsi Nyoo yacan cuv̄i tsa tyaá yahvi yo tsa tsah̄a cuenda ra tsi yo. Tan tandih̄i tsa tsah̄a cuenda ra tsi yo, ña ȳi javaha yo can. ⁴ Tyin tandih̄i yoo tsa cuv̄i sehe Nyoo, jahá canaa yo tsi tsa ña vaha tsa iyó nu ñuhu ñayiv̄i ñayiv̄i ihya. Cuv̄i jaha canaa yo can tyin tsinú iñi yo tsi Nyoo. ⁵ Maa ñi maa nyiv̄i tsa tsinú iñi tyin ra Jesús cuv̄i Sehe Nyoo, ñi ican cuv̄i ñi cuv̄i jahá canaa tsa ña vaha tsa iyó nu ñuhu ñayiv̄i ihya.

Tatyí Ii Nyoo cuv̄i tsandaa cuenda ra Jesús Sehe Nyoo

⁶ Ra Jesucristo quits̄i ra nu ñuhu ñayiv̄i ihya. Tan tsa tsi-coondutȳa ra tsihin ndutȳa tan tsa tsat̄i niñi ra janahá tyin Sehe Nyoo cuv̄i tsi ra. Ñavin tsa tsicoondutȳa ñi ra. tyin nda cuanda tsa tsat̄i niñi ra. Tan juvin ñi maa Tatyí Ii Nyoo cuv̄i tsandaa tyin tacan cuv̄i. Tan Tatyí Ii Nyoo ña jandav̄i ñaha tsi. ⁷ Nda andiv̄i iyó uñi taahan tsa cuv̄i tsandaa: maa Nyoo Jutu yo tan ra Cristo ra cuv̄i Tuhun tsa Caahán Nyoo, tan Tatyí Ii Nyoo. Tsa nduñi taahan ra naha, iin ñi cuv̄i ra naha. ⁸ Tan nu ñuhu ñayiv̄i ihya iyó tucu uñi tsandaa: Tatyí Ii Nyoo tsa iyó añima yo caahán tyin ra Jesús cuv̄i Sehe Nyoo. Tsa tsinu uv̄i cuv̄i nu tsicoondutȳa ra Jesús, nu catyí Nyoo tyin juvin ra Jesús cuv̄i Sehe

ra. Tan tsa tsinu uñi cuví nu tsatí niñi ra Jesús. Tan tsa nduñi taahan yacan nacatsí tahan caahán can. ⁹ Yoo naquihín yo tsa caahán ra cuví tsandaa nu ñuhu ñayivi ihya. Tan Nyoo cahnu ca cuví ra tan ñavin ca ra ñuu ñayivi ihya. Yacan cuenda taahán tsi naquihin yo tsa caahán ra, tan juvin ñi maa ra catyí tyin Sehe ra cuví tsi ra Jesús. ¹⁰ Nyivi tsa tsinú iñi tyin Sehe Nyoo cuví tsi ra Jesús, tsitó ñi tsitsi añima ñi tyin nditsa. Nyivi tsa ña tsinú iñi tsi ra, jahá ñi tyin vatya Nyoo, tyin ña cuñi ñi tsinu iñi ñi tsa caahán Nyoo tsandaa cuenda Sehe ra. ¹¹ Tan tye-hen caahán Nyoo tsihin yo: Catyí ra tyin tsaha ra ñayivi nyito coo yo tan ñihi yo itsi tatun tsinú iñi yo tyin ra Jesucristo cuví Sehe ra. ¹² Nyivi iyó Sehe Nyoo añima, iyó ñi ñayivi nyito. Tan nyivi nduve Sehe Nyoo iyó añima, ña iyó ñi ñayivi nyito.

Nu ndihí cahán ra Juan tan nu tsahá ra tyiñu tsi nyivi

¹³ Tyaá yu tuhun ihya tsa cuenda nyooho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayivi nyito tsa ña cua naa maa.

¹⁴ Ndita iñi yo tsi Nyoo tyin tatun tsicán yo tsa tsicán yo tsi ra tan cuhya cuñi maa ra tsicán yo, tsitó yo tyin maa ra tsiñi ra tsa caahán yo. ¹⁵ Tan tsa tsitó yo tyin tsiñi ra tsa tsicán yo, tsitó tucu yo tyin tsa ñihí yo tsa tsicán yo tsi ra.

¹⁶ Tatun iin nyivi tan nyehe yo tyin javahá ñi cuatyí tsa ña taahán tsi cúu ñi, taahán tsi cahan ndaahvi yo tsihin Nyoo tsa cuenda ñi na jaha ra tucahnu iñi tsi ñi tsa cuenda cuatyí can. Maa tyin tatun javahá ñi cuatyí tsa taahán tsi cúu ñi, ña ndacan tahvi yo tsa cuenda ñi. ¹⁷ Tandihí tsa caquiñi tsa javahá nyivi, cuatyí cuví can. Tan iyó tucu cuatyí tsa ña jaha Nyoo tucahnu iñi.

¹⁸ Tsitó yo tyin nyivi tsa nacacú tsa jahá Nyoo, ña jañihí ca ñi javaha ñi cuatyí. Tyin jahá cuenda Sehe Nyoo tsi ñi tan ña tsahá ra tsa tñin nu ña vaha tsi ñi.

¹⁹ Yoo tsa tsitó yo tyin cuenda Nyoo yihí yo. Tan tandihí nyivi tsa taahán iñi tsa iyó nu ñuhu ñayivi ihya, nu ña vaha ndacá ñaha tsi ñi.

²⁰ Tan tsitó tucu yo tyin quítsi Sehe Nyoo, tan tsaha ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ñi tsihin ra. Tan juvin maa ra cuví Nyoo tsa nditsa. Tan iyó ra ñayivi nyito tsa ña cua naa maa. ²¹ Nyooho tsa cuví tumaa sehe yu, jahá cuenda ndo tsi ndo tsihin tsitoho tsa jacahnú nyivi, tyin ñavin Nyoo cuví can.

Tan na cuvi tsi tacan ñi.

Carta Tsinu Uvi Tsa Tyaa Ra Juan

*Nu caahán ra Juan tyin
cuñí xaan ra tsi nyivi yihí
cuenda Nyoo*

¹ Yuhu ra tsahnu cuenda vehe ñuhu, jaquitsí yu carta ihya tsi yooho, cuhva yu, tan tsi sehe un tyin cuví un ñaha tsa nacatsí maa Nyoo. Cuñí xaan yu tsi ndo tsihin tsa nii ñiñi añima yu. Tan cuñí ndihi tucu tandihi nyivi tsa tsitó tsa nditsa tsi ndo, yacan ñavin yuhu ñi cuñí tsi ndo. ² Cuñí ndi tsi ndo tsa cuenda tsa nditsa tsa iyó tsitsí añima yo. Tan tacan ñi maa cua coo tsa nditsa can tsihin yo. ³ Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ñiñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

⁴ Sii xaan cuñí yu tyin tsitó yu tyin juhva sehe un vaha xaan nyicún ñi tsa nditsa, tumaa tava tyiñu maa Nyoo Jutu yo tsi yo. ⁵ Hermana, caahán ndaahvi yu tsihin un vityin, na cuñi tahan yo tsi yo. Tyiñu ihya cuñí yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndi tsaha Nyoo tsi yo cuví tsi. Tyin tsa iyó maa tsi nda nu quitsaha. ⁶ Tsa cuñí yo tsi Nyoo, yacan cuví tsa javahá yo tandihi tsa

tava tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsiñi ndo nda quivi jihna ñi: Coo ndo tsihin tsa cuñi ndo tsi Nyoo tan tsi nyivi.

*Nu tsahá cuenda ra Juan
nácaa jaha cuenda yo tsi yo tsi-
hin nyivi jandavi ñaha*

⁷ Caahán yu tyehen tsihin un tyin cuaha xaan nyivi jandavi ñaha iyó nani cahanu nu ñuhu ñayivi. Catyí ñi tyin ña nditsa tsa quitsí ra Jesucristo cacu ra tsihin cuñu ñuhu tan cuví ra ra ñayivi. Nyivi tsa caahán tacan, ñi jandavi ñaha cuví ñi. Tan ñi ndasi cuñi nyehé tsi ra Cristo cuví ñi. ⁸ Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihi ca ndo tandihi tsa cua cuhva Nyoo tsi ndo.

⁹ Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaá yahvi ñi itsi, iyó Jutu yo Nyoo tan ra Jesucristo Sehe ra tsihin ñi. ¹⁰ Tatun tsaá nyivi yuvehe ndo, tan cuñí ñi jacuahá ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndi ña cuhva ndo nacumi tsi ñi. ¹¹ Tyin tun cuhva yo nacumi tsi ñi, cuñí tsi catyi tyin javahá ndihí yo tsa ña vaha tsa javahá ñi.

Nu ndihí cahan ra Juan

¹² Iyó cuaha ca tuhun cuñí yu cahan yu tsihin ndo. Maa tyin ña cuñí yu cahan yu can tsihin carta. Tyin tyaá yu cuhva tsa quitsi yu nu yucú ndo. Tyin tacan tan natuhun vaha ca maa yo, tan cusii ca iñi yo.

¹³ Ihya vatsí nacumi tsi un jahá sehe ña tahan un tsa nacatsj ndihi maa Nyoo.

Tan na cuvi tsi tacan ñi.

Carta Tsinu Uñi Tsa Tyaa Ra Juan

Nu caahán ra Juan tyin vaha cuahán ra Gayo tsihin Nyoo

¹Yoocho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha iñi tsi yu tan tsa tsitó maa un tyin cuñí xaan yu tsi un tyin iin caa ñi nyicún yo tsa nditsa.

²Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un. ³Yuhu sii xaan cuñi yu quivi quitsi juhva ra yañi yo naha ra nu nyii yu. Tan nacatyí tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa. ⁴Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

⁵Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra. ⁶Tandihí ra naha, tan nacatyí tuhun ra naha nuu tandihí nyivi tsicá vehe ñuhu tyin cuñi xaan un tsi ra naha. Jaha tumañi iñi, jatyinyee ca tsi ra yañi yo naha ra, cuhva tsa tsiñi ñuhu tsi ra naha tumaa taahán iñi

maa Nyoo. Tyin tacan tan jañihi ca ra naha cuhun ra naha cahan ra naha tuhun Nyoo. ⁷Tyin tyiñu ra Jesucristo tsicá ra naha. Tan ña cuñi ra naha tsa jatyinyee nyivi tsa ña tsitó tsi Nyoo tsi ra naha. ⁸Yacan cuenda maa yo taahán tsi jatyinyee tsi ra naha tsihin tsa tsiñi ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

Nu caahán ra Juan tyin ña vaha javahá ra Diótrefes

⁹Yuhu jacuhun yu iin carta tsi nyivi tsicá vehe ñuhu, maa tyin ra Diótrefes ña cuñi ra tyaa soho ra tsa caahán yu tyin cuñi xaan maa ra cuví ra ityi nuu tsihin nyivi. ¹⁰Yacan cuenda tatun quitsi yu nu yucú ndo cua jandaa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyivi tsicá vehe ñuhu naquihín vaha ñi tsi ra hermano can naha ra, tyasí ra Diótrefes tsi ñi, tan tavá ra tsi ñi vehe ñuhu.

¹¹Yoocho yañi yu tsa cuñi xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

Nu caahán ra Juan tyin vaha xaan tsinú iñi ra Demetrio tsi Nyoo

¹² Tandihí nyívi tan vaha caahán ñi tuhun ra Demetrio. Tan vaha xaan tyaá yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

Nu ndihí cahān ra Juan

¹³ Cuaha xaan tuhun cuñí yu jacoto yu tsi un, maa tyin ña cuñí yu jacoto yu can tsi un tsihin carta. ¹⁴ Tyin tyihí yu cuhva tsa quitsi yu nu iyó un tsa numí ñi, tyin tacan tan natuhun vaha ca maa yo. ¹⁵ Na coo tsa taxin añaima un. Ra vaha iñi tsi yo tsa iyó ityi ihya jaquitsí xaan ra naha nacumi tsi un. Tan cuñí yu jaha un tumañi iñi cuhva un nacumi tsi tsa intuhun intuhun ra vaha iñi tsi yo.

Carta Tsa Jacuhun Ra Judas Tsi Nyivi Yihí Cuenda Nyoo

Nu tyaá ra Judas carta tsa cuenda nyivi cana Nyoo

¹ Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyooho tsa cana Nyoo Jutu yo. Cuñí xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo. ² Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñí ra tsi yo. Tan na naquihin ca ndo tsa taxin tsahá ra tsi yo coo añima ndo.

Nu caahán ra Judas tuhun nyivi tsa jacuahá tsa ña nditsa (2 Pedro 2.1-17)

³ Tyihí yu kuhva tyaá yu iin carta tsa cuenda ndo yañi, tyin cuñí yu cahan yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñi yu tsi ndo na ña kuhva ndo tsa sama kuhva tsinú iñi ndo tsa vaha tsa tsahá Nyoo tsi yo tsa cuví yo nyivi yihí cuenda ra. Tyin iin tsaha ñi janaha ra nácaa tsinu iñi yo tsi ra tan ña cua nasama ra itsi. ⁴ Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yaha jaha Nyoo tucahnu

iñi tsi yo, tan yacan cuenda cuví ñi javaha maa yo tsa cuñí yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahañ tsanaha tyin ra tsa javahá tacan, cua cunaa ra naha.

⁵ Vasu ndi maa tsa tsitó ndo tsa javahá Nyoo tahañ tsanaha, maa tyin cuñí yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacú ra tsi ñi ndaha nyivi Egipto can. Maa tyin tsa yaha can janaa ra tsi tandihí maa ñi tsa ña tsinú iñi tsi ra. ⁶ Tan juvin ñi tacan javahá tucu Nyoo tsihin ángel tsa ña tyaá yahvi tsi ra. Tsahá ra tyiñu tsi nahnu, maa tyin nacoq nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahan tsi quivi cutuñi nyivi. ⁷ Tacan tucu nyivi ñuu Sodoma tan ñuu Gomorra, tan nyivi ñuu nyihi tsa tsicoq nicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayii can naha ra tsicoq ra naha tsihin ñaha. Tan ñiñaha tsicoq ñi tsihin iin rayii tan inga ra. Tan cuaha ca tsa caquiñi javahá ñi tyin rayii tsicoq ra naha tsihin ra ndusihi. Tan tsa cuenda yacan, nyehe ñi tundoho nu cayu ñi quivi tsahmí Nyoo ñuu ñi. Tan yacan janahá tsi yo tyin nyivi javahá tsa caquiñi, cua cayu ñi tsihin

ñuhū tsa ña cua ndahva maa.

⁸ Vasu ndi maa tacan cuvī, vityin ndi iyó ra jandavī ñaha naha ra. Cuñí ra naha tyin vaha javahá ra naha. Maa tyin jativí ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi siqui ra iyó ca tunyee iñi tsi tan ñavin ca maa ra naha. ⁹ Tan ndi ángel Miguel tsa cahnu cuvī nuu Nyoo, ña cana iñi ra javahá ra tacan. Tyin quivi cañi tahan ra tsihin nu ña vaha tsa cuenda cuñu ñuhu ra Moisés, ña cana iñi ra cahan ra ndavaha ñi siqui nu. Intuhun ñi tsa catyi ra tsihin nu: “Na tatsi tuñi Jutu Mañi yo tsi un” catyi ángel Miguel can tsihin nu ña vaha. ¹⁰ Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quitī, tyin quitī ña cutuñi iñi ti. Ica ñi maa ti naha ti tsa cuñi cuñu ñuhu ti naha ti. Tan tacan tucu ra can naha ra. Tsihin tsa caquiñi tsa javahá ra naha jativí ra naha juvin ñi tsi maa ra naha.

¹¹ ¡Ndahvi ra ndaahvi can naha ra! tyin javahá ra naha tumaa javaha ra Caín. Tan tsa cuenda tsa cuñi ra naha jaha canaa ra naha xuhun, nacoó ra naha ityi Nyoo tumaa javaha ra Balaam. Tan cua cunaa ra naha tumaa cunaa ra Coré, tyin tsihi ra can tsa cuenda tsa ña tyaa yahvi ra tsa cahan ra cuvī ityi nuu tsihin ra. ¹² Ra tsa jatyañú tsi ndo naha ra tsahá ra naha

ticanuu tsi ndo nu ndu iin ndo. Tyin tsatsí ra naha tan tsihi ra naha tsihin tsa sii cuñi ra naha, tan ña cahán nuu ra naha tsa ña jahá ra naha tsa ñayivi tsi Nyoo. Cuvī ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuvī ra naha tumaa vico tsa yihí ityi siqui tun tsa cua cuun savi tan cuahán tsi tsihin tatyī tan ña cuun savi. Cuvī ra naha tumaa yutun tsa ña tsahá tsiti. Tyin yutun tsa ña tsahá tsiti cuvī tun tumaa yutun tsa tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuii yoho tun. ¹³ Tan juvin ñi cuvī tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuvī tucu ra naha tumaa tiñuu tsa iyó andivi tsa tsinaa. Tsa nyaá maa tsa cua ndoo cuii ra naha nu naa. Tacan ñi maa tsa cua tahan ra naha.

¹⁴ Tuhun ra can naha ra cahan ra Enoc tahan tsanaha. Ra Enoc tsa tsinu utsa tsa cuvī tata ra Adán. Caahan ra tuhun tsa tsaha maa Nyoo tsi ra, tan catyi ra: “Nyehe yu nu vatsí Jutu Mañi yo tan cuenda mil ángel ra vatsí tsihin ra ¹⁵ tyin vatsí ra vatsí tatsí tuñi ra tsi nyivi caquiñi tsa cuenda tandihi tsa ña vaha tsa javaha ñi, tan nyivi caahán ndavaha ñi siqui ra”, catyi ra Enoc tahan tsanaha. ¹⁶ Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahán ra naha tan catyi ra

naha: “Yi xaan, cahnu xaan tundoho nyehé yo.” Javahá ra naha tsa cuñí cuñu ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyivi, javahá ra naha can tyin cuñí ra naha tsa cahan nyivi tyin vaha xaan iñi ra naha.

Nu tsahá cuenda ra Judas tsi nyivi yihí cuenda Nyoo

¹⁷ Yañi, ña tyaa yahvi ndo tsi ra can naha ra. Maa tyin nducuhun iñi ndo tuhun tsa cahán ra tsa tava tyiñu Jutu Mañi yo Jesucristo, ¹⁸ tyin catyi ra naha tyehen: “Nu cua ndihi quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.” ¹⁹ Ra tsa cahán ra naha tuhun cuví ra cuñí jasiin tsi yo. Tyin tyaa yahvi ra naha kuhva cuñí cuñu ñuhu ra naha tan nduve Tatyí Ii Nyoo iyó tsihin ra naha.

²⁰ Maa tyin nyooho yañi, jandu iin ndo iñi ndo tsihin tsa tsinú iñi ndo tsi ra Cristo. Ndaçan tahvi ndo tsi ra tsihin tunyee iñi Tatyí Ii maa ra. ²¹ Nducu ndo kuhva cunyanaa vaha ca ndo tsi Nyoo, tyin tacan tan coto ndo tyin cuñí xaan ra tsi yo. Tan çatu ndo quivi kuhun yo coo cuii yo tsihin ra. Tyin yacan cuví tsa cua kuhva Jutu Mañi yo Jesucristo tsi yo tsa cuenda tsa cundaahví iñi ra tsi yo.

²² Cahan yuhu ndo tsihin nyivi tsa ña tsinú iñi, na tsinu iñi ñi. ²³ Nducu ndo kuhva cacu ñi tsa cua cayu. Cundaahvi tucu iñi ndo nyehe ndo tsi inga ñi tsa

javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuanda jahma nditsí ñi tan ña vaha can.

Nu ndihi cahán ra Judas tan jacahnu ra tsi Nyoo

²⁴⁻²⁵ Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuví ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quivi cua kuhun yo tsihin ra nu cahnu cuví nu nyaá ra. Tan sii xaan cua cuñi yo.

Na coto yo tsa cahnu xaan cuví ra. Na jacahnu yo tsi intuhun ñi maa ra tyin cahnu xaan cuví ra. Tan iyó xaan tunyee iñi tsi ra. Na cundaca ñaha intuhun ñi maa ra tandihi. Tyin nda nu quitsi tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuví tsi tacan ñi.

Tsa Janaha Ra Jesucristo Tsi Ra Juan

Tsa nyehe ra Juan

¹ Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihi tsa cua cuvi tsi yuhu, ra Juan, ra cuvi musu ra. ² Tan caahán yu tandihi tsa nyehe yu. Tan cuvi yu tsandaa tsa cuenda tuhun Nyoo tsa jacotó ra Jesucristo tsi yu.

³ Sií xaan cuvi tsi nyivi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahvi ñi itsi, tyin tandihi tuhun tsa nyaá nuu tutu ihya, tsa yatyin cuii cundaa tsi.

Nu jacuhun ra Juan tutu tsi nyivi tsa utsa taahan vehe ñuhu

⁴ Yuhu ra Juan jaquitsí yu tutu ihya tsi nyooho, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ii tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuvi Nyoo nda tsanaha, tan vityin, tan juvin ra cua quitsi. ⁵ Tan naquihin tucu ndo tsa vaha jahá ra Jesucristo. Tyin ra ican cuvi ra

tsandaa tan tsa nditsa. Juvín ra cuvi ra tsa nandotó tsa jihna ñi. Tan ndacá ñaha ra tsi ra cuvi rey tsa iyó nu ñuhu ñayivi ihya naha ra. Tan cuñi xaan ra tsi yo, tan nacatyá ra tsi yo tsihin ñiñi ra. ⁶ Tan tsaha ra tsa cuvi yo rey tan cuvi yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

⁷ ¡Nyehe jihna ndo! ¡Tsa vatsí ra Cristo nu vico andivi! Tandihí nyivi cua nyehe ñi tsi ra nda cuanda nyivi tsa jañicuehe tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuvi. Nditsa, tacan cua cuvi, tan na cuvi tsi tacan ñi.

⁸ Catyí Jutu Mañi yo:

—Yuhu cuvi ra jihna ñi, tan yuhu cuvi ra cua coo nu cua ndihí quivi, tumaa letra A tan Z —catyí Jutu Mañi yo, ra iyó tandihí tunyee iñi tsi. Tacan ñi iyó maa ra: Juvín ra cuvi Nyoo nda tsanaha, tan vityin, tan juvin ra cua quitsi.

Nu nyehe ra Juan tsa iyo caá ra Cristo

⁹ Yuhu ra Juan cuvi yu yañi ndo. Tan iin caa ñi nyehé yu tundoho tsihin ndo, tan ndacá ñaha Nyoo tsi yo, tan iin caa ñi cunyee xaan iñi yo náa cuvi tsi yo tyin jatyinyeé ra Jesucristo tsi yo. Nyíi yu vehe caa ñuhu Patmos tsa canyií mahñu ndutyá ñuhu. Nyíi yu vehe caa tsa cuenda tsa caahán yu tuhun Nyoo tsa

jacuahā ra Jesucristo. ¹⁰ Tan iin tumingu quivi jacahnú yo tsi Jutu Mañi yo, tuvī iñi yu tsa nyaá Tatyī Ii Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta. ¹¹ Tan catyí tsi tsihin yu tyehen:

—Yooho, Juan. Yuhu cuvī ra jihna ñi, tan yuhu cua coo nu cua ndihi quivi. Tyāa nu iin tutu tandihi tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

¹² Tacan tan nyico coo yu tyin cuñi yu nyehe yu yóo caahán tsihin yu. Tan nyehe yu utsa taahan candileru xuhun cuaan. ¹³ Tan mahñu tsa utsa taahan candileru can, nyehe yu nyaá iin ra tsa caá tumaa caá rayii ñuhu ñayivi ihya. Nditsí ra jahma cañi nda nu tsaha ra. Tan yihí iin cinturón xuhun cuaan yiqui nyica ra. ¹⁴ Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyí. Tan tinuu ra caá tsi tumaa caá nu cayú ñuhu. ¹⁵ Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha. ¹⁶ Tan ndaha cuaha ra nyecú utsa

taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehé ñicanyii.

¹⁷ Cuhva tsa nyehe yu tsi ra, nduvá yu tsaha ra tumaa tsa tsihi yu. Maa tyin tyiso ra ndaha cuaha ra siqui yu, tan catyí ra tsihin yu:

—Ña nayuhvi un. Yuhu cuvī ra jihna ñi, tan yuhu cua coo nu cua ndihi quivi. ¹⁸ Yuhu nyito yu vasu tsihi yu, maa tyin vityin ña cua cundihí maa tsa iyó yu. Tan iyó ndatu tsi yu tsa catyí yu ama taahán tsi cúu nyivi, tan tatun cuhun ñi anyaya o ña cuhun ñi. ¹⁹ Tyāa nu libru tandihi tsa nyehe un, tan tsa iyó vityin, tan tsa cua coo nu cuahán ca tsi. ²⁰ Tuhun ihya cuvī tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñi tsi catyí tsa utsa vehe ñuhu.

2

Nu quitsahā tsahá cuenda ra Cristo tsi nyivi tsicá tsa utsa vehe ñuhu: Tsa tsahā cuenda ra tsi nyivi tsicá vehe ñuhu ñuu Éfeso

¹ Jacuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyí tsihin ra tyehen: “Tyehen catyí ra tsa nyecú

utsa tiñuu ndaha cuaha, tan tsicá nuu ra mahñu tsa utsa candileru xuhun cuaan: ² Yuhu tsitó yu tandihí tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñi ndo nyehé ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyí tyin ra tsicá tyiñu Nyoo cuví ra naha, tan tsitó ndo tyin ña nditsa ra naha. ³ Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo. ⁴ Maa tyin iyó iin tsa ña vaha javahá ndo, tyin ña cuñi ca ndo tsi yu vityin tumaa tsa cuñi ndo tsi yu quivi jihna ñi. ⁵ Yacan cuenda nducuhun iñi ndo numaa nda nduvá ndo. Tan nasama ndo cuhva iyó ndo, tan javaha nyico ndo tumaa javahá ndo quivi naquihin cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi. ⁶ Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñi ndo nyehe ndo tsa caquiñi tsa javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan. ⁷ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu. Catyí ra tyehen: Tatun

cuvi jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito añima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

Tsa tsahá cuenda ra Jesucristo tsi nyivi tsicá vehe ñuhu ñuu Esmirna

⁸ Jacuhun ndihí tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyí tsihin ra tyehen: “Tyehen catyí ra cuví tsa jihna ñi, ra cua coo nu cua ndihí quivi, ra tsa tsihi tan nandoto: ⁹ Yuhu nyehé yu tandihí tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavaha ñi siqui ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañí Satanás, cuví ñi. ¹⁰ Maa tyin ña nayuhvi ndo tsa nyehé ndo tundoho. Tyin nu ña vaha cua tyihi nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehe ndo tundoho. Maa tyin cpanyicun vaha ndo tsi Nyoo nda cuanda cúu ndo. Tan yuhu cua cuhva yu ñayivi coo ndo tsihin Nyoo. ¹¹ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu. Catyí ra tyehen: Tatun cuvi jaha canaa ndo tsi nu ña vaha, ña cua cuhun ndo

anyaya, quivi cúu nyivi tsa tsinu uvi tsaha.”

Tsa tsaha cuenda ra Jesucristo tsi nyivi tsicá vehe ñuhu ñuu Pérgamo

¹² Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyi tsihin ra tyehen: “Tyehen catyí ra tsa ndahá mityi tsa xaan nduvi tsiyo yuhu: ¹³ Yuhu nyehé yu tandihi tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuví tsandaa cuenda yu. ¹⁴ Maa tyin quituvi juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñí jandihí cuhva tsa javaha ra Balaam, ra tsicoo tsanaha. Tyin ra Balaam natyuhu ra tsi ra Balac, na jacatsi ra cuñu quiti tsa jamañi nyivi nu tsitoho tsi nyivi Israel. Tan natyuhu ra tsi ra na catyi ra tsihin ñi tyin ñavin cuatyí cuví tun iin ñaha tan iyó ña tsihin iin rayii vasu ña tindaha ñi, tan tacan tucu ñi rayii. ¹⁵ Tan juvin ñi iyó tucu juhva nyivi tsa ña cuñí nacoo tsa jacuahá ra yihí cuenda ra Nicolás. Tan yuhu ndasi cuñí yu nyehe yu tsa jacuahá ra can naha ra. ¹⁶ Yacan cuenda janumi ndo nasama ndo cuhva iyó ndo. Tyin tatun ña nasama ndo cuhva iyó ndo, cua quitsi yu

nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi [tsa cuví tuhun] quitá yuhu yu. ¹⁷ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu: Tatun cuvi jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyii xeehe. Tan cua cuhva yu iin yuu cuitsin tsi ndo. Tan nu yuu can nyaá iin sivi tsa tsa yoñi tsitó; intuhun ñi nyivi tsa cua naquihin yuu can cua coto sivi can.”

Tsa tsaha cuenda ra Jesucristo tsi nyivi tsicá vehe ñuhu ñuu Tiatira

¹⁸ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan catyi tsihin ra tyehen: “Tyehen catyí Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronce tsa xiñu xaan. ¹⁹ Yuhu nyehé yu tandihi tsa javahá ndo. Tan tsitó yu tsa cuñí xaan ndo tsi nyivi. Tan tsitó yu tyin tsinú xaan iñi ndo tsi yu, tan jatyinyeé ndo tsi nyivi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsi tsi. ²⁰ Maa tyin iyó juhva tsa cuñí yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javaha] ña Jezabel [tsa tsicoo tahañ tsanaha]. Ña ican jacuahá tsi ndo, catyí ña tyin Nyoo tsahá tuhun caahán ña, maa

tyin jandaví ñaha ña tsi nyivi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayii tsihin ñaha o iin ñaha tsihin rayii tun ña tindahá ñi. Tan jacuahá ña tyin cuví catsi ñi nyayu tsa jamañi nyivi tsi tsitoho. ²¹ Yuhu tsa ndatu xaan yu tsa nasama ña cuhva iyó ña, maa tyin ña cuñí ña javaha ña can. Ña cuñí ña jandihi ña tsa tsicá nuu ña tsihin rayii. ²² Tan vityin cua quihin cuehe tsi ña tan ña cua cuvi nduvita ña. Tan nyivi javahá tsa caquiñi tsihin ña, cua cuhva yu tundoho nyehe ñi tatun ña ndu uvi iñi ñi tsa javahá ñi. ²³ Tan cua cahñi yu sehe ña. Tacan tan cua coto tandihi nyivi tsicá vehe ñuhu, tyin yuhu tsitó yu tandihi tsa tsicá iñi ñi, tan tandihi tsa iyó añima ñi. Tan tsa intuhun intuhun nyooho cua cuhva yu tsa taahán tsi tsi ndo tsa cuenda tsa javahá ndo. ²⁴ Maa tyin tandihi ca nyooho tsa iyó ñuu Tiatira, nyooho tsa ña naquihin cuenda cuhva jacuahá ña, ndi ña javahá ndo tsa catyí nyivi tyin cuví tuhun xeehe cuenda nu ña vaha, ña tyaá yu inga tsa yii sigui ndo. ²⁵ Maa tyin jañihi ndo javaha ndo tsa vaha nda cuanda quitsi nyico yu. ²⁶ Tan nyooho tsa jaha canaa tsi nu ña vaha, tan javahá ndo cuhva cuñí yu nda cuanda nu ndihi tuhun, cua cuhva yu ndatu tsi ndo tsa cundaca ñaha ndo tsi nyivi iyó nu ñuhu ñayivi ihya. ²⁷ Tumaa

tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyivi. Tan cua tahvi cuatyí ndo tsi ñi tumaa tsa tahví cuatyí yo quisi. ²⁸ Tan cua cuhva yu tiñuu cahnu tsa caná tsa naa ca coo tsihin ndo. ²⁹ Nyooho tsa iyó soho, tyaá soho ndo tsa caahán Tatyí Ii Nyoo tsihin nyivi tsicá vehe ñuhu.”

3

Tsa tsahá cuenda ra Jesucristo tsi nyivi tsicá vehe ñuhu ñuu Sardis

¹ Jachun tucu tutu tsi ra caahán tuhun yu tsihin nyivi tsicá vehe ñuhu ñuu Sardis. Tan catyí tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihi tsa javahá ndo. Tan vasu catyí nyivi tyin nyito ndo, maa tyin tsa cuenda yuhu, tsa tsihi ndo. ² Jaha cuenda vaha ndo tsa vaha tsa iyó luxu ca tsi ndo. Tyin coto ndihi ndihi tuhun yu nu yucú ndo. Nyehé yu tyin nuu Nyoo ña vaha maa tsa javahá ndo. ³ Nducuhun iñi ndo tsa vaha tsa cutuhva ndo. Cuanycun ndo can, tan nasama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu. ⁴ Maa tyin iyó juhva nyooho, nyivi Sardis, tsa ña janyahyu jahma; ña javahá ndo tsa caquiñi cuví can. Tan juvin nyooho cua

cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo. ⁵ Tan nyooho tsa cua cuvi jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sivi ndo nu libru nu nyecú sivi tandihi nyivi cua coo nyito tsihin Nyoo. Tan cua catyi yu tsihin Jutu yu, tan ángel ra tyin nacotó yu tsi ndo. ⁶ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

Tsa tsahá cuenda ra Jesu-cristo tsi nyivi tsicá vehe ñuhu ñuu Filadelfia

⁷ 'Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Filadelfia. Tan catyi tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra tsa nuñá yuvehe tan ndi intuhun nyivi tan ña cuvi nacasi. Tan tatun nacasi ra, ndi intuhun ñi tan ña cuvi nuña ñi. Tyehen catyí ra: ⁸ Yuhu nyehé yu tandihi tsa javahá ndo. Tan nuña yu iin yuvehe tsa cuenda ndo tan yoñi cuví nacasi itsi, [tyin tsahá yu tsa cahan ndo tuhun Nyoo tsihin nyivi, tan yoñi cuví casi tsi ndo]. Tan iyó luxu tunyee iñi tsi ndo, tan tyaa yahvi ndo tsa caahán yu, tan ña catyí ndo tyin ña nacotó ndo tsi yu. ⁹ Tan nyivi yihí cuenda nu ña vaha, ñi vatya, ñi catyí tyin nyivi Israel cuví ñi, maa tyin ñavin nyivi Israel cuví ñi tsitsi

añima ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñí yu tsi ndo. ¹⁰ Tyin cunyeé xaan iñi ndo tumaa catyi yu tsihin ndo tyin cunyee iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quivi cua jaquitsi yu tundoho cahnu siqui tandihi nyivi, tyin cua nducu cuhva yu tsi tandihi ñi iyó nu ñuhu ñayivi. ¹¹ Yatyí cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyivi tsa vaha tsa cua ñihi ndo. ¹² Nyooho tsa cua cuvi jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sivi Nyoo yu tsi ndo, tan sivi ñuu Nyoo yu, ñuu Jerusalén tsa tsa cua quee nda andivi, tan juvin ñi cua tyaa tucu yu sivi tsa yu tsi ndo. ¹³ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

Tsa tsahá cuenda ra Jesu-cristo tsi nyivi tsicá vehe ñuhu ñuu Laodicea

¹⁴ 'Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Laodicea. Tan catyi tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javahá Nyoo tandihi maa tsa iyó: ¹⁵ Yuhu nyehé yu

tandihí tsa javahá ndo. Tan cuví ndo tumaa ndutya tsa ña vitsin tan ndi ña ihñi, tyin ndi ña tsinú vaha iñi ndo tsi yu, tan ndi ña jandihí tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandihí cuii ndo tsa tsinú iñi ndo tsi yu. ¹⁶ Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo. ¹⁷ Tyin nyooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsi yu,’ catyí ndo. ¿A ña jahá ndo cuenda tyin cuihya cuñí ndo nyehé ndo tundoho tsitsi añima ndo, ndaahvi ndo, cuaa ndo, tan tandii ndo tsitsi añima ndo? ¹⁸ Yacan cuenda tsahá cuenda yu tsi ndo tyin tsi maa yu jata ndo xuhun cuaan tsa cayu tan naa tsa nyahyu tsi, tyin tacan tan nducuca ndo. Tan jata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandii ndo, Tan jata ndo numeri quihvi tinuu ndo tyin tacan tan cuví nyehé ndo. ¹⁹ Yuhu tsahá cuenda yu tan tatsí tuñi yu tsi tandihí nyivi tsa cuñi xaan yu. Yacan cuenda catyí yu tsihin ndo: Jandu iin ndo iñi ndo tsihin tsa ñi iñi añima ndo tan javaha ndo tsa vaha. ²⁰ ¡Nyehé jihna! Yuhu nyaá yu yuvehe tan cañi ndaha yu. Nyivi tsa cua cuñi ndusu yu, tan nuña ñi yuvehe, cua quihvi yu tan cuxiñi yu tsihin ñi. Tan maa ñi cuxiñi ñi

tsihin yu. ²¹ Cua cuhva yu tsa cunyecu ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin Jutu yu nu ndacá ñaha ra. ²² Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu” —catyí ra Jesucristo.

4

Tsa cuví nda gloria

¹ Tsa yahá can, tan nyehe yu ticoho iin yuvehe nda andivi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndaa nyehe tan janaha yu tsi un tsa cua cuví nu cuahán ca tsi —catyí ndusu can tsihin yu.

² Tan juvin ñi cuhva can tan tuví iñi yu tsa nyaá Tatyí Ii Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá. ³ Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan tumaa xiñu yuu cornalina. Tan tanii cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda. ⁴ Tan nyehe yu nyecú oco cumi ca tyayu nu nyecú oco cumi ra tsahnu naha ra, tsinu nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jiñi

intuhun intuhun ra naha.
⁵ Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuví tsa utsa tatyí ii Nyoo. ⁶ Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyí.

Nñi canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can.

⁷ Iin tsa nyito can caá can tumaa caá ndicaha. Tan tsa tsinu uvi tumaa caá indiquí lee. Tan tsa tsinu uñi, tumaa caá nuu rayí caá nuu can. Tan tsa tsinu cumi tumaa caá tasu tsa cuahán ndavá. ⁸ Tan iyó iñu nditsin tsa intuhun intuhun tsa nyito can. Tan tanñi cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quitsi.

⁹ Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naha tsi tacan, ¹⁰ tsa oco cumi ra tsahnu can naha

ra tsicuiñi tsiti ra naha tan jacahnú ra naha tsi ra iyó tandihí tyembu. Tan tsaquin ra naha corona ra naha nu nyaá tyayu can. Tan catyí ra naha:

¹¹ Jutu Mañi ndi, Nyoo ndi cuví un.

Yooho taahán tsi jacahnú ndi. Tan taahán tsi tsi un tsa cundaca ñaha un.

Tyin maa un javaha tandihí tsa iyó.

Tan tsa cuenda tsa iyó iñi maa un, tan tsicoo tandihí tsa iyó, catyí ra naha.

5

Nu nyehe ra Juan iin tutu tan Mbee Ticyi Luhlu tsa cuví ra Jesucristo

¹ Tacan tan nyehe yu tyin ra tsa nyaá nu tyayu can ndahá ra iin tutu tshin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tshin utsa sellu. ² Tan nyehe yu iin ángel tsa nyee xaan. Tan caná tsaa ra tan catyí ra:

—¿Yóo taahán tsi nacani tutu ihya tan jocon sellu ihya? —catyí ra.

³ Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi. ⁴ Tan tsacú xaan yu, tsa tsito yu tyin yoñi maa cuví nacani tutu can tan cuví cahvi, tan cuví nyehe nuu tsi. ⁵ Tacan tan catyí iin ra tsahnu tsa nyaá can tshin yu:

—Ña vacu ca un. Tyin ra cuví Ndicaha [o cuñi tsi catyí, ra ndacá ñaha], ra cuví tata ra

Judá, tan tata ra rey David, ra ican jahá canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

⁶ Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyí Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan iyó utsa ndiqui ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tani cahnu nu ñuhu ñayivi. ⁷ Tan ra Mbee Ticatyí Luhlu can tsahan ra nu nyaá ra nyaá nu tyayu can tan quihin ra tutu tsa ndahá ra can nu ndaha cuaha ra.

⁸ Cuhva tsa quihin ra tutu can, tandihi tsa cumi tsa nyito can tan tandihi tsa oco cumi ra tsahnu can tsicuiñi tsiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu guitarra. Tan tsitu cutu tsitsi copa xuhun cuaan ndahá ra naha. Tan cutu can cuví tandihi tsa tsicán tahvi nyivi yihí cuenda Nyoo. ⁹ Tan tsitá ra naha iin yaa tsa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin niñi un jata un tsi ndi tyin coo vaha ndi tsihin Nyoo.

Tan cuví ndi nyivi ñuu nyihi tan ñuu nahnu tsa iyó

tani cahnu nu ñuhu ñayivi, nyivi caahán siin siin yuhu, tan nyivi siin siin tata.

¹⁰ Tsañ un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyivi iyó nu ñuhu ñayivi, catyí ra naha, tsitá ra naha.

¹¹ Yahá can tan tsiñi yu ndusu tan nyehe yu nyecú cuenda millón ángel tani canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can.

¹² Tan ñihi caahán ángel can naha ra, tan catyí ra naha:

Ra Mbee Ticatyí Luhlu tsa tsahñi nyivi,

juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihi tunyee iñi.

Na jacahnu yo tsi ra tan na jacahnu tandihi nyivi tan tandihi tsa iyó tsi ra, tyin cahnu xaan cuví ra, catyí ángel can naha ra.

¹³ Tan tsiñi tucu yu tsa caahán tandihi tsa javaha Nyoo; tandihi tsa iyó andivi, tan nu ñuhu ñayivi, tan tsitsi ñuhu, tan tsitsi ndutyá ñuhu; tan catyí tsi naha tsi:

Cahnu xaan cuví ra tsa nyaá nu tyayu.

Cahnu xaan cuví ra Mbee Ticatyí Luhlu.

Tan tunyee iñi tsa iyó tsi ra naha ña cua cundihi maa tsa iyó tsi.

Tan taahán tsi tsa jacahnu
yo tan tyaa yahvi yo
tsi ra naha tacan ñi
maa —catyí tandihi tsa
javahá Nyoo.

¹⁴Tan catyí tsa cumi tsa ny-
ito can:

—¡Na cuvi tsi tacan! —catyí
tsi naha tsi.

Tan tsicuiñi tsiti tsa oco
cumi ra tsahnu can naha ra
tan jacahnú ra naha tsi ra tsa
ña cua cundihí maa.

6

*Nu jocón ra Jesucristo tsa
utsa sellu tsa ndasí tutu can*

¹Tacan tan nyehe yu nu
jocón ra Mbee Ticatyí Luhlu
can sellu tsa jihna ñi tsitsi
tsa utsa sellu can. Tan tsiñi
yu ndusu iin tsa nyito can
tan ndusu tsi cuví tumaa nu
caahán savi, tan catyí tsi:

—¡Naha, tan nyehe un!
—catyí tsi tsihin yu.

²Tacan tan nanyehe yu tan
nyehe yu iin cuayu cuitsin,
tan ra yosó tsi ti ndahá ra iin
nduva. Tan ñihí ra iin corona
yihí jiñi ra, yacan jahá canaa
ra, tan ndi nyaá ca cua jaha
canaa ca ra.

³Tan tsa jocón ra Mbee
Ticatyí Luhlu can tsa tsinu
uvi sellu can, tsiñi yu tsa
caahán inga tsa nyito can tan
catyí tsi:

—¡Naha, tan nyehe un!
—catyí tsi tsihin yu.

⁴Tan quita iin cuayu
cuaaha. Tan ra tsa yosó tsi
ti ñihí ra ndatu tsa quinyaa ra
tsa taxin iyó nu ñuhu ñayivi,
tyin tacan tan cahñi tahan
nyivi tsi ñi. Tan ñihí ndihi ra
iin mityi cahnu cundahá ra.

⁵Tan tsa jocón ra Mbee
Ticatyí Luhlu can tsa tsinu
uñi sellu can, tsiñi yu tsa
caahán inga tsa nyito can tan
catyí tsi:

—¡Naha, tan nyehe un!
—catyí tsi tsihin yu.

Tan nanyehe yu, tan nyehe
yu iin cuayu tuun. Tan
ra yosó tsi ti, ndahá ra iin
ticatya. ⁶Tan tsiñi yu caahán
iin ndusu mahñu tsa cumi tsa
nyito can, tan catyí tsi:

—Tumaa tyahví nyivi tsi
iin musu tsa iin quivi, tacan
yahvi tsa intuhun ñi kilu
nuñi. Tacan tucu ñi tsa uñi
kilu cebada. Tan ña jativi ndo
acetye tan vinu —catyí ndusu
can.

⁷Tan tsa jocón ra Mbee
Ticatyí Luhlu can tsa tsinu
cumi sellu can, tsiñi yu tsa
caahán intuhun ca tsa nyito
can, tan catyí tsi:

—¡Naha, tan nyehe un!
—catyí tsi tsihin yu.

⁸Tan nanyehe yu, tan
nyehe yu iin cuayu cuaan.
Tan ra yosó tsi ti nañi ra
Tuhun Tsiihi. Tan tsata ra
can vatsi inga ra tsa nañi Nu
Yucú Añima Ndiyí. Tan ñihí
ra naha tunyee iñi tsa cahñi
ra naha tsa cuaha nyivi iyó
nu ñuhu ñayivi. Tyin tsitsi
tsa sava nyivi iyó nu ñuhu
ñayivi, cua cahñi ra naha sava
ñi. Tan cua cahñi ra naha tsi
ñi tsihin tsa jacoo ra naha
cuatyí, tan tsihin tama, tan
tsihin cuehe, tan tsihin quiti
xaan iyó nu ñuhu ñayivi.

⁹Tan tsa jocón ra Mbee
Ticatyí Luhlu can tsa tsinu
uhun sellu can, nyehe yu xuu

altar. Tan ican yucú ańima nyivı tsa tsihi tsa cuenda tsa jacoto ńi tuhun Nyoo. ¹⁰ Tan caná tsa ńi tan catyí ńi tye-hen:

—Jutu Mańi ndi, ra ii cuvı un, tan jandaá un tandihı tsa caahán un tyin javaha un. ¿Ama cua tatsı tuńi un tsi nyivı tsa tsahńi tsi ndi tsa cuenda un? —catyí ńi.

¹¹ Tacan tan ńihı intuhun intuhun ńi jahma cuitsin tsa cunditsı ńi. Tan catyí ra tsihin ńi na quitatu ńi tan cuatu ńi juhva ca quivı, nda cuanda cahńi nyivı tsi tandihı ca ńi tsa jahá tyińu tyińu ra Cristo, ńi tsa taahán tsi cúu tumaa tsihi tucu maa ńi.

¹² Tan tsa jocon ra Mbee Ticatyi Luhlu can tsa tsinu ińu sellu can, nyehe yu tyin ńihi xaan taán. Tan ndutuun ńicanyii tumaa tuun jahma nyivı iyó tucuihıya ińi. Tan yoo nducuaaha tsi tumaa cuaaha nińi. ¹³ Tan tińuu cucoyo tsi nu ńuhu ńayivı tumaa cucoyó tsi yutya yutun tatun ńihi yahá tatyı. ¹⁴ Tan andivı tsiquihı tıvı tsi tumaa tyihı tıvı yo iin ndaha tutu. Tan tandihı yucu tan ńuhu nyihı tsa cayucú mahńu ndutya ńuhu nasama nu cayucú tsi. ¹⁵ Tan tandihı rey tsa iyó nu ńuhu ńayivı tsihin ra nahu naha ra, tan ra cuca naha ra, tan ra cuvı ityi nuu tsihin andaru naha ra, tan ra iyó xaan tunyee ińi tsi naha ra, tan tandihı nyivı tsa cuvı musu, tan ńi tsa ńavin musu cuvı, quihvı xeehe ńi tsitsı yavi yuu tan tyańu cava

tsa iyó yucu nahnu. ¹⁶ Tan catyí ńi tsihin yucu can tan tsihin yuu can:

—Cucoyo ndo tsata ndi, na ńa nyehe ra nyaá nu tyayu can tsi ndi tan coto tatsı tuńi ra Mbee Ticatyi Luhlu can tsi ndi.

¹⁷ Tyin tsa tsa quivı cahnu tsa cua tatsı tuńi ra tsi ndi, tan yońi cunyee ińi can —catyí ńi.

7

Nu ńihı nyivı Israel tuńi cunyaq nutyaan ńi

¹ Tsa yaha can tan nyehe yu nyecú cumi ángel tsa ndihı tsa cumi tutun ńuhu ńayivı ityi nu tuhvá tatyı quee tyin tacan tan ńa yaha tatyı nu ńuhu ńayivı tan nu ndutya ńuhu tan nu yutun. ² Tan nyehe tucu yu quee inga ángel, ityi nu caná ńicanyii, tan ndahá ra tuńi Nyoo nyito. Tan cana tsa ra tsi tsa cumi ángel tsa ńihı ndatu tsa jatıvı nu ńuhu ńayivı tan nu ndutya ńuhu. Tan catyí ra tsihin ra naha:

³ —Ña jatıvı naha ndo nu ńuhu ńayivı, ndi nu ndutya ńuhu, tan ndi nu yutun tsa ndi cumańi ca janaha ndi yóo nyivı cuvı musu Nyoo, tyin cua tyaa ndi tuńi nutyaan intuhun intuhun ńi —catyí ángel can.

⁴ Tan catyí ra tsińı yu tyin cientu uvi xico cumi mil cuvı nyivı Israel tsa tsinyaa tuńi can. ⁵ Utsı uvi mil nyivı tata ra Judá tsinyaa tuńi, tan utsı uvi mil nyivı tata ra Rubén, tan utsı uvi mil nyivı tata ra Gad, ⁶ tan utsı uvi mil nyivı tata ra Aser, tan utsı uvi mil

nyivi tata ra Neftalí, tan utsi uvi mil nyivi tata ra Manasés, ⁷ tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Isacar, ⁸ tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihí ñi can tan tsinyaa tuñi Nyoo tsi ñi.

Nu nyehe ra Juan tsi nyivi nditsí jahma cuitsin

⁹ Tsa yaha can tan nyehe yu yucú cuaha nyivi. Tan yoñi maa cuví nacahvi tsi ñi, tyin cuaha xaan ñi. Yucú nyivi quee tandihí ñuu nyihí tan ñuu nahnu tsa iyó tanií cahnu nu ñuhu ñayivi. Tan yucú nyivi caahán siin siin yuhu. Tan yucú nyivi siin siin tata. Tan nyecú ñi nuu ra nyaá nu tyayu, tan nuu ra Mbee Ticatyí Luhlu. Nditsí ñi jahma cuitsin. Tan ndahá ñi ndaha ndicaha. ¹⁰ Tan tandihí ñi caná tsaá ñi tan catyí ñi:

Nyoo Jutu yo, ra nyaá nu tyayu, tan ra Mbee Ticatyí Luhlu, juvin ra naha jacacú tsi yo —catyí ñi caná tsaá ñi.

¹¹ Tan tandihí ángel naha ra nyecú ra naha tanií canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsicuiñi tsiti ra naha tan tsaquin ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo. ¹² Tan catyí ra naha:

Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñí tuñi tsi un:

Nacuhvá xaan ndi tyahvi nyoo tsi un.

Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuví tsi tacan tandihí tyembu, catyí ra naha.

¹³ Tacan tan tsicá tuhun iin ra tsahnu can tsi yu tan catyí ra:

—¿Yóo nyivi cuví ñi nditsí jahma cuitsin ihya? ¿Tan ndáa ityi quee ñi? —catyí ra.

¹⁴ Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyivi ihya cuví ñi nyehe tundoho cahnu. Maa tyin nacatya ñi jahma ñi tsihin niñi ra Mbee Ticatyí Luhlu tan nducuitsin tsi. ¹⁵ Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi. ¹⁶ Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñí ñi tsihin tsa ihñi. ¹⁷ Tyin ra Mbee Ticatyí Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihí ndutya nuu ñi —catyí ra tsihin yu.

8

Nu joçon ra Jesucristo tsa tsinu utsa sellu tan nu quita iin ángel tsihin iin cuu xuhun cuaan

¹ Tan tsa joçon ra Mbee Ticatyí Luhlu tsa tsinu utsa sellu tsa ndasí tutu can, ndutaxin nda andiví tumaa sava hora.

² Yahá can tan nyehe yu nyecú utsa ángel ityi nuu Nyoo. Tan intuhun intuhun ra naha quihin cuenda ra naha iin trompeta. ³Yahá can tan tsaá inga ángel tsa ndahá iin cuu xuhun cuaan. Tan tsinyaá nyityi ra ityi nuu altar can. Tan quihin cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyiví tsi Nyoo nuu altar xuhun cuaan tsa nyaá ityi nuu tyayu Nyoo.

⁴ Tan quitá yuhma cutu tan yuhma tsa tsicán tahvi nyiví tsi Nyoo ndaha ra, tan cuahán yuhma can nu nyaá Nyoo.

⁵ Tacan tan ángel can quihin ra cuu can tan jacutu ra can tsihin tuun ñuhú tsa quita nu altar can. Tan tyoso ra can nu ñuhu ñayiví. Tan quitsaha caahán savi, tan iyo cuví. Tan ñihi tatsa, tan quitsaha taán.

Nu tiví ángel naha ra trompeta

⁶ Tacan tan tsa utsa ángel tsa ndahá trompeta can, ndatú ra naha tsa tiví ra naha can.

⁷ Tsa tiví iin ángel can trompeta tsa ndahá ra, quitsaha cuún savi tan cucoyó yuu savi, ñihi cayú ñuhú tan sacá nuu ñiñi tsihin can. Tan

tsa yatyin cayú sava ñuhu ñayiví, tan tsa yatyin tucu sava cuhva nyaá cuhu tsitsa tan tandihi cuhva nyaá cuhu cuii.

⁸ Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacava can mahñu ndutyá ñuhu. Tan tsa yatyin sava ndutyá ñuhu can nanduví tsi ñiñi. ⁹ Tan tsa tandihi quití iyó tsitsi ndutyá ñuhu can tsihi tsa yatyin sava ti naha ti. Tan tahvi cutyí tucu tsa yatyin sava yutun ndoo cuaha tsa iyó tsitsi ndutyá ñuhu can.

¹⁰ Tan tsa tiví tsa tsinu uñi ángel can trompeta tsa ndahá ra, nacava iin tiñuu cahnu. Cayú tsi tumaa cayú yiti. Tan nacava tsi siqui tsa yatyin ña sava yutya nahnu tan tsa yatyin ña sava nu ndohyo.

¹¹ Tan siví tiñuu cahnu can cuví Ajenjo. Tan tsa yatyin ña sava ndutyá tsa iyó, ndu uva tsi tumaa tsa uva xaan ajenjo can. Tan cuaha xaan nyiví tsihi tyin tsihi ñi ndutyá tsa ndu uva can.

¹² Tan tsa tiví tsa tsinu cumi ángel can trompeta tsa ndahá ra, ndu naa tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaá tsi naha tsi. Tan tsa cuenda tsa ndunaá juhva ñicanyii, ndunaá nu ñuhu ñayiví cumi hora tsa iin iin nduvi. Tan tsa cuenda tsa tiví juhva yoo tan tiñuu, ña ndunditsin maa nu ñuhu ñayiví cumi hora tsa iin iin tsacuaa.

13 Yahá can tan nyehe yu iin ángel ndavá ra mahñu andiví tan tsiñi yu tsa caahán ra. Tsihin tsa ñihi ndusu ra catyí ra:

—¡Ndahvi nyiví iyó nu ñuhu ñayiví tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

9

1 Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andiví. Tan nacava can nu ñuhu ñayiví. Tan quihín cuenda can ndaha tucu tsa cuenda yavi cunu tsa nduve maa nuu tsindihi. 2 Tacan tan nuña can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasí yuhma can nuu ñicanyii tan nasacá nuu can tsihin tatyí. Tan ndunaá nu ñuhu ñayiví. 3 Tan tsitsi yuhma can quitá tica xama. Tan ndava ti naha ti nu ñuhu ñayiví. Tan ñihí ti naha ti ndatu tsa tyaa ti naha ti tsi nyiví tumaa tyaa tujuhma tsa iyó nu ñuhu ñayiví. 4 Quihín ti naha ti tuhun tyin na ña jativi ti naha ti cuhu tsa iyó nu ñuhu ñayiví, ndi cuhu cuui, tan ndi yutun. Maa tyin na tyaa ti naha ti tsi nyiví tsa nduve tuñi Nyoo nyaá nutyaan. 5 Ña ñihí ndatu ti naha ti tsa cahñi ti naha ti tsi nyiví, tyin tyaa ñi maa ti naha ti tsi ñi. Tan quihí xico ti tsi ñi uhun yoo. Tan xico uhvi can uhvi tsi tumaa uhví nyiví tsa tyaa tujuhma. 6 Quiví can nyiví cua nanducu ñi tuhun

tsiihí. Maa tyin ña cua nañihi ñi can. Tan vasu ndi maa cuñi ñi cúu ñi, tuhun tsihií cua cunu tsi nuu ñi tyin ña cua cúu ñi.

7 Tica xama can caá ti tumaa caá cuayu tsa tsicá cuatyí. Tan jiñi ti naha ti yihí tsa caá tumaa caá corona xuhun cuaan. Tan nuu ti naha ti caá tumaa caá nuu nyiví. 8 Tan ixi jiñi ti naha ti caá tumaa caá ixi jiñi ñaha. Tan nuhu ti naha ti caá can tumaa caá nuhu ndicaha. 9 Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí. 10 Tan juhma ti naha ti caá tumaa caá juhma tujuhma, tyin yihí iñu can. Tan tsihin can cua tyaa ti naha ti tsi nyiví tsitsi tsa uhun yoo. 11 Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñi tsi catyí: Nu Janaá.

12 Tsa yahá iin tundoho, tan cumañi uvi taahan ca.

13 Tan tsa tiví tsa tsinu iñu ángel can trompeta tsa ndahá ra, tsiñi yu iin ndusu tsa quitá tsitsi tsa cumi ndiqui tsa nyecú tutun altar xuhun cuaan tsa nyaá ityi nuu Nyoo. 14 Tan ndusu can caahán tsi tsihin tsa tsinu iñu ángel tsa ndahá trompeta can, tan catyí tsi:

—Ndatsi tsi tsa cumi ángel tsa nuuhñi yatyin yuhu yutya

cahnu Eufrates —catyí ndusu can.

¹⁵ Tacan tan ndatsj ra tsi tsa cumi ángel can, tyin tsa ndatū xaan ra naha ora can, quivi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi. ¹⁶ Tan tsiñi yu tyin uvi cientu millón andarū tsa yosó cuayu.

¹⁷ Tacan nyehe yu cuayu jahā Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre. ¹⁸ Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitá yuhu cuayu can naha ti: ñuhu tan yuhma tan azufre. ¹⁹ Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá tumaa caá coo tan nu juhma ti naha ti caá tumaa caá jiñi coo. Tan tsihin yacan jañicueehé ti naha ti tsi nyivi.

²⁰ Maa tyin tandihi ca nyivi tsa ndoo, ñi tsa ña tsihi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yu-tun: tsitoho tsa ña cuví nyehe, ndi ña tsiñi, ndi ña cuví caca. ²¹ Ndi ña jandihí ñi tsa tsahñi ñi nyivi, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayii, tan rayii ña jandihí ra naha tsa

tsicá nuu ra naha tsihin ñaha vasu ndi maa ña tindaha ñi. Tan ña jandihí ñi tsa suhú ñi.

10

Ángel tsa ndahá libru luhlu

¹ Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsi nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú. ² Tan ndahá ra iin libru luhlu nuñá nuu tsi. Tan tsañi tsaha cuaha ra nu ndutya ñuhu tan tsaha satyin ra nu ñuhu ñayivi. ³ Tacan tan cana tsa ra, tumaa taná ndicaha tsa cuxaán ti. Tan cuhva tsa cana tsa ra, tsiñi yu utsa ndusu tumaa cuví nu caahán savi, tan intuhun intuhun tsi caahán tsihin ndusu maa tsi. ⁴ Tsa yahā tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi yu caahán iin ndusu nda andivi, tan catyí tsi tsihin yu:

—Naquihin xeehe tuhun tsa cahān tsa utsa ndusu can. Tan ña tyaa un can nu tutu —catyí ndusu can.

⁵ Tacan tan ángel tsa nyehe yu tsa tsañi nu ndutya ñuhu tan nu ñuhu ñayivi, jandaā ra ndaha cuaha ra ityi andivi. ⁶ Tan ángel can catyí ra:

—Na nyehe maa Nyoo ra ña cua cundihí maa, ra tsa javahā andivi tan ñuhu ñayivi tan ndutya ñuhu tan tandihí tsa iyó nuu tsi tyin nduve ca tsa cucuee. ⁷ Tyin cuhva tsa cua quitsaha tivi tsa tsinu utsa ángel can trompeta tsa

ndahá ra, cuhva can cua cun-
daa tuhun xeehe tsa catyí
Nyoo tyin javaha ra, tumaa
cahan ra tsihin ra jahá tyiñu
tyiñu ra, ra cuví ndusu yuhu
ra —catyí ángel can.

⁸ Tan ndusu tsa quita
andivi, tsa cahan jihna tsihin
yu, juvin tsi caahán tsihin yu
tyehen:

—Cuaahan cuaquihin
libru luhlu tsa nandica tsa
ndahá ra ángel tsa tsañi nu
ndutya ñuhu tan nu ñuhu
ñayivi —catyí tsi.

⁹ Tacan tan tsahan yu nu
nyaá ángel can tan tsican yu
libru luhlu can tsi ra, tan
catyí ra tsihin yu:

—Juhun, çatsi itsi. Vixi
xaan tsi cua cuví tsitsi yuhu
un, tumaa vixi ndutya ñuñu.
Maa tyin cua ndu uva tsi tsitsi
un —catyí ra tsihin yu.

¹⁰ Tacan tan quihin yu li-
bru luhlu tsa ndahá ra, tsatsi
yu. Tsa ndi nyii tsi tsitsi yuhu
yu, vixi xaan tsi tumaa vixi
ndutya ñuñu. Maa tyin tsa
cocó yu itsi, ndu uva tsi tsitsi
yu. ¹¹ Tacan tan catyí ra naha
tsihin yu:

—Cuñi tsi tsa cahan nyico
un inga tsaha tuhun tsa
caahán Nyoo siqui nyivi tsa
iyó ñuu nyihi tan ñuu nahnu,
tan nyivi caahán siin siin
yuhu, tan siqui ra cuví rey
naha ra —catyí ra tsihin yu.

11

*Nduvi ra tsa cuví tsandaa
naha ra*

¹ Tacan tan tsaha ra naha
iin ndoo tsi yu. Caá tsi tumaa
caá yutun tsa tuhvá yo tyihí

cuhva tsihin. Tan catyí ra
naha tsihin yu:

—Nduvita tan tyihi cuhva
un vehe ñuhu Nyoo tan al-
tar ra, tan cahvi najava taa-
han nyivi jacahnú tsi ra tsitsi
vehe can. ² Maa tyin ña tyihi
cuhva un nuquehe vehe ñuhu
can, tyin tsa cuenda nyivi
inga ñuu cuví can. Cua vaca
tsaha ñi nu ñuu ii tsitsi tsa uñi
cuiya sasava. ³ Tan yuhu cua
jacuhun yu uvi ra tsa cua cuví
tsandaa tan cahan tuhun yu
tsitsi tsa mil uvi cientu uñi
xico quivi. Tan cunditsi ra
naha jahma tucuihya iñi.

⁴ Tan tsa nduvi tsandaa
can cuví uvi yutun olivo tan
uvi candileru tsa nyecú nu
Jutu Mañi yo, ra ndacá ñaha
nu ñuhu ñayivi. ⁵ Tan nyivi
tsa cua cuñi jañicueehe tsi ra
cuví tsandaa can naha ra,
cua naa cuii nuu ñi. Tyin
cua quita ñuhu yuhu ra naha,
tan tsihin can cua cahmi ra
naha tsi tandihi nyivi xaan
iñi tsi ra naha. ⁶ Tan iyó
ndatu tsi ra naha tsa casi ra
naha nu cuun savi tandihi
quivi tsa cua cuhva cuenda
ra naha tuhun caahán Nyoo
tsihin ra naha tsi nyivi. Tan
iyó tucu ndatu tsi ra naha
tsa jananduvi ra naha niñi
ndutya. Tan iyó tucu ndatu
tsi ra naha tsa janyehe ra
naha tundoho tsi nyivi iyó
nu ñuhu ñayivi tsihin tandihi
nuu cuehe. Tan cuví javaha
ra naha yacan najava tsaha
cuñi maa ra naha. ⁷ Maa tyin
tsa cua ndihi cuhva cuenda
ra naha tuhun Nyoo tsi nyivi,
cua quita quiti xaan yavi
cunu can, tan cua cañi tahan

ti tsihin tsa nduvi taahan ra cuvi tsandaa can. Tan cua jaha canaa ti tsi ra naha. Tan cua cahñi ti tsi ra naha. ⁸ Tan cua cava cuñu ñuhu ra naha tsitsi calle ñuu nu tsahñi nyivi tsi Jutu Mañi yo tan tyaa ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can]. ⁹ Tan tsitsi tsa uñi quivi sasava, cua nyehe tandihi nyivi cuñu ñuhu ra naha; nyivi iyó tandihi ñuu nyihi, nyivi tandihi ñi tata, tan ñi caahán siin siin yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quih xeehe cuñu ñuhu ra naha tsitsi ñuhu. ¹⁰ Tan sii xaan cua cuñi ñi tsa cuenda tsa cua cúu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa sii cuñi ñi tsa cua cúu nduvi taahan rayii tsa cahan tuhun Nyoo tsihin ñi. Tyin cuñi maa ñi tyin tsaha xaan ra naha tundoho tsi ñi. ¹¹ Maa tyin tsa cua yaha tsa uñi quivi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihi nyivi tsa cua nyehe tyin cua nandoto ra naha, cua nayuhvi xaan ñi. ¹² Tan tsa yaha tsa tsihi ra naha tan nyehe yu nandoto ra naha, tan catyí iin ndusu ityi andivi tsihin ra naha:

—Naha ndo nyehe

Tacan tan nandaq ra naha ityi andivi tsitsi vico. Tan nyehe nyivi xaan iñi tsi ra naha nu nandaq ra naha. ¹³ Tan ñihi xaan taan cuhva

can. Tan tsitsi ñuu can tani cuaha xaan vehe. Tsitsi tsa utsi utsi vehe, tani intuhun intuhun tsi. Tan tsihi utsa mil nyivi jaha tsa taan can. Tan nyivi tsa ña tsihi, jacahnú ñi tsi Nyoo, ra nyaá andivi, tsa cuenda tsa yuhvi ñi.

¹⁴ Yacan cuvi tundoho tsa tsinu uvi tsa nyehe nyivi, maa tyin tsa vatsi tsa tsinu uñi.

Nu tiví tsa tsinu utsa ángel trompeta tsa ndahá ra

¹⁵ Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andivi, tan catyí tsi:

Tandih nu ndacá ñaha rey nu ñuhu ñayivi, tsa yaha nanduví tsi tsa tsii Nyoo Jutu yo tan ra Cristo.

Tan ña cua ndih maa tsa ndacá ñaha ra naha, catyí ndusu can.

¹⁶ Tacan tan tsa oco cumi ra tsahnú tsa nyecú nu nyaá Nyoo, tsicuiñi tsiti ra naha tan tsaquin ra naha nuu ra naha nda nu ñuhu. Tan jacahnú ra naha tsi Nyoo. ¹⁷ Tan catyí ra naha:

Jutu Mañi ndi Nyoo ndi. Ra iyó tandihi tunyee iñi tsi.

Tacan ñi iyó maa un. Juvín un cuví Nyoo nda tsanaha tan vityin, tan juvín un cua quitsi.

Tsahá xaan ndi tyahvi nyoo tsi un,

Tyin tsa naquihín cuenda un tunyee iñi un.

Tan tsa quitsaha ndacá ñaha un.

18 Tan vasu ndi maa cuxaán nyivi iyó tandihi ñuu nahnu.

Maa tyin tsa tsaá quivi tatsi tuñi un tsi ñi.

Tan tsa tsaá quivi tsa jacutuñi un tsi ndiyi.

Tan cuhva un tsa vaha tsa taahán tsi tsi nyivi jahá tyiñu tyiñu un, ñi tsa há cuenda tuhun caahán un,

ñi tsa nacuhva cuenda añima ñi tsi un, tan jacahnú ñi sivi un.

Vasu ndi maa cahnu cuví ñi o ndaahvi ñi.

Tan tsa tsaá cuhva tsa janaa un tsi nyivi jatíví tsi nyivi iyó nu ñuhu ñayivi, catyí ra naha.

19 Tacan tan nuña yuvehe ñuhu Nyoo tsa iyó gloria, tan tsitsi vehe ñuhu can quituvi tsatun cuenda tsa ndoo ra tyiñu tsihin yo. Tan quihvi tatsa. Tan ñihí cuvaá tan caahán savi. Tan taan. Tan ñihi xaan cucoyo yuu savi.

12

Nu nducú coo xaan tsa iyó ndaha tsi ñaha

1 Tacan tan quituvi tsa iyo cahnu ityi andivi. Quita iin ñaha tan nditsí ña ñicanyii tumaa nditsí yo jahma. Tan tsañi ña nu yoo. Tan yihí iin corona tsa utsi uvi tiñuu jiñi ña. 2 Tan ñaha ihya ñuhú sehe ña. Tan tsacú xaan ña tsihin tsa cuuhví tsitsi ña, tyin nyehé xaan ña tundoho.

3 Tacan tan quita inga tsa iyo ityi andivi. Tan nyehé yu iin coo xaan tsa iyó ndaha. Cuaaha ti tan cahnu ti. Tan iyó utsa jiñi ti, tan utsi ndiqui

ti. Tan yihí corona intuhun intuhun jiñi ti. 4 Tan tsihin juhma ti jacoyo ti tsa yatyin sava tiñuu tsa iyó andivi nu ñuhu ñayivi. Tan coo can tsicuiñi ti nuu ñaha tsa cua cacu sehe, tyin cuñi ti catsi ti sehe ña náa cuhva cacu ñi maa tsi. 5 Tan ñaha can jacacu ña iin rayii. Tan juvin ra cua cundaca ñaha tandihi nyivi iyó nu ñuhu ñayivi. Ñihi xaan cua cundaca ñaha ra tumaa tsa tsihin iin tatun tsa cuví caa. Tan tsa yahá cacu ra, naquihin Nyoo tsi ra cuahán ra nu nyaá ra nu tyayu ra.

6 Tan cuahán ñaha can tsinú xeehe ña ñuhu ityi, nu janduvahá Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quivi.

7 Yahá can tan tsicoo cuatyí nda andivi, cañi tahan ángel Miguel tan tandihi ángel tsa cutahán tsihin ra tsihin coo xaan can. Tan coo can tsihin tandihi tatyí ña vaha tsa cutahán tsihin ti, cañi tahan ti tsihin ángel Miguel. 8 Maa tyin ña cuví jahá canaa ti tsa cañi tahan ti. Tan ña ñihí ca ti nu ndoo ti nda andivi tsihin tatyí ña vaha tsa cutahán tsihin ti. 9 Tacan tan tava Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandihi nyivi iyó nu ñuhu ñayivi. Maa nu tan tatyí ña vaha tsa cutahán tsihin nu cucoyo nahnu nda nu ñuhu ñayivi.

10 Tacan tan tsiñi yu iin ndusu ñihi xaan ityi andivi,

tan catyí tsi:

—Vityin tsa tsaꞗ quivi tsa jacacú Nyoo tsi nyivi. Tsa jahꞗ canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tavꞗ ra naha tsi nu tsa tyaꞗ xaan cuatyí siqui ñi nuu ra naha nduvi tan ñiñu. ¹¹ Tan jaha canaa ñi tsi nu tsihin niñi ra cuví Mbee Ticatyí Luhlu, tan tsihin tuhun Nyoo tsa cahan ñi tsihin nyivi. Ña nayuhvi ñi cúu ñi tan tsaha cuenda ñi ñayivi ñi. ¹² Yacan cuenda cusi iñi nyooho tsa iyó andivi. Maa tyin jndahvi nyivi tsa iyó nu ñuhu ñayivi tan nu ndutya ñuhu! Tyin nu ña vaha nacavꞗ nu nu ñuhu ñayivi nu yucú ñi. Tan xaan xaan cuñí nu tyin tsitó nu tyin ña cuaha ca quivi tan cundihi tsa jandaví ñaha nu tsi ñi.

¹³ Tan tsa nyehe nu coo xaan tsa iyó ndaha can tyin nacavꞗ nu nu ñuhu ñayivi, quitsaha nyaá ndaha nu tsi ñaha tsa tsicoꞗ sehe yii can. ¹⁴ Maa tyin tsicoꞗ uvi nditsin nahnu ñaha can tan caá can tumaa caá nditsin tasu. Tsicoꞗ can tyin tacan tan cuví ndava ña tan cahun ña cunu xeehe ña nu tsiqui nu ña cuví ñihi coo can tsi ña. Ican cuví nu cua ñihi ña tsa catsi ña tsitsi tsa uñi cuiya sasava. ¹⁵ Tan nu coo can tavꞗ nu ndutya tsihin yuhu nu, tyin coo yutya cahnu, tan tañi ñaha can tsitsi yutya can. ¹⁶ Maa tyin ñuhu ñayivi jatyinyee tsi tsi ña, tyin ndata tsi tan nanyee yutya tsa javahꞗ nu coo tsihin ndutya

tsa quita yuhu nu. ¹⁷ Tan tsa ña cuví jaha canaa nu tsi ña, quitsaha cañi tahan nu tsihin nyivi cuví tata ña, ñi tsa tyaá yahvi tuhun caahán Nyoo, tan nyicún ñi tsihin tsa niñi iñi aña ñi tsa nditsa tsa caahán ra Jesucristo.

13

Nu nyehé ra Juan uvi quití caquiñi

¹ Tan tsinyaꞗ nyityi yu nu nyiti yuhu ndutya ñuhu, nyehe yu quita iin quití caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo. ² Quití caquiñi can caá ti tumaa caá cuiñi. Tsaha ti caá tumaa caá tsaha oso, Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsaha nu ndatu tsi quití caquiñi can tsa cunyaa ti nu tyayu nu. Tan tsaha nu ndatu tsi ti tsa cundaca ñaha ti. ³ Tan nyaá iin nu caahvi tsa cua cahñi tsi ti jiñi ti, maa tyin ndaha nu caahvi can. Tan tsa nyehe nyivi iyó nu ñuhu ñayivi ihya can, iyo xaan cuñi ñi. Tan quitsaha nyicún ñi tsi ti. ⁴ Tan jacahnú ñi tsi nu coo xaan can, tyin tsaha nu ndatu tsi quití can. Tan jacahnú tucu ñi tsi quití can, tan catyí ñi:

—¿Yoñi maa cuví tumaa cuví quití ihya? ¿Tan yoñi cuví cañi tahan tsihin ti? —catyí ñi.

5 Tan ñihj tucu quití can ndatu tsa cahan ndasi ti tan cahan ti ndavaha ñi síqui Nyoo. Tan cua cundaca ñaha ti uvi xico uvi yoo. 6 Tacan javaha ti: Cahān ti tsi Nyoo. Cahān ti ndavaha ñi nu iyó ra, tan sívi ra, tan tsa iyó andívi. 7 Tan tsicoo tucu ndatu tsi ti tsa cañi tahan ti tsihin nyívi yihí cuenda Nyoo nda cuanda cuvi jaha canaa ti tsi ñi. Tan ñihj ndatu tucu ti tsa quihi ndaha ti tsi nyívi ndihi ñi tata, nyívi caahán síin síin yuhu, nyívi iyó tandihi ñi ñuu nyihi, tan ñuu nahnu. 8 Tan nyívi tsa ña cua coo ñayívi tsa tsihin ra cuví Mbee Ticatyi Luhlu, ra tsa tsihj, ña cua coo ñi ñayívi tsa can tsa cuenda tyin ña tsinyaā sívi ñi nu libru ra tsa ndi cumañi ca tsinu ñuhu ñayívi. Tandihi maa ñi can cua jacahnu ñi tsi quití caquiñi can.

9 Tatun yihí ndo iyó soho ndo, tyāa soho ndo tuhun ihya: 10 Nyívi tyihí tsi inga nyívi vehe caa, cua cahun tucu maa ñi vehe caa. Tan nyívi tsa tsahñi tsihin tsa xaan, juven ñi maa tsihin can cua cúu ñi. Yacan cuenda nyooho tsa yihí cuenda Nyoo cuñi tsi cunyeē iñi ndo tan tsinu iñi ndo tsi ra.

11 Yaha can tan nyehe yu quitā inga quití caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyi luhlu. Maa tyin caahán ti tumaa caahán coo xaan tsa iyó ndaha can.

12 Tan ndacá ñaha ti tumaa ndacá ñaha inga quití caquiñi

can. Tan nyehe inga quití can tsa ndacá ñaha ti. Tan natyuhú ti tsi ñuhu ñayívi tan nyívi iyó nu tsi na jacahnu ñi tsi inga quití caquiñi tsa cuñi cúu jahā tsa caahvi tsa tsinyaā tsi ti. 13 Tan cuaha xaan tsa iyo javaha ti nda cuanda quitā ñuhu andívi tan janacavā ti can nu ñuhu ñayívi tyin nyehe nyívi. 14 Tan jandavj ñaha ti tsi nyívi iyó nu ñuhu ñayívi tsihin tsa iyo tsa cuví javaha ti nuu quití caquiñi tsa jihna ñi. Tava tyiñu ti na javaha ñi iin tsitoho quití caquiñi tsa tyahnya caahvi tsihin mityi, tan ña tsihj ti. 15 Tan quití caquiñi tsa tsinu uvi can tsicoo ndatu tsi ti tsa cuhva ti tsa coo nyito tsitoho quití caquiñi tsa jihna can tyin tacan tan cuví cahan tsi tan cahñi tsi tsi tandihi nyívi tsa ña cua jacahnú itsi. 16 Tan síin tyin catyí tsi tyin cunyaa tuñi tsi tandihi nyívi; nyívi nyihi, nyívi tsahnu, nyívi cuca, nyívi ndaahvi, nyívi iyó nuña, tan nyívi iyó tsitoho. Tan cua cunyaa tuñi can ndaha cuaha ñi a nutyaan ñi. 17 Tan yoñi maa cuví jata tan xico tatun nduve tuñi can nyaá tsi ñi, o tatun nduve sívi ti, o número sívi ti nyaá tsi ñi. 18 Tuhun ihya cuñi xaan tsi tsa tsíñi tuñi. Nyívi cutuñi iñi, na jaha cuenda ñi número quití caquiñi can. Tyin número rayñi cuví can. Tan número can cuví iñu cientu uñi xico iñu.

Nu tsitá cientu uvi xico cumi mil nyivi iin yaa tan jacahnú ñi tsi Nyoo

¹ Yahá can tan nyehe yu tsi ra cuví Mbee Ticatyí Luhlu, nyaá nyityi ra jiñi yucu Sión. Tan yucú cientu uvi xico cumi mil rayii tsihin ra. Ra ihya naha ra cuví ra tsa nyaá sivi ra tan sivi Jutu ra nutyaan. ² Tacan tan tsiñi yu cucayú ityi andivi, tumaa cucayú yutya nahnu, tan tumaa caahán savi tsa ñihi xaan, o tumaa cuví nu javacú ra naha guitarra cuaha. ³ Tan tsitá ra naha iin yaa tsa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihi ra tsahnu naha ra. Tan yoñi maa cuví cutuhva yaa can, maa ñi maa tsa cientu uvi xico cumi mil rayii tsa cacú nu ñuhu ñayivi cuví tsitá can. ⁴ Ra ihya naha ra cuví ra tsa ña tsicá nuu tsihin ñaha, tyin ii ra naha. Tan nyicún ra naha tsi ra cuví Mbee Ticatyí Luhlu tandihi ñi ityi cuahán ra. Cacú ra naha tan juvin ra naha jamañi tsi ra naha nuu Nyoo tan nuu ra cuví Mbee Ticatyí Luhlu tsa jihna ñi. ⁵ Yoñi cuví catyi tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andivi. Tan nyisó ra tuhun Nyoo tsa ña cua cundihí maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi

nyivi iyó nu ñuhu ñayivi; nyivi iyó tandihí ñi ñuu nahnu, tan ñuu nyihi, nyivi tandihí ñi tata, tan nyivi caahán siin siin yuhu. ⁷ Tan ñihi xaan cahan ra tan catyí ra:

—Nayuhvi ndo tsi Nyoo, tan jacahnu ndo tsi ra. Tyin tsa tahañ tsi cuhva tsa cua cutuñi nyivi. Jacahnu ndo tsi ra javahá andivi tan ñuhu ñayivi, tan ndutya ñuhu tan ndohyo —catyí ángel can.

⁸ Tan catyí inga ángel tsa vatsí nyicún tsi ra:

—Tsa nduva ñuu Babilonia tsa cuví ñuu cahnu, tsa taní tsi. Tyin nyivi iyó ñuu can jacuahá ñi tsa caquiñi tsa javahá ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jahá ñi Babilonia cuví can —catyí ángel can.

⁹ Tacan tan vatsí tsa tsinu uñi ángel, tan ñihi cahan ra tan catyí ra:

—Tatun ndáa nyivi jacahnu tsi quití caquiñi can tan tsi-toho ti, o cuhva ñi tsa cunyaa tuñi ti nutyaan ñi o ndaha ñi, ¹⁰ cua nyehe xaan ñi tundo tyin cua tyihi Nyoo tsi ñi nu ñuhu, tan nu azufre. Tumaa tsa cua jacoho ra vinu xaan tsi ñi nuu ángel tan nuu ra cuví Mbee Ticatyí Luhlu cuví can. ¹¹ Tan ña cua cundihí maa tsa quita yuhma nu nyehe ñi tundo, tan ña cua quitatu maa ñi nduvi tan ñiñu. Ñi ihya cuví ñi tsa jacahnú tsi quití caquiñi can tan tsi tsi-toho ti, tan tsahá ñi tsi ñi cunyaa tuñi sivi ti. ¹² Yacan cuenda nyivi yihí

cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñi tsi tsa cunyeē iñi ñi —catyí ángel tsa tsinu uñi can.

¹³ Tacan tan tsiñi yu iin ndusu tsa queē nda andivi, tan catyí tsi tsihin yu:

—Tyaá tuhun ihya: “Vityin tan ityi nuu, si xaan cua cuvi tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, si xaan cua cuvi tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyivi

¹⁴ Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan.

¹⁵ Tan quita inga ángel tsitsi vehe ñuhu tan ñihi xaan cana tsa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaá cuhva, tan tsa iyó nu ñuhu ñayivi tsa tsityí tsi —catyí ra.

¹⁶ Tacan tan ra tsa nyaá nu vico can jayahá ra mityi ra nu ñuhu ñayivi, tan naquihin ra tsa iyó nuu tsi.

¹⁷ Tacan tan quita inga ángel tsitsi vehe ñuhu tsa iyó andivi. Tan juvin ñi ndahá tucu ra iin mityi yacua tsa xaan. ¹⁸ Tan quita inga ángel nu nyaá altar, tan ra ihya iyó

ndatu tsi ra tsa cundaca ñaha ra ñuhu tsa cayú. Tan cana tsa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yucu vixi tsa nañi uvas tsa iyó nu ñuhu ñayivi, tyin tsa tsityí tsi —catyí ra.

¹⁹ Tan jayahá ángel can mityi ra nu ñuhu ñayivi tan tsahnyá ra uvas can. Tan tyihí ra itsi iin nu tyihí ra tyin cua cuhñi ra itsi tan quita ndutya tsi. Tan yacan cuñi tsi catyí tsa cua tatsi tuñi Nyoo tsi nyivi. ²⁰ Tan nacuhñi ra uvas can ityi tsata ñuu, tan cuñi tsi catyí tyin cuaha xaan nyivi tsihi, tan nu cuvi can, cuaha xaan cuaha xaan niñi ñi tsati. Tan tsaá tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

15

Nu quitá ndihi utsa taahan ña tundoho tsa cua nyehe nyivi

¹ Nyehe yu inga tsa iyo cahnu andivi tan nayuhvi xaan yu, nyehe yu utsa ángel tsa vatsi ndacá utsa taahan ña tundoho. Tsihin tundoho ihya cua cundihí tsa xaan cuñi Nyoo nyehé ra tsi nyivi tsa ña tyaá yahvi tuhun caahán ra.

² Tan nyehe tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasaca ñuhu tsihin tsi. Tan nyivi tsa cunyeē jaha canaa tsi quiti caquiñi can tan

tsi tsitoho ti, tan ña tsinyaa número sivi ti tsi ñi, tandihi ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsaha Nyoo tsi ñi. ³Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuví Mbee Ticatyi Luhlu. Tan catyí yaa can tyehen:

Cahnu tan iyo xaan caá tandihi maa tsa javahá un,

Nyoo, Jutu ndi, iyó tandihi tunyee iñi tsi un.

Ndoo xaan tan nditsa xaan ityi un,

Yooho Rey cuenda tandihi nyivi iyó nu ñuhu ñayivi.

⁴¿Yóo ña cua nayuhvi tsi un, yooho Jutu Mañi ndi?

¿Yóo ña cua jacahnu tsi un?

Tan intuhun ñi maa un cuví ra ii.

Tan cua quitsi nyivi quee tandihi maa ñuu, tan cua jacahnu ñi tsi un,

tyin nyehe ñi tsa vaha tsa javahá un, catyí yaa tsitá ñi.

⁵Tacan tan nyehe yu nuña yuvehe ñuhu tsa nyaá nda andivi nu yucú vaha nduvi tabla tsa nyaá ley Nyoo nuu.

⁶Tan quita utsa ángel tsa vatsí ndacá tsa utsa tundoho can tsitsi vehe ñuhu can. Nditsí ra naha jahma vaha, cuitsin tan xiñu. Tan yihí cinturón xuhun cuaan yiqui nyica tsa intuhun intuhun ra naha.

⁷Tacan tan iin tsa nyito can, tsaha can intuhun intuhun coho xuhun cuaan tsi tsa intuhun intuhun tsa utsa ángel can. Tan tsitu maa can

tsihin tsa xaan Nyoo tsa cua tatsi tuñi ra tsi nyivi. Ra ican ña cua cundihí maa tsa iyó ra. ⁸Tan tsitu maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yoñi maa cuví quihvi tsitsi vehe ñuhu can tsitsi tsa ndi cumañi ndihí tsa utsa tundoho tsa vatsí ndacá tsa utsa ángel can.

16

Coho tsa yihí tundoho tsa cua jaquitsi tsa utsa ángel

¹Tacan tan tsiñi yu iin ndusu ñihi xaan tsa quita tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cuacoyo ndo tsa yihí tsitsi coho ndahá ndo juvin siqui nyivi iyó nu ñuhu ñayivi, tyin Nyoo cua tatsi tuñi ra tsi ñi —catyí ndusu can.

²Tacan tan tsahan iin ángel can tsicoyo ra tsa yihí tsitsi coho ra siqui nyivi tsa nyaá tuñi quiti caquiñi can tan jacahnú ñi tsitoho ti. Tan quita nu caahvi xaan tan uhvi xaan tsi ñi.

³Tacan tan coyó tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduví tsi niñi tumaa niñi ndiyi, tan tandihi tsa nyito tsa iyó tsitsi ndutya ñuhu can tsihi tsi.

⁴Tacan tan coyó tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduví tsi niñi. ⁵Tacan tan tsiñi yu tsa

caahán ángel cuenda ndutya tan catyí ra:

—Jutu Mañi yu, yooho vaha xaan un tyin tatsí tuñi un tsi nyivi tyehen. Jutu Mañi yu, Nyoo ii cuví un tyin nda nu quitsaha tandihi tan nda cuenda vityin tacan ñi iyó maa un. ⁶ Tatsí tuñi un tsi ñi tyin maa ñi tsatí ñi niñi nyivi yihí cuenda un tan niñi ra cuví ndusu yuhu un. Tan vityin yooho tumaa tsa jacobó un niñi tsi ñi tyin tacan taahán maa tsi tsi ñi —catyí ángel can.

⁷ Tan tsiñi tucu yu nacahan inga ndusu ityi nu nyaá altar Nyoo tan catyí tsi tyehen:

—Nditsa, Nyoo, Jutu Mañi yu, ra iyó tandihi tunyee iñi tsi, vityin tsa tatsí tuñi un tsi nyivi tsihin tsa nditsa tan tsihin tsandaa —catyí ndusu can.

⁸ Tan coyó tsa tsinu cumi ángel can tsa yihí tsitsi coho ra nu ñicanyii. Tacan tan tsi-coo ndatu tsi ñicanyii can tsa cahmi tsi tsi nyivi tsihin ñuhu tsi. ⁹ Tan tandihi nyivi ndasi xaan cayu ñi jahá ñicanyii can. Maa tyin vasu ndi maa tacan tahan ñi, ña nasama ñi cuhva tsicoo ñi, tan ndi ña jacahnu ñi tsi Nyoo. Tan cahán ñi ndavaha ñi siqui Nyoo, ra tsa jaquitsi tundo ho can siqui ñi.

¹⁰ Tan coyó tsa tsinu uhun ángel can tsa yihí tsitsi coho ra siqui tyayu quití caquiñi can. Tan ndunaá nu ndacá ñaha ti. Tan nyivi cuenda ti, nda cuanda tsatsi yihí ñi yaa ñi tsa cuenda tsa nyehé

xaan ñi tsa uhvi. ¹¹ Maa tyin vasu ndi maa tacan cuví, ña jandihí ñi tsa javahá ñi tsa ña vaha. Tan cahán ñi ndavaha ñi siqui Nyoo, ra nyaá andivi, tsa cuenda tsa uhvi nu caahvi ñi.

¹² Tan coyó tsa tsinu iñu ángel can tsa yihí tsitsi coho ra nu yutya Eufrates cahnu. Tan ndoco ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra. ¹³ Tacan tan nyehe yu quitá tatyí ña vaha tsa caá tumaa caá sahva yuhu tsa intuhun intuhun quití. Iin can quitá yuhu quití caquiñi, inga can quitá yuhu coo xaan tsa iyó ndaha inga can quitá yuhu tsa cuví ndusu yuhu vatya. ¹⁴ Tatyí ña vaha can cuví tatyí nu ña vaha, tan nahnu tsa nyityi javahá nahnu. Quitá nahnu, jandu iin nahnu tandihi rey tsa iyó nu ñuhu ñayivi, tyin cañi tahan ra naha quivi tsa quivi janaha Nyoo tyin iyó tandihi tunyee iñi tsi ra. ¹⁵ Tan catyí ra Cristo:

—Nyehe ndo tyin tsa vatsi yu tumaa vatsí iin ñasuhu tyin iin ñasuhu sana iñi ndo tan quihví ra tsitsi vehe ndo tacan yuhu. Si xaan cua cuví tsi nyivi ndatú quivi quitsi yu tan tsa iyó vaha jahma ñi tyin quivi cua tsa yu ña cua nducahan nuu ñi tyin ña tandi ñi —catyí ra Cristo.

¹⁶ Tan cua ndu iin ra cuví rey naha ra nu nañi Armagedón tsihin yuhu hebreo.

17 Tan coyō tsa tsinu utsa ángel can tsa yihí tsitsi coho ra nu tatyí, tacan tan quitā iin ndusu nu nyaá tyayu Nyoo tsitsi vehe ñuhu tsa nyaá nda andivi. Canā tsa tsi tan catyí tsi:

—Tsa iyó vaha vityin.

18 Tacan tan vaa ña maa cuví tan caahán savi tan cañí tatsa. Tan ñihi xaan taan nu ñuhu ñayivi. Tan ña tuhvá maa taán tacan tsa ndi quitsaha iyó nyivi nu ñuhu ñayivi. 19 Tan uñi nu ndata ñuu cahnu Babilonia can, jahā tsa taan. Tan tandihi ca ñuu tsa cayucu nu ñuhu ñayivi taní tsi. Nyoo ña naa maa iñi ra tsa javaha nyivi Babilonia. Yacan cuenda janyehe xaan ra tundoho tsi ñi. 20 Tandihi maa ñuhu tsa iyó tsitsi ndutya ñuhu tan tandihi yucu, tandihi maa tsi tsinaa. 21 Tan cucoyo cuaaha yuu savi nahnu xaan tsa quee andivi siqui nyivi. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyivi cahan ñi ndavaha ñi siqui Nyoo tsa cuenda tundoho yuu savi can, tyin cuví tsi iin tundoho cahnu xaan tsa cuenda ñi.

17

Nu cua tatsi tuñi Nyoo tsi ñuu ña vaha

1 Tacan tan quitā iin ángel tsitsi tsa utsa ra tsa ndahá coho can naha ra, natuhva ra nu nyaá yu, tan catyí ra tsihin yu:

—Ñaha tyin janaha yu tsi un nácaa cua cutuñi ñaha ña vaha tsa tsicá nuu tsihin

rayi, ña tsa nyaá nu ndutya cuaaha. 2 Tyin ra cuví rey nu ñuhu ñayivi tsicoo ra naha tsihin ña, tan tsa cuenda ña tiví tandihi nyivi iyó nu ñuhu ñayivi —catyí ra tsihin yu.

3 Tacan tan nyehe yu iin tsa janaha Tatyí Ii Nyoo tsi yu, tan tsindaca ángel can tsi yu nu tsiqui nu nduve maa nyivi iyó, tan juvin ñi ican nyehe yu iin ñaha yosó iin quití cuaaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiqui ti. 4 Tan ñaha can nditsí ña jahma tijinda tan cuaaha. Tan cuaaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña. 5 Tan nyaá iin sivi tsa cuví iin tuhun xeehe tsa ña cutuñi iñi nyivi nutyaan ña. Tan catyí can tyehen: “Ñaha ihya cuví ñuu Babilonia cahnu, sihi tandihi ñiñaha tsa tsicá nuu tsihin rayi tan sihi tandihi tsa ña vaha tsa iyó nu ñuhu ñayivi.” 6 Tacan tan nyehe yu tyin tsiñi ñaha can jahā tsa tsihi ña niñi nyivi yihí cuenda Nyoo, ñi tsa tsihi tsa cuenda tsa cahan ñi tuhun ra Jesús. Tsa nyehe yu tsi ña, iyo xaan cuñi yu. 7 Tacan tan catyí ángel can tsihin yu:

—¿Nacuenda iyo xaan cuñi un? Cua jacoto yu tsi un náa cuñi tsi catyí tuhun xeehe ñaha ihya tan quití caquiñi tsa yosó ña, quití tsa iyó utsa jiñi tan utsi ndiqui. 8 Quití caquiñi tsa nyehe un can, juvin ti

cuví quití tsa tsicoꝝ tan vityin nduve ca ti iyó. Maa tyin cua quita ti tsitsi yavi cunu tsa nduve nu tsindihi. Ican nyíi ti tsa ndi cumañi ca cahun ti nu cua cundihi cuii ti. Nyívi iyó nu ñuhu ñayívi, ñi tsa nduve sívi nyaá nu libru Nyoo nda quívi tsinu ñuhu ñayívi, iyo xaan cua cuñi ñi nyehe ñi tsi quití can. Libru can catyí yóo nyívi cua coo cuii.

9 'Tuhun ihya cuñí tsi tsa cutuñi iñi yo itsi: Tsa utsa jíñi quití can cuñí tsi catyí tsa utsa yucu tsa nyaá ñaha can nuu.

10 Tan juvin ñi cuñí tucu tsi catyí can utsa rey. Uhun ra naha tsa yahá tsindacá ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quívi quítsi ra, ña naha cua cundaca ñaha ra. 11 Tan quití caquiñi tsa tsicoꝝ tan vityin nduve ca ti iyó, juvin ti cuví iin rey tsitsi tsa utsa taahan rey can, tan cua cuvi tucu ti rey tsa tsinu una. Tsa yaha cundaca ñaha nyico ti, tacan tan cua cahun ti nu cua cundihi cuii ti.

12 'Tan tsa utsi ndiqui tsa nyehe un can, cuñí tsi catyí utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quití caquiñi can. 13 Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quití caquiñi can. Tan tandihi ndatu tsa iyó tsi ra naha cua nacuhva ra naha tsi ti. 14 Tan cua cañi tahan ra naha tsihin ra Mbee

Ticatyi Luhlu. Maa tyin ra Mbee can, cua jaha canaa ra tsi ra naha. Tyin juvin ra yihí ndaha tsi tandihi ra ndacá ñaha. Tan yihí ndaha tucu ra tsi tandihi ra cuví rey naha ra. Tan nyívi yihí cuenda ra, maa Nyoo caná tsi ñi tan nacatsj ra tsi ñi. Tan ñi xaan cuñí ñi nyicún ñi tsi ra.

15 Tan catyí tucu ángel can tsihin yu:

—Nduya cuaha tsa nyehe un can, nu nyaá ñaha tsicá nuu can, yacan cuví nyívi iyó tandihi ñuu nyihi tan ñuu nahnu, ñi caahán sñn sñn yuhu. 16 Rey tsa cuví tsa utsi ndiqui quití caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua naco ihñi ra naha tsi ña. Tan cua jatandí ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña. 17 Tyin Nyoo tsañá ra tsa caca iñi rey can naha ra tyin javaha ra naha kuhva cuñí maa Nyoo. Tyin iin ñi kuhva cua caca iñi ra naha, tan cua kuhva ra naha ndatu tsi quití caquiñi can tsa cundaca ñaha ti tumaa rey nda cuanda cundaa tuhun caahán maa Nyoo. 18 Ñaha tsa nyehe un can, juvin ña cuví ñuu cahnu tsa ndacá ñaha tsi tandihi ra cuví rey nu ñuhu ñayívi.

18

Nu naá ñuu Babilonia

1 Tsa yahá yacan tan nyehe yu quee inga ángel ityi andívi tan iyó xaan tunyee iñi tsi ra. Tan ndunditsjñ ñuhu ñayívi

jaha tsa nditsin ra. ²Tan cana tsa ra tsihin tsa ñihi ndusu ra, tan catyí ra:

—Tsa tsindihí nuu ñuu Babilonia cahnu. Nanduvi tsi nu iyó tatyí ña vaha, vehe tandihí nuu tatyí ña vaha, tan taca saa ña vaha tsa ña taahán iñi nyívi. ³Tyin tandihí nyívi tiví ñi tsa cuenda cuatyí javahá ñuu Babilonia can. Ra cuví rey nu ñuhu ñayívi naha ra tumaa tsa tsicoo ra naha tsihin ñaha tsa cuví ñuu Babilonia can. Javaha ra naha cuatyí tsihin ña. Tan nyívi ñuhu ñayívi nducuca ñi tsihin tsa cuaha xaan tsa yahví tsa jata nyívi ñuu can.

⁴Tacan tan tsiñi yu ndusu Nyoo ityi andívi, tan catyí tsi:

—Quita ndo ñuu ihya, nyooho tsa cuví nyívi yu, ña cutahan ndo tsihin nyívi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehé maa ñi. ⁵Tyin tsa canyí tucuíti cuatyí nyívi iyó ñuu can, nda cuanda tsaá can nu nyaá yu. Tan ñuhú iñi yu tsa ña vaha javahá ñi. ⁶Cuhva ndo juvin ñi maa tsa tsaha ñi tsi inga nyívi tsi ñi; cuhva ndo uvi ca tsaha siqui tsa javaha ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsaha maa ñi tsi inga nyívi. ⁷Yacan cuenda cuhva ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jacahnu xaan ñi tsi ñi tan cusii xaan iñi ñi juvin cuhva

can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho”, cuñí ñi, tsicá iñi ñi. ⁸Yacan cuenda iin quívi ñi cua quitsi tundoho siqui ñuu can, cua quitsi tuhun tsihi, tucuihya iñi, tama, tan cua cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyívi ñuu can —catyí Nyoo.

⁹Ra cuví rey nu ñuhu ñayívi ihya tumaa tsa tsicoo ra naha tsihin ñaha tsa cuví ñuu can, cua vacu xaan ra naha, tan cuihya cua cuñi ra naha na nyehe ra naha yuhma tsa cayu ñuu can. ¹⁰Tan tsa cuenda tsa yuuhví ra naha tundoho can, nda sava ñi cua cunyecu ra naha. Tan cua catyí ra naha:

—¡Ndahvi yooho, ñuu cahnu Babilonia, ñuu tsa tsicoo cuaha tunyee iñi tsi! Tyin iin yaha ñi tsaá tundoho nyehé un —cua catyí ra naha.

¹¹Tan ra tsa xicó ndaha tyiñu naha ra, juvin ñi cua vacu xaan ra naha tan cuihya cua cuñi ra naha tsa cuenda ñuu can. Tyin yoñi ca cua jata tsa xico ra naha. ¹²Tyin xicó ra naha xuhun cuaan, xuhun cuitsin, yuu sii caá, perla, jahma linu, jahma seda, tan jahma ti-jinda cuaaha. Tan xicó tucu ra naha tandihí nuu vitu tami tan náa ndihí tsa tsinu tsihin yiqui nuu landa, tan vitu sii caá, tan caa tsa cuví bronce,

tan caa tsa cuví hierro, tan yuu tsa cuví mármol. ¹³ Tan xicó tucu ra naha canela, náa ndihi ca yucu tsa quihví tsihin tsa tsatsí yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, acetye, yutyi paan vaha, tan trigu. Tan juvin ñi xicó tucu ra naha quití cuenda carga, tan mbee, cuayu, carreta, tan nda cuanda nyívi tsa cuví musu tan xicó ra naha. ¹⁴ Tan catyi ra naha tsihin nyívi ñuu can tyehen:

—Nduve ca tsa sii caá tsa tsicoꝝ tsi un, tsa taahán xaan iñi un. Tan tsa tsindihí tandihí tsa cuca un. Tan ña cua ñihi ca maa un tandihí yacan —catyi ra naha.

¹⁵ Ra tsa xicó tandihí can, nducuca ra naha tsa cuenda tsa jata nyívi ñuu Babilonia can tsa xicó ra naha. Nda sava cua cunyecura ra naha tsa cuenda tsa yuuhví ra naha tsa cua nyehe nyívi can tundoho. Tan cua vacu xaan ra naha tan cuihya cua cuñi ra naha. ¹⁶ Tan cua catyi ra naha:

—¡Ndahvi ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu sii caá tan perla. ¹⁷ ¡Tan iin yaha ñi ndihí tsa cuca xaan can! —cua catyi ra xicó can naha ra.

Tan tandihí ra cuví capitán tsa jacacá yutun ndoo nu ndutya, tsihin nyívi yucú tsitsi can tan tandihí ra jahá tyiñu nu ndutya ñuhu naha ra, nda sava cua ndoo

ñi. ¹⁸ Tan tsa cua nyehe ñi yuhma tsa cayú ñuu can, cua cana tsa ñi, tan cua catyi ñi:

—¿Náa inga ñuu tsicoꝝ tumaa ñuu cahnu ihya? Nduve —cua catyi ñi.

¹⁹ Tan cua coso ñi nyaca jiñi ñi, tan cua vacu xaan ñi. Tan cuihya cua cuñi ñi, cua cana tsa ñi, tan cua catyi ñi:

—¡Ndahvi ñuu cahnu can! Tyin tsihin tsa cuca tsi tan nducuca tandihí yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naꝝ tsi! —cua catyi ñi.

²⁰ Maa tyin nyooho cusii iñi ndo nyehe ndo tsa taahán ñuu can, nyooho tsa iyó andivi, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihí ca nyooho tsa yihí cuenda Nyoo. Cusii iñi ndo tyin tsa cuenda tsa javaha ñi tsa ña vaha tsihin ndo tan tatsí tuñi Nyoo tsi ñi.

²¹ Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhun ra can tsitsi ndutya ñuhu, tan catyi ra:

—Tyehen cua cundihí nuu ñuu Babilonia cahnu. Tan ndi iin tsaha ca tan ña cua nyehe ca ndo itsi. ²² Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihi ca tyiñu. Tan ndi ña cua cucayu ca molino. ²³ Tan ndi ñuhu tyuma, tan ña cua cayu ca tsitsi ñuu can. Ndi ña cua cuñi ca yo ndusu nyívi nu

iyó vico tindaha. Tacan cua cuvi vasu ndi maa ra xico tsa tsicoo ñuu can naha ra, cahnu xaan tunyee iñi tsicoo tsi ra naha, tan jandavi ñaha xaan nyivi iyó ñuu can tsi tandihi nyivi iyó nu ñuhu ñayivi tsihin tuhun tasi.

²⁴ Tyin cuaha xaan niñi ra cuvi ndusu yuhu Nyoo canyí tsitsi ñuu can tyin tsahñi ñi tsi ra naha. Tan canyí tucu niñi inga ca nyivi yihí cuenda Nyoo, tan niñi tandihi nyivi tsa tsahñi nyivi nanii cahnu nu ñuhu ñayivi.

19

¹ Tsa yaha yacan, tan tsiñi yu ndusu nyivi cuaha ityi andivi. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

² Tyin tsihin tsa vaha tan tsandaa tan tsa nditsa jacutuñi ra.

Tatsi tuñi ra tsi ñaha tsicá nuu tsa cuví ñuu Babilonia tsa jativí xaan tsi nyivi iyó nu ñuhu ñayivi tsihin tsa caquiñi tsa javaha ña tsihin ñi.

Tan tatsi tuñi ra tsi ña tsa cuenda tsa tsahñi ña tsi nyivi jahá tyiñu tyiñu ra.

³ Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihi maa tsa ndaa tsi ityi siqui —catyí ñi.

⁴ Tan tsa oco cumi ra tsahnu tan tsa cumi tsa nyito

tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na cuví tsi tacan! —catyí ra naha.

⁵ Tan nu nyaá tyayu Nyoo, nacahan iin ndusu, tan catyí tsi:

Jacahnu ndo tsi Nyoo Jutu yo tandihi nyooho tsa jahá tyiñu tyiñu ra,

tan tyaá yahvi ndo tsi ra, nyooho nyivi nyihi tan nyivi tsahnu.

Nu iyó vico tindaha ra Mbee Ticatyi Luhlu tan nyivi tsinú iñi tsi ra

⁶ Tan tsiñi tucu yu ndusu tumaa cuví nu cuaha xaan nyivi yucú, o tumaa ndusu nu cuaha xaan yutya o tsa ñihi xaan caahán savi. Tan catyí tsi:

¡Cahnu xaan cuví Nyoo Jutu yo, ra iyó tandihi tunyee iñi tsi! Tyin tsa quitsaha ndacá ñaha ra.

⁷ Na cusii iñi yo tan na cutu yo tsihin tsa sii. Na jacahnu yo tsi ra,

Tyin tsa tsaá cuhva tsa coo yo vico tindaha ra Mbee Ticatyi Luhlu.

Tan yoo cua cuví yo tumaa ñasihi ra, tan ndatú yo quivi tindaha yo tsihin ra.

⁸ Tyin tsa ñihi ndatu yo tsa cunditsi yo jahma cuitsin tsa ña nyahyu ca tsa cuví jahma linu.

Tyin jahma linu can cuñi tsi catyi tsa vaha tsa javahá nyivi yihí cuenda ra.

⁹ Tacan tan quitsahá catyi ángel can tsihin yu:

—Tyaa tyehen nu tutu: “¡Sií xaan cuvi tsi nyivi tsa cua cahun nu tindaha ra Mbee Ticatyí Luhlu!”

Tan catyi tucu ra tyehen:

—Tuhun ihya cuvi tuhun nditsa Nyoo —catyi ra tsihin yu.

¹⁰ Tacan tan tsicuiñi tsi ti yu nuu ángel Nyoo can tsa cua jacahnu yu tsi ra. Maa tyin catyi ra tsihin yu:

—Ña jacahnu un tsi yuhu, tyin yuhu musu Nyoo ñi cuvi tucu yu tumaa yoocho, tan tumaa tandihi ra yañi un tsa tsinú iñi tuhun nditsa tsa cahan ra Jesucristo. Tsi Nyoo taahan tsi jacahnu yo —catyi ra tsihin yu.

Tyin tsa cahan ra Jesús, yacan cuvi tsa jandu iin iñi tsi ra cuvi ndusu yuhu ra, ra tsahá cuenda tuhun caahan Nyoo tsihin yo.

Nu nyehe ra Juan tsi ra tsa yosó cuayu cuitsin

¹¹ Tacan tan nyehe yu ticohó andivi. Tacan tan quituvi iin cuayu cuitsin. Tan ra yosó tsi ti nañi ra Ra Nditsa Tsa Nii Iñi Jahá Tyiñu Tyiñu Nyoo. Tyin tsihin tsa ndaa jacutuñi ra tsi nyivi, tan ndaa javahá ra tsa cañi tahan ra. ¹² Tan tumaa caá nu cayú ñuhu, tacan caá tinuu ra. Tan cuaha xaan corona yihí jiñi ra. Tan intuhun ñi maa ra tsitó iin sivi tsa nyaá tsi ra. ¹³ Tan nditsí ra jahma

cahyi tsihin niñi. Tan nañi ra Tuhun Nyoo. ¹⁴ Tan nyicún andaru andivi tsi ra, nditsí ra naha jahma vaha tsa cuvi linu, cuitsin tsi tan ña nyahyu tsi. Tan yosó ra naha cuayu cuitsin. ¹⁵ Tan quitá iin mityi xaan yuhu ra, yacan cuvi Tuhun Nyoo; tsihin yacan cua jañicueehe ra tsi nyivi iyó nu ñuhu ñayivi. Tan ñihi cua cundaca ñaha ra tsi ñi tsihin tatun tsa cuvi caa. Cua tatsi tuñi ra tsi ñi tumaa javahá ra tavá ndutya yucu vixi tsa cuvi uva tsihin tsaha ra. Tan cua jacoho ra vinu tsa tsinú tsihin uva tsi ñi, tsehe cuñi tsi catyi tyin cuxaán Nyoo tsihin ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihi tunyee iñi tsi. ¹⁶ Nu jahma ra tan nu sihin ra can nyaá letra tsa catyi tyehen: “Ra ihya cuvi ityi nuu tsihin tandihi rey. Tan juvin ñi ra cuvi ityi nuu tsihin tandihi ra ndacá ñaha naha ra.”

¹⁷ Tacan tan nyehe yu nyaá nyityi inga ángel nu ñicanyii. Tan ñihi xaan cana tsaa ra tsi tandihi saa tsa ndavá ityi andivi, tan catyi ra tsihin ti naha ti:

—Nuu ndo tan ndu iin ndo tan cuxiñi ndo tsa tsahá Nyoo catsi ndo. ¹⁸ Cua catsi ndo cuñu ra cuvi rey naha ra tan ra cuvi ityi nuu tsihin andaru naha ra tsihin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandihi ra naha, ra iyó tsitoho tan ra nduve tsitoho, tahan ñi nyivi nyihi tan nyivi tsahnu —catyi ra tsihin saa can naha

ti.

¹⁹ Tacan tan nyehe yu quití caquiñi can tsihin ra cuví rey tsa iyó nu ñuhu ñayivi tsihin andaru cuenda ra naha. Ndu iin ra naha tsa cua cañi tahan ra naha tsihin ra yosó cuayu cuitsin can tan andaru cuenda ra. ²⁰ Tiin ra yosó cuayu cuitsin can tsi quití caquiñi can iin caa ñi tsihin ra cuví ndusu yuhu vatya can, tyin nuu quití caquiñi can javaha ra vatya can tsa nyityi, tan tsihin yacan jandavi ñaha ra tsi nyivi tsa tsaha cunyaa tuñi quití caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhu tsa cayú tsihin azufre. ²¹ Tan tandihi ca ñi tsihi ñi tsihin mityi xaan tsa quitá yuhu ra yosó cuayu cuitsin can. Tan tandihi maa saa, tsatsi xaan ti naha ti cuñu ñi.

20

Nu nyehe ra Juan tsa cuenda tsa mil cuiya

¹ Tsa yaha can tan nyehe yu quee iin ángel ityi andivi, ndahá ra ndaha tucu yuvehe yavi cunu tsa nduve maa nu tsindihi. Tan ndahá tucu ra iin cadena cahnu. ² Tiin ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañi nu Satanás. Tsahñi ra tsi nu tsihin cadena iin mil cuiya. ³ Tan jacuhun ra tsi nu tsitsi yavi cunu xaan can. Nacasí ra yuhu yavi can, tan tyaá ra iin sellu yuhu can tyin tacan tan ña jandavi ñaha ca

nu tsi nyivi iyó nu ñuhu ñayivi, nda yaha mil cuiya. Tsa yaha mil cuiya can, cua ndatsi nyico nu juhva ca quivi.

⁴ Yaha can tan nyehe yu nyecú cuaha tyayu. Tan nuu can nyecú nyivi tsa ñihí ndatu tyin tatsi tuñi ñi tsi nyivi. Tan nyehe tucu yu añaima nyivi tsahnya nyivi jiñi tsa cuenda tsa cahān ñi tuhun Nyoo tsa tsaha cuenda ra Jesús tsi ñi. Nyivi ihya ña jacahnú ñi tsi quití caquiñi can, ndi tsi tsitoho ti, tan ndi ña tsaha ñi cunyaa tuñi ti nutyaan ñi, tan ndaha ñi. Nyehe yu nandoto ñi can tan tsindaca ñaha ñi tsihin ra Cristo tsitsi tsa mil cuiya can. ⁵ Ni ihya cuví ñi tsa nandoto tsa jihna ñi. Maa tyin inga ndiyi ña nandoto ñi tyin cua nandoto ñi nda yaha mil cuiya can. ⁶ Si xaan cuví tsi ñi tsa nandoto jihna tyin nacatsi Nyoo tsi ñi! Tan ña cua cuhun ñi anyaya nu tatsi tuñi Nyoo añaima ña vaha tsa cua cúu nyivi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundaca ñaha ñi tsihin ra Cristo mil cuiya.

⁷ Tsa yaha mil cuiya can, cua ndatsi Satanás nu nyii nu nuuhñi nu. ⁸ Cua quita nu, jandavi ñaha nu tsi nyivi Gog tan Magog, ñi xaan iñi tsi Nyoo tsa iyó nan# cahnu nu ñuhu ñayivi. Cua jandu iin nu tsi andaru ñi can tyin cuhun ra naha cuatyí. Cuaha xaan ra naha, tumaa cuaha nyiti yuhu ndutya ñuhu. ⁹ Tacan tan nyehe yu quee ra naha

nani cahnu nu ñuhu ñayivi. Tan tyasi nduvi ra naha nu iyó nyivi yihí cuenda Nyoo ñuu Jerusalén tsa cuñi xaan Nyoo. Maa tyin Nyoo januu ra ñuhu tsa quee andivi tan tsahmi tsi tsi tandihi ra naha. ¹⁰ Tan nu ña vaha tsa jandavi ñaha tsi ñi, jacuhun Nyoo tsi nu anyaya nu cayú ñuhu tsihin azufre, nu jacuhun ra tsi quití caquiñi can tan ndusu yuhu vatya can. Ican cua nyehe nahnu tundoho tacan ñi maa, nduvi tan ñiñu.

Nu cutuñi nyivi ityi nu nyaá tyayu cuitsin nu nyaá Nyoo

¹¹ Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehé ra nu naa ñuhu ñayivi tan andivi. Tan ña ñihí tsi numaa cava tsi. ¹² Tan nyehe yu tandihi añima nyivi tsihi, tahan ñi nyivi tsahnu tan nyivi nyihi, nyecú nyityi ñi ityi nuu Nyoo. Tacan tan nuña libru tsa nyaá tandihi tsa javaha ñi quivi tsicoo ñi. Tan nuña tucu inga libru nu nyecú sivi nyivi tsa cua coo nyito tsihin Nyoo. Ndiyí can cua cutuñi ñi tsa cuenda náa ndihi ca tsa javaha ñi tsa nyaá nu libru can. ¹³ Tan ndutyá ñuhunacuhva cuenda tsi añima nyivi tsa tsihi tsa cumí tsi. Tan nu yucú añima nyivi tsihi tan Tuhun Tsihi, nacuhva cuenda nahnu añima nyivi tsa yihí ndaha nahnu. Tan tandihi ñi cua tahan ñi nácaa javaha maa ñi. ¹⁴ Tacan tan Tuhun Tsihi can tan nu yucú añima nyivi tsihi can cua jacuhun ndihi Nyoo

nduvi taahan can anyaya cahnu nu cayú ñuhu. Tan tsehe cuví tuhun tsihi tsa tsinu uvi. ¹⁵ Juvín ñi ican jacuhun ra tsi nyivi tsa nduve sivi nyaá nu libru nu nyecú sivi nyivi cua coo nyito tsihin Nyoo tacan ñi maa.

21

Nu nyehé ra Juan andivi tsaa tan ñuhu ñayivi tsaa

¹ Yahá can tan nyehe yu iin andivi tsaa tan iin ñuhu ñayivi tsaa, tyin andivi tan ñuhu ñayivi tsa tsicoo jihna naa tsi. Tan tacan tucu ndutyá ñuhu naa tsi. ² Yuhu ra Juan nyehe yu ñuu ii tsa cuví Jerusalén tsaa tsa quee nda nu nyaá Nyoo andivi, nyehe yu nuu tsi. Tan sii xaan caá cucutu tsi tumaa cucutu iin ñaha cua tindaha. ³ Tan tsiñi yu iin ndusu ñihi tsa quitá nda andivi, tan catyí tsi:

—¡Nyehe jihna! Iyó Nyoo mahñu nyivi. Cua coo ra tsihin ñi. Maa ñi cua cuvi ñi nyivi ra. Tan cua cunyaa ra tsihin ñi, tan cua cuvi ra Nyoo cuenda ñi. ⁴ Juvín ñi maa ra cua nacuhva ndutyá nuu ñi. Ña cua coo ca tuhun tsihi tan ndi tucuihaya iñi. Ña cua vacu ca nyivi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandihi tsa tsicoo, tsa tsindihí tsi —catyí ndusu can.

⁵ Tacan tan ra nyaá nu tyayu cahnu can, catyí ra:

—Nyehe jihna. Jandutsaa yu tandihi maa tsa tsicoo.

Tan catyí tucu ra:

—Tyaa tuhun caahán yu ihya, tyin tuhun nditsa cuví tsi. Cuita iñi tuhun ihya tyin cua cundaa tsi —catyí ra tsihin yu.

⁶ Tsa yahá cahán ra yacan tan catyí tucu ra:

—Tsa iyó vaha tandihi vi-tyin. Yuhu cuví ra jihna ñi, tan yuhu cuví ra cua coo nu cua ndihi quivi: tumaa letra A cuví tsi letra jihna ñi tan tumaa letra Z cuví tsi letra nu ndihi ña. Nyivi tsa na ityi iñi cua cuhva yu ndutya coho ñi; tuhun ihya cuñí tsi catyi: Ñi cuñí tyaa soho tuhun yu, cua cuhva yu ñayivi tsa ña cua naa maa coo ñi, tan nduve yahvi tsi cua coo. ⁷ Nyivi jahá canaa tsi nu ña vaha, cua ñihi ñi tandihi tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu. ⁸ Maa tyin nyivi yuhví xaan, ñi ña tsinú iñi, ñi quiñi iyó, ñi tsahñi, ñiñaha tsicá nuu tsihin rayii, tan rayii tsicá nuu tsihin ñaha, ñi tasi, ñi jacahnú tsitoho, ñi vatya; tandihi maa nyivi ihya taahán tsi cuhun ñi anyaya cahnu nu cayú ñuhú tsihin azufre, nu cuví tsa tsinu uvi tuhun tsihi, nu tatsí tuñi Nyoo añima ña vaha.

Nu nyehé ra Juan nácaa cua cuví ñuu Jerusalén tsa

⁹ Tacan tan tsitsi tsa utsa ángel tsa ndahá coho tsitú tsihin tundoho, quitá iin ra tan natuhvā ra nu nyaá yu tan catyí ra:

—Cohon tsihin yu tan janaha yu nyivi yihí cuenda ra Cristo tsi un, ñi tsa cuví tumaa ñasihi ra Mbee Ticatyi Luhlu —catyí ra tsihin yu.

¹⁰ Tan janahá Tatyí Ii Nyoo tsi yu tyin tsindaca ángel can tsi yu iin yucu sucun tan cahnu. Tan janahá ra ñuu ii, ñuu Jerusalén cahnu can tsi yu. Juvín ñi cuhva tsa vatsí nuu tsi tsa quee tsi andivi nu nyaá Nyoo. ¹¹ Xiñu xaan ñuu can tsihin tsa sii caá Nyoo. Xiñu xaan tumaa iin yuu vaha tan sii caá, tumaa yuu jaspe, tumaa nyehé yo tsa nyaá inga tsiyo tsihin yutyi, tacan caá tsi. ¹² Nii canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsi tsaahnu yo naha ra. ¹³ Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii. ¹⁴ Utsi uvi yuu yihí nu cacu tsaha tsi. Tan nuu yuu can nyecú sivi tsa utsi uvi ra tsa tava tyiñu ra Mbee Ticatyi Luhlu.

¹⁵ Tan ángel tsa cahán tsihin yu, ndahá ra iin metru tsa tsinú tsihin xuhun cuaan, tsihin yacan tyihí cuhva ra ñuu can, tan yuhu cora can tan nanii canduvi cora ñuu can. ¹⁶ Iyó cumi taahan tutun ñuu can. Tan inducu ñi tsa quihin tan tsa cañi tsi. Tan tyihí cuhva ángel can ñuu can tsi-

hin metru xuhun cuaan can. Tan quitá uvi mil uvi cientu kilómetro. Iin ñi cuhva tsa cañi tan tsa sucun tan tsa quihin. ¹⁷ Tacan tan tyihí cuhva ra cora ñuu can. Tan quitá uñi xico cumi metru tsa quihin, tyihí cuhva ra tumaa tyihí cuhva nyivi.

¹⁸ Tsihin yuu jaspe sama cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyi tun ndoó vaha tsi. ¹⁹ Tan tsaha cora can samá tsi tsihin tandihi ñi nuu yuu sii caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda; ²⁰ tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu iin cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndihi ña cuví amatista. ²¹ Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tsihin tsi, tacan caá tsi.

²² Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihi tunyee iñi tsi, tan ra Mbee Ticatyí Luhlu cuví vehe ñuhu ñuu can. ²³ Ña tsiñí ñuhu tsa jandunditsín ñicanyii ñuu can tan ndi tsa jandunditsín yoo. Tyin juvin

ñi maa tsa nditsin Nyoo tan tsa nditsin ra Mbee Ticatyí Luhlu jandunditsín tsitsi ñuu can. ²⁴ Tandihí nyivi tsa cacu ánima, cua caca nuu ñi nu nditsin can. Tan ra cuví rey nu ñuhu ñayivi naha ra cua cundaca ra naha tsa cuca ra naha tan tandihí tsa cahnu cuví ra naha ñuu can. ²⁵ Ña cua cundasi yuhu cora tsa tsinu cahñi, tan ña cua coo tsacuaa ñuu can. ²⁶ Tan tandihí tsa cuca, tan tsa cahnu, tsa iyó nu ñuhu ñayivi cua tsaa tsi ñuu can. ²⁷ Maa tyin ña cua cuví quihvi tsa caquiñi, ndi intuhun nyivi javahá tsa caquiñi, tan ndi ñi vatya. Intuhun ñi maa nyivi iyó sivi nu libru ra Mbee Ticatyí Luhlu cua cuví quihvi, tan cua coo nyito tsihin ra tacan ñi maa.

22

¹ Tacan tan janahá ángel can iin yutya cuii xaan tsi yu. Ndutya tsa tsahá tsa coo nyito yo cuví. Cuii xaan tsi tumaa cuii iin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyí Luhlu. ² Mahñu tsitsi ityi cahnu ñuu can tan nduvi tsiyo xiin yutya can, nyecú yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyivi iyó nu ñuhu ñayivi. ³ Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tsihin ra Mbee Ticatyí

Luhlu. Tan cua jacahnu nyivi yihí cuenda ra tsi ra. ⁴Tan cua nyehe tsihin nuu ñi tsi ra. Tan cua cunyaa sivi ra nutyaan ñi. ⁵Ña cua coo ca tsacuaa ican. Tan nyivi tsa cua coo ican ña tsiñi ñuhu ñuhu candili tsi ñi, ndi ñuhu ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tsihin ra tacan ñi maa.

Nu janahá tsi tyin tsa cuyatin quitsi ra Cristo

⁶Tacan tan catyí ángel can tsihin yu:

—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahan tsihin ra cuví ndusu yuhu ra tahan tsanaha, juvin ra jacuhun ángel ra, tyin janaha ra tsi nyivi jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

⁷—¡Tsa cuyatin quitsi yu! —catyí ra.

¡Sii xaan cuví tsi nyivi tsa javahá cuhva caahan tuhun Nyoo tsa nyaá nu libru ihya!

⁸Yuhu ra Juan, tsiñi yu tan nyehe yu tandihi tuhun ihya. Tsa yaha nyehe yu tan tsiñi yu itsi, tsicuiñi tsi yu tsaha ángel tsa janaha itsi tsi yu, tyin jacahnu yu tsi ra. ⁹Maa tyin catyí ra tsihin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan tandihi ca ra yañi un tsa cuví ndusu yuhu Nyoo, tan tumaa tandihi ca nyivi tyaá yahvi tuhun nyaá nu libru ihya.

Intuhun ñi Nyoo taahan tsi jacahnu yo —catyí ra tsihin yu.

¹⁰Tan catyí tucu ra tsihin yu:

—Ña tyihi xeehe un tuhun Nyoo tsa nyaá nu libru ihya, tyin tsa yatin cuii cundaa tsi. ¹¹Maa tyin jaña ndaha tsi nyivi caquiñi, na javaha maa ñi cuhva cuñi maa ñi. Tan nyivi iyó cuatyí, na coo ca cuatyí ñi. Maa tyin nyivi javahá tsa vaha, na jañihi ca ñi javaha ñi tsa vaha. Tan nyivi tsa jandu ii Nyoo, na cunicun vaha ca ñi tsi ra —catyí ra tsihin yu.

¹²Tan Jutu Mañi yo catyí ra:

—Nyehe ndo. Tsa cuyatin quitsi yu. Tan tyahvi yu tsi intuhun intuhun nyivi tsa cuenda tsa javahá ñi, a javahá ñi tsa vaha o tsa ña vaha. ¹³Yuhu cuví ra jihna ñi, tan yuhu cuví ra cua coo nu cua ndihi quivi, tsa iyó maa yu nda nu quitsaha tandihi tan tacan ñi maa cua coo yu nu cua ndihi tumaa letra A cuví tsi letra jihna ñi tan letra Z cuví tsi letra nu ndihi ña —catyí Jutu Mañi yo.

¹⁴Sii xaan cuví tsi nyivi tsa nacatyá jahma, [ñi janduvahá añima], tyin cua ñihi ñi ndatu catsi ñi tsiti yutun tsa tsahá tsa coo nyito añima yo. Tan cuví quihvi ñi yuhu cora ñuu can. ¹⁵Maa tyin nyivi javahá tsa caquiñi, tumaa ñi tasi, rayii tsa tsicá nuu tsihin ñaha tan ñiñaha tsa tsicá nuu tsihin rayii, tan ñi tsahñi, tan ñi jacahnú tsitoho, tan

tandihí ñi vatya, tan ñi jan-daví ñaha; tandihí maa ñi can, ña cua quihvi ñi tsitsi ñuu can.

¹⁶ Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihí tuhun ihya tsi nyivi tsicá vehe ñuhu. Yuhu cuví nyivi tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

¹⁷ Tatyí li Nyoo tan nyivi yihí cuenda ra, ñi tsa cuví tumaa ñasihí ra Mbee Ticatyi Luhlu, catyí ñi tyehen:

—Ñaha ñi, Jutu Mañi yu —catyí ñi.

Tan nyivi tsa tsiñí tuhun ihya, na catyi ndihí ñi:

—Ñaha.

Tan nyivi na ityi iñi tan tandihí nyivi cuñí quitsi, na quitsi ñi tan coho ñi ndutya tsa tsahá tsa coo nyito añima yo, tan nduve náa cua tyahvi ñi.

¹⁸ Tan tandihí nyooho tsa tsiñí tuhun Nyoo tsa nyaá nu libru ihya, cuñí yu catyi yu tsehe tsihin ndo: Nyivi tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya siqui ñi. ¹⁹ Tan nyivi tsa cua quinyaa juhva tuhun Nyoo tsa nyaá nu libru ihya, Nyoo cua quinyaa ra tsa taahán tsi tsi ñi tsa nyaá nu libru tsa caahán yoo nyivi cua coo nyito, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun. ²⁰ Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuy-
atyin quitsi yu —catyí ra.

Tan yuhu catyí yu:

—Na cuví tsi tacan. Ñaha ñi, Jutu Mañi yu, Jesús —catyí yu.

²¹ Na naquihin tandihí ndo tsa vaha tsa tsahá Jutu Mañi yo Jesucristo tsi yo.

Tan na cuví tsi tacan ñi.